

Holy Bible

Aionian Edition®

भड्लाई बाइबिल

Bhadrawahi Bible

AionianBible.org

The world's first Holy Bible untranslation

100% free to copy and print

also known as “ The Purple Bible ”

Holy Bible Aionian Edition ©

भड्लाई बाड्बिल
Bhadrawahi Bible

CC Attribution ShareAlike 4.0, 2018-2024

Source text: eBible.org

Source version: 7/12/2024

Source copyright: CC Attribution ShareAlike 4.0
The Love Fellowship, 2020

Formatted by Speedata Publisher 4.19.18 (Pro) on 7/19/2024

100% Free to Copy and Print

TOR Anonymously

<https://AionianBible.org>

Published by Nainoia Inc

<https://Nainoia-Inc.signedon.net>

We pray for a modern public domain translation in every language

Report content and format concerns to Nainoia Inc

Volunteer help is welcome and appreciated!

Celebrate Jesus Christ's victory of grace!

Preface

भद्रवाही at AionianBible.org/Preface

The *Holy Bible Aionian Edition* © is the world's first Bible *un-translation*! What is an *un-translation*? Bibles are translated into each of our languages from the original Hebrew, Aramaic, and Koine Greek. Occasionally, the best word translation cannot be found and these words are transliterated letter by letter. Four well known transliterations are *Christ*, *baptism*, *angel*, and *apostle*. The meaning is then preserved more accurately through context and a dictionary. The Aionian Bible un-translates and instead transliterates eleven additional Aionian Glossary words to help us better understand God's love for individuals and all mankind, and the nature of afterlife destinies.

The first three words are *aiōn*, *aiōnios*, and *aiōdios*, typically translated as *eternal* and also *world* or *eon*. The Aionian Bible is named after an alternative spelling of *aiōnios*. Consider that researchers question if *aiōn* and *aiōnios* actually mean *eternal*. Translating *aiōn* as *eternal* in Matthew 28:20 makes no sense, as all agree. The Greek word for *eternal* is *aiōdios*, used in Romans 1:20 about God and in Jude 6 about demon imprisonment. Yet what about *aiōnios* in John 3:16? Certainly we do not question whether salvation is eternal! However, *aiōnios* means something much more wonderful than infinite time! Ancient Greeks used *aiōn* to mean *eon* or *age*. They also used the adjective *aiōnios* to mean *entirety*, such as *complete* or even *consummate*, but never infinite time. Read Dr. Heleen Keizer and Ramelli and Konstan for proofs. So *aiōnios* is the perfect description of God's Word which has *everything* we need for life and godliness! And the *aiōnios* life promised in John 3:16 is not simply a ticket to eternal life in the future, but the invitation through faith to the *consummate* life beginning now!

The next seven words are *Sheol*, *Hadēs*, *Geenna*, *Tartaroō*, *Abyssos*, and *Limnē Pyr*. These words are often translated as *Hell*, the place of eternal punishment. However, *Hell* is ill-defined when compared with the Hebrew and Greek. For example, *Sheol* is the abode of deceased believers and unbelievers and should never be translated as *Hell*. *Hadēs* is a temporary place of punishment, Revelation 20:13-14. *Geenna* is the Valley of Hinnom, Jerusalem's refuse dump, a temporal judgment for sin. *Tartaroō* is a prison for demons, mentioned once in 2 Peter 2:4. *Abyssos* is a temporary prison for the Beast and Satan. Translators are also inconsistent because *Hell* is used by the King James Version 54 times, the New International Version 14 times, and the World English Bible zero times. Finally, *Limnē Pyr* is the Lake of Fire, yet Matthew 25:41 explains that these fires are prepared for the Devil and his angels. So there is reason to review our conclusions about the destinies of redeemed mankind and fallen angels.

The eleventh word, *eleēsē*, reveals the grand conclusion of grace in Romans 11:32. Take the time to understand these eleven words. The original translation is unaltered and a note is added to 64 Old Testament and 200 New Testament verses. To help parallel study and Strong's Concordance use, apocryphal text is removed and most variant verse numbering is mapped to the English standard. We thank our sources at eBible.org, Crosswire.org, unbound.Biola.edu, Bible4u.net, and NHEB.net. The Aionian Bible is copyrighted with creativecommons.org/licenses/by-nd/4.0, allowing 100% freedom to copy and print, if respecting source copyrights. Check the Reader's Guide and read online at AionianBible.org, with Android, and TOR network. Why purple? King Jesus' Word is royal... and purple is the color of royalty!

History

भद्रवाही at AionianBible.org/History

- 04/15/85 - Aionian Bible conceived as B. and J. pray.
- 12/18/13 - Aionian Bible announced as J. and J. pray.
- 06/21/15 - Aionian Bible birthed as G. and J. pray.
- 01/11/16 - AionianBible.org domain registered.
- 06/21/16 - 30 translations available in 12 languages.
- 12/07/16 - Nainoia Inc established as non-profit corporation.
- 01/01/17 - Creative Commons Attribution No Derivatives 4.0 license added.
- 01/16/17 - Aionian Bible Google Play Store App published.
- 07/01/17 - 'The Purple Bible' nickname begins.
- 07/30/17 - 42 translations now available in 22 languages.
- 02/01/18 - Holy Bible Aionian Edition® trademark registered.
- 03/06/18 - Aionian Bibles available in print at Amazon.com.
- 10/20/18 - 70 translations now available in 33 languages.
- 11/17/18 - 104 translations now available in 57 languages.
- 03/24/19 - 135 translations now available in 67 languages.
- 10/28/19 - Aionian Bible nursed as J. and J. pray.
- 10/31/19 - 174 translations now available in 74 languages.
- 02/22/20 - Aionian Bibles available in print at Lulu.com.
- 05/25/20 - Illustrations by Gustave Doré, La Grande Bible de Tours, Felix Just.
- 08/29/20 - Aionian Bibles now available in ePub format.
- 12/01/20 - Right to left and Hindic languages now available in PDF format.
- 03/31/21 - 214 translations now available in 99 languages.
- 11/17/21 - Aionian Bible Branded Leather Bible Covers now available.
- 12/20/21 - Social media presence on Facebook, Twitter, LinkedIn, YouTube, etc.
- 01/01/22 - 216 translations now available in 99 languages.
- 01/09/22 - StudyPack resources for Bible translation study.
- 02/14/22 - Strong's Concordance from Open Scriptures and STEP Bible.
- 02/14/23 - Aionian Bible published on the TOR Network.
- 12/04/23 - Eleēsē added to the Aionian Glossary.
- 02/04/24 - 352 translations now available in 135 languages.
- 05/01/24 - 371 translations now available in 151 languages.

Table of Contents

NEW TESTAMENT

मत्ती	11
मरकुस	35
लूका	54
यूहन्ना	80
प्रेरितों के काम	100
रोमियों	125
1 कुरिन्थियों	136
2 कुरिन्थियों	148
गलातियों	155
इफिसियों	159
फिलिप्पियों	163
कुलुरिसियों	166
1 थिस्सलुनीकियों	169
2 थिस्सलुनीकियों	172
1 तीमुथियुस	174
2 तीमुथियुस	178
तीतुस	181
फिलेमोन	183
इब्रानियों	184
याकूब	193
1 पतरस	196
2 पतरस	200
1 यूहन्ना	203
2 यूहन्ना	206
3 यूहन्ना	207
यहूदा	208
प्रकाशित वाक्य	210

APPENDIX

Reader's Guide


Glossary

Maps

Destiny

Illustrations, Doré

NEW TESTAMENT



यीशु ज़ोवं, “हे बाजी एन माफ़ करां एन न ज़ानन् कि एना कुन लोरेम केरने।”
ते तैनेई तैसेरे लिगडां केरे लेइ पेरची छेडतां शर्त रखवू ते एण्पू मामेई बंटां।
लूका 23:34

मत्ती

1 अब्राहमेरी औलादी मरां दाऊद राज़ो थियो, दाऊद राज़ेरे औलादी मरां यीशु मसीह थियो। यीशु मसीहेरे दादे-पड़दादां केरां नंवां इना आन। 2 अब्राहमेरू मट्टू इसहाक थियूं, इसहाकेरू याकूब, याकूबेरां मट्टां यहूदा ते तैसेरे ढूला थियो। 3 यहूदा ते तामारेरां मट्टां पेरेस ते जेरह थियां, पेरेसेरू मट्टू हेस्रोन्, हेस्रोनेरू एराम, 4 ते एरामेरू अम्मीनादाब, अम्मीनादाबेरू नहशोन, नहशोनेरू सलमोन, 5 ते सलमोन ते तैसेरी कुआन्श राहाबेरू मट्टू बोआज थियूं, ते बोआज ते तैसेरी कुआन्श रूतरू ओबेद, ओबेदेरू यिशै, 6 ते यिशैरू मट्टू दाऊद राज़ो थियो, दाऊद राज़ेरू मट्टू सुलैमान तैस कुआन्शी सेइं पैदा भोव, जै पेइली ऊरिय्याहरी कुआन्श थी। 7 सुलैमानेरू रहबाम, रहबामेरू अबिय्याह, अबिय्याहेरू आसा, 8 ते आसारू यहोशाफात, यहोशाफातेरू योराम, ते योरामेरे खानदानेरे मरां उज्जियाह पैदा भोव। 9 उज्जियाहरू योताम, योतामेरू आहाज, आहाजेरू हिजकिय्याह, 10 ते हिजकिय्याहेरू मनशशे, मनशशेरू आमोन, आमोनेरू मट्टू योशिय्याह थियूं 11 ते योशिय्याहेरां पोद्लड़ां यकुन्याह ते तैसेरे ढूला थियो, जैना गिरफ्तार भोइतां बाबेलेरी गुलैमी मां गानेरे वक्ते मां ज़र्मोरां थियां। 12 गिरफ्तार भोइतां बाबेलेरी गुलैमी मां गानेरे पत्ती यकुन्याहेरू शालतियेल ते शालतियेलेरू जरूबबाबेल, 13 ते जरूबबाबेलेरू अबीहूद, अबीहूदेरू एलयाकीम, एलयाकीमेरू अजोर, 14 ते अजोरेरू सादोक, सादोकेरू अखीम, अखीमेरू एलीहूद 15 ते एलीहूदेरू एलीआजर, एलीआजारेरू मत्तान, मत्तानेरू याकूब, 16 ते याकूबेरू यूसुफ, ते यूसुफ मरियमरो मुन्श थियो, ते मरियमरू मट्टू यीशु आए, जैस जो मसीह ज़ोतन। 17 एन्चरे अब्राहमे करां दाऊद राज़े तगर च़ेवधे पीड़ी भोइ, ते दाऊद राज़े करां यहूदी केरे गिरफ्तार भोइतां बाबेलेरी गुलैमी मां गाने तगर च़ेवधे पीड़ी भोइ, ते गिरफ्तार भोइतां बाबेले मां गाने करां देइतां यीशु मसीह तगर च़ेवधे पीड़ी भोइ। 18 यीशु मसीहेरू ज़र्म एन्चरे सेइं भोवं, कि ज़ैखन तैसेरी अम्मा मरियमरी कुड़माइ यूसुफ नंवे एक्की मैन्हु सेइं भोरी थी, त तैन केरे इला भोने करां पेइले मरियम पवित्र आत्मा रे शेक्ति सेइं दोज्जींती भोइ। 19 तैसरो मुन्श यूसुफ जै धर्मी मैन्हु थियो, तै तैस बदनाम केरनि न थियो चातो। तैनी चुपचारे इन सोचू, कि मीं एस सेइं इला नई बनानो। 20 हेजू ते एन सोचने लोरो थियो, त प्रभुएरे एक्की स्वर्गदूते तैस सेइं सुपने मां एइतां ज़ोवं, “हे यूसुफ! तू जै दाऊदरेरे खानदाने मरां आस, तू मरियम अपनि कुआन्श बनाने करां न डर, किजोकि ज़ैन तैसारे पेटे मां आए तैन पवित्र आत्मा रे तरफां आए। 21 तैस मट्टू भोनूए, ते तू तैसेरू नवं ‘यीशु’ रेखां, किजोकि तैए अपने लोकन तैन केरे पापन करां मुक्ति देलो।” 22 एन सब किछ एल्हेरेलेइ भोवं, कि ज़ैना वचन प्रभुए यशायाह नेबेरे ज़िरिये ज़ोरे थियो पूरे भोए कि, 23 “हेरा, अक अइलाई कुई पेटे भारी भोली, ते तैस अक मट्टू भोलू, ते लोक तैस जो इम्मानुएल ज़ोले” ज़ेसोरो मतलब ई आए, परमेशर असन सेइं साथी आए। 24 तैखन यूसुफ निड्लारां बींझो त तैनी परमेशेरेरे

स्वर्गदूतेरू ज़ोनू मन्नु, ते मरियमी सेइं इला बनाव ते अपने घरे आनी। 25 पन ज़ांतगर तैस मट्टू न भोवं तांतगर तै तैस सेइं साथी न झुल्लो ते ज़ैखन तैस मट्टू भोवं त यूसुफे तैस मट्टेरू नवं यीशु रख्खू।

2 हेरोदेस राज़ेरे ज़माने मां ज़ेइस यहूदिया इलाकेरे बैतलहम नगरे मां यीशु पैदा भोव, त पूर्वरां किछ जोष्टी लोक यरूशलेम नगरे मां आए। 2 ते तैना लोकन पुच्छने लगगे, “यहूदी लोकां केरो राज़ो ज़ै ज़र्मोरोए तै कोइ आए? किजोकि असेईं पूरबे मां तैसेरो तारो लोरोए, ते आस तैस कां मथ्यो टेकने ओरेम।” 3 ज़ैखन हेरोदेस राज़े ए गल शुनी, त हेरोदेस राज़ो ते कने यरूशलेम नगरेरे सारे लोक घबराए। 4 ते हेरोदेस, यहूदी लोकां केरे प्रधान याजक ते शास्त्री लोक अकोट्टे केरतां तैन पुच्छने लगगे, “मसीह कोइ पैदा भोरो लोडे?” 5 तैनेईं तैस सेइं ज़ोवं, “यहूदिया इलाकेरे बैतलहम नगरे मां,” किजोकि (बड़े पेइले) मीका नेबे एन्चरे लिखोरूए, कि परमेशरे ज़ोवं, 6 “हे बैतलहम नगर, तू ज़ैन यहूदिया इलाके मां आस, यहूदियारे इलाकन मां तू बडू खास नगर आस, किजोकि तीं मरां अक एरो हाकिम निसेलो ज़ै मेरे लोक इस्राएलेरी रखवाली केरेलो” 7 ज़ैखन हेरोदेस राज़े एन शुनू, त तैनी जोष्टी चुपचारे कुजेइतां तैन करां तारो निसनेरे ठीक वक्तेरे बारे मां पतो कियो। 8 ते तैनी जोष्टी एन ज़ोइतां बैतलहम नगरे जो भेजे, कि “गाथ, ते तैस बच्चरे बारे मां रोडेचारे पतो केरा ते ज़ैखन तुसन पतो लगगे, त (वापस एइतां) मीं भी पतो देइयथ ताके अवं भी तैस कां गेइतां मथ्यो टेकी।” 9 तैना जोष्टी (हेरोदेस) राज़ेरी गल शुन्तां (यरूशलेम नगरेरां) च़ले जे। ते अकदम तै तारो, ज़ै तैनेईं पूरबे मां लोरो थियो, तैन अग्री-अग्री च़लो ते तैस घरेरे बारुको ज़ैडी तैन मट्टू थियूं। 10 ज़ैखन तैनेईं तै तारो लव, त तैना बड़े खुश भोए। 11 तैखन तैना घरे अन्तर जे ते तैन मट्टू तैसेरी अम्मा मरियमी कां लाव ते तैस मट्टे कां मथ्यो टेकी। तैखन तैनेईं अपने-अपने खज़ानेरे झोले खोलतां सोन्नु, लोबान ते मुर् तैस कां च़ाडू। 12 जोष्टी केरे तैटां निसनेरां पत्ती, तैन सुपने मां ए बिस्तार मैल्लो कि वापस हेरोदेसे कां न गेइयथ। एल्हेरेलेइ तैना वापस कोन्ची होरि बत्तां अपने मुलखे जो च़ले जे। 13 जोष्टी केरे गानेरां पत्ती, अचानक प्रभुएरो अक स्वर्गदूत यूसुफे सुपने मां मैल्लो ते ज़ोने लगगे, “उठ, बच्चो ते तैसेरी अम्मा नेइतां मिस्र मुलखे जो नशश। ते मेरे ज़ोने तगर तैडी रेइयां, किजोकि हेरोदेस राज़ो बच्चे तोप्तां मारने चाते।” 14 यूसुफ निड्लारां उठो ते मट्टू ते तैसेरी अम्मा साथी नेइतां रातो-रात मिस्र मुलखे जो च़लो जेव। 15 हेरोदेसेरे मरने तगर यूसुफ तैडी राव, ताके प्रभुएरू तैन वचन पूरू भोए, ज़ैन होशे नेबे लिखोरू थियूं, “मीं मिस्र मुलखे मरां अपनू मट्टू कुजाव।” 16 ज़ैखन हेरोदेसे जोष्टी केरे धोखे बैजरो पतो लगगे, त तैस बड़ी सरक आई। तैनी अपने मैन्हु भेजतां, ज़ैन गल्लां केरो पतो तैस जोष्टन करां मैल्लोरो थियो, तैनी बैतलहम नगरे ते तैसेरे आसेपासेरे इलाकन मां सिपाही भेजतां सारां मट्टां, ज़ैना दूई सालां केरां या दूई सालन करां निकड़ां थियां मारां। 17 ज़ैखन एन भोव, त तैखन तैन वचन पूरू भोवं, ज़ैन यिर्मयाह नेबे ज़ोरू थियूं। तैनी ज़ोवं, 18 “रामाह नगर मां बड़ि लेरां ते मातमेरि

आवाज़ शुनोई, राहेल अपने बच्चां केरे लेइ लेरां देने लोरी, तैसारो दिल ठंडो न भोए, किजोकि तैसेरे बच्चे मेरि जोरना।” 19 हेरोदेसेरी मौतारां पत्ती, ज़ैखन यूसुफ मिस्र मुलखे मां थियो, त अचानक प्रभुएरो स्वर्गदूत तैस सुपने मां लेइहोव ते तैस सेइं ज़ोने लगी, 20 “उठ, बच्चो ते कने तैसेरी अम्मा साथी नेइतां इस्राएल मुलखे जो वापस चलो गा, किजोकि ज़ैना लोक बच्चे मारने चाते थिये, तैना मेरि जोरने।” 21 फिरी यूसुफ निडलारां बीड़ो, ते बच्चो ते तैसेरी अम्मा साथी एन्तां इस्राएल मुलखे जो वापस अव। 22 पन ज़ैखन यूसुफे एन शुनु कि अरखिलाउस अपने बाजी हेरोदेसेरी ठैरी यहूदिया इलाके पुड़ राज़ केरने लगगोरो, त ते तैडी गाने करां डरो। एल्हेरेलेइ ज़ैखन यूसुफे सुपने मां परमेशेरो बिस्तार मैल्लो, त ते गलील इलाके जो चलो जेव। 23 ते तैडी पुजतां ते नासरत नंवेरे नगर मां राने लगी, ताके तैन वचन पूरू भोए, ज़ैन परमेशेरे अपने नेबी केरे ज़िरिये ज़ोरो थियूं। तैनेई ज़ोवं, “तैस जो नासरी ज़ोले।”

3 तैन दिहाइन मां यूहन्ना नंवेरो मैनु, ज़ै बपतिस्मो देनेबालो थियो, यहूदिया इलाकेरे सुनसान ठैरी मां अव। ते लोकन ज़ैना तैस कां एइते थिये, तैन ई प्रचार केरतो थियो, 2 “अपने पापन करां मनफिराथ, किजोकि स्वर्गेरू राज़ नेइ ओरूए!” 3 ई तैए ज़ेसेरे बारे मां यशायाह नेबे एन ज़ोरू थियूं, “कोई सुनसान ठैरी मां लोकन, ज़ैना तैस कां गातन, तैन उच्ची आवाज़ी सेइं ज़ोले कि ‘तुसन कां प्रभु एजनेबालो आए, एल्हेरेलेइ तैसेरी बत तियार केरा ते कने तैसेरेलेइ सड़कां सिद्धी केरा।’ (यानी, प्रभुएरे लेइ तुस अपने दिल साफ केरा)” 4 यूहन्ना आम लिगड़ां लातो थियो ज़ैना लिगड़ां ऊँटेरे बालन सेइं बनोरां थियां। ते अपनि कमरी पुड़ चमड़ेरू मज़ बंधतो थियो। ते ते टिट्टां त कने जंगलेरू माछी खातो थियो। 5 तैखन यरूशलेम नगरेरे बड़े लोक ते यहूदिया इलाकेरे बड़े लोक ते यरदन दरियारे आसे-पासेरे इलाकन मरां लोक यूहन्नारी गल्लां शुन्नेरे लेइ तैस कां एइते थिये। 6 ते तैनेई अपने पाप मेन्तां यूहन्ना करां यरदन दरियाए मां बपतिस्मो नीयो। 7 पन ज़ैखन तैनी हेरू कि बड़े फरीसी ते सदूकी लोक बपतिस्मो नेनेरे लेइ तैस कां एजने लोरेन, त तैनी तैन सेइं ज़ोवं, “तुस जेहरीले सप्पेरे ज़ेरे बुरे आथ! तुसन केनि ज़ोवं कि, एजनेबाले परमेशेरे कोपे करां नश्शा? 8 सज़ाई करां बचनेरे लेइ तैना कम्मां केरा, ज़ैन सेइं पतो लागे तुसेईं सच्चे पापन करां मन फिरावरोए। 9 ते अपने-अपने दिले मां एन न सोचा कि ‘अब्राहम इश्शो बाजी आए’ (परमेशर तुशे पाप सिर्फ एल्हेरेलेइ माफ़ न केरेलो कि तुस अब्राहमेरी औलाद आथ), किजोकि अवं तुसन सेइं ज़ोताई कि परमेशर इन घोड़न मरां भी अब्राहमेरे लेइ औलाद पैदा केरि सकते। 10 ते हुन्ना त बुट्टां केरे ज़ीलन पुड़ परमेशेरो मैक्कु रख्खोरोए, एल्हेरेलेइ ज़ै कोई तैस बुटेरो ज़ेरो भोते, ज़ै रोड़ो फल न दे, ते कटनोए ते अग्गी मां छड़नोए। 11 अवं त तुसन पैनी सेइं बपतिस्मो देताई किजोकि तुसेईं मनफिरोरोए, पन मसीह ज़ै मेरे बाद एजनेबालोए, ते मीं केरां भी महान आए। अवं त तैसेरो गुलाम भोनेरे काबल भी नई कि तैसेरे बूट छुई। ते तुसन पवित्र आत्माई सेइं ते अग्गी सेइं बपतिस्मो देलो (ज़ैना मन फिरान, तैनन)। 12

तैसेरू छज्ज तैसेरे हथ्थे मां आए ते ते खलाइ रोड़ेघारे साफ केरेलो, ते गेहुं अपने कोठारे मां रखेलो, पन झाड़ी तैस अग्गी मां फुकेलो ज़ै कथे न हिश्शो। (एल्हेरेलेइ पापन करां मनफिराथ नई त परमेशर तुसन सज़ा देलो)” 13 तैस मौके यीशु गलील इलाके मरां यरदन दरियारे बन्ने पुड़ यूहन्ना कां अव, ताके तैस करां बपतिस्मो ने। 14 पन यूहन्ना, यीशु जो इन ज़ोइतां रोकेने लगी, “मीं तीं करां बपतिस्मो नीयोरो लोइते, फिरी किजो तू मीं करां बपतिस्मो नेने ओरोस?” 15 पन यीशुए तैस ई जुवाब दित्तो, “हुनी तू एन्चरे भोने दे, किजोकि एन्चरे केरतां अस तैन केरतम ज़ैन परमेशर चाते।” तैखन यूहन्ना तैसेरी गल मनी। 16 ते यीशु ज़ैखन बपतिस्मो नेइतां पैनी मरां बेइर अव, त तैस मौके हेरा अम्बर खुल्ली ज़ोवं। ते तैनी पवित्र आत्मा कबूतेरी शकली मां एप्पू पुड़ एइती लाई। 17 ते तैखन हेरा अम्बरे मरां ए आवाज़ आई (ते यीशुएरे बारे मां ज़ोवं), “एन मेरू ट्लारू मट्टू, अवं एस पुड़ बड़ो खुश आई।”

4 तैल्ला पत्ती, पवित्र आत्मा यीशु सुनसान ठैरी मां नीयो, ताके शैतान तैसेरी अज़मैइश केरे। 2 40 दिहाड़े ते 40 रातन किछ न खानेरां पत्ती तैस ढलुख लगगी। 3 त तैखन शैताने ज़ैस जो अज़माने बालो भी ज़ोतन, तैस कां एइतां ज़ोवं, “अगर तू परमेशेरेरू मट्टू आस, त इन घोड़न जो हुक्म देइतां साबत केर, कि एना रोटी बनन ताके तू खेइ सकस।” 4 यीशुए तैस जुवाब दित्तो, “अवं न केरेलो किजोकि परमेशेरी किताबी मां लिखोरूए, ‘मैनु सिर्फ रोटेइं सेइं ज़ीतो न राए, बल्के ते हर गल मन्ने सेइं ज़ीतो राते, ज़ै परमेशर ज़ोते।” 5 फिरी शैताने ते पवित्र नगर यरूशलेमे मां नीयो ते मन्देरी उच्ची छम्पी पुड़ नेइतां खड़ो कियो। 6 तैखन तैनी यीशु सेइं ज़ोवं, “अगर तू हकीक्ति मां परमेशेरेरू मट्टू आस त इट्टां बिछड़तां साबत केर, किजोकि पवित्रशास्त्रे मां लिखोरूए, ‘ते तेरे लेइ अपने स्वर्गदूतन हुक्म देलो, ते तैना तीं अपने हथ्थन मां टलाले, ताके तेरे पावन केन्वी घोड़न सेइं ठोकर न लगगे।” 7 यीशुए तैस सेइं ज़ोवं, “(नई, अवं छाल न मारेलो, किजोकि) परमेशेरी किताबी मां एन भी लिखोरूए, ‘तू प्रभु अपने परमेशेरे अज़मैइतां इन साबत केरनेरी कोशिश न केर कि ते अपने वादे पूरे केरते या नई।” 8 तैखन शैताने, यीशु एक्की बड़े उच्चे पहाड़े पुड़ नीयो, ते तैडी दुनियारां सारां राज़ां ते तैन केरि धन दौलत तैस हिराई। 9 तैखन तैनी यीशु सेइं ज़ोवं, “अगर तू मीं कां मथ्यो टेकस ते मेरी आराधना केरस, त अवं इन सब किछ तीं देलो।” 10 यीशुए तैस जो ज़ोवं, “हे शैतान! दूर भो, किजोकि परमेशेरी किताबी मां लिखोरूए, ‘तू सिर्फ प्रभु अपने परमेशेरे कां मथ्यो टेक ते तैसेरी आराधना केर।” 11 तैखन शैतान तैस करां चलो जेव, ते अकदम किछ स्वर्गदूत यीशु कां एइतां तैसेरी सेवा केरने लगगे। 12 एक्सां केन्चे यीशु जो ज़ोवं, कि यूहन्ना ज़ै बपतिस्मो देनेबालो थियो, कैद कियोरोए त यीशु यहूदिया इलाकेरां, गलील इलाके मां वापस अव। 13 ते नासरत नगर शैरां काफरनहूम नगरे मां राने लगी, ज़ैन समुन्दरेरे बन्ने पुड़ आए, ज़ैडी जबूलन ते कने नप्टाली गोट्लेरे लोक राते थिये। 14 ताके तैन वचन ज़ैन यशायाह नेबे ज़ोरू थियूं पूरू भोए, तैनी ज़ोवं, 15 “ज़ैना लोक

जबूलून ते नपताली गोत्रां केरे इलाके मां आन, जैना गलील समुन्दरे नेडे यरदन दरियारे उस पार, गलील इलाके मां आन, जैदी गैर यहूदी लोक भी रातन, 16 (तैना लोक) जैना पापेरे आंधरे मां बिशशोरेन, तैनेई बड्डी लौ लई। तै लौ तैन पुड़ चमकी जैना हमेशारे मौतारे आंधरेरे मुलखे मां बिशशोरेन।” 17 तेइसेरू देतू यीशुए परमेशेरी खबर लोकन शुनानेरी सेवा शुरू की। तैनी लोकन ज़ोवं, “अपने पापन करां मनफिराथ, किजोकि स्वर्गरू राज़ नेडे ओरूए।” 18 एकसां ज़ैखन यीशु गलील समुन्दरेर बन्ने च़ल्लोरो थियो, त तैनी दूई मैन्हु लाए जैना मेछली ट़लानेबाले थियो। तैना मेछली ट़लानेरे लेइ समुन्दरे मां ज़ाल छेड्डी राओरे थियो। तैन मरां एककेरू नवं शमोन, ज़ैस जो पतरस भी ज़ोतन, ते तैसेरो ढ़ला ज़ेसेरू नवं अन्द्रियास थियूं। 19 यीशुए तैन सेइं ज़ोवं, “एज्जा मेरे चले बना। अवं तुसन शिखालेलो कि केन्च़रां होरे मैन्हु मेरे चले बनानेन।” 20 तैना अकदम अपना ज़ालां छेडतां यीशु पत्ती च़ले जे। 21 ते तैना तैट्टां थोडे ज़ेरे अगगर जे, त यीशुए होरे दूई ढ़ला, यानी याकूब त कने तैसेरो ढ़ला यूहन्ना अपने बाजी जब्दी सेइं साथी किशती मां लाए। तैना किशती मां ज़ालां ठीक केरने लगोरे थियो। यीशुए तैना भी कुजाए (कि तैना तैसेरे चले बनन)। 22 ते तैना भी तैखने किशती ते अपने बाजी तैडी ज़ेरे छेडतां यीशु सेइं साथी च़ले जे। 23 तैल्ला पत्ती, यीशु सारे गलील इलाके मां हंठतो फिरतो राव। तै तैन केरे प्रार्थना घरन मां लोकन शिक्षा देतो राव ते परमेशेरेरे राज़ेरी खुशखबरी शुनातो राव। ते तै लोकां केरि हर किसमेरी बिमैरी ते कमजोरी दूर केरतो राव। 24 यीशुएरे बारे मां ई खबर सारे सीरिया इलाके मां मशूर भोइ जेई। एसेरे वजाई सेइं, ज़ैदी कोन्ची तै जेव, तैडी लोक सेबन्नी बिमारन ज़ैना हर किसमेरी बिमैरी ते तकलीफन मां फसोरे थियो, ते ज़ैन लोकन पुड़ भूतां केरो सायो थियो, ते ज़ैना मिरगरे रोगी थियो, ते ज़ैना अधरंगेरे रोगी थियो, तैना यीशु कां आने ते यीशुए तैना सारे बज्ज़ाए। 25 एसेरे वजाई सेइं मैन्हु केरि बडी भीड़ यीशु पत्ती च़ली। तैना लोक गलील, दिकापुलिस इलाकां केरे, यरूशलेम नगररे, यहूदिया इलाकेरे, ते यरदन दरियारे पैरीं पारेरे इलाकां केरां ओरे थियो।

5 यीशु तैना हछे लोक लेइतां एककी पहेडी पुड़ च़लो जेव, ते ज़ैखन तै शिखालनेरे लेइ बिशशो त तैसेरे चले तैस कां आए। 2 तैखन यीशु तैन लोकन शिक्षा देने लगो, 3 “परमेशर तैन लोकन बरकत देते, ज़ैना ज़ानतन कि तैन परमेशेरी ज़रूते, किजोकि तै तैन पुड़ राज़ केरेलो। 4 परमेशर तैन लोकन बरकत देते, ज़ैना दुखी आन, किजोकि परमेशर तैन तत्सली देलो। 5 परमेशर तैन लोकन बरकत देते ज़ैना नम्र आन, किजोकि परमेशर तैन, तैना सैरी बरकतां देलो ज़ैन केरो तैनी वादो कियोरोए। 6 परमेशर तैन लोकन बरकत देते, ज़ैना परमेशेरी नज़री मां रोडी गल्लां केरनेरी बडी इच्छा रखतन, (जेन्च़रे कोई ढ़लुखोरो खाने पीनेरी इच्छा रखते) तैन परमेशर अपनि मेर्जी पुड़ च़लनेरे लेइ शक्ति देते। 7 परमेशर तैन लोकन बरकत देते, ज़ैना दया केरतन, किजोकि परमेशर भी तैन पुड़ दया केरेलो। 8 परमेशर तैन लोकन बरकत देते, ज़ैन केरे मन साफ आन, किजोकि तैन परमेशर दर्शन देलो। 9 परमेशर तैन लोकन

बरकत देते, ज़ैना शैनतरां कम्मां केरतन, किजोकि तैन जो परमेशेरे बच्चे ज़ोले। 10 परमेशर तैन लोकन बरकत देते, ज़ैना परमेशेरी नज़री मां रोडि गल्लां केरनेरे वजाई सेइं सताए गातन, किजोकि परमेशर तैन पुड़ राज़ केरते।” 11 “परमेशर तुसन बरकत देलो, ज़ैखन लोक तुसन मेरे चेलो भोनेरे वाजाई सेइं तुशुशी तुहीन केरन ते स्तान ते झूठ जोइतां हर किसमेरी बुरी गल्लां तुशुशे बारे मां ज़ोन। 12 तैखन तुस खुशी रेइयथ ते मघन भोइयथ, किजोकि परमेशेरे ज़ैन इनाम स्वर्ग मां तुशुशे लेइ रखेरूए तैन बडू बडूए, किजोकि लोकेई बडे पेइले तैना नबी भी एन्च़रे सतोर थियो।” 13 “तुस इस दुनियारे लोकां केरे लेइ लूनेरे ज़ेरे आथ, पन अगार लूनेरो स्वाद च़ेलि गाए, त फिरी दुबारां केन्च़रे तैसेरो स्वाद वापस आनेले? फिरी तैन कोन्ची कम्मरू न राए, सुवाए बेइरोवं शारनेरां ते लोकां केरे पावेइं सेइं ढ़लेन्च़ेनेरां।” 14 “तुस इस दुनियारे लोकां केरे लेइ लोअरे ज़ेरे आथ। ज़ैन नगर पहाडे पुड़ बसते तैन कथे भी छेप्पी न सके। 15 लोक बलतो दीयो हेटी मां न रखन, पन तैस उच्ची ठैरी रखतन ताके घरेरे सैरी मैन्नु लौ पुज्जे। 16 ते एन्च़रे तुशुशी लौ मैन्हु केरे सामने एरी चमके, ताके तैना तुशुशां रोडां कम्मां हेरतां तुशुशे स्वर्गेरे बाजेरी तारीफ़ केरन।” 17 “एन न बुझथ कि अवं मूसोरो कानून या नेबी केरे किताबन मां लिखोरी गल्लां रद केरने ओरोई। अवं तैन रद केरने नई बल्के पूरी केरने ओरोई। 18 किजोकि अवं तुसन सेइं सच़ जोताई, कि ज़ां तगर धरती त अम्बर खतम न भोए, तांतगर परमेशेरे कानूने मरां अक मात्रा या बिंदी भी न टलेली, ज़ां तगर सब किछ लिखोरू पूरू न भोए। 19 एल्हेरेलेइ ज़ै कोई इन निकडे करां निकडे हुकमन मरां केन्ची एक्की ज़ेरे ट़लोइते ते होरन भी एन्ने केरनू शिखालते, ते स्वर्गेरे राज़े मां सेबन्न करां निकडो भोलो, पन ज़ै तैन हुकमन पुड़ अमल केरते ते होरन भी एन हुकमन पुड़ च़लनेरे बारे मां शिखालते त तै स्वर्गेरे राज़े मां बड्डो भोलो। 20 किजोकि अवं तुसन सेइं जोताई कि ज़ां तगर तुस शास्त्री ते फरीसी लोकन करां रोडे च़ारे कानूने न मन्नेले, तांतगर तुस स्वर्गेरे राज़े मां दाखल न भोइ सकतथ।” 21 “तुसेईं शुनेरू थियूं कि परमेशेरे इश्शे दादे-पडदादन सेइं ज़ोरू थियूं, ‘खून नई केरनो, ते ज़ै खून केरेलो त तैस आदालत सज़ा देली।’ 22 पन मेरू ज़ोनू एने कि ज़ै कोई अपने ढ़लाए पुड़ क्रोध केरते, परमेशर तैसेरो इन्साफ़ केरेलो, ते ज़ै कोई अपने ढ़लाए जो निकम्मो ज़ोते त तैस भी महासभा मां जुवाब देनो पेनोए, ते ज़ै कोई अपने ढ़लाए जो ‘बेवकूफ़’ ज़ोलो त परमेशर तैस नरकेरे अगारी सज़ा देलो। (Geenna g1067) 23 एल्हेरेलेइ अगार तू अपनि च़ढतल मन्दरे मां आनस, ते तैडी तीं याद एज्जे कि मीं अपने ढ़लाए सेइं किछ गिलोए। 24 त तू अपनि च़ढतल बलिदान चाढ़नेरे ठैरी पुड़ छेडतां पेइले अपने ढ़लाए सेइं मेल-मलाप केरां, फिरी अपनि च़ढतल च़ैढां। 25 अगार कोई मैन्हु तीं पुड़ दाओ केरतां तीं आदालती मां नेनो चाते, त तू बत्तां तैस सेइं मेल-मिलाप केरां न त तैनी तू हाकिमे कां खडी केरनोस, ते तैनी तू सिपैहीएरे हवाले केरनोस ते सिपैहीए तू कैद केरतां छडनोस। 26 अवं तुसन सेइं सच़ जोताई कि ज़ां तगर तू पाई-पाई न देलो त तांतगर तैट्टां

छुट्टी न सकेलो।” 27 “तुसेई शुनेरु थियूं, कि ई हुकम दित्तोरो थियो, ‘बदमाशी नई केरनि।’ 28 पन अव तुसन इन भी ज़ोताई कि ज़ै कोई केन्ची कुआन्शी पुड़ गेन्दी नज़रां सेइं तकते, तैनी अपने दिले मां पेड़ली तैस सेइं बदमाशी केरि छुट्टी। 29 अगर तेरी देइनी अछ तौ पाप केरनेरे लेइ ठोकर खुवाए, त तैस केदतां शार, किजोकि तेरी पूरी जान नरके मां छुट्टे गाने करां तेरे लेइ एन्ने रोडूए कि तेरी जानी मरां अक अंग नाश भोए (Geenna g1067) 30 अगर तेरो देइनी हथ तीं पाप केरनेरे लेइ ठोकर खुवाए त तैस केदतां शार, किजोकि तेरी पूरी जान नरकेरी अग्गी मां गाने करां तेरे लेइ एन्ने रोडूए कि तेरी जानी मरां अक अंग नाश भोए।” (Geenna g1067) 31 “एन भी ज़ोरु थियूं, ‘ज़ै कोई अपनि कुआन्शा शारे त एन ज़रूए कि फारख्ती लिखतां हावाले केरे।’ 32 पन अव तुसन सेइं ज़ोताई, कि ज़ै कोई अपने कुआन्शी बदमैशरे अलावा होरि केन्ची गल्ली पुड़ फारख्ती दे, त तैस केरां बदमैशी केरवाते। ते ज़ै कोई तैस शोरोरी कुआन्शी सेइं ड़ला बनाते, त तै भी तैस सेइं बदमाशी केरते।” 33 “तुसेई शुनोरु, कि ई हुकम दित्तोरो थियो, ‘झूठी कसम नई केरनि, पन कसम प्रभुएरे लेइ पूरी केरथा।’ 34 पन अव तुसन सेइं ज़ोताई कि कथे कसम न केरथ, न स्वर्गरी, किजोकि ते परमेशरोरो तखत आए। 35 न ज़मीनारी किजोकि परमेशर तैड़ी पाव रखते, ते न यरूशलेम नगरेरी किजोकि तैन महा राजां केरु नगर आए। 36 ते न अपने दोगेरी कसम केरथ, किजोकि तुस अपनो अक बाल भी छित्तो या कालो न केरि सकतथ। 37 पन हांएरी ठैरी हाँ ते नाएरी ठैरी न ज़ोथ, किजोकि ज़ैन किछ एस करां जादे तैन बुरैई यानी शैतानेरे पासेरां आए।” 38 “तुसेई शुनोरुए, कि मूसेरे कानूने मां लिखोरुए, कि अछछरे बदले अछ ते दंतरे बदले दंत। 39 पन अव तुसन सेइं ज़ोताई कि, बुरे मैन्हु करां बदलो न नेइयथ। अगर कोई तेरे देइनी खैखोड़ी पुड़ थप्पड़ बालो त तू बाएं पासो भी तैसेरे पासे रेख्खां। 40 ते अगर कोई मुकदमो केरतां तेरी कमीज़ नेनी चाए त तू कोट भी तैसेरे हवाले केरां। 41 ते अगर कोई सिपाई तीं भारो छूने अक मील नेने चाए त तू दूई मील गेइयां। 42 ज़ै कोई तीं करां किछ मग्गे, तैस दे। ते ज़ै कोई तीं करां ओधार मग्गे त तुत्तर न फिरेइयां।” 43 “तुसेई शुनोरुए, कि मूसेरे कानूने मां लिखोरुए, कि ‘अपने पड़ोसी सेइं अपनो ज़ेरो प्यार केरथ ते दुश्मने सेइं बैर रेखथ।’ 44 पन अव तुसन सेइं ज़ोताई, कि अपने दुश्मन सेइं प्यार केरा, ते ज़ैना तुसन सतातन तैन केरे लेइ प्रार्थना केरा। 45 ज़ैस सेइं तुस अपने स्वर्गेरी बाजी केरे बच्चे बेनि सकतथ, ज़ै अपनो दिहाड़ो अपने रोड़े लोकन पुड़ चमकाते ते बुरे लोकन पुड़ भी, ते धेर्मी लोकन पुड़ झड़ि देते ते बुरे लोकन पुड़ भी। 46 किजोकि अगर तुस तैन्ने लोकन सेइं प्यार केरथ ज़ैना तुसन सेइं प्यार केरतन त तुसन कुन इनाम मैलेलू? कुन चुंगी धिन्ने बाले भी एन्ने न केरन?” 47 “ते अगर तुस सिर्फ अपने दलान जो नमस्कार ज़ोथ, त तुस होरन करां जादे कुन केरतथ? कुन गैर कौमां केरे लोक ज़ैना परमेशरेरे कानूने न मनन् तैना भी एरु न केरन? 48 तुसन तैन लोकन सेइं प्यार

केरनेरी ज़रूरत आए, ज़ैना तुसन सेइं प्यार न केरन, एन्चरां तुस सिद्ध भोले ज़ेन्चरे स्वर्गं मां रानेबालो तुशशो बाजी सिद्ध आए।”

6 “खबरदार, तुस अपने रोड़ां कम्मां सिर्फ लोकन हिरानेरे लेइ न केरा, नई त तुशशो स्वर्गेरो बाजी तुसन कोई इनाम न देलो। 2 एल्हेरेलेइ ज़ैखन तू गरीब मैन्हु दान देस, त तू दुंदुरो न बजेइयां, ज़ेन्चरे पाखंडी लोक प्रार्थना घरन मां ते गेल्लन मां केरतन, ताके लोक तैन केरि तारीफ़ केरन। अव तुसन सेइं सच ज़ोताई कि ज़ैन इनाम तैन मैलनू थियूं, तैन सिर्फ इन्ने, कि लोकेई तैन केरि तारीफ़ की (परमेशरे करां तैनन् कोई इनाम न मैलेलो)। 3 पन ज़ैखन तू गरीब मैन्हु दान देस, त केन्ची पतो न लोड़े लग्गोरो कि तीं कुन दित्तू। 4 ताके तेरु दान छप्पोरु भोए, तैखन तेरो बाजी ज़ै छेपतां तकते, तीं इनाम देलो।” 5 “ज़ैखन तू प्रार्थना केरस त पाखंडी लोकां केरो ज़ेरो न बेना, ज़ैना प्रार्थना घरन मां ते सड़कां केरे मोड़न पुड़ खेड़ोइतां प्रार्थना केरनि सुखातन, ताके लोक तैन तक्कन ते तैन केरि तारीफ़ केरन। अव तुसन सेइं ज़ोताई कि ज़ैन इनाम तैनन् मैल्लोरु लोड़तू थियूं, तैन सिर्फ इन्ने, कि लोकेई तैन केरि तारीफ़ की (परमेशरे करां तैनन् कोई इनाम न मैलेलू)। 6 पन ज़ैखन तू प्रार्थना केरस त अकैल्लो अपने कमरेरो अन्तर गा, ते दार बंद केरतां अपने परमेशरे कां ज़ै लेइहोए न तैस कां प्रार्थना केरा। तैखन तुशशो बाजी परमेशर ज़ै लेइहोए न, ज़ै हर वक्त तीं तकतो राते तै तीं इनाम देलो। 7 प्रार्थना केरते बार, गैर कौमां केरु ज़ेरु बकबक न केरां, किजोकि तैना समझतन कि तैन केरे बकबक केरने सेइं तैन केरि प्रार्थना शुनी गाली। 8 तैन केरे ज़ेरे न बना, किजोकि तुशशो बाजी तुशशे मगने करां पेड़ले तुशशी ज़रूरतां ज़ानते।” 9 “एल्हेरेलेइ तुस एन्चरे प्रार्थना केरा, हे इश्शे बाजी, तू ज़ै स्वर्गं मां आस, लोक तेरी आदर केरन किजोकि तू पवित्र परमेशर आस। 10 तू सेब्भी लोकन पुड़ ते चीज़न पुड़ राज़ केरस। तेरी मर्ज़ी ज़ेन्चरे स्वर्गं मां पूरी भोचे, इस धेरती पुड़ भी भोए। 11 इश्शी रोजेरी रोटी अज़ असन दे। 12 ते ज़ेन्चरे अस ज़ैना इश्शे खलाफ़ बुराई केरतन, तैन माफ़ केरतम, तेन्चरे तू भी इश्शी बुरैई माफ़ केर। 13 अज़मैइशरे ज़िरिये असन पाप केरने न दे, पन बुरैई यानी शैताने करां बचेइयां, (किजोकि राज़, शक्ति ते महिमा हमेशा तेरी भोती राए। आमीन।)” 14 “एल्हेरेलेइ अगर तुस लोकां केरे पाप माफ़ केरेले, त तुशशो स्वर्गेरो बाजी भी तुशशे पाप माफ़ केरेलो। 15 ते अगर तुस लोकां केरे पाप माफ़ न केरेले, त तुशशो स्वर्गेरो बाजी भी तुशशे पाप माफ़ न केरेलो।” 16 “ज़ैखन तुस बरत रखत, त पाखंडी लोकां केरु ज़ेरु अपनू तुत्तर न बगैइथ। तैना अपनू तुत्तर बिगाइतन, ताके लोकन पतो लग्गे कि एनेई अज़ बरत रखोरुए ते तैन केरि तारीफ़ केरन। अव तुसन सेइं सच ज़ोताई कि ज़ैन इनाम तैन मैलनू थियूं तैन मैल्ली जेव। 17 बल्के ज़ैखन तू बरत रखस त अपनू तुत्तर धोइयां ते दोग्गे तेल मेल्लां। 18 ताके लोक नई, पन तेरो स्वर्गेरो बाजी, ज़ै लेइहोतोए न तै लाए कि तीं बरत रखोरुए तै तीं इनाम देलो।” 19 “एप्पू जेई धरती पुड़ दौलत अकोट्टी न केरा, ज़ैड़ी कीड़े खातन ते मौरचो लेगतां नाश केरते, ते चोर तुशशु घर टलोइतां

चोरी केरतन। 20 बल्के रोडू केरतां अपने लेइ स्वर्गे मां दौलत अकोट्टी केरा ज़ैडी न कीड़ी लगगे, ते न मोरचो लगगे ते न चोर चोरी केरेले। 21 किजोकि ज़ैडी तेरी दौलत भोली, तैडी तेरो दिल भी लगगेलो।” 22 “अछ जानेरे लेइ दीयेरी ज़ेरि आए, एल्हेरेलेइ अगर तेरी अछ रोडी साफ आए, त तेरी सारी जान लौ भोली। 23 अगर तेरी अछ खराब आए, त सारी जानी मां आंधरू भोलू। बस अगर ज़ै लौ तीं मां आए तै आंधरू बेनि गाए, त तैन केत्रू आंधरू भोलू!” 24 “कोई मैन्हु दूई मालिकां केरि सेवा एककी वक्ते मां न केरि सके। न त एककी सेइं दुश्मनी केरेलो ते होरि सेइं प्यार केरेलो, या एककेरो बेनतां रालो त होरि न सुखालो। तुस परमेशेरी ते दौलतरी, दुइयां केरि सेवा न केरि सकतथ। 25 एल्हेरेलेइ अवं तुसन सेइं जोताई, कि तुस अपने ज़िन्दगरी ज़रूरतां केरे लेइ फिक्क न केरा, कि तुस कुन खाले या कुन पीले, ते न अपने जानारी कि कुन लामेले। कुन प्राण रोटी करां ते जान लिगड़े करां बेधतां नई!” 26 “अम्बरेरे चुडील्लन हेरा! तैना न किछ बेन, ते न किछ कट्टन, ते न अकोट्टे केरतां रखन, फिरी भी तुश्शो स्वर्गो बाजी तैन खाने जो देते ते तैन केरि हेरगेश केरते। कुन तुश्शी कदर तैन करां जादे नई? 27 तुसन मां एरो कौन आए, ज़ै फिक्क केरतां अपनि उमर अक घडी भी बधैई सकते?” 28 “ते लिगड़ेरे लेइ किजो फिक्क केरतथ? जंगले मां सोसनेरां फूड हेरा कि तैना केन्चरे बेडोतन, न तैना मेहनत केरन, ते न तैना लिगड़ां बनान। 29 फिर भी अवं तुसन सेइं जोताई कि राज़ो सुलैमाने भी अपने सारे धन दौलतरे बावजूद भी तैन केरां ज़ेरां लिगड़ां न लां। 30 एल्हेरेलेइ ज़ैखन परमेशर मैइदानेरो घास, ज़ै अज़ आए ते कालां लौवेनां मां फुकनोए, एरी खूबसूरती देते, त हे घट विश्वासे बाले लोकव, कुन तै तुसन लिगड़ न देलो? 31 एल्हेरेलेइ तुस फिक्क केरतां एन न जोइयथ, कि ‘कुन खामेले, या कुन पीमेले, या कुन लामेले?’ 32 किजोकि गैर कौमां एन गल्लां केरि फिक्की मां रेइचन। ते तुश्शो स्वर्गो बाजी ज़ानते, कि तुसन कोनां-कोनां चीज़ां केरि ज़रूरत आए। एल्हेरेलेइ तुस कोन्ची चीज़री फिक्क न केरा। 33 पन पेइले तुस अपने आपे परमेशेरेरे राज़ेरे लेइ अर्पण केरा, ते तैन कम केरा ज़ैन परमेशेरी नज़री मां रोडू भोते, त इना सैरी चीज़ां भी तुसन मैल्ली गैली। 34 एल्हेरेलेइ कालेरे बारे मां फिक्क न केरथ, किजोकि कालेरी दिहाड़ी अपने लेइ एप्पू फिक्क आनेली। अज़ेरे लेइ अज़ेरो दुख सुद्धोए।”

7 “केन्ची पुड़ दोष न लेइयथ, तुसन भी दोष न लगगेलो। 2 किजोकि ज़ेन्चरे तुस होरि पुड़ दोष लाएले, तेन्चरे परमेशर भी तुश्शो इन्साफ केरेलो। ज़ेन्चरे तुस होरि लोकन सेइं बर्ताव केरतथ, तेन्चरे परमेशर तुसन सेइं बर्ताव केरेलो।” 3 “तू अपने दूलाएरी एछड़ी मां कूडो किजो तकतां, पन तेरी एछड़ी मां त नग आए, ते तैसेरो तू खियाल भी न केरस? 4 जद तेरी एछड़ी मां नग आए, त तू कौस ऐशी सेइं अपने दूलाए जो जोई सकतां कि, ‘एई, अवं तेरी एछड़ी मरां कूडो केट्टी!’ 5 हे पाखंडी! पेइले अपने एछड़ी मरां नग कढ, ते फिरी अपने दूलाएरी एछड़ी मरां रोडे च़ारे तेकतां कूडो केट्टी सकतस।” 6 “जैना लोक परमेशेरे वचन शन्नू न चान, तैन न शुनाथ। अगर तुस एन्चरे केरेले, त पवित्र चीज़ कुतरन कां

छडनेरे बराबर ते कने मोती सूरन कां छडनेरे बराबर भोले, कि तैना तैन पव्वन हैठ ड़लन्चन ते बेदलोइतां तुसन पुड़ हमलो केरेलो।” 7 “परमेशेरे करां मग्गा, त तुसन दित्तू गालू। ते तोप्पा, त तुसन मैल्ली गालू। ते दार गुडकाथ, त तुश्शो लेइ खोल्लू गालू। 8 किजोकि ज़ै कोई मगते तै हासिल केरते, ते ज़ै कोई तोपते तैस मैल्ली गाते, ते ज़ै कोई दार गुडकाते त तैसेरेलेइ खोल्लू गालू। 9 तुसन मां एरो कौन आए, कि अगर तैसेरू मट्टू रोटी मग्गे, त तै तैस घोड़ दे? 10 या अगर मछली मग्गे, त तैस सप दे? 11 ते तुस बुरे भोनेरे बावजूद भी अपने मट्टन रोडी चीज़ां देनी ज़ानतथ, त तुश्शो स्वर्गो बाजी तुसन रोडी चीज़ां कि न देलो, ज़ैना तैस करां मगतन? 12 ज़ेरू तुस चातथ कि लोक तुसन सेइं केरन, तुस भी तैन सेइं तेरहु केरा, किजोकि मूसेरे कानूनेरी त कने नेबी केरि लिखोरी शिक्षा ईए आए।” 13 “तुस परमेशेरे राज़े मां सिर्फ सुन्कड़े दारेरां बत्तां गेइ सकतथ। किजोकि तैन दार चौडू, ते तै बत बड़ी खुल्ली आए ज़ै नाशेरे पासे गाचे, ते तैस बत्तां गानेबाले बड़े आन। 14 किजोकि तैन दार सौंकडू आए, ते तै बत असुखती आए, ज़ै हमेशेरे ज़िन्दगरे पासे गाचे, ते तेरहां गानेबाले थोड़े आन।” 15 “झूठे नेबन करां खबरदार रेइयथ, ज़ैना तुसन कां भैट्टां केरे रूपे मां एइतन पन असली मां तैना मारने बालां गिदां भोतन। 16 तुस तैन केरे कम्मन सेइं तैन पिशानेले, कुन लोक ड़ल्लन सैहीयेरां दाछ कढतन ते केरेरी सैहीयेरां फैगू ट़लोइतन? 17 एल्हेरेलेइ हर एककी रोडे बुट्टे रोडो फल लगते, ते हर एककी बुरे बुट्टे बुरो फल लगते। 18 रोडे बुट्टे बुरो फल न लगगे, ते न बुरे बुट्टे रोडो फल लगगे। 19 ते ज़ैस बुट्टे रोडो फल न लगगे तै केटतां अग्गी मां फुकतां छडतन, तेन्चरे झूठे नेबन भी सज़ा मैलेली। 20 बरसा, तुस तैन केरे कम्मन सेइं तैन पिशानेले।” 21 “मींजो, ‘हे प्रभु, हे प्रभु,’ जोनेबाले सारे मैन्हु स्वर्गे राज़े मां दाखल न भोले, पन ज़ै, मेरे स्वर्गे बाजी केरे मेरज़ी पुड़ चलने बालोए तै ज़रूर दाखल भोले। 22 इन्साफेरे दिहाड़ी बड़े लोक मीं सेइं जोले कि, ‘हे प्रभु, हे प्रभु,’ कुन असेईं तेरे नव्वे सेइं भविष्यवाणी नई कियोरी? ते तेरे नव्वे सेइं भूतां नई कढोरां ते तेरे नव्वे सेइं बड़े चमत्कार नई हेरेवरे? 23 तेखन अवं तैन जो साफ जोलो, ‘अवं तुसन कथे न ज़ैनी, ओ बुरां कम्मां केरने बालाव, मेरे तुत्तर अगरां दूर भोथ।’” 24 “एल्हेरेलेइ ज़ै मेरी गल्लां शुनते ते तैन पुड़ अमल केरते त तै तैस अक्लमन्द मैनेरो ज़ेरो भोलो, ज़ैनी अपनू घर शफ़डी पुड़ बनेवरुए। 25 झ़ाडी लगगी ते हड़ाई आई ते अंधगुबारी भोइ ते तैस घरे पुड़ पुजी, पन तैन घर न ड़ल्लू, किजोकि तैसेरी मुनीयाद पेक्की शफ़डी पुड़ कढोरी थी। 26 पन ज़ै मेरी गल्लां शुनते ते तैन पुड़ अमल न केरे, त तै तैस बेवकूफ मैनेरो ज़ेरोए भोलो, ज़ैनी अपनू घर रती पुड़ बनेवरू थियू। 27 झ़ाडी लगगी ते हड़ाई आई अंधगुबारी भोइ ते तैस घरे कां पुजी ते तैन घर ड़ल्ली ज़ोवं ते बरबाद भोवं।” 28 ज़ैखन यीशुए एना सैरी गल्लां शुनेइतां झ़ैडी, त सारे लोक तैसेरी शिक्षा शुन्तां हेरान भोए। 29 किजोकि यीशु तैन शास्त्री लोकां केरि ज़ेरि नई, बल्के अधिकारे सेइं शिक्षा देतो थियो।

8 ज़ैखन तै पहैडी पुड़ां उन्डो अव, त बड़े लोक तैस पत्पती चले। 2 तैखन एककी कोढ़े यीशु कां ज़ैन्धु केरे भारे बिश्तां तैस कां मिन्नत केरतां ज़ोवं, “हे प्रभु अगर तू चास त मेरू कोढ़ बज़्ज़ोई सकतस।” 3 यीशुए तैस पुड़ हथ रेखतां ज़ोवं, “अवं चाताई, तू बज़्ज़ोस।” ते तै कोढ़ी तैखने साफ भोइ जेव। 4 यीशुए तैस सेइं ज़ोवं, “हेर, एस गल्लरे बारे मां केन्ची सेइं किछ न ज़ोइयां। बल्के अपनो आप याजक हिरा। तैल्ला पत्ती, तू अपने बेज़्ज़ोनेरे वजाई सेइं चढ़तल चाढ़, ज़ेसेरे बारे मां मूसा नेबे कानूने मां हुक्म दित्तोरोए, ताके लोकन पतो चले कि तू बेज़्ज़ोरोस।” 5 ज़ैखन यीशु कफरनहूम नगर मां अव त अक रोमी सूबेदार ज़ै 100 सिपेहिन केरो अफसर थियो, तैनी यीशु कां एइतां बिनती की। 6 “हे प्रभु, मेरो नौकर अथरंगेरो मरीज़ घरे बिमार भोरौए, तै चलेनेरे काबल नई, ते तै बेडि तकलीफी मां आए।” 7 तैनी तैस सेइं ज़ोवं, “अवं एज्जेलो ते तैस बज़्ज़ोइलो।” 8 सूबेदार ज़ोने लगे, हे प्रभु अवं एस काबल नई कि तू मेरे घरे मां एज्जी सकस; पन तू अगर सिर्फ ज़बाना सेइं ज़ोस त मेरो नौकर बेज़्ज़ोलो। 9 किजोकि अवं भी केन्चेरे अधिकारे मां कम केरताई, ते सिपाही मेरे अधीन आन, ते ज़ैखन एककी जो ज़ोताई कि गा, त तै गाते ते हेरि जो ज़ोतां एई, त तै एइते, ते अपने सेवके जो ज़ोताई इन कम केर त तै केरते। 10 यीशु एन शुन्तां हैरान रेइ जेव, ते एप्पू पत्ती चलेने बाले मैनु सेइं ज़ोने लगे, “अवं तुसन सेइं सच ज़ोताई, कि मीं इस्राएल मुलखे मां इस गैर यहूदी मैनेरो ज़ेरो मैन्हु नई लोवरो ज़ै मीं पुड़ एत्रो विश्वास केरे।” 11 अवं तुसन सेइं ज़ोताई कि बड़े गैर कौमां केरे लोक पूबरां ते पछमेरां एइतां अब्राहमे, इसहाक ते याकूबे सेइं साथी परमेशेरे राज़्ज़ेरी धामी मां शामिल भोले। 12 पन इस्राएली लोक बेइर आंधरे मां छुड़े गाले ज़ैडी तैना लेरां देते ते दंत च़ापते राले। 13 ते यीशुए तैस सूबेदारे सेइं ज़ोवं, “घरे जो गा, ज़ेरो तेरो विश्वासे तेरे लेइ तेरहु भोलू,” ते तैखने तैसेरो नौकर बेज़्ज़ोइ जेव। 14 ज़ैखन यीशु पतरसेरे घरे जेव, त तैनी हेरू, कि पतरसेरी शिखी बडो भुखारे, ते तै लेटोरी थी। 15 तैनी तैसारा हथ ट्लातो ते अकदम तैसारा भुखार उतरी जेव, ते तै खडी उदुतां तैसेरी सेवा केरने लगगी। 16 ज़ैखन इलोइ भोइ त लोकेई बड़े बिमार, ज़ैन पुड़ भूतां केरो सायो थियो तैस कां आने, ते तैनी तैना भूतां अपने वचने सेइं कढां, ते सारे बिमार बज़्ज़ाए। 17 ताके यशायाह नेबेरी ज़ोरी तै गल पूरी भोए कि, “तैनी एप्पू इशशी कमज़ोरी हटेइ ते इशशी बिमैरी भी मुकेइ।” 18 यीशुए अपने चेब्रे पासन मैन्हु केरि भीड़ लेइतां अपने चेलन, गलील समुन्दरे पार गानेरो हुक्म दित्तो। 19 ज़ैखन तैना पार गानेरी तियारी केरने लगगे, त तैखन अक शास्त्री मैन्हु तैस कां एइतां ज़ोने लगे, “गुरू, तू ज़ेरहां भी गालो त अवं तीं पत्ती चलेलो।” 20 यीशुए तैस जो ज़ोवं, “लौई केरि कूढां, ते अम्बेरे चुडोल्लू केरे आले भोतन, पन मैनेरे मट्टे यानी मीं कां कोई ठार नई ज़ैडी अवं झुल्ली सेक्खी।” 21 चेलन मरां एक्के हारे तैस सेइं ज़ोवं, “हे प्रभु, मीं घरे गानेरी अज़ाज़त दे, मेरे बाजरे मरनेरां बाद अवं तैस देबतां एज्जेलो ते फिरी तीं पत्ती चलेलो।” 22 यीशुए तैस जो ज़ोवं, “तू मेरो चेलो बन ते मीं

पत्ती चले, ते ज़ैना लोक आत्मिक तरीके सेइं मरने तैन अपने मैन्हु मरने बलगने दे।” 23 ज़ैखन यीशु किश्ती मां चढ़ो त तैसेरे चले भी तैस सेइं साथी चले। 24 ते अचानक समुन्दरे मां अक बडो तूफान अव ते किश्ती छेलहेई सेइं छपने लगगी ते यीशु तैस मां झुल्लोरो थियो। 25 तैखन चलेई तै बींझेइतां तैस सेइं ज़ोवं, “हे प्रभु, असन बचा! अस त डुबने लौरम।” 26 तैनी तैन सेइं ज़ोवं, “हे घट विश्वासे बालाव, तुस किजो डरतथ?” तैखन तैनी खड़े उदुतां तूफान त समुन्दर डांटो, तैखने तूफान रुकी जेव त समुन्दर बड़े शांत भोव। 27 लोक हैरान भोइतां ज़ोने लगगे, “ए मैन्हु कौन आए कि तूफान त समुन्दर भी एसेरो हुक्म मन्तन।” 28 ज़ैखन तै गलील समुन्दरे पार, गिरासेनी इलाके मां पुजो, त दूई मैन्हु ज़ैन पुड़ भूतां केरो सैयो थियो कब्रन मांमेइं यीशु कां मिलने आए। तैना एत्रे निग्गर थियो, कि कोई भी तैस बत्तां निस्सी न थियो बटतो। 29 तैना ज़ोरे-ज़ोरे चिन्डां मारने लगगे ते ज़ोने लगगे, हे परमेशेरे मट्टां, तीं असन सेइं कुन कम्मे? कुन तू वक्ते करां पेइले असन नरके मां छडने ओरोस? 30 तैन केरां दूर सूरां केरो अक बडो घान चरने लोरो थियो। 31 भूतेई यीशु कां मिनत केरतां ज़ोवं, “अगर तू असन कढने चातस त उन सूरां केरे घाने मांजो भेज।” 32 तैखन यीशुए ज़ोवं, “गाथ,” तैना भूतां तैइं निस्तां तैन सूरां केरे घाने मां जेआं, ते सूरां केरो सारो घान उछड़तो-उछड़तो डैल्ले मां गेइतां सारे सूर मेरि जे। 33 तैखन सूरां केरे चारनेबालेई एन हेरू, त तैना डेरि जे, ते तैनेई नगरेरे लोकन सेइं सारो बिस्तार दित्तो, ते ज़ैन पुड़ भूतां केरो सैयो थियो तैन केरो हाल भी शुनाव। 34 तैस नगरेरे सारे लोक यीशु सेइं मिलनेरे लेइ आए ते यीशु लेइतां लोक मिनत केरतां ज़ोने लगगे, इशशे इलाके मरां चलो गा।

9 फिरी यीशु किश्ती मां चढ़तां दरियाए पार जो जेव, ते अपने नगर मां अव। 2 ते हेरा, किछ मैनेई अक अधरंगी मैन्हु खट्टी पुड़ छुइतां तैस कां आनो, ज़ैखन यीशुए तैन केरो विश्वास हेरो, त तैस अधरंगी मैन्हु जो ज़ोवं, “मट्टा, गा हिम्मत रख, तेरे पाप माफ़ भोए।” 3 एस गल्ली पुड़ किछ शास्त्री एप्पू मांमेइं ज़ोने लगगे, “ए त परमेशेरी तुहीन केरते!” 4 यीशुए तैन केरि मनेरी गल्लां बुझतां तैन जो ज़ोवं, “तुस अपने-अपने मने मां एन्चरां किजो सोचने लगगेरेथ? 5 एन ज़ोनू कुन सुखतुए कि गा ‘तेरे पाप माफ़ भोए,’ या एन ज़ोनू कि ‘उठ, ते चले फिर?’ 6 पन अवं किछ केरनेबालोई, ज़ैस सेइं तुसेईं बुझनूए कि मैनेरे मट्टे (यानी मीं) धेरती पुड़ लोकां केरे पाप माफ़ केरनेरो अधिकार आए।” तैखन तैनी तैस अधरंगी मैन्हु जो ज़ोवं, “अपनि खट छुइतां अपने घरजो चलो गा।” 7 ते अधरंगी मैन्हु तैखने अपनि खट छुइतां घरजो चलो जेव। 8 लोक एन हेरतां डेरि जे ते परमेशेरी बडयाई केरने लगगे, कि ज़ैनी मैन्हु एत्रो अधिकार दित्तोरोए। 9 ज़ैखन यीशु तैइं अग्रोवं चलो त तैनी अक मत्ती नंवेरो मैन्हु, चुंगी नेनेबालो दफ़तेरे मां बिश्शोरो लाव, ते यीशुए तैस जो ज़ोवं, “तू मीं पत्ती चले।” तै तैखने यीशु पत्ती चलो। 10 ते ज़ैखन यीशु अपने चेलेरे घरे गेइतां रोटी खाने बिश्शो ज़ेसेरू नवं मत्ती थियूं, त बड़े चुंगी नेनेबाले ते पापी मैन्हु भी आए ते यीशु त तैसेरे चेलन सेइं साथी

रोटी खाने बिश्शे। 11 जैखन फरीसी लोकेई एन हेरू, त तैनेई तैसेरे चलन पुच्छू, “तुशशो गुरू चुंगी धिन्ने बाले ते पैपी लोकन सेई साथी रोटी किजो खाते?” 12 एन शुन्तां यीशुए तैन मिसाल देइतां ज़ोवं, “सझर लोकन डाक्टरेरी ज़रूरत न भोए, पन बिमारन भोचे।” 13 फिर भी तुस गोइतां एस गल्लरो मतलब कढा, “अवं बलिदान नई बल्के दया पसंद केरताई, किजोकि अवं धर्मी लोकन नई बल्के पापी लोकन कुजाने ओरोई।” 14 तैखन यूहन्नारे चले यीशु कां एइतां ज़ोने लगगे कि कुन वजा आए, कि अस ते फरीसी लोक त बरत रखतम, पन तेरे चले किजो बरत न रखन? 15 यीशुए तैन न् जुवाब दितो, “इलाएरे दिहाड़े, जैखन लाडो जैनी सेई साथी राते, कुन जन शौग बनेई सकतन? पन तैना दिहाड़े एज्जले, जेइस लाडो तैन केरां अलग कियो गालो (यानी मारो गालो), तैखन तैना (अपने दुख्खेरे वजाई सेई) बरत रख्वेले। 16 अवं तुसन अक होरि मिसाल देताई, नंवे लिगड़ेरी टलोई पुराने लिगड़े कोई न लाए। किजोकि नंवे लिगड़ेरी टलोई पुराने लिगड़े अपने पासे खिच्ची छुट्टेली। ते तैन पेइले केरां भी जादे छिन्दोलू। 17 ते नंवे दाछारो रस पुरैनी मसकन मां न भरन, किजोकि मसकां फैटी गाचिन ते दाछारो रस ज़ेया भोइ गाते ते मसकां भी कोन्ची कम्मैरी न रान। एल्हेरेलेइ नंवे दाछारो रस नेव्वीं मसकी मां छडतन ताके दुइये बरबाद न भोन।” 18 यीशु एन गल्लां हेजू मसां ज़ोने लोरो थियो, त प्रार्थना घरेरो अक प्रधान अव ते यीशु कां मथ्यो टेकतां ज़ोने लगगे, मेरी कुई मेरि जोरीए, “पन तू अगर एइतां तैस पुइ हथ रखखस त तै हुन्ना ज़ींती भोइ गानीए।” 19 यीशु तैस सेई साथी चलो जेव, ते चले भी तैस सेई साथी जे। 20 ते एरू भोवं कि अक कुआन्श भी थी, ज़ैस 12 सालां केरि खून च़लनेरी बिमारी थी। तैसां यीशु पत्पती एइतां तैसेरे चोगे सेई हथ लाव। 21 किजोकि तै अपने दिले मां एन ज़ोती थी, कि अगर अवं यीशुएरे चोगे सेई हथ लाएली त अवं बेज़्जोइ गानीं। 22 यीशुए बेदलोइतां तैस कुआन्शरे पासे तक्कू ते ज़ोवं, “हे कुईए, विश्वास रख, तेरे विश्वासे सेई तू बेज़्जोरस” ते तै तैखने बेज़्जोइ जेई। 23 जैखन यीशु तैस प्रधानेरे घरे पुज़ो, त लोक नगारो बजाते ते लेरां देंते लाए। 24 तैखन यीशुए तैन लोकन सेई ज़ोवं, “दूर भोथ, किजोकि कुई मरीं नई, बल्के झुल्लोरीए।” एन शुन्तां तैना लोक हसने लगगे। 25 पन जैखन लोक तैटां दूर कढे, त यीशुए अन्तर गोइतां कुइयरो हथ ट्लाव, त तै ज़ींती भोइ। 26 ते एस गल्लरी खबर सारे इलाके मां फैली जेई। 27 जैखन यीशु तैटां अग्रोवं च़लो, त दूई काने तैस पत्ती चिन्डां मारते ज़ोने लगगे, “हे दाऊदरा मट्टां असन पुइ दया केर!” 28 जैखन तै घरे अन्तर जेव, त तैना काने तैस कां आए, ते यीशुए तैन सेई ज़ोवं, “कुन तुसन विश्वासे, कि अवं तुसन बज़्जेई सकताई?” तैनेई जुवाब दितो “हॉ प्रभु, अस विश्वास केरतम, तू असन बज़्जेई सकतस।” 29 तैखन तैनी तैन केरि एछ्छन सेई हथ लाव ते ज़ोवं, “तुस विश्वास केरतथ कि अवं बज़्जेई सकताई, अवं तुसन बज़्जेइली।” 30 ते तैना लहने लाए, ते यीशुए तैन रोइच्चारे समझेइतां ज़ोवं, “खबरदार ज़ैन मीं तुशशे लेइ कियू तैसेरे बारे मां कोन्ची सेई न ज़ोइयथ।” 31 पन तैनेई बेइर

गोइतां सारे मुलखे मां एस चमत्कारेरे बारे मां ज़ोवं। 32 जैखन तैना बेइर च़लोरोरे थिये, त लोकेई अक मैन्हु ज़ै गल्लां न थियो केरि बटतो, किजोकि तैस पुइ भूतेरो सैयो थियो, तै तैनेई यीशु कां आनो। 33 ते जैखन भूतेरो सैयो तैस मेरां कढे, त लट्टो गल्लां केरने लगगे, लोक बड़े हैरान भोइजेइ ते ज़ोने लगगे, असेई एरो ज़ेरो माजरो इसाएले मां पेइले कथे नई लाहोरो। 34 पन फरीसी लोक ज़ोने लगगे, “ए त भूतां केरे गुरेरी मदीं सेई भूतां कढते।” 35 यीशु त कने तैसेरे चले गलील इलाकेरे इल्लोव्न ते नगरन मां ते प्रार्थना घरन मां जे। ते तै शिक्षा देतो राव, ते परमेशेरेरे राज़्जेरी खुशखबरी शुनातो राव, ते लोकां केरि हर किसमेरी बिमारी ते कमज़ोरी दूर केरतो राव। 36 जैखन तैनी बड़े लोक लाए त तैस तैन लोकन पुइ बड़ो तरस अव, किजोकि तैना तैन भैट्टां केरे ज़ेरे थिये ज़ैन केरो कोई पुहाल न भोए, तैन केरो बड़ो बुरो हाल थियो ते तैना टेपलोरे थिये। 37 तैखन यीशुए अपने चलन सेई ज़ोवं, “पकोरी फसलरे ज़ेरे बड़े लोक तियार आन ज़ैना परमेशेरेरे वचने पुइ विश्वास केरनू चातन, पन कम केरनेबाले थोड़े आन ज़ैना तैन परमेशेरे राज़्जेरे बारे मां ज़ोने। 38 एल्हेरेलेइ तुस फसलरे मालिके कां प्रार्थना केरा कि तै जादे कम केरनेबाले भेजे, कि तैना लोकन परमेशेरेरे राज़्जेरे बारे मां ज़ोने।”

10 फिरी यीशुए अपने 12 चले एप्पू कां कुजाए, ते तैन भूतां केरो सैयो कढनेरो ते हर बिमारी ते तकलीफ दूर केरनेरो अधिकार दितो। 2 12 प्रेरितां केरां नव्वां इना आन, शमौन ज़ैस जो पतरस ज़ोतन ते तैसेरो ढ़ला अन्द्रियास, जब्देरू मट्टू याकूब ते कने तैसेरो ढ़ला यूहन्ना, 3 फिलिप्पुस, बरतुल्मै, थोमा, ते मती चुंगी धिन्ने बालो, हलफईरू मट्टू याकूब, ते तद्दै। 4 शमौन कनानी, ते यहूदा इस्करियोती ज़ैनी तै ट्लुवेवरो भी थियो। 5 एन 12 यीशुए एन ज़ोइतां भेजे, “गैर कौमां केरे पासे न गोइयथ, ते कने सामरी लोकां केरे केन्ची नगर मां न गोइयथ। 6 बल्के इसाएलेरे घरानेरी हेरोरि भैडून कां गोइयथ। 7 ते च़लते-च़लते, एन ज़ोते गोइयथ कि स्वर्गरे राज़ नेडे ओरूए। 8 बिमारन बज़्जेइयथ, मुडदन ज़ीते केरथ, कोढ़ी केरू कोढ़ साफ केरथ, ते भूतां केरो सैयो केढथ, तुसन एन सब किछ मुफ्त मैलोरूए ते मुफ्त देइयथ। 9 ते साथी सोन्नु, चाँदी ते पेंडसे न रेखथ। 10 ते न बत्तारे लेइ झोलो नेइयथ ते न दूई-दूई लिगड़ां, ते न बूट ते न सोटी, किजोकि मज़दूर अपनि मज़दूरो हकदार भोते।” 11 “जैखन तुस केन्ची नगर या इलोव्वे मां गाथ त तुस एरे मैनेरो पतो केरथ, कि कौन अतबारेरे काबल? तैटां ज़ां तगर गानेरो वक्त न एज्जे त तांतगर तैडी तैस्से कां रेइयथ। 12 ते घरे मां अन्तर गाते बार तैन जो शान्ति देइयथ।” 13 “अगर तैन घर तुशशे काबल भोलू त शान्ति पुजेली, ते अगर तैन घर तुशशे काबल न भोलू त तुशशी शान्ति तुसन पुइ वापस एज्जेली। 14 ज़ै तुसन कबूल न केरे ते तुशशी गल न मन्ने त तैस घरे या नगर मरां बेइरोवं गाते बार अपने पावां केरि थूड तैडी झैइयथ।” 15 “अवं तुसन सेई सच ज़ोताई कि इन्साफेरे दिहाड़े तैस नगरेरो हाल सदोम ते अमोरा नगरां केरे हाले करां भी जादे बुरो भोलो।” 16 “हेरा, अवं तुसन भैट्टां केरे गिदन मां भेजने लोरोई, एल्हेरेलेइ तुस सप्यां केरे ज़ेरे

हुशार ते कबूतरां केरे जेरे सादे बेनथ। 17 मैनन् करां हुशार रेइयथ तैना तुसन ट्लेइतां सभान मां पैश केरेले ते प्रार्थना घरन मां तुसन कोडां केरि मार दुवाले। 18 ते तुसन मेरी वजाई सेइं गवर्नरन ते कने राजन कां हाज़र केरेले, ताके तुस तैन मां ते गैर कौमन मां मेरे गवाह बन्थ। 19 पन ज़ैखन तैना ट्लुवेइतां हावाले केरेले, त तुस फिक्र न केरथ, कि अस कुन जोमेले ते केन्चरे जोमेले, किजोकि ज़ैन किछ ज़ोनू भोलू तैखने अवं तुसन जोइलो। 20 किजोकि ज़ोने बाले तुस नई, बल्के पवित्र आत्मा भोलो ज़ै तुशशे स्वर्गेरे बाजी परमेशरेरे तरफां आए। 21 “ढला, ढलाए ते बाजी मट्टे मारनेरे लेइ सोंफेले, ते मट्टां अपने अम्मा बाजी केरे खलाफ भोइतां तैन माराले। 22 मेरे नंवेरो वजाई सेइं सब लोक तुसन सेइं बैर केरेले, पन ज़ै आखरी तगर बरदाशत केरेलो तैस्से मुक्ति मैलेली। 23 ज़ैखन लोक तुसन एक्की नगर मां सताले, त होरि नगर मांजो नेशशी गेइयथ, अवं तुसन सेइं सत्र ज़ोताई कि एस करां पेइले तुस इस्राएलेरे सैरी नगरन मां तुशशू सफर पूरू न भोलू, त अवं मैनेरू मट्टू एज्जी गालू।” 24 “चेलो अपने गुरू करां बड्डो न भोए, ते न नौकर अपने मालिके करां। 25 चेलेरे लेइ त एन्ने बड्डुए कि तै अपने गुरेरो ज़ेरो भोए, ते नौकरेरे लेइ एन्ने बड्डुए कि तै अपने मालिकेरे बराबर भोए, अगर तैनेई मालिके जो शेतान ज़ोवं, त तैसेरे घरेबालन जो केत्रू ज़ोनूए!” 26 “तुस तैन करां न डेरथ, किजोकि कोई चीज़ छप्पोरी नई, ज़ै खोल्ली न गाली, ते कोई भेद छप्पोरो न रालो, बल्के सारो भेद बांदो भोलो। 27 ज़ैन किछ अवं तुसन सेइं आंधरे मां ज़ोताई, तुस तैन दीसां जोइयथ, ते ज़ैन किछ तुशशे कन्ने पत्र बल्हे सेइं शुनावं गाते, तुस लाए पुड गेइतां तैसेरो प्रचार केरथ। 28 तुस तैन करां न डेरथ ज़ैना जानी त मारतन, पन आत्मा न मैरी बटन, परमेशरे करां डरा, ज़ै आत्माई ते जानी दुइने नरके मां नाश केरि बटते। (Geenna g1067) 29 कुन एक्की सिकेरी दूई च़ड़ोली न बिकन? फिरी भी तुशशो बाजरे मेरज़रे बगैर तैन मरां अक भी धेरती पुड न झेड़ी बटन। 30 परमेशर तुशशे हर गल्लरी फिक्र केरते इड़ी तगर तुशशे दोगेरे बाल भी गन्गोरिन। 31 एल्हेरेलेइ डरा न, तुशशी कदर बेडि च़ड़ोलन करां भी बडी जादे।” 32 “ज़ैना लोक, मैन्हु केरे सामने मेरो इकरार केरतन कि तैना मेरे चेलेन, त अवं भी अपने स्वर्गेरो बाजी केरे सामने तैन केरो इकरार केरेलो, कि तैना मेरे चेलेन। 33 पन ज़ैना लोक, मैन्हु केरे सामने इन जोने करां डरेले, कि तैना मेरे चेलेन, त अवं भी तैन केरो अपने स्वर्गेरो बाजरे सामने इन्कार केरेलो, कि एना मेरे चले नई।” 34 “इन न सैमझथ कि अवं धेरती पुड एल्हेरेलेइ ओरोई लोक मेल मिलापे सेइं रान, पन मेरू एजनु लोकन एप्पू मांमेइं लडनेरी वजा भोइ, मेल मलाप नई। 35 अवं एल्हेरेलेइ ओरोई कि मट्टे बाजी करां ते कुइये अम्मा करां ते नुशी शिखी करां अलग केरि। 36 मैनेरे दुश्मन त तैसेरे अपने घरेरे लोक भोनेन।” 37 ज़ै कोई अम्मा या बाजी मीं करां जादे ट्लारे समझते, तै मेरो चेलो बन्नेरे काबल नई ते ज़ै कोई मट्टे या कुइये मीं करां जादे समझते, तै भी मेरो चेलो बन्नेरे काबल नई। 38 ज़ै कोई मेरो चेलो भोनेरी वजाई सेइं दुःख झैल्लनेरे लेइ त कने मरनेरे लेइ तियार नई, त तै भी मेरो चेलो बन्नेरे

काबल नई। 39 ज़ै कोई मरने करां बचनेरे लेइ मेरो इन्कार केरेलो, त तैन हमेशारी ज़िन्दगी न मैलेली। पन ज़ै मीं पुड विश्वास केरनेरे वजाई सेइं अपने जान देनेरे लेइ भी तियार भोलो, त तैस हमेशारी ज़िन्दगी मैलेली। 40 “ज़ैना तुसन कबूल केरतन, तैना मीं कबूल केरतन, ज़ैना मीं कबूल केरतन, तैना सिर्फ मीं नई, पन तैना परमेशरे भी कबूल केरतन, ज़ैनी अवं इड़ी भेजोरोई।” 41 “ज़ै नेबन, नबी सेमझतां कबूल केरेलो, परमेशर तैस नेबी केरे बराबर इनाम देलो, ते ज़ै धर्मी मैन्हु धर्मी सेमझतां कबूल केरते, परमेशर तैस धर्मी बराबर इनाम देलो। 42 ज़ै कोई इन निकड़न मरां एक्की मेरो चेलो बुझतां सिर्फ अक कटोरो ठंढू पानी पियालो, अवं तुसन सेइं सत्र ज़ोताई तैस पक्कू इनाम मैलनू आए।”

11 ज़ैखन यीशुए अपने 12 चेलन हुक्म दितो, त तै तैठां चलो जेव, ताके चेलां केरे नगरन मां गेइतां शिक्षा दे ते प्रचार केरे। 2 यूहन्ना नेबे कैदखाने मां मसीहरे कम्मां केरे बारे मां शुन्तां तैस कां अपने चेले इन पुच्छने भेजे। 3 “तैनी तैन सेइं ज़ोवं, एजनेबालो मसीह तू आस, जेसेरे बारे मां परमेशरे वादो कियोरोए, या आस केन्ची होरि बलगम?” 4 यीशुए तैन जुवाब दितो, “ज़ैन किछ तुस शुन्तन ते लातथ तैन गेइतां यूहन्ना सेइं ज़ोथ। 5 कि काने लातन, ते टोन्टे च़लतन, ते कोढी केरू कोढ शुद्ध भोते, ते टोंऊने शुन्तन, ते मुइदे ज़ीते भोतन, ते गरीबन खुशखबरी शुनाई गातीए 6 परमेशर तैस बरकत देते, ज़ै मीं पुड शक न केरे।” 7 ज़ैखन यूहन्नारे चेले तैठां च़ले जे, त यीशु लोकन सेइं यूहन्नारे बारे मां ज़ोने लगे, “तुस सुनसान ठैरी कुन हेरने जोरे थिये? कुन हवाई सेइं हिलते निरेठरे डाले? 8 त फिरी होरू कुन हेरने जोरे थिये? माघां लिगडां लेइतां कोई? हेरा ज़ैन माघां लिगडां लेइतां भोतन तैना महलन मां रातन। 9 फिरी तुस कुन हेरने जोरे थिये? कुन कोई नेबी? हाँ पन अवं तुसन सेइं ज़ोताई कि नेबी करां भी बड्डे हेरने जोरे थिये। 10 ई तैए यूहन्ना आए जेसेरे बारे मां परमेशर पवित्रशास्त्रे मां ज़ोते, कि हेरा, ‘अवं अपने बिस्तार देनेबालो तीं अग्री भेजताई, ज़ै तेरे लेइ बत तियार केरेलो।’” 11 अवं तुसन सेइं सत्र ज़ोताई, कि ज़ै कुआन्शन करां ज़रमोरोए तैन मां यूहन्ना बपतिस्मो देनेबाले करां कोई बड्डो नई भोरो, पन ज़ै स्वर्गेरे राज़े मां निकडे करां निकडोए तै तैस करां भी बड्डोए। 12 यूहन्ना बपतिस्मो देनेबालेरे दिहाइन करां अज़ तगर प्रचार भोइ रावरोए, ते स्वर्गेरू राज़ जल्दी बथने लोरूए, पन बडे निगगर लोक तैस पुड हमलो केरतन। 13 सारे नेबी केरे लेख, ते मूसरो कानून यूहन्ना तगर भविष्यवाणी केरते राए। 14 अगर तुस चाथ ते मन्थ, एलिय्याह जेसेरे बारे मां नेबेई ज़ोरू थियू, कि तै एजनेबालो थियो ते ईए। 15 ज़ै कोई समझनू चाते, तै ध्याने सेइं शुने ते समझो। 16 “अवं इस ज़मानेरे लोकां केरि मिसाल केस सेइं देई, इना तैन मट्टां केरे ज़ेरेन ज़ैना बज़ारन मां बिश्तां अपने दोसन सेइं शिकैयत केरतन, 17 कि असेईं तुशशे लेइ बाज़ो बज़ाव, ते तुस न नच्छे, ते असेईं शोग कियो ते तुसेईं छाती न पिटी। 18 किजोकि यूहन्ना बपतिस्मो देनेबालो जादे तर बरत रखतो थियो, ते शराब न थियो पीतो, ते तैना तैस जो ज़ोतन कि एस पुड भूतेरो सैयो आए। 19 ते मैनेरू मट्टू

यानी अवं खातो पीतो अव, हेरा, ते तैना ज़ोतन पेटू ते शराबी मैन्हु ते चुंगी नेनेबाले ते पापी लोकां केरो दोस्त, पन अक्लमन्द कौने तैसेरे कम्मई सेइं पतो च़लते।” 20 तैखन यीशु फिरी तैन नगरन मां गेइतां तैद्रेरे लोकन झिड़कतां ज़ोने लगे, ज़ैन मां तैनी चमत्कार कियेरे थी, पन तैनेई अपने पापन करां मन न फिराव। 21 “हे खुराजीन नगरेरे लोकव! तुसन पुड़ अफ़सोस, हे बैतसैदा नगरेरे लोकव तुसन पुड़ अफ़सोस, कि ज़ैना चमत्कार तुसन मां किये, अगर एना चमत्कार सूर ते सैदा नगरन मां कियेरे बोथे, त तैन लोकेई केइसेरे देंतेरी टाट पलेटतां ते मांजनी मां बिशतां अपने पापन करां मनफिरावरो भोथो। 22 पन अवं तुसन सेइं ज़ोताई, कि इन्साफेरे दिहाड़े परमेशर, ज़ै सज़ा सूर ते सैदा नगरां केरे लोकन देलो, तुशशी सज़ा तैस करां भी जादे भोली। 23 ते हे कफरनहूम नगरेरे लोकव, कुन तुस सोचतथ कि स्वर्ग मां तुशशी आदर भोनीए! नई तुस त नरके गाले ज़ैडी पापी लोकन सज़ा मैलेली! किजोकि ज़ैना चमत्कार तुसन मां किये, अगर मीं एना सदोम नगरे मां कियेरे बोथे त सदोम नगर अज़ तगर भी भोनू थियूं। (Hades 986) 24 पन अवं तुसन ज़ोतां कि इन्साफेरे दिहाड़े परमेशर ज़ै सज़ा सदोम नगरेरे लोकन देलो, तुशशी सज़ा तैस करां भी जादे भोली।” 25 तैखन यीशुए ज़ोवं, “हे बाजी, स्वर्ग ते धेरतरे प्रभु, अवं तेरू शुक्र केरतां कि तीं एना गल्लां अक्लमन्द ते समझदार लोकन करां छपेइतां रेख्खी ते तैन लोकन पुड़ बैदी की, ज़ैना निक्के बच्चां केरे ज़ेरे आन। 26 हॉ, हे बाजी तीं एन्ने रोडू लग्गू। 27 “मेरे बाजेई सब किछ मेरे सुपुर्द कियेरूए; कोई होरो मट्टे न ज़ाने, सिर्फ बाजी ज़ानते; कोई बाजी न ज़ाने सिर्फ मट्टू ज़ानते, या ते मैन्हु बाजी ज़ानते ज़ैस पुड़ मट्टू बांदो केरने चाए। 28 “हे मेहनत केरनेबाले लोकव, ते भारे सेइं थकोरे लोकव मीं कां एज्जा; अवं तुसन आराम देइलो। 29 मेरे अधीन एन्चरे भोथ ज़ेन्चरे दांत जूए हैठ भोते, ते ज़ैन किछ अवं तुसन शिखालताई तैस शिख्खा, किजोकि अवं शरीफ आई ते दिलेरो नम्र आई ते तुशशी जानी आराम मैलेलो। 30 ज़ै भार अवं तुसन देइलो ते पोल्लोए, तुस तैस आरामे सेइं छुई सकतथ।”

12 यीशु आरामेरे दिहाड़े ऊडारन मांमेई एककी बत्तां च़लारे थियो, ते तैसेरे चेलन ढ़लुख लग्गी, ते तैना शिल्लां ट़लोइतां खाने लग्गे। 2 फरीसी लोकेई एन लेइतां यीशु सेइं ज़ोवं, “तक! तेरे चले तैन कम केरने लोरेन ज़ैन आरामेरे दिहाड़े केरू जेइज़ नई।” 3 यीशुए तैन जुवाब दित्तो, “कुन तुसेई पवित्रशास्त्रे मां कथे नई पढेरू कि ज़ेइस इश्शे पूर्वज दाऊद राज़ो त तैसेरे साथी ढ़लुखारे थिये त तैनेई कुन कियेरू थियूं? 4 तै केन्चरे परमेशररे घरे मां जेव, ते ज़ैना ज़ैदोरी रोटी थी तैइं एन्तां एप्पू भी खेइ, ते अपने सैथन भी दित्ती, ते तैनेई भी खेइ हालांकी तैना रोटी खैनी तैन केरे लेइ ज़ेइज थी, तैना सिर्फ याजक खेइ सकते थिये। 5 या तुसेई मूसेरो कानूने मां एन भी नई पढेरू, कि याजक मन्दरे मां आरामेरे दिहाड़ेरी विधि न मन्ने पुड़ भी बेकसूर भोतन। 6 पन अवं तुसन सेइं ज़ोताई कि इडी तैए, ज़ै मन्दरे करां भी बड्डोए। 7 अगर तुस एल्हेरो मतलब ज़ानेथे कि, अवं बलिदान नई बल्के दया पसंद केरताई, त तुस

बेकसूर कुसुरवार न बनाथे। 8 किजोकि मैनेरू मट्टू यानी अवं आरामेरे दिहाड़ेरी भी प्रभु आई।” 9 यीशु तेइं निस्तां तैन केरे प्रार्थना घरे मां जेव। 10 तैडी अक मैन्हु थियो, ज़ेसेरो हथ शुक्कोरो थियो, तैनेई यीशु दोष लानेरे बहाने सेइं तैस पुच्छू, “कुन आरामेरे दिहाड़े कोई बड्डानो जेइज़े?” 11 तैनी तैन जो ज़ोवं, “तुसन मरां कौने, ज़ेसेरी अक्के भैड भोए, ते तै आरामेरे दिहाड़े गते मांजो बिछड़े, त तुस कुन तैस तैइं बेइर न कढेले? 12 मैनेरी कीमत त भैडी करां केत्री जादे! एल्हेरेलेइ आरामेरे दिहाड़े रोडू कम केरू जेइज़े।” 13 तैखन यीशुए तैस मैन्हु जो ज़ोवं, “अपनो हथ अग्रोवं केर।” तैनी मैने अपनो हथ अग्रोवं कियो, ते अकदम तैसेरो हथ बेज्जोव। 14 तैखन फरीसी लोक बेइर गेइतां तैसेरी खलाफ साज़िश केरने लग्गे, कि एस केन्चरे मारम? 15 इन बुझतां यीशु तैइं च़लो जेव। ते बडे लोक तैस पत्ती च़ले, ते तैनी तैना सब बज्झाए। 16 ते तैनी तैना खबरदार किये, कि मेरे बारे मां केन्ची सेइं न ज़ोइयथ। 17 ताके यशायाह नेबेरी ज़ोरी तै गल पूरी भोए: 18 “हेरा ई मेरो सेवके ज़ै मीं चुनोरोए, ई मेरो ट़लारोए ज़ैस पुड़ मेरो दिल खुशे, अवं अपनि आत्मा तैस पुड़ छडेले, ते तै गैर कौमन मां गेइतां इन्साफेरी खबर शुनालो। 19 तैन न लड़ाई केरेलो, ते न शौर, ते बज़ारन मां कोई तैसेरी आवज़ न शुनेलो। 20 ते ए ढ़लेन्चरे निरैठरे डाले न ट़लोडेलो, ते न बलतो दीयो हिशाहो ज़ां तगर इन्साफ भारी न भोए। 21 ते तैसेरे नंवे पुड़ गैर कौमां उमीद रेखेली।” 22 तैखन लोकेई अक मैन्हु यीशु कां आनो ज़ै कानो ते लट्टो थियो ते तैस पुड़ भूतेरो सैयो थियो, ते तैनेई तैस कां आनो, तैनी तै ठीक कियो, ते तै लहने लग्गे ते गल्लां भी केरने लग्गे। 23 एन हेरतां लोक हैरान भोइतां ज़ोने लग्गे, “कुन एन दाऊदेरू मट्टूए?” 24 पन फरीसी लोकेई एन शुन्तां ज़ोवं, “ए त भूतां केरे प्रधान शैतानेरी मद्दती सेइं भूतां केरो सैयो कढते।” 25 यीशुए तैन केरे मन्नां केरे खियाल ज़ैनतां तैन सेइं ज़ोवं, “ज़ैस राज़े मां फूट पेचे, तैन राज़ बनोरू न रेइ सके, ते केन्ची नगर या खानदाने मां फूट पेचे, तैन भी बनोरू न राए। 26 अगर शैतान एप्पू अपने भूतां कढे, त तै अपनो मुखालफ एप्पू भुओ, त फिरी तैसेरू राज़ केन्चरे बनोरू रेइ सकते? 27 अगर अवं शैतानेरी मद्दती सेइं भूतां केरो सैयो कढताई त तुशशे अपने मैन्हु केसेरी मद्दती सेइं कढतन? तैन्ना तुशशो हाकिम भोले। 28 पन अगर अवं परमेशररी आत्मा मद्दती सेइं भूतां केरो सैयो कढताई त परमेशररू राज़ तुशशे नेडे पुजोरूए। 29 या कोई मैन्हु केन्ची ज़ोरेबाले मैनेरे घरेरे मां गेइतां तैसेरो माल तांतगर लुट्टी न सके, ज़ांतगर कि तै पेइले तैस ज़ोरेबाले मैन्हु बेंधी न छुडे। तैखन तै तैस ज़ोरेबाले मैनेरो माल लुट्टी सकते। 30 ज़ै मीं सेइं साथी नई ते मेरे खलाफे, ते ज़ै मीं सेइं साथी नई ते अकोट्टू न केरे ते इरां उरां बिटलते। 31 एल्हेरेलेइ अवं तुसन सेइं ज़ोताई कि, मैन्हु केरे सारे पाप ते तुहीन माफ़ भोली, पन पवित्र आत्मा तुहीन माफ़ न भोली। 32 ज़ै कोई मैनेरे मट्टेरे खलाफ किछ ज़ोलो, त तैसेरो ए पाप माफ़ कियो गालो, पन ज़ै पवित्र आत्मा तुहीन केरे, त तैस मैन्हु न इस दुनियाई मां माफ़ भोलू ते न एजने बैली दुनियाई मां माफ़ भोलू।” (aiōn 9165) 33

“अगर बुट रोड़े, त तैसेरे फल भी रोड़ो भोलो, अगर बुट बुरोए त तैसेरे फल भी बुरो भोलो, किजोकि बुट अपने फले सेई पिशिनोते। 34 तुस ज़हरीले सपेरे बच्चां केरे बुरे भोड़तां रोड़ी गल केन्चरे जोई सकतथ? किजोकि ज़ैन दिले मां भोते तैन्ने ज़बानी पुड़ एइते। 35 रोड़ो मैन्हु दिलेरे रोड़े खज़ाने मरां रोड़ी गल्लां कढते, ते बुरो मैन्हु बुरे दिलेरे बुरे खज़ाने मरां बुरी गल्लां कढते (दिल खज़ानेरो ज़ेरोए)। 36 अवं तुसन सेई ज़ोतां, कि ज़ैना-ज़ैना निक्केमी गल्लां मैन्हु जोले, इन्साफेरे दिहाड़े लोकन अपनि हर एककी तैस गल्लरो हिसाब देनो भोलो। 37 किजोकि तू अपने गल्लेई सेई धर्मी ते अपने गल्लेई सेई दोषी भोलो।” 38 इस पुड़ किछ शास्त्री ते फरीसी लोकेई तैस सेई ज़ोवं, “हे गुरू अस तीं करां कोई निशान हेरनो चातमा।” 39 तैनी तैन जुवाब दित्तो, “इस ज़मानेरे बुरे ते बदमाश लोक निशान हेरनो चातन, पन तैन योना नेबेरे निशानेरे अलावा होरो कोई निशान न दित्तो गालो। 40 ज़ेन्चरे योना नबी ट्लाई दिहाड़े ते ट्लाई रातन मेछलरे पेटे मां राव, तेन्चरे मैनेरू मट्टू यानी अवं भी ट्लाई दिहाड़े ते ट्लाई रातन ज़मीनी मां रालो। 41 नीनवेरे लोक इन्साफेरे दिहाड़े इस ज़मानेरे लोकन सेई साथी खड़े भोड़तां एन दोषी बनाले, एल्हेरेलेइ कि तैनेई योनारो प्रचार शुन्तां पापन करां मन फिराव, ते हेरा इड़ी तैए, ज़ै योना करां भी बड्डोए, पन तुसेई पापन करां मन फिरानो न चाव। 42 दक्षिणेरी रानी इन्साफेरे दिहाड़े इस ज़मानेरे लोकन सेई साथी खड़ी भोड़तां दोषी बनाली, किजोकि तै बड़े दूरेरां सुलैमान राजेरू ज्ञान शुन्नेरे लेइ ओरी थी, पन हेरा इड़ी तैए, ज़ै सुलैमाने करां भी बड्डोए।” 43 “ज़ैखन केन्ची मैन्हु मरां भूतां केरो सैयो निसते, त तै अपने आरामेरे लेइ बेरान ठारां हठते, पन ज़ैखन तैस ठार न मैल्ले। 44 तैखन ज़ोते, कि अवं वापस अपने तैस्से घरे मां गाताई ज़ैस मरां निसोरो आई, ते ज़ैखन तै वापस एइते, त तैस तैन घरे खाली, धोवेरू ते साफ सुथरू सज़्जो-सज़ेवरू मैलते। 45 तैखन तैन गाते ते सत बुरां भूतां एप्पू सेई साथी आनते, ते तैन सब तैस मां रहतन, ते तैस मैनेरो हाल पेइले हाले करां भी जादे बुरो केरतन, तेन्चरे इस ज़मानेरे बुरे लोकां केरो हाल भी एरो भोनोए।” 46 ज़ैखन तै मैन्हु सेई गल्लां केरने लोरो थियो, त तैसेरी अम्मा ते कने तैसेरे ढूला खड़े थी, तैना तैस सेई गल्लां केरनि चाते थिये। 47 केन्चे गेइतां तैस सेई ज़ोवं, “बेइर तेरी अम्मा ते ढूला खड़े आन, तैना तीं सेई गल केरनि चातना।” 48 एन शुन्तां तैनी पतो देनेबाले जो ज़ोवं, “कौने मेरी अम्मा, ते कौन मेरे ढूला?” 49 ते अपने चेलां केरे पासे हथ अग्रोवं केरतां ज़ोवं, “हेरा मेरी अम्मा, ते मेरे ढूला इना आन। 50 किजोकि ज़ै कोई मेरे स्वर्गेरे बाजेरी मेज़ीं पुड़ चलते तैए मेरो ढूला ते मेरी बेइन्, ते मेरी अम्मा आए।”

13 तैस दिहाड़े यीशु घेरां निस्सो, ते गलील समुन्दरेरे बन्ने पुड़ गेइतां बिशशो। 2 तैसेरे ज़ेब्रे पासन लोकां केरि एत्री भीड़ अकोठी भोड़, ते तै एककी किशती मां चढ़ो ते बिशशी जेव, ताके तै सेरुभी लोकन परमेशेरी गल्लां केरि शिक्षा देइ सके, ते सारे लोक बन्ने पुड़ खड़े राए। 3 तैखन तैनी तैन सेई कहेनी केरे तरीके सेई बेड़ि गल्लां जोई, “एक्सां

अक बीज़ बेनेबालो बीज़ बेने जो जेव। 4 बीज़ बेते बार किछ बीज़ बत्तेरे इलेखी बिछड़ू त चुडोल्लेई एइतां तैन बीज़ चुनू। 5 किछ बीज़ घोड़नबाली ज़मीनी पुड़ बिछड़ू, ज़ेड़ी तैस दुग्धी मिती न मेलनेरे वजाई सेई तैन लूशी उग्गू ते बूटो लगो। 6 पन ज़ैखन दिहाड़ो निस्सो, त तै निकड़ो बूटो फुककोई जेव। ज़ील न छड्डनेरे वजाई सेई शुक्की जेव। 7 ते किछ बीज़ कंटां केरे झैल्लन मां बिछड़ू। ज़ैखन तैड़ी बूटो लगो, त कंटां केरे झैल्लेई भी बेड़ोइतां तै बूटो दबेइ छड्डो। 8 पन ज़ैन रोड़ी ज़मीनी मां बिछड़ू, त तैस फल भी लगे केन्ची शौव गुणा केन्ची शठ गुणा, ते केन्ची टली गुणा। 9 ज़ै कोई समझनू चाते, तै ध्याने सेई शुने ते समझो।” 10 चेलेई यीशु कां एइतां पुच्छू, “तू लोकन सेई कहेनी केरे तरीके सेई गल्लां किजो केरतां?” 11 तैने जुवाब दित्तो, “तुसन त स्वर्गेरे राज़ेरे भेदां केरि समझ दित्तोरीए” पन होरि लोकन नई। 12 किजोकि ज़ैस कां परमेशेरी मर्ज़ी समझनेरी इच्छा आए, तैस परमेशर जादे समझ देलो। पन ज़ैस कां परमेशेरी मर्ज़ी समझनेरी इच्छा नई, तैस केरां, थोड़ी ज़ेरी समझ, ज़ै तैस कां आए, तै भी नी गाली। 13 अवं तैन सेई एल्हेरेलेइ कहेन्न मां गल्लां केरतां, कि तैन, तैना बार-बार शुनेले, पन मेरी गल न समझले। 14 तैन केरे बारे मां यशायाह नेबेरी भविष्यवाणी पूरी भोतीए, “तुस कन्नेई सेई त शुनेले पन समझले न, तुस एछछन सेई त लाएले पन पिशैनी न सकेले।” 15 “किजोकि एना लोकां केरे दिलन पुड़ चरभी भेरोरीए, ते एना कन्न सेई उकडु शुन्तन, ते एनेई अपनि एछछी तुमोरिन, एरू न भोए कि तैना एछछेई सेई लहन, ते कन्नेई सेई शुन्ने ते दिले सेई समझन, ते मेरे पासे फिरन ते अवं तैन बज़्जेइं।” 16 “पन तुशशी एछछी धन आन, कि तुस लातथ ते तुशशे कन्न धन आन किजोकि तुस शुन्तन। 17 अवं तुसन सेई सच ज़ोताई, कि बड़े नेबी ते धेरमी लोकेई चाव कि ज़ैन गल्लां तुस हेरतथ तैना हेरन, पन न हेरी बेटि, ते ज़ैना गल्लां तुस शुन्तन शुन्, पन न शुनी बेटि।” 18 “हुनी तुस बीज़ बेनेबालेरी कहेनरो मतलब शुना। 19 बीज़ बेनेबालो तै आए, ज़ै परमेशेरी गल्लां लोकन शुनाते। ज़ैना मैन्हु परमेशेरी गल्लां शुन्तन, तैन मरां किछ लोक तैस बत्तेरे ज़ेरे आन, ज़ेड़ी बीज़ बिछड़ते। तैना त परमेशेरी गल्लां शुन्तन, पन शैतान अकदम एइतां तैन मैन्हु केरे दिले मरां परमेशेरी गल्लां केड्डी छड्डते। 20 ते ज़ैन घोड़नबाली ज़मीनी मां बेवं, एना तैना आन, ज़ैना खुशी सेई वचन शुन्तन कबूल केरतन। 21 पन एप्पू मां ज़ील न रखनेरे वजाई सेई तैन थोड़े दिहाड़ी केरूप, ते ज़ैखन वचनेरे वजाई सेई तैन पुड़ मुसीबत या जुलाम भोते त तैखने ठोकर खातन। 22 होरे किछ लोक ज़ैना परमेशेरी गल्लां शुन्तन, तैना तैस कंटां केरे झैल्लां केरे ज़मीनेरे ज़ेरे आन। पन दुनियारो फिक्र ते दौलतरे वजाई सेई धोखो खातन, ते तैना बेफल रेइ गाते। (aiōn g165) 23 ज़ैन रोड़ि ज़मीनी मां बेवं, एन तैना लोकन ज़ैना वचन शुन्तन ते समझतन, ते तैस फल भी लगते कोन्ची शौव गुणा कोन्ची शठ गुणा, ते केन्ची टली गुणा।” 24 यीशुए तैन अक होरि मिसाल देइतां ज़ोवं, “स्वर्गेरू राज़ तैस मैनेरू ज़ेरूप ज़ैनी अपने ऊडारे मां रोड़ू बीज़ बेवं। 25 पन ज़ैखन लोक झुलारो थिये, त तैसेरे

दुश्मने एइतां तैसेरे ऊडारे मां गेहुं केरे बीजे मांमेइ जंगली बीज बेवं। 26 जैखन पटलां ते शिल्लां लगां लगने त तै जंगली डाल भी साथी लग्गो। 27 मालिकेरे नौकरेई एइतां तैस सेइं ज़ोवं, “हे मालिक, कुन तीं अपने ऊडारे मां रोडू बीज न थियूं बेवरू, फिरी जंगली तैस मां कोट्ठां अव?” 28 तैनी तैन सेइं ज़ोवं, एन केन्ची दुश्मनेरू कम्मे, नौकरेईं पुच्छू कुन तू चातस, कि अस गोइतां तैन पुट्टी छडम? 29 पन तैनी ज़ोवं नन्ना, एरू न भोए कि तैस सेइं साथी तुस गेहुं भी पुटथ। 30 फसल लुन्ने तगर दुइये साथी बेडोने देथ, ते लुनते बार अव एप्पू लुन्ने बालन सेइं ज़ोइलो, कि पेडले जंगली बीज लुन्तां अग्गी मां फुकनेरे लेइ अकोट्टू केरा, ते फिरी तुस गेहुं मेरे कोठारे मां जम्हां केरतां रख्खा।” 31 तैनी तैन अक होरि मिसाल देइतां ज़ोवं, “स्वर्गेरू राज़ शरीएरे बीजेरू ज़ेरू आए, ज़ैन एक्के मैने आनु ते अपने ऊडारे मां बेवं। 32 एन बीज सेल्भी बीजिन करां निक्कु भोते, पन ज़ैखन तैन बीज बेव गाते, त तैन उगतां सारे निक्के-निक्के बुट्टन केरां बड्डू भोते। ते एरो बुट बनते इडी तगर कि अम्बरेरां चुडोल्लू भी तैस पुइ बिशतन।” 33 तैनी तैन अक होरि मिसाल देइतां ज़ोवं, “स्वर्गेरू राज़ अम्लेटेरू ज़ेरूए, ज़ैन केन्ची कुआन्शां आनु, ते हळे अट्टे मां मलाव ते सारू अट्टू खमीर बेनि ज़ोवं।” 34 एन सैरी गल्लां यीशुए तैन लोकन मिसाल देइतां शुनातो थियो, ते मिसाल देनेरे बगैर तै तैन किछ न थियो शुनातो। 35 ताके तैन वचन ज़ैन नेबे ज़ोवरो थियूं पूरू भोए, “अवं कहैनी केरे लेइ अपनि ज़बान खोल्लेलो, ते तैना गल्लां ज़ोइलो ज़ैना दुनिया बन्ने करां पेइली छेप्पोरी थी।” 36 तैखन यीशु लोकन करां अलग भोइतां घरजो अव, ते तैसेरे चलेई तैस कां एइतां ज़ोवं, “तू असन ऊडारेरे जंगली बीजेरी कहैनरो मतलब समझा।” 37 तैनी तैन जुवाब दित्तो, “रोडू बीज बेनेबालो मैनेरू मट्टूए। 38 ऊडार ई दुनियाए, ते रोडू बीज राज़ हासिल केरनेबाले लोक, ते जंगली बीज शैतानेरे लोक आन। 39 ते तै दुश्मन ज़ैनी तैन बेवरू थियूं तै शैताने, लुन्नेरो मतलब इस दुनियारो अन्त भोनीए, ते लुन्ने बाले स्वर्गदूतन। (aiōn g165) 40 जेन्चरे जंगली बीजेरे ग्लेव अकोट्टे केरतां अग्गी मां फुकतन, तेन्चरे इस दुनियारो अन्त भोनीए। (aiōn g165) 41 मैनेरू मट्टू अपने स्वर्गदूतन भजेलू, ते तैन केरे राज़े मां ठोकरारी वजा ते बुरां कम्मां केरनेबालन अकोट्टे केरेले। 42 ते तैन अगगारे कुण्डे मां छडले, ज़ैडी तैना लोक लेरां देते ते दंत चापते राले। 43 तेइस धर्मी लोक अपने बाजी केरे राज़े मां दिहाडेरे ज़ेरे चमकेले। ज़ै कोई समझनु चाते, तै ध्याने सेइं शुने ते समझे।” 44 “स्वर्गेरू राज़ तैस दौलतरू ज़ेरू ए, ज़ै एक्की ऊडारे मां दबोरी थी, ज़ै एक्की मैने तोप्पी, ते तैस मैल्ली भी, ते फिरी तैने छपेइतां छडी ते खुशी सेइं अपनू सब किछ बेचतां तैन ऊडार धिनु। 45 “स्वर्गेरू राज़ तैस बुपैरेरू ज़ेरूए, ज़ै कीमती मोती तोपतो थियो। 46 ज़ैखन तैस अक कीमती मोती मैल्ली, त तैनी अपनू सब किछ बेचतां ते मोती धिनु। 47 “स्वर्गेरू राज़ तैस मेछली जालेरू ज़ेरूए, ज़ैन समुन्द्रे मां छडू ते तैस मां हर किसमेरी मेछली लेग्गी। 48 ते ज़ैखन ज़ाल भेरोई ज़ोवं त डिरेईं ज़ाल खिचतां कनारे पुइ आनु, ते बिशतां रोडी-रोडी मेछली टोकरन मां रेख्खी

ते बुरी-बुरी मेछली शैरी छैडी। 49 दुनियारे अन्ते मां भी एरू भोनीए, स्वर्गदूतेई एइतां दुष्ट लोक, धर्मी लोकन करां अलग केरनेन। (aiōn g165) 50 ते तैना अगारी भेठी मां छडनेन तैडी लेरां ते दंत चापने भोले। 51 “कुन तुसेई एन सैरी गल्लां सेमझी?” तैनेई ज़ोवं, “हाँ” असेई सेमझी। 52 फिरी यीशुए तैन सेइं ज़ोवं, “हर अक शास्त्री ज़ै स्वर्गेरे राज़ेरो चेलो बनोरोए एक्की एरे मुकान मालिकेरो ज़ेरोहे, ज़ै अपने खज़ाने मरां नर्वीं ते पुरैनी चीज़ां कढते।” 53 ज़ैखन यीशुए एना सब कहैनी शुनेई त तै तैट्ठां अग्रोवं चलो जेव। 54 ते अपने नगर मां एइतां तैट्टेरे प्रार्थना घरे मां गोइतां शिक्षा देने लगो, ते लोक तैसेरी शिक्षा शुन्तां हैरान भोए ते ज़ोने लग्गे: “ए अक्ल बुधी ते एना चमत्कार एस कोट्ठां हासिल भोए। 55 एन त तैस ट्लखानेरू मट्टू आए ते एसैरे अम्मारू नवं मरियम ते एसैरे ढलां केरू नवं याकूब, यूसुफ, शमीन ते कने यहूदा आन, 56 ते एसैरी सब बेइनां इश्शे इडी रेइचन, फिरी एसमां ई काबलीत कोट्ठां आई?” 57 एन्चरे तैन लोकेई इन्कार कियो। पन यीशुए तैन सेइं ज़ोवं, “नबी अपने नगर मां ते अपने घरेरे अलावा होरि कोन्ची ठारी बेइजत न भोए।” 58 ते तेने तैडी तैन केरे विश्वास न केरनेरे वजाई सेइं जादे चमत्कार न हिराए।

14 जेइस हेरोदेस ज़ै मुलखेरे च़ेवरोवं हिस्से पुइ हकोमत केरतो थियो, तैनी यीशुएरे बारे मां शूनु। 2 तैनी अपने नौकरन सेइं ज़ोवं, “ए यूहन्ना आए ज़ै बपतिस्मो देनेबालोए, ए मुइदन मरां ज़ींतो भोरोए, एल्हेरेलेइ तै चमत्कार हिराते।” 3 किजोकि हेरोदेसे अपने ढ्लाए फिलिप्पुरी कुआन्श हेरोदियासेरी वजाई सेइं यूहन्ना टलेइतां बन्धोवरो ते कैदखाने मां छडोरो थियो। 4 किजोकि यूहन्ना हेरोदेस सेइं ज़ोरू थियूं, कि ए रखनी तेरे लेइ जेइज नई। 5 ते हेरोदेस तैस कल्ल केरनो चातो थियो, पन लोकन करां डरतो थियो, किजोकि लोक तैस नबी मन्ते थियो। 6 पन ज़ैखन हेरोदेसेरी ज़र्म दिहैडी आई, त हेरोदियासेरे कुइयां मेहमाना केरे सामने नेचतां हेरोदेस खुश कियोरो थियो। 7 एल्हेरेलेइ तैनी वादो कियोरो थियो, “कि ज़ैन किछ तू मग्गेली, अवं तीं तैन्ने देलो।” 8 तैसां अपने अम्मारै शिखालने पुइ ज़ोवं, “मींजेई यूहन्ना बपतिस्मो देनेबालेरी क्रोडी थाले मां मग।” 9 राज़े बडो अफ़सोस भोव, पन अपने मेहमाना केरे सामने ते कसम खानेरी वजाई सेइं हुक्म दित्तो कि देथ। 10 ते तैनी कैदखाने मां लोक भेजतां यूहन्नारी क्रोडी कटाई। 11 ते तैसेरी क्रोडी थाले मां रेखतां कुइये कां दित्ती, ते तै अपनि अम्मा कां घिन्तां जेई। 12 तैखन तैसेरे चले आए, ते तैनेई तैसेरी लाश नेइतां देबतां छडी ते गोइतां यीशुए पतो दित्तो। 13 ज़ैखन यीशुए एन शूनु, त तै किशतरे ज़िरिये अकेन्ती ठारी जो चलो जेव, ते लोक एन शुन्तां नगर नगरेरे पैदल तैस पत्ती चले जे। 14 ज़ैखन यीशु किशती मरां ओस्सो त तैनी बडे लोक पतोरं एइते लाए, ते तैस तैन पुइ बडो तरस अव, ते तैनी तैन केरे बिमार लोक बड़्झाए। 15 ज़ैखन इलोइ भोइ, त यीशुएरे चलेई तैस कां एइतां ज़ोवं, “ई सुनसान ठार आए, त त्रिर भी बडू भोरू आए। ते एन लोकन भेजी छड ते कोस्कोई इलॉव्वन मां गोइतां किछ खाने जो घिन्ना।” 16 यीशुए तैन सेइं ज़ोवं, “एना भेजने ज़रूरी नई! तुस्से एन किछ खाने

जो देथ।” 17 चलेई तैस सेइं ज़ोवं, “इड़ी असन कां पंच रोटी ते दूई मेछली केरे अलावा होरू किछ नई।” 18 तैनी ज़ोवं, “तैन इरां मीं कां आना।” 19 तैखन यीशुए लोकन घासे पुड़ उन्दे बिशनेरे लेइ ज़ोवं, ते पंच रोटी ते दूई मेछली हथ्ये मां रेख्खी, ते अम्बरेरे पासे तेकतां शुक्र कियूं, ते रोटी टलोड़ी-टलोड़ी अपने चेलन कां दित्ती, ते चलेई तैन लोकन दित्ती। 20 ते सारे मैन्हु खेइतां रेज़्ज़ी जे। तैल्ला पत्ती, यीशुएरे चलेई बचोरे टुकड़न सेइं 12 टोकरी भरि। 21 रोटी खानेबाले लोकां केरि तैथात कुआन्शां ते बच्चां केरे अलावा कोई 5000 मड़द थिये। 22 तैल्ला पत्ती, यीशुए अपने चेलन हुकम दित्तो कि, तुस किशती मां चेट्टां मीं केरां पेइले समुन्दरेरे उस पार जो गाथ ते अवं एन लोकन वापस भेजतां एइताई। 23 लोकन भेजनेरे पत्ती, यीशु तैट्ठां निस्तां नेडे एककी पहैड़ी पुड़ प्रार्थना केरनेरे लेइ जेव। ते इलोइती तै अकैल्लो थियो। 24 तैखन किशती बन्ने करां दूर पुजोरी थी, किजोकि एग्रोवरां बड़ी तेज हवा चलोरी थी। 25 ते लगभग झेइंजेरे चेत्रे बजेई जैखन हेजू आंधरू थियूं, यीशु समुन्दरेरे पैनी पुड़ चेलतां अपने चेलन कां अव। 26 जैखन चलेई यीशु समुन्दरे पुड़ चलतो लाव त तैना डेरि जे, तैनेई बुझू, “ए भूत ओरोए,” ते डेरतां चिन्दां लग्गे मारने। 27 यीशुए तैखने तैन सेइं रोडेचारे गल्लां की ते ज़ोवं, “हिम्मत रख्खा डरा नन्ना, अवं आई।” 28 पतरसे तैस जुवाब दित्तो, “हे प्रभु अगर तू आस, त मीं भी हुकम दे ते अवं भी पैनी पुड़ चलतो तीं कां एज्जी।” 29 तैनी ज़ोवं, “एई!” तैखन पतरस किशती मरां ओस्तां यीशु कां गानेरे लेइ पैनी पुड़ मेइं चलने लग्गे। 30 पन तेज हावी सेइं छेल्ली चलने लेग्गी ते तै डेरि जेव, ते डुबने लग्गे तैखन तैनी चिन्दां मैरतां ज़ोवं, “हे प्रभु मीं बच्चा।” 31 यीशुए लूशीं अपने हथ्ये सेइं झफ देइतां पतरस टलातो, ते तैस सेइं ज़ोवं, “हे घट भरोसे बाला तीं किजो शक की?” 32 जैखन तैना किशती मां बिश्शे ते हवां रुकी जेई। 33 तैखन जैना किशती मां बिश्शोरे थिये, त तैनेई तैस कां मथ्यो टेको ते ज़ोने लग्गे, “तू सच्चे परमेशेरेरू मटूस।” 34 जैखन तैना गलील समुन्दर पार केरतां गन्नेसरत नंवेरे जगाई पुड़ पुज्जे। 35 त तैट्टेरे लोकेई यीशु पिशानो ते आसेपासेरे इलाके मां खबर दित्ती, ते सारे बिमार तैस कां आने। 36 ते तैनेई यीशु सेइं मिन्त केरते थिये कि, तैन तैसेरे लिगड़न सेइं हुरने दे। ते जेचेत्रेइं तैसेरे लिगड़न सेइं हथ लाव तैना सब बेइज्जोए।

15 तैखन किछ फरीसी ते किछ शास्त्री लोक यरूशलम नगरे मरां यीशु कां आए ते ज़ोने लग्गे। 2 “तेरे चले बुजुर्गां केरि रसमरे खलाफ किजो चलतन, तैना रोटी खाने करां पेइले हथ न धोन?” 3 तैनी तैन जुवाब दित्तो, “तुस किजो अपने रसमन सेइं परमेशेरेरो हुकम टलोइतथ? 4 किजोकि परमेशेरे ज़ोरूए, कि अपने हाज बव्वेरी इज्जत केरा, ते ज़ै कोई अपने हाज बव्वे जो बुरू ज़ोलो ते मारो गालो। 5 पन तुस ज़ोतथ, कि ज़ै कोई बाजी या अम्मा सेइं ज़ोए कि, मीं करां ज़ै किछ मद्दत तुसन मैल्ली सकती थी, ते पेइली बलिदान भोरीए, यानी परमेशेरे जो चढतल चाढोरीए 6 त तै अपने बाजी केरि इज्जत न केरे, एन्चरे तुस अपने रसमन सेइं परमेशेरेरो हुकम टलोइतथ। 7 हे पाखंडी

लोकव, यशायाह नेबे तुश्शे बारे मां ई भविष्यवाणी ठीक कियोरीए, 8 एना लोक ऐशी सेइं त मेरी बड़ी तारीफ़ केरतन, पन एन केरे दिल मीं करां बडे दूर आन। 9 एना लोक बेफैइदी मेरी आराधना केरतन, किजोकि एना मैन्हु केरे हुकमां केरि शिक्षा देतन।” 10 फिरी मैन्हु एप्पू कां कुजेइतां ज़ोवं, “शुना, ते समझा। 11 ज़ै चीज़ ऐशी मां गाचे तैस सेइं मैन्हु जुट्टो न भोए, पन ज़ैन तैसेरे ऐशी मरां बेइरोवं निस्ते, तैने तैस जुट्टो केरते।” 12 तैखन चलेई यीशु कां एइतां ज़ोवं, “कुन तू ज़ानतस कि फरीसी लोकेई ए गल शुन्तां ठोकर खाइ?” 13 तैनी जुवाब दित्तो, “ज़ै बट मेरे स्वगरे बाजे नई लोरो तै ज़ीलना पुटतां छडनोए। 14 तैन केरि परवाह न केरा, तैन काने बत हिराने बालेन, अगर अक कानो होरि काने बत हिराए, त तैना दुइये गढे मां बिछड़ेले।” 15 एन शुन्तां पतरसे ज़ोवं, “ए मिसाल असन समझा।” 16 यीशुए ज़ोवं, “कुन तुस हेजू भी बेसमझाथ?” 17 “कुन तुस न ज़ानथ, कि ज़ैन किछ ऐशी मां गाते तैन पेटे मां गाते, ते फिरी पेटे मरां बेइर निस्ते? 18 पन ज़ैन किछ मैनेरे अन्त्रेरां निस्ते, तैन दिले मरां निसते, तैने मैन्हु जुट्टो केरते? 19 किजोकि बुरे खियाल, कल्ल केरनो, अइलाए देइने गलत कम केरनू, बदमाशी, चोरी, झूठी गवाही देनी, ते तुहीन दिले मरां निसचे। 20 एन एरी गल्लन जैना मैन्हु जुट्टो केरचन, पन हथ धोने बगैर रोटी खाने सेइं मैन्हु जुट्टो न भोए।” 21 यीशु तैट्ठां चलो जेव, ते सूर ते सैदारे आसेपासेरे इलाकेरे नेडे अव। 22 तैस इलाकेरी अक कनानी कुआन्श यीशु कां आई, ते चिन्दां मैरतां ज़ोने लग्गी, “हे प्रभु दाऊदेरा मट्ठां, मीं पुड़ दया केर, मेरी कुइये पुड़ भूतेरो सैयोए, तैन भूत तैस बडू सताते।” 23 पन यीशुए कोई जुवाब न दित्तो, तैसेरे चले नेडे एइतां तैस कां मिनत केरने लग्गे, “एस भेज, किजोकि ए चिन्दां मारचे ते इश्शो पीछो न छडे।” 24 तैनी जुवाब दित्तो, “अवं इसाएलेरी हेरोरि भैट्ठां केरे अलावा होरि कोन्वी कां नई भेजोरो।” 25 पन तै कुआन्श आई, ते तैस कां मथ्यो टेकतां ज़ोने लग्गी, “हे प्रभु मेरी मद्दत केर।” 26 तैनी जुवाब दित्तो, “बच्चां केरि रोटी नेइतां कुतरन देनी ठीक नई।” 27 तैसां ज़ोवं “सच्चे प्रभु, पन ज़ैन टुकड़े मालिकेरी मेजे पुडेरां बिछड़तन तैना कुतरां भी खातन।” 28 यीशुए तैस जुवाब दित्तो, “ए कुआन्श तेरो विश्वास बडोए, जेरू तू चातिस तेरे लेइ तेरहु भोए” ते तैसारी कुई तैखने बेइज्जोइ जेई। 29 यीशु तैट्ठां निस्तां गलील समुन्दरेरे बन्ने पुड़ अव, तैखन तै एककी पहाड़े पुड़ गेइतां बिश्शी जेव। 30 ते बडे लोकां केरि भीड़ तैस कां आई, तैन लोकेई एप्पू सेइं साथी टोंटे, काने, लट्टे, डोंडे ते होरे काई एरे ज़ेरे मैन्हु साथी आने, ते तैसेरे पावन कां छुट्टे, ते तैनी तैना सब बइज्जाए। 31 जैखन लोकेई हेरू कि लट्टे गल्लां केरतन कमज़ोर तकडे भोतन, टोंटे चलतन ते काने लातन त तैना बडे हैरान भोइ जे ते इसाएलेरे परमेशेरी तारीफ़ केरने लग्गे। 32 यीशुए अपने चले कुजेइतां तैन सेइं ज़ोवं, “मीं एन लोकन पुड़ बडो तरस एइते, एना मैन्हु टलेइ दिहैई केरे देंते बराबर मीं सेइं साथिन, ते एन कां खाने जो किछ भी नई। अवं एन नियन्ने भेजने न चैई, कोस्कोई एरू न भोए कि एना बत्ती मां रेइ गान।” 33 तैसेरे चलेई तैस जुवाब दित्तो “अस इस

सुनसान ठैरी मां एत्रे लोकां केरे लेइ रोटी कोट्टां आनम, जैना सेव्भी केरे लेइ पूरी भोन?" 34 यीशुए पुच्छू, "तुसन कां केत्री रोटी आन?" तैनेई ज़ोवं, "सत रोट्टिन ते किछ निक्की मेछली भी आन।" 35 तैखन तैनी लोकन ज़मीनी पुड़ बिशनेरे लेइ ज़ोवं। 36 ते यीशुए तैना सत रोटी ते मेछली टलेइ, ते परमेशेरू शुक्र केरतां टलोड़ी, ते अपने चलन कां दित्ती ते चलेई तैना मैनन् दित्ती। 37 सारे मैन्हु रोटी खेइतां रेज़्जी जे। तैल्ला पत्ती, यीशुएरे चलेई मेछली त कने रोटी केरे बच्छोरे टुकडन मरां सत टोकरे भरतां सल्ले। 38 रोटी खाने बालां केरि तैथात कुआन्शां ते बच्चां केरे अलावा 4000 मड्ड थिये। 39 तैखन तैने तैना सब लोक भेजे ते एप्पू किशती मां च़ेढतां मगदन इलाके जो च़लो जेव।

16 किछ फरीसी ते किछ सदूकी लोक यीशु कां आए, "ते तैस अज़मानेरे लेइ तैस सेइं ज़ोवं, असन कोई अम्बरेरो निशान हिरा।" 2 तैनी तैन जुवाब दित्तो, "ज़ैखन इलोइज़ भोतीए त तुस ज़ोतथ कि मौसम रोडोए किजोकि अम्बर लाले। 3 ते इल्लोइज़ ज़ोतथ कि अज़ आँधी एजनीए किजोकि अम्बर लाले ते बिदलारे, तुस अम्बर हेरतां अंदाज़ो लेइता ज़ोतथ, पन ज़मानेरो निशान न पिशैनी सकतथ! 4 इस ज़मानेरे बुरे ते बदमाशी केरनेबाले लोक निशान मगतन, पन तैन योना नेबेरे अलावा होरो कोई निशान न दित्तो गालो।" यीशु तैन शैरतां च़लो जेव। 5 ते यीशुएरे चले समुन्दरे पार पुज़ी जे, पन तैनेई रोटी साथी नेनी बिसरोरी थी। 6 यीशुए तैन सेइं ज़ोवं, "खबरदार फरीसी ते कने सदूकी लोकां केरे खमीरे करां हुशार रेइयथ।" 7 तैना एप्पू मांमेइं गलबात केरने लगगे, "असेई रोटी नई आनोरी, एल्हेरेलेइ तै एरू ज़ोने लोरोए।" 8 एन ज़ैनतां, यीशुए ज़ोवं, "हे घट विश्वेसव, तुस एप्पू मांमेइं किजो सोची राओरेथ, कि असन कां रोटी नई? 9 कुन तुसन याद नई? ज़ताली मीं 5000 मैन्हु केरे लेइ पंच रोटी टलोइतां दित्तोरी थी, त तुसेईं बादे मां बच्छोरी रोटी केरे केत्रे टोकरे भरतां सल्लोरे थिये? 10 ते तैन 4000 मैन्हु केरे लेइ सत रोटी ते टुकां केरि केत्री टोकरी सैल्लोरी थी? 11 तुस की न समझथ, कि मीं तुसन रोटी केरे लेइ न थियू ज़ोरू? पन फरीसी ते कने सदूकी लोकां केरे खमीरे करां हुशार रेइयथ।" 12 तैखन तैन केरि समझी मां अव, कि तैनी रोटी केरे लेइ नई, बल्के फरीसी ते कने सदूकी लोकां केरे खमीर यानी शिक्षाईं करां हुशार रानेरे लेइ ज़ोरू थियू। 13 ज़ैखन यीशु कैसरिया फिलिपी इलाके मां अव, त तैनी अपने चलन पुच्छू: "मैनेरू मट्टू कौने, लोक एस बारे मां कुन ज़ोतन?" 14 चलेई ज़ोवं, "किछ ज़ोतन यूहन्ना बपतिस्मो देनेबालोए, किछ ज़ोतन एलिय्याह, ते किछ ज़ोतन यिर्मयाह नबी ते किछ ज़ोतन नेबन मरां कोई अक आए।" 15 यीशुए तैन पुच्छू, "पन तुस मेरे बारे मां कुन सोचतथ कि अवं कौन आई?" 16 शमीन पतरसे जुवाब दित्तो, "तू ज़ीते परमेशेरू मट्टू मसीह आस।" 17 यीशुए ज़ोवं, "ए शमीन योनारे मट्टां तू धन आस, किजोकि ए गल मासे या खूने नई बल्के मेरे स्वर्गे बाजे तीं पुड़ बांदा कियोरीए। 18 ते अवं तीं सेइं ज़ोताई, तू पतरस आस ते अवं इस पक्के घोड़े पुड़ अपनि कलीसिया बनेइलो ते पातालारां दारां तैस पुड़ अस्सर न केरि बटेलां। (Mat 23: 1-39)

19 अवं अपने स्वर्गे राज़ेरी चौबी तीं देइलो, ते ज़ैन किछ तुस ज़मीनी पुड़ बंधेले तैन स्वर्ग मां बंधोलू, ते ज़ैन किछ तू ज़मीनी पुड़ खोल्लेलो तैन सब किछ स्वर्ग मां खुल्लेलू।" 20 तैखन यीशुए चलन जो ज़ोवं, ए गल केन्ची सेइं न जोइयथ कि अवं मसीह आई। 21 एसेरे बाद यीशुए अपने चलन ज़ोने लगे कि, "तैसेरू यरूशलेम नगरे मां गानू ज़रूरीए ताके यहूदी लोकां केरे बुजुर्गन, प्रधान याजकन ते शास्त्री लोकां केरे हथेइं तै बडो दुःख झैल्ले, ते मारो गाए ते तै टलेइयोवं दिहाड़े फिरी ज़ीतो भोलो।" 22 पतरस तैस अलग नेइतां झिड़कने लगे, "हे प्रभु, परमेशर न केरे, तीं सेइं एरू कथे न भोलू।" 23 यीशुए मुइतां पतरसे सेइं ज़ोवं, "हे शैतान, मीं करां दूर भो, तू मीं करां पाप करानेरी कोशिश कराने लोरोस। किजोकि तू ज़ेन्चरे परमेशर सोचते तेन्चरे नई बल्के ज़ेन्चरे मैन्हु सोचन तेन्चरे सोचतस।" 24 तैखन यीशुए अपने चलन सेइं ज़ोवं, "अगर कोई मीं पत्ती एजनी चाते त तै अपने आपेरो इन्कार केरे, ते अपनू कूस छुइतां मीं पत्ती च़ले।" 25 "किजोकि ज़ै कोई अपनि जान बचानी चालो, त तै तैस गुवालो, ते ज़ै अपनि जान मेरे लेइ गुवालो, त तै तैस हासिल केरेलो। 26 अगर कोई सारी दुनिया हासिल केरे, ते अपने हमेशारे ज़िन्दगी गुवाए, त तैस कुन फ़ैइदो भोलो? या मैन्हु हमेशारे ज़िन्दगरे बदले कुन देलो? 27 किजोकि ज़ैखन मैनेरू मट्टू अपने बाजेरी महिमाईं मां अपने स्वर्गदूतन सेइं साथी एज्जेलू, तैखन तै हर केन्ची तैन केरे कियोरे कम्मां केरो फल देलो। 28 अवं तुसन सेइं सच ज़ोतई कि ज़ैना इड़ी खडे आन, ज़ां तगर मैनेरे मट्टे अपने राज़े मां एइते न लाएले, तांतगर न मरेले।"

17 शेइ दिहाइना बाद, यीशु अपने चले पतरस, याकूब त तैसेरे ढ़ला यूहन्ना सेइं साथी एक्की पहाड़े पुड़ जेव, ज़ेड़ी कोई भी न थियो। 2 तैड़ी तैन केरे सामने तैसेरी शकल बेदलोई जेई, तैसेरू तुत्तर दिहाड़ेरू ज़ेरू चमकने लगू ते तैसेरां लिंगड़ां लोअरां ज़ेरां छित्तां भुआं। 3 तैखन तैनेई मूसा ते एलिय्याह नबी यीशु सेइं गल्लां केरते लाए। 4 पतरसे यीशु सेइं ज़ोवं, "हे प्रभु इश्शू इड़ी रानू रोडुए, अगर तू चातस त आस टलाई डेरे बनाम, अक तेरे लेइ ते अक मूसेरे लेइ ते अक एलिय्याहरे लेइ।" 5 तै ए गल ज़ोई राहोरो थियो, अक बड़ी चमकती बिदलार तैन पुड़ एइतां रुकी, ते तैस बिदलारी मरां ई आवाज़ आई, "एन मेरू ट्लारू मट्टूए, ज़ैस पुड़ अवं खुश आई, एसेरी शुना।" 6 चले एन शुन्तां तुत्तेरे भारे बिछड़े ते बड़े डेरि जे। 7 पन यीशुए एइतां तैन सेइं हथ लाव, ते ज़ोवं, "उठा, डरा नन्ना।" 8 ज़ैखन तैनेई च़ेरे पासन तक्कू, त यीशुएरे अलावा होरो कोई न लाव। 9 ज़ैखन तैना तैस पहाड़े पुडेरं उन्डे ओरे थिये, त यीशुए तैन ई हुकम दित्तो, ज़ैन किछ तुसेईं लाहेरूए, "ज़ां तगर मैनेरू मट्टू मुडदन मरां ज़ींतू न भोए तांतगर केन्ची सेइं न जोइयथ।" 10 तैसेरे चलेई तैस पुच्छू, "शास्त्री किजो ज़ोतन कि मसीहेरे एजनेरां पेइले, एलिय्याह नेबेरू दुनियाईं मां एजनु ज़रूरी आए?" 11 तैनी जुवाब दित्तो, "एलिय्याह ज़रूर एज्जेलो ते सब किछ बहाल केरेलो। 12 पन अवं तुसन सेइं ज़ोतई कि 'एलिय्याह' त पेइले ओरोए, पन लोकेई तै न पिशानो, पन ज़ैन चाउ तैस सेइं तैने कियू, एन्चरे मैनेरू मट्टू भी तैन केरे

हथान सेइं दुःख भोगेलो।” 13 तैखन चलेईं बुझू कि असन सेइं यूहन्ना बपतिस्मो देनेबालेरे बारे मां ज़ोने लोरोए। 14 ज़ैखन तैना हल्ले मैन्हु केरि बडी भीडी कां पुजे, त अक मैन्हु तैस कां अव, ते ज़ैधू केरे भारे बिशतां ज़ोने लगो। 15 “हे प्रभु मेरे मट्टे पुड़ दया केर, तैस मिरगरी वजाई सेइं दौवरे एइतन, ते तैस बडो दुखे, ते बार-बार अग्गी मां ते बार-बार पैनी मांजो खिरकते। 16 मीं तैन तेरे चेलन कां आनोरू थियूं, पन तैनेईं तैन ठीक न केरि बटु।” 17 यीशुए ज़ोवं, “हे घट विश्वावैसव ते ढीठ लोकव, अवं केइस तगर तुसन सेइं साथी भोनीईं, केइस तगर तुशशी झैलतो रेइलो? तै मीं कां आनां।” 18 तैखन यीशुए तैन भूत झिड़कू, ते तैस पुड़ां सैयो निस्सी जेव, ते तैन मट्टू तैखने ठीक भोइ ज़ोवं। 19 तैखन चलेईं अकैल्ले ज़ेरे यीशु कां गेइतां पुच्छू, “अस तैस मट्टे मरां भूतेरो सायो की न केइडी सके?” 20 तैनी तैन सेइं ज़ोवं, “अपने घट विश्वासेरे वजाई सेइं, अवं तुसन सेइं सच ज़ोताई, अगर तुशशो विश्वास शरीएरे ग्लेवे ज़ेत्रो भी भोए, त तुस उस पहाड़े जो ज़ोले कि, ‘इट्टां निस्तां उडी गा,’ त तैन गालू, ते तुशशे लेइ कोई भी गल असुखती न भोली। 21 पन इस किसमरां भूतां प्रार्थना ते बरते बगैर न निस्सन।” 22 ज़ैखन तैना गलीले मां थी, त यीशुए तैन सेइं ज़ोवं, “मैनेरू मट्टू भी मैन्हु केरे हवाले कियूं गालू। 23 तैना तैस मारिले, ते तैन ट्लेइयोवं दिहाड़े फिरी ज़ींतो भोली।” चले एन शुन्तां बडे परेशान भोए। 24 ज़ैखन तैना कफरनहूम नगर मां पुजे, त प्रार्थना घरेरे लेइ चुंगी घिन्ने बाले पतरसे कां एइतां पुच्छू, “कुन तुशशो गुरू प्रार्थना घरेरी चुंगी न दे?” 25 तैनी जुवाब दित्तो, “हाँ देते।” ज़ैखन पतरस घरे मां पुजो त यीशुए तैसेरे पुछनेरे पेइले तैस सेइं ज़ोवं, “हे शमौन तू कुन समझतस? दुनियारे राजे कोन लोकन करां चुंगी घिन्तन अपने बचन करां या होरि लोकन करां?” 26 पतरसे तैस सेइं ज़ोवं, “होसन करां।” यीशुए तैस सेइं ज़ोवं, “त मट्टां बरी भोइ जेआं। 27 फिरी भी एल्लेरेलेइ कि अस तैन ठोकर न देम, तू समुन्दरे पुड़ गेइतां कंटो लेइतां मेछली ट्लेइयां, ते ज़ै मेछली पेइली लगेली, तैसारू आशी खोल्लां, ते तीं अक सिक्को मैलनोए, ते तै सिक्को नेइतां मेरी ते अपनि चुंगी देइयां।”

18 तैखन चले यीशु कां आए ते पुछने लगगे, “स्वगरे राजे मां सेबन करां बड्डो कौने?” 2 तैनी अक निकडो बच्चेो एण्पू कां कुजाव, ते मझाटे खडो कियो। 3 ते ज़ोने लगो, “अवं तुसन सेइं सच ज़ोताई, कि तुस अपनो आप बेदलतां निकडे बच्चेरो ज़ेरे न बनथ, त तुस स्वगरे राजे मां कधी दाखल न भोले। 4 ज़ै कोई अपनो आप इस बच्चेरो ज़ेरो निकडो बनालो, त तै स्वगरे राजे मां बड्डो भोली। 5 ते ज़ै कोई एरे ज़ेरे निकडे बच्चे मेरे नंवे सेइं कबूल केरते, त तै मीं कबूल केरते।” 6 “ज़ै कोई इन निकडन मरां ज़ैना मीं पुड़ विश्वास केरतन एक्केरे लेइ ठोकर बने, त तैसेरेलेइ एन्ने रोडू आए कि बडे ढलाटेरो ढलेइटोल तैसेरे गल्ले उन्डो ढंढेइतां दुधे समुन्द्रे मां डोबतां छडोरो लोइते। 7 ठोकरां केरि वजाई सेइं दुनियाई पुड़ अफ्रसोस। ठोकरां लेग्गीन त

ज़रुरन पन, अफ्रसोस तैस मैन्हु पुड़ जेसेरी वजाई सेइं ठोकर लगगीए। 8 अगर तेरो हथ या तेरो पाव तेरे लेइ ठोकरारो ज़िरयो बनते, त तू तैस केरतां छड, किजोकि तेरू टोंटु या कानू बेनतां ज़िन्दगी मां दाखल भोनु रोडूए, ते तेरे दुइये हथ पाव सथे भोने सेइं अगर तू हमेशारी अग्गी मां गास त तैल्ला केरतां तू टोंटो या कानो बेनतां रोडोस। (aiōnios g166) 9 अगर तेरी अछ तेरे लेइ ठोकरां वजा बनती, त तू तैस केरतां शैरी छड, कानू भोइतां ज़िन्दगी मां दाखल भोनु तेरे लेइ रोडूए, कि दुइये एछछी भोने सेइं तू नरकेरी अग्गी मां गास त तैल्ला रोडोस।” (Geenna g1067) 10 “हेरा इन निक्के चेलन मरां तुस केन्ची घटिया न बुझा, अवं तुसन सेइं ज़ोताई कि तैन केरे स्वर्गदूत हर वक्त स्वर्ग मां मेरे बाजी केरे हज़ूरी मां रातन। 11 (किजोकि मैनेरू मट्टू यानी अवं हेरोरे लोकन बचाने ओरोई।) 12 तुशशो खियाल कुने? कि केसकोई कां 100 भैट्टां भोन, ते तैस मरां अक हेरोए, त कुन तै नडेनुवं भैट्टां ज़ैडी खतरन न भोए तैडी छेइतां, तैस हेरोरि न तोपेलो? 13 ते अगर एरू भोए, तैस तै मैल्ले, त अवं तुसन सेइं सच ज़ोताई कि तै तैना नडेनुवं केरे लेइ एत्री खुशी न मनालो, ते तैस एक्की भैडारे लेइ जादे खुशी बनालो। 14 एन्चरे तुशशो बाजी ज़ै स्वर्ग मां, तै एन न चाए कि एन निकन मरां भी कोई नाश न भोए।” 15 “अगर कोई मीं पुड़ विश्वास केरनेबालो ढला तीं सेइं बुराई केरते, त तू अकैल्ले मां तैस समझा, अगर तै तेरी गल शुने, त तीं तै वापस परमेशरे कां आनो। 16 अगर तै तेरी गल न शुने, त तू एण्पू सेइं साथी अक या दूई मैन्हु नेइयां, किजोकि मूसरे कानूनरे मुताबिक हर शिकैइतरी मां दूई या ट्लाई मैन्हु गवाह भोतन। 17 अगर तै तैन केरि भी न शुने, त तू कलीसियारे लोकन सेइं ज़ो, अगर तै कलीसियारे लोकां केरि भी न शुने, त तू तैस सेइं एरो बर्ताव केर जेन्चरां तै गैर कौमरो भोए या चुंगी घिन्ने बालो भोए।” 18 “अवं तुसन सेइं सच ज़ोताई, जैन किछ तुस ज़मीनी पुड़ बंधेले त समझा कि स्वर्ग पुड़ बंधोलू, ते ज़ैन किछ तुस ज़मीनी पुड़ खोल्लेले त तैन स्वर्ग मां खुल्लेलू। 19 फिरी अवं तुसन सेइं सच ज़ोताई, कि अगर तुसन मरां दूई जने धेरीत पुड़ अक मन भोइतां कोन्ची मसलैरे हल कढनेरे लेइ परमेशरे करां ज़ै स्वर्ग मां आए मद्दत मगन, त तै तैन केरि मद्दत ज़रूर केरेलो। 20 किजोकि ज़ैडी दूई या ट्लाई मैन्हु, मेरे नव्वे सेइं परमेशरे करां मद्दत मगनेरे लेइ अकोट्टे भोतन, अवं तैडी तैन केरि मद्दत केरनेरे लेइ तैन मां भोइताई।” 21 तैखन पतरसे यीशु कां एइतां पुच्छू, “प्रभु अगर कोई तीं पुड़ विश्वास केरनेबालो, मीं सेइं बुराई केरतो राए, त अवं केत्रे बार तैस माफ़ केरि? कुन सत बार?” 22 यीशुए जुवाब दित्तो, “अवं तीं सेइं इन न ज़ोई सत बार, बल्के सत्तेरे सत्तर बार माफ़ करां (यानी लगातार माफ़ केरतू रानू)। 23 बरसा अवं तुसन सेइं इन ज़ोताई, स्वर्ग रू राज तैस राजे ज़ेरू आए, ज़ैनी सोचू कि अवं अपने नौकरन करां हिसाब धिनी। 24 ज़ैखन तै हिसाब घिन्ने लगो, त अक मैन्हु तैस कां हाज़र कियो, ज़ै दश हज़ार सोन्नेरे सिक्कां केरे तोड़ां केरो कर्जदार थियो। 25 तैस कां कर्जो मुकाने जो किछ न थियूं, राजे हुक्म दित्तो, एसेरे बाल बच्चे ते कुआन्था ते ज़ैन किछ भी आए सब बेचतां

कर्जों उसूल केरा। 26 पन तै नौकर ज़ोवले हथ केरतां मालिके कां मिनत केरतां ज़ोने लगे, “मीं किछ मौको दे, ते अवं तेरो सारो कर्जों मुकालो।” 27 मालिके तैस नौकरे पुड़ बड़ो तरस अवं, ते तैनी तै छैडी दित्तो ते तैसेरो कर्जों भी माफ़ कियो।” 28 “पन ज़ैखन तै नौकर तैद्वं चलो जेव, त तैस अक एरो नौकर मैल्लो, जै तैसेरो साथी थियो, ते तैस तैनी 100 दीनार दित्तोरे थियो, तैनी तै गलेरां द्लाव ते ज़ोने लगे, ‘मेरो कर्जों कढ।’ 29 तैसेरो साथी नौकर तैस्से कां मिनत केरने लगे, मीं किछ मौको दे ते अवं तेरो सारो कर्जों मुकालो। 30 पन तैनी तैसेरी अक गल भी न शुनी, ते तैनी तै डेपतां छुट्टो कि ज़ां तगर कर्जों न देस तांतगर ढप्पोरो रा। 31 ज़ैखन होरि नौकरेई एन शूनू, त तैना बड़े परेशान भोए, ते मालिके कां गेइतां सारो हाल शुनाव। 32 तैखन मालिके तै अपने नौकर कुजेइतां ज़ोवं, ‘ओ बेईमान नौकरा मीं तेरो सारो कर्जों माफ़ कियो, किजोकि तीं मीं कां छंदे कियोरे थियो। 33 कुन तेरे लेइ ज़रूरी न थियूं कि ज़ेन्चरे मीं तीं पुड़ दया केरतां तेरो कर्जों माफ़ कियो, तेन्चरे तू भी अपने सैथन पुड़ दया केरतां तैन केरो कर्जों माफ़ केरेथो?’ 34 मालिके सरक आई, ते तैनी तै नौकर सज़ा देनेबालां केरे हवाले कियो, कि ज़ां तगर मेरो सारो कर्जों न दे तांतगर ढप्पोरो भोए। 35 “एन्चरे अगर तुसन मरां हर कोई, तैस मैन्हु जै मीं पुड़ विश्वास केरते दिले सेइं माफ़ न केरे त मेरो स्वर्गेर बाजी यानी परमेशर भी तुसन सेइं एन्चरे पैश एज्जेलो।”

19 ज़ैखन यीशुए एन गल्लां ज़ोई छैडी, त तै गलीले मरां गेइतां यरदन दरियारे पार यहूदिया इलाके मां चलो अवं। 2 बड़े लोक यीशु पत्ती चले जे, ते यीशुए तैना तैडी बज़्ज़ाए। 3 तैखन फरीसी लोकेई यीशु कां एइतां तैस अज़मानेरे लेइ पुच्छू, “कुन मैन्हु अपनि कुआन्श केन्ची भी वजाई सेइं फारखती देनी जेइजे?” 4 तैनी जुवाब दित्तो, “कुन तुसेईं नईं पढ़ेरू कि ज़ैने तैना बनां तैनी शुरू करां मड़द ते कुआन्श बनेवरां थियां। 5 “एल्हेरेलेइ मड़द अपने हाज बच्चे करां कनारे बिशतां अपनि कुआन्शी सेइं साथी रालो, ते तैना दुइये अक जान भोलां।” 6 एल्हेरेलेइ हुनी तैना परमेशरिरी नज़री मां दूईं नईं, पन अक्के आन। एल्हेरेलेइ ज़ैना परमेशरे ज़ोइोरेन, तैनू कोई मैन्हु अलग न केरे।” 7 तैनेईं तैस पुच्छू, “फिरी मूसे ए हुकम किजो दित्तो कि फारखती लिखतां छैडी देथ?” 8 तैनी तैन सेइं ज़ोवं, “मूसे तुशे सखत दिलेरी वजाई सेइं अपनि कुआन्शन छडनेरो हुकम दित्तोरो थियो, पन शुरू करां एन न थियूं। 9 अवं तुसन सेइं सज़ ज़ोताई, कि ज़ै कोई अपनि कुआन्शी बदमेशरे अलावा कोन्ची होरि गल्ली पुड़ फारखती दे, ते तै केन्ची होरि सेइं इला बनाते, त तै (एप्पू) बदमाशी केरते। ते जै तैस शैरोरी कुआन्शी सेइं इला बनाते, त तै भी बदमाशी केरते।” 10 चेलेईं यीशु सेइं ज़ोवं, “अगर मड़द ते कुआन्शारे रिशतेरो ई हाले त इला न लोइे बनोरो।” 11 यीशुए तैन सेइं ज़ोवं, “ए गल सब कबूल न केरि बटन, सिर्फ तैना ज़ैन परमेशर ई काबलीत दित्तोरीए। 12 किछ त ज़र्मिनेरि हिजड़े भोतन ते किछन लोक बनातन, ते किछ एरे भी आन, कि ज़ैन स्वर्गेर राज़ेरे लेइ इला न बनान, ते ज़ैना इना गल्लां सेमझी सकतन तैना समझन।” 13 तैखन लोकेईं

बच्चे यीशु कां आने, कि तैन पुड़ हथ रेखतां प्रार्थना केरे, पन चलेईं तैना लोक झिड़के। 14 यीशुए ज़ोवं, “बच्चे मीं कां एजने देथ, तैन न ठाका, किजोकि स्वर्गेरू राज़ एरां केरूए।” 15 ते तै बच्चन पुड़ हथ रेखतां तैद्वं अग्रोवं चलो जेव। 16 हेरा, अक मैन्हु यीशु कां अवं ते पुच्छने लगे, “हे गुरू अवं कुन भलू कम केरि, कि हमेशारी ज़िन्दगी हासिल केरि?” (aiōnios g166) 17 यीशुए तैस सेइं ज़ोवं, “तू मीं भलैइये बारे मां किजो पुछतस? परमेशरेरे अलावा होरो कोई भी रोइो नईं, पन अगर तू हमेशारी ज़िन्दगी हासिल केरनि चातस त हुकम मननू।” 18 तैनी ज़ोवं, “कोन हुकमन पुड़?” यीशुए ज़ोवं, “खून नईं केरने, बदमाशी नईं केरनि, चोरी नईं केरनि, झूठी गवाही नईं देनी, 19 अपने हाज बच्चां केरि सेवा केर, अपने पड़ोसी सेइं अपने बराबर प्यार केर।” 20 तैनी जवाने जुवाब दित्तो, “एना सब हुकम अवं बचपनेरो मन्तो ओरोईं। हुनी मीं मां को कमीए?” 21 यीशुए तैस सेइं ज़ोवं, “अगर तू सिद्ध भोनु चातस, त ग ज़ैन किछ तीं कां आए तैन बेचतां गरीब मैन्नु दे, तैखन तीं स्वर्गे मां खज़ानो मैलेलो। ते एइतां मीं पत्ती च़ल।” 22 पन तैनी जवाने ए गल शुनी, त बड़ो उदास भोइतां च़लो जेव, किजोकि तै बड़ो अमीर थियो। 23 तैखन यीशुए अपने चलन सेइं ज़ोवं, “अवं तुसन सेइं सज़ ज़ोताई कि अमीर मैनेरू स्वर्गेर राज़ेरे मां दाखल भोनु मुशकले। 24 फिरी अवं तुसन सेइं ज़ोताई, परमेशरेरे राज़ेरे मां अमीर मैनेरू दाखल भोने केरां ऊँटेरू सांधनेरे पाए मरां निस्नू सुखू आए।” 25 एन शुन्तां चेलेईं हैरान भोइतां ज़ोवं, “फिरी कसेरी मुक्ति भोइ बटतीए।” 26 यीशुए तैन केरे पासे तेकतां ज़ोवं, “मैन्नु करां त एन न भोइ सके पन परमेशरे करां सब किछ भोइ बटते।” 27 एस पुड़ पतरस ज़ोने लगे, “हेर अस सब किछ शैरतां तीं पत्ती च़लोरेम ते असन कुन मैलनूए?” 28 यीशुए तैन सेइं ज़ोवं, “अवं तुसन सेइं सज़ ज़ोताई, कि नन्वे दुनियाईं मां ज़ैखन अवं मैनेरू मटू अपने महिमारे तखते पुड़ बिश्लू, त तुस भी मीं पत्ती च़लने बाले 12 तखतन पुड़ बिशतां इस्पाएलेरे 12 गोत्रां केरो इन्साफ केरेले। 29 ते ज़ैनी केन्चे अपना घरां ते ढ़ला या बेइन या हाज या बव या बच्चे या ऊडारां छुट्टोरेन, तैस 100 गुणा फल मैलेलो, ते हमेशारी ज़िन्दगीर विरासत मैलेली। (aiōnios g166) 30 पन बड़े मैन्हु ज़ैना हुन्ना पेइले आन, तैना बादे मां पत्रोवं भोनेन। त ज़ैना हुन्ना पत्रोवं आन, तैना बादे मां पेइले भोनेन।”

20 “स्वर्गेरू राज़ तैस ज़िमदारेरू ज़ेरूए ज़ै झेइं उट्टतां ते अपने दाखरी बागी मां मज़दूर कम्मे लाए। 2 तैनी अक दीनार रोज़ मुजुरी देनेरे लेइ तैना बागी मां भेजे। 3 फिरी नौ बजेइं बेइर गेइतां तैनी बज़ारे मां काई लोक बेकार खड़े लाए। 4 तैनी तैन सेइं ज़ोवं, ‘तुस भी मेरी बागी मां गाथ, ते ज़ैन किछ जेइज़ भोलू अवं तुसन देलो।’ तैना कम्मे पुड़ जो जे। 5 फिरी तैनी दुपहरेईं ते टलेइ बज़न तगर एन्ने कियूं। 6 पंचे बजेइं तैनी बेइर निस्तां किछ होरे लोक भी खड़खड़े लेइतां तैन पुच्छू, ‘तुस झेइंरे देते किजो खेइोरेथ?’ तैनेईं जुवाब दित्तो, ‘अस केन्चे कम्मे नईं लोरे।’ 7 तैनी तैन सेइं ज़ोवं, ‘तुस भी मेरे बागी मां गाथ ते कम केरा।’” 8 “इलोइी तैनी बागरे मालिके अपने मुन्शी सेइं ज़ोवं कि, ‘पेइले लगगेरे

मज़दूर ते पत्ती कम्मे लगगोरे मज़दूर सेम्भन अक-अक दीनार दिहाड़ी दे।' 9 ज़ैना पंचे बजेईं ओरे थिये, तैन भी अक दीनार पूरी दिहाड़ी मैल्ली। 10 ज़ैना मज़दूर झेझां कम्मे लगगोरे थिये तैन केरि बारी आई त तैनेईं सोचू कि असन जादे मैलनेन, पन तैन भी अक-अक दीनार मैल्लो। 11 ज़ैखन दिहाड़ी मैल्ली, त तैस मालिकेरे बारे मां तैना एप्पू मांमेईं बुराईं केरने लागे। 12 'पत्ती लोरे मज़दूरेईं सिर्फ अक घैन्टो कम कियोरूप, ते तीं तैन भी असन बराबर ज़ैनेईं सैरी दिहैड़ी कम कियां मुजुरी दित्ती।' 13 तैनी तैन मरां एक्की जुवाब दित्तो, 'दोस्त मीं तीं सेईं कोई बेइन्साफी नईं कियोरी, कुन मीं तीं सेईं अक दीनार दिहैड़ी गल न थी कियोरी? 14 एल्हेरेलेइ ज़े तेरी मज़दूरीए तै ट्ला ते चलो गा, ए मेरी मज़ाए कि बादे मां लगगोरे मज़दूर भी एत्रे देईं। 15 कुन मीं ए अधिकार नईं कि अपने माले मरां ज़ैन चैईं तैन केरि? तू मीं पुड़ एल्हेरेलेइ ज़लतस कि अवं खुल्ले दिले सेईं देने बालोईं?' 16 एल्हेरेलेइ बडे मैन्हु ज़ैना हुन्ना पेइले आन, तैना बादे मां पत्रोवं भोनेन, ते ज़ैना हुन्ना पत्रोवं आन, तैना बादे मां पेइले भोनेन।' 17 यरूशलेम नगरे जो गांते बार यीशुए अपने 12 चेलन अलग नेइतां तैन सेईं ज़ोवं, कि तैस सेईं कुन भोने बालूए। 18 "हेरा, अस यरूशलेम नगरे जो चलोरेम, मैनेरू मडू प्रधान याजकां ते शास्त्री लोकां केरे हवाले कियूं गालू, ते तैना तैस मारनेरे काबल ठैरेले। 19 तैस गैर कौमां केरे हवाले केरेले, तैना मैनेरे मट्टेरी यानी मेरी हासी बनाले, ते तैस कोडे बाहेले, ते फिरी तैस क्रूसे पुड़ च़ाढेले, ते अवं टलेइयोवं दिहाड़े फिरी जींतो भोलो।" 20 तैखन जब्दी नंवेरे मैनेरां मट्टां केरि अम्मा अपने मट्टन सेईं साथी यीशु कां आई, ते तैस कां मिनत केरने लाई ते तैस करां किछ मगने लगगी। 21 तैने तैस पुच्छू, "तीं कुन लोइते?" तैसां ज़ोवं, "वचन दे, कि मेरां इन्ना मट्टां तेरे राज़जे मरां अक तेरे देइने पासे त होरू तेरे बाएं पासे बिशशन।" 22 पन यीशुए तैन सेईं ज़ोवं, "तुस न ज़ानथ कि कुन मगने लगगोरेथ! ज़ेन्चरे दुख अवं झलने बालोईं, कुन तुस झेल्ली सकतथ? तैनेईं जुवाब दित्तो, हाँ झेल्ली सकतम।" 23 तैनी तैन सेईं ज़ोवं, "तुस मेरे ज़ेरो दुःख झललेले, पन एन मेरू कम नईं कि एक्की देइने पासे ते होरि बाएं पासे बिशैली, ए ठार ज़ेसेरे लेइ मेरे बाजोरे तरफां रखोरीए तै तैसेरे लेइए।" 24 एन शुन्तां होरि दश चेलेईं तैन दूईं इलान पुड़ नराज़ भोइ जे। 25 यीशुए अपने सारे चेले नेडे कुजेइतां, तैन सेईं ज़ोवं, "होरि कौमां केरे प्रधान अपने लोकन पुड़ राज़ केरतन, ते तैन केरे मालिक तैन पुड़ अधिकार रखतन। 26 पन तुसन मां एरू न लोडे भोरू, बल्के तुसन मां ज़े बड्डो बननो चाते, ते सेम्भी केरो सेवक बने। 27 ज़े कोई तुसन मां प्रधान बनू चाए, ते सेम्भी केरो गुलाम बने, 28 ज़ेन्चरे कि मैनेरू मडू एल्हेरेलेइ नईं ओरूए कि कोई तैसेरी सेवा केरे, बल्के एल्हेरेलेइ कि सेवा केरे, ते अपनि जान बडे लोकां केरे छुटकारेरे लेइ दे।" 29 ज़ैखन यीशु त तैसेरे चेले यरीहो नगरे मरां च़लोर थिये, त बडे लोक तैस पत्पती च़ले। 30 दूईं काने बत्ती मां बिशशोरे थिये, तैनेईं एन शुनु कि यीशु इस बत्तां च़लोरोए, त तैना चिन्डां मारने लागे, "हे प्रभु दाऊदरा मट्टां असन पुड़ दया केर।" 31 लोक तैन झिड़कने ते ज़ोने लागे

कि चुप राथ, पन तैना मना चिन्डां मारने लागे, "हे प्रभु, दाऊदरा मट्टां असन पुड़ दया केर।" 32 तैखन यीशु खेडोव ते तैन कुजेइतां पुच्छने लागे, "तुस कुन चातस अवं तुशशे लेइ केरि?" 33 तैन कानेईं जुवाब दित्तो, "हे प्रभु अस चातम कि इशशी एछ़न लौ एज्जे।" 34 यीशुए तैन पुड़ बडी तरस अव, ते तैनी तैन केरे एछ़न पुड़ हथ रखो ते तैना लहने लागे, ते दुइये काने यीशु पत्ती च़ले जे।

21 ज़ैखन यीशु ते कने तैसेरे चेले यरूशलेम नगरेरे नेडे पुजे, त यीशुए ज़ैतून पहाड़े पुड़ बैतफगे मरां अपने दूईं चेले एन ज़ोइतां अग्रोवं भेजे। 2 "अपने सामने उस इलव्वें मां गाथ, ते तैडी पुजेले, त तुसन अक गधी बंधोरी मैलनिये, ते तैस साथी तैसेरो बच्चो भी भोनोए, तैस खोलतां इडी मीं कां आनां।" 3 अगर तुसन कोई पुच्छे, त तुस जोइयथ, कि प्रभुए एसेरी ज़रूरत आए, ते तै लूशी तैस वापस भेजेले। 4 इन सब किछ एल्हेरेलेइ भोवं, कि नेबे ज़ैन वचन ज़ोरू थियूं, तैन पूरू भोवं, 5 "सिय्योनेरे कुइये सेईं ज़ोथ, कि तेरो राज़ो तीं कां ओरोए, ते तै बडो हलीमी ते तै गैधी पुड़ च़ेदतां ओरोए, बल्के गथेरे बच्चे पुड़ा।" 6 चेले च़ले जे ते ज़ेन्चरे यीशुए ज़ोरू थियूं, तैनेईं तेन्चरे कियूं। 7 तैनेईं ते गधी ते तैसारे बच्चो आनो, ते तैन पुड़ अपना लिगडां छडां, ते यीशु तैस पुड़ च़ेदतां च़लो। 8 बडे लोकेईं अपना लिगडां बत्ती मां बिछां, ते किछेईं बुट्टा केरे डाल केटतां बत्ती मांमेईं छडोरे थिये। 9 ते तैना लोक ज़ैना यीशु सेईं साथी अग्री-अग्री ते पत्ती-पत्ती च़लोर थिये, तैना नहरे देते थिये, "दाऊदरे मट्टेरी होशाना (तारीफ़), धने तै, ज़े प्रभुएरे नंवे सेईं एइते, स्वर्ग मां होशाना।" 10 ज़ैखन यीशु यरूशलेम नगरे मां पुजो, त सारे नगर मां हलचल मेचि जेई, ते लोक ज़ोने लागे, "ए कौने?" 11 लोकेईं ज़ोवं, "ई गलीलेरे नासरत नगरेरो नबी यीशुए।" 12 यीशुए परमेशरेरे मन्दरेरे अंगने मां गेइतां, ज़ैना बुपारी बुपार केरते थिये सब तेइतां कडे, तैनी सुनारां केरि दुकान ते कबूतर बेचने बालां केरि ठारां टलोडी। 13 ते तैनी ज़ोवं, "लिखोरूए कि मेरे मन्दरे जो प्रार्थना केरनेरू घर ज़ोले, पन तुसेईं त ए डैकू केरो अड्डो बनेवरोए।" 14 तैखन काने ते टोटे मन्दरे मां यीशु कां आए, ते तैनी तैना सब बज्झाए। 15 पन ज़ैखन मन्दरेरे प्रधान याजक ते शास्त्री लोक एना कम्मां ज़ैना तैनी कियां, ते मट्टन मन्दरे मां दाऊदरी औलादरी होशाना (तारीफ़) ज़ोते लाए, तैन बड्डी सरक आई। 16 ते तैस सेईं ज़ोने लागे, "तू शुन्ने लोरोस कि एना कुन ज़ोने लोरेन?" यीशुए तैन सेईं ज़ोवं, "हाँ अवं शुन्ने लोरोईं, तुसेईं कथे नईं पढेरू कि, 'तीं मट्टन ते दुद्ध पीते बच्चन करां भी तीं अपनि पूरी तारीफ़ कमाईं?'" 17 तैखन तै तैन शेरतां नगरे बेइरोवं च़लो जेव, ते बैतनिय्याह नगरे मां जेव ते तैडी रात गुजारी। 18 झेझां ज़ैखन यीशु नगरे मांजो वापस ओरो थियो, त तैस दलुख लगगी। 19 बत्तारे इलेखी अक फ़ेगोरो बूट लाव ते तैस कां जेव, ते पटलां केरे अलावा तैस पुड़ किछ न लाव, तैनेईं तैस जो ज़ोवं, "कथे भी तीं पुड़ फ़ल न लगगेलो ते तैखने तै बुट शुक्की जेव।" (aiōn g165) 20 एन हेरतां चेले हैरान भोइतां पुच्छने लागे, "ई फ़ेगोरो बुट अकदम केन्चरे शुक्की जोरोए?" 21 यीशुए जुवाब दित्तो, "अवं तुसन सेईं सच

जोताई कि अगर तुस विश्वास रखथ, ते शक न केरथ, जैन फ्रेगरे बुटे सेइं भोवं तैन तुस भी केरि सकतथ, बल्के उस पहाड़े जो ज़ोले कि इट्ठां उखड़तां समुन्द्रे मां गा, त तैन्ने भोलू।” 22 अगर तुशो विश्वास पक्कोए त ज़ैन किछ तुस प्रार्थनाई मां मगगेले, तैन तुसन मैल्ली गालू? 23 यीशु मन्दरे मां शिक्षा देने लोरो थियो, त प्रधान याजक, ते लोकां केरे बुजुर्गेई तैस पुच्छू, तू एन कम कसेरे अधिकारे सेइं केरतस? ते तीं एन कम कैनी दित्तोरोए? 24 यीशुए तैन जुवाब दित्तो, “अवं भी तुसन अक गल पुछतई, अगर तुस तैसेरो जुवाब देले, त अवं भी जोइलो कि अवं एन कम कसेरे अधिकारे सेइं केरताई। 25 यूहन्नारो बपतिस्मो कोट्टां थियो? स्वर्गेर तरफां थियो, या की इन्सानेरी तरफां थियो? तेना एप्पू मांमेइं गलबात केरने लागे, कि अगर अस ज़ोतम कि, स्वर्गेर तरफां थियो, त फिरी तैनी ज़ोनूए कि फिरी तुसेईं तैसेरू याकीन की नईं कियेरू? 26 पन अगर अस ज़ोतम कि, ‘इन्सानेरी तरफां थियो,’ त लोकां केरो भी डरे किजोकि लोक यूहन्ना नबी मन्ते थियो।” 27 एल्हेरेलेइ, तैनेई यीशुए जुवाब दित्तो, “अस किछ न ज़ानम।” तैनी भी तैन सेइं ज़ोवं, “अवं भी तुसन सेइं न जोई कि अवं इन कम्मां कसेरे अधिकारे सेइं केरताई।” 28 पन तुस इस मिसालरे बारे मां कुन सोचतथ? केन्ची मैनेरां दूईं मट्टां थियां, तैनी बड्डे मट्टे कां गेइतां ज़ोवं, “अज़ दाछरी बागी मां गा ते कम केर।” 29 तैनी जुवाब दित्तो, “अवं न गेई।” पन बादे मां पशतेइतां चलो जेव। 30 फिरी बाजे होरि मट्टे कां भी गेइतां एन्ने ज़ोवं, तैनी जुवाब दित्तो, “अच्छा खरी गाताई।” पन जेव नन्ना। 31 “एन दुइने मरां केनि अपने बाजेरो हुक्म मन्ने?” तैनेई जुवाब दित्तो बड्डे हुक्म मन्ने, यीशुए तैन सेइं ज़ोवं, कि अवं तुसन सेइं सज़ ज़ोताई, कि चुंगी धिन्ने बाले ते बदचलन कुआन्शां तुसन करां पेइले परमेशेरे राज़ मां दाखल भोली। 32 अवं इन ज़ोताई, यूहन्ना बपतिस्मो देनेबाले तुसन ज़ोवं, कि धार्मिकतारी ज़िन्दगी केन्चरां ज़ीनीए पन तुसेईं तैसेरू विश्वास न कियो, पन चुंगी धिन्ने बाले ते बदचलन कुआन्शेईं तैसेरू विश्वास कियूं, एन हेरतां भी तुसेईं पापन करां मन न फिनाव ते तैस पुड़ विश्वास न कियो। 33 अक होरि मिसाल शुना, एक्की ज़मीनदार अक दाछरी बाग लाई ते तैसेरे चेरे पासन बाड़ दित्तो, ते दाछारो रस कढनेरे लेइ अक हौवज़ बनावं, ते तैस बागरी हेरगेश केरनेरे लेइ अक उच्ची कूड़ी बनाई ते फिरी तै काशत केरनेबालन ठेके पुड़ देइतां कोन्च दूर प्रदेशे जो चलो जेव। 34 ज़ैखन दाछ टलोइनेरो मौको अव त तैनी अपनो हिस्सो नेनेरे लेइ अपने नौकर तैन ठेकेदारन कां भेजे। 35 ते ठेकेदारेइं तैसेरे नौकर कोई झूसो कुटो कोई मारो ते केन्ची जेईं घोड़ेईं दिती। 36 फिरी तैनी होरे नौकर भेजे ज़ैना पेइलन करां जादे थिये, पन ठेकेदारेइं तैन सेइं भी तेरहो ज़ेरो सलूख कियो। 37 आखकार तैनी अपनू मट्टू तैन कां भेजू, ते सोचू कि मेरे मट्टेरो त लिहाज़ केरेले। 38 “पन ज़ैखन ठेकेदारेइं तैसेरू मट्टू लाव, त तैना एप्पू मांमेइं मुशोरो केरने लागे, कि एज्जा एस सेवां मारम ते एसेरी बागी पुड़ कब्जो केरम।” 39 “तैखन तैनेई तैन मट्टू टलाव ते बागारे बेइर शेरी छड्डू। 40 एल्हेरेलेइ ज़ैखन बागरो मालिक एप्पू एज्जेलो, त तैन ठेकेदारन सेइं केरो

सलूख केरेलो?” 41 तैनेई जुवाब दित्तो, तै तैन बुरन, बुरे तरीके सेइं मेरतां बागरो ठेको होरि ठेकेदारन देलो, ज़ैना मौके पुड़ तैसेरो हिस्सो तैस देन। 42 यीशुए तैन सेइं ज़ोवं, “तुसेईं पवित्रशास्त्रे मां कथे नईं पढेरू, ज़ै घोड़ मिस्त्रेईं रदी कियोरो थियो, तैए कूनेरो घोड़ भोलो, एन कम परमेशेरे कियोरूए, ते इश्शी नज़री मां एन आजीब आए?” 43 एल्हेरेलेइ अवं तुसन सेइं ज़ोताई, कि परमेशेरे राज़ तुसन करां निव गालू, ते एरी कौमी कां दित्तू गालू ज़ै वक्ते पुड़ तैस फल दे। 44 ते ज़ै कोई इस घोड़े पुड़ बिछड़ेलो त तैसेरे टुकड़े-टुकड़े भोइ गाले, पन ज़ै एस उन्डो बिछड़ेलो त तैस पइतां छडेले। 45 प्रधान याजक ते फरीसी लोकेईं यीशुएरी ए मसाल शुन्तां सेमझी जे, कि यीशु एन गल्लां इश्शे बारे मां ज़ोने लोरोए। 46 तैनेई यीशु ट्लानो चाव, पन लोकन करां डरते थिये किजोकि तैना यीशु नबी मन्ते थिये।

22 यीशु फिरी मसाल देइतां ज़ोने लागे। 2 “स्वर्गेरू राज़ एक्की राज़ेरू ज़ेरूए, ज़ैनी अपने मट्टेरे इला बनाव। 3 ते अपने नौकर भेजे कि तैना लोकन ज़ैन जेईं इलाएरी धाम बनोरी थी, तैन कुजान पन तैना न आए। 4 तैखन तैनी अपने नौकर एन ज़ोइतां भेजे, कि ज़ैन जेईं इलाएरी धाम बनेवरीए, तैन ज़ोथ, रोटी बनोरीए ते मीं बडे-बडे जानवर कटोरन, ते सब किछ तियार भोरूए, ते इलाएरी धामी मां शामिल भोथ। 5 पन तैनेई ध्यान न दित्तू ते कोई परवाह न की, कोई अपने ऊडारे मां चलो जेव, ते कोई अपने कारोबारे मां लगे ते कोई कोरां चलो जेव। 6 किछेईं तैसेरे नौकर टलेइतां तैन तैना बेइज़त किये, ते जानां भी मैरी छुट्टे। 7 ज़ैखन राज़े एन शूनू त राज़े बड़ी सरक आई, ते तैनी अपनि फौज भेजतां तैना कातली मैरी छुट्टे ते तैन केरां नगरां फुके। 8 तैखन तैनी अपने नौकरन सेइं ज़ोवं, इलाएरी धाम तियार आए, पन ज़ैन कुजारे थिये तैन एस काबल नईं। 9 एल्हेरेलेइ तुस हर पासे गाथ ते ज़ेरे तुसन मैलतन, तैना सब इरां कुजाथ। 10 तैखन तैना नौकर चले जे ते हर पासे गेइतां ज़ेरे खरे बुरे तैन मैल्ले, सब अकोट्टे इलाए मां आने ते मेहमानेइं सेइं घर भेरतां भोवं। 11 “ते राज़ो मेहमान सेइं मिलने अन्तर अव, त तैसेरी नज़र एक्की मैन्हु पुड़ पेई ज़ै इलाए मां इलेरां लिगड़ां लेइतां न थियो ओरो।” 12 राज़े तैस पुच्छू, हे दोस्त, तू इलाएरे लिगड़न मां की नईं ओरो? पन तैने किछ न ज़ोवं। 13 “एस गल्ली पुड़ राज़े अपने नौकरन सेइं ज़ोवं, ‘एसेरे हथ पाव बंधतां बेइर आंधरे मां छड्डा ज़ैडी ए लेरां देंतो राए, ते दंत चापतो राए।’ 14 किजोकि परमेशेरे हमेशारे ज़िन्दगरे लेइ त बडे कुजारेन पन चुनोरे थोडेन।” 15 तैखन फरीसी लोक तैइं चले जे, ते एप्पू मांमेइं मुशोरो केरने लागे एस केन्चरे गल्लन मां फसाम। 16 एल्हेरेलेइ तैनेई अपने किछ चले हेरोदेस राज़ेरे लोकन सेइं साथी यीशु कां भेजे, ते तैनेई ज़ोवं, “हे गुरू अस ज़ानतम कि तू सच्च्योस, ते परमेशेरी बत सच्च्येईं सेइं शिखालतस ते कोन्चेरी परवाह न केरस किजोकि तू मैन्हु केरू तुतर हेरतां गल्लां न केरस। 17 एल्हेरेलेइ असन ज़ो, तू कुन सोचतस? महाराजे जो चुंगी देनी जेइजे की नईं?” 18 यीशु

तैन केरि चाल सेमझतां ज़ोवं, “हे पाखंडी लोकव मीं किजो अज़मातथ? 19 ज़ै सिको चुंगरे लेइ देतथ तैस मीं हिराथ, तैनेई अक दीनार तैस कां आनो। 20 यीशुए तैन पुच्छू, इस पुड़ कसेरी शकल ते कसेरू नवं लिखोरूए?” 21 तैनेई जुवाब दितो महाज़ेरू, तैखन तैनी तैन सेइं ज़ोवं, “ज़ैन महाराज़ेरूए तैन महारज़े जो देथ, ते ज़ैन परमेशेरू ए तैन परमेशेरे जो देथ।” 22 तैना एन शुन्तां हैरान रेइजे, ते तैस तैड़ी छेडतां चले जे। 23 तैस्से दिहैड़ी किछ सद्की लोक ज़ैना ज़ोते थिये कि मरनेरां बाद कोई ज़ीतो नईं भोनो, तैनेई तैस पुच्छू, 24 “हे गुरु मूसे ज़ोरूए कि, ‘अगर कोई मैन्हु बेओलाद मेरि गाए, त तैसेरो ढ़ला तैसेरी कुआन्शी सेइं इला बनाए ताके अपने ढ़लाएरे लेइ औलाद पैदा केरे।’ 25 इश्शे इड़ी सत ढ़ला थिये, पेइले इला बनेइतां मेरि जेव, तैस औलाद न थी तैनी अपनि कुआन्श अपने ढ़लाएरे लेइ छेड्डी दित्ती। 26 ए वजा आए तैसेरे दुइयोवं ते टलेइयोवं भी एन्चरे कियूं बल्के सत्ते ढ़लान सेइं एन्ने भोतू राऊं। 27 आखकार ते कुआन्श भी मेरि जेई। 28 हुनी ज़ो तै कुआन्श मुइदन मरां ज़ीते भोनेरे दिहाड़े तैन सत्ते ढ़लान मरां कसेरी कुआन्श भोली? किजोकि तै सेबभी केरि कुआन्श बनोरी थी।” 29 यीशुए तैन जुवाब दितो, “तुस न पवित्रशास्त्र ते न परमेशेरी शक्ति ज़ानथ, ते एस्से वजाई सेइं तुस टेपलोरैथ। 30 किजोकि ज़ीते भोनेरां पत्ती तैना इला न बनाले, पन तैना स्वर्गें मां परमेशेरे स्वर्गदूतां केरे ज़ेरे भोनेन।” 31 “पन मुइदन मरां ज़ीते भोनेरे बारे मां कुन तुसेईं इन वचन नईं पढेरू ज़ैन परमेशर तुस न सेइं ज़ोवं, 32 ‘अवं अब्राहमेरो परमेशर, ते इसहाकेरो परमेशर ते याकूबेरो परमेशर आई?’ तै मुवोरां केरो नईं बल्के ज़ीतां केरो परमेशेरी।” 33 लोक तैसेरी ए शिक्षा शुन्तां हैरान रेइजे। 34 ज़ैखन फरीसी लोकेईं एन शुनु कि तैनी सद्की केरू आशी बंद कियोरूए, त तैना तैस कां सब अकोट्टे भोए। 35 तैन मरां अक शास्त्री तैस अज़मानेरे लेइ यीशुए पुच्छू। 36 “हे गुरु, मूसेरे कानूने मां सेबन करां बड्डो हुकम कौ आए?” 37 तैनी ज़ोवं, “तू परमेशेरे अपने प्रभु सेइं अपने सारे दिले सेइं ते अपनि सैरी जानी सेइं ते अपनि सैरी अक्ली सेइं प्यार केरा। 38 सेबन करां बड्डो ते खास हुकम ईए। 39 एसेरो जेरो ईए, ‘अपने पड़ोसी सेइं अपने बराबर प्यार केरा।’ 40 इन्ना दूईं हुकम मूसेरे कानून ते नेबी केरो आधारे।” 41 ज़ैखन फरीसी लोक भी तैड़ी जम्हां भोइजेइ, त यीशुए तैन पुच्छू। 42 “मसीहेरे बारे मां तुशुशो कुन खियाले, कि तैन केसेरू मट्टूए?” तैनेईं जुवाब दितो, “दाऊदेरू मट्टू।” 43 यीशुए तैन सेइं ज़ोवं, “फिरी दाऊद आत्माईं मां तैस जो प्रभु किजो ज़ोते?” 44 “प्रभुए मेरे प्रभु सेइं ज़ोवं, मेरे देइने पासे बिश ज़ां तगर अवं तेरे दुश्मन तेरे पावन हैठ न ढ़लेन्चेईं। 45 बस्सा, अगर दाऊद तैस जो प्रभु ज़ोते त तैन तैसेरू मट्टू केन्चरे सेइं भोइ सकते?” 46 तैन मरां केन्चे भी एक्की गल्लरो जुवाब न देइ बटो। पन तैस वक्तेरे बाद फिरी कोन्ची तैस पुच्छनेरी हिम्मत न भोइ।

23 तैखन यीशुए बडे लोकन सेइं ते अपने चलन सेइं एन ज़ोवं।
2 “शास्त्री ते फरीसी लोक मूसेरो कानून समझाने बालेन। 3 एल्हेरेलेइ ज़ैन किछ तैना तुसन ज़ोतन तैन तुस केरा ते मेन्ना, पन तैन

केरां ज़ेरां कम्मां न केरा, किजोकि तैना ज़ोने त ज़ोतन पन केरन नन्ना। 4 तैना अपने मेर्ज़ी सेइं कानून बनातन ज़ैना लोकां केरे लेइ मन्ने मुशकिल भोतन, पन एप्पू अपने कानूने मन्नेरी कोशिश भी न केरन। 5 तैना ज़ैन किछ केरतन सिर्फ मैन्नु हिरानेरे लेइ केरतन, तैना अपने कुपाए ते पैखड़न पुड़ पवित्रशास्त्रेरे वचन लिखतां बड्डे-बड्डे जन्त्रां केरे ज़ेरे बन्धतन, ते अपने चोगन पुड़ लम्मी गुच्छा लातन (ताके लोक समझन तैना बडे धर्मी आन)। 6 तैना धामन मां खास ठैरी बिशनु चातन, ते प्रार्थना घरे मां खास कुर्सन पुड़ बिशनु चातन। 7 ते तैना चातन कि लोक तैननु जो बज़ारन मां नमस्कार ज़ोन, ते तैननु जो गुरु ज़ोन। 8 पन तुस अपने आपे जो गुरु न जुवेइयथ, किजोकि तुशुशो अक्के गुरु आए, ते तुस सब ढ़लां केरे ज़ेरे बराबर आथ। 9 ते दुनियाईं मां केन्ची जो (आत्मिक) बाजी न ज़ोइयथ, किजोकि तुशुशो अक्के बाजी आए ज़ै स्वर्गें मां आए। 10 ते न केन्ची जो मालिक ज़ोइयथ किजोकि तुशुशो अक्के मालिके ज़ै मसीह आए। 11 पन ज़ै तुसन मां बड्डो भोनु चाते, त तै तुशुशो सेवक बने। 12 ते ज़ै कोई अपनो आप बड्डो बनानेरी कोशिश केरते, त तै निकड़ो बनाव गालो, ते ज़ै कोई अपनो आप निकड़ो बनाते त तै बड्डो बनाव गालो।” 13 तैखन यीशुए ज़ोवं, “हे पाखंडी शास्त्री ते फरीसी लोकव, तुसन पुड़ अफ्रसोस, किजोकि तुस स्वर्गेरे राज़े मां लोकन दाखल भोने न देथ, किजोकि न तुस एप्पू दाखल भोथ, ते न होरन दाखल भोने देथ। 14 हे पाखंडी शास्त्री ते फरीसी लोकव तुसन पुड़ अफ्रसोस, तुस विधवा कुआन्शां केरे घरन लुटतथ, ते लोकन हिरानेरे लेइ लेम्मी-लेम्मी प्रार्थना केरतथ, तुसन जादे सज़ा मैलेली।” 15 “हे पाखंडी शास्त्री ते फरीसी लोकव, तुसन पुड़ अफ्रसोस! तुस अक मैन्हु अपने धर्में मां आन्नेरे लेइ बडे दूर-दूर गातथ, ते ज़ैखन तै तुशुशी शिक्षा मन्ते त तैस एप्पू करां दुगनो नरके मां गानेरे काबल बनातथ।” (Geenna g1067) 16 “हे बत हिराने बाले कानाव, तुसन पुड़ अफ्रसोस, कि तुस ज़ोतथ कि अगर कोई मन्देरी कसम केरे त कोई हर्ज़ नईं, पन अगर मन्देरे सोन्नेरी कसम केरे, त तैसेरी कसमारो पाबंद भोलो। 17 हे बेवकूफ ते कानाव, बड्डू कुन आए सोन्नु या मन्दर, ज़ेसेरी वजाई सेइं सोन्नु पवित्र समझू गाते?” 18 “तुस ज़ोतथ कि अगर कोई बलिदान चाढ़नेरे ठारारी कसम केरे, त कोई हर्ज़ नईं, पन च़ेढोरी चीज़री कसम केरे त तैसेरो पाबंद भोलो। 19 हे कानाव! बड्डू कुन आए, चाढ़ोरी चीज़ या बलिदान चाढ़नेरे ठार ज़ेसेरी वजाई सेइं चाढ़ोरी चीज़ पवित्र समझी गावे? 20 अगर ज़ै कोई बलिदान चाढ़नेरे ठारारी कसम केरते, त तै सेबभी च़ेढोरी चीज़ां केरि कसम केरते। 21 ज़ै कोई मन्देरी कसम केरते त तै मन्देरे मां रानेबाले परमेशेरी कसम केरते। 22 ते ज़ै कोई स्वर्गेरी कसम केरते, तै परमेशेरेरे तखतेरी ते तैस पुड़ बिशने बालेरी कसम केरते।” 23 “हे पाखंडी शास्त्री ते फरीसी लोकव, तुसन पुड़ अफ्रसोस, तुस पुतनेरो ते सॉफ़ेरो ते ज़ीरोरे दशोवं हिस्सो त देतथ, पन मूसेरे कानूनेरी खास गल्लां ज़ेन्चरे इन्साफ केरनो, दया केरनि ते ईमानदार भोनु शारोरूए, ज़रूरी थियूं तुस एन भी केरते राथे ते तैन भी न शारेथे। 24 हे बत हिराने बाले

कानाव! तुस मशे त छानतथ पन सथ्थो ऊँट निगलतथ।” 25 “हे पाखंडी शास्त्री ते फरीसी लोकव, तुसन पुड़ अफ़सोस, तुस कटोरो ते कने थाली बेडरमेई खूब मांजतथ पन अन्त्रमेई लालच ते बे सबरीए भरतां।” 26 “हे काने फरीसाव पेड़ले कटोरो ते थाली अन्त्रमेई मांजा, ते फिरी बेडरमेई भी साफ भोए।” 27 “हे पाखंडी शास्त्री ते फरीसी लोकव तुसन पुड़ अफ़सोस, तुस तैन कबां केरे ज़ेरथ ज़ैन बेडरमेई त सफ़ैदाए ते बेडि रोड़ी लेहीयोचन, पन अन्त्रमेई मुडदां केरि हड्डी ते सब किसमेरी गेन्दगी सेइं भरतन। 28 एन्चरे तुस बेडरमेई लोकन बड़े धर्मी लेइयोतथ, पन अन्त्रमेई दुनियारे पाखंडे ते अधर्म सेइं भरतथ।” 29 “हे पाखंडी शास्त्री ते फरीसी लोकव तुसन पुड़ अफ़सोस, किजोकि तुस नेबी केरे आसथान सजातथ ते धेर्मी लोकां केरि कबां बनातथ। 30 ते जोतथ कि, ‘अगर अस अपने दादे-पड़दादां केरे ज़माने मां भोथे त नेबन मारने मां तैन केरू साथ न देखे।’ 31 एन्चरे तुस एप्पू मन्तथ कि तुस नेबी केरे कल्ल केरनेबालां केरि औलादी मरां आथ। 32 हुनी तुस अपने दादे-पड़दादां केरे पापेरे घड़ो भरते राथ।” 33 “हे ज़हरीले सप्पां केरे ज़ेरे बच्चाव! तुस नरकेरी सज़ाई करां केन्चरे बचेले? (Geenna g1067) 34 एल्हेरेलेइ हेरा अवं नेबन ते अक्लमन्दन ते शास्त्री लोकन तुसन कां भेजताई, तुस तैन मरां किछन कल्ल केरेले, ते किछन क्रूसे पुड़ चाढ़ेले, ते किछन अपने प्रार्थना घरे मां कोडेइं सेइं बाले, ते नगरे-नगरे मां तैन मारनेरे लेइ तैन पत्ती लगगारे राले। 35 एल्हेरेलेइ सारे धेर्मी केरो कल्ल ज़ै इस धेरती पुड़ भोरोए, तैन केरि सज़ा तुसन पुड़ एज्जे, धर्मी हाबिलेरे कल्ले करां लेइतां, ते बिरिक्याहरे मट्टे जकर्याहरे कल्ले तगर ज़ै तुसेईं मन्दरेरे ते बलिदान केरनेरे ठारारे मझाटे मन्दरेरे अंगने मां कल्ल कियोरो थियो। 36 अवं तुसन सेइं सच जोताई कि इस ज़मानेरे लोकन एना सैरी गल्लां केरे सज़ा मैलनी।” 37 फिरी यीशुए ज़ोवं, “हे यरूशलेम नगरेरे लोकव, हे यरूशलेम नगरेरे लोकव, तुसेईं केन्चरे नबी कल्ल किये ज़ैना बड़े पेड़ले तुसन कां आप, ते ज़ैना तुसन कां भेजे तुसेईं तैन घोडेईं बेई, मीं बड़े बार सोचू कि तेरे बच्चन अकोट्टे केरि ज़ेन्चरे कुकड़ी अपने बच्चन अपने फंगन हैठ रखचे पन तुस राजी न भोए। 38 हेरा तुशू घर तुशो लेइ बेरान भोइ गाते। 39 किजोकि अवं तुसन सेइं सच जोताई, कि तुस मीं हुन्ना करां तैस दिहाड़े तगर कधे न लेईं सकेले, ज़ांतगर मेरे बारे मां इन न ज़ोले, तैसेरी तारीफ़ भोए ज़ै प्रभुपरे अधिकारे सेइं एइते।”

24 ज़ैखन यीशु मन्दरे मरां निस्तां ब्रल्लोरो थियो, ते तैसेरे चले तैस कां आप, ताके तैस मन्दरेरे रोड़े-रोड़े भवन हिरान। 2 तैनी तैन सेइं ज़ोवं, “कुन तुस एन सब किछ हेरने लोरेथ? अवं तुसन सेइं सच जोताई कि इड़ी कोई घोड़े पुड़ घोड़ बाकी न रालो, ज़ै बछोइ न गालो।” 3 ज़ैखन तै ज़ैतून पहाड़े पुड़ बिशोरो थियो, त तैसेरे चले अलग ज़ेरे तैस कां एइतां तैस सेइं ज़ोने लगगे, “असन ज़ो कि एन गल्लां केइस भोनिन? ते तेरे एजनेरो ते दुनियारो अन्त भोनेरो कुन निशान भोनीए?” (aion g165) 4 यीशुए तैन जुवाब दित्तो, “खबरदार राथ, कोई तुसन न टपलाए! 5 किजोकि बड़े मेरे नव्वे सेइं एजनेन ते तैनेई ज़ोनीए कि,

‘अवं मसीह आई,’ ते तैनेई बड़े लोक टपलानेन। 6 तुस लड़ाई ते लड़ाई केरि अफवाह शुनेले, खबरदार डेरथ नन्ना, किजोकि एन गल्लां ज़रूरी भोनिन, पन तैस वक्ते खातमां नई भोनी। 7 किजोकि कौमी पुड़ कौम, ते राज़े पुड़ राज़ चढ़ाई केरेलू, ते ठारी-ठारी काल पेले, ते भुंजल एज्जेले। 8 मुसीबतां केरि शुरुआत भी एन्ने गल्लेईं सेइं भोनीए। 9 तैखन ज़ैना तुशो खलाफन तैना तुसन टलेइतां बड़ी सखत सज़ा देले, ते कल्ल केरेले, ते मीं पुड़ विश्वास केरनेरे वजाई सेइं, सैरी कौमां केरे लोक तुसन सेइं बैर रखेले। 10 तैखन बड़े लोक मीं पुड़ विश्वास केरने शारेले, एक्की होरि टलुवाले, ते एप्पू मांमेइं भी बैर रखेले। 11 ते बड़े झूठे नबी दुनियाई मां निसनेन ते बड़े लोक टपलानेन। 12 अधर्म बधने सेइं बड़े लोक एप्पू मांमेइं प्यार केरने शारेले। 13 पन ज़ै कोई आखरी दर्म तगर मीं पुड़ विश्वास केरेलो, त तैस्से मुक्ति मैलनीए। 14 ते परमेशरेरे राज़ेरी ई खुशखबरी दुनियारे हर पासे शुनाई गाली, ताके सैरी कौमां केरे लोकन मौको मैले कि तैना इस कबूल केरन, तैखन दुनियारो खातमां भोलो।” 15 “ज़ैखन तुस तैस उज़ड़ाने बाली भिट्टी चीज़ी, ज़ेसेरे बारे मां दानियेल नेवे ज़ोरू थियुं, पवित्र ठैरी खड़ी लाएले, (त पढ़नेबालो भी समझे)। 16 कि ज़ैना तैस मौके यहूदिया इलाके मां भोले तैना पहाड़न पुड़ जो नशशन। 17 ते ज़ैना लाए पुड़ भोन त तैना कोई चीज़ नेने अन्तर न एजन। 18 ते ज़ै मैनुऊ ऊडारे मां भोलो, त तै लिंगडां नेने अन्तर न एज्जे।” 19 तैन दिहाड़न मां ज़ैना दोर्जीती त दुद्ध पियाती कुआन्श भोली, तैन केरे लेइ अफ़सोस! 20 “ते प्रार्थना केरा कि तुसन हिवतड़े या आरामेरी दिहाड़ी नशशनू न पे। 21 किजोकि तेइस एत्री बड्डी मुसीबत भोली, ज़ेरे दुनियारे शुरु करां अज़ तगर नई ओरी, ते न कधी एज्जेली। 22 अगर तैन दिहाड़ां केरि तैधात घटेवरी न भोथी, त कोई प्राणी न थियो बचानो, पन चुनोरां केरे लेइ तैना दिहाड़े घटेवरेन। 23 अगर कोई तुसन सेइं ज़ोए कि, ‘तक्का, मसीह इड़ी आए! या उड़ी आए!’ त तुस विश्वास न केरथ।” 24 “किजोकि झूठे मसीह ते झूठे नबी दुनियाई मां निसनेन, ते तैनेई निशान ते बड्डे-बड्डे चमत्कार हिरानेन, ते भोइसखे त चुनोरे लोक भी टपलानेन। 25 हेरा, मीं तुसन सैरी गल्लां भोनेरे पेड़ले ज़ोरिन। 26 अगर कोई तुसन सेइं ज़ोए कि, ‘हेरा तै जंगले मांए,’ त तुस बेडर न गेइयथ; ‘हेरा, तै घरे मांए,’ त तुस विश्वास न केरथ।” 27 “किजोकि ज़ेन्चरे बिजली पूर्बेरां, पछमें तगर चमकतीए एन्चरे मैनेरू मट्टू भी एज्जेलू।” 28 “ज़ैडी ज़िगग भोते तैडी इल्लां जम्हां भोइचन।” 29 “तैन दिहाड़ना बाद दिहाड़ो कालो भोइ गालो, त चाँदनी लौ न देली, त कने अम्बरेरां तारे बिछड़ने लगगेले, त अम्बरेरी सैरी शेक्ति हिलेइ गेली। 30 तैखन मैनेरे मट्टेरो निशान अम्बरे मां लेइहोनीए, ते दुनियारी सैरी कौमां छाती पिट्टेली, ते मैनेरू मट्टू अम्बरे मरां बिदलारी पुड़ बेडि शेक्ति ते महिमा सेइं एइते लाएले। 31 ते तै अपने स्वर्गदूत ते नइशिगिरी बड़ी आवाज़ी सेइं साथी भेजेले, ते तैसेरे चुनोरे लोकन चेन्ने पासन अम्बरेरे एक्की पासेरां होरि पासे तगर सेबन जम्हां केरेले।” 32 “फ़ेगरे बुटे करां ई सबक शिखा, ज़ेरे तैसेरे डाल नर्म भोतन ते पट्टां निसतन त तुस बुझतथ कि गेर्मेरो मौसम एजनेबालो आए। 33

एसेरो ज़ेरो, ज़ैखन तुस एना गल्लां, ज़ैना मीं जोई, भोते हेरेले, त तुस बुझ्गी छुड़ा कि मैनेरू मट्टू, यानी अवं बड़े नेड़े पुज्जोरोई। 34 अवं तुसन सेइं सत्र ज़ोताई, कि ज़ां तगर एन सब किछ पूरू न भोए, तांतगर एस पीड़रो खातमों न भोलो। 35 अम्बर ते धरती टेली गाली पन मेरी गल्लां कधे न टेलेली।” 36 “मेरे वापस एजनेरे दिहाड़ेरे बारे मां, या तैस वक्तेरे बारे मां कोई भी न ज़ाने कि तै कताली भोलो, स्वर्गेरे स्वर्गदूते भी न ज़ाननू त कने परमेशेरू मट्टू यानी अवं भी न ज़ैनी, पन सिर्फ मेरो बाजी परमेशर ज़ानते। 37 ज़ेन्चरे नूहेरे ज़माने मां भोरू थियूं, तेन्चरे मैनेरे मट्टेरे एजनेरे वक्ते भोनूए। 38 किजोकि तूफान एजने करां पेड़ले भी लोक खाते पीते थिये, ते ड़ला भी बनाते थिये, ते नूहेरे किशती मां गाने तगर एन सब किछ भोतू राऊं। 39 तैन पतो भी न थियो कि कुन भोने बालूए, इड़ी तगर कि तूफान अव ते तैनी सब किछ रुड़ेइतां नेव, ते मैनेरे मट्टेरू यानी मेरू एजनु भी एरू भोनूए। 40 तैखन ऊडारे मां दूई मैन्हु कम केरते भोले ते अक नीयो गालो, ते दुइयोंवं तैड़ी रालो। 41 ते दूई कुआन्शां ढ़लाट पिती भोली त अक नी गाली ते होरि तैड़ी राली। 42 तुस बींझी राथ किजोकि तुस न ज़ानथ कि तुश्शो प्रभु केइस एजनोए। 43 पन याद रखा, अगर घरेरे मालिके पतो भोए कि चोर कताली एजनो, त तै बींझी बिशेथो ते अपने घरे चोरी न भोने देखो। 44 एल्हेरेलेइ तुस भी तियार राथ, किजोकि ज़ैखन तुसन शक भी नई भोनी त मैनेरू मट्टू यानी अवं एज्जी गानोई।” 45 “ईमानदार ते अक्लमन्द नौकर तैसेरो ज़ेरोए, ज़ेसेरो मालिक तैस अपने नौकरन पुड़ पुछनो गन्ने रखे ताके तै तैन मौके पुड़ रोटी दे, ते फिरी दूर सफरे पुड़ गाए।” 46 “तै नौकर धने ज़ेसेरो मालिक एइतां तैस करां एरू ज़ेरू केरतो लाए।” 47 अवं तुसन सेइं सत्र ज़ोताई कि तै मालिक अपने घरेरो सारो अधिकार तैसेरे सुपुर्द केरेलो। 48 “पन अगर ते बुरो नौकर अपने दिले मां एन ज़ोए कि मेरे मालिकेरे एजने हेजू बडू चिरे। 49 ते अपने सैथन मारने कुटने ते शैरेपण सेइं खाए ते पीए। 50 त तैसेरो मालिक कोस्कोई एरी दिहैडी एज्जे ज़ेइस तैस नौकरे उमीदे न भोए, ते तैसेरो मालिक वापस एज्जी गाए। 51 ते मालिक तैस पक्की सज़ा देलो, ते तैसेरो हिस्सो पाखंडी लोकन सेइं साथी भोलो, ज़ैडी लेरां देनी ते दंत च़ापने भोले।”

25 तैखन यीशुए अपने चलन सेइं ज़ोवं, ज़ैखन मैनेरू मट्टू यानी अवं वापस एज्जेलो तैस मौके स्वर्गेरू राज़ तैन दश अड्लैई कुइयां केरू ज़ेरू भोलू, ज़ैना अपनि मिसालां बैलतां लाड़े सेइं मिलनेरे लेइ निस्सी। 2 तैन मां पंच बेवकूफ थी, पन पंच अक्लमन्द थी। 3 ज़ैना बेवकूफ थी तैनेई मिसालां त नी, पन होरो तेल साथी न नीयो। 4 “पन ज़ैना अक्लमन्द थी तैनेई मिसालां केरे अलावा कुप्यन मां होरो तेल भी साथी नीयो।” 5 लाड़ो एजने च़िर लग्गू, ते तैना सब बलगते-बलगते डिगरी लेइ देने, ते झुल्ली जेई। 6 “अध्धी रात भोइ त शौर मच्ची कि लाड़ो ओरोए, ते तैस सेइं मिलनेरे लेइ एज्जा। 7 तैखन सैरी अड्लैई कुइयां बींझी, ते अपनि-अपनि मिसालां ठीक केरने लेगि। 8 बेवकूफ कुइयेई अक्लमन्द अड्लैई कुइयन सेइं ज़ोवं, ‘अपने तेले मरां थोड़ो ज़ेरो

तेल असन भी देख, किजोकि इश्शी मिसालां हिश्शने लोरिन।’ 9 पन अक्लमन्देई जुवाब दित्तो, ‘असन कां एत्रो तेल नई, कि इश्शे लेइ ते तुश्शे लेइ पूरो भोए, तुस एरू केरा कि बेचनेबालन करां आनां।’ 10 ज़ैखन तैना तेल घिन्ने च़ेलोरी थी त तैत्रे मां लाड़ो पुजी जेव, ते ज़ैना तियार थी, तैना लाड़े सेइं साथी अन्तर ड़लाएरे घरे मां च़ेलि जेई, ते दार बंद केरतां छुड़। 11 बादे मां तैना होरि अड्लैई कुइयां भी वापस पुजी ते लाड़े जो ज़ोने लेगि, ‘प्रभु! प्रभु!’ इश्शे लेइ दार खोल्ल। 12 पन तैनी जुवाब दित्तो, ‘अवं तुसन सेइं सत्र ज़ोताई, अवं तुसन न ज़ैनी।’ 13 एल्हेरेलेइ खबरदार राथ, किजोकि तुस मेरे वापस एजनेरे दिहाड़ेरे बारे मां न ज़ानथ।” 14 ज़ैखन मैनेरू मट्टू यानी अवं वापस एज्जेलो त स्वर्गेरू राज़ तैस मैनेरो ज़ेरू भोनूए, ज़ै दूर मुलखे जेव, तैनी अपने नौकर कुजाए ते सारी दौलत तैन दित्ती, ते तैन ज़ोवं एस दौलती सेइं होरि भी कमाई केरा। 15 “तैनी एक्की पंच तोड़े दित्ते होरि दूई तोड़े दित्ते, ते एक्की अक्के तोड़ो दित्तो, हर एक्की तैसेरे काबलीतेरे मुताबिक दित्ते, ते एप्पू होरि मुलखे जो च़लो जेव।” 16 ज़ैस नौकरे पंच तोड़े मैलोरे थिये, तैनी गेइतां कारोबार केरतां पंच तोड़े होरे कमाए। 17 एन्चरे ज़ैस नौकरे दूई तोड़े मैल्लोरे, तैनी दूई होरे कमाए। 18 पन ज़ैस नौकरे अक तोड़ो मैल्लोरे थियो, तैनी मिन्ती घेइतां मालिकेरी रकम छपेइतां छुड़ी। 19 बड़े च़िरेरां पत्ती तैसेरो मालिक वापस अव, ते नौकरन सेइं हिस्साब केरने लगो कि तैनेई तैन तोड़ां केरू कुन कियूं। 20 “ज़ैस नौकरे पंच तोड़े मैल्लोरे थिये, तैनी गेइतां पंच होरे तोड़े हाज़र कमाए ते ज़ोने लगो, ‘हे मालिक तीं पंच तोड़े दित्तोरे, ते हेर मीं पंच तोड़े होरे कमाए।’ 21 मालिके तैस सेइं ज़ोवं, ‘शाबाश ईमानदार नौकरा तीं थोड़ी ज़ेरि रकमी पुड़ इमानदेरी सेइं कम कमाव, अवं तीं बेड़ि चीज़ां केरो मुख्तियार बनालो, ते अपने मालिकेरी खुशी मां शामिल भो।’ 22 ते ज़ैस दूई तोड़े मैल्लोरे थिये, तै भी अव ते ज़ोने लगो, ‘हे मालिक तीं मीं दूई तोड़े दित्तोरे थिये, ते हेर मीं दूई तोड़े होरे कमाए।’ 23 मालिके तैस सेइं ज़ोवं, ‘शाबाश ईमानदार नौकरा तीं थोड़ी ज़ेरि रकमी पुड़ इमानदेरी सेइं कम कमाव, अवं तीं बेड़ि चीज़ां केरो मुख्तियार बनालो, ते अपने मालिकेरी खुशी मां शामिल भो।’ 24 ते ज़ैस अक तोड़ो मैल्लोरे थियो, त तै भी हाज़र भोव ते ज़ोने लगो, ‘हे मालिक अवं ज़ानतो थियो तू बडो सखत मैन्हु आस, तू तैस मैनेरो ज़ेरोस ज़ैनी ऊडारे मां फसल नई बेवरी ते तै तैट्ठां फसल कटते।’ 25 एल्हेरेलेइ अवं डरो कि अगर अवं तेरी दौलत हिरेइलो त तू मीं सज़ा देलो, तांए तेरी दौलत मीं ज़मीनी मां देबतां छुड़ी, हेर, ‘तेरी दौलत ई आए।’ 26 तैसेरे मालिके जुवाब दित्तो, हे दुष्ट ते निकम्मे नौकरा अगर तीं पतो थियो, कि अवं तैस मैनेरो ज़ेरोई ज़ैनी ज़ैस ऊडारे मां नई बेवरू त तैट्ठां कटते। 27 त तीं एन लोड़तू थियूं कियोरू, कि मेरी दौलत शौकारां केरे हवाले केरस, तैखन अवं वापस एइतां अपनि दौलत सूते समेत उसुल केरथो। 28 हुनी एन केरा कि एस करां तै तोड़ो नेइतां तैस देख ज़ैस कां दश तोड़ें। 29 एल्हेरेलेइ ज़ैस कां परमेशेरी मर्ज़ी समझनेरी इच्छा आए, तैस परमेशर जादे समझ देलो। पन ज़ैस कां परमेशेरी मर्ज़ी

समझनेरी इच्छा नई, तैस केरां, थोड़ी ज़ेरि समझ ज़ै तैस कां आए, तै भी नी गाली। 30 ते एस निकम्मे नौकरे आंधरे मां छुट्टा, ज़ैड़ी ए लेरां देंतो ते दंत चापतो राए। 31 ज़ैखन मैनेरू मट्टू यानी अवं, अपने महिमा मां अपने स्वर्गदूतन सेइं साथी एज्जेलो त अपने महिमारे तखते पुड़ बिशतां लोकन पुड़ राज़ केरेलो। 32 सैरी कौमां मीं कां अकोट्टी भोली, ते धर्मी लोक बुरे लोकन करां अलग किये गानेन, जेन्चरे पुहाल भैडुन, छेल्लन मरां अलग केरते। 33 ते अवं धर्मी लोकन सेइं ज़ैना मेरे देइने पासे भोले, ते बुरे लोकन ज़ैना मेरे बाएं पासे भोले। 34 तैखन राज़ो यानी अवं अपने देइने पासेरे लोकन सेइं ज़ोलो, “एज्जा मेरे बाजरे धन लोकव इन राज़, ज़ैन दुनियारे शुरु मां तुश्ले लेइ तियार कियोरूए। 35 किजोकि अवं नियन्नो थियो, ते तुसेईं मीं रोटी खुवाई, अवं ट्लिशोरो थियो, ते तुसेईं मीं पानी पियावं अवं परदेशी थियो, ते तुसेईं अवं अपने घरे मां कुजाव। 36 अवं नगो थियो, ते तुसेईं मीं लिगडां दितां, ते अवं बिमार थियो, ते तुसेईं मेरी हेरगेश की अवं कैद थियो, ते तुस मीं मिलने आए।” 37 तैखन तैना धर्मी मैनु ज़ोलो, “हे प्रभु असेईं कैखन तू नियन्नो लाव, ते असेईं तीं रोटी खुवाई या तू ट्लिशोरो थियो, ते असेईं तीं पानी पियावं।” 38 असेईं कैखन परदेशी सेमझतां तू अपने घरे मां रखवो, या तू नगो थियो, ते असेईं तीं लिगडां दितां? 39 ते अस कताली तीं बिमार या कैद लेइतां तीं सेइं मिलने आए? 40 तैखन राज़ो यानी अवं जुवाब देलो, “कि अवं तुसन सेइं सच ज़ोताई कि ज़ैखन तुसेईं इन लोकन सेइं ज़ैनेईं मीं पुड़ विश्वास कियो एक्की सेइं भी एरो बताव कियो त एन बुझा कि एन तुसेईं मीं सेइं कियूं।” 41 तैखन तै बाएं पासे बालन सेइं ज़ोलो, “हे लानती लोकव मेरे तुत्तरे अगरां तैस हमेशारी बैलती अगगी मांजो गाथ, ज़ै परमेशरे, शैतान त कने शैतानेरे दूतां केरे लेइ तियार कियोरीए। (aiōnios g166) 42 एल्हेरेलेइ ज़ैखन अवं नियन्नो थियो, ते तुसेईं मीं रोटी न खुवाई अवं ट्लिशोरो थियो, ते तुसेईं मीं पानी न पियावं। 43 अवं परदेशी थियो, ते तुसेईं अवं अपने घरे मां न रखवो, अवं नगो थियो, ते तुसेईं मीं लिगडां न दितां, ते अवं बिमार ते कैद थियो, ते तुस मीं सेइं मिलने न आए।” 44 तैखन तैना लोक भी ज़ोले, “हे प्रभु असेईं कताली तू नियन्नो या ते ट्लिशोरो या परदेशी ते नगो या बिमार या कैद लाव ते असेईं तेरी सेवा न की?” 45 तैखन अवं अपने बाएं पासेरे लोकन जुवाब देलो, “अवं तुसन सेइं सच ज़ोताई कि ज़ैखन तुसेईं मेरे इन निकड़े करां निकड़े लोकन पुड़ ज़ैना मीं पुड़ विश्वास केरतन एक्की सेइं भी एरो ज़ेरो बताव कियो त एन बुझा कि एन मीएं सेइं कियूं। 46 एल्हेरेलेइ एन लोकन हमेशारे लेइ सज़ा भोली, पन धर्मी लोकन हमेशारी ज़िन्दगी मैलेली।” (aiōnios g166)

26 ज़ैखन यीशु एन गल्लां की, त तै अपने चलन सेइं ज़ोने लगे।

2 “तुसन पत्तोए कि दूई दिहैइना बाद फ़सह तिहारे, ते मैनेरू मट्टू कूसे पुड़ चाढ़नेरे लेइ ट्लुवाव गाए।” 3 तैखन प्रधान याजक ते कौमरे बुजुर्ग कैफा महायाजकेरे अंगने मां अकोट्टे भोए। 4 ते तैनेईं सल्लाह की, कि यीशु धोखे सेइं ट्लेइतां मेरी छड़म। 5 पन तैना ज़ोते थी, कि फ़सह

तिहारेरे मौके पुड़ नई, एरू न भोए कि लोक हंगामो केरन। 6 तैस मौके यीशु बैतनिय्याह इलव्वें मां शमोन कोढेरो घरे मां थियो। 7 ते अक कुआन्श शंखमरमरी भांडे मां इत्र घिन्तां यीशु कां आई, तैखन ते रोटी खानेरे लेइ बिशोरो थियो, त तैसेरे दोगे पुड़ तै इत्र उलटाव। 8 चले एन लेइतां बडे नाराज़ भोए ते ज़ोने लगे, “कि ए किजो बराबर कियो?” 9 अगर ए बेचोरो भोथो, त बडी कीमत मैलनी थी, ज़ै गरीबन बेन्टां देथे। 10 यीशुए एन शुन्तां तैन सेइं ज़ोवं, “तुस एस कुआन्शी किजो तंग केरने लोरिथ? एसां त मीं सेइं रोडू कियोरूए। 11 गरीब त हमेशा तुसन सेइं साथी भोनेन, पन अवं तुसन सेइं साथी हमेशा नई भोने। 12 तैसां मेरी जानी पुड़ ज़ै ई इत्र उलटावरोए, तैसां मेरे दबनेरे लेइ कियोरू। 13 अवं तुसन सेइं सच ज़ोताई, कि सैरी दुनियाई मां ज़ैडी भी खुशखबरी शुनाई गाली, तैडी तैसेरी यादगैरी मां एस गल्लेरे बारे मां भी ज़ोवं गालू।” 14 फिरी 12 चलन मरां अक ज़ेसेरू नवं यहूदा इस्करियोती थियूं, प्रधान याजकन कां जेव ते ज़ोवं। 15 “अगर अवं यीशु तुसन ट्लुवेइं, त तुस मीं कुन देले? तैनेईं तैस ट्लाही चैदरे सिके दित्ते। 16 ते तै तेइसेरो ते ठीक मौके बलगने लगे कि यीशु केन्चरे सेइं ट्लुवाए।” 17 “अखमीरी रोट्टारे तिहारेरी पेइली दिहाड़ी चले यीशु कां एइतां पुच्छने लगे कि, तू फ़सह तिहारेरी रोटी कोड़ि खानी चातस, ताके अस गेइतां तियारी केरम?” 18 तैनी ज़ोवं, “नगर मां अक फलानो मैनुए, ते तुस तैस कां गाथ ते तैस ज़ोथ, कि गुरु ज़ोने लगगोरोए, मेरो वक्त नेडे पुज़ोरोए ते अवं अपने चलन सेइं साथी फ़सह तेरे घरे मां मनेइलो।” 19 बरसा ज़ेरो यीशुए अपने चलन हुक्म दित्तोरो थियो, तैनेईं तेन्चरे फ़सह तिहारेरी रोटी तियार की। 20 ज़ैखन इलोझ भोइ त यीशु 12 चलन सेइं साथी रोटी खाने बिश्शो। 21 ते रोटी खांते बार यीशुए तैन सेइं ज़ोवं, “अवं तुसन सेइं सच ज़ोताई कि तुसन मरां अक मीं ट्लुवालो।” 22 “एन शुन्तां तैना सारे चले उदास भोए, तैना बैरी-बैरी सेइं तैस पुच्छने लगे, हे प्रभु कुन अव्वें त नई?” 23 तैनी जुवाब दित्तो, “ज़ैनी मीं सेइं साथी थैली मां हथ छुडोरोए, तैए मीं ट्लुवालो। 24 मैनेरे मट्टेरे लेइ त ज़ेरू तैसेरे बारे मां लिखोरूए तैस सेइं तेरहु कियूं गाते, पन अफ़सोस तैस मैनु पुड़ ज़ेसेरी वजाई सेइं तैन ट्लुवाव जेव, तैसेरेलेइ एन्ने रोडू थियूं कि तै ज़मरोरो न भोथो। 25 तैखन ट्लुवानेबालो यहूदा ज़ोने लगे, हे गुरु अव्वें त नई? तैनी तैस सेइं ज़ोवं, तीं एप्पू ज़ोवं।” 26 खांते बार यीशुए रोटी ट्लाती, ते बरकत मेगतां ट्लोड़ी, ते चलन कां देइतां ज़ोवं यांथ खाथ ई मेरी जाने। 27 फिरी यीशुए दाख़रे रसेरो कटोरो ट्लातो, ते परमेशेरू शुक्र केरतां चलन कां दित्तो ते ज़ोवं, “यांथ तुस सब इस मरां पीया। 28 किजोकि ई मेरे नव्वे करारे मां मेरो तै खूने ज़ै बडां केरे पापां केरि मैफारे लेइ दित्तो गाते। 29 अवं तुसन सेइं ज़ोताई, कि अवं दाख़ारो ई रस फिरी कथे न पियेलो ज़ां तगर परमेशेररे राज़े मां तुसन सेइं साथी नव्वो न पीं।” 30 तैल्ला पत्ती, यीशु त कने तैसेरे चले परमेशेरू भजन ज़ोइतां, यरूशलेम नगररे बेइर ज़ैतून नव्वेरे पहेड़ी पुड़ चली जे। 31 तैखन यीशुए तैन सेइं ज़ोवं, “तुस अज़े राती मेरी वजाई सेइं ठोकर खाले, किजोकि लिखोरूए, ‘अवं

पुहाले मारेलो ते धनेरी भैडू तितर-बितर भोली।’ 32 पन अवं जीतो भोइतां तुसन करां पेइले गलील इलाके मां गेइलो।” 33 पतरसे तैस सेइं ज़ोवं, “अगर सारे तेरी वजाई सेइं ठोकर खान त खान, पन अवं तेरे बारे मां कधी ठोकर न खेइलो।” 34 यीशुए तैस सेइं ज़ोवं, “अवं तुसन सेइं सत्र ज़ोताई कि अज़ राती कुकड़ बांग देने करां पेइले तू मेरो ट्लाई बार इन्कार केरेलो।” 35 पन पतरसे ज़ोवं, “अगर तीं साथी मीं मरनू भी पे, त तांभी अवं तेरो इन्कार न केरेलो ते सैरी चेलेई भी एन्ने ज़ोवं।” 36 तैखन यीशु अपने चेलन सेइं साथी एककी ठैरी पुजो, ज़ैस ठारारू नवं गतसमनी थियूं, ते तै अपने चेलन सेइं ज़ोने लगे, तुस इड़ी बिश्शा, ते तांतगर अवं उड़ी अगर गेइतां प्रार्थना केरताई। 37 तैनी पतरस ते जेबेरां दुइये मट्टां साथी नियां, ते तैड़ी तै बड़े परेशान भोने त कने घबराने लगे। 38 फिरी यीशु तैन सेइं, इस दुखेरे वजाई सेइं मेरे प्राण निसने लोरेन इड़ी बिश्शारे राथ ते बींझे राथ। 39 फिरी थोडो ज़ेरे अगर गेइतां तल्ले मां मथथो टेकतां खिरको ते प्रार्थना की, “हे बाजी अगर भोइसखे त ई कटोरो मीं करां टेली जाए, फिरी भी ज़ैन अवं चाताई तैन नई बल्के ज़ैन तू चातस तैन्ने भोए।” 40 फिरी तै चेलन कां वापस अव ते तैना झुलारे लाए, ते तैने पतरसे सेइं ज़ोवं, “कुन तुस अक घड़ी भी मीं सेइं साथी बींझे न बिश्शी सके?” 41 बींझे बिश्शा ते प्रार्थना केरते राथ ताके तुस अज़मैइशी मां न राथ, आत्मा त तियारे पन जान कमजोरे। 42 यीशुए फिरी जेव, ते ई प्रार्थना की, “हे मेरे बाजी ई दुखखेरो कटोरो मेरे पीने बगैर टेली न सखे, त तेरी मर्जी पूरी भोए।” 43 तैखन तै चेलन कां एइतां तैना फिरी झुलारे लाए, किजोकि तैन केरि एछछी ऑइले सेइं गिरकी भोरी थी। 44 तै तैन तैड़ी छेइतां चलो जेव, ते फिरी तैए प्रार्थना केरने लगे ज़े पेइली कियोरी थी। 45 तैसेरां बाद तै चेलन कां वापस अव, ते तैन सेइं ज़ोने लगे, “हुनी झुलारे राथ ते आराम केरा, हेरा तै मौको नेडे पुजोरोए, ते मैनेरू मट्टू पापी लोकां केरे हवाले कियूं गाते। 46 उठा, चलम। हेरा! मीं ट्लुवानेबालो नेडे पुज्जी जोरोए!” 47 तै एना गल्लां ज़ोने लोरो थियो, त यहूदा ज़ै 12 चेलन मरां थियो तैड़ी पुजो, तैस सेइं साथी बड़े मैन्हु थिये ज़ैना तलवारां ते लट्ठां घिन्तां ओरे थिये तैना प्रधान याजकन ते कौमरे बुजुर्ग लोकेई भेजोरे थिये। 48 तैसेरे ट्लुवाने बाले तैन ई निशान दित्तोरो थियो, कि ज़ैस अवं फुम्मड़ी देइलो त तैए, ते तुस तैस ट्लेइयथ। 49 ते तैखन यहूदा, यीशु कां एइतां ज़ोवं, हे गुरु नमस्कार, ते एइतां तैस फुम्मड़ी दिती। 50 यीशुए तैस सेइं ज़ोवं, हे मेरे दोस्ता ज़ैस कम्मरे लेइ तू ओरोस तैन कम केर, तैखन लोकेई एगरोइतां यीशु पुड़ हथ रखे ते ट्लाव। 51 यीशुएरे सैथन मरां एक्के अपनि तलवार कढी, ते महायाजकेरे नौकरे पुड़ बाई ते तैसेरो कन्न कटो। 52 तैखन यीशुए तैस जो ज़ोवं, तलवारी मियांने मां रख किजोकि ज़ैना तलवार चलातन तैना तलवारी सेइं मारे गाले। 53 “कुन तू न ज़ानस अवं अपने बाजी करां मिनत केरि सकताई ते हुन्ना स्वर्गदूतां केरि 12 फौवजां बल्के तैस करां भी जादे भेजते। 54 पन फिरी तैना पवित्रशास्त्रेरी गल्लां केन्चरे पूरी भोनिन ज़ैन केरू पूरू भोनु ज़रूरीए?”

55 तैखन यीशुए तैन हछे लोकन सेइं ज़ोवं, “अवं कुन कोई डैकू आई ते तुस मींजो डांग सोटे ते तलवारां ट्लेइतां मीं ट्लाने ओरैथ? अवं त रोज़ मन्दरे मां बिश्तां शिक्षा देतो थियो ते तैखन तुसेईं अवं नई ट्लातोरो? 56 पन एन सब किछ एल्हेरेलेइ भोवं, कि पवित्र बचने मां नेबी केरि लिखोरी गल्लां पूरी भोन, तैखन सारे चले तैस तैड़ी छेइतां चले जे।” 57 ते यीशु ट्लानेबाले तैस महायाजक कैफा कां घिन्तां जे, ज़ैड़ी तैना शास्त्री ते बुजुर्ग अकोट्टे भोरे थिये। 58 ते पतरस भी दूरां देतो पत्पती तैस महायाजकेरे अंगनेर तगर जेव, ते तैड़ी पेरेहेदारन सेइं साथी बिश्तां यीशुएरो अन्त लोरो थियो हेरने कि कुन केरतन। 59 प्रधान याजक ते कने सारी महासभा यीशुएरे खलाफ गवाही तोपनेरी कोशिश केरि राओरे थिये, कि ज़ैस सेइं यीशु कल्ल कियो जाए। 60 पन कोई गवाह न मैल्लो, हालांकी बड़े झूठे गवाह भी पैश भोए, आखकार दूई गवाह पैश भोए। 61 ते ज़ोने लगे, एनी जोरू कि “अवं परमेशरेरू घर डोलतां ट्लेइ दिहाइन मां फिरी खडू केरि सकताई।” 62 तैखन महायाजक खडो भोइतां यीशु पुच्छने लगे, “कुन तू कोई ज़ुवाब न देस, इना लोक तेरे खलाफ कुन गवाही देतन?” 63 पन यीशु चुप राव, “तैखन महायाजक फिरी पुच्छने लगे, तीं जीते परमेशरेरी कसम भोए कि असन ज़ो, कि तू परमेशरेरू मट्टू मसीह आस? 64 यीशुए ज़ुवाब दित्तो, तीं एप्पू जोई छडू ते हुनी अवं भी ज़ोताई कि अज़ेरे बाद तुस मैनेरे मट्टे परमेशरेरे देइने पासे बिश्शारे लाएले, ते अम्बरे पुड़ बिदलारी मां एइते लाएले।” 65 तैखन महायाजके अपना लिगडां छिंदा, ते ज़ोने लगे, एनी परमेशरेरी तुहीन कियोरीए हुनी असन केन्ची गवाहेरी ज़रूरत नई, तुसेईं हुन्ना एसेरू झूठ शुनेरूए। 66 तुशुशी कुन राईए? तैनेई ज़ुवाब दित्तो ए कतलारे काबल आए? 67 तैखन तैनेई तैसेरे तुतरे पुड़ थुकू ते तैस घुसेइं ते होरेई थप्पड़ मैरतां ज़ोवं। 68 “हे मसीह अगर तू नबी आस त भविष्यवाणी केर ते ज़ो, तीं केनि बाहोरिए?” 69 पतरस बेइर अंगने मां बिश्शोरो थियो, ते अक नौकरानी तैस कां आई ते ज़ोने लग्गी कि तू भी यीशु गलीली सेइं साथी थियो। 70 तैनी सेबभी केरे सामने इन्कार कियो ते ज़ोवं, “मीं नई पतो तू कुन लोरिस ज़ोने? 71 तैखन पतरस बेइर फाटकेरे पासे जेव, त अक होरि नौकरानी तैस लेइतां तैन सेइं ज़ैन तैड़ी थी ज़ोने लार्इ, ई मैन्हु भी नासरतेरे यीशु सेइं साथी थियो।” 72 पन तैनी सेबभी केरे सामने कसम केरतां इन्कार कियो, ते ज़ोवं, अवं एस मैन्हु सैइयां न ज़ैनी। 73 थोडे चिरिंरां पत्ती तैना लोक ज़ैना तैड़ी खडखडे थिये, पतरसे कां आए ते ज़ोने लगे, सच्चे तू भी तैन्ने मरां अक आस, किजोकि तेरी बोली सेइं बुझोते कि तू तैसेरो साथिस। 74 तैखन तै तैस जो गेई देइतां ज़ोने लगे, ते कसम केरतां ज़ोने लगे, “अवं एस मैन्हु सैइयां न ज़ैनी।” तैखन कुकड़े बांग दिती। 75 पतरसे तैखन यीशुएरी तै गल याद आई, ज़ै तैनी ज़ोरी थी कि कुकड़ेरे बांग देने करां पेइले तू ट्लेइ बार मेरो इन्कार केरेलो, ते पतरस बेइर गेइतां हुस्बुकैइ-हुस्बुकैइ लेरां देने लगे।

27 झेइं भोते सारे लोक ते प्रधान याजक, ते कौमरे बुजुर्गेई मुशोरो कियो कि यीशुएरे कल्ल केरनेरो फैसलो कियो। 2 ते यीशु बंधतां

नीयो, ते रोमी गवर्नर पिलातुसे कां नीयो। 3 जैखन यहूदा जैनी यीशु ट्लुवेवरो थियो तैस एसास भोव, कि यीशु मुर्जम बनरोए त तैनी बडू पशतावं, ते तैना चँदेर ट्लही सिक्के प्रधान याजक ते बुजुर्गन कां वापस आने। 4 ते ज़ोने लगगे, “मीं पाप कियो, कि अक बेकसूर मैन्हू, मारने लेइ ट्लुवाव,” ते तैना ज़ोने लगगे, “असन कुने? तू ज्ञान ते तेरू कम ज्ञाने।” 5 तैखन यहूदा तैना सिक्के मन्दरेरे अंगने मां शैरतां छडे, ते तैट्टां गेइतां अपने आपे फांसी दित्ती। 6 प्रधान याजकेई तैना सिक्के सल्ले, ते ज़ोने लगगे, “इन सिक्के इशे कानूनेरे मुताबिक मन्दरेरे खज़ाने मां रखने जेइज नई, किजोकि ए कोन्ची मैन्हू मारनेरी कीमतो।” 7 एल्लेरेलेइ तैनेई मुशोरो केरतां तैस रकमी सेई कुम्हारे करां अक ऊडार घिन्नु, ताके परदेशी केरे लेइ कब्रान्स्तान बनावं गाए। 8 तांए त अज तगर भी तैस ऊडारे जो खूनेरू ऊडार ज़ोतन। 9 तैखन ते गाल पूरी भोइ ज़ै यिर्मयाह नेबे ज़ोरी थी, कि तैनेई तैसेरी पूरी कीमत चँदेर ट्लही सिक्के निये, ए कीमत इस्राएलेरे लोकेई कियोरी थी। 10 ते तैन चँदेर ट्लही सिक्केइं सेई कुम्हारेरू ऊडार घिन्ने जो दित्ते जेन्चरे प्रभुए मीं हुक्म दित्तोरो थियो। 11 ज़ैखन यीशु हाकिमेरे तुत्तरे अगर खडो थियो, ते हाकिम तैस पुच्छू, “तू यहूदी केरो राज़ोस?” यीशुए जुवाब दित्तो, “तू एप्पू ज़ोने लोरोस।” 12 ते ज़ैखन प्रधान याजक ते बुजुर्ग तैस पुइ इलज़ाम लाने लोरे थिये त यीशुए कोई जुवाब न दित्तो। 13 तैखन पिलातुसे यीशु सेई ज़ोवं, “हेर एना तेरे खलाफ केत्री गवाहेई लोरेन देने तू शुन्तस की नई।” 14 पन यीशुए तैस एक्की गल्लारो भी जुवाब न दित्तो; ते इडी तगर कि हाकिम बडो हेरान भोइ जेव। 15 ते हाकिमेरो अक दस्तूर थियो, कि फ़सह तिहारेरे मौके पुइ अक कैदी ज़ैस लोक चाते थिये तैस हथरां छडतो थियो। 16 तैस मौके तैन केरो अक बडो मुशूर कैदी थियो, जेसेरू नवं बरअब्बा थियूं। 17 ज़ैखन तैना लोक पिलातुसे कां जम्हां भोए, त पिलातुसे तैन पुच्छू, “तुस कुन चातथ, अवं केस हथरां छेड्डी? बरअब्बा कि यीशु ज़ैस जो मसीह ज़ोतन?” 18 किजोकि तै ज्ञानतो थियो, कि तैनेई सिर्फ जलनी सेई तै ट्लुवोरोए। 19 ज़ैखन तै आदालतरि तखते पुइ बिशोरो थियो, त तैसेरी कुआन्शां तैस जो समाद भेजोरो थियो, “कि तू एस रोइ मैनेरे बारे मां किछ न करां, किजोकि मीं अज राती एसेरी वजाई सेई सुपने मां बडो दुःख भोरोए।” 20 पन प्रधान याजकेई ते बुजुर्ग लोकेई लोक बमकाए, कि तैना पिलातुसे करां बरअब्बा हथरां छडन ते यीशु मारन। 21 ज़ैखन हाकिमे तैन लोकन पुच्छू, “कि तुस एन दुईन मरां केस चातथ, अवं तैस हथरां छेड्डी,” तैन लोकेई ज़ोवं, “बरअब्बा।” 22 पिलातुसे तैन पुच्छू, “फिरी अवं यीशु ज़ैस जो मसीह ज़ोतन तैस सेई कुन केरि?” सब लोक ज़ोने लगगे “एस कूसे पुइ च़ाढ़।” 23 हाकिमे ज़ोवं किजो? “एनी कुन बुराई कियोरीए? पन तैना मना ज़ोरे-जोरे ज़ोने लगगे कि एस कूसे पुइ च़ाढ़।” 24 ज़ैखन पिलातुसे हेरू कि किछ भी बन्ने बालू नई बल्के उलटो फसाद भोने बालोए, त तैनी पानी मेगतां तैन मैन्हू केरे सामने हथ धोए ते ज़ोवं, “कि अवं एस एक्की धेर्मी मैनेरे खूने करां बरी भोइताई, तुसे ज़ाना।” 25 ते सारे लोकेई जुवाब

दित्तो, “एसेरो खून असन पुइ ते इशशी औलादी पुइ भोए।” 26 तैखन पिलातुसे बरअब्बा हथरां छेड्डी, ते यीशुए कोडे बावैहीतां तैन केरे हवाले कियो, ताके तैना तैस कूसे पुइ च़ाढ़न। 27 ते तैखन हाकिमेरे सिपैहीयेइं यीशु महलेरे अंगने मां नेइतां सारे फौजरे सिपाही यीशुएरे चुफुरतां जम्हां भोए। 28 तैनेई तैसेरां लिगाइं खोल्लां ते तैस अक लाल रंगोरो चोगो लुवाव। 29 फिरी कंटां केरू ताज तैसेरे दोगगे पुइ रख्खू, ते तैसेरे देइने हथ्थे मां अक निरेठरी लौठ दित्ती, ते तैस कां मथ्थो टेकतां तैसेरी हासी बनाने लगगे, ते ज़ोने लगगे, “हे यहूदी केरे राज़ा नमस्कार।” 30 तैना तैस पुइ थुकते ते सोटी सेई तैसेरे दोगगे पुइ बाते थिये। 31 ज़ैखन तैनेई तैसेरो मज़ाक बनाव, त तैसेरो चोगो खोल्लो, ते फिरी तैस तैसेरां लिगाइं लुवां ते तैट्टां च़ले, ताके तैस कूसे पुइ च़ाढ़न। 32 ज़ैखन तैना तैट्टां च़लोरे थिये, त तैन शमौन कुरेनी नंवेरो अक मैन्हू मेल्लो, तैन लोकेई तै ट़लातो ताके यीशुएरू कूस छुइतां च़लाए। 33 ते यीशु गुलगुता नंवेरी ठैरी पुजे, जेसेरो मतलबे खोपडारी ठार। 34 तैडी तैनेई यीशु दाछारो रस ते ट़्लिठो रस मिलेइतां पीने जेई दित्तो, पन तैनी पीनी न चाव। 35 ज़ैखन तैनेई यीशु कूसे पुइ च़ाढ़ो त शर्त रेखतां चिटी छेडतां तैसेरां लिगाइं भी एप्पू मांमेइं बंटा। 36 ते तैडी बिशतां तैसेरो पैरहो केरने लगगे। 37 ते तैनेई तैसेरो जुर्म एक्की पेखडी पुइ लिखतां तैसेरे दोगगे करां बा लाई ज़ैस पुइ एन लिखोरू थियूं, “ई यहूदी केरो राज़ो यीशु आए” 38 तैखन तैस सेई साथी दूई डैकू भी कूसे पुइ च़ाढ़े, अक यीशुएरे देइने पासे, ते होरो बांए पासे। 39 तैट्टां गानेबाले सारे लोक दोग हिलेइतां गाते थिये ते तैसेरी तुहीन केरते थिये। 40 ते ज़ोते थी इस मन्दरे डोलने बाला ते ट़लेइ दिहइन मां बनाने बाला, अपनो आप त बच्चा, “अगर तू परमेशेरू मट्टू आस त एस कूसे पुइरां उन्डो ओस।” 41 एन्चरे प्रधान याजक ते शास्त्री ते बुजुर्ग भी तैसेरी हासी बनाते थिये, ते ज़ोते थिये। 42 “एनी होरे बच्चाए पन अपनो आप न बचेइ बटो, ई त इस्राएलेरो राज़ो आए।’ अगर हुन्ना भी तू कूसे पुइरां उन्डो ओस्स, त अस तीं पुइ विश्वास केरतम। 43 एसेरो भरोसो परमेशेरू पुइ, अगर तै एस चाते त एस बच्चाए, किजोकि एनी ज़ोरू थियूं, ‘अवं परमेशेरू मट्टू आई।’” 44 ते दूई डैकू भी ज़ैना तैस सेई साथी कूसे पुइ च़ाढ़ेरे थिये, तैना भी तैसेरी तुहीन केरते थिये। 45 दीसेरे 12 बजेई सारे मुल्खे मां आंधरू भोवं ते ट़लेइ बज़न तगर रावं। 46 ते ट़लेइ बाज़ां केरे लगभग यीशुए बडे ज़ोरे सेई ज़ोवं, “एली, एली लमा शबक्तनी?” जेसेरो मतलबे, “हे मेरे परमेशर, हे मेरे परमेशर, तीं अवं किजो शारो?” 47 ज़ैना लोक तैडी खडखडे थिये, तैन मरां किछ शुन्तां एन ज़ोने लगगे, कि ए त एलिय्याह फुकारने लोरोए। 48 तैखन अक मैन्हू देवइतां जेव, ते अक गलास पैनी मां डोबतां ते निरेठरे सोटी पुइ टकेइतां पीनेरे लेइ तैसेरे ऐशी सेई हुरावं। 49 किछ ज़ोने लगगे, “बलगा हुनी हेरतम, कि एलिय्याह एस बच्चाने एइते कि नई।” 50 ते यीशुए फिरी ज़ोरे सेई चिन्ड मारी ते प्राण दित्ते। 51 तैखन मन्दरेरो पडदो बां देता बुन तगर फेटतां दूई टुकडे भोइ जे, ते पहाइं ते सारी ज़मीन हिलने लगगी। 52 कब्रं खुल्ली जेई, ते बडे पवित्र लोक ज़ैना मौतरी निडला मां झुलोरे थिये, ज़ींते भोइ जे। 53

ते कब्रन मरां निस्तां ज्जींते भोनेरां पत्ती पवित्र नगर मां दाखल भोए, ते तैडी बडे होरि लोकेई भी लाए। 54 तैखन तैनी सूबेदार ते तैसेरे सैधेई जैन यीशुएरी निगरानी करेने लोरे थिये, भुंजल गांतो हेरो, त तैना डेरि जे, ते ज़ोने लगगे, “सच्छे एन परमेशेरू मट्टू थियूं!” 55 तैडी बेडि कुआन्शां जैना गलील इलाके मरां यीशु सेइं साथी तैसेरी सेवा केरती तैस पत्ती ओरी थी, ते दूरेरां तकने लोरी थी। 56 तैना मां मरियम मगदलीनी ते याकूब त योसेसेरी अम्मा मरियम ते जब्दरे मट्टां केरि अम्मा साथी थी। 57 ज़ैखन डलोझ भोइ त अरिमतियाहरो अक अमीर यूसुफ नंवेरो मैनु जै एप्पू भी यीशुएरो चेलो थियो अव। 58 तैनी पिलातुसे कां गोइतां यीशुएरी लाश मगी, ते पिलातुसे लाश देनेरो हुकम दित्तो। 59 यूसुफे लाश नेइतां एक्की रोडि जेरि चादरी मां पलेटी। 60 ते तै लाश एक्की नर्वीं कब्री मां जै शफ़डी मां घड़ोरी थी रख्खी, ते तैस कब्री आग्रोरां अक बड्डो घोइ तैस उबरो छड्डो। 61 ते मगदलीन इलव्वेरी मरियम ते होरि मरियम तैडी तैस कब्रारे सामने बिशोरी थी ज़ैस मां यीशुएरी लाश रखोरि थी। 62 होरसां तिवैरारे दिहाड़े बाद यहूदी केरे आरामरे दिहाड़े प्रधान याजक ते फरीसी लोक मिलतां पिलातुसे कां पुजे। 63 ते ज़ोने लगगे महाराज असन यादे कि तैनी धोखे बाजे अपने ज्जींते सांसेइं ज़ोरू थियूं, “अवं मरनेरे ट्लेइ दिहाड़ां बाद फिरि ज्जींतो भोनोई। 64 एल्हेरेलेइ हुकम दे ताके ट्लेई दिहाड़न तगर कब्री पुड़ पेरहो दित्तो गाए, कि एरू न भोए कि तैसेरे चले एइतां तैसेरी लाश चोरन, ते लोकन सेइं ज़ोन कि तै मुइदन मरां ज्जींतो भोरोए, ए धोखो पेइले धोखे करां भी जादे बुरो भोलो।” 65 पिलातुसे जुवाब दित्तो, “तुसन कां पेरहो देनेबाले आन, गाथ ज़ेत्रू भोइसखे पेरहो देथ।” 66 तैखन तैनेई गोइतां घोडे पुड़ मोहर लाई, ते कब्रारे पेरहे लेइ पेरहेदार रख्खे।

28 आरामरे दिहाड़े बाद हफतेरे पेइले दिहाड़े ट्लेकडोंते-ट्लेकडोंते मगदलीन इलव्वेरी मरियम ते होरि मरियम ज़ैडी यीशुएरी लाश कब्री मां रख्खोरी थी, हेरने एई। 2 ते हेरा अक बड्डो भुंजल अव, किजोकि परमेशेरु अक स्वर्गदूत स्वर्गंरां ओरो थियो, ते तैस कब्री अगरां घोड़ उन्ढो बिछोइतां तैस पुड़ बिश्वी जेव। 3 तैसेरी शकल सूरत दिहाड़ेरी जेरि रोडी थी, ते तैसेरां लिगड़ां हींविंरां ज़ेरां छित्तां सुफेद थियां। 4 पेरहेदार डेरतां थर-थर कम्बने लगगे ते ज़ेरे मुइदे भोए। 5 स्वर्गदूते कुआन्शन सेइं ज़ोवं, “डरा नन्ना, अवं जानताई कि तुस यीशुए तोपने लोरिथ, ज़ै क्रूसे पुड़ चाढोरोए। 6 तै इडी नई बल्के ज़ेन्चरे तैनी ज़ोरू थियूं, तै ज्जींतो भोरोए, एज्जा तै ठार हेरा, ज़ैडी प्रभु थियो। 7 ते जल्दी गोइतां तैसेरे चलन पतो देथ, कि तै मुइदन मरां ज्जींतो भोरोए, ते तुसन करां पेइलो गलीले मां गाते, ते तुसेई तै लहनोए हेरा मीं तुसन एन ज़ोरूए।” 8 तैखन तैना कुआन्शां डेरतां भी ते खुशी सेइं भी कब्री मरां बेइर एई, ते दौवइती-दौवइती जेई ताके चलन पतो देन। 9 तैखन यीशु तैन मैल्लो, ते तैनी ज़ोवं तुसन शान्ति मैल्ले, ते तैनेई तैसेरे पाव बंते, ते तैस कां मथ्यो टेको। 10 तैखन यीशुए तैन ज़ोवं, डरा न ते गाथ ते मेरे चलन सेइं ज़ोथ कि

गलीले मांजो गान, तैना मीं तैडी लाएले। 11 हेजू तैना कुआन्शां बत्तां थी कि ज़ैना चलन खबर देने च़लोरी थी, त पेरहेदारन मरां किछ नगर मां जे ते प्रधान याजकन सेइं सारो बिस्तार शुनाव। 12 ज़ैखन महायाजकेई बुजुर्गन सेइं मिलतां मुशोरो कियो, ते तैनेई ई फैसलो कियो कि सिपेहिन बडे पेइसे देन, कि तैना ई गल केन्ची सेइं न ज़ोन, कि कब्र केन्चरे खाली भोइ। 13 तैनेई पेहेरेदारन एन ज़ोवं, कि तुस एन जोइयथ, कि ज़ैखन अस राती झुल्लोरे थिये त तैसेरे चले आए ते तैनेई तैसेरी लाश नी। 14 अगर ए गल गुवनरि तगर पुजेली त अस तैस एप्पू समझामेले त तुसन कोई परेशानी न भोली। 15 ते सिपैहेई पेइसे नीए ते ज़ेन्चरे तैनेई ज़ोरू थियूं तेन्चरे कमाव, ते अज़ तगर ए गल यहूदन मां मुशूरे। 16 11 चले गलीले मां जे, ते तैस पहाड़े पुड़ अकोट्टे भोए ज़ैडी गानेरे बारे मां यीशुए तैन ज़ोवरू थियूं। 17 ज़ैखन तैनेई यीशु लाव त तैस कां मथ्यो टेको, ते किछन हेजू भी शक थी, कि तै ज्जींतो वापस ओरोए। 18 तैखन यीशु तैन केरे नेडे एइतां ज़ोवं, “थेरतरो ते स्वर्गोरो सारो अधिकार मीं दित्तोरोए। 19 एल्हेरेलेइ तुस गाथ ते सैरी कौमां केरे लोकन चले बनाथ, ते तैन बाजी, ते मट्टेरे, ते पवित्र आत्मारे नंवे सेइं बपतिस्मो देथ। 20 ते तैन तैना सब हुकम मन्ने शिखाला ज़ैना मीं तुसन दित्तोरेन, ते हेरा, अवं दुनियारे आखरी तगर हमेशा तुसन सेइं साथी आई।” (aiōn g165)

मरकुस

1 ई यीशु मसीहेरे बारे मां खुशखेबरादी शुरुआत आए, जैन परमेशेरू मट्टू आए। 2 (बडे पेड़ले) यशायाह नेबे अपनि किताबी मां लिखोरू थियूं कि, (परमेशरे अपने मट्टे सेइं ज़ोवं,) “शुन, अवं अपनो बिस्तार देनेबालो तीं केरां पेड़ले भेजेलो।” “तै तीं केरां पेड़लो गेइतां तेरे लेइ बत तियार केरेलो। (यानी, लोकां केरे दिल परमेशरे लेइ तियार केरेलो)” 3 “तै बिस्तार देनेबालो सुनसान ठैरी मां लोकन, ज़ैना तैस कां गाले, तैन हक देइतां ज़ोलो कि ‘तुसन कां प्रभु एजनेबालो आए, एल्हेरेलेइ तुस तैसेरेलेइ बत तियार केरा त कने तैसेरेलेइ सड़कां सिद्धी केरा।’ (यानी, प्रभुएरे लेइ तुस अपने दिल साफ केरा।)” 4 जेन्चरां लिखोरू थियूं, अक बिस्तार देनेबालो अव। तैस मैनेरू नवं यूहन्ना थियूं। लोक तैस जो बपतिस्मो देनेबालो भी ज़ोते थियो। तै यहूदिया इलाकेरे सुनसान ठैरी मां अव। तैड़ी तै लोकन परमेशेरी गल्लां शुनातो थियो कि, “तुस अपने पापन करां मनफिराथ, त कने बपतिस्मो नेथ, ताके परमेशर तुशे पाप माफ़ केरे।” 5 यहूदिया इलाकेरे बडे लोक त यरूशलेम नगरेरे रानेबालन मरां बडे लोक यूहन्नारी गल्लां शुन्नेरे लेइ सुनसान ठैरी मां तैस कां आए। तैन लोकेई अपने पाप मन्तां यूहन्ना करां यरदन दरियाए मां बपतिस्मो नीयो। 6 यूहन्ना आम लिगड़ां लातो थियो ज़ैना लिगड़ां ऊँटेरे बालन सेइं बनोरां थियां। तै अपनि कमरी पुड़ चमड़ेरू मज़ बंधतो थियो। तै तै टिट्टां त कने जंगलेरू माछी खातो थियो। 7 तै लोकन शुनातो थियो कि, “कोई अक, ज़ै मीं केरां भी महान आए, मेरे बाद एजनेबालोए। अवं त तैसेरो गुलाम भोनेरे काबल भी नई कि लिकतां तैसेरे बूटेरे तसमे खोल्ली। 8 अवं त तुसन पैनी सेइं बपतिस्मो देताई, पन तै तुसन पवित्र आत्मा सेइं बपतिस्मो देलो।” 9 तैल्ला पत्ती, तैन दिहाइन मां एरू भोवं कि यीशु गलील इलाकेरे नासरत नगरेरां यूहन्ना कां अव। तैनी यूहन्ना करां यरदन दरियाए मां बपतिस्मो नीयो। 10 ज़ैखन यीशु बपतिस्मो नेइतां पैनी मरां बेइर अव, त तैनी अम्बर खुलतू त पवित्र आत्मा कबूतेरी शकली मां तैस पुड़ एत्तो लाव। 11 तैखन परमेशरे स्वर्गां यीशु सेइं ज़ोवं, “तू मेरू ट्लारू मट्टू आस, अवं तीं पुड़ बडो खुश आई।” 12 तैल्ला पत्ती, अकदम पवित्र आत्मा यीशु सुनसान ठैरी जो भेजो। 13 सुनसान ठैरी मां 40 दिहाइन तगर शैताने यीशु अज़माव। त तैड़ी यीशु जंगली जानवरन साथी थियो। तैखन परमेशेरे स्वर्गदूत यीशु कां एइतां तैसेरी सेवा केरने लगगे। 14 किछ वक्तेरां बाद, यूहन्ना नबी कैद कियो जेव। तैल्ला बाद, यीशु गलील इलाके मां जेव। तैड़ी तै लोकन परमेशेरेरां राज़ेरे बारे मां खुशखबरी शुनाने लगगे। 15 तैनी ज़ोवं कि, “ठीक वक्त ओरोए त कने परमेशेरू राज़ नेडे ओरूए। एल्हेरेलेइ, तुस अपने पापन करां मनफिराथ ते इस खुशखेबरी पुड़ विश्वास केरा।” 16 एकसां, ज़ैखन यीशु गलील नर्वेरे समुन्दरेरे बन्ने च़लारो थियो, तैखन तैनी दूई मैन्हु शमोन त तैसेरो दूला अन्द्रियास लाए, ज़ैना मेछली ट्लानेबाले थियो। तैना मेछली ट्लानेरे लेइ समुन्दरे मां ज़ाल छेड्डी राओरे थियो। 17 यीशुए

तैन सेइं ज़ोवं, “एज्जा मेरे चले बना। अवं तुसन शिखलेलो कि केन्चरां होरे मैन्हु मेरे चले बनानेन।” 18 अकदम तैना अपना जालां छेडतां यीशु पत्ती च़ले जे। 19 ज़ैखन तैना थोड़े ज़ेरे अगगर जे, त यीशुए याकूब त कने तैसेरो दूला यूहन्ना लाए। तैना दुइये जेबेदरां मट्टां थियां। तैना किशती मां जालां ठीक केरने लगगेरे थिए। 20 अकदम यीशुए तैना अपने चले बनानेरे लेइ कुजाए। तैना दुइये, अपने बाजी जब्दी किशती मां मज़दूरन सेइं साथी छेडतां, यीशु सेइं साथी च़ले जे। 21 तैल्ला पत्ती, यीशु त तैसेरे चले तैट्टां कफरनहूम नगरे मां जे। आरामेरे दिहाड़े, अकदम यीशु तैन केरे प्रार्थना घरे मां जेव। तैड़ी तै परमेशेरी गल्लां तैन लोकन शुनाने लगगे। 22 तैना यीशुएरी शिक्षा शुन्तां हेरान भोए, किजोकि तैनी शास्त्री लोकां केरि जेरी शिक्षा न दिती, पन तै अधिकारे सेइं शिक्षा देइ राओरो थियो। 23 ज़ैखन यीशु तैड़ी थियो, त तैन केरे प्रार्थना घरे मां अक मैन्हु थियो, ज़ैस पुड़ भूतेरो सायो थियो। 24 अचानक तैनी मैने चिन्डां मेरतां ज़ोवं, “हे नासरत नगरेरो यीशु! तीं सेइं असन कुन कम? कुन तू असन नाश केरनेरे लेइ ओरोस? अवं ज़ानताई कि तू कौन आस, तू परमेशेरू पवित्र मट्टू आस!” 25 पन यीशुए तैस भूते झिडकतां ज़ोवं, “चुप रा, एस मैन्हु मरां निस्सी गा।” 26 तैखन भूते तै मैन्हु इलेडेइतां त ज़ोरे सेइं चिन्डां मेरतां तैस मैन्हु मरां निस्सी जेव। 27 एन हेरतां सारे लोक बडे हेरान भोए। तैना एप्पू मांमेइं गलबात केरतां एककी होरि पुछने लगगे कि, “ए कुन गल आए! ए त अक नन्वी शिक्षा आए ज़ैस मां अधिकार आए! तै त भूतन भी अधिकारे सेइं हुकम देते ते तैना भी तैसेरो हुकम मन्तन।” 28 अकदम यीशुएरे बारे मां ए गल गलील इलाकेरे आसेपासेरे सेबमी ठैरन मां फैली जेई। 29 तैना अकदम प्रार्थना घरे मरां निस्तां, याकूब त कने यूहन्ना सेइं साथी शमोन त अन्द्रियासेरे घरे जे। 30 शमोनेरी शिखी भुखारे थियो ते तै लेटोरी थी। अकदम तैनेई तैसेरे बारे मां यीशु सेइं ज़ोवं कि ऊ बिमार आए। 31 यीशुए तैस कां गेइतां तैसारो हथ ट्लेइतां खडी की। अकदम तैसारो भुखार ठीक भोव। ते तै तैन केरि सेवा केरने लगगी। 32 इलोइरी ज़ैखन दिहाड़ो डुब्बो, त लोक सारे बिमार मैन्हु त कने ज़ैन मैन्हु पुड़ भूतेरो सायो थियो तैना यीशु कां आन्ने लगगे, ताके तै तैनन् बज़्ज़ाए। 33 तैस नगरेरे बडे लोक तैस घरेरे दारे पुड़ अकोट्टे भोए। 34 यीशुए बडे मैन्हु बज़्ज़ाए, ज़ैना बडे किसमां केरि बिमैरन सेइं दुखी थियो। त तैनी बडे मैन्हु मरां भूतां केरो सायो कट्टो। पन यीशुए भूतन किछ ज़ोने न दित्तू, किजोकि तैना यीशु पिशानतां थियां (कि एन परमेशेरू मट्टू आए)। 35 एरी दिहाड़ी, झेज़्ज़ां-झेज़्ज़ां दिहाड़ो निस्ने केरां बडे पेड़ले, यीशु उठतां बेइर एककी सुनसान ठैरी मां जेव। तैड़ी तै प्रार्थना केरने लगगे। 36 पन थोड़े च़िरेरां बाद, शमोन त तैसेरे साथी, यीशु तोपने जे। 37 ज़ैखन तैनन् तै मैल्लो, त तैनेई यीशुए सेइं ज़ोवं, “(वापस इलाव्वं मां एई,) सारे लोक तीं तोप्पी राओरेन!” 38 पन यीशुए तैन सेइं ज़ोवं, “एज्जा, अस होरि केन्वी आसेपासेरे इलॉव्वन मां गाम, ताके अवं तैन लोकन भी परमेशेरी गल्लां शुनेई। किजोकि अवं एस्से कम्मरे लेइ दुनियाई मां ओरोई।” 39 तैल्हेरेलेइ यीशु गलील इलाकेरे सारे इलॉव्वन

मां गेइतां, तैन केरे प्रार्थना घरन मां लोकन परमेशेरी गल्लां शुनातो राव ते बडे लोकन मरां भूतां केरो सायो कढतो राव। 40 तैल्ला पत्ती, एक्सां अक कोढी मैन्हु यीशु कां अवं। तैनी मैने यीशुएरे सामने जैन्धु केरे भारे बिशतां तैस कां मिन्नत केरतां तैस सेइं ज़ोवं, “अगर तू चास, त मीं बज़्ज़ोई सकतस। (महरबानी केरतां मीं बज़्ज़ा।)” 41 यीशुए तैस मैन्हु पुड़ तरस खाव। यीशुए अपनो हथ अग्रोवं कियो त तैस कोढी मैन्हु सेइं हथ लेइतां ज़ोवं, “अवं चाताई, तू बज़्ज़ोस।” 42 अकदम तै कोढी बज़्ज़ोई जेव। 43 तैखन यीशुए तै मैन्हु समझेइतां लूशी भेजो। 44 त तैनी तैस सेइं ज़ोवं, “हेर, एस गल्लरे बारे मां केन्ची सेइं किछ न जोइयां। (तू यरूशलेम नगरेरे मन्दरे मां गा), त कने अपने आपे याजके हिरा। तैल्ला पत्ती, तू अपने बेज़्ज़ोनेरे वजाई सेइं चढतल च़ाढ, जेसेरे बारे मां मूसा नेबे कानूने मां हुकम दित्तोरोए, ताके लोकन पतो च़लते कि तू बेज़्ज़ोरोस।” 45 पन तै मैन्हु बेइर गेइतां एस गल्लारे बारे मां लोकन बड्ड शुनाने लगे ते इडी तगर फैलाने लगे कि यीशु फिरी बांदे नगरे मां न गेइ सको, पन बेइर सुनसान ठैरन मां राव ते च़ेरे पासां केरे लोक तैस कां एइते राए।

2 किछ दिहाइना बाद, यीशु फिरी कफरनहूम नगरे मां जेव। तैट्टेरे मैनेईं शुनु कि तै तैडी एक्की घरे मां आए। 2 अकदम बडे मैन्हु तैस घरे मां अकोट्टे भोए। तैडी ठार न राई, इडी तगर कि दारे केरां बेइर भी ठार न थी। यीशु तैन लोकन परमेशेरी गल्लां शुनाने लगे। 3 तैखन किछ मैन्हु एक्की अधरंगी मैन्हु छुइतां यीशु कां आए। च़ेरे मैनेईं तै अधरंगी मैन्हु खट्टी पुड़ छुइतां आनोरो थियो। 4 मैन्हु केरि भीइरे वजाई सेइं, तैना यीशुएरे नेडे न पुज़्जी सके। एल्लेरेलेइ तैनेईं तैस घरेरी छत ज़ैस मां यीशु थियो पुट्टी छुइती। तैल्ला बाद, तैनेईं तै खट ओसाली ज़ैस पुड़ अधरंगी मैन्हु थियो। 5 यीशुए तैन केरो विश्वास हेरतां अधरंगी मैन्हु सेइं ज़ोवं, “हे मट्टा, तेरे पाप माफ़ भोए।” 6 तैखन शास्त्री लोकन मरां किछ मैन्हु ज़ैना तैडी थिये, अपने-अपने मने मां सोचने लगगे कि, 7 “ए मैन्हु एन्चरां किजो ज़ोते? ए त परमेशेरी तुहीन केरते। परमेशेरे अलावा कौन पाप माफ़ केरि सकते?” 8 अकदम यीशुए ज़ैनी छुइ कि तैना अपने-अपने मने मां कुन सोचने लगगेरेन। एल्लेरेलेइ तैनी तैन सेइं ज़ोवं, “तुस अपने-अपने मने मां एन्चरां किजो सोचने लगगेरेथ? 9 एस अधरंगी मैन्हु सेइं कुन ज़ोनू सुख्खू आए? एन ज़ोनू कि ‘तेरे पाप माफ़ भोए,’ या एन ज़ोनू कि ‘उठ, अपनि खट छुइतां च़ल फिर?’” 10 अवं किछ केरनेबालोई, ज़ैस सेइं तुसेईं बुज़्ज़नूए कि मैनेरे मट्टे (यानी मीं) धेरती पुड़ लोकां केरे पाप माफ़ केरनेरो अधिकार आए!” फिरी तैनी तैस अधरंगी मैनेरे पासे मुइतां तैस सेइं ज़ोवं, 11 “अवं तीं सेइं ज़ोतई, उठ, अपनि खट छुइतां अपने घरजो गा!” 12 अकदम तै खडो उठो ते अपनि खट छुइतां सारे मैन्हु केरे सामने निस्तां च़लतो जेव। एस वजाई सेइं सारे मैन्हु हेरान भोए, त परमेशेरी बड़याई केरतां ज़ोने लगगे, “असेईं एरू ज़ेरू कधी नईं लावरू!” 13 तैल्ला पत्ती, यीशु तैट्टा निस्तां फिरी गलील समुन्दरेरे बन्ने जेव। तैखन मैन्हु केरि सारी भीड़ तैस कां आई। तै तैन लोकन परमेशेरी गल्लां केरि शिक्षा देने लगे। 14 समुन्दरेरे बन्ने गाते-गाते, यीशुए लेवी नंवेरे मैन्हु

लाव, ज़ैन हलफईसेरू मट्टू थियूं। तै मैन्हु चुंगी नेनेरे दफ़तरे मां कम केरतो थियो। तैखन यीशुए तैस सेइं ज़ोवं, “मीं पत्ती एई, ते मेरो चेलो बन।” अकदम लेवी उठो त यीशु पत्ती च़लतो। 15 बादे मां, यीशु त तैसेरे चेले लेवेरे घरे मां रोट्टी खाने बिशशे। तैखन बडे चुंगी नेनेबाले त होरे पापी मैन्हु (लोक तैन केरे बारे मां सोचते थिये कि एना पापिन।) भी यीशु त तैसेरे चेलन सेइं साथी रोट्टी खाने बिशशे, किजोकि एन केरे ज़ेरे बडे लोक यीशु पत्ती च़लते थिये। 16 ज़ैखन किछ शास्त्री लोकेईं त कने फरीसी लोकेईं हेरू कि यीशु पापी मैन्हु त चुंगी नेनेबालन सेइं साथी रोट्टी खाने लगगेरोए, तैखन तैनेईं यीशुएरे चेलन सेइं ज़ोवं, “तै चुंगी नेनेबालन त पैपन सेइं साथी किजो खाते पीते?” 17 यीशुए तैन केरि गल शुन्तां तैन मिसाल देइतां जुवाब दित्तो, “सज़र लोकन डाक्टरेरी ज़रूरत न पे, पन बिमार मैन्हु ज़रूरत पेचे। तेन्चरां, अवं तैन मैन्हु केरे लेइ नईं ओरोईं ज़ैना अपने आपे धर्मी समझतन, पन पापी मैन्हु कुजाने ओरोईं, ताके तैना अपने पापन केरां मन फिरान।” 18 यूहन्नारे चेले त कने फरीसी लोक बरत रखते थिये, पन यीशुएरे चेले बरत न थिये रखते। किछ लोकेईं यीशु कां एइतां तैस पुच्छू, “यूहन्नारे चेले ते फरीसी लोकां केरे चेले बरत रखतन, पन तेरे चेले बरत की न रखन?” 19 यीशुए तैनन् जुवाब दित्तो, “इलाएरे दिहाडे, ज़ैखन लाडो ज़ैनी सेइं साथी राते, कुन तैना बरत रेख्खी सकतन? (बिलकुल नईं) तैल्लेरेलेइ, ज़ांतगर लाडो तैन सेइं साथी राते, तांतगर तैना बरत न रेख्खी सकन। (किजोकि तैना खुशी आन।) 20 मेरे चेले भी तैन केरे ज़ेरे आन, किजोकि अवं तैन सेइं साथी आईं। पन तैना दिहाडे एज्जले, ज़ैखन लाडो तैन केरां अलग कियो गालो (यानी मारो गालो), तैस मौके तैना (अपने दुख्खेरे वजाई सेइं) बरत रखेले।” 21 “अवं तुसन अक होरि मिसाल देताई, नंवे लिगडेरी टलोईं पुराने लिगडे कोईं न लाए। अगर कोईं एन्चरां केरे, त धोनेरे पत्ती नंवे लिगडेरी टलोईं पुराने लिगडे अपने पासे खिचची छुइली। त तैन पेइले केरां भी जादे छिन्दोलू। 22 तेन्चरे कोईं भी पुरैनी मसकन मां नंवे दाछारो रस न रखे, किजोकि दाछारो रस अम्लो भोइतां फुलते बार मसकन छिन्दी छुइलो। दाछारे रस त कने मसकां, एना दुइये बरबाद भोइ गाले। एल्लेरेलेइ नंवे दाछारे रस हमेशा नंवे मसकन मां रखखोरो लोडे, ताके मसकन न छिन्दे।” 23 एक्की आरामेरे दिहाडे, यीशु त कने तैसेरे चेले बत्ती मामेईं च़लने लगगेरे थिये, ज़ै गेव्वां केरे ऊडारन मामेईं थी। च़लते-च़लते तैसेरे चेले गेव्वां केरे किछ शिल्लां टलोइतां खाने लगगे। 24 पन किछ फरीसी लोकेईं तैन हेरतां यीशु सेइं ज़ोवं, “तक! एना आरामेरे दिहाडे तैन कम किजो केरतन, ज़ैन मूसेरे कानूनेरे मुताबिक जेइज़ नईं?” 25 यीशुए तैन सेइं ज़ोवं, “कुन तुसेईं परमेशेरी किताबी मां एन कधी नईं पढोरूए कि (बडे पेइले) दाऊद राजे कुन कियूं, ज़ैखन तैस त तैसेरे सैथन ढलुख लगगी त तैनन् रोट्टी ज़रूरत थी? 26 तुसन पतोए कि दाऊद राजे परमेशेरे घरे मां गेइतां, अबियातार नंवेरे महायाजक केरां खाने जो रोट्टी मग्गी। दाऊदे तै रोट्टी खाइ, ज़ै परमेशेरे जो च़ढोरी थी। कानूनेरे मुताबिक याजक केरे अलावा होरि

केन्वी तैना रोटी खानेरी अजाज़त नई थी। पन दाऊदे अपने सैथन भी रोटी दित्ती त तैनेई भी तैना रोटी खेइ? (पन फिरी भी परमेशरे दाऊदे पुइ दोष न लाव।) 27 तैखन यीशुए तैन फरीसी लोकन सेइं ज़ोवं, “परमेशरे आरामेरी दिहाइरी लोकन मद्रत केरनेरे लेइ बनोरीए, न कि आरामेरे दिहाइरे कानून मन्नेरे लेइ तैनी लोक रचे। 28 एल्हेरेलेइ, मैनेरू मद्रू यानी अवं आरामेरे दिहाइरेरो भी प्रभु आई।”

3 तैल्ला पत्ती, यीशु एक्की प्रार्थना घरे मां जेव। तैड़ी अक मैन्हु थियो, ज़ेसेरो हथ शुक्कोरे थियो। 2 तैड़ी किछ फरीसी लोक भी थिये, ज़ैना यीशु पुइ इलज़ाम लानो चाते थिये। एल्हेरेलेइ तैना यीशु ध्याने सेइं हेरने लगगेरे थिये कि आरामेरे दिहाइ तै तैस मैन्हु बड़्ज़ाते की नई। 3 तैखन यीशुए शुक्कोरे हथेबाले मैन्हु सेइं ज़ोवं, “मझाटे खडे भो।” (ते तै मैन्हु खडो भोव।) 4 त यीशुए तैन लोकन पुच्छू, “आरामेरे दिहाइ कुन केरनू जेइजे, मैनेरू भलू केरनू या बुरू केरनू, मैनेरी जान बचानी या मारनी?” पन तैना चुप राए। 5 त तैनी सरकी सेइं तैन केरे चेरे पासन तक्कू, पन तैन केरे सखत दिलेरी वजाई सेइं उदास भोव। तैखन तैनी तैस मैन्हु सेइं ज़ोवं, “अपनो हथ अग्रोवं केर।” तैनी मैने अपनो हथ अग्रोवं कियो। त अकदम तैसेरो हथ बेज्ज़ोव। 6 तैखन फरीसी लोक प्रार्थना घरे मरां बेइर जे। अकदम तैना हेरोदेस राजेरे लोकन सेइं साथी यीशुएरे खलाफ साज़िश केरने लगगे कि यीशुएरो कोस तरीके सेइं कल्ल केरमा। 7 तैल्ला पत्ती, यीशु अपने चलन सेइं साथी गलील समुन्दरेरे पासे जेव। मैन्हु केरि बड़ी भीड़ तैस पत्ती चली। गलील त यहूदिया इलाकां केरे लोक तैस कां आए। 8 यरूशलम नगरेरे लोक, इदूमिया इलाकेरे लोक ते यरदन दरियारे पारेरे लोक त कने सूर त सैदारे आसेपासेरे लोक भी तैस कां ओरे थिये। तैना सब यीशु कां आए, किजोकि तेनेई यीशुएरे सारे चमत्कारेरे कमां केरे बारे मां शूनरू थियूं, ज़ैना तै केरतो थियो। 9 यीशुए बडे लोक हथ लेइतां बड़्ज़ावरे थिये, एल्हेरेलेइ हारे बडे लोक ज़ैना बडे बिमार थिये, तैना तैस सेइं हथ लानेरे लेइ तैस पुइ बिछड़ी गाते थिये, ताके तैना भी बेज्ज़ोन। मैन्हु केरि भीड़ बडी जादे थी। एल्हेरेलेइ यीशुए अपने चलन सेइं ज़ोवं, “मेरे लेइ अक किशती तियार केरा, ताके एना लोक मीं ढलेन्नी न सकन।” 11 त ज़ैन लोकन पुइ भूतां केरो सायो थियो, तैना भी यीशु लेइतां तैसेरे पावन पुइ बिछड़ी गाते थिए। तैना भी ज़ोरे-ज़ोरे सेइं ज़ोते थिए कि, “तू परमेशेरू मद्रू आस।” 12 यीशुए तैन भूतन सखत हुकम दितो कि, “मेरे बारे मां लोकन न ज़ोथ कि अवं कौन आई।” 13 तैल्ला पत्ती, यीशु एक्की पहाडे पुइ चढो। ज़ैना मैन्हु तै अपने चले बनानो चातो थियो, तैना एप्पू कां कुजाए। तैना तैस कां आए। 14 यीशुए तैन मरां 12 मडद चुने, ते तैन प्रेरित नवं दित्कू कि तैना तैस सेइं साथी-साथी रान, ताके तै तैन लोकन खुशखबरी शनाने भेजे। 15 यीशुए तैनन्, लोकां केरि बिमेरी बड़्ज़ाने त कने मैन्हु मरां भूतां केरो सायो कढनेरो अधिकार दितो। 16 तैना 12 मैन्हु केरां नंवां इना थियां: शमौन जेसेरू नवं यीशुए पतरस रखू, 17 याकूब त तैसेरो ढला यूहन्ना, एना दुइये जेबेदरां मद्रूं थियां, त यीशुए एन दुइयां

केरू नवं बुअनरगिस रखू, मतलब कि, गुडनेरां मद्रूं। 18 त अन्द्रियास, फिलिप्पुस, बरतुलमै, मत्ती, थोमा, याकूब ज़ैन हलफईसेरू मद्रू थियूं, त तदै, शमौन ज़ै पेइले रोमी सरकारारे खलाफ यहूदी लोकां केरि आज़ेदेरे लेइ लडनेबालो थियो। 19 त कने यहूदा इस्करियोती ज़ैनी बादे मां यीशु थोखे सेइं ट्लुवाव। 20 तैल्ला पत्ती यीशु कफरनहूम नगरेरे एक्की घरे मां जेव। फिरी मैन्हु केरि भीड़ तैस घरे मां अकोट्टी भोइ, कि यीशु त तैसेरे चलन रोटी खानेरे लेइ भी मौको न मैल्लो। 21 ज़ैखन यीशुएरे रिशतेदारई एन शुन्नु त तैना तैस ट्लेइतां अपने घरे वापस आन्नेरे लेइ जे, किजोकि तैना ज़ोने लगगेरे थिये कि तैसेरो दिमाग ठीकाने नई। 22 किछ शास्त्री लोक, ज़ैना यरूशलम नगरेरां ओरे थिये, तैना लोकन सेइं जोई राओरे थिये कि, “यीशु मां शैतान आए।” त एन भी जोई राओरे थिये कि, “ते भूतां केरे प्रधानेरी शेक्ति सेइं लोकन मरां भूतां केरो सायो कढते।” 23 एल्हेरेलेइ यीशुए तैना नेडे कुजाए ते तैन मिसाल देइतां ज़ोने लगगे, “शैतान केन्चरां अपने भूतन लोकन मरां केड्डी सकते? 24 अगर एक्की राज़ेरे लोक अपने राज़ेरे खलाफ लड़ाई केरन, त तैन राज़ बनोरू न रेइ सके। 25 अगर केन्वी टब्बेरेरे लोक अपने टब्बेरेरे खलाफ लड़ाई केरन, त तैन टब्बर भी बनोरू न रेइ सके। 26 तेन्चरे, शैतान भी अगर एप्पू अपने भूतां केरे खलाफ लड़ाई केरे, त तै केन्चरां बनोरो रेइ सकते? तैसेरो त बिलकुल खातमां भोइ गालो। 27 अवं होरि मिसाल देताई, कोई मैन्हु केन्वी ज़ोरेबाले मैनेरे घरेरे मां गेइतां तैसेरो माल तांतगर लुट्टी न सके, ज़ांतगर कि तै पेइले तैस ज़ोरेबाले मैन्हु बंधी न छुड्डे। तैखन तै तैस ज़ोरेबाले मैनेरो माल लुट्टी सकते। अवं भी शैतानेरे भूतां केरो सायो लोकन मरां केड्डी सकतां। (शैतान तैस ज़ोरेबाले मैनेरो ज़ोरोए) 28 अवं तुसन सेइं सत्र ज़ोतई कि मैन्हु केरे सारे किसमां केरे पाप त कने परमेशेरी तुहीन, ज़ै तैना केरतन, अगर तैना मन फिरान त परमेश तैन माफ़ केरेलो। 29 पन ज़ै कोई पवित्र आत्मारी तुहीन केरे, त तैस कधी भी परमेशर माफ़ न केरेलो। पन तै मैन्हु हमेशारे पापेरो दोषी बेनि गालो।” (aiōn g165, aiōnios g166) 30 यीशुए एन्चरां ज़ोवं किजोकि तैना यीशुएरे बारे मां एन ज़ोते थिये कि तैस पुइ भूतेरो सायो आए। 31 तैखन यीशुएरी अम्मा त कने तैसेरे ढला तैड़ी आए। तैना घरेरे बेइर खडे भोइतां तैस जो बिस्तार भेजो। 32 तैना घरेरे अन्तर न गेइ सके किजोकि मैन्हु केरि भीड़ यीशुएरे चेरे पासन बिशारी थी। एल्हेरेलेइ तैन लोकेई यीशु सेइं ज़ोवं, “तक, तेरी अम्मा त तेरे ढला बेइर खडे आन। तैना तीं सेइं मिलनू चातन।” 33 पन यीशुए तैनन् जुवाब दितो, “अवं तुसन ज़ोताई मेरी अम्मा त कने मेरे ढला कौन आन!” 34 तैखन यीशुए तैन लोकां केरे पासे तेकतां ज़ोवं, ज़ैना तैसेरे चेरे पासन बिशारे थिये, “तक्का, मेरी अम्मा त कने मेरे ढला इना आन। 35 किजोकि ज़ै कोई परमेशेरी मेर्जी पुइ चलते, तैए मेरो ढला, मेरी बेइन ते मेरी अम्मा आए।”

4 तैल्ला पत्ती, यीशु फिरी गलील समुन्दरेरे बन्ने लोकन शिक्षा देने लगो। मैन्हु केरि एत्री भीड़ तैस कां अकोट्टी भोइ। यीशु समुन्दरे मां एक्की किशती मां चढो ते बिशरी जेव, ताके तै सेबमी लोकन परमेशेरी

गल्लां केरि शिक्षा देइ सके। मैन्हु केरि सारी भीड़ तैसेरी गल्लां शुन्तां समुन्दररे बन्ने पुड़ खड़ी राई। 2 यीशुए तैनन् बड़ि गल्लां मिसालन मां जोई। तैनी शिक्षा देइतां तैन लोकन सेइं जोवं, 3 “ई कहानी शुना! एक्सां अक बीज बनेबालो बीज बने जो जेव। 4 बीज बेते बार किछ बीज बत्तेरे इलेखी बिछडू त चुड़ोल्लेई एइतां तैन बीज चुनू। 5 किछ बीज घोड़नबाली ज़मीनी पुड़ बिछडू, जेड़ी तैस दुग्घी मित्ती न मेलनेरे वजाई सेइं तैन लूशी उगू त बूटो लगे। 6 पन ज़ैखन दिहाड़ो निस्सो, त तै निकडो बूटो फुककोई जेव। ते ज़ील न छुड़नेरे वजाई सेइं शुक्की जेव। 7 होरू किछ बीज कंटां केरे झैल्लन मां बिछडू। ज़ैखन तैडी बूटो लगे, त कंटां केरे झैल्लेई बेड़ोइतां तै बूटो दबेइ छुड़ो, त तैनी बुटे फल न दित्तो। 8 पन किछ बीज रोड़ी ज़मीनी पुड़ बिछडू, त तैन उगू त बेडोवं त फलदार भोवं। तैन मरां केन्ची बीजे टलही गुणा फल दित्तो, त केन्ची बीजे शठ गुणा, त केन्चे शौव गुणा।” 9 ए मिसाल शुनानेरे बाद, यीशुए लोकन सेइं जोवं, “जै कोई समझनू चाते, तै ध्याने सेइं शुने त समझो।” 10 तैल्ला पत्ती, ज़ैखन यीशु मैन्हु केरि भीड़ी करां अलग थियो, त तैखन तैसेरे सैथेई त कने तैसेरे 12 चलेई यीशु तैस मिसालेरे बारे मां पुच्छू। 11 यीशुए तैन सेइं जोवं, “अवं तुसन परमेशरेरे राज़ेरो भेद समझैल्लो। पन होरि लोकां केरे लेइ मिसालन मां जोवं गाते। 12 ताके ज़ेन्चरां परमेशरेरी किताबी मां लिखोरूपे तेन्चरां भोए कि, ‘जैन अवं केरतई, तैन तैना बार-बार हेरेले, पन तैना तैसेरो मतलब न बुझैले। जैन अवं जोतई, तैन तैना बार-बार शुनेले, पन मेरी गल न समझैले। एरू न भोए कि तैना अपने पापन करां मन फिरान त तैन केरे पाप माफ़ किये गान।” 13 तैल्ला पत्ती, यीशुए तैन सेइं जोवं, “कुन तुसेई तै मिसाल न समझी? अगर तुस तैस मिसाली न समझथ, त फिरि होरि सब मिसालां केन्चरां समझैले? 14 अवं तुसन तै मिसाल समझताई। बीज बनेबालो तै आए, जै परमेशरेरी गल्लां लोकन शुनाते। 15 जैना मैन्हु परमेशरेरी गल्लां शुन्तन, तैन मरां किछ लोक तैस बत्तेरे ज़ेरे आन, जेड़ी बीज बिछडते। तैना त परमेशरेरी गल्लां शुन्तन, पन शैतान अकदम एइतां तैन मैन्हु केरे दिले मरां परमेशरेरी गल्लां केड़ी छुड़ते। 16 किछ होरे लोक, जैना परमेशरेरी गल्लां शुन्तन, तैना तैस घोड़नबैली ज़मीनेरे ज़ेरे आन। तैना परमेशरेरी गल्लां शुन्तन त खुशी सेइं तैन कबूल भी केरतन। 17 पन ज़ेन्चरां निकडो बूटो घोड़नबैली ज़मीनी मां मित्ती घट भोनेरे वजाई सेइं लूशी लगेते, तेन्चरां एना मैन्हु भी भोतन। तैना मज़बूत विश्वास न रखन। एल्हेरेलेइ तैना थोड़े दिहाड़न तगर विश्वास रखतन। पन ज़ैखन परमेशरेरी गल्लां केरे मुताबिक चलनेरे वजाई सेइं तैन पुड़ मुसीबतां एचन त कने ज़ैखन लोकन केरां सताए गातन, त तैखन तैना अकदम अपने विश्वास छेडतां ठोकर खातन। 18 होरे किछ लोक, जैना परमेशरेरी गल्लां शुन्तन, तैना तैस कंटां केरे झैल्लां केरे ज़मीनेरे ज़ेरे आन। तैना परमेशरेरी गल्लां त शुन्तन, 19 पन तैना इस दुनियारी फिक्क केरतन, त कने दौलतरे वजाई सेइं धोखो खातन, त तैना बड़े चीजां केरू लालच केरतन। एसेरे वजाई सेइं तैना परमेशरेरी गल्लां बिसरी छुड़तन त तैन गल्लन पुड़ न चलन।

(aiōn g165) 20 पन किछ लोक, जैना परमेशरेरी गल्लां शुन्तन त कने तैन पुड़ चलतन, तैना तैस रोड़ी ज़मीनेरे ज़ेरे आन। तैना परमेशरेरी गल्लां शुन्तन त कबूल भी केरतन त फल देतन, मतलब की तैना परमेशरेरी गल्लां केरे मुताबिक ज़िन्दगी ज़ीतन। कोई टलही गुणा, कोई शठ गुणा त कोई शौव गुणा फल देतन।” 21 तैल्ला पत्ती, यीशुए मैन्हु केरि भीड़ी सेइं जोवं, “कोई बलतो दीयो एन्तां हेटी मां या खड़ी हठ न रखवे। पन केन्ची उच्चै ठेरी पुड़ रखवो गाते। (ताके सारे घरे लौ भोए।) 22 कोई गल छप्पोरी न राली, पन सैरी गल्लां बेदी भोली, ते न कोई भेद छप्पोरो रालो, पन सारो भेद बांदो भोलो। 23 जै कोई समझनू चाते, तै ध्याने सेइं शुने त समझो।” 24 तैल्ला पत्ती, यीशुए मैन्हु केरि भीड़ी सेइं जोवं, “होशियार राथ कि अवं तुसन कुन शिक्षा देइ राओरोई। मेरी शिक्षाई शुन्तां, जेत्री तुस मेरी गल मन्नेले तेत्री परमेशर तुसन समझ देलो। हॉ, परमेशर तुशुशी समझ होरि भी बधालो। 25 किजोकि जैस कां परमेशरेरी मर्जां समझनेरी इच्छा आए, तैस परमेशर जादे समझ देलो। पन जैस कां परमेशरेरी मर्जां समझनेरी इच्छा नई, तैस केरां, थोड़ी ज़ेरि समझ, जै तैस कां आए, तै भी नी गाली।” 26 तैल्ला पत्ती, यीशुए मैन्हु केरि भीड़ी सेइं जोवं, “परमेशरेरू राज़ एरू ज़ेरू आए, कि अक मैन्हु ज़मीनी पुड़ बीज बेते। 27 तै मैन्हु हर राती झुलते त दीसां बींझते। तैन बीज उगने लगोरूपे त बडोने लगोरूपे, पन तैस पतो न चले कि तैन केन्चरां भोते। 28 केन्चेरी मदतरे बगैर ज़मीन एप्पू फल आन्चे। पेइले मुन्केरे निस्तन, बादे मां शिल्लां निस्तन, तैल्ला पत्ती शिल्लन ग्लेव लगतन। 29 आखरी मां, ज़ैखन ग्लेव पेक्की गातन, तैखन अकदम तै मैन्हु कटाई केरनेरे लेइ मैन्हु भेजते, किजोकि कटाईरो वक्त ओरो भोते।” 30 तैल्ला पत्ती, यीशुए मैन्हु केरि भीड़ी सेइं जोवं, “अस परमेशरेरू राज़ेरी मसाल कोस चीजी सेइं देइ सकतम? कोस मिसाली सेइं अस तैस समझैइ सकतम? 31 परमेशरेरू राज़ शरीएरे बीजेरू ज़ेरू आए (जै शरीयो इस्राएले मां भोते)। ज़ैखन तैन बीज ज़मीनी मां बेव गाते, तैन सारे बीजन केरां निकडू भोते। 32 पन ज़ैखन तैन बीज बेव गाते, तै उगतां सारे निक्के-निक्के बुटन केरां बडो भोते। तैसेरी एत्री बेड़ी डेलडी निस्चन, कि अम्बेरां चुड़ोल्ली तैसेरी छावी मां अपने आले बनेइ सकतन।” 33 एन्चरां बेड़ि मिसालां जोइतां, यीशु तैन लोकन परमेशरेरी गल्लां शुनातो थियो, जेत्रू तैना शुनी सकते थियो। 34 तै हमेशा मिसाल देइतां परमेशरेरे राज़ेरे बारे मां तैन सेइं जोतो थियो। पन ज़ैखन मैन्हु केरि भीड़ी मरां यीशु त तैसेरे चले अलग बिश्ते थियो, तैखन यीशु अपने चलन सेइं सैरी मिसालां केरो मतलब समझोतो थियो। 35 तैस दिहाड़ेरे बादे मां, ज़ैखन इलोझ भोइ, यीशुए अपने चलन सेइं जोवं, “एज्जा, अस गलील समुन्दररे पार चलमा।” 36 तैल्हेरेलेइ मैन्हु केरि भीड़ छेडतां तैना तैस किशती मां चढ़े जैस मां यीशु पेड़लो थियो, त तैना तैट्टां चले जे। होरि किछ किशती मां भी लोक तैन सेइं साथी जे। 37 ज़ैखन तैना समुन्दर पार केरने लगगेरे थियो, तैखन अक बडो तूफान चलो, त छेल्ली एडी तगर पुज्जी कि किशती पैनी सेइं भेरोई जेई। 38 पन यीशु किशतेरी पेत्री पासे, शोराहने पुड़ क्रोड़ी रेखतां

झुल्लोरो थियो। तैखन तैसेरे चलेई तै बींझेइतां तैस सेइं ज़ोवं, “हे गुरु, कुन तीं फिक्र नई, अस त मरने बालेम!” 39 तैखन यीशुए उठतां तूफान डांटो, त समुन्दरे सेइं ज़ोवं, “शान्त रा, रुकी गा!” अकदम तूफान रुकी जेव त समुन्दर शान्त भोव। 40 तैखन यीशुए अपने चेलन सेइं ज़ोवं, “तुस किजो डरतथ? कुन तुसन हेजू भी मीं पुड़ विश्वास नई?” 41 पन तैना बड़े डेरि जे त एप्पू मांमेइं ज़ोने लगगे, “ए मैन्हु कौन आए कि तूफान त समुन्दर भी एसेरो हुकम मन्तन!”

5 यीशु त तैसेरे चले गलील समुन्दरे पार, गिरासेनी इलाके मां पुज्जे। 2 ज़ैखन यीशु किशती पुडेरं ओस्सो, त तैखन अक मैन्हु, ज़ैस पुड़ भूतां केरो सायो थियो, कब्रन मांमेइं यीशु कां मिलने अव। 3 तै मैन्हु कब्रस्ताने मां रातो थियो। (तै मैन्हु बड़ो खतरनाक थियो।) कोई तैस शंगली सेइं भी न बेंधी सकतो थियो। 4 किजोकि (पेइले बड़े बार) लोकेई तैसेरे हथ पाव शंगलन सेइं बंधोरे थिये। पन हर बार तै हथ्यां केरि शंगलां टलोइतो थियो त पवां केरि शंगलां केरे टुकड़े-टुकड़े केरतो थियो। कोई तैस कैबू न केरि सकतो थियो। 5 तै हमेशा रात-दिहाड़ी कब्रस्ताने मां त कने पहैइन पुड़मेइं हन्ठतो थियो त चिन्डां मारतो थियो, त अपने आपे घोड़न सेइं ज़ख्मी केरतो थियो। 6 ज़ैखन तैनी मैने यीशु दूरें लाव, त तै दौड़तां यीशु कां अव ते तैस कां मथ्यो टेको। 7 यीशुए भूते सेइं ज़ोवं, “हे भूता, एस मैन्हु मरां निस्सी गा!” तैनी भूते ज़ोरे सेइं चिन्डां मेरतां ज़ोवं, “हे यीशु, परमप्रधान परमेशेरा मद्रा, मीं तीं सेइं कुन कम? अव तीं परमेशेरी कसम देताई, मीं दुख न दे।” 9 एल्हेरेलेइ यीशुए तैस पुच्छू, “तेरू कुन नवं आए?” तैनी यीशु सेइं ज़ोवं, “मेरू नवं फौज आए, किजोकि अस बड़े आम।” 10 तैखन तैनी यीशु कां बड़ी मिन्नत की, “इस इलाके मरां असन बेइर न भेज।” 11 तैड़ी पहैड़ी पुड़ सूरं केरो अक बड़ी घान च़ेरी राहोरो थियो। 12 तैल्हेरेलेइ तैन भूतेई यीशु कां मिन्नत की, “महरबानी केरतां असन उन सूरन मां भेजी दे ताके अस उन मां गाम!” 13 तैखन यीशुए तैनन्, सूरन मां गानेरी अज़ाज़त दिती, त तैना भूतां तैस मैन्हु मरां निस्तां सूरन मां जेआं। तैखन सूरं केरो घान, ज़ैस मां लंगभग दूई हज़ार सूर थिये, टिबे पुडेरं बिछड़तां अकदम समुन्दरे मां डुबतां मेरि जे। 14 ज़ैखन सूरं केरे च़ारनेबालेई एन हेरू, त तैना डेरि जे। तैनेई तैइं नेशतां नगरी मां त कने आसेपासरे इलोव्वन मां ए खबर शुनाई। तैल्हेरेलेइ लोक एप्पू हेरनेरे लेइ तैड़ी आए। 15 ज़ैखन नगररे लोक यीशु कां पुज्जे, त तैस मैन्हु, ज़ैस मां पेइले भूतां केरि फौजेरो सायो थियो, हुनी लिगइं लंगोरे त कने होशी मां लेइतां डेरि जे। 16 ज़ैनेई तैना गल्लां पेइले लेवरी थी, तैनेई तैस मैनेरे बारे मां ज़ैस पुड़ भूतेरो सायो थियो त कने तैन सूरं केरे बारे मां पूरो हाल लोकन शुनाव। 17 तैना यीशु कां मिन्नत केरतां ज़ोने लगगे कि, “इश्शे इलाके मरां च़ेलि गा!” 18 ज़ैखन यीशु वापस गानेरे लेइ किशती मां च़ढ़ने लगगे, त तैनी मैने ज़ैस मां पेइले भूतां केरो सायो थियो, यीशु कां मिन्नत की कि, “मीं एप्पू सेइं साथी च़लने दे।” 19 पन यीशुए तै एप्पू सेइं

साथी च़लने न दितो। पन तैनी तैस सेइं ज़ोवं, “अपने घरे जो गा त कने अपने लोकन सेइं ज़ो, कि प्रभु परमेशेरे तीं पुड़ दया केरतां तेरे लेइ केतू बडू कम कियोरूए।” 20 एल्हेरेलेइ तै मैन्हु गेइतां दिकापुलिस इलाके मां लोकन शुनाने लगगे कि यीशुए मेरे लेइ केतू बडू कम कियोरूए। सारे लोक ए गल शुन्तां हैरान भोइ जे। 21 तैल्ला पत्ती, यीशु फिरी किशती मां गलील समुन्दरेरे इस पासे वापस अव, त मैन्हु केरि बड़ी भीड़ तैस कां अकोट्टी भोइ। यीशु समुन्दरेरे बन्ने पुड़ थियो। 22 तैखन याईर नंवेरो मैन्हु तैड़ी अव, ज़ै यहूदी लोकां केरे प्रार्थना घरेरे प्रधान मरां अक थियो। ज़ैखन तैनी यीशु लाव, त तैसेरे पावन पेव। 23 तैनी एन ज़ोइतां यीशुए सेइं बड़ी मिन्नत की, “मेरी निकड़ी कुई मरनेबाली आए। तू मीं सेइं साथी एइतां तैस पुड़ अपनो हथ रख, ताके तै बेज्जोए ते ज़ींती राए।” 24 एल्हेरेलेइ यीशु तैस सेइं साथी तैसेरे घरे जेव। मैन्हु केरि अक बड़ी भीड़ यीशु पत्ती च़ली, इड़ी तगर कि लोक यीशु पुड़ बिछड़ते थिये। 25 तैस भीड़ी मां अक कुआन्श भी थी, ज़ैस 12 सालां केरि खून च़लनेरी बिमारी थी। 26 तैसां बड़े बेइदन केरां बड़ो दुख झल्लो। बिमारी ठीक भोनेरे लेइ तैसां अपने सब पेंडसे खेर्षीं दिते, पन तैस कोई फ़ैदो न भोव। पन तै होरि भी जादे बिमार भोइ जेई। 27 तै यीशुएरे बारे मां शुन्तां अपने दिले मां ज़ोती थी, “अगर अव सिर्फ तैसेरे लिगड़े सेइं हथ लाएली, त अव बेज्जोई गाली।” एल्हेरेलेइ तै मैन्हु केरि भीड़ी मां यीशुएरे पत्रेवरां आई ते तैसेरे लिगड़े सेइं हथ लाव। 29 ज़ैखन तैसां यीशुएरे लिगड़े सेइं हथ लाव, त अकदम तैसेरो खून च़लनेरी बिमारी बेज्जोई। तैसां अपनि जानी मां बुज्जू कि अव तैस बिमारी केरां बेज्जोरी आई। 30 यीशुए अकदम बुज्जू कि मीं मरां शक्ति निस्सोरीए। एल्हेरेलेइ तैनी मैन्हु केरि भीड़ी मां च़ेरे पासन मुइतां लोकन पुच्छू, “मेरे लिगड़े सेइं केनि हथ लाव?” 31 तैसेरे च़ेलेई तैस सेइं ज़ोवं, “तू हेरतस कि मैन्हु केरि भीड़ तीं पुड़ बिछड़ने लगगोरी, फिर भी तू किजो पुछतस कि ‘केनि मीं सेइं हथ लाव?’” 32 पन यीशु तैस हेरनेरे लेइ, ज़ैनी एरू कियोरू थियू, च़ेरे पासन तकने लगगे। 33 तैखन तै कुआन्श डरती ते थर्कती थी, किजोकि तै ज़ानती थी कि तेसां मूसेरो कानून टलोइरोए। तै अगगर आई ते यीशुएरे पावन पुड़ बिछड़तां, तैस सेइं सैरी गल्लां सच-सच ज़ोने लगगी। 34 पन यीशुए तैस सेइं ज़ोवं, “हे कुईए, तेरे विश्वासे, ज़ै तीं मीं पुड़ रखबोरो, तैनी तू बज्जाई। खुशी सेइं घरजो गा, ते हुनी तू एस बिमारी केरां बेची जेई।” 35 ज़ताली यीशु ई गल मसां ज़ोई राओरो थियो, तैखन प्रार्थना घरेरे लीडरेरे घरेरां किछ मैनेई एइतां तैस सेइं ज़ोवं, “तेरी कुई मेरि जोरीए, हुनी गुरु किजो तकलीफ देतस?” 36 पन यीशुए तैन केरि गल न शुन्तां प्रार्थना घरेरे लीडरे सेइं ज़ोवं, “न डर। सिर्फ मीं पुड़ विश्वास रख।” 37 यीशु ते याईर च़लने लगगे, पन यीशुए पतरस, याकूब ते तैसेरो दूला यूहन्नारे अलावा, होरो कोई एप्पू सेइं साथी एजने न दितो। 38 प्रार्थना घरेरे लीडरेरे घरे मां पुज्तां यीशुए हल्लो मज्जोरो लाव ते कने लोक बड़े लेरां देते त शोग केरते लाए। 39 तैखन यीशुए घरे मां गेइतां तैन सेइं ज़ोवं, “तुस किजो रोलो मघातथ त लेरां देतथ? कुई मरी

नई, पन झुल्लोरीए।” 40 जैखन तैन लोकेई एन शुनु, त तैना तैसेरो मजाक बनाने लगगे, किजोकि तैना ज्ञानते थिये कि कुई मेरि जोरीए। तैखन यीशुए सारे मैन्हु तैट्ठां केदतां, सिर्फ कुईअरे हाज-बव त कने अपने टलाई चेलन सेइं साथी कमरेरे अन्तर जेव, जेड़ी कुई पेत्री थी। 41 तैखन यीशुए कुईएरो हथ टलेइतां तैस सेइं अपनी भाषाई मां ज़ोवं, “तलीता कूमी!” जेसेरो मतलब कि, “हे निकड़ी कुईए, अवं तीं सेइं ज़ोतई, खड़ी उठ!” 42 अकदम कुई उठतां च़लने फिरने लगगी, किजोकि तै कुई 12 सालां केरि थी। एन हेरतां तैना बड़े हेरान भोए। 43 पन यीशुए तैन हुक्म देइतां ज़ोवं कि, “ए गल केन्ची सेइं न ज़ोइयथ। एस कुईए किछ खाने जो देथ।”

6 तैल्ला पत्ती, यीशु तैट्ठां निस्तां अपने नगर नासरते जो जेव। तैसेरे चले तैस सेइं साथी च़ले। 2 आरामेरे दिहाड़े, यीशु तैन केरे प्रार्थना घरे मां गेइतां तैन लोकन परमेशेरी गल्लां केरि शिक्षा देने लगगे। तैसेरी शिक्षा शुन्तां बड़े लोक हेरान भोए ते एक्की हारि पुछने लगगे, “एनी मैने एना गल्लां कोट्टां शिख्खी? एस एत्री अक्ल कोट्टां आई? एस एत्रे चमत्कार केरनेरी शक्ति कोट्टां मैल्ली! 3 ए त टलखान आए, ज़ैन मरियमारू मट्टू आए। ए त याकूब, योसेस, यहूदा, ते शमौनेरो ढ़ला आए! एसेरी बेइनां भी इश्शे इड़ी रेइचन!” एल्हेरेलेइ तैनेई यीशुएरो इन्कार कियो। 4 तैखन यीशुए तैन लोकन अक कहावत ज़ोई, “नबी बेइरीए लोकन मां इज़्जतदार भोलो, पन अपने नगरेरे लोकन केरां ते कने अपने रिश्तेदारन केरां त कने अपने घरेबालन मां बेइज़्जत भोलो।” 5 तैन लोकेई यीशु पुड़ विश्वास न केरनेरे वजाई सेइं, तैनी तैस नगरी मां सिर्फ थोड़े ज़ेरे बिमार मैनु पुड़ हथ रेखातां तैना बज़्ज़ाए, तैन केरे अलावा होरो कोई चमत्कार न केरि सको। 6 यीशु नासरत नगरेरे लोकां केरो अविश्वास हेरतां हेरान भोव। तैल्ला पत्ती, तै अपने चेलन सेइं साथी च़ेरे पासन केरे इल्लोवन मां परमेशेरी गल्लां केरि शिक्षा देतो राव। 7 तैल्ला पत्ती, यीशुए अपने 12 चले एप्पू कां कुजेइतां, तैन दूई-दूई केरतां भेजने लगगे। भेजने केरां पेइले, तैनी अपने चेलन, लोकन मरां भूतां केरो सायो कढनेरो अधिकार दित्तो। 8 ते तैनी तैन हुक्म दित्तो, “बतां च़लते-च़लते सोटेरे अलावा होरू किछ न नेइयथ। न रोटी न झोलो त कने बेटवे मां पेंइसे भी न नेइयथ। 9 पन बूट लेइयथ, पन दूई-दूई कुरते न लेइयथ। 10 ज़ैखन तुस केन्ची इल्लोवें मां गाथ, अगर कोई अपने घरे बिश्नेरेलेइ तुसन कुजाए, त तैस्से घरे मां बिश्शथ, ज़ांतगर तैस इल्लोवें मां निससथ। 11 अगर केन्ची इल्लोवेंरे लोक तुसन कबूल न केरन त कने तुश्शी गल्लां न शुननु, त तैट्ठां च़लते-च़लते तुस अपने पावां केरि थूड़ झेड़ी छेइथ ताके तैन केरे खलाफ गवाही भोए। (अवं तुसन सेइं सच ज़ोतई कि परमेशेरे आदालतेरे दिहाड़े बुरे लोकन सज़ा देलो, ज़ैना सदोम त कने अमोरा नगरन मां रहते थिये। पन ज़ैना लोक तुश्शी गल्लां न शुनेले, तैस नगरेरे लोकन परमेशार बड़ी जादे सज़ा देलो)” 12 यीशुएरो हुक्म शुन्नेरे बाद, तैनेई तैट्ठां निस्तां बड़े नगरन मां गेइतां लोकन परमेशेरी गल्लां शुनेई कि, “तुस अपने पापन केरां मनफिराथ।” 13 ते तैनेई बड़े लोकन

मरां भूतां केरो सायो भी कट्टो, त कने बड़े बिमार मैनु पुड़ तेल लेइतां बज़्ज़ाए। 14 हेरोदेस राजे भी यीशुएरे बारे मां शुनु, किजोकि यीशुएरू नवं मुशरू भोरू थियूं। तैनी यीशुएरे बारे मां ज़ोवं कि, “शायद, यूहन्ना, ज़ै बपतिस्मो देनेबालो थियो, मुड़दन मरां ज़ीतो भोरोए। एल्हेरेलेइ, तै एना चमत्कार केरि सकोते।” 15 होरेई मैनेई यीशुएरे बारे मां ज़ोवं कि, “शायद, तै मैन्हु एलिय्याह नबी आए!” पन किछ होरेई मैनेई ज़ोवं कि, “तै त पराने ज़मानेरे परमेशेरी गल्लां ज़ोनेबालां केरो ज़ेरो अक नबी आए!” 16 पन हेरोदेस राजे लोकां केरि गल्लां शुन्तां ज़ोवं कि, “तै मैन्हु त यूहन्ना आए, जेसेरी क्रोड़ी मीं कट्टेत्री थी। तै मुड़दन मरां ज़ीतो भोरो आए!” 17 हेरोदेस राजे एन्चरां सोचू, किजोकि थोड़े दिहाड़ना पेइले, तैनी एप्पू अपने सिपाही भेजतां यूहन्ना कैद केरतां छुट्टोरो थियो। तैनी अपने ढ़ला फिलिप्पुसेरी लाड़ी हेरोदियासेरी वजाई सेइं एन्चरां कियोरू थियूं, जैस सेइं तैनी इला बनोरो थियो। 18 एल्हेरेलेइ, यूहन्ना हेरोदेस राजे सेइं बार-बार ज़ोतो थियो कि, “तीं अपने ढ़लाएरी लाड़ी सेइं इला बनानो जेइज़ नई।” 19 तैल्हेरेलेइ हेरोदियास रानी यूहन्ना सेइं दुश्मनी रखती थी ते तैस कल्ल केरनो चाती थी। पन तै तेन्चरां न केरि सकती थी, 20 किजोकि हेरोदेस राजे पतो थियो कि यूहन्ना अक धर्मी ते पवित्र मैन्हु थियो। तैल्हेरेलेइ, हेरोदेस राजो तैसेरी बड़ी इज़्जत केरतो थियो त कैदखाने मां हेरोदियास रेनी केरां बचेइतां रखतो थियो। त तै यूहन्नारी गल्लां शुन्तां बड़ो डरतो थियो, पन तैसेरी गल्लां खुशी सेइं शुन्तो भी थियो। 21 आखकार यूहन्ना मारनेरो ठीक मौको मैल्लो। हेरोदेस राजे अपने ज़रमेरी दिहाड़ी मां अक धाम रख्खी। तैस धामी मां तैनी अपने बड़े खास अफसरन, त कने फौजी अफसरन, त कने गलील इलाकेरे बड़े-बड़े मैन्हु कुजाए। 22 तैखन हेरोदियास रेनेरी कुई तैस कमरे मां आई, जेड़ी तैना बिश्शोरे थिये। त तैसां तैड़ी नेच़तां हेरोदेस राजो त कने तैसेरे मेहमान खुश कियो। तैखन राजे कुईए सेइं ज़ोवं, “ज़ैन तू चास मीं केरां मग, अवं तीं देलो।” 23 त राजे तैस कुईए सेइं कसम भी खाइ कि, “ज़ैन किछ तू मीं केरां मग्गेली, अवं तीं देलो, इड़ी तगर कि अवं अपनु अथ्थू राजे भी देलो।” 24 तैल्हेरेलेइ तैस कुइयां बेइर गेइतां, अपनि अम्मा पुच्छू, “अवं हेरोदेस राजे केरां कुन मेग्गी?” तैखन तैसेरी अम्मा ज़ोवं, “यूहन्ना बपतिस्मो देनेबालेरी क्रोड़ी मग।” 25 अकदम तै कुई अन्तर राजे कां आई त तैस कां मिन्नत की, “अवं चाताई कि, तू यूहन्ना बपतिस्मो देनेबालेरी क्रोड़ी केरतां एक्की थाले मां हुन्ना आन।” 26 तैसेरी गल शुन्तां राजो बड़ो दुखी भोव, पन अपनि कसमेरे वजाई सेइं त कने अपने मेहमानां केरे वजाई सेइं तैने इन्कार केरनो न चाव। 27 तैल्हेरेलेइ, तैनी अकदम एक्की सिपाही हुक्म दित्तो कि, “यूहन्नारी क्रोड़ी केरतां आन।” 28 सिपाही कैदखाने मां गेइतां यूहन्नारी क्रोड़ी कट्टाई, त एक्की थाले मां रेखातां आनी त कुईए कां दित्ती। त कुइयां गेइतां अपनि अम्मा कां दित्ती। 29 ए गल शुन्तां यूहन्नारे चले तैड़ी आए, त तैसेरी लाश नेइतां कब्री मां देब्वी छुट्टी। 30 परमेशेरी गल्लां लोकन शुनानेरे पत्ती, यीशुएरे प्रेरित तैस कां वापस आए, ज़ैना तैनी भेजोरे

थिये। जैन किछ तैनेई लोकन सेइं कियोरु ते शिक्षा दित्तोरी थी, तैन सारी गल्लां यीशु सेइं शुनाई। 31 बड़े लोक यीशु त कने तैसेरे चलन कां एइते गाते थियो। एस वजाई सेइं, तैनन् रोटी खानेरे लेइ भी मौको न थियो मैल्लोरो। तैल्हरेलेइ यीशुए अपने चलन सेइं ज़ोवं, “मीं सेइं साथी केन्ची अकेन्ती ठैरी एज्जा, त थोड़ो ज़ेरो आराम केरा।” 32 एल्हरेलेइ तैना किशती मां च़ेदतां, अकेन्ती ठैरी च़ेले जे। 33 पन बड़े लोकेई यीशु त तैसेरे च़ेले गाते लेइतां पिशानी छुड़े कि तैना कोरां च़लोरैन। तैल्हरेलेइ, सारे नगरेरे मैन्हु प़ेदल दोइतां तैन केरां प़ेइले तैड़ी पुज्तां अकोट्टे भोए। 34 ज़ैखन यीशु किशती पुइरां ओस्सो, त तैनी मैन्हु केरि अक बड़ी भीड़ लेइतां तैन पुइ तरस खाव, किजोकि तैना मैन्हु तैन भेइं करे ज़ेरे थिये, ज़ैन केरो कोई पुहाल न भोए। तैखन यीशु तैन लोकन परमेशरेरे राज़्जेरे बारे मां बड़ि गल्लां केरि शिक्षा देने लगे। 35 ज़ैखन दिहाड़ी डुबने लगोरी थी, त यीशुएरे च़ेलेई तैस कां एइतां ज़ोवं, “ई सुनसान ठार आए, ते च़िर भी बड्डू भोरु आए। 36 एन मैन्हु भेज, ताके एना च़ेरे पासां केरे बेस्तन त कने इलोव्वन मां गेइतां अपने लेइ खाने जो रोटी घिन्ना।” 37 पन यीशुए तैनन् जुवाब दित्तो कि, “तुस्से एन खाने जो रोटी देथा।” पन तैनेई तैस सेइं ज़ोवं, “कुन अस दूई शौव दिहाड़ी केरि कमाई सेइं रोटी घिन्तां एन मैन्हु खुवाम? एन न भोइ सके।” 38 एल्हरेलेइ, यीशुए तैन सेइं ज़ोवं, “तुसन कां केत्री रोटी आन? गेइतां हेरा।” पतो केरनेरे पत्ती, तैनेई यीशु सेइं ज़ोवं कि, “पंच रोटी त कने दूई मेछली आन।” 39 तैखन यीशुए अपने चलन हुक्म दित्तो कि, “सारे मैन्हु नीले घासे पुइ बिशाला।” 40 एल्हरेलेइ तैना मैन्हु शौव-शौव त कने पज़ां-पज़ां केरि हुन्डी मां बिशशी जे। 41 तैखन यीशुए अपने हथ्थे मां पंच रोटी ते दूई मेछली टलेइ, त अम्बरेरे पासे तेकतां शुक्र कियुं। तैल्ला पत्ती, यीशु तैना रोटी टलोइतां चलन कां देते जेव कि लोकन खाने जो देन। तेन्चरां दूई मेछली भी तैन सारे लोकन बंटी दित्ती। 42 ते सारे मैन्हु खेइतां रेज़्जी जे। 43 तैल्ला पत्ती, यीशुएरे च़ेलेई बेच्चोरी रोटी त कने मेछली केरे टुकडन सेइं 12 टोकरी भेरि। 44 ज़ैनेई रोटी त मेछली खेइ, तैन मां 5000 मडद थिये। 45 तैल्ला पत्ती, यीशुए अपने चलन हुक्म दित्तो कि, “तुस किशती मां च़ेदतां मीं केरां प़ेइले समुन्दरेरे उस पार बैतसैदा नगरे जो च़ली गाथ, ज़ांतगर अवं एन लोकन न भेज्जी।” त तैना तैट्ठां जे। 46 लोकन भेजनेरे पत्ती, यीशु तैट्ठां निस्तां नेइ एक्की पहैड़ी पुइ प्रार्थना केरनेरे लेइ जेव। 47 ज़ैखन इलोइ भोइ, त तै किशती, ज़ैस मां यीशुएरे च़ेले थिये, समुन्दरेरे मड्गाटे थी, त यीशु अकेल्लो ज़मीनी पुइ थियो। 48 तैनी हेरु कि तैसेरे च़ेले किशती मां च़ेपू देइ-देइ परेशान भोने लगोरेन, किजोकि एग्रोवरां बड़ी तेज हवा च़लोरी थी। लगभग ज़ेइरे च़ेरे बजेई ज़ैखन हेजू आंधरु थियुं, यीशु समुन्दरेरे पैनी पुइ च़ेलतां अपने चलन कां अव। तै तैन केरां अग्रोवं निसू चातो थियो। 49 पन ज़ैखन तैनेई यीशु समुन्दरेरे पैनी पुइ च़लतो लाव, त तैनेई सोचो कि तै भूत आए। तैल्हरेलेइ, तैनेई चिन्डां मैरी, 50 किजोकि तैना सारे तैस हेरतां बड़े डेरि जोरे थियो। पन तैनी अकदम तैन सेइं गल्लां की ते ज़ोवं, “हिम्मत रखा! अवं आई। डरा

न!” 51 तैखन तै तैन केरि किशती मां च़दो, ते तूफान च़लनो बन्ध भोइ जेव। तैखन च़ेले बड़े हैरान भोए, 52 किजोकि तैनेई न थियुं समझोरु कि यीशु केन्चरां रोटी त कने मेछली बधोरी थी, पन तैन केरे मन बेसमझ भोरे थियो। 53 तैल्ला पत्ती, यीशु त तैसेरे च़ेले गलील समुन्दर पार केरतां गन्नेसरत नंवेरे जगाई पुइ पुज्जे। तैड़ी तैनेई किनारे पुइ किशती बंधतां रख्की। 54 ज़ैखन तैना किशती पुइरां ओस्से, त तैट्टेरे लोकेई यीशु पिशैनी छुड़ो। 55 एल्हरेलेइ, तैनेई सारे इलाके मां गेइतां लोकन खबर शुनाई कि यीशु ओरोए। ज़ेड़ी-जेड़ी लोकेई शुनु कि यीशु ओरोए, तैड़ी लोकेई बिमार मैन्हु खट्टी पुइ छुइतां यीशु कां आन्ने लगे, ताके तै तैनन् बज़्जाए। 56 ज़ेड़ी कोन्ची इलोव्वन मां, नगरन या बेस्तन मां यीशु गातो थियो, तैड़ी लोक बिमार मैन्हु बज़ारन मां यीशु कां एन्तां रखते थियो। तैना यीशु सेइं मिन्त केरते थिये कि, तैन सिर्फ तैसेरे लिगड़े सेइं हुरने देन। ज़ेरे बिमार मैन्हु यीशु सेइं हथ लाते थिये, तैना सारे बेज्जोते थियो।

7 एक्की दिहाड़े किछ फरीसी लोक त कने शास्त्री लोकन मरां किछ लोक, ज़ैना यरुशलम नगरेरां ओरे थिये यीशुए कां अकोट्टे भोए। 2 ते तैनेई हेरु कि यीशुएरे किछ च़ेले रीति रुवाजरे खलाफ अधोए हथ्थन सेइं रोटी खेइ राओरेन। 3 किजोकि फरीसी लोक त कने सारे यहूदी लोक, ज़ांतगर हथ न धोन तांतगर रोटी न खाते थिये। अपने बुजुर्गां केरि परमपरा च़लानेरे लेइ तैना एन्चरां केरते थियो। 4 ज़ैखन तैना बज़ारेरां घरे एइते थिये, ज़ांतगर तैना निहान न देन तांतगर रोटी न थिये खाते। होरे भी बड़े रीति रुवाज थिये, ज़ैना तैन केरे बुजुर्गन केरां ओरे थिये, ज़ेन्चरां कटोरे, घड़े, ट्लामेरां भांडां रुवाजरे मुताबिक धोना। 5 एल्हरेलेइ फरीसी लोकेई त कने शास्त्री लोकेई यीशु पुच्छू, “तेरे च़ेले इश्शे बुजुर्गां केरि परमपरा पुइ की न च़लन? पन तैना रुवाजरे खलाफ अधोए हथ्थन सेइं रोटी खातन!” 6 तैखन यीशुए तैन सेइं ज़ोवं, “बड़े प़ेइले यशायाह नेबे तुश्शे ज़ेरे पाखंडी केरे बारे मां ठीक भविष्यवाणी कियोरीए कि परमेशरे ज़ोवं, ‘एना लोक ऐशी सेइं त मेरी बड़ी तारीफ़ केरतन, पन एन केरे दिल मीं केरां बड़े दूर आन। 7 एना बेफाइदी मेरी आराधना (पूजा) केरतन, किजोकि एना त मैन्हु केरि बनोरी परमपरान, परमेशरेरे हुक्मां केरे ज़ेरे लोकन शिक्षा देतन।’” 8 तैखन यीशुए तैन सेइं ज़ोवं, “तुस भी तैन लोकां केरे ज़ेरे आथ, ज़ैना परमेशरेरे हुक्मन टेलतां मैन्हु केरि बनोरी परमपरान मन्तन, ज़ेन्चरां घड़े त कने कटोरे रुवाजरे मुताबिक धोने, त कने एसरेरे ज़ेरे होरे भी बड़े रुवाज न मन्तथ।” 9 फिरी तैनी तैन सेइं ज़ोवं, “तुस केरु गलत केरतथ, कि अपने रीति-रुवाज मन्नेरे लेइ परमेशरेरे हुक्म टलोइतथ। 10 किजोकि मूसा नेबे ज़ोरुए कि, परमेशरे सारी मैन्हु ई हुक्म दित्तो कि, ‘तू अपने हाज बव्वेरी केरि इज्जत केर। त ज़ै कोई अपने हाज बव्वे जो बुरु ज़ोलो, तै ज़रु मारो गालो।’ 11 पन तुस ज़ोतथ कि अगर कोई मैन्हु अपने हाज बव्वे सेइं सिर्फ एन जोए, त तैन बड्डू आए कि, ‘मीं करां ज़ै किछ मद्दत तुसन मैल्ली सकती थी, तै प़ेइली बलिदान भोरीए, यानी परमेशरे जो च़दतल च़ाढ़ोरीए। एल्हरेलेइ, अवं तुसन किछ न देइ सकी।’ 12 एरी शिक्षा देइतां तुस

लोकन तैन केरे हाज बव्वां केरि किछ मद्दत केरने न देथ। 13 एन्चरां तुस अपनि परमपरा च़लानेरे लेइ, परमेशेरी गल्लां टेली छड़तथ। एरी ज़ेरि तुस होरि भी बेड़ि गलत परमपरा मन्ते ओरेथा। 14 तैखन यीशुए फिरी सारे लोक एप्पू कां कुजेइतां तैन सेइं ज़ोवं, “तुस सारे लोक, मेरी गल ध्याने सेइं शुना ते समझा। 15 एरी कोई चीज़ नईं ज़ै बेइरेरां मैनेरे अन्तर गेइतां तैस जुट्टो केरे। पन ज़ैना बुरी चीज़ां मैनेरे अन्त्रां, यानी तैसेरे दिले मरां बेइर निस्चन, तैनां तैस जुट्टो केरचन। 16 अगर कोई समझानो चाते, त तै ध्याने सेइं शुने।” 17 बादे मां, यीशु मैन्हु केरि भीड़ी मरां घरे जो जेव। तैखन तैसेरे चेलेईं तैस मिसालारे मतलबेरे बारे मां तैस पुच्छू। 18 तैनी तैन सेइं ज़ोवं, “होरि मैन्हु केरे ज़ेरे कुन तुस भी न समझथ? कुन तुस न समझथ कि ज़ै चीज़ बेइरां मैनेरे अन्तर गाचे, तै तैस जुट्टो न केरि सके? 19 किजोकि तै तैसेरे दिले मां नईं, पन तैसेरे पेटे मां गाचे ते बादे मां पेटे मरां निस्सी गाचे।” एन जोइतां यीशुए समझावं कि खानेरी चीज़ कोई भी असन जुट्टो न केरे। 20 तैखन तैनी अपने चेलन सेइं ज़ोवं, “ज़ैन मैनेरे अन्त्रेरां निस्ते, तैन्ने परमेशेरी नज़री मां मैन्हु जुट्टो केरते, 21 किजोकि मैनेरे अन्त्रेरां, यानी मैनेरे दिले मरां बुरे खियाल, बदमाशी, चोरी, कत्ल केरनो, 22 अड़लाए देइने गलत कम केरनू, लालच, दुष्ट कम केरनू, बेइमानी, बदचलन, जलन, तुहीन, घमण्ड, ते बेवकूफी एचचन। 23 एना सैरी बुरी गल्लां मैनेरे अन्त्रेरां, यानी दिले मरां निस्तां मैन्हु जुट्टो केरचन।” 24 तैल्ला पत्ती, यीशु तैट्टां निस्तां सूर त सैदा नगरेरे आसेपासेरे इलाकेरे नेइे अव। ते तैड़ी तै एक्की घरे मां जेव। ते तै चातो थियो कि कोई न ज़ैनी सके कि अवं इड़ी आईं। पन तै छेप्पी न सको। 25 तैड़ी अक कुआन्श थी, ज़ेसेरी निकड़ी कुईए पुइ भूतेरो सायो थियो। तै यीशुएरे बारे मां शून्तां अकदम तैड़ी आईं ते तैसेरे पावन पुइ पेईं। 26 त तै कुआन्श गैर कौमरी थी ते सुरूफिनिकी इलाकेरी थी। तैसां यीशु सेइं मिन्नत की कि, “मेरी कुईए पुइरां भूतेरो सायो केइी देथ।” 27 पन यीशुए तैस सेइं ज़ोवं, “पेइले बचचन रज़ने दे, किजोकि बच्चां केरि रोटी नेइतां कुतरन जो देनी ठीक नईं।” 28 तैसां जुवाब दित्तो, “सच्चे, प्रभु! पन कुतरां भी मेजे हेठोरां बच्चां केरि रोट्टन मरां बिछडोरे टुकड़े खातन।” 29 तैखन यीशुए तैस सेइं ज़ोवं, “मीं पुइ तीं एत्रो विश्वास रखबोरोए, एल्हेरेलेइ तू आरामे सेइं घरे जो गा। तेरी कुईए मरां भूतेरो सायो निस्सी जोरोए।” 30 तैसां कुआन्शां तैट्टां अपने घरे वापस एइतां हेरू कि कुई खट्टी पुइ आरामे सेइं झुल्लोरी थी, त भूतेरो सायो तैस मरां निस्सी जोरो थियो। 31 यीशु फिरी अपने चेलन सेइं साथी सूर त सैदारे नगरेरे इलाकन मरां निस्तां, दिकापुलिस इलाके मांमेइं भोइतां गलील समुन्दरेरे नेइे पुज्जो। 32 तैड़ी किछ लोकेईं अक टोव्को मैन्हु, ज़ै खेखबो भी थियो, यीशु कां एन्तां तैस सेइं मिन्नत की कि, “तू अपनो हथ एस पुइ रख कि ए मैन्हु बेइज्जोए।” 33 यीशुए मैन्हु केरि भीड़ी मरां तै मैन्हु अलग नीयो। तैखन तैनी अपनि एंगलोईं तैस मैनेरे कन्नां मां छेइी, त अपनि एंगलोईं सेइं थुक तैस मैनेरी जिभ्भी सेइं लावं। 34 तैल्ला पत्ती, यीशु अम्बरेरे पासे तेकतां ओशा छुट्टो, त तैस मैन्हु सेइं अपनि (इब्रानी)

भाषाई मां ज़ोवं, “इप्फत्तह!” ज़ेसेरो मतलब “खुल्ली गा!” 35 अकदम तै रोइज़ारे शुन्ने लगे ते तैसेरी जिभ्भी भी ठीक भोइ जेईं, ते तै साफ-साफ गल्लां केरने लगे। 36 तैखन यीशुए तैन मैन्न हुक्म दित्तो कि, “ए गल केन्ची सेइं न ज़ोइयथ।” पन ज़ेत्रू जादे यीशुए तैन हुक्म दित्तोरो थियो, तेत्रू जादे तैना होरि लोकन ए गल शुनाने लगगे। 37 यीशुएरे चमत्कारेरां कम्मां केरे वजाई सेइं, तैना बडे हेरान भोइतां ज़ोने लगगे, “कमाल आए! यीशुए ज़ैन किछ भी कियूं सब किछ रोडू कियोरूए! तै टोव्नन शुन्नेरी ते लट्टन गल्लां केरनेरी शक्ति देते।”

8 तैन दिहाइन मां एरू भोव कि, मैन्हु केरि बड़ी भीड़ यीशु कां फिरी अकोट्टी भोइ। तैन कां किछ खाने जो न थियूं। तैखन यीशुए अपने चले एप्पू कां कुजेइतां तैन सेइं ज़ोवं, 2 “मीं एन मैन्हु केरि भीड़ी पुइ तरस एइते, किजोकि एना टलेइ दिहाइं केरे देते मीं सेइं साथी आन, ते एन कां खाने जो किछ नईं राओरू। 3 अगर अवं एन ढलुखबोरे घरे जो भेज्जी, त चलते-चलते बत्ती मां थेकतां रेइ गानेन, किजोकि एन मरां कोई-कोई दूरेरां भी आन।” 4 तैसेरे चेलेईं तैस जुवाब दित्तो, “इड़ी सुनसान ठैरी एन मैन्न जो एत्री रोटी कोट्टां आनम कि एन मैन्हु रेज्जतां खान?” 5 तैखन यीशुए तैन पुच्छू, “तुसन कां केत्री रोटी आन?” तैनेईं जुवाब दित्तो, “सत रोटी आन।” 6 तैखन यीशुए मैन्हु केरि भीड़रे पासे मुइतां तैन जो हुक्म दित्तो कि, “ज़मीनी पुइ बिशशी गाथ।” तैखन तैनी तैन सत रोटी टलेइतां परमेशेरेरू शुक्र केरतां टलोड़ी, ते अपने चेलन कां देते जेव कि तैना लोकन खाने जो देन। ते चेलेईं मैन्न रोटी दित्ती। 7 तैन कां थोड़ी ज़ेरि निक्की मेछली भी थी। यीशुए मेछली केरे लेइ भी परमेशेरेरू शुक्र केरतां अपने चेलन सेइं ज़ोवं, “इना भी लोकन खाने जो देथ।” तेन्चरां तैसेरे चेलेईं कियूं। 8 तैना सारे मैन्हु रोटी खेइतां रेज्जो जे। तैल्ला पत्ती, यीशुएरे चेलेईं मेछली त कने रोटी केरे बच्चेरे टुकड़न मरां सत टोकरे भेरतां सल्ले। 9 तैड़ी लगभग 4000 मड्ड थिये। लोकन रोटी खुवानेरे पत्ती यीशुए मैन्हु भेज्जी दित्ते। 10 तैखन तै अकदम अपने चेलन सेइं साथी किशती मां च़ेइतां दलमनूता इलाके जो च़लो जेव। 11 फिरी किछ फरीसी लोक यीशु कां एइतां तैस सेइं बेंस केरने लगगे। तैना तैस अज़मानेरे लेइ तैस पुछने लगगे, “असन अम्बरेरां कोई निशान हिरा।” 12 ज़ैखन यीशुए एन शूनू त तैनी अक बड्डो ओशा छेइतां ज़ोवं, “इस ज़मानेरे लोक मीं केरां किजो निशान मगतन! अवं तुसन सेइं सच ज़ोतईं कि इस ज़मानेरे लोकन, यानी तुसन अवं कोई भी निशान न हिरैईं।” 13 तैल्ला पत्ती, यीशु तैन लोकन छेइतां, फिरी किशती मां च़ड्डो ते गलील समुन्दरेरे पार च़लो जेव। 14 ज़ैखन यीशुएरे चले किशती मां च़डे, त तैना एप्पू सेइं साथी रोटी नेनी बिसरी जे। किशती मां तैन कां अक्के रोटी थी। 15 ज़ैखन तैना समुन्दरे पार केरि राओरे थिये, त यीशुए तैन समझावं कि, “खबरदार! फरीसी लोकां केरे खमीरेरे बारे मां ते कने हेरोदेस राज़ेरे खमीरेरे बारे मां होशियार रेइयथ।” 16 चले यीशुएरी गल गलत सेमझतां एप्पू मांमेइं गलबात केरने लगगे कि, “असन कां त रोटी नईं, एल्हेरेलेइ यीशुए एन्चरां ज़ोवं।” 17 तैखन यीशुए तैन केरि गल

जेनतां, तैन सेइं ज़ोवं, “तुस एप्पू मांमेइं एन्चरां किजो सोची राओरेथ कि असन कां रोटी नई? कुन तुस हेजू भी मेरी गल न समझी ते कने न बुझी? कुन तुशे मन बेसमझ भोइ जोरेन? 18 कुन तुसन एछछी भोइतां भी न लेइहोए? ते कन भोइतां भी न शुनोए? कुन तुसन याद नई? 19 ज़ताली 5000 मैन्हु केरे लेइ पंच रोटी टलोइतां दित्तोरी थी, त तुसेईं बादे मां बच्चोरी रोटी केरे केरे टोकरे भरतां सल्लोरे थिये?” तैनेईं तैस जुवाब दित्तो, “बारहे टोकरे।” 20 तैखन तैनी तैन पुच्छू, “ज़ताली मीं 4000 मैन्हु केरे लेइ सत रोटी टलोइतां दित्तोरी थी, त तुसेईं रोटी केरे केरे टोकरे भरतां सल्लोरे थिये?” तैनेईं तैस जुवाब दित्तो, “सत टोकरे।” 21 तैखन तैनी तैन पुच्छू, “कुन तुसन हेजू भी समझ न आई?” 22 तैल्ला पत्ती, यीशु त तैसेरे चले बैतसैदा नगरे मां आए। लोकेईं अक कानो मैन्हु यीशु कां आनो ते तैस कां मिन्नत की कि, “एस मैन्हु सेइं हथ लाथ ताके ए बेज्झोए।” 23 तैखन यीशुए तैस काने मैनेरो हथ टलेइतां इल्लोवें केरां बेइर नीयो। तैखन तैनी तैस काने मैनेरी एछछन पुइ थुकतां, तैस पुइ हथ रखे, ते तैस पुच्छू, “कुन तू किछ लातस?” 24 तैखन तैनी मैने उबरे तेकतां ज़ोवं, “हाँ, अवं मैन्न हेरी सकतई, तैना मीं च़लते बुट्टां केरे ज़ेरे लेइहोतन।” 25 तैखन यीशुए दुइयोवं हटे तैसेरी एछछन पुइ हथ रखे। ते कानो ध्याने सेइं लाने लगो। तैसेरी एछछी ठीक भोइ जेई, त तै सब किछ साफ-साफ हेरने लगो। 26 तैल्ला पत्ती, यीशुए तै मैन्हु एन ज़ोइतां घरे जो भेजो, “तू इस इल्लोवें मां पाव भी न रेखां (ते कने ई गल केन्ची सेइं न ज़ोइयां।)” 27 तैल्ला पत्ती, यीशु ते तैसेरे चले बैतसैदा नगरे मरां निस्तां कैसरिया-फिलिप्पी न्चवरे नगरेरे इल्लोव्वन मां च़ेलि जे। बत्तां च़लते-च़लते यीशुए अपने चेलन पुच्छू, “ज़ैखन लोक मेरे बारे मां गल्लां केरतन, त तैना मेरे बारे मां कुन ज़ोतन कि अवं कौन आई?” 28 तैसेरे चलेईं जुवाब दित्तो, “किछ ज़ोतन कि तू यूहन्ना आस, ज़ै बपतिस्मो देनेबालो थियो, पन किछ हारे मैन्हु ज़ोतन कि तू एलिय्याह आस, ज़ै नबी थियो, पन किछ हारे मैन्हु एन भी ज़ोतन कि तू परमेशेरी गल्लां ज़ोनेबालन मरां अक मैन्हु आस।” 29 तैखन यीशुए अपने चेलन पुच्छू, “पन तुस मेरे बारे मां कुन सोचतथ कि अवं कौन आई?” पतरसे जुवाब दित्तो, “तू मसीह आस।” 30 त यीशुए तैनू समझावं कि, “मेरे बारे मां ई गल केन्ची सेइं न ज़ोइयथ।” 31 तैखन यीशु अपने चेलन शिक्षा देनो लगो कि, “मैनेरे मट्टेरे लेइ, यानी मेरे लेइ एन ज़रूरी आए कि मीं बड़े दुख झल्लनेन। यहूदी लोकां केरे बुजुर्गन, प्रधान याजकन, त कने शास्त्री लोकन केरां अवं निकम्मो समझो गानोईं त मारो गानोईं। पन टलेइ दिहाइना पत्ती अवं फिरी ज़ीतो भोनोईं।” 32 यीशुए एना गल्लां तैन सेइं साफ-साफ ज़ोईं। तैखन पतरस तैस अलग नेइतां डांटेने लगो, “मसीह न मरो।” 33 पन यीशुए मुइतां अपने बाकी चेलतां केरे पासे तक्कू, ते पतरसे सेइं झिड़केइतां ज़ोवं, “हे शैतान, मीं केरां दूर भो! (मतलब एन्चरां न सोच। शैतान तीं केरां एन्चरां जुवाते) मीं केरां दूर भोइ गा। तू परमेशेरी गल्लन पुइ नई, पन मैन्हु केरि गल्लन पुइ मन लातस।” 34 तैखन यीशुए अपने चले त कने मैन्हु केरि भीइ एप्पू कां

कुजेइतां सेभन सेइं ज़ोवं, “तुस अगर मेरे चेलो बन्नु चातथ, त तुस अपने आपरो इन्कार केरा त कने तुस अपनू क्रूस छुइतां मीं पत्ती च़ला। 35 किजोकि ज़ै कोई अपनि जिन्दगी बचानी चाते, त तै हमेशारी जिन्दगी गुवालो। पन ज़ै कोई मेरे वजाई सेइं त कने मेरे बारे मां खुशखबरी होरि लोकन शुनानेरी वजाई सेइं अपनि जिन्दगी गुवाते, यानी बलिदान केरते, त तै तैस बचालो, यानी हमेशारी जिन्दगी हासिल केरेलो। 36 मैन्हु अगर सारी दुनियाई हासिल केरे त अपनि हमेशारी जिन्दगी गुवाए, त तैस फिरी कुन फैइदो भोलो? 37 मैन्हु अगर अपनि हमेशारी जिन्दगी गुवालो, त गुवानेरे पत्ती तै कुन देइतां तैस वापस घिन्नी सकते? 38 अज़्जेरे ज़मानेरे लोक परमेशेरे केरां दूरन त कने पापी आन। एस ज़माने मां, अगर कोई मैन्हु मीं केरां त कने मेरी गल्लन केरां शरमाते, त मैनेरू मट्टू भी, यानी अवं भी तैस केरां शरमालो। ज़ेइस अवं अपने बाजी केरि महिमा सेइं साथी त कने पवित्र स्वर्गदूतन सेइं साथी वापस एज्जलो, त तेइस अवं तैस केरां भी शरमालो।”

9 तैखन यीशुए तैन सेइं ज़ोवं, “अवं तुसन सेइं सच ज़ोतई कि ज़ैना इड़ी खडे आन, तैन मरां किछ मैन्हु एरे आन कि ज़ांतगर तैना परमेशेरे राज़ेरी शक्ति न हेरेले, तांतगर तैना न मरेलो।” 2 शेइ दिहाइना बाद, यीशु अपने चले पतरस, याकूब त कने यूहन्ना सेइं साथी एक्की पहाड़े पुइ च़ढो, ज़ेड़ी कोई भी न थियो। तैड़ी तैन केरे सामने यीशुएरी शकल बदलोई जेई। 3 तैसेरां लिगडां हियूवेरां ज़ेरां बडां चमकने लग्गां कि एत्रे छित्तां भुआं कि थेरती पुइ कोई भी लिगडां धोनेबालो एरां ज़ेरां छित्तां न केरि सके। 4 तैखन तैड़ी मूसा नबी त कने एलिय्याह भी यीशु सेइं साथी लेइहोए। ते तैना यीशु सेइं गल्लां केरने लगो। 5 ज़ैखन पतरसे एन हेरू, त तैनी यीशु सेइं ज़ोवं, “हे गुरू, इशूशू इड़ी रानू रोडू आए। एल्हेरेलेइ, अस ट्लाई डेरे बनाम, अक तेरे लेइ, अक मूसेरे लेइ, त कने अक एलिय्याहरे लेइ।” 6 पतरसे एन्चरां एल्हेरेलेइ ज़ोवं किजोकि तैस पतो न थियो कि कुन ज़ोई, किजोकि तै त कने हारे दूई चले भी बड़े डेरि जोरे थिये। 7 तैखन तैड़ी तैन पुइ बिदलार आई ते तैस बिदलारी मरां परमेशेरी आवाज़ आई, “एन मेरू टलारू मट्टू आए। ध्याने सेइं एसेरी गल शुना।” 8 अकदम, ज़ैखन यीशुएरे चलेईं च़ेरे पासन तक्कू, त यीशुएरे अलावा तैड़ी तैन कोई भी न लेइहोव। 9 पहाड़े पुइरां ओस्ते-ओस्ते यीशुए अपने चेलन हुक्म दित्तो कि, “ज़ांतगर मैनेरू मट्टू, यानी अवं, मेरतां ज़ीतो न भोई, तांतगर ज़ैन किछ तुसेईं पहाड़े पुइ लावरूप, तैन केन्ची सेइं न ज़ोइयथ।” 10 तैनेईं तैन केन्ची सेइं न ज़ोवं, ते तैना एप्पू मांमेइं गलबात केरने लगो कि, “मेरतां ज़ीतो भोनेरो कुन मतलब भोइ सकते।” 11 तैखन तैनेईं यीशुए पुच्छू, “शास्त्री लोक किजो ज़ोतन कि मसीहरे एजनेरां पेइले एलिय्याह नेबेरू दुनियाई मां एजनु ज़रूरी आए?” 12 यीशुए तैन जुवाब दित्तो, “ते तै सच्चि गल आए कि मसीहरे एजने केरां पेइले एलिय्याह एजतां सैरी गल्लां ठीक केरनिन। पन परमेशेरी किताबी मां मैनेरे मट्टेरे बारे मां, यानी मेरे बारे मां एन किजो लिखोरूप कि, “मीं बड़े दुख झल्लनेन त लोक मीं निकम्मो समझलेते?”

13 पन अवं तुसन सेइं ज़ोतई कि 'एलिय्याह' त पेइले ओरोए, (यूहन्ना, एलिय्याहरे जगाई अब) त ज़ेन्चरां तैसेरे बारे मां परमेशेरी किताबी मां लिखोरु थियूं. तेन्चरां तैनेई तैस सेइं कियूं. यानी ज़ेन्चरां तैना चाते थिये, तेन्चरां तैनेई तैस सेइं बुरु कियूं। 14 तैल्ला पत्ती, यीशु त तैसेरे ट्लाई चले पहाड़े पुडेरं ओस्तां, होरि चेलन कां पुज्जे, ज़ैना बुन थिये। तैडी एजतां यीशुए तैन चेलन केरे चेत्रे पासन मैन्हु केरि बडी भीड लाई। शास्त्री तैन चेलन सेइं बेंस केरि राओरे थिये। 15 यीशु लेइतां सारे लोक बड़े हेरान भोए। तैना तैसेरे पासे दौइतां आए ते तैस जो नमस्कार कियूं। 16 तैखन यीशुए तैन पुच्छू, "मेरे चेलन सेइं कुन बेंस केरि राओरेथ?" 17 मैन्हु केरि भीडी मरां एक्की मैने यीशु जुवाब दित्तो, "हे उस्ताद, मीं अपनू मट्टू तीं कां आनेरु थियूं, ताके तैन ठीक भोए। किजोकि तैस पुड भूतेरो सायो आए, ते तैस गल केरने न दे। 18 कोन्ची भी ठैरी तैन भूत मेरे मट्टे ट्लाते, ते ज़मीनी पुड बिछोइते। तैखन तैसेरे ऐशी मरां शैम्फ एच्चे ते तैन दंत कटते ते ठठमुकर भोइ गाते। मीं तेरे चेलन सेइं ज़ोरु थियूं कि, 'मेरे मट्टे पुडेरं भूतेरो सायो केड्डी देथ।' पन तैना केड्डी न सके!" 19 एन गल्लां शुन्तां यीशुए तैन जुवाब दित्तो, "हे गैर विश्वासी मैनाव! अवं केइस तगर तुसन सेइं साथी रालो? त केइस तगर अवं तुश्रो अविश्वास झैल्ललो? तैस मट्टे मीं कां आनां!" 20 तैखन तैनेई तैन मट्टू यीशु कां आनु। ज़ैखन तैनी भूते यीशु लाव, त तैनी अकदम तैन मट्टू मरोडू, ते मट्टू तल्ले बिछू। ते तैसेरी ऐशी मरां शैम्फ निस्ने लग्गी त तैन डलेडने लग्गू। 21 यीशुए तैसेरे बाजी पुच्छू, "एसेरी ए हालत केइसेरी देंती आए?" तैसेरे बाजे ज़ोवं, "बचपनेरी देंती। 22 एस मारनेरे लेइ एन भूत बड़े बार कधी अग्गी मां ते कधी पैनी मां बिछोइतू राते, पन अगर तू किछ केरि सकतस, त असन पुड तरस खेइतां इश्शी मद्दत केर!" 23 यीशुए तैस मट्टेरे बाजी सेइं ज़ोवं, "तू ए को गल केरतस! अगर तू विश्वास केरस, त एन भोइ सकते। किजोकि मीं पुड विश्वास केरनेबालां केरे लेइ सब किछ भोइ सकते।" 24 तैस मट्टेरे बाजे अकदम ज़ोरे सेइं लेरां देइतां ज़ोवं, "हे प्रभु, अवं विश्वास केरतई, मेरी मद्दत केर कि अवं शक न केरि।" 25 ज़ैखन यीशुए हेरु कि बड़े लोक दौइतां अकोट्टे भोने लग्गोरेन, त तैनी भूत एन ज़ोइतां डांटू, "हे भूता, ज़ै एस मट्टे टोन्वू त लट्टू बनातस। अवं तीं हुक्म देताई, एस मट्टे मरां निस्सी गा, ते एसमां फिरी कधी भी न एज्जां।" 26 तैखन तैनी भूते चिन्डां मारी त तैन मट्टू मरोडू, फिरी तैन तैस मट्टे मरां निस्सी जेव। त मट्टू मरु ज़ेरु भोइ ज़ोवं, इडी तगर कि बड़े लोक जोने लग्गे कि मट्टू मेरि ज़ोवं। 27 पन यीशुए मट्टेरो हथ टलेइतां खडू कियूं। ते मट्टू ठीक भोइतां खडू भोवं। 28 तैल्ला पत्ती, यीशु ते तैसेरे चले घरे जो जे। ज़ैखन ते अकैल्लो थियो तैखन तैसेरे चेलेई तैस पुच्छू, "अस तैस मट्टे मरां भूतेरो सायो की न केड्डी सके?" 29 यीशुए तैन सेइं ज़ोवं, "बगैर प्रार्थनारे (त कने बगैर बरत रखनेरे) अलावा, होरि केन्ची तरीके सेइं, तुस एरे ज़ेरे भूतेरो सायो न केड्डी सकतथ।" 30 तैल्ला पत्ती, यीशु त तैसेरे चले तैट्ठां निस्तां गलील इलाके मांमेइं चेलि राओरे थिये। यीशु न चातो थियो कि कोई तैसेरे बारे मां ज़ाने कि तै तैडी

ओरोए, 31 किजोकि तैखन तै अपने चेलन शिक्षा देतो ते तैन सेइं ज़ोतो थियो कि, "मेरे दुश्मनेई मैनेरु मट्टू, यानी अवं कैद केरनोई। त तैनेई अवं मारनोई, पन मारनेरां टलेइयोवं दिहाड़े अवं मुडदन मरां फिरी ज़ींतो भोनोई।" 32 पन यीशुएरी ए गल चेलां केरि समझी मां न आई, ते तैना एस गल्लारो मतलब पुछ्ने केरां भी डरते थिये। 33 तैल्ला पत्ती, यीशु ते तैसेरे चले कफरनहूम नगरे मां आए। तैना तैडी एक्की घरे मां जे। तैखन यीशुए अपने चेलन पुच्छू, "बतां चलते-चलते तुस एप्पू मांमेइं कोस गल्लारे बारे मां बेंस केरि राओरे थिये?" 34 तैना सब शरमेइतां चुप राए, किजोकि तैनेई बत्तां एप्पू मांमेइं एसेरे बारे मां बेंस कियोरी थी कि असन मां बड्डो मैन्हु कौन आए। 35 तैखन यीशुए तल्ले बिश्तां अपने 12 चले कुजाए ते तैन सेइं ज़ोवं, "अगर कोई परमेशेरी नज़री मां बड्डो बनू चाते, त तै सेबभन केरां निकडो बने, ते कने सेबभी मैन्हु केरो सेवक बने।" 36 तैखन यीशुए अक निकडो बच्चो हथ्यन मां टलेइतां, तैन केरे मझाटे खडो कियो। तैनी तै बच्चो अपने कुम्मे मां रेखतां अपने चेलन सेइं ज़ोवं, 37 "ज़ैना लोक मीं सेइं प्यार केरनेरे वजाई सेइं एरे ज़ेरे बच्चन मरां अक भी कबूल केरतन, तैना मीं कबूल केरतन। ज़ैना मीं कबूल केरतन, तैना सिर्फ मीं नई, पन तैना परमेशेरे भी कबूल केरतन, ज़ैनी अवं इडी भेजोरोई।" 38 तैखन यूहन्ने यीशु सेइं ज़ोवं, "हे गुरु, असेई अक मैन्हु लाव, ज़ै तेरु नवं घिन्तां लोकन मरां भूतेरो सायो केड्डी राओरो थियो। एल्हेरेलेइ, असेई तै मैन्हु ठाको, किजोकि तै असन सेइं साथी तीं पत्ती नई चलै।" 39 पन यीशुए जुवाब दित्तो, "तैस न ठाका, किजोकि अगर कोई मेरे नवं घिन्तां चमत्कारेरां कम्मां केरे, त ते मेरे बारे मां लूशी बुरी गल्लां न ज़ोए। 40 किजोकि ज़ैना इश्शे खलाफ कम न केरन, तैना इश्शे पासेन। 41 अगर कोई मेरे नवं सेइं तुशशी मद्दत केरे, अक गिलास पानी भी तुसन पियाए, कि मसीहेरे आथ, त अवं तुसन सेइं सच ज़ोतां कि तै मैन्हु परमेशेरे केरां अपनो फल ज़रूर हासिल केरेलो। 42 "ज़ै कोई इन निकडे बच्चन मरां ज़ैना मीं पुड विश्वास केरतन, केन्ची भी पाप करवाए, त तैस मैनेरे लेइ एन रोडू आए कि ढ्लाटोरो अक बड्डो ढलेइटोल तैसेरे गल्ले सेइं बेंधतां समुन्द्रे मां शारो गाए। 43 अगर तेरो हथ तीं पाप केरनेरे लेइ ठोकर खुवाए, त तैस केट्टी छड। किजोकि तेरे लेइ दूई हथ भोंते सांते सज़ा मैलनेरे लेइ नरकेरी अग्गी मां गाने केरां एन रोडू आए, कि तू डोण्डो भोइतां हमेशारी जिन्दगी मां दाखल भोस। किजोकि नरकेरी अग कधी भी न हिश्शे। (Geenna g1067) 44 तैडी तैन केरे कीडे, ज़ैना तैन खातन न मरन ते कने अग भी न हिश्शे। 45 त अगर तेरो पाव तीं पाप केरनेरे लेइ ठोकर खुवाए, त तैस केट्टी छड। किजोकि तेरे लेइ दूई पाव भोंते सांते सज़ा मैलनेरे लेइ नरकेरी अग्गी मां गाने केरां एन रोडू आए, कि तू टोंटो भोइतां हमेशारी जिन्दगी मां दाखल भोस। किजोकि नरकेरी अग कधी भी न हिश्शे। (Geenna g1067) 46 तैडी तैन केरे कीडे, यानी ज़ैना तैन खातन न मरन त अग भी न हिश्शे। 47 अगर तेरी अछ तीं पाप केरनेरे लेइ ठोकर खुवाए, त तैस केट्टी छड। किजोकि तेरे लेइ दूई एछछी भोंते सांते नरकेरी अग्गी मां छड्डे गाने केरां एन रोडू आए, कि

एक्की अछ्छी सेइं तू परमेशेरें राज्जे मां दाखल भोस। (Geenna g1067)
 48 नरके मां तैन केरे कीडे, ज़ैना तैन खातन न मरन त अग भी न हिश्वे।
 49 ज़ेन्चरां हर बलिदाने मां लून छडनू ज़रूरी आप, तेन्चरां परमेशर हर
 एक्की मैनेरी अज़मैइश घिन्नलो, ज़ै बड़ी दुखे बाली भोनी आप, ज़ेन्चरां
 कि अग्गी मांमेइं निसनूए। 50 लून त रोडू आप, पन अगर लूनरो स्वाद
 चेलि गाए, त फिरी दुबारां केन्चरे तैसेरो स्वाद वापस आनेले? तेन्चरां
 तुस भी एप्पू मां लून रखा, यानी परमेशेरें हुक्म मन्ना, त एप्पू मांमेइं
 मेल मिलापे सेइं राथ।”

10 तैल्ला पत्ती, यीशु त तैसेरे चले तैट्टां उठतां यहूदिया इलाके मां
 आए, त फिरी यरदन दरियारे उस पार चले जे। तैड़ी मैन्हु केरि
 भीड़ फिरी तैस कां अकोट्टी भोइ। त तै अपने रीतरे मुताबिक तैन फिरी
 शिक्षा देने लगे। 2 तैखन फरीसी लोकेईं यीशु कां एइतां तैस अज़मानेरे
 लेइ तैस पुच्छू, “कुन एन जेइज आप कि मइद अपनि कुआन्शी फारख्ती
 दे?” 3 पन यीशुए तैनन् पुच्छू, “बडे पेइले मूसा नेबे तुसन कुन केरनेरो
 हुक्म दित्तोरो थियो?” 4 तैखन तैनेईं यीशुए जुवाब दित्तो, “मूसे मइदे
 अज़ाज़त दित्तोरीए कि तै लिखतां फारख्ती दे।” 5 तैखन यीशुए तैनन्
 जुवाब दित्तो, “तुश्शे सखत दिलेरी वजाई सेइं, मूसे तुश्शे लेइ ए हुक्म
 दित्तोरो थियो। 6 पन दुनियारी शुरुआती मां, ज़ैखन परमेशेरें मैन्हु केरि
 रचना की, तैखन तैनी तैना मइद ते कुआन्शा बनोरेन। 7 एल्हेरेलेइ,
 इलाएरे पत्ती मइद अपने हाज-बव्वे केरां अलग भोइतां अपनि कुआन्शी
 सेइं साथी रालो, 8 ते तैना दुइये अक्के जान भोले।” तैल्ला पत्ती यीशुए
 ज़ोवं, “एल्हेरेलेइ तैना हुनी परमेशेरें नज़री मां दूई नईं, पन तैना अक्के
 आन। 9 एल्हेरेलेइ ज़ैना परमेशेरें जोड़ोरेन, तैनन् कोई मैन्हु अलग न
 केरे!” 10 बादे मां, ज़ैखन यीशु ते तैसेरे चले घरे मां थिये, तैखन तैसेरे
 चलेईं फारख्ती देनेरे बारे मां तैस फिरी पुच्छू। 11 यीशुए तैन सेइं ज़ोवं,
 “ज़ै कोई अपनि कुआन्शी फारख्ती देइतां होरो इला बनाए, त तै तैस
 पेइली कुआन्शारे खलाफ बदमाशी केरते। 12 त अगर कुआन्शा अपने
 मइदे छेइतां होरो इला बनाए, त तै अपने पेइले मइदेरे खलाफ बदमाशी
 केरचे।” 13 तैल्ला पत्ती, किछ लोक अपने निक्के बच्चन यीशु कां
 आन्ने लगे ताके तै तैन पुइ हथ रेखतां आशिर्वाद दे, पन तैसेरे चलेईं
 तैना लोक डांटे। 14 यीशुए एन हेरतां सेरकोइतां अपने चलन सेइं ज़ोवं,
 “निक्के बच्चन मीं कां एजने देथ, तैनन् न ठाका, किजोकि परमेशेरें
 राज्जे एरे ज़ेरे लोकां केरे लेइ आए। 15 अवं तुसन सेइं सज़ ज़ोतईं कि ज़ै
 कोई परमेशेरें राज्जे निकडे बच्चेरू ज़ेरू कबूल न केरे, त तै परमेशेरें
 राज्जे मां कधी भी दाखल न भोइ सके।” 16 तैखन यीशुए तैना बच्चे
 कुम्मे मां रेखां, तैन पुइ हथ रेखतां तैनन् आशिर्वाद दित्तो। 17 तैल्ला
 पत्ती, ज़ैखन यीशु त तैसेरे चले घरेरां बेइर निस्तां बत्तां चेलि राओरे थिये,
 ते अक मैन्हु यीशु कां दौइतो अव। तैनी तैस कां मथ्थो टेकतां तैस पुच्छू,
 “हे रोडे गुरू, हमेशारी ज़िन्दगी हासिल केरनेरे लेइ अवं कुन केरि?”
 (aiōnios g166) 18 पन यीशुए तैस पुच्छू, “किजो तू मींजो रोडू ज़ोतस?
 परमेशेरें अलावा होरो कोई भी रोडी नईं। 19 तू त परमेशेरें हुक्मन

ज़ानतस, यानी ‘खून न केरा, बदमाशी न केरा, चोरी न केरा, झूठी गवाही
 न देथ, धोखो न देथ, अपने हाज-बव्व्यां केरि इज़्जत केरा।” 20 पन तैनी
 मैने यीशु जुवाब दित्तो, “हे गुरू, एना सब हुक्म अवं बचपनेरो मन्तो
 ओरोईं।” 21 तैखन यीशुए तैस तेकतां तैस सेइं प्यार कियो, त तैस
 सेइं ज़ोवं, “तीं मां एक्की गल्लारी कमी आए। गा, ज़ैन किछ तीं कां
 आए तैन बेचतां गरीब मैन्नु दे, तैखन तीं स्वर्ग मां खज़ानो मैलेलो।
 तैल्ला पत्ती, एइतां मेरो चेलो बना, त अपनू क्रूस छुइतां मीं पत्ती च़ल।”
 22 यीशुएरी ए गल शुन्तां तैस मैनेरू तुत्तर टलक्कू, त तै बडो दुखी
 भोइतां च़लो जेव, किजोकि तै बडो अमीर थियो त तै अपनो धन छुडने न
 चातो थियो। 23 तैखन यीशुए च़ेरे पासन अपने चलन तेकतां तैन सेइं
 ज़ोवं, “अमीर मैन्हु केरू परमेशेरें राज्जे मां दाखल भोनु बडू मुश्किल
 आए।” 24 यीशुएरे चले तैसेरी गल्लां शुन्तां हैरान भोए। पन यीशुए
 फिरी तैन सेइं ज़ोवं, “हे मट्टाव, ज़ैना धने पुइ भरोसो रखतन, तैन केरे
 लेइ परमेशेरें राज्जे मां दाखल भोनु बडू मुश्किल आए! 25 परमेशेरें
 राज्जे मां अमीर मैनेरू दाखल भोने केरां ऊँटेरू सांधनेरे पाए मरां निस्नु
 सुख्खू आए!” 26 तैखन तैना बडे हैरान भोइतां एप्पू मांमेइं ज़ोने लगे,
 “अगर अमीर मैनेरे लेइ मुक्ति हासिल केरनि नमुमकिन आए, त फिरी
 केसेरी मुक्ति भोइ सकचे?” 27 यीशुए तैन केरे पासे तेकतां ज़ोवं, “मैन्हु
 अपने आपे न बचेइ सकन, यानी मुक्ति हासिल न केरि सकन, पन
 परमेशर एन केरि सकते, किजोकि परमेशर सब किछ केरि सकते।” 28
 तैखन पतरस यीशु सेइं ज़ोने लगे, “तक, अस त सब किछ छेइतां तीं
 पत्ती च़लोरेम! असन कुन इनाम मैलेलू?” 29 यीशुए अपने चलन सेइं
 ज़ोवं, “अवं तुसन सेइं सज़ ज़ोतईं कि, ज़ैनेईं मेरे लेइ त कने मेरे बारे मां
 खुशखबरी होरे लोकन शुनानेरे लेइ अपने घर या ढ़ला या बेइन या हाज
 या बव या बच्चे या ऊडारां शारोरन, 30 तैनन् इस दुनियाईं मां शौव गुणा
 मैलेलू। तैना घरन, ढ़लान, बेइनन, हेईयन, बच्चन त कने ऊडारां हासिल
 केरेले। लोक भी तैनन् सताले, पन एजनेबाली दुनियाईं मां परमेशर तैनन्
 हमेशारी ज़िन्दगी देलो। (aiōn g165, aiōnios g166) 31 पन बडे मैन्हु ज़ैना
 हुन्ना पेइले आन, तैना बादे मां पत्रोवं भोनेन। त ज़ैना हुन्ना पत्रोवं आन,
 तैना बादे मां पेइले भोनेन।” 32 तैल्ला पत्ती, यीशु त तैसेरे चले ते किछ
 लोक यरूशलेम नगरे ज़ो च़लते-च़लते, तैना हेजू बत्तां थिये। यीशु तैन
 केरे अग्री-अग्री पासे च़ेलि राओरो थियो। ते तैसेरे चले हैरान भोए त हारे
 लोक डरते-डरते तैस पत्ती च़ली राओरे थियो। तैखन यीशु अपने 12
 चलन बत्ती मरां अलग नेइतां फिरी तैन सेइं तैना गल्लां ज़ोने लगे, ज़ैना
 तैस सेइं भोनेबैली थी। 33 तैनी ज़ोवं, “शुना, अस सारे यरूशलेम नगरे
 ज़ो गेइ राओरेम। तैड़ी मैनेरू मट्टू (यानी अवं) प्रधान याजकन त कने
 शास्त्री लोकन केरां कैद कियो गानोईं, त तैना मीं मारनेरो हुक्म देले त
 गैर यहूदी लोकां केरे हवाले केरले। 34 त हौरि कौमां केरे लोक मेरो
 मज़ाक बनाले, त मीं पुइ थुकेले, त मीं कोडे मारेले, त तैना मीं मैरी
 छेडेले, पन टलेइ दिहाइना पत्ती अवं मुइदन मरां फिरी ज़ीतो भोलो।”
 35 तैखन याकूब त यूहन्ना, ज़ैना जब्दी नब्बेरे मैनेरां मट्टां थियां, यीशुएरे

नेडे एइतां तैस सेइं ज़ोने लग्गे, “हे गुरु, अस चातम कि ज़ैन किछ अस तीं केरां मग्गम, तैन तू असन देइयथ।” 36 यीशुए तैन पुच्छू, “तुसन कुन लोइते, ज़ैन अवं तुसन देई?” 37 तैनेई तैस सेइं ज़ोवं, “असन एन दे कि ज़ैखन तू महिमा सेइं साथी राज़ केरेलो, तैखन तीं सेइं साथी राज़ केरनेरे लेइ असन मरां अक तेरे देइने पासे त होरो तेरे बाएं पासे राज़गेही पुइ बिशेशो।” 38 पन यीशुए तैन सेइं ज़ोवं, “तुस न ज़ानथ कि तुस कुन मगने लग्गेरेथ! ज़ेन्चरे दुख अवं झलने बालोई, कुन तुस झेल्ली सकतथ? ज़ेन्चरे अवं मारनोई कुन तुस भी मारे गानेरे लेइ तियारथ?” 39 तैनेई तैस जुवाब दित्तो, “हाँ, अस एन केरि सकतम।” एल्हेरेलेइ, यीशुए तैन सेइं ज़ोवं, “सच्चे, ज़ेन्चरे अवं दुख झलने बालोई, तेन्चरे तुस झललेले? ज़ेन्चरे अवं मारनोई तेन्चरे तुस मारे गाले। 40 पन तै ठार ज़ैन केरे लेइ पेइले तियारी कियोरीए, तैन छेइतां हारे केन्ची अपने देइने पासे त कने अपने बाएं पासे राज़गेही पुइ बिशालनू मेरू कम नई।” 41 एन शुन्तां यीशुएरे बाकी दश चले याकूब त कने यूहन्ना सेइं नराज़ भोइ जे। 42 तैखन यीशुए अपने सारे चले नेडे कुजेइतां, तैन सेइं ज़ोवं, “तुसन पतोए कि ज़ैना होरि कौमां केरे लोकां केरे राज़ केरनेबाले समझे गातन, तैना अपने लोकन पुइ राज़ केरतन। तैन मरां ज़ैना बड्डे अफसर आन, तैना अपने लोकन पुइ हकौमत च़लातन। 43 पन तुसन मां एरी ज़ेरि गल न लोडे, पन ज़ै कोई तुसन मां बड्डो बनू चाए, त तै निकडो बेनतां तुशशो सेवक बने। 44 त ज़ै कोई तुसन मां प्रधान मैन्हु बनू चाए, त तै सारे मैन्हु केरो सेवक बने। 45 किजोकि मैनेरू मट्टू, यानी अवं एस दुनियाई मां एल्हेरेलेइ नई ओरो कि कोई मेरी सेवा केरे, पन एल्हेरेलेइ ओरोई कि अवं होरि लोकां केरि सेवा केरि त कने बडे लोकां केरे लेइ अपनि जान बलिदान केरि, ताके तैन अपने पापां केरे सज़ाई केरां छुटकारो मैल्ले।” 46 तैल्ला पत्ती, यीशु त तैसेरे चले यरीहो नगरे मां पुज्जे। बादे मां, ज़ैखन तैना मैन्हु केरि बडी भीडी सेइं साथी यरीहो नगरी मरां निस्सी राओरे थिये, त तैखन बरतिमाई नंवेरो कानो भिखारी सइकेरे इलेखी बिशतां भीख मेग्गी राओरो थियो। तैसेरे बाजी केरू नंवं तिमार्इ थियूं। 47 ज़ैखन तैनी शुनू कि नासरत नगरेरो यीशु इलमेई निस्सी राओरोए, त तै भिखारी ज़ोरे सेइं ज़ोने लग्गे, “हे यीशु, दाऊद राज़ेरा मट्टा! मीं पुइ दया केर!” 48 त बडे लोकेई तै डांटो कि, “चुप रा।” पन तै पेइले केरां जादे चिन्डां मारने लग्गे, “हे दाऊद राज़ेरा मट्टा, मीं पुइ दया केर!” 49 तैखन यीशुए रुकतां लोकन सेइं ज़ोवं, “तुस तैस इरां कुजाथ।” लोकेई तै कानो कुजेइतां तैस सेइं ज़ोवं, “हिम्मत रख! उठ! यीशु तीं एपू कां कुजाने लग्गेरेन।” 50 तै अपनि च़ादर शैरतां लूशी उठो, ते यीशु कां अवं। 51 तैखन यीशुए तैस पुच्छू, “तीं कुन लोइते कि अवं तेरे लेइ केरि?” काने मैने जुवाब दित्तो, “हे गुरु, अवं लानू चाताई।” 52 तैखन यीशुए तैस सेइं ज़ोवं, “तू गा। तीं मीं पुइ विश्वास कियूं एल्हेरेलेइ अवं तीं बज़्जाताई।” अकदम तै लाने लग्गे त कने यीशु पत्ती च़लो।

11 ज़ैखन यीशु त तैसेरे चले यरूशलेम नगरेरे नेडे आए, त तैखन ज़ैतून नंवेरे पहाड़ेरे नेडे, बैतफगे त कने बैतनिय्याह इल्लोवन कां

पुज्जे। तैखन यीशुए अपने चलन मरां दुइयन सेइं एन ज़ोइतां पेइले भेजे कि, 2 “अपने सामनेबाले इल्लोवं मां गाथा तैडी पुज्जे तुसन अक गैधेरो बच्चो बंधोरो मैलेलो, ज़ैस पुइ कधी कोई नई च़ढोरो। तैस खोलतां इडी मीं कां आनां। 3 अगर तुसन कोई पुच्छे, ‘किजो एन केरने लग्गेरेथ?’ त तैस सेइं ज़ोइयथ, ‘प्रभुए एसेरी ज़रूरत आए।’ त तै अकदम गधेरे बच्चे तुसन सेइं साथी इडी भेजेलो।” 4 तैना दूई चले तैस इल्लोवं मां जे। तैडी गैधरो बच्चो एक्के घरेरे दारे बेइर बंधोरो लाव, त तैना तैस खोलने लग्गे। 5 ज़ैना तैडी खडे थिये, तैन मरां किछ मैनेई तैन पुच्छू, “एन कुन केरने लग्गेरेथ, गधेरे बच्चे किजो खोलने लग्गेरेथ?” 6 ज़ेन्चरां यीशुए अपने चलन सेइं ज़ोरू थियूं, तेन्चरां तैनेई तैन मैन् सेइं ज़ोवं। तैखन तैन मैनेई चले तैडुं गाने दित्ते। 7 यीशुएरे चलेई बच्चो यीशु कां एन्तां यीशुए तैस पुइ बिशालनेरे लेइ, तैस पुइ अपने लिगडां छड्डो। त यीशु तैस पुइ बिशेशो (त तैना यरूशलेम नगरेरे पासे जो च़लने लग्गे)। 8 तैखन बडे लोकेई (तैसेरी इज़्जत केरनेरे लेई) अपना लिगडां बत्ती मां बिछां त कने किछ मैनेई पटलनबाली डैलडी एन्तां बत्ती मां बिछेई। 9 ज़ैना यीशुएरे अग्री-अग्री त कने पत्ती-पत्ती च़लने लग्गेरे थिये, तैना खुशी सेइं ज़ोरे सेइं ज़ोने लग्गे, “होशाना! (परमेशेरी तारीफ़ भोए) परमेशर तैस बरकत दे, ज़ै प्रभु-परमेशेरेरे अधिकारे सेइं साथी एज्जी राओरोए!” 10 “परमेशर तीं आशिर्वाद दे, ज़ैखन तू इशे पडदादे दाऊदरू राज़ेरू ज़ेरू राज़ केरे! परमेशेरी होशाना (तारीफ़) भोए, ज़ै उच्चे स्वर्ग मां आए!” 11 तैल्ला पत्ती, तैन लोकन सेइं साथी, यीशु यरूशलेम नगरी मां पुज्जां मन्दरे मां जेव। यीशु मन्दरे मां च़ेरे पासन तक्कू कि ज़ैन तैडी भोइ राओरू थियूं। तै अपने 12 चलन सेइं साथी नगरे मरां निस्तां, राती बिशनेरे लेइ बैतनिय्याह इल्लोवं जो वापस च़लो जेव, किजोकि इलोइ भोइ जोरी थी। 12 त एग्री दिहाडी, ज़ैखन यीशु त तैसेरे चले बैतनिय्याह इल्लोवरां निस्तां यरूशलेम नगरे जो वापस एज्जी राओरे थिये, तैखन यीशुए ढलुख लग्गी। 13 तै दूररां फ़ेगरो अक नीलो बुट लेइतां तैसेरे नेडे जेव कि खाने जो शायद तैस मां किछ मैल्ले। पन, ज़ैखन तै बुटे कां जेव, त तैडी पटलां केरे अलावा तैस किछ न मैल्लू, किजोकि तै फल्लेरो मौसम न थियो। 14 तैखन यीशुए तैस बुटे फिटकार देइतां तैस सेइं ज़ोवं, “हुन्नेरे पत्ती, तीं मां कोई फल कधी न लग्गलो!” त तैसेरे चले एन शुनी राओरे थिये। (aiōn g165) 15 तैल्ला पत्ती, तैना फिरी यरूशलेम नगरे मां पुज्जे, त यीशु मन्दरेरे अंगने मां जेव। तैडी लोक जानवरां केरू त कने मन्दरे मां च़ाढनेरू सामान घिन्नेरू त कने बेचनेरो कारोबार केरि राओरे थिये। यीशु तैनन् बेइर कढने लग्गे, ते तैनी तैडी पेइसे बदलनेबालन केरे मेज़न त कने कबूतर बेचनेबालन केरि कुर्सी उलटैइ दित्ती। 16 त मन्दरेरी ठेरी मां केन्ची बेचनेरे लेइ कोई चीज़ एन्तां च़लने न दित्तू। 17 तैखन यीशुए तैन लोकन शिक्षा देइतां ज़ोवं, “परमेशेरी किताबी मां एस मन्दरेरे बारे मां एन लिखोरूए कि परमेशेरे ज़ोवं, मेरू मन्दर सैरी कौमां केरे लोकां केरे लेइ प्रार्थनारू घर भोलू! पन तुस लोकेई इन मन्दर डैकू केरो अड्डो बनोरोए।” 18 एन शुन्तां प्रधान याजक त कने शास्त्री लोक यीशु कल्ल

केरनेरो मौको तोपने लग्गे। पन तैना यीशु केरां डरते थिये, किजोकि सारे लोक तैसेरो शिक्काई शुन्तां हैरान भोते थिये। 19 ज़ैखन ड्लोझ भोड, त यीशु त तैसेरे चले (रात गुज्जारेने लेड) नगरेरां बेडर चेलि जे। 20 एग्री दिहाडी, झेज्जंयां यीशु त तैसेरे चले तैदुं यरूशलेम नगरे जो चले त तैनेई तै फ्रेगेरो बुट लाव, ज़ैस यीशुए पेडले फिटकार दित्तोरो थियो। तै बुट जीलन तगर शुक्की जोरो थियो। 21 पतरसे तै गल याद आई कि यीशुए एस बुटे फिटकार दित्तोरो थियो, त तैनी यीशु सेइं ज़ोव, “हे गुरु, तक! ए फ्रेगेरो बुट ज़ैस तीं फिटकार दित्तोरो थियो, शुक्की जोरोए! (एन केन्चरां भोवं)” 22 यीशुए अपने चेलन जुवाब दित्तो, “तुस परमेशरे पुड विश्वास रखा। 23 अवं तुसन सेइं सग्न जोताई कि ज़ै कोई एस पहाडे सेइं ज़ोए, ‘तू उखडतां समुन्द्रे मां बिछड़ी गा,’ त एन्चरां ज़ोइतां अपने दिले मां शक न केरे, पन विश्वास केरे कि ‘ज़ैन अवं ज़ोतई तैन भोड गालू,’ त तैसेरेलेड तैन्ने भोलू। 24 एल्हेरेलेड अवं तुसन सेइं ज़ोतई कि, ज़ैखन तुस प्रार्थना केरतां परमेशरे केरां ज़ैन भी मगले, त विश्वास केरा कि तुसन तैन ज़रूर मैल्ली गालू, तैखन परमेशरे केरां तैन तुसन दित्तू गालू। 25 ते ज़ैखन कथी तुस खडे भोइतां परमेशरे कां प्रार्थना केरतथ, त अगर तुसन केन्ची सेइं गिलो भोए, त पेडले तुस तैस माफ़ केरा, ताके तुशशो स्वर्गेरो बाजी भी तुशशे पाप माफ़ केरे। 26 अगर तुस होरि लोकन माफ़ न केरतथ, त तुशशो बाजी परमेशर भी, ज़ै स्वर्ग मां आए, तुशशे पाप माफ़ न केरेलो।” 27 तैल्ला पत्ती, यीशु त तैसेरे चले फिरी यरूशलेम नगरे मां आए। ज़ैखन यीशु मन्दरेरे अंगने मांमेइं हठने लगगेरो थियो, त तैखन प्रधान याजक त कने शास्त्री त कने यहूदी लोकां केरे बुजुर्ग तैस कां आए, त तैस सवाल पुछने लगगे, 28 “तू एन कम्मां कोस अधिकारे सेइं केरतस, त कने एन कम्मां केरनेरो तीं केनि अधिकार दित्तोरोए?” 29 पन यीशुए तैन सेइं ज़ोव, “अवं भी तुसन अक सवाल पुछतई। मीं तैसेरो जुवाब देथ, तैखन अवं भी तुसन ज़ोलो कि अवं एन कम्मां कोस अधिकारे सेइं केरतई। 30 मीं जुवाब देथ। यूहन्ना ज़ै बपतिस्मो देनेबालो थियो, तैस बपतिस्मो देनेरो अधिकार कोड्डां मैल्लो, परमेशरेरी तरफां मैल्लो या मैन्हु केरि तरफां?” 31 तैखन तैना एप्पू मांमेइं गलबात केरने लगगे कि, “अगर अस ज़ोम कि, ‘परमेशरेरी तरफां मैल्लो,’ त एनी पुछनूए कि, ‘फिरी तुसेईं तैसेरो विश्वास की न कियो?’ 32 पन अस एन भी नईं ज़ोई सकम कि, ‘यूहन्ना अधिकार, मैन्हु केरि तरफां मैल्लो,’ किजोकि असन लोकां केरो डर आए कि तैना असन पुड क्रोध केरले, किजोकि सारे लोक समझते थिये कि सच्चे यूहन्ना नबी आए।” 33 एल्हेरेलेड तैनेई यीशु एन जुवाब दित्तो कि, “असन नईं पतो।” यीशुए तैन सेइं ज़ोव, “अवं भी तुसन सेइं न ज़ोई कि अवं एन कम्मां कोस अधिकारे सेइं केरतई।”

12 तैल्ला पत्ती, यीशु यहूदी लोकां केरे लीडरन सेइं मिसालन मां गल्लां केरने लगगे, “एक्सां, एक्की मैने दाछरी बाग लाई, ते बागारे चेत्रे पासन बाड दित्तो, त दाछारो रस कढनेरे लेड कुण्ड बनावं, ते तैनी तैस बागारी रखवाली केरनेरे लेड अक उच्ची कूडी बनाई। तैल्ला पत्ती, तै मैन्हु तैस बागारो ठेको किछ ज़मीनदारन देइतां होरि मुखे जो

चलो जेव। 2 ज़ैखन फल्लेरो मौसम अवं, त तैनी ज़मीनदारन कां अक नौकर भेजो कि ज़मीनदारन केरां दाछारे बागारे फल्लां केरो अपनो हिस्सो आने। 3 पन ज़ैखन तै नौकर बागी मां पुज्जो, त तैन किसानेई तै दलेइतां मड्डो त खाली हथ्थेइं वापस भेजो। 4 ज़ैखन बागारे मालिके शुनू कि तैनेई एन कुन कियूं, त तैनी होरो अक नौकर फिरी भेजो। पन तैनेई तैसेरो भी दोग बननो ते तैसेरी बेजती केरतां भेजो दित्तो। 5 फिरी तैनी मालिके होरो अक नौकर तैन कां भेजो। तैनेई तै भी मैरी छड्डो। तैखन तैनी होरे जादे नौकर भेजे। तैन मरां तैनेई किछ मड्डे, ते किछ मारे। 6 तैस मालिके कां अक्के रेवरो थियो, ज़ैन तैसेरू दलारू मड्डू थियूं। आखरी मां, तैनी तै भी तैन कां एन सोचतां भेजू कि तैना मेरे मड्डेरी इज्जत केरले। 7 पन ज़ैखन मालिकेरू मड्डू तैन कां अवं, त तैन किसानेई एप्पू मांमेइं ज़ोव, “ए त एस बागारो वारिस आए। एज्जा, अस एस भी मैरी छड्डम, तैखन एसेरी जेइदात इशशी भोनी।” 8 एल्हेरेलेड, तैनेई तै दलेइतां मैरी छड्डो, ते बागारे बेडर शेरी छड्डो।” 9 तैखन यीशुए तैन मैन्नु पुच्छू, “हुनी बागारो मालिक तैन ज़मीनदारन सेइं कुन केरेलो? अवं ज़ोतई कि तैनी कुन केरनू, तै एइतां तैन किसानां केरो नाश केरेलो, ते बागारो ठेको होरि केन्ची ज़मीनदारन देलो!” 10 “कुन तुसेईं पवित्रशास्त्रे मां मसीहेरे बारे मां ई गल नईं पढोरी? तैस मां लिखोरूए कि, ‘ज़ै घोड राज़-मिस्त्रेईं निकम्मो ठहरेवरो थियो, तै मकानेरो खास घोड बेनि जेव। 11 एन प्रभु परमेशरेरी तरफां एन्चरां भोव, ते कने इशशी नज़री मां ए हैरान भोनेरी गल आए!” 12 ज़ैखन यहूदी लोकां केरे लीडरेई एन शुनू, त तैनेई सेमझी छड्डू कि यीशुए ई मिसाल इशशे खलाफ ज़ोरीए। एल्हेरेलेड, तैना सेरकोए। त तैनेई यीशु कैद केरनू चाव। पन तैना लोकन केरां डरे, एल्हेरेलेड तैस छेडतां चेलि जे। 13 तैल्ला पत्ती, यहूदी लोकां केरे लीडरेई यीशु कां किछ फरीसी लोक त कने हेरोदेस राज़ेरे लोक भेजे, ताके तैना यीशुए अपनि गल्लन मां फसान। 14 तैनेई यीशु कां एइतां तैस सेइं ज़ोव, “हे गुरु, अस ज़ानतम कि तू सच्चो आस, त केन्चेरी परवाह न केरस, किजोकि तू सारे मैन्नु बराबर समझतस, त तू परमेशरेरी गल्लां लोकन सच्च्याई सेइं शुनातस। एल्हेरेलेड असन ज़ो, कुन रोम-मुखेरे महाराजे जो चुंगी देनी जेइज्ज आए कि नईं? 15 अस देम या न देम?” यीशुए तैन केरू पाखंड ज़ेनतां तैन सेइं ज़ोव, “मीं किजो अज़मातथ? अक सिक्को (दीनार) मीं कां आनां कि अवं तैस हेरी।” 16 तैनेई आनो, तैखन यीशुए तैन पुच्छू, “इस सिक्के पुड केसेरी शकल त केसेरू नवं आए?” तैनेई जुवाब दित्तो, “महाराजेरू आए।” 17 यीशुए तैन सेइं ज़ोव, “ज़ैन महाराजेरू आए तैन बड्डे राज़े देथ, ते ज़ैन परमेशेरू आए तैन परमेशरे देथ।” ज़ैखन फरीसी लोकेईं ते कने हेरोदेस राज़ेरे लोकेईं एन शुनू, त तैखन तैना बडे हैरान भोए। 18 तैल्ला पत्ती, सदूकी लोक यीशु कां आए। तैना ज़ोतन मुडदे जीते न भोन। त तैनेई यीशु पुच्छू, 19 “हे गुरु, बडे पेडले मूसे असन जो कानूने मां लिखोरू थियूं कि अगर कोई मैन्हु बैऔलाद मेरि गाए त तैसेरी कुआन्श रेइ गाए, त तैसेरो दूला तैसेरी लैडी सेइं इला बनाए, त अपने दूलापरे लेइ औलाद पैदा केरे, ताके तैसेरी

खानदानी राए। 20 सत ढूला थिये। पेइलो ढूला इला बनेइतां बेऔलाद मेरि जेव। 21 तैखन दुइयोवं ढूलाए तैस कुआन्शी सेइं इला बनाव। तै भी बेऔलाद मेरि जेव। तेन्चरां टूलेइयोवं ढूलाए भी कियूं। 22 त सते ढूलाएई तैस कुआन्शी सेइं एक्केरे पत्ती एक्के इला कियो, पन औलाद न भोइ। सैरेन पत्ती तै कुआन्श भी मेरि जेई। 23 एल्हेरेलेइ, परमेशर लोक मुइदन मरां जींते केरनेरे पत्ती, यानी ज़ैखन लोक जींते भोले, त तैखन तै कुआन्श तैन सत्तन मरां केसेरी लाड़ी भोली? किजोकि तै इडी धेरती पुइ सत्तां केरि लाड़ी भोरी थी।” 24 यीशुए तैन सेइं ज़ोवं, “तुशथी सोच केत्री गलत आए! कुन तुसन पतो किजो? किजोकि तुस पवित्रशास्त्रे मां लिखोरी गल्लन त कने परमेशररी शक्ति न ज्ञानथ। 25 तुसेईं ज़ै कहानी जोई, तैस मां तै कुआन्श तैन सत्तन मरां केन्चेरी लाड़ी नई भोनी, किजोकि ज़ैखन लोक मुइदन मरां जींते भोले, त तैखन कोई केन्ची सेइं इला न बनारो, पन तैना स्वर्ग मां परमेशररे स्वर्गदूतां केरे जेरे भोले, ज़ैना इला न बनान। 26 मुइदां केरे जींतो भोनेरे बारे मां, कुन तुसेईं मूसेरी किताबी मां एन नई पढोरू ज़ैखन मूसे बलतू झैल्ल लाव, तैखन (यानी अब्राहम, इसहाक त याकूब मरनेरे बड़े सालना पत्ती) परमेशरे मूसा सेइं ज़ोवं, ‘अवं अब्राहमेरो परमेशर, ते इसहाकेरो परमेशर, ते याकूबेरो परमेशर आई?’ 27 परमेशर मुइदां केरो परमेशर नई, पन जींतां केरो परमेशर आए, एल्हेरेलेइ तुशथी सोच बिलकुल गलत आए।” 28 तैखन शास्त्री लोकन मरां एक्की मैने एजतां यीशु ते सदूकी लोकां केरि गलबात शुनी। तैस पतो चलो कि यीशुए तैन ठीक जुवाब दित्तो, ते तैनी यीशु कां एइतां तैस पुच्छू, “परमेशररे सारे हुक्मन मरां बड़ो खास हुक्म को आए?” 29 यीशुए तैस जुवाब दित्तो, “सारे हुक्मन मरां बड़ो खास हुक्म ई आए, जेन्चरां परमेशररी किताबी मां लिखोरूए कि, ‘हे इस्राएलेरे लोकव शुना, प्रभु इशथो परमेशर, अक्के प्रभु आए, 30 एल्हेरेलेइ प्रभु अपने परमेशरे सेइं तुस अपने सारे दिले सेइं, त अपनि सैरी जानी सेइं, त अपनि सैरी अक्ली सेइं, त अपनि सैरी ताकती सेइं प्यार केरा।’ ए बड़ो खास हुक्म आए। 31 तैसेरो जेरो दुइयोवं बड़ो खास हुक्म ई भी आए कि, ‘तू अपने पेडोसन सेइं अपने बराबर प्यार केरा।’ एन दूई हुक्मन केरां होरो कोई भी बड्डो हुक्म नई।” 32 तैखन शास्त्री मैन्हु यीशु सेइं ज़ोवं, “हे गुरु, तीं बडू ठीक ज़ोवं! त तीं सत्र ज़ोवं कि परमेशर अक्के आए, ते तैसेरे अलावा होरो कोई नई। 33 त असेईं परमेशरे सेइं अपने सारे दिले सेइं, ते अपनि सैरी जानी सेइं, ते अपनि सैरी अक्ली सेइं, त अपनि सैरी ताकती सेइं प्यार कियोरो लोडे। ते कने असेईं अपने पेडोसन सेइं अपने बराबर प्यार कियोरो लोडे। जानवरां केरू बलिदान केरनु या होरि चीज़ां केरि चढतल चढने करां भी बेधतां, एना दुइये हुक्मन मन्ने परमेशररे लेइ बड़े खास आन!” 34 ज़ैखन यीशुए हेरू कि तैनी अक्ली सेइं जुवाब दित्तो, त तैनी तैस सेइं ज़ोवं, “तू परमेशररे राज़े मां दाखल भोने करां दूर नई।” ते तैल्ला पत्ती, केन्ची यीशु किछ पुछनेरी हिम्मत न भोइ। 35 मन्दरे मां शिक्षा देते बार यीशुए लोकन अक सवाल पुच्छो, “शास्त्री किजो ज़ोतन कि ज़ै मसीह आए, तै दाऊद-राज़ेरी औलादी मरां भोलो?

36 बड़े पेइले दाऊद राजे एप्पू पवित्र आत्मार शक्ति सेइं एन्चरां ज़ोरू थियूं कि, प्रभु परमेशरे मेरे प्रभु मसीह सेइं ज़ोवं, ‘तू मेरे देइने पासे बिश, ज़ांतगर कि अवं तेरे दुश्मन बिलकुल न हारेई।’ 37 दाऊद राजे त एप्पू मसीहरे बारे मां एन ज़ोवं कि ‘तै मेरो प्रभु आए,’ फिरी मसीह तैसेरू मट्टू केन्चरां भोइ सकते?” त मैन्हु केरि भीइ यीशुएरी गल्लां खुशी सेइं शुन्ती थी। 38 यीशुए शिक्षा देते बार लोकन सेइं ज़ोवं, “शास्त्री लोकन करां खबरदार राथ, ज़ैना लम्मे-लम्मे चोले लेइतां हन्ठनु चातन, ताके लोक समझन कि तैना बड़े धर्मी आन, त तैना चातन कि बज़ारन मां लोक असन बड़ी इज़्ज़ती सेइं नमस्कार केरन। 39 त कने प्रार्थना घरन मां बड़े खास मैन्हु केरे लेइ रखोरी कुर्सी पुइ बिशनु चातन, त धामन मां भी गेइतां बड़े खास मैन्हु केरे लेइ रखोरी कुर्सी पुइ बिशनु चातन। 40 तैना विधवां केरे घरन लुटतन त कने होरि मैन्न हिरानेरे लेइ लेम्मी-लेम्मी प्रार्थना केरतन, ताके लोक समझन कि तैना बड़े धर्मी आन। परमेशर तैनन् बड़ी जादे सज़ा देलो!” 41 लोकन शिक्षा देनेरे पत्ती, यीशु मन्दरेरे दान-पेट्टेरे सामने बिश्तां एन तकने लगगोरो थियो कि, लोक दान-पेट्टी मां केन्चरां पेंडसे छड़तन। बड़े मैनेई, ज़ैना अमीर थिये, तैडी एइतां तैस मां बड़े पेंडसे छड़ने लगगोरे थिये। 42 तैखन अक गरीब विधवां एइतां दूई सिक्के छड़े, ज़ैन केरि कीमत बड़ी घट थी। 43 ज़ैखन यीशुए तैन हेरू, तैनी अपने चले एप्पू कां कुजेइतां तैन सेइं ज़ोवं, “अवं तुसन सेइं सत्र ज़ोतई कि मन्दरेरे दान-पेट्टी मां पेंडसे छड़नेबालन मरां, एस गरीब विधवां तैन सारे मैन्न करां जादे छड़ोरेन। 44 किजोकि तैन सैरेई अपने जादे पेंडसन मरां थोडे जेरे छड़े, पन ए विधवा त बड़ी गरीबी आए, फिरी भी तैसां सब किछ ज़ैन तैस कां थियूं छेड़ी दित्तू, यानी अपनि ज़रूरतेरे लेइ रखोरे पेंडसे भी छेड़ी दित्तो।”

13 ज़ैखन यीशु त तैसेरे चले मन्दरे मरां निस्सी राओरे थिये, तैखन तैसेरे चलन मरां एक्के तैस सेइं ज़ोवं, “हे गुरु, इडी हेर! केत्रे बड्डे-बड्डे घोड़न सेइं बनोरी दिवारां कने केतू रोडे भवन आए!” 2 यीशुए तैन सेइं ज़ोवं, “हुन्ना त तुस एना बड्डे-बड्डे घोड़न सेइं बनोरे भवनन लातथ, पन एक्की दिहाड़े इडी घोडे पुइ घोड़ भी न रालो, यानी सब नाश भोइ गालू!” 3 तैल्ला पत्ती, यीशु ज़ैतन नन्वेरे पहेडी पुइ चढता पार मन्दरेरे सामने बिश्थो। तैखन पतरस, याकूब, यूहन्ना ते अन्दियास यीशु कां अलग गेइतां तैस केरां पुछने लगे, 4 “असन ज़ो कि एना गल्लां केइस भोनिन? तैन दिहाड़ी केरो कुन निशान आए, ज़ैखन एना सब गल्लां पूरी भोनिन?” 5 तैखन यीशु तैन सेइं ज़ोने लगे, “खबरदार राथ कि कोई तुसन धोखो न दे। 6 किजोकि बड़े मैन्हु मेरे नन्वे सेइं एइतां ज़ोले कि, ‘अवं मसीह आई।’ ते तैना बड़े मैन्हु धोखो देले। 7 ज़ैखन तुस लड़ाई ते कने लड़ाइयां केरि अफवाह शुनेले, त तुस घबरेइयथ न, किजोकि लड़ाइयां केरू भोनु ज़रूरी आए, पन एस दुनियारो अन्त अकदम न भोलो। 8 किजोकि एक्की ज़ातारे लोक होरि कौमे लोकां केरे खलाफ लड़ाई केरले, त अक मुलख होरि मुल्खेरे खलाफ लड़ाई केरेलो। हर ठैरी

भुंजल एज्जले, त काल पेलो। एन सब त सिर्फ मुसीबतां केरि शुरुआत आए। 9 “पन तुस अपने बारे मां खबरदार राथ, किजोकि लोक तुसन सभां केरे हवाले केरले, प्रार्थना घरन मां नेइतां मड्डले, त तुस मेरे वजाई सेइं गवर्नरन ते कने राजन कां खडे किये गाले, ताके तुस तैन केरे सामने मेरे गवाह भोथ। 10 पन इस युगरो अन्त भोनेरे पेइले एरू भोनू जरूरी आए कि परमेशररे राज्जेरे बारे मां खुशखबरी सैरी कौमां केरे लोकन शुनेई गाए।” 11 जैखन लोक तुसन नेइतां आदालतां केरे हवाले केरले, त पेइले फिक्र न केरथ त न सोचथ कि अस कुन ज़ोमेले, पन जैन किछ परमेशर तुसन तैस घड़ी ज़ोनेरे लेइ ज़ोवं गालू, तैन्ने ज़ोइयथ। किजोकि ज़ोनेबाले तुस नई, पन पवित्र आत्मा तुशे ज़िरिये ज़ोलो। 12 ढूला (जै मां पुइ विश्वास न केरे, तै) अपने ढूलाए मरानेरे लेई हवाले केरेलो। त बाजी भी अपने मट्टे तेन्चरां हवाले केरेलो, ते बच्चे अपने हाज-बच्चेरे खलाफ भोइतां तैनन मैरी छडेले। 13 मां पुइ विश्वास केरनेरे वजाई सेइं सारे लोक तुसन सेइं नफरत केरले, पन जै मरने तगर विश्वासे मां बनरो रालो, तैस परमेशर मुक्ति देलो। 14 तैल्ला पत्ती, यीशुए तैन सेइं ज़ोवं, “बड़ी बुरी गंदी चीज़, ज़ै नाश केरचे, एजनेबाली आए। तै भिट्टी चीज़ तैस जगाई पुइ खड़ी भोली, ज़ेड़ी तैसाख खडू भोनू जेइज नई। बडे पेइले दानिय्येले नेबे तैस चीज़ेरे बारे मां ज़ोरू थियू। (ज़ै कोई एन पडे, तै ए गल समझे।) जैखन तुस तै चीज़ी तैड़ी खड़ी लाएले, त तैखन ज़ैना लोक यहूदिया इलाके मां रातन, तैना बचनेरे लेइ पहाइन पुइ नेश्शी गान। 15 ते अगर कोई मैन्हु अपने घरेरे छते पुइ भोलो, त तै अकदम तैटां नेश्शी गाए, ते अपने घरेरां किछ नेने अन्तर न गाए (ताके वक्त बरबाद न भोए)। 16 ते अगर कोई मैन्हु ऊदारे मां कम केरि राओरो भोलो, त तै भी अकदम तैटां नेश्शी गाए। तै अपना लिगडां भी नेनेरे लेइ पत्रोवं न एज्जे। 17 तैन दिहाइन मां ज़ैना दोर्जीती त दुद्ध पियाती कुआन्शां भोली, तैन केरे लेइ अफ़सोस! (किजोकि तैन केरे लेइ बड़ी मुश्किल भोली।) 18 ते तुस प्रार्थना केरा कि एन हिंयूतडेरे दिहाइन मां न भोए। 19 किजोकि तैन दिहाइन मां लोकन बड़ी मुसीबत भोली, कि दुनितयारी शुरुआती केरां देती ज़ैन परमेशरे बनोरीए, अज़ तगर एरी मुसीबत नई ओरी। ते एरी ज़ेरी मुसीबत फिरी कथी न भोली।” 20 “अगर प्रभु परमेशर तैन मुसीबतेरी दिहाइन न घटाए, त कोई मैन्हु भी न बचलो। पन परमेशर अपने चुनोरे लोकां केरे वजाई सेइं तैन दिहाइन घटालो। 21 तैस मुसीबतेरे दिहाइन मां, अगर कोई तुसन सेइं ज़ोए कि, ‘तक्का, मसीह इड़ी आए!’ या ‘तक्का, उड़ी आए!’ त विश्वास न केरथ। 22 किजोकि झूठे मसीह ते कने झूठे नबी एज्जले। तैना लोकन धोखो देनेरे लेइ निशान ते कने चमत्कारेरां कम्मां हिराले, कि अगर भोइ सके, त तैना परमेशररे चुनोरे लोकन भी धोखो देले। 23 एल्हेरेलेइ, तुस होशियार राथ! हेरा, मां तुसन सैरी गल्लां भोनेरे पेइले ही ज़ोरिन।” 24 तैल्ला पत्ती, यीशुए तैन सेइं ज़ोवं, “तैन दिहाइन मां, तैस मुसीबतेरे वक्तेरे पत्ती, ‘दिहाडो कालो भोइ गालो, त चाँदनी लौ न देली, 25 त अम्बरेरां तारे बिछुडेने लग्गेले, त अम्बरेरी सैरी शक्ति हिल्लेली।” 26 “तैखन लोक मैनेरे मट्टे (यानी मां)

बड़ी शक्ति त कने बड़ी महिमा सेइं साथी धरती पुइ जो बिदलारी मां एजते हेरेले। 27 तैखन अवं अपने स्वर्गदूतन सारी दुनियार्ई मां भेजतां धरतारे हर पासेरां अपने चुनोरे लोकन अकोट्टे केरेलो।” 28 तैल्ला पत्ती, यीशुए तैन सेइं ज़ोवं, “फेगेरे बुटेरे मिसाले केरां अक सबक शिख्खा! जैखन तैसेरी डैलड़ी नरम भोइतां, त नंवां पट्लां निस्ने लगतन, ते तुस बुज्झी छुइतथ कि गेमेंरो मौसम एजनेबालो आए। 29 एसेरो ज़ेरो, जैखन तुस एना गल्लां, ज़ैना मां ज़ोई, भोते हेरेले, त तुस बुज्झी छुइ कि मैनेरू मट्टू, यानी अवं बडे नेडे पुज्जोरोई। 30 अवं तुसन सेइं सच ज़ोतई कि ज़ांतगर एना सैरी गल्लां न भोली, तांतगर एना लोक, ज़ैना हुन्ना जीतेन, तैना न मरेले। 31 अम्बर त कने धरती टेली गाली, पन मेरी गल्लां कथी न टेलेली।” 32 तैल्ला पत्ती, यीशुए तैन सेइं ज़ोवं, “मेरे वापस एजनेरे दिहाडेरे बारे मां, या तैस वक्तेरे बारे मां कोई भी न ज़ाने कि तै कताली भोलो, स्वर्गेरे स्वर्गदूते भी न ज़ानन् त परमेशररू मट्टू यानी अवं भी न ज़ैनी, पन सिर्फ मेरो बाजी परमेशर ज़ानते। 33 एल्हेरेलेइ, मेरे वापस एजनेरे लेइ हमेशा तियार राथ, ते प्रार्थना केरते राथ, किजोकि तुस न ज़ानथ कि तै वक्त कताली एज्जलो। 34 मैनेरे मट्टेरू, यानी मेरू वापस एजन् तैस मैनेरू ज़ेरू आए, ज़ै अपनू घर छेडतां होरे मुखे जो गाते। गाने केरां पेइले, तै अपने नौकरन कुजेइतां अपने घरेरी रखवाली केरनेरो अधिकार देते, ते हर एक्की अपनू-अपनू कम देते, त दारे पुइ रखवाली केरनेरे लेइ संत्री बींझो रानेरो हुकम भी देते, किजोकि तै कथी भी वापस एज्जी सकते।” 35 “एसेरे ज़ेरे, तुस भी हमेशा मेरे वापस एजनेरे लेइ तियार राथ, किजोकि तुस न ज़ानथ कि घरेरो मालिक यानी अवं कताली वापस एज्जेलो। शायद इलोझी या एध्धी राती या कुकडेरे बांग देनेरे मौके या झेज्झां। 36 एल्हेरेलेइ तियार राथ! एरू न भोए कि अवं अचानक एइतां लेई कि तुस तियार नई। 37 ज़ैन अवं तुसन सेइं ज़ोतई, तैन्ने सारे मैनन् सेइं भी ज़ोतई कि, ‘हमेशा तियार राथ!’”

14 फ़सहेरू तिहार त कने अखमीरी रोट्टारू तिहार दूई दिहाइन पत्ती एजनेबालां थियां। प्रधान याजक त कने शास्त्री मौको तोपने लगगोरे थिये कि अस यीशु केन्चरां चुपचारे ट्लाम ते तैस मैरी छड्डम। 2 पन तैनेई एप्पू मांमेई ज़ोवं कि, “अस तिहारेरे दिहाइन मां यीशुए कैद न केरम, किजोकि तैन दिहाइन मां बडे लोक चेब्रे पासन भोतन, ते एरू न भोए कि यीशुएरे कैद भोनेरे वजाई सेइं लोकन मां दंगोफसाद भोइ गाए।” 3 यीशु बैतनिय्याह इलॉव्वे मां शमौन नंवेरे मैनेरे घरे मां थियो, जैस पेइले कोद्रेरो रोग थियो। जैखन यीशु तैड़ी रोटी खेइ राओरो थियो, त तैखन अक कुआन्श संगमरमेरे सेइं बनोरे भांडे मां इत्र एन्तां यीशु कां आई, ज़ै बडो कीमती थियो त कने ज़ैस जो जटामासी ज़ोतन। तैसां तै इत्र बोतल ट्लोइतां खोल्ली ते यीशुएरी इज्जत केरनेरे लेइ तैसेरे दोगे पुइ इत्र उलटवा। 4 पन किछ मैन्हु, ज़ैना तैड़ी खडे थिये, तैस कुआन्शी हेरतां अपने दिले मां सेरकोइतां एप्पू मांमेई ज़ोने लग्गे, “ए कुआन्श किजो एस बड़ी कीमतारो इत्र ज़ाया केरचे? 5 ए इत्र त एक्की सालेरी मज़दूारे पेंडसन केरां भी जादे भाए मां बेचतां, ते तैना पेंडसे गरीब मैनन्

देइ सकती थी!” ते तैना सेरकोइतां तैस सेइं डांटेन लग्गे। 6 पन यीशुए तैन सेइं ज़ोवं, “एस छेड़ी देथ! एस किजो तंग केरतथ? एसां त मीं सेइं भलाई कियोरीए। 7 गरीब मैन्हु त हमेशा तुसन सेइं साथी रातन। ज़ैखन भी तुस चाथ, तैखन तैन सेइं भलाई केरि सकतथ, पन अवं तुसन सेइं साथी हमेशा न रालो। 8 ज़ैन किछ ए कुआन्श केरि सकती थी, तैन एसां कियूं। एसां मेरी जानी पुड खुशबूदार तेल लेइतां मेरे मरनेरां पेइली मेरी जान दबनेरे लेई तियार कियोरीए। 9 अवं तुसन सेइं सच ज़ोतई कि सैरी दुनियाई मां ज़ेड़ी कोन्ची मेरे बारे मां खुशखबरी लोकन शुनाई गाली, तैड़ी ज़ैन कम एसां मीं सेइं कियोरूप तैन भी एसेरी यादी मां ज़ोवं गालू।” 10 तैल्ला पत्ती, यहूदा इस्करियोती, ज़ै 12 चेलन मरां अक थियो, प्रधान याजकन कां जेव कि तै यीशु टलुवानेरे लेइ तैन केरि मदत केरे। 11 एन शुन्तां तैना बड़े खुश भोए, ते तैसेरे मदतरे लेइ तैनेई चैदरे रुपेइये देनेरो वादो कियो। एल्हेरेलेइ, तै ठीक मौके बलगने लगो कि यीशु केन्चरां सेइं टलुवाए। 12 अखमीरी रोट्टेरे तिहारेरी पेइली दिहाड़ी, ज़ैखन लोक फ्रसहेरे तिहारेरे गबड़े बलिदान केरते थिये, तैखन यीशुएरे चेलेई तैस पुच्छू, “तू कोडिं चातस कि अस गेइतां तेरे लेइ फ्रसह तिहारेरी रोटी तियार केरम?” 13 तैखन यीशुए अपने दूई चेले एन ज़ोइतां भेजे, “यरूशलेम नगरे मां गाथ, ते अक मैन्हु तुसन पैनेरो घड़ी छुवोरो मैलैलो, तैस पत्ती-पत्ती गेइयथ। 14 ते तै ज़ैस घरे मां गालो, तैस घरेरे मालिके सेइं तुस एन ज़ोइयथ कि, इश्शे गुरे ज़ोवरूप कि, ‘मेरे लेइ तियार कियोरो मेहमान कमरो कोडिं आए, ज़ेड़ी अवं अपने चेलन सेइं साथी फ्रसह तिहारेरी रोटी खेइ?’ 15 तैखन घरेरो मालिक तुसन दुइयोवं छती पुड, तियार कियोरो, अक बड्डो कमरो हिरालो। तैड़ी इश्शे लेइ रोटी तियार केरथ।” 16 ते चले तैइं निस्तां नगरे मां आए, त जेन्चरां यीशुए तैन सेइं ज़ोरू थियूं, तेन्चरां तैनेई लावं। ते तैनेई फ्रसह तिहारेरी रोटी तियार की। 17 ज़ैखन इलोइ भोइ, त यीशु अपने 12 चेलन सेइं साथी मेहमान कमरे मां अवं। 18 ज़ैखन तैना बिश्तां रोटी खेइ राओरे थिये, त यीशुए तैन सेइं ज़ोवं, “अवं तुसन सेइं सच ज़ोतई कि तुसन मरां अक, ज़ै मीं सेइं साथी रोटी खेइ राओरोए, मीं थोखे सेइं टलुवालो।” 19 एन शुन्तां तैना सारे चले उदास भोए, ते तैना अक-अक केरतां यीशु सेइं पुछने लग्गे, “कुन अवं आई? कुन अवं आई?” 20 यीशुए तैन सेइं ज़ोवं, “तै तुसन बारहन मरां अक आए, ज़ै मीं सेइं साथी बिश्तां इश्शी एक्की थैली मां रोटी खेइ राओरोए। 21 जेन्चरां मैनेरू मट्टू यानी मेरे बारे मां परमेशेरी किताबी मां लिखोरूप, तेन्चरां अवं मारो गानोई। अफ्रसोस! (किजोकि तैस मैन्हु बड़ी सज़ा मैलनीए एजने बालीए) जेसेरे वजाई सेइं मैनेरू मट्टू यानी अवं टलुवाव गानोई! अगर तै मैन्हु ज़रमोरो न भोथो, त तैसेरे लेई तैन भलू थियूं।” 22 ज़ैखन यीशु त तैसेरे चले फ्रसहेरी रोटी खेइ राओरे थिये, यीशुए अक रोटी टलेइतां परमेशेरू शुक्र केरतां टलोड़ी। तैल्ला पत्ती, तैनी तै अपने चेलन दिती, ते तैन सेइं ज़ोवं, “टलाथ ते खाथ। ई मेरो जिसम आए।” 23 फिरी यीशुए दाछारे रस्सेरो कटोरो टलेइतां परमेशेरू शुक्र कियूं। तैल्ला पत्ती, तैनी तै अपने चेलन दितो, ते तैनेई सैरेई पियो।

24 तैखन तैनी तैन सेइं ज़ोवं, “ए दाछारे रस मेरो खून आए, ज़ै परमेशेरू त कने लोकां केरे मझाटे नचवो करार बनाते, ज़ै बड़े लोकां केरे मैफारे लेइ बगाव गालो। 25 अवं तुसन सेइं सच ज़ोतई कि अवं दाछारो रस तैस दिहाड़ी तगर फिरी कधी न पीलो, ज़ांतगर परमेशेरे राज़े मां अवं नचवो दाछारे रस पीं। 26 तैल्ला पत्ती, यीशु त कने तैसेरे चले परमेशेरू भजन जोइतां, यरूशलेम नगरेरे बेइर ज़ैतून नचवेरे पहैड़ी पुड चले जे।” 27 तैखन यीशुए अपने चेलन सेइं ज़ोवं, “तुस सारे मीं छेइतां नश्शेले, किजोकि परमेशेरी किताबी मां लिखोरू कि, ‘अवं पुहाले मैरेलो ते तैसेरी भैइं इरां उरां नेशशी गाली।’ 28 पन अवं मेरतां मुइदन मरां फिरी ज़ोतो भोनोंई। तैल्ला पत्ती, अवं तुसन केरां पेइले गलील इलाके जो गालो त तैड़ी तुस मीं लाएले।” 29 तैखन पतरसे यीशु सेइं ज़ोवं, “अगर सारे तीं छेइतां नश्शेले त नश्शन, पन अवं कधे न नेशशेलो।” 30 यीशुए पतरसे सेइं ज़ोवं, “अवं तीं सेइं सच ज़ोतई कि अज्जेरी राती कुकड़ेरे दूई बार बांग देने केरां पेइले, तू टलाई बार मेरो इन्कार केरेलो कि तू मीं न ज़ानस।” 31 पन पतरसे मना ज़ोरे सेइं यीशु सेइं ज़ोने लगो, “अगर मीं तीं सेइं साथी मरनू भी पे, त फिरी भी अवं तेरो इन्कार कधी न केरेलो।” एन्चरां होरि चेलेई भी ज़ोवं। 32 तैल्ला पत्ती, यीशु ते तैसेरे चले गतसमनी नचवेरे एक्की बागी मां जे, ते तैड़ी यीशुए अपने किछ चेलन सेइं ज़ोवं, “इड़ी बिश्शोरे राथ, ज़ां तगर अवं प्रार्थना न केरि।” 33 फिरी यीशुए पतरस ते याकूब ते यूहन्ना एप्पू सेइं साथी बागी मां अगगर निये, ते तैड़ी तै बड़े परेशान भोने ते कने घबराने लगो। 34 ते तैखन यीशुए तैन सेइं ज़ोवं, “मेरो दिल बड़ो उदास आए, इड़ी तगर कि अवं मरनेबालोई। तुस इड़ी बलगा, ते बींझो राथ।” 35 फिरी तै बागी मां थोडो ज़ेरे अगगर गेइतां, तल्ले मां ज़ैनु केरे भारे बिश्तां प्रार्थना केरने लगो कि अगर भोइ सके त ए दुखेरी घड़ी मीं पुडेरं देली गाए। 36 ते तैनी प्रार्थनाई मां एन ज़ोवं, “बैपू! हे मेरे बाजी, तुसन केरां सब किछ भोइ सकते। एस दुखेरो कटोरो मीं केरां दूर केरा। फिरी भी ज़ैन अवं चाताई तैन नई, पन ज़ैन तुस चातथ तैन्ने भोए।” 37 फिरी तै अपने टलाई चेलन कां वापस अवं, त तैना झुल्लोरे मैल्ले, ते तैनी तैना बींझाए, त तैनी शमौन-पतरसे सेइं ज़ोवं, “हे शमौन, कुन तू झुल्लोरोस? कुन तू अक घड़ी भी बींझो न रेइ सकस?” 38 तैखन यीशुए तैन सैरेन सेइं ज़ोवं, “बींझे ते प्रार्थना केरते राथ ताके तुस अज़मैइशी मां न पेथ। तुस त अज़मैइश रोकनी चातथ, पन तुसन कां रोकनेरी ताकत नई।” 39 ते यीशु फिरी अपने चेलन केरां थोडे दूर चलो जेव, त ज़ैना गल्लां तैनी पेइले जोइतां प्रार्थना कियोरी थी, तैनां गल्लां दुबारां जोइतां प्रार्थना की। 40 ते फिरी वापस एइतां हेरू कि तैना चले झुल्लोरेन, किजोकि तैन एत्री निडली थी, कि तैन केरि एछछी भी न थी लोरी खुलने। ज़ैखन यीशुए तैना बींझाए, त तैना शरमाने लागे कि यीशुए कुन जुवाब देम! 41 फिरी टलेइयोवं बार गेइतां यीशुए प्रार्थना की ते वापस एइतां फिरी तैन सेइं ज़ोवं, “कुन तुस हेजू झुल्लोरेथ! बड्डू आए! हुनी घड़ी एज्जी जोरी! हेरा, मैनेरू मट्टू (यानी अवं) पापी मैन्हु केरे हथ्यन मां टलुवेइयोवं गानोई। 42 उठा, च़लम। हेरा! मीं टलुवानेबालो

नेडे पुज्जी जोरो!” 43 यीशु एन्ने जोई राओरो थियो कि अकदम यहूदा जै 12 चेलन मरां अक थियो, एप्पु सेईं साथी मैन्हु केरि अक बड्डी भीड एन्तां तैडी पुज्जी जेव, जैन कां तलवारां ते डंडे थियो. तैना प्रधान याजक ते शास्त्री लोक ते कने यहूदी लोकां केरे बुजुर्गा केरि तरफां यीशु कैद केरनेरे लेइ भेजोरे थियो. 44 यीशुएरो ट्लुवानेबालो यहूदा तैडी पुज्जे केरां पेइले, तैन मैन्न जो निशान दितोरो थियो कि जैस अवं फुम्मडी देलो तैए यीशु आए, तैस ट्लेइतां ध्याने सेईं नेइयथा. 45 जैखन यहूदा ते मैन्हु केरि भीड बागी मां आई, त तैनी अकदम यीशु सेईं ज़ोवं, “हे रब्बी (गुरु)” ते तैस फुम्मडी दित्ती. 46 तैखन तैनेईं यीशु ट्लेइतां कैद कियो. 47 यीशुएरे चेलन मरां, जैना तैसेरे नेडे खडे थियो, एक्के अपनि तलवारे सेईं महायाजकेरे एक्की नौकरे पुइ चलाई त तैसेरो अक कन केट्टी छुट्टो. 48 यीशुए तैन मैन्न सेईं ज़ोवं, “कुन तुस मीं डैकु समझतां ट्लानेरे लेइ तलवारां ते डंडे धिन्तां ओरेथ? 49 अवं त हर दिहाडी मन्दरे मां तुसन सेईं साथी रेइतां परमेशेरे बारे मां लोकन शिक्षा देतो थियो, पन तैखन तुसेईं अवं न ट्लाव. पन एन एल्हेरेलेइ भोने लग्गेरू कि पवित्रशास्त्रे मां मेरे बारे मां जैना गल्लां लिखोरिन तैना पूरी भोन.” 50 तैखन यीशुएरे सारे चले तैस छेइतां नेश्शी जे. 51 ते अक जवान ज़ैनी अपनि नग्गी जानी पुइ अक लिगड पलेट्टेरू थियू, यीशु पत्ती चलो. ते भीडी मरां किछ मैनेईं तै ट्लाव. 52 पन तै तैन केरे हथन मां अपनू लिगड छेइतां नग्गे नेश्शी जेव. 53 तैल्ला पत्ती, मैन्हु केरि भीडां यीशु महायाजकेरे घरे मां नीयो. ते सारे प्रधान याजक ते कने बुजुर्गा त कने शास्त्री यीशुएरू इमतिहान नेनेरे लेइ महायाजके सेईं साथी तैडी अकोट्टे भोए. 54 यीशु त कने मैन्हु केरि भीडी केरा दूर-दूर रेइतां पतरस तैन पत्ती-पत्ती महायाजकेरे महलेरे अंगने तगर पुज्जी जेव. ते तैडी तै महायाजकेरे पैरदारे सेईं साथी बिशतां अग तपने लगो. 55 मेहलेरे अन्तर, प्रधान याजक त कने सारी महासभा यीशुएरे खलाफ गवाही तोपनेरी कोशिश केरि राओरे थियो, ताके तैना तैस मैरी सकन, पन तैनन् किछ न मैल्लू. 56 किजोकि बडे मैन्हु यीशु पुइ झूठी गवाही देने लग्गोरे थियो, पन तैन केरि गवाही अक्कां ज़ेरि न थी. 57 आखरी मां किछ मैनेईं उठतां तैसेरे खलाफ ई झूठी गवाही दित्ती कि, 58 “असेईं एस केरां एन ज़ोते शुनेरू कि, ‘अवं मैन्हु केरू बनोरू एस मन्दरे बिछोइतां ट्लेइ दिहाइन मां होरू मन्दर बनालो, जैन मैन्हु केरू बनोरू न भोलू।” 59 पन एन ज़ोइतां भी तैन केरि गवाही अक्कां ज़ेरि न निस्सी. 60 तैखन महायाजके आदालतेरे मझाटे खडे भोइतां यीशु पुच्छू, “एना लोक तेरे खलाफ गवाही देतन, कुन तू कोई जुवाब नई देस?” 61 पन यीशु चुप राव, ते किछ जुवाब न दितो. तैखन महायाजके तैस फिरी पुच्छू, “कुन तू परमेशेरेरू मट्टू मसीह आस?” 62 यीशुए ज़ोवं, “हाँ, अवं तै आई. ते ज़ेन्चरां परमेशेरी किताबी मां लिखोरू कि ‘तुस सारे लोक, मैनेरू मट्टू (यानी मीं) सर्वशक्तिमान परमेशेरी देइने पासे बिशोरे त अम्बरे मरां बिदलारे सेईं साथी धेरती पुइ एजते हेरेले।” 63 तैखन महायाजके सेरकोइतां, अपना चोगो छिन्दतां आदालतेरे मैन्न सेईं ज़ोवं, “हुनी असन होरि केन्चेरी गवाहेरी ज़रूरत नई! 64 तुसेईं एप्पु परमेशेरी

तुहीन शुनी! ते तुस एसेरो कुन फैसलो केरतथ?” तैखन तैनेईं सारे मैनेईं ज़ोवं कि, “ए मैन्हु दोषी आए किजोकि एनी परमेशेरी तुहीन की, एल्हेरेलेइ, एस मौतरी सज़ा दे।” 65 तैखन तैन मरां किछ मैन्हु, तैसेरी बेजती केरनेरे लेइ, तैस पुइ थुकने लग्गे. ते किछ मैन्हु तैसेरी एछ्छी लिगडे सेईं ढेकतां तैस मुक्केईं बाने लग्गे ते तैस सेईं ज़ोने लग्गे, “भविष्यवाणी केर कि केनि तीं बाई!” ते नौकरेईं भी तैस ट्लेइतां थप्पड बाए. 66 ज़ैखन पतरस, महायाजकेरे महलेरे अंगने मां थियो, त महायाजकेरे नौकरेनन मरां अक कुआन्श तैडी आई. 67 तैसां पतरस अग तपतो लाव. ते तै कुआन्श पतरस तेकतां तैस सेईं ज़ोने लग्गी, “तू भी एस नासरत नगरेरो यीशु सेईं साथी थियो।” 68 पन पतरसे यीशुएरो इन्कार कियो ते ज़ोवं, “अवं न ज़ैनी ते न सेमझी कि तू कुन लगोरिस ज़ोने।” फिरी तै तैटां बेइर डेवढी मां जेव. तैखन कुकडे बांग दित्ती. 69 ज़ैखन तैसां नौकरेनां फिरी पतरस लव, त तै तैन सेईं, ज़ैना नेडे खडे थियो, ज़ोने लग्गी, “ए मैन्हु तैसेरे चेलन मरां अक आए!” 70 पन पतरसे फिरी यीशुएरो इन्कार कियो। थोडे चिरे बाद, ज़ैना पतरसेरे नेडे खडे थियो, तैनेईं तैस सेईं ज़ोवं, “पक्को तू भी तैसेरे चेलन मरां अक आस, किजोकि तू गलील इलाकेरो मैन्हु भी आस।” 71 तैखन पतरस कसम केरतां ज़ोने लगो, “मीं फिटकार लग्गे, अगर अवं झूठ ज़ोई कि अवं एस मैन्हु ज़ानतो भोई, ज़ेसेरे बारे मां तुस गल्लां केरने लग्गोरेथ!” 72 तैखन अकदम दुइयोवं बार कुकडे बांग दित्ती। ज़ै गल यीशुए पतरसे सेईं पेइली ज़ोरी थी, तै गल तैस याद आई कि, “कुकडेरे दूई बार बांग देने केरां पेइले तू ट्ललाई बार मेरो इन्कार केरेलो कि तू मीं न ज़ानस।” तैखन तैनी बडी लेरां दित्ती, किजोकि तैनी यीशुएरो इन्कार केरनेरे वजाई सेईं बडी दुखी भोव।

15 झेज्ज भोते, अकदम प्रधान याजकेई, ते यहूदी लोकां केरे बुजुर्गेई, ते कने शास्त्री लोकेई ते कने सारे महासभारे मैनेईं यीशुएरे खलाफ सलाह केरतां तै बन्धाव ते तैटां नेइतां रोमी गवर्नर पिलातुसेरे हवाले कियो। 2 पिलातुसे यीशु पुच्छू, “कुन तू यहूदी लोकां केरो राजो आस?” यीशुए तैस जुवाब दित्तो, “तू एप्पु ज़ोई राओरोस।” 3 तैखन प्रधान याजक तैस पुइ बेडि गल्लां केरो झूठो इलज़ाम लेइ राओरे थियो. पन यीशुए किछ न ज़ोवं। 4 पिलातुसे तैस फिरी पुच्छू, “तू किछ भी जुवाब की न देस? हेर, एना लोक तीं पुइ केत्री गल्लां केरो इलज़ाम लेइ राओरेन!” 5 हांलाकि यीशुएरी किछ भी गलती न थी, तैनी किछ जुवाब न दित्तो, इडी तगर कि पिलातुस बडो हैरान भोव। 6 हर साल फ्रसह तिहाररे वक्ते पुइ यहूदी लोकां केरे लेइ केन्ची एक्की कैदी, जैस तैना लोक चाते थियो तैस पिलातुस छेडी देतो थियो। 7 तैन दिहाइन बरअब्बा नन्वेरो अक मैन्हु किछ दंगेफसाद केरनेबालन सेईं साथी कैदखाने मां थियो, ज़ैनेईं दंगेफसादे मां कत्ल कियोरो थियो। 8 तैखन मैन्हु केरि भीड पिलातुसे कां गेइतां मिन्नत केरने लग्गी कि, “ज़ैन तू इश्शे लेइ हर साल केरतो ओरोस तैन्ने केर।” 9 पन पिलातुसे तैनन् पुच्छू, “तुस

कुन चातथ कि अवं तुशुशे लेइ यहूदी केरे राजे यानी तुशुशे राजे छेड्डी देई?" 10 पिलातुसे लोकन एन्चरं पुच्छू, किजोकि तै ज्ञानतो थियो कि प्रधान याजक यीशु पुड़ जलतन तांए तैनेई तै दलुवोरोए। 11 पन प्रधान याजकेई लोक बमकाए, ताके पिलातुस तैन केरे लेइ यीशुएरे बदले बरअब्बा छेड्डी दे। 12 एन शुन्तां पिलातुसे लोकन फिरी पुच्छू, "अगर अवं बरब्बे छेड्डी देई, त जैस तुस यहूदी लोकां केरो राजो जोतथ, तैसेरु अवं कुन केरि?" 13 तैना पिलातुसे सेइं फिरी शोर केरतां ज़ोने लग्गे कि, "एस कूसे पुड़ चाढ़!" 14 पिलातुसे तैनन पुच्छू, "किजो ए कूसे पुड़ चाढ़नो, एनी कुन बुराई कियोरीए?" पन तैना लोक पेइले केरां जादे शोर केरने लग्गे कि, "एस कूसे पुड़ चाढ़!" 15 तैखन पिलातुसे लोक खुश केरनेरे इरादे सेइं, बरअब्बा तैन केरे लेइ छेड्डी दित्तो, ते यीशु कोडे लुवेइतां सिपेही केरे हवाले कियो कि तैना यीशु कूसे पुड़ चाढ़न। 16 तैखन सिपाही यीशुए पिलातुसेरे महल्लेरे अंगने मां नेइ जे, जैस जो प्रीटोरियम जोतन। ते तैनेई सारी रोमी पलटन कुजेइतां आनी। 17 तैखन तैनेई यीशुएरो मज़ाक बनानेरे लेइ तैसेरां लिगड़ां खोल्लां, ते तैस लाल रंगेरो चोलो लुवाव ते कने कंटां केरु ताज बनेइतां तैसेरे दोगे पुड़ रखवू। 18 ते एन ज़ोने लग्गे कि, "हे यहूदी केरा राजा, नमस्कार!" 19 तैना यीशुएरे दोगे पुड़ अक्केरे पत्ती अक केरतां सोटी सेइं बाने लग्गे, ते तैसेरी बेजती केरनेरे लेइ तैस पुड़ थुकने लग्गे, ते मज़ाक बनानेरे लेइ तैसेरे अगगर जैन्धु केरे भारे बिश्तां तैस नमस्कार केरते राए। 20 तैसेरो मज़ाक बनानेरे पत्ती, तैनेई तैस पुड़ेरां लाल रंगेरो चोगो खोल्लां तैसेरां लिगड़ां लुवां। तैखन तैना यीशु कूसे पुड़ चाढ़नेरे लेइ यरुशल्लेमेरे नगरे केरां बेइर नीयो। 21 ज़ताली तैना तैदां चेलि राओरे थिये, त तैखन शमौन नंवेरो मैन्हु इल्लोव्वेरां तैलमेइं एज्जी राओरो थियो। तै मैन्हु कुरेनी नंवेरे नगरेरां ओरो थियो ते तै सिकन्दर ते कने रूफुसेरो बाजी थियो। तैखन सिपाहेई शमौन मजबूर कियो कि तै यीशुएरे लेइ तैसेरी कूसे छुइतां चले। 22 ते तैनेई यीशु गुलगुता नंवेरी ठैरी पुड़ आनो, जेसेरो मतलब "खोपड़ारी ठार" आए। 23 फिरी किछ लोकेईं मुर् नंवेरी दवाई, दाछारे रस्से मां मिलेइतां यीशु पीने जो दित्ती, पन तैनी तैसेरो इन्कार केरतां न पी। 24 तैखन तैनेई यीशु कूसे पुड़ चाढ़ो ते तैसेरां लिगड़ां केरे लेइ पेरची छेड्डी कि तैसेरां लिगड़ां केस मैलतन। तैल्ला पत्ती, तैनेई तैसेरां लिगड़ां बेन्टी छुइतां। 25 जैखन तैनेई तै कूसे पुड़ चाढ़ो, तैखन झेइंजेरे नौ बज़ारे थिये। 26 ते एक्की फेटी पुड़ तैसेरी सज़ारी वजा लिखतां तैसेरे क्रोडी केरां बां लेइ छेड्डी। तैस मां लिखोरु थियूं कि, "ए यहूदी लोकां केरो राजो आए।" 27 सिपाहेई यीशु सेइं साथी होरे दूई डैकू भी, अक तैसेरे देइने पासे ते अक तैसेरे बाए पासे अलग-अलग कूसन पुड़ चाढ़े। 28 तैखन परमेशेरी किताबी मां लिखोरी गल पूरी भोइ। तैस मां मसीहरे बारे मां एरु लिखोरु थियूं कि, "ते पापी मैन्हु केरे साथी गनो गालो।" 29 तैखन बत्तां चलनेबालन मरां किछ मैन्हु अपनि क्रोडी हिलेइ-हिलेइतां ते कने एन ज़ोइतां तैसेरी तुहीन केरते थिये कि, "वाह! वाह! मन्दर बिछोइनेबालो, त कने ट्लेइ दिहाइन मां बनानेबालो! 30 अगगर तू

शक्तिशाली आस त कूसे पुड़ेरां ओस्तां अपने आपे बच्चा।" 31 एन्चरं प्रधान याजक भी शास्त्री लोकन सेइं साथी तैसेरो मज़ाक बनेइ राओरे थिये, त तैना एप्पू मांमेइं ज़ोते थिये कि, "एनी होरे मैन्हु त बच्चाए, पन अपने आपे बच्चे न सको। 32 ए ज़ोरो थियो कि 'अवं इस्राएल लोकां केरो राजो आई, यानी मसीह आई,' अगर ए गल सच्च आए त हुन्ना कूसे पुड़ेरां ओस्से, ताके अस हेरतां विश्वास केरम कि ए इशुशो राजो आए।" त दूई डैकू, जैना तैस सेइं साथी कूसे पुड़ चाढ़ारे थिये, तैनेई भी तैसेरी बेजती की। 33 दीसारे बारे बजेईं सारे मुल्ले मां आंधरु भोवं, ते ट्लेइ बज्जन तगर रावं। 34 ट्लेइ बजेईं यीशुए बडी ज़ोरे सेइं अपनि बोली मां ज़ोवं कि, "इलोई, इलोई, लमा शबकनी!" जेसेरु मतलब, "हे मेरे परमेशर, हे मेरे परमेशर, तीं किजो अवं छेड्डी दित्तो!" 35 तैखन जैना तैडी नेडे खडे थिये, तैन मरां किछ मैनेई एन शुन्तां गलत सेमझतां एप्पू मांमेइं ज़ोवं, "हेरा, ए मैन्हु एलिय्याहे जो मद्दत केरनेरे लेइ कुजेई राओरोए।" 36 तैखन तैन मरां एक्की मैने दौइतां स्पन्जे (जै पेनेरी ज़ेरि चीज़ चूसी सकचे) खट्टे दाछारे रस्से मां डुबेइतां डांगी पुड़ रेखतां यीशु जो चुसावं त ज़ोवं, "बलगा, हेरम, एलिय्याहे एस कूसे पुड़ेरां उसालने एजते कि नई।" 37 तैखन यीशुए बडे ज़ोरे सेइं आवाज़ देइतां प्राण दित्तो। 38 ते तैखन मोट्टो पर्दो, जै मन्दरे मां लोरो थियो, बां देता बुन तगर फेटतां दूई टुकडे भोइ जे। 39 जैखन फौजी-अफसर, जै यीशुएरे सामने खडो थियो, यीशु एन्चरं ज़ोरे सेइं आवाज़ देइतां प्राण देतो लाव, तैखन तैनी ज़ोवं, "सच्चे, ए मैन्हु परमेशेरु मट्टू थियूं!" 40 किछ कुआन्शां भी दूरेरां एन हेरी राओरी थी। तैन मां मगदलीन नगरेरी मरियम, निकडो याकूब ते योसेसेरी अम्मा मरियम, त कने सलोमी भी थी। 41 जैखन यीशु गलील इलाके मां थियो, त तैखन एना कुआन्शां तैस पत्ती-पत्ती चेलती थी त तैसेरी सेवा केरती थी। त तैडी होरि भी बडी कुआन्शां थी, जैना तैस सेइं साथी गलील इलाके मरां यरुशल्लेम नगरे मां ओरी थी। 42 जैखन इलोइ भोइ, ते एल्हेरेलेइ कि तै तिहारेरी दिहाडी थी, यानी आरामेरे दिहाडेरे पेइली दिहाडी जैखन लोक आरामेरी दिहाडेरे लेइ तियार भोते थिये, त तैखन 43 अरिमतियाह नगरेरो रानेबालो यूसुफ नंवेरो मैन्हु तैडी अव, जै यहूदी लोकां केरे बड्डे आदालतेरे खास मैनन् मरां अक थियो। तै एप्पू भी परमेशेरे राजे बलगने लोरो थियो। तै मैन्हु हिम्मत केरतां गवर्नर पिलातुसे कां जेव ते यीशुएरी लाश मग्गी, ताके तै तैस दबनेरे लेइ ने। 44 तैखन पिलातुस हैरान भोव कि केन्चरं तै एत्री लूशी मेरि जेव। त तैनी फौजी-अफसर कुजेइतां पुच्छू, "कुन ते मेरि जोरोए?" 45 जैखन तैनी फौजी-अफसरे केरां हाल जानो कि यीशु सच्चे मेरि जेव, त तैनी यूसुफे लाश नेनेरी अज़ाज़त दित्ती। 46 तैखन यूसुफे अक कीमती लिगड़ घिन्नु ते यीशुएरी लाश कूसे पुड़ेरां ओसैलतां यहूदी लोकां केरि रसमेरे मुताबिक तैस लिगड़े मां पलेटतां एक्की कब्री मां छेड्डी, जै पहैडी पुड़ एक्की घोडे मां घडोरी थी। त तैस कब्रेरे बेइर दारे पुड़ अक बड्डो घोड़ घिसेइतां छुइतो। 47 मगदलीन इल्लेरी मरियम, ते योसेसेरी अम्मा मरियम, एना दुइये हेरी राओरी थी कि यीशुएरी लाश कोइ रेखतन।

16 होरसां डलोझी, ज़ैखन आरामेरी दिहाड़ी खतम भोरी थी, त तैखन मगदलीन डलंवेरी मरियम, त कने याकूबेरी अम्मा मरियम, त कने सलोमी, एन सेब्भेई रोडी मुशकी बालो तेल आनो, ताके यहूदी लोकां केरि रसमेरे मुताबिक यीशुएरी लाशी पुड़ तेल लान। 2 हफतेरे पेड़ले दिहाड़े झेज़्ज़ां-झेज़्ज़ां, ज़ैखन मसां दिहाड़ो निस्सी राओरो थियो, त तैना कब्री कां जेई ज़ैस मां यीशुएरी लाश रखोरि थी। 3 तैखन तैना एप्पू मामेइं ज़ोती थी, “इश्शे लेइ कब्रेरे दारे पुड़ेरां घोड़ कौन गिसालो?” 4 किजोकि तै घोड़ बडो बड्डो थियो। पन तैड़ी पुज़नेरे बाद, तैनेई कब्रेरे पासे उब्री तक्कू त हेरू कि घोड़ पेड़लो कब्रेरे दारे पुड़ेरां गिस्सोरो थियो। 5 तैनेई कब्रेरे अन्तर गेइतां अक जवान लाव ते तैना बेडि हैरान भोइ जेई। तैस छित्तां लिंगडां लेगगोरां थियां, ते तैड़ी तैन केरे सिध्दे पासे बिश्शोरो थियो। 6 तैनी जवाने तैन सेइं ज़ोवं, “डरा न, अव ज़ानताई कि तुस नासरत नगरेरे यीशु तोप्पी राओरिथ, ज़ै क़ूसे पुड़ च़ादरो थियो। तै मुडदन मरां ज़ीतो भोरोए। तै इडी नई। हेरा, ई तैए ठार आए, जेड़ी तैसेरी लाश रखोरी थी। 7 पन तुस गेइतां तैसेरे चलन सेइं त कने पतरसे सेइं भी ज़ोइयथ कि यीशु तुसन करां पेड़लो गलील इलाके जो गालो। ज़ेन्चरां तैनी पेड़लू तुसन सेइं ज़ोरू थियूं, तेन्चरां तुस तैस तैड़ी लाले।” 8 तैना कुआन्शां कब्री मरां बेडर निस्तां तैट्ठां नेश्शी जेई, किजोकि तैनन् थर्क लग्गोरी त घेबरोरी थी। बत्तां तैनेई केन्वी सेइं किछ न ज़ोवं, किजोकि तैना डेर्री थी। 9 (note: The most reliable and earliest manuscripts do not include Mark 16:9-20.) हफतेरे पेड़ले दिहाड़े झेज़्ज़ां भोते, यीशु मुडदन मरां ज़ीतो भोइतां पेड़ले मगदलीन नगरेरी मरियमी लेइहोव, ज़ैस मरां तैनी पेड़लां सत भूतां केरो सायो कड्डोरो थियो। 10 मरियमां यीशु लानेरे पत्ती, गेइतां तैसेरे चलन खबर दित्ती, ज़ैना यीशुएरे लेइ शोग केरने लग्गोरे ते कने लेरां देने लग्गोरे थिये। 11 पन ज़ैखन तैनेई तैसारी गल शुनी कि यीशु फिरी ज़ीतो भोरोए ते तैसां लेवरोए, त तैनेई तैसारी गल्ली पुड़ याकीन न कियूं। 12 तैल्ला पत्ती, यीशु अपने चलन मरां दूई चलन होरि रूपे मां लेइहोव, ज़ैखन तैना (यरूशलेम) नगरेरां अपने इलांवे जो च़लोरे थिये। 13 तैखन तैनेई भी नगरे वापस एजतां यीशुएरे होरे चलन खबर दित्ती, पन तैनेई तैन केरि गल्लारो भी विश्वास न कियो। 14 तैल्ला पत्ती, यीशु अपने 11 चलन भी लेइहोव, ज़ैखन तैना रोटी खेइ राओरे थिये। त तैन केरे अविश्वास त कने सखत दिलेरे वजाई सेइं यीशुए तैना डांटे, किजोकि तैनेई तैन केरो विश्वास न कियो, ज़ैनेई यीशु ज़ीतो भोनेरे पत्ती तै लेवरो थियो। 15 यीशुए अपने चलन ज़ोवं, “तुस सैरी दुनियाई मां गेइतां सारे लोकन मेरे बारे मां खुशखबरी शुनाथ। 16 ज़ै कोई मीं पुड़ विश्वास केरे ते बपतिस्मो ने, तैस पापां केरि सज़ाई करां मुक्ति मैलेली। पन ज़ै कोई विश्वास न केरे, तैस अपने पापां केरि सज़ा मैलेली। 17 ज़ैना मीं पुड़ विश्वास केरतन, तैना एरां चमत्कारेरां कम्मां (निशाना) केरले कि तैना मेरे नंवे सेइं लोकन मरां भूतां केरो सायो कढेले, ते नंवी-नंवी बोली केरले। 18 ते अगर तैना ज़ेहरीले सप्पन ट़लाले त कने ज़ेहरीली चीज़ भी पीले, तांभी तैनन् किछ नुकसान न भोलो। ते ज़ैखन तैना

बिमारन पुड़ हथ रखेले, ते तैना बेज़्ज़ोइ गाले।” 19 यीशु अपने चलन सेइं गल्लां केरनेरां पत्ती, परमेशरे तै स्वर्ग जो नीयो। ते यीशु परमेशरेरे देइने पासे राज़गेद्वी पुड़ बिश्शी जेव। 20 ते यीशुएरे चेलेई बेडर हर जगाई गेइतां लोकन खुशखबरी शुनाने लग्गे। ते प्रभु तैन सेइं साथी कम केरतो राव। तैना चमत्कारेरां कम्मां (निशानन) केरे ज़िरिये, ज़ैना साथी-साथी भोतां थियां, प्रभु साबत केरतो राव कि तैन केरि गल्लां सच़ आन। आमीन।

लूका

1 जनाब थियुफिलुस, बड़े लोकेई तैना गल्लां हेरी जैना प्रभु-यीशुए कियोरी थी, जैखन तै असन सेइं साथी थियो, जेइसेरां तैनी अपनू सेवारू कम शुरू कियोरू थियूं। तैन मैनेई होरि मैनु यीशुएरे बारे मां शिक्षा देइतां परमेशेरी सेवा की। बड़े मैनेई तैन केरि गल्लां शुन्तां यीशुएरे बारे मां इशे लेइ इतिहासेरी किताब लिखी। 3 मीं एप्पू तैन सैरी गल्लां केरि बड़े रोडेचारे छानबीन की। एल्हेरेलेइ, मीं एन रोडू लग्गू, कि अवं भी तुशे लेइ तैन गल्लां केरे बारे मां ठीक डंगे सेइं इतिहासेरी किताब लिखी। 4 अवं चाताई कि तीं पतो लग्गे कि यीशुएरे बारे मां तैना गल्लां सच्च्री आन, जैन केरे बारे मां तुसन शिक्षा मैल्लोरी थी। 5 यहूदिया इलाके मां, जैखन हेरोदेस राजो राज़ केरतो थियो, त तैखन जकर्याह नंवेरो अक यहूदी याजक थियो। तै मैन्हु याजकां केरे टोली मां अबिय्याह नंवेरो टोली मरां थियो। तैसेरी कुआन्शा नवं एलीशिबा थियूं। एलीशिबा हारूनेर खानंदेनी मरां थी, (हारून इस्राएल लोकां केरो पेइलो याजक थियो)। 6 तैना दुइये प्रभु-परमेशेरी नजरी मां धर्मी थियां ते कने परमेशेरे सारे कानून ते सारे हुकमन पुइ बेइलजाम चलनेबालां थियां। 7 पन तैन केरि कोई औलाद न थी, किजोकि एलीशिबा बाँझ थी, ते तैना दुइये बुढ़ां थियां। 8 एक्की फेरे, जकयहिरी टोली यरूशलेम नगरेरे मन्दरे मां सेवारू कम केरि राओरे थी, तैखन तै प्रभु परमेशेरी हजरी मां अपनू याजकेरू कम लोगोरो थियो केरने। 9 याजकां केरे रीतरे मुताबिक तैनेई परची छेडतां जकयहिह चुनो कि तै प्रभु-परमेशेरे मन्दरे मां गेइतां गुग्गल बाले। 10 जैखन तै गुग्गल बालने लोरो थियो, त तैखन मैन्हु केरि सारी भीड़ मन्दरेरे बेइर प्रार्थना केरि राओरी थी। 11 तैखन अचानक प्रभु-परमेशेरो अक स्वर्गदूत गुग्गल बालनेरी ठाररे देइने पासे खड़े भोइतां जकयहिह लेइहोव। 12 जैखन जकयहिह स्वर्गदूत लाव, त तै घेमरोव ते बड़ो डेरि जेव। 13 पन स्वर्गदूते तैस सेइं ज़ोवं, “हे जकयहिह, न डर! जैखन तीं प्रार्थना की, त परमेशेरे तेरी प्रार्थना शुनी। एल्हेरेलेइ, तेरी कुआन्श एलीशिबाई मट्टू भोनूए, ते तू तैसेरू नवं यूहन्ना रेख्खां। 14 तैसेरे जर्म भोने सेइं तू बड़ो खुश भोलो। त बड़े लोक भी खुश भोले। 15 तै प्रभु-परमेशेरी नजरी मां महान भोलो, ते तैनी कान्ची भी किसमेरी नशे बाले चीज़ त कने शराब कधे न लोड़े पियोरी, ते तै अपनि अम्मारे पेटे मां भोते वक्तेरां परमेशेरी पवित्र आत्मारी शक्ति सेइं भरपूर भोलो। 16 तै इस्राएली लोकन मरां बड़े लोक परमेशेरे पासे जै तैन केरो प्रभु परमेशेरे वापस तैस कां आनेलो, जैना अपने पापां केरि वजाई सेइं परमेशेरे करां दूर भोरे थिये। 17 ते तै एरो मैन्हु भोलो जैस पुइ एलिय्याहरी आत्मा ते कने शक्ति भोली। तै परमेशेरी बत तियार केरेलो, तैस अग्री-अग्री चलेलो ताके हाज बच्चां केरो दिल औलादरे पासे ते परमेशेरे न मन्नेबाले लोकन धेर्मी लोकां केरे बत्तां केरे पासे बदलेलो, ताके जैखन प्रभु एज्जे त लोक तियार भोन।” 18 जकयहिह स्वर्गदूते पुच्छू, “अवं केन्चरे मेन्नी एन असन सेइं भोनूए, अवं त बुढोइं ते मेरी कुआन्श भी बुढी भोरीए।”

19 स्वर्गदूते जुवाब दितो, “अवं जिब्राईल आई अवं परमेशेरे कां खडो भोताई, अवं एल्हेरेलेइ भेजोरोई, कि अवं तीं सेइं गल केरि ते तीं ए खुशखबरी शुनेई। 20 ते हेर ज़ां तगर एना गल्लां पूरी न भोन तेरी ज़बान बंद भोली, ते तू गल न केरि सकेलो किजोकि तीं मेरी गल्लां केरू याकीन नई कियेरू जैना अपने वक्ते पुइ पूरी भोनिन।” 21 ते जैखन जकयहिह ते स्वर्गदूत मन्दरे मां गल्लां लोरे थिये केरने त लोक मन्दरेरे बेइर अंगने मां जकयहिह बलगने लोरे थिये, तैना बड़े हैरान भोइजेइ कि जकयहिह मन्दरे मां एत्रू चिरि किजो लाव। 22 जैखन तै बेइर निस्सो, त तै कुजी न बटो ते तैन लोकेई बुझी छूइ, कि एनी मन्दरे मां किछ दर्शन लाहेरूए किजोकि तै इशारो केरतो थियो, पन कुजी न थियो बटतो। 23 जेइस यरूशलेम नगरेरे मन्दरे मां जकयहिहए एक्की हफतेरे याजकेरी सेवारू कम पूरू भोवं, त तै अपने घरे जो चलो जेव। 24 किछ वक्तेरां बाद तैसेरी कुआन्श एलीशिबा दोर्जीतीए भोइ, ते तै पंच महीन तगर बेइर लोकन मां न जेई। तैसां ज़ोवं, 25 “प्रभुए मीं पुइ दया केरतां केत्रू महान कम कियूं, ते अवं दोर्जीती भोइ, ते जैस गल्लरे वाजाई सेइं लोक मीं घटिया समझते थिये, ते गल दूर की।” 26 एलीशिबारे दोर्जीती भोनेरे शेइयोवं महीने जिब्राईल स्वर्गदूत परमेशेरी तरफां गलील इलाकेरे नासरत नगरे मां, 27 एक्की अड्लेई कुइये कां भेजो। तैसारी कुइमाइ दाऊदरे खानदाने मरां एक्की मड्डे सेइं भोरी थी जेसेरू नवं यूसुफ थियूं, ते तैस कुइयेरू नवं मरियम थियूं। 28 स्वर्गदूते तैस कां एइतां ज़ोवं, “आनन्द ते ज़ीत तेरी भोए, तीं पुइ परमेशेरी बड़ी दया भोरीए, प्रभु तीं सेइं साथिये!” 29 मरियम स्वर्गदूतेरी गल शुन्तां परेशान भोइतां सोचने लगी एन केरहु नमस्कारे? 30 स्वर्गदूते तैस सेइं ज़ोवं “हे मरियम, डर न, किजोकि परमेशेरो तीं पुइ बड़ो अनुग्रह भोरोए। 31 तू दोर्जीती भोली तीं अक मट्टू भोलू, ते तू तैसेरू नवं यीशु रेखां। 32 तैन महान भोलू ते तैस जो परमप्रधान परमेशेरेरू मट्टू ज़ोले, ते परमेशेरे तैस तैसेरे पूर्वज दाऊद राज़ेरू जेरो राजो बनालो। 33 ते तै याकुबेरे खानदाने पुइ हमेशा राज़ केरेलो, ते तैसेरू राज़ कधे खतम न भोलू।” (aiōn g165) 34 मरियमा स्वर्गदूते पुच्छू, “एन केन्चरे भोइ सकते? अवं त अड्लेई आई।” 35 स्वर्गदूते जुवाब दितो, “पवित्र आत्मा तीं पुइ उतरेलो, ते परमप्रधान परमेशेरी शक्ति तीं पुइ सैयो केरेली एल्हेरेलेइ ते बच्चो जै जर्मएलो ते पवित्र भोलो तैस जो परमेशेरेरू मट्टू ज़ोले। 36 ते हेर तेरी रिशतेदार एलीशिबाई भी बुढे बारे मट्टू भोने बालूप तैस जो लोक बाँझ ज़ोते थिये, तैस दोर्जीती शा महीने भोरेन। 37 किजोकि परमेशेरे लेइ किछ भी नमुमकिन नई।” 38 मरियमा स्वर्गदूते जुवाब दितो, “अवं परमेशेरी सेवा केरती जैन तीं ज़ोरूप तैन भोए।” तैखन स्वर्गदूत तैस करां चलो जेव। 39 किछ दिहाइन पत्ती मरियम तियार भोइतां यहूदियारे इलाकेरे एक्की पहाड़ी नगरे मां जेई। 40 ते जकयहिहरे घरे मां गेइतां एलीशिबा जो नमस्कार कियूं। 41 जैखन एलीशिबा मरियमारू नमस्कार शुनू त बच्चो तैसारे पेटे मां उछड़ने लगे ते एलीशिबा पवित्र आत्माई सेइं भेरोई जेई। 42 ते बड़े ज़ोरे सेइं ज़ोने लगी, “तू कुआन्शन मां धन आस ते जै बच्चो तीं ज़ानोए तै भी

धने! 43 ते मेरे लेइ बडी इज्जतरी गल आए कि, मेरे प्रभुएरी अम्मा मीं कां आई! 44 किजोकि हेर जेरि तेरे नमस्कारेरी आवाज मीं शुनी त बच्चे खुशी सेइं मेरे पेटे मां छालां लगे मारने। 45 तू धन आस तीं तैन गल्लन पुड़ विश्वास कियो जैना प्रभुए तीं सेइं जोई कि, तैना पूरी भोली।” 46 ते मरियमा जोवं, “अवं प्रभुएरी तारीफ़ करती। 47 ते मेरी आत्मा मेरे मुक्ति देनेबाले परमेशरे सेइं खुशी भोइ। 48 किजोकि तैनी अपनि सेवा केरने बैलरी गिरोरी हालती पुड़ नज़र की, अजेरां देइतां हर ज़मानेरे लोक मींजो धन ज़ोले। 49 किजोकि परमेशरे मेरे लेइ बड़ा-बड़ां कम्मां कियोरन ते तैसेरू नवं पवित्र भोए। 50 तैसेरी दया तैस करां डरने बालन पुड़ पीड़ी-पीड़ी तगर राचे। 51 तैनी अपने शक्ति सेइं बड़ां-बड़ां कम्मां कियोरन तैनी घमण्डी तितर-बितर कियो। 52 तैनी राजे राज़ केरने करां रोके, ते तैनी नग्र लोकन आदर दिती। 53 तैनी नियन्ने रोड़ी-रोड़ी चीजेइं सेइं रज़ाने ते धन दौलती बाले खाली हथेइं भेजे। 54 तैनी अपने वादे जैना तैनी इश्शे दादन-पड़दादन सेइं कियोरे थिये याद कियो, तैनी अपनि सेवा केरनेबाले इस्राएली लोकां केरि मद्दत की, 55 तैनी हमेशारे लेइ अब्राहमे पुड़ ते तैसेरी औलादी पुड़ दया केरनि याद रखबी।” (aiōn g165) 56 मरियम कोई ट्लाई महीन्न तगर एलीशिबा सेइं साथी राई ते फिरी अपने घरजो आई। 57 एलीशिबारे गल्हे बिशनेरो वक्त एज्जी अव ते तैस मट्टू भोवं। 58 तैसारे आसेपासेरे रिशतेदारें एन शुनु कि परमेशरे तैस पुड़ बडी दया कियोरियो ते तैस सेइं साथी खुशी मनाई। 59 अठोवं दिहाड़े तैना मट्टेरो खतनो केरने आए, ते तैना तैसेरू नवं तैसेरे बाजी केरे नव्वे पुड़ जकर्याह रखनू चाते थियो। 60 पन तैसेरी अम्मा ज़ोने लगी, “नई एसेरू नवं यूहन्ना भोलू।” 61 किछ तैस जो ज़ोने लगे, “तुश्शी खानदेनीं मां कोई भी एस नव्वेरो नई।” 62 तैखन तैन लोकेईं जकर्याहरे पासे इशारे सेइं पुच्छू कि तू मट्टेरू नवं कुन रखनू चातस? 63 ते तैनी पटारी मगी ते तैस पुड़ लिखू, “एसेरू नवं यूहन्ना आए,” ते सब लोक हैरान रेइजे। 64 तैखने तैसेरी ज़िभ खुल्ली ते जकर्याह गल्लां लगे केरने ते परमेशरेरी तारीफ़ केरने लगी। 65 ते आसे-पासेरे लोक एस तमाशे हेरतां हैरान रेइजे, ते यहूदियारे इलाकेरे एककी पहाड़ी नगर मां एस गल्लरी चरचा भोने लगी। 66 ते शुन्ने बाले अपने-अपने मन्न मां सोचते थियो, “एन मट्टू बड्डू भोइतां केरहु भोनूए?” किजोकि परमेशरेरी शक्ति अज़्जेरी देतीं एस सेइं साथीए? 67 तैखन तैसेरो बाजी जकर्याह पवित्र आत्माई सेइं भेरोवं ते भविष्यवाणी केरने लगी। 68 “प्रभु इस्राएलेरो परमेशर धन भोए, किजोकि तैनी एइतां अपने लोकन मुक्ति दितोरियो। 69 ते तैसेरे दास दाऊदरे घराने मरां इश्शे लेइ अक मुक्ति देनेबालो भेजेरोए। 70 (बड़े पेड़ले जेन्चरे पवित्र नेबी केरे ज़िरियो ज़ोरू थियू, जैन शुरू करां देते औरूए।) (aiōn g165) 71 असां अपने दुश्मन करां ते बैर रखने बालन करां मुक्ति हासिल केरम। 72 ते तै इश्शे दादे पड़दादन पुड़ दया केरे ते अपनो पवित्र करार याद केर। 73 तै करार जै तीं इश्शे पूर्वज अब्राहमे सेइं कियोरो थियो। 74 कि तै असन हिम्मत देलो, कि असां अपने दुश्मन करां बगैर केन्ची भी डरे सेइं बेंच्री सखम। 75 ते अपनि ज़िन्दगी तैस सौंफम ते सारी ज़िन्दगी पवित्रेइ ते

धार्मिकता ज़ीम। 76 ते हे बच्चां तू नबी भोलो किजोकि तू परमेशरेरे अग्री-अग्री चेलतां लोकन तियार केरेलो कि परमेशर एज्जोए। 77 तै अपने लोकन तैन केरे पाप माफ़ केरनेरे ज़िरियो मुक्तेरे बारे मां ज्ञान देलो। 78 ते इश्शे परमेशरेरी दया एरी भोली जेन्चरे दिहाड़ो लौ देते तेन्चरे मसीह स्वर्गेंरां एज्जेलो। 79 ताके तैन केरे लेइ जैना पापे मां ज़ीतन ते हमेशारे मौतरे खतरे मां रातन लौ दे, ते तै असन बत हिराए ताके अस सुखे सेइं ज़िन्दगी ज़ीम।” 80 तैन मट्टू यानी यूहन्ना बडोटो जेव ते आत्माई मां बद्धतो जेव ते इस्राएलेरे लोकन प्रचार केरने तगर सुनसान ठैरन मां राव।

2 तैन दिहैडन मां रोम मुलखेरे महाराजे औगुस्तुसे एलान कियू कि, दुनियारे सारे मैन्हु केरि गिनती की गाए। 2 ए पेड़ली मैन्हु केरि गिनती थी, जै सीरिया इलाकेरे गवर्नर क्विरिनियुसेरे वक्ते मां भोइ। 3 ते सारे लोक, मैन्हु केरि गिनतरे लेइ नवं लिखाने अपने-अपने पूर्वजां केरे नगर जो चले जे। 4 यूसुफ भी गलील इलाकेरे नगर नासरते मरां यहूदिया इलाके मां दाऊदरे नगर बैतलहम मांजो चलो, किजोकि तै दाऊद राजेरे खानदाने मरां थियो। 5 ताके तैडी मरियमी सेइं साथी जैस सेइं तैसेरी कुडमाइ भोरी थी ते तै दोर्जीती थी नवं लिखाए। 6 तैन केरे तैडी रेइतां तैसारे गल्हे बिशनेरो वक्त अव। 7 ते तैस पेड़लू मट्टू भोवं ते तैसां तैन फैल्हडी मां पलेटतां खुरली मां रखू किजोकि तैन धर्मशाली मां कोन्च ठार न थी मैल्लोरी। 8 किछ पुहाल राती एक्की इलबडे मां गब्बां केरो पेरहो केरते थियो। 9 ते परमेशरेरो स्वर्गदूत तैन कां बांदो भोव ते परमेशरेरी महिमारी लौ तैन केरे चेत्रे पासन बलने लगी ते तैना बड़े डेरि जे। 10 तैखन स्वर्गदूते तैन जो ज़ोवं, “डरा नन्ना, किजोकि अवं तुसन अक बडी खुशखबरी शुनाने ओरोई, जै खुशी सैरी लोकां केरे लेइ भोली। 11 अज़ बैतलहमे मां जैन दाऊद राजेरू नगर थियू, तुश्शे लेइ अक मुक्ति देनेबालो ज़रमोरोए यानी यीशु मसीह प्रभु। 12 तैसेरो तुश्शे लेइ ए निशान भोलो कि तुसन अक मट्टू फैल्हडी मां पलेटेरू गाल्हेरे बेइर खुरली मां मैलेलू।” 13 ते अकदम तैस स्वर्गदूते सेइं होरे भी स्वर्गदूत बांदे भोए ते तैना परमेशरेरी तारीफ़ केरने लगे ते एन ज़ोने लगे, 14 “स्वर्गें मां परमेशरेरी महिमा भोए, ते ज़मीनी पुड़ तैन मैन्नु शान्ति मैल्ले, जैन पुड़ परमेशर खुशे।” 15 जैखन स्वर्गदूत पुहालां केरे सामने वापस स्वर्गें मांजो चले जे। पुहाल एपू मांमेइं ज़ोने लगे, “एज्जा अस बैतलहम नगरे मां गाम जै बिस्तार प्रभुए असन दितोरोए तैस हेरम।” 16 एल्हेरेलेइ तैना लूशी तैट्टां चले जे ते तैडी पुजे ते सच्चे तैडी मरियम, यूसुफ ते निकडी बच्चो फैल्हडी मां पलेटोरो गोरू केरि गाल्हेरे बेइर खुरली मां मैल्लो। 17 ते पुहाल एन हेरतां जै गल तैन एस बच्चेरे बारे मां ज़ोरी थी सेबनन सेइं ज़ोने लगे। 18 पुहालां केरि गल्लां शुन्तां सारे लोक हैरान रेइजे। 19 पन मरियम सैरी गल्लां अपने दिले मां रेखतां सोचने लगी। 20 ते पुहालन जेन्चरे तैनी स्वर्गदूते ज़ोरू थियू, तैनेई अपनि एछछेई तैन सब किछ लेइतां परमेशरेरी तारीफ़ केरते वापस घरजो चले जे। 21 अठोवं दिहाड़े जेइस तैसेरो खतनो केरनेरो वक्त अव त तैसेरू नवं यीशु रखबू एन तैन नवं आए, जैन स्वर्गदूते मरियमारे दोर्जीतीए भोने करां पेइले रखबेरू

थियूं। 22 जैखन मूसरे कानूनरे मुताबिक तैसेरे शुच्चे भोनेरे दिहाड़े पूरे भोए, त यूसुफे ते मरियमा यीशु यरूशलेम नगरे मांजो नीयो ताके तैस प्रभुए कां अर्पण केरन। 23 जेन्चरे प्रभुएरे कानूने मां लिखोरूप, “सारां पेड़लां मट्टां परमेशरे लेइ पवित्र भोलां।” 24 जेन्चरे प्रभुएरे कानूने मां लिखोरूप कि, “अक जोड़ी गुधू केरि या कबूतरेरे दूई बच्चे बलिदानेरे लेइ आन।” 25 तैस वक्ते यरूशलेम नगरे मां अक मैन्हु थियो, तैसेरू नवं शमौन थियूं, तै बड़ो धर्मी ते भक्त मैन्हु थियो, तै मसीह बलगने लोरो थियो, कि तै एज्जेलो ते इस्राएली लोकन शान्ति देलो, ते तैस पुड़ पवित्र आत्मा थियो। 26 पवित्र आत्मा तैस पुड़ बांदू कियूं, कि ज्ञां तगर तू प्रभुएरे मसीह न लाएलो तांतगर न मरेलो। 27 तैस दिहाड़े शमौन पवित्र आत्मा चलाव, तै आत्मिक शक्ति सेइं मन्दरे मां अव तैखन यीशु भी तैसेरे अम्मा बाजेई अन्तर आनोरो थियो, कि तैसेरेलेइ मूसरे कानूनरे मुताबिक कमाम। 28 त शमौने बच्चो कुम्मे मां टलातो ते परमेशरेरी तारीफ़ केरने लगे। 29 “हे प्रभू तीं जै अपनो वादो कियोरोए अपने दासे आनन्दे सेइं मरने दे। 30 किजोकि मीं अपने एछेछेई सेइं मुक्ति देनेबालो लाव, जै तीं सैरी लोकां केरे लेइ भेजोरोए। 31 जै तीं सैरी कौमां केरे सामने तियार कियोरोए। 32 तै, परमेशर गैर कौमन पुड़ बांदो केरनेरे लेइ लौ आए, ते इस्राएली लोकां केरे लेइ अक बड़ी महिमा भोए।” 33 यीशुएरे अम्मा बाजी शमौनेरी एना गल्लां शुन्तां हक्के-बक्के भोए। 34 तैखन शमौने तैन बरकत दिती, ते तैसेरी अम्मा मरियम सेइं ज़ोवं, “हेरा, इन मट्टू एल्हेरेलेइ ठहरावरो, कि इस्राएले मां बड़े लोकां केरे लेइ नाश भोनेरी ते मुक्ति मैलनेरी वजा भोए, तै परमेशरेरी तरफां अक निशान आए पन बड़े लोक तैसेरे खलाफ भोले। 35 ताके बड़े दिलां केरे खियाल खुल्ली गान ते तीं बड़ो दुःख भोनेए जेन्चरे तलवार कटतीए।” 36 तैड़ी अक कुआन्श थी जै नबिन थी, तैसारू नवं हन्नाह थियूं, अशेरेरे खानदाने मरां अक मैन्हु जेसेरू नवं फनूएल थियूं, हन्नाह तैसेरी कुई थी तै बड़ी बुढी थी तै अपने इलाहेरां बाद सत साल अपने मुन्शे सेइं साथी रहोरी थी। 37 तै विधवा थी तैसारी उमर चूरासी साल थी तै मन्दरे मरां न थी गाती ते रात दिहैड़ी प्रार्थना ते कने बरतां रखती ते परमेशरेरी आराधना केरती रहती थी। 38 तैखन तै भी तैड़ी एइतां परमेशरेरू शुक़ केरने लगी ते बच्चेरे बारे मां तैन सेबन सेइं गल्लां लाई केरने, जैना बलगने लोरे थिये कि परमेशरे यरूशलेम नगरेरे लोकन छुटानेरे लेइ मसीह भेजोनेए। 39 जैखन मरियम ते यूसुफे मूसरे कानूनरे मुताबिक यीशुएरो खतनो कियो, त तैना गलील इलाके मरां अपने नगर नासरते मांजो जे। 40 तैन मट्टू बडोटू जेवं ते अक्लमन्द भोटू जेवं किजोकि परमेशरेरो तैस पुड़ बड़ो अनुग्रह थियो। 41 यीशुएरे अम्मा बाजी हर साल फ़सह तिहारेरी दिहाड़ी बनाने यरूशलेम नगरे मां गाते थिये। 42 जैखन यीशु 12 सालां केरो भोव त तैना रीतरे मुताबिक यरूशलेम नगरे मां जे। 43 जैखन तिहार बीतू त यीशुएरे अम्मा बाजी वापस घरजो आए त यीशु यरूशलेम नगरे मां रेइ जेव ते तैसेरे अम्मा बाजी कोई पतो न थियो। 44 तैनेई बुझू कि यीशु होरि मैन्न् सेइं साथी अग्रोवं जोरोए, तैना अपने रिशतेदारन ते ज्ञान पिशानी बालन मां

तोपने लगे। 45 जैखन तैन यीशु न मैल्लो त तैना वापस तोपते-तोपते यरूशलेम नगरे मां पुजे। 46 ट्लेइडयोवं दिहाड़े तैन यीशु मन्दरेरे अंगने मां बुजुर्ग लोकन सेइं गलबात केरतो ते तैन सेइं सवाल जुवाब केरतो मैल्लो। 47 जैना लोक तैसेरी गल्लां शुन्ने लोरे थिये तैना यीशुएरी गल्लां शुन्तां हैरान रेइजे। 48 जैखन तैसेरे हाज बव्वेई यीशु लाव त तैना हैरान रेइजे ते ज़ोने लगे, “मट्टां तीं असन सेइं एन कुन कमाव? तेरे हाज बव तीं तोपते-तोपते परेशान भोइ जे।” 49 यीशु तैन सेइं ज़ोवं तुस मीं किजो तोपने लगोरो थिये? “तुसन पतो नई कि मीं अपने बाजेरे घरे मां रातू ज़रूरी थियूं?” 50 पन तैन तैना गल्लां केरि समझ न आई कि, एन केरो कुन मतलब आए। 51 तैखन तै अपने अम्मा बाजी सेइं साथी नासरत नगरे मां अव ते अपने अम्मा बाजी कां राव ते मरियमा एना सैरी गल्लां अपने दिले मां रेख्खी। 52 यीशु अक्ली मां भी ते कदे मां भी बेडोतो जेव ते परमेशरेरी ते इन्सानेरी कृपाई मां बढूतो जेव।

3 तिबिरियुस महाराजरे हुकुमतेरे परनोहूँ साले मां जेइस पुन्तियुस पिलातुस यहूदिया इलाकेरो गवर्नर थियो, ते गलीलेरे इलाके मां हेरोदेस गवर्नर थियो, तैसेरो दूला फिलिप्पुस इतुरैया ते त्रखोनीतिस इलाकां केरो गवर्नर थियो, लिसानियास, अबिलेन इलाकेरो गवर्नर थियो। 2 तैस वक्ते हन्ना ते कैफा महायाजक थिये, तेइस परमेशरे जकर्याहरे मट्टे यूहन्ना सेइं गल्लां की। जैन सुनसान ठैरी मां रातू थियूं। 3 ते यूहन्ना यरदन दरियारे आसेपासेरे इलाकन मां गेइतां ई प्रचार केरने लगे, कि अपने पापन करां मनफिराथ, ते बपतिस्मो नेथ ताके परमेशर तुशशे पाप माफ़ केरे। 4 जेन्चरे यशायाह नेबेरी किताबी मां लिखोरूप, “सुनसान ठैरी मां फुकारने बालेरी आवाज़ एइचे कि, ‘प्रभुएरी बत बनाथ ते तैसेरी बत्तां पैठी केरा।’” 5 “डुग्घी ठारां सैरी भेरोई गैनिन, हर अक पहाड़ ते च़ौढू बछोइनेए ते जैना ट्लेढी बत्तन तैना सिधी केरनिन जैना उन्डी उबरिन तैना पैठी केरनिन। 6 ते सब लोक तैस हेरेले, जै परमेशरे तैन मुक्ति देने भेजोरोए।” 7 ते यूहन्ना तैन लोकन सेइं ज़ोवं, जैना जथन मां तैस करां बपतिस्मो नेने ओरे थिये, “तुस जेहरीले सप्येरे जेरे बुरे आथ! तुसन केनि ज़ोवं कि, एजनेबाले परमेशरेरे कोपे करां नश्शा? 8 बस्सा, सज़ाई करां बचनेरे लेइ तैना कम्मां केरा, जैन सेइं पतो लगगे तुसेईं सच्चरे पापन करां मन फिरावरोए। ते अपने-अपने मने मां एन न ज़ोथ कि, अब्राहम जेन्चरे इश्शो बाजीए, किजोकि अवं तुसन सेइं जोताई कि परमेशर इन घोड़न मरां अब्राहमेरे लेइ औलाद पैदा केरि सकते। 9 ते हन्ना त बुट्टां केरे ज़ीलन पुड़ परमेशरेरो मैक्कु रक्खोरोए, एल्हेरेलेइ जै कोई तैस बुट्टेरो जेरो भोते, जै रोड़ो फल न दे, तै कटनोए ते अग्गी मां छडनोए।” 10 लोकेई तैस पुच्छू, “फिरी असां परमेशरेरी सज़ाई करां केन्चरे बचम?” 11 यूहन्ना तैन सेइं ज़ोवं, “जैस कां दूई कुरतेन त अक कुरतो तैस देथ जैस कां अक भी नई ते जैस कां रोटी आए त तै भी रोटी बंटे जैन कां नई।” 12 ते धड़त नेनेबाले भी बपतिस्मो नेने ओरे थिये तैनेई तैस पुच्छू, “हे गुरु जी असां कुन केरम?” 13 तैनी तैन सेइं ज़ोवं, “जैन तुशशे लेइ सरकारी कानूनरेरि हिसाबे सेइं रक्खोरूप

तैस करां जादे धडत न नेइयथ।” 14 ते तैखन होरि सिपाहीएइं भी तैस पुच्छू, “असां कुन केरम?” यूहन्ना तैन सेइं जोवं, “केन्ची पुड़ जुलम केरतां बेहक न नेइयथ, ते न केन्ची पुड़ झूठो दोष लेइयथ, पन अपनि तनखुवाही पुड़ गुज्जारो केरथ।” 15 तैखन लोक इंतजारे मां थिये कि, मसीह जल्दी एज्जोए, ते सब लोक अपने दिले मां यूहन्नारे बारे मां सोचते थिये कि ज़ै ओरोए तै मसीह आए या नई? 16 त यूहन्ना तैन जुवाबे मां तैन सेइं जोवं, “अवं त तुसन पैनी सेइं बपतिस्मो देताई पन ज़ै मीं करां महाने ते एज्जनेबालो आए। अवं तैसेरो गुलाम बेनतां तैसेरी जुट्टी केरे तसमे भी खोलनेरे काबल नई। तै तुसन पवित्र आत्माई ते अग्गी सेइं बपतिस्मो देलो। 17 तैसेरू छज्ज तैसेरे हथ्ये मां आए ते तै खलाड़ रोड़ेचारे साफ केरेलो, ते गेहुं अपने कोठारे मां रखेलो पन झाझी तैस अग्गी मां फुकेलो ज़ै कधी हिशनेरी न भोली।” 18 बस्सा ते बड़े रोड़ेचारे लोकन समझेइतां परमेशेरी खुशखबरी शुनातो राव। 19 हेरोदेस च़ेवरोवं मुलखे पुड़ राज़ केरतो थियो। यूहन्ना तै झिड़कावरो थियो, कि हेरोदेस अपने ढ़ला फिलिप्पुरेरी कुआन्श हेरोदियास ज़ै थी तैस सेइं इला कियोरो थियो, ते होरां भी बड़ां बुरां कम्मां कियोरां थियां। 20 हेरोदेस एन सेब्भन करां जादे बुरू कम कियूं कि यूहन्ना कैद केरतां छुड्डो। 21 ज़ैखन सब लोक बपतिस्मो नने लोरे थिये त यीशुए भी बपतिस्मो नीयो, ते ज़ैखन तै प्रार्थना लोरो थियो केरने, त एरू भोवं कि स्वर्ग खुल्ली जेवं। 22 ते पवित्र आत्मा कबूतरी शकली मां यीशु पुड़ उत्रो ते अम्बरे मरां ई आवाज़ अई, “तू मेरू टलारू मट्टू आस, अवं तीं पुड़ बडो खुश आई।” 23 ज़ैखन यीशुए अपने सेवारू कम शुरू कियूं त तैसेरी उमर 30 साल थी (जेन्चरे समझू गातू थियूं) एन यूसुफेरू मट्टूए, ते तैन एलेरू 24 एली मत्तातेरू ते तैन लेवेरू ते तैन मलकेरो ते तैन यन्नेएरो ते तैन यूसुफेरू मट्टू थियूं, 25 ते तैन मत्तित्याहेरू ते तैन आमोसेरो ते तैन नहूमेरू ते तैन असल्याहेरू ते तैन नग्गईएरू मट्टू थियूं। 26 ते तैन मत्तातेरो ते तै मत्तित्याहेरू ते तैन शिमीएरू ते तैन योसेखेरू ते तैन योदाहेरू मट्टू थियूं। 27 ते तैन यूहन्नारू ते तैन रेसारू ते तै जरुब्बाबेलेरू ते तैन शालतियेलेरू ते तैन नेरूरू मट्टू थियूं। 28 ते तैन मलकीएरू ते तैन अदीयेरू ते तैन कोसामेरू ते तैन एल्मदामेरू ते तैन एरेरू मट्टू थियूं। 29 ते तैन येशूएरू ते तैन एलीएजेरेरू ते तैन योरीमेरू ते तैन मत्तातेरू ते तैन लेवेरू मट्टू थियूं। 30 ते तैन शामौनेरू ते तैन यहूदेरू ते तैन यूसुफेरो ते तैन योननेरू ते तैन एलयाकीमेरू मट्टू थियूं। 31 ते तैन मलेआहेरू ते तैन मिन्नाहेरो ते तैन मत्ततेरो ते तैन नातानेरो ते तैन दाऊदेरू मट्टू थियूं। 32 ते तैन यिशीएरो ते तैन ओबेदेरो ते तैन बोआजेरो ते तैन सलमोनेरो ते तैन नहशोनेरू मट्टू थियूं। 33 ते तैन अम्मीनादाबेरू ते तैन अरनेरू ते तै हेस्रोनेरू ते तैन पेरेसेरू ते तैन यहूदेरू मट्टू थियूं। 34 ते तैन याकूबेरू ते तैन इसहाकेरो ते तैन अब्राहमेरू ते तैन तेरहेरो ते तैन नाहोरेरू मट्टू थियूं। 35 ते तैन सरुगेरो ते तैन रऊएरो ते तैन पेलेगेरो ते तैन एबेरेरू ते तैन शिलहेरू मट्टू थियूं। 36 ते तैन केनानेरू ते तैन अरफक्षदेरो ते तैन शेमेरो ते तैन नूहेरो ते तैन लेमेकेरू मट्टू थियूं। 37 ते तैन मथूशिलहेरू ते तैन हनोकेरो ते तैन यिरिदेरू

ते तैन महललेलेरू ते तैन केनानेरू मट्टू थियूं। 38 ते तैन एनोशेरू ते तैन शतेरू ते तैन आदमेरो ते तैन परमेशेरू मट्टू थियूं।

4 फिरी यीशु पवित्र आत्मा सेइं भरपूर भोइतां यरदन दरियाए मरां वापस अव त 40 दिहाड़े पवित्र आत्मा रे च़लाने सेइं सुनसान ठैरी जो च़लो जेव। 2 तैन 40 दिहाड़न मां शैतान तैस अज़मातो राव, तैन दिहैड़न मां तैनी किछ न खाव पीवं ते ज़ैखन तैना दिहाड़े पूरे भोए त तैस ढ़लुख लग्गी। 3 शैताने तैस जो जोवं, “अगर तू परमेशेरू मट्टू आस त इन घोड़न जो जो कि एना रोटी बनन।” 4 यीशु तैस जुवाब दित्तो, “पवित्रशास्त्रे मां लिखोरूए, ‘मैनु सिफ रोटेइं सेइं ज़ीतो न राए।’” 5 फिरी शैताने यीशु एक्की उच्चे पहाड़े पुड़ घिन्तां जेव ते तेइं एक्की पले मां तैस तैड़ी दुनियारां सारां राज़ां हिरां। 6 ते तैनी यीशु सेइं जोवं, “एन सब किछ मेरे अधिकारे मां आए, ते एसेरी सारी धन दौलत अवं तीं देलो एन मेरे स्पुईं। अवं ज़ैस चाताई तैस देइ सकताई। 7 बस अगर तू मीं कां मथ्यो टेकस त एन सब किछ तेरू भोलू।” 8 यीशुए तैस जुवाब दित्तो, “पवित्रशास्त्र मां लिखोरूए, ‘तू सिफ अपने प्रभु परमेशेरे कां मथ्यो टेकतां ते सिफ तैसेरी भक्ति केरां।’” 9 ते तैनी यीशु यरूशलम नगरेरे मन्देरी उच्ची छम्पी पुड़ नेइतां खडो कियो ते तैस सेइं जोवं, “अगर तू परमेशेरू मट्टू आस त अपनो आप इट्टां उन्ढो बछोड़। 10 किजोकि पवित्रशास्त्रे मां लिखोरूए, ‘तै तेरे लेइ अपने स्वर्गदूतन ज़ोलो ते तैना तेरी हफ़ाज़त केरेलो।’ 11 ते ‘तैना तीं अपने हथ्यन पुड़ छूले ताके एरू न भोए कि तेरे पावन घोड़न सेइं ठोकर लगगे।’” 12 यीशु तैस जुवाब दित्तो, “पवित्रशास्त्रे मां इन भी लिखोरूए तू अपने प्रभु परमेशेरी अज़मैइश न केरां।” 13 ज़ैखन शैताने तैसेरी बड़े तरीकेई अज़मैइश की, त किछ च़िरेरां बाद तैस करां च़लो जेव। 14 फिरी यीशु पवित्र आत्माेरी शक्ति सेइं भरपूर भोइतां गलील इलाके मां वापस अव, ते सारे इलाके मां तैसेरी मुशूरी भोइजेइ। 15 यीशु तैन केरे प्रार्थना घरन मां शिक्षा देतो राव, ते सब लोक तैसेरी तारीफ़ केरते थिये। 16 फिरी तै नासरत नगर मां वापस अव ज़ैड़ी ते पलोरो थियो। अपने रीतरे मुताबिक आरामेरे दिहाड़े तै प्रार्थना घरे मां जेव ते वचन पढनेरे लेइ खडो भोव। 17 ते तैस यशायाह नेबेरी किताब दित्ती ते तैनी खोलतां तैन वचन कढू ज़ैड़ी लिखेरू थियूं, कि, 18 “प्रभुएरी आत्मा मीं पुड़े, एल्हेरेलेइ कि तैनी गरीबन खुशखबरी शुनानेरे लेइ मेरू अभिषेक कियोरूए, तैनी अवं भेजोरोई कि कैदन हथरां छेड्डी (जैना शैतानेरे कब्जे मां आन) ते कांन केरि एछछन ठीक भोनेरी खबर शुनेई, ते ज़ैन पुड़ जुलम भोते तैन लोकन आज़ाद केरि। 19 ते तैस वक्तेरू एलान केरि ज़ेइस परमेशार लोकन पुड़ दया केरेलो।” 20 फिरी तैनी तै किताब बंद केरतां सेवके कां वापस देइतां बिश्शी जेव। ज़ेत्रे प्रार्थना घरे मां थिये सब तैसेरां तकते थिये। 21 ते तै तैन सेइं ज़ोने लगे, “अज़ पवित्रशास्त्रेरू तैन वचन तुश्शे सामने पूरू भोवं।” 22 ते सब तैसेरी तारीफ़ केरने लगे, ते तैसेरी गल्लन पुड़ बडो अनुग्रह थियो, जैना गल्लां तैसेरे एशेरां निसती थी, ते लोक हैरान भोइतां ज़ोने लगे, “कुन एन यूसुफेरू मट्टू नई?” 23 यीशु तैन सेइं ज़ोने लगे, “ए कहावत तुस

मीं पुड़ जुंरु ज़ोले, 'कि हे बेईद जी अपनो आप त ठीक केर, ज़ैन किछ असेई कफरनहूम नगर मां केरतू शुनेरूए, तैन इड़ी अपने नगरे मां भी केर।" 24 ते तैनी इन भी ज़ोवं, "अवं तुसन सेइं सच ज़ोताई, कि कोई नबी अपने मुलखे मां कबूल न कियो गाए। 25 अवं तुसन सेइं सच ज़ोताई कि एलिय्याह नेबेरे वक्ते मां ज़ैखन साडे टलाई साल अम्बर बंद भोवं (यानी झड़ी न भोइ) ते इड़ी तगर कि सैरी मुलखे मां बडो काल पेई जेव ते तैस वक्ते बेडि विधवा कुआन्शां इस्पाएले मुलखे मां थी। 26 पन एलिय्याह नबी, तैन मरां केन्ची कां नई पन सैदा नगरेरे नेडे सारफत नगर मां एक्की विधवा कां भेजो, जै यहूदी न थी। 27 ते एलीशा नेबेरे ज़माने मां इस्पाएलेरे मुलखे मां बडे कोढी थिये पन तैन मरां कोई भी कोढे करां साफ न थियो भोरो, पन सिर्फ अक सीरियारो रानेबालो नामान कोढे करां साफ भोरो थियो, जै गैर कौमी मरां थियो।" 28 जेत्रे लोक प्रार्थना घरे मां थिये एना गल्लां शुन्तां सरकी सेइं लाल-लाल भोइ जे। 29 ते खडे उट्टां तैस नगर करां बेइर निस्से ते तै तैस पहाडेरी च़ौटी पुड़ घिन्तां जे ज़ैस पुड़ तैन केरू नगर आबाद थियू, ताके तैस तेट्टां उन्हे बछोइतां मारन। 30 पन यीशु तैन मरां निस्तां च़लो जेव। 31 फिरी तै गलील इलाकेरे कफरनहूम नगरे मांजो जेव। ते आरामेरे दिहाडे तैन शिक्षा देने लगगोरो थियो। 32 ते लोक तैसेरी शिक्षा शुन्तां हैरान रहते थिये किजोकि तैसेरी शिक्षा बडे अधिकारे सेइं थी। 33 प्रार्थना घरे मां अक मैन्हु थियो, जैस पुड़ भूतेरो सायो थियो। तै बडे ज़ोरे सेइं चिन्डां मारने लगे। 34 "हे नासरत नगरेरे यीशु! असन तीं सेइं कुन कम? कुन तू असन नाश केरनेरे लेइ ओरोस? अवं ज़ानताई कि तू कौन आस, तू परमेशेरू पवित्र मट्टू आस!" 35 यीशुए तैस झिड़क देइतां ज़ोवं, "चुप रा, एस मैन्हु मरां निस्सी गा!" तैखन भूते तै मैन्हु ज़मीनी पुड़ शैरी दित्तो, ते तैस मरां निस्सी जेव। 36 एन हेरतां सारे लोक बडे हैरान भोए ते एप्पू मांमेइं ज़ोने लगे, "ए कुन गल आए! तै अधिकारे ते शक्ति सेइं भूतन हुक्म देते ते तैना तैस मरां निस्सी गातन।" 37 ते सारे मुलखेरे मां च़ेरे पासन तैसेरी खबर फैली जेई। 38 फिरी तै प्रार्थना घरे मरां उट्टां शमोनेरे घरे जेव ते शमोनेरी शिखी बडो भुखार थियो, ते लोकेई तैसारे बारे मां यीशु सेइं ज़ोवं। 39 तै खडो भोइतां तैसारे पासे फिरो ते बिमारी झिड़की, ते तैसारो सारो भुखार उतरी जेव ते तै खड़ी भोइ, ते तैन केरि सेवा केरने लगी। 40 ज़ैखन दिहाड़ी लाई डुबने त लोकेई तैना सब लोक ज़ैन मां किसमां-किसमां केरि बिमैरी थी तैस कां आने, ते यीशुए तैन पुड़ हथ रेखतां तैना सब बज्झाए। 41 भूतां भी चिन्डां मारतां थियां, ते ज़ोतां थियां, "तू परमेशेरू मट्टूस!" ते बडे लोकन मरां भूतां केरो सैयो निस्सी जेव, ते तै तैन झिड़कतो थियो, ते तैन गल भी न थियो देतो केरने, किजोकि तैना भूतां ज़ानतां थियां कि ए मसीह आए। 42 ज़ैखन झेझ भोइ त यीशु उट्टां बेइर एक्की सुनसान ठैरी मां जेव, ते पतोरों सारे लोक तैस तोपते-तोपते तैस कां पुजे ते रोकने लगे कि तू असन करां न गा। 43 पन यीशुए तैन सेइं ज़ोवं, "मीं होरि नगरन मां भी परमेशेरूरे राज़ेरी

खुशखबरी शुनानी ज़रूरीए किजोकि अवं एल्हेरेलेइ भेजोरोई।" 44 ते तै यहूदिया इलाकेरे प्रार्थना घरन मां प्रचार केरतो राव।

5 एक्की दिहाडे यीशु गन्नेसरतेरे समुन्देरे बन्ने पुड़ खेडोरो थियो, ते बडे लोक तैस कां करां परमेशेरू वचन शुन्नेरे लेइ तै उन्हे बिछड़ी गाते थियो। 2 तैनी दूई किशती बन्ने लेगोरी लेई, ते मेछली टलानेबाले किशती इलेखी छेइतां अपना ज़ालां धोने लगगोरो थियो। 3 यीशु एक्की किशती मां च़ढो ते किशतेरे मालिके शमोने सेइं ज़ोने लगे, तुस किशती इट्टां बन्ने पुडेरों नेइतां थोडी दूर लाथ। फिरी यीशु किशती मां बिश्तां तैन लोकन उपदेश देने लगे। 4 ज़ैखन तैनी लोकन शिक्षा दित्ती त तै शमोने सेइं ज़ोने लगे, "तुस किशती डुग्घी ठैरी च़लाथ ते मेछली टलानेरे लेइ ज़ाल छडा।" 5 शमोने जुवाब दित्तो, "हे गुरु, असेई सैरी राती तरले कियोरेन ते अक मेछली भी नई टलेइयोरी, पन असां तेरे ज़ोने सेइं ज़ाल छडतम।" 6 आखकार पतरस ते तैसेरे सैथेई ज़ालां छैडी दित्तां ते एत्री मेछली लेगि, कि ज़ालां छिन्दोइतां मेछली बेइरोवं निस्सने लेगि। 7 तैखन तैनेई अपने सैथन जो ज़ैना होरि किशती पुड़ थिए, इशारो कियो कि एज्जा इश्शी मद्दत केरा, ते तैना भी आए ते किशती मेछलेई सेइं एत्री भेरोई जेई कि किशती डुबने लगी। 8 शमोने पतरस एन हेरतां यीशुएरे पावन पुड़ पेइतां ज़ोने लगे, "हे प्रभु, अवं पापी मैन्हु आई तू मीं करां दूर भो!" 9 गल ए थी कि तै त तैसेरे साथी एत्री मेछली लेइतां हैरान भोइ जोरे थियो। 10 तेरहो हाल जेव्देरे मट्टां केरो यानी याकूब त कने यूहन्नारो भी थियो, ज़ैना शमोने सेइं साथी थियो, यीशुए शमोने सेइं ज़ोवं, "डर नन्ना अज़्जेरे बाद तू मेछली टलाने बालो नई, बल्के मैन्हु अकोट्टे केरतां मेरे चले बनानेबालो भोलो।" 11 तैनेई किशती इलेखी एन्तां लेई, ते अपनू सब किछ छेइतां यीशु पत्ती च़ले जे। 12 ज़ैखन यीशु एक्की नगर मां थियो, ते एरू भोवं कि तेडी अक मैन्हु थियो, जेसेरे सैरी जानी कोढ थियू, तैनी यीशु लाव, ते तै ज़ैशु केरे बारे बिश्तां तैस कां मिन्न्त केरतां ज़ोने लगे, "हे प्रभु तू चास त मेरू कोढ बज्झेई सकतस।" 13 यीशुए अपनो हथ तैस पुड़ रखो ते ज़ोवं, "अवं चाताई, तू बज्झोस।" ते तैखने तैसेरू कोढ साफ भोइ जेवं। 14 तैखन यीशुए तैस मैन्हु हुक्म दित्तो, "हेर, एसेरे बारे मां केन्ची सेइं किछ न ज़ोइयां। बल्के अपनो आपे याजके हिरा। तैल्ला पत्ती, तू अपने बेज्झोनेरे वजाई सेइं च़ढतल च़ाढ, जेसेरे बारे मां मूसा नेबे कानूने मां हुक्म दित्तोरोए। ताके लोकन पतो च़ले कि तू बेज्झोरोस।" 15 पन यीशुएरे बारे मां सेव्हन पतो लगे ते लोक दूरेरां देते एजने लगे ताके यीशुएरी गल्लां शुन्न कने अपनि बिमैरन करां बेज्झोन। 16 पन यीशु जादे केरतां सुनसान ठैरी च़लो गातो थियो, ते प्रार्थना केरतो रातो थियो। 17 एक्की दिहेड़ी एरू भोवं कि यीशु शिक्षा देने लगगोरो थियो, ते तैखन किछ फरीसी ते शास्त्री लोक जोते थियो, तैना गलील इलाके ते यहूदियारे सैरी इलाकन मरां यरूशलेम नगरे मां ओरे थियो; ते परमेशेरूरी शक्ति यीशु सेइं साथी थी, ते बिमार बेज्झोइतां गाते थियो। 18 किछ मैनेई अक अधरंगी मैन्हु खट्टी पुड़ छुइतां आनोरोए थियो, ते तैना कोशिश लगे केरने कि एस अन्तर नेइतां यीशु कां पुज़ाम। 19 पन अन्तर एत्री तंगी थी

कि तैना अन्तर न गेइ सके फिरी तैनेई तैस घरेरी छत पुट्टी जैस घरे मां यीशु थियो, ते खटां सने तै अधरंगी मैन्हु अन्तर यीशुपरे तुतरे अगर ओसालो। 20 यीशु तैन केरो विश्वास हेरतां जोंव, “हे दोस्त तेरे पाप माफ्र भोए।” 21 शास्त्री ते फरीसी लोक सोचने लगे, “ए कौन मैन्हु आए, जै परमेशरेरी तुहीन केरते, परमेशरेरे अलावा कौन पाप माफ्र केरि सकते?” 22 यीशुए तैन केरि गल्लां बुझी ते तैन जुवाब दितो, “तुस अपने-अपने मने मां एन्वरां किजो सोचने लगोरैथ? 23 कुन ज़ोन सुखतुए, ‘तेरे पाप माफ्र भोए,’ या एन ज़ोन ‘उठ, ते चल फिर?’ 24 पन तुसन पतो लगगे, मैनेरे मट्टे ज़मीनी पुड़ पाप माफ्र केरनेरो अधिकारे,” फिरी यीशुए तैस बिमारे जो जोंव, “अपनि खट सल्ल ते घरजो चलो गा।” 25 तै अधरंगी बिमार मैन्हु सेरुभी केरे सामने ते खड़े उठो ते जैस खट्टी पुड़ तै झलतो थियो, अपने दोग्गे पुड़ छुड़तां परमेशरेरी बड़याई केरतो-केरतो घरजो चलो जेव। 26 तैना सारे लोक हेरान राए ते परमेशरेरी तारीफ्र केरने लगे ते कने ज़ोने लगे, “ए त असेई अज़ नव्वीं गल लाई।” 27 एना गल्लां बीतनेरां बाद यीशु तैटां निरस्सो, ते एक्की चुंगी घिन्ने बाले कां चले जेव, तैसेरु नव लेवी थियूं। ते तै चुंगी नेनेबाले दफ्रतेरे मां बिश्शोरो लाव, ते यीशुए तैस जो जोंव, “तू मीं पत्ती चल ते मेरो चेलो बन।” 28 तै तैखने यीशु पत्ती चलो जेव। 29 ते फिरी लेवी यीशुपरे लेइ अपने घरे अक बड़ी धाम दित्ती। ते तैड़ी चुंगी नेनेबाले ते होरे भी बड़े लोक थिये ज़ैना तैस सेइं साथी रोटी खाने बिश्शे। 30 फरीसी लोक ते शास्त्री यीशुपरे चलन सेइं ज़ोने लगगे, “तुस चुंगी नेनेबालन ते पापी लोकन सेइं साथी किजो खातथ पीतथ?” 31 यीशुए तैन सेइं जोंव, “बिमारन डाक्टेरेरी ज़रूरत भोचे, न कि सझर लोकन। 32 अवं धर्मी लोकन नई, पन पापी लोकन कुजाने ओरोई कि, तैना अपने पापन करां मन फिरान।” 33 तैना लोक यीशु सेइं ज़ोने लगे, “यूहन्नारे चले त बरत रखतन ते प्रार्थना भी केरतन ते एन्वरे फरीसी लोक भी केरतन, पन तेरे चले ते खातन पीतन?” 34 यीशुए तैन नु जुवाब दितो, “इलापरे दिहाड़े, कुन लाड़ो साथी भोंते सांते जन बरत रेखी सकतथ? 35 पन तैना दिहाड़े एज्जले, ज़ैखन लाड़ो तैन केरां अलग कियो गालो (यानी मारो गालो)। तैन दिहैडन मां तैना (अपने दुखेरे वजाई सेइं) बरत रखेले।” 36 फिरी यीशु तैन अक हीरि मसाल दित्ती, “पुराने लिगड़े पुड़ नव्वे लिगड़ेरी टलोई कोई न लाए, नता तै टलोई तैस मरां होरु भी छिंदेली, ते कने पुराने सेइं तै मिले भी नन्ना। 37 नव्वो दाछारो रस पुरैनी मसकी मां कोई न छुट्टे, नन्ना त नव्वे दाछारो रस सेइं मसक भी फैट्टी गाचे, ते दाछारो रस भी डुल्ली गाते, ते तै मसक भी बरबाद भोचे। 38 किजोकि नव्वो दाछारो रस नव्वीं मसकन मां भरोरो लोड़ते। 39 कोई मैन्हु पुरानो दाछारो रस पीतां नव्वीं न पीनो चाए, किजोकि तै ज़ोते कि पुरानो दाछारो रस जादे रोड़ोए।”

6 एक्की फेरे यीशु त तैसेरे चले आरामेरे दिहाड़े ऊडारन मामेइं एक्की बत्तां चलोरै थिये, ते तैसेरे चले शिल्लां हथेइं सेइं प्रोड़तां खाने लगगे। 2 एन लेइतां किछ फरीसी लोकेई तैन सेइं जोंव, “तुस एन कम किजो लोरैथ केरने, ज़ैन आरामेरे दिहाड़े केरनु जेइं नई?” 3 यीशुए तैन जुवाब

दितो, “कुन तुसेईं पवित्रशास्त्रे मां कथे नई पढ़ेरु कि जेइस इश्शो पूर्वज दाऊद राजां त तैसेरे साथी द्लुखोरै थिये त तैनेई कुन कियेरु थियूं? 4 तैनेई केन्वरे परमेशरेरे घरे मां गेइतां ज़ैदोरी रोटी खोरी थी, ते अपने सैथन भी दित्तोरी थी। तैना रोटी खैनी सिर्फ याजकां केरे लेइ जेइं थी।” 5 फिरी तैने तैन सेइं जोंव, “मैनेरु मट्टू, यानी अवं आरामेरे दिहाड़ेरो भी प्रभु आई।” 6 एक्की बार यीशु प्रार्थना घरे मां गेइतां उपदेश शुनेई राहोरो थियो, ते तेइस भी आरामेरी दिहाड़ी थी तैड़ी अक मैन्हु थियो, जेसेरो देइनो हथ शुक्कोरो थियो। 7 शास्त्री त फरीसी लोक यीशुपरी ताके मां थिये कि अगर यीशु आरामेरे दिहाड़े केन्वी बझालो त असन इलज़ाम लानेरो मौको मैलनोए। 8 पन यीशु तैन केरे बारे मां सेमझी जेव, यीशुए तैस शुक्कोरे हथेबाले मैन्हु सेइं जोंव, “मझाटे खड़े भो।” ते खड़ो भोव। 9 तैखन यीशु तैन सेइं जोंव, “अवं तुसन पुछतां कि आरामेरे दिहाड़े भलाई केरनि रोड़ीए या बुराई केरनि रोड़ीए, मैनेरी जान बचानी या मारनी?” 10 ते तैनी चेरे पासना तैन केरां तकू ते तैस मैन्हु जो जोंव, “अपनो हथ हिरा।” तैनी मैने अपनो हथ अग्रोवं कियो। त अकदम तैसेरो हथ बेज्जोव। 11 पन याजकन त फरीसन बड़ी सरक अई तैना एप्पू मामेइं बेंस केरने लगगे, कि असां यीशुए सेइं कुन केरम? 12 तेइस एरु भोवं कि यीशु प्रार्थना केरनेरे लेइ एक्की पहाड़े पुड़ चढ़ो, ते सैरी राती परमेशरे कां प्रार्थना केरतो राव। 13 ज़ैखन टलेकड़ोने लगू त तैनी अपने चले एप्पू कां कुजाए ते तैन मरां 12 प्रेरित चुने। 14 अक शमौन ज़ैस जो पतरस भी ज़ोते थिये तैसेरो दूला अन्दि्रयास, याकूब, यूहन्ना, फिलिप्पुस, बरतुलमै, 15 मत्ती, थोमा, हलफर्डरु मट्टू याकूब, ते शमौन ज़ैस जो जेलोतेस ज़ोतन। 16 ते याकूबेरु मट्टू यहूदा ते यहूदा इस्करियोती ज़ै तैसेरो टलुवाने बालो बनो। 17 तैखन यीशु तैन सेइं साथी चौरस ठैरी मां खड़ो भोव, ते तैसेरे चले भी तैड़ी अकोट्टे भोए ते सारे यहूदिया ते यरूशलम नगरन त कने सूर ते सैदारे आसेपासरे लोक समुन्दरेरे बन्नेरे बड़े लोक ज़ैना तैड़ी थिये। 18 एन लोक यीशु करां ज्ञान शुन्ने ते अपनि-अपनि बिमैरी तैस कां बझाने ओरे थिये, ते ज़ैन लोकन पुड़ भूतां केरे सैये सेइं दुखे मां थिये तैना भी बेज्जोइ जे। 19 सब लोक तैस सेइं हथ लानेरी कोशिश केरते थिये किजोकि तैस मां शक्ति थी ज़ैस सेइं तैना बेज्जोते थिये। 20 तैखन यीशु अपने चेलां केरे तकने लगगे ते ज़ोने लगगे, “परमेशर तुसन बरकत देलो ज़ैना नमरथ, किजोकि स्वर्गेरु राज तुशू आए। 21 परमेशर तुसन बरकत देलो ज़ैना द्लुखोरैथ, किजोकि तुस रज़नेथ, परमेशर तुसन बरकत देलो ज़ैना अज़ लेरां देतथ, किजोकि तुसेईं हसनुए।” 22 “परमेशर तुसन बरकत देलो, ज़ैखन मैनेरे मट्टे, यानी मेरे चेलो भोनेरे वाजाई सेइं लोक तुशू तुहीन केरन, ते तुसन भाईचारे करां कनारे छुडले, ते तुसन बेइजत केरेले, ते तुशू नवं केटी छुडले।” 23 “तैस दिहाड़े खुशी भोइतां उछड़थ, किजोकि हेरा तुशू लेइ स्वर्ग मां बडू इनामे। तैन केरे दादे-पड़दादे नेबन सेइं भी एरो ज़ेरो बर्ताव केरते थिये।” 24 “पन अफ्रसोस! तुसन पुड़ ज़ैना दौलतमन्दथ, किजोकि तुसन सब किछ मैलेरुए। 25 अफ्रसोस! तुसन पुड़, ज़ैन तुस

चाते थिये, तुसन तैन मैल्लू, किजोकि तुस नियन्ने भोले, अफ्रसोस! तुसन पुड़ जैना अज़ हसतथ किजोकि तुस शोग केरेले ते लेरां देले। 26 पन अफ्रसोस! तुसन पुड़ ज़ैखन लोक तुसन जो भलू ज़ोन, किजोकि तुशुशे दादे-पड़दादेई भी झूठे नेबन सेइं एरो बर्ताव कियोरो थियो।” 27 “अवं तुसन शुन्नेबालन सेइं ज़ोताई कि अपने दुश्मन सेइं प्यार केरा। जैना तुसन सेइं बैर रखतन तैन केरू भलू केरा। 28 जैना तुसन जो बुरू ज़ोतन तुस तैन केरे लेइ बरकत मग्गा, ज़ैन तुसन बेइज़त केरन तुस तैन केरे लेइ प्रार्थना केरा। 29 अगर कोई तुशुशे एककी खैखोड़ी पुड़ थपुड़ बाहे त होरो पासो भी तैसेरे पासे रखा, ते अगर कोई तुशुशू कोट नेते त कमीज़ भी तैस देथ। 30 ज़ै कोई तीं करां किछ मग्गे त तैस देथ अगर कोई तेरो सबाब नेते ते तैस करां वापस न मग्गा। 31 ते जेन्चरे तुस चातथ कि लोक तुसन सेइं केरन तेन्चरे तुस भी तैन सेइं तेरहु केरा। 32 अगर तुस तैन्ने सेइं प्यार केरथ ज़ैना तुसन सेइं प्यार केरतन त तुशुशू कुन एवसाने? किजोकि पापी लोक भी अपने प्यार केरनेबालन सेइं प्यार केरतन। 33 अगर तुस तैन केरू भलू केरतथ ज़ैना तुशुशू भलू केरतन त तुशुशू कुन एवसाने? किजोकि पापी लोक भी अपने प्यार केरनेबालन सेइं प्यार केरतन। 34 अगर तुस तैन्ने ओधार देतथ ज़ैन करां तुसन वापस भी मैलनेरी उमीदे, त परमेशर तुशुशी बड़याई किजो केरे? किजोकि बुरे लोक भी अपने प्यार केरनेबालन पेंडसे देतन ताके तैन करां वापस मैलन। 35 पन तुस अपने दुश्मन सेइं प्यार केरा ते तैन केरू भलू केरा, ओधार देइयथ पन तैन करां वापस मैलनेरी उमीद न रेखथ, एन्हेरो स्वर्गं मां तुशुशे लेइ अक बड़ो फले, किजोकि तुस परमप्रधान परमेशररे बच्चे भोले, किजोकि तै परमेशर न मन्ने बालन पुड़ ते ज़ालमन पुड़ भी दया केरते। 36 ज़ेरो दया दिल तुशुशो बाजी तेरेहे दया दिल तुस भी भोथा।” 37 “दोष न लाथ, तुसन पुड़ भी दोष न लव गालो, निन्दा न केरा, तुशुशी भी निन्दा न की गाली, तुस होरन माफ़ केरेले त तुसन भी माफ़ कियूं गालू। 38 तुस होरि किछ देले त तुसन भी किछ दितू गालू तुशुशू बरकतरू भांड जेन्चरे अन्नेरी हाटी हिलेइतां देतां तैन भी तेन्चरे ज़ैस हैटी सेइं तुस होरि केरे लेइ मिनतथ तैस्से सेइं तुशुशे लेइ भी मिनेले।” 39 यीशुए तैन अक मिसाल शुनाई, “कुन कानो होरि काने बत हेरेई सकते? तैना त दुइये गढे मां बिछड़ेले? 40 चेलो अपने गुरू करां बड़ो न भोए पन हर एककी गल्ली मां ज़ैखन सब शिखेलो त अपने गुरेरो ज़ेरो भोलो। 41 तू अपने ढ़लाएरी एछछी मां कूड़ो किजो तकतस, पन तेरी एछछी मां त नग आए, ते तैसेरो तू खियाल भी न केरस? 42 तू अपने ढ़लाए केन्चरे ज़ोई सकतस कि, ‘तेरी एछछी मरां कूड़ो केडी?’ हे पाखंडी पेइले अपनि एछछी मरां नग कढ फिरी अपने ढ़लाएरी एछछी मरां कूड़ो केडी सकतस।” 43 “किजोकि केन्ची भी रोड़े बुटे बुरो फल न लगगे ते न केन्ची बुरे बुटे रोड़ो फल लगगे। 44 हर बुट अपने फले सेइं पिशैनेते। किजोकि न झलन सेइं फैगू लगन ते न झल्लन सेइं दाछ लगगे। 45 रोड़ो मैन्हु अपने दिलेरे रोड़े खज़ाने मरां रोड़ी चीज़ां कढते ते बुरो मैन्हु अपने दिलेरे बुरे खज़ाने मरां बुरी चीज़ां कढते किजोकि ज़ैन दिले मां

भरेरू भोते तैन्ने ज़बानी पुड़ एइते।” 46 “ज़ैखन तुस मेरे ज़ोने पुड़ अमल न केरथ त मींजो, ‘हे प्रभु, हे प्रभु!’ किजो ज़ोतथ? 47 ज़ै मीं कां एइते ते मेरी गल्लां शुन्तां तैन पुड़ अमल केरते त अवं तुसन सेइं ज़ोताई कि तै केसेरो ज़ेरो भोलो? 48 ते तैस मैनेरो ज़ेरोए ज़ैनी अपनू घर डुग्गी खाइ केढतां पेक्की ठैरी घर बनाव ज़ैखन हड़ाई आई त तैस घरे किछ न भोवं, किजोकि तैसेरी मुनीयाद पेक्की ठैरी थी। 49 पन ज़ै मेरी गल्लां शुन्तां तैन पुड़ अमल न केरे त तै तैस मैनेरो ज़ेरोए, ज़ैनी अपनू घर रेती पुड़ बनाव ते ज़ैखन हड़ाई अई त तैन घर डुल्ली जेवं ते तब्बा भोइ जेवं।”

7 ज़ैखन तैनी लोकन एपनी सब गल्लां शुनेई छैडी, त तै कफरनहूम नगर मां अव। 2 तैडी केन्ची सूबेदारेरो अक ट़लारो सेवक बिमार थियो ते मरने बालो थियो। 3 तैनी यीशुएरी मुशूरी शुन्तां यहूदी केरे किछ बुजुर्गं तैस कां मिनत केरनेरे लेइ भेजे, कि तै एइतां मेरो सेवक बज़्ज़ाए। 4 तैना यीशु कां आए ते तैस कां मिनत केरने लागे, “तै इस काबले, कि तू तैसेरेलेइ इन केरस। 5 किजोकि ते इश्शी कौमी सेइं बड़ी हमदरदी रखते, ते इश्शू प्रार्थना घर तैन्नी बनेवरुए।” 6 यीशु तैन सेइं साथी-साथी च़लो जेव, पन ज़ैखन तैस घरे नेड़े पुजो त सूबेदारे होरि दोस्तन सेइं समाद भेजो कि, “प्रभु तकलीफ न केर, किजोकि अवं एस काबल नई कि तू मेरे घरे मां एज्जी सखत। 7 एस्से वजाई सेइं अवं भी अपनो आप तीं कां एजनेरे काबल न सेमझी बल्के अपनि ज़बानी सेइं ज़ोस त मेरो नौकर बेज़्ज़ोइ सकते। 8 तै मैन्हु ज़ोने लगो कि अवं भी केन्चरे अधिकारे मां कम केरताई, ते सिपाही मेरे अधीन आन, ते ज़ैखन एककी जो ज़ोतां कि ‘गा,’ त तै गाते, ते होरि जो ज़ोतां एई, त तै ‘एइते,’ ते अपने सेवके जो ज़ोताई, ‘इन कम केर,’ त तै केरते।” 9 यीशु एन शुन्तां हैरान रेइ जेव, ते पत्रोवं लोकां केरे पासे लगो तकने ज़ैना तैस पत्पती ओरे थिये तैन जो ज़ोने लगो, “कि अवं तुसन सेइं सच ज़ोताई कि मीं इसाएल मुलखे मां इस गैर यहूदी मैनेरो ज़ेरो मैन्हु नई लोवरो ज़ै मीं पुड़ एत्रो विश्वास केरे।” 10 ते ज़ैना लोक यीशु कां भेजोरे थिये वापस ज़ैखन घरे आए त तै सेवक बेज़्ज़ोरो लव। 11 थोड़े च़िरेरां पत्ती एरू भोवं कि यीशु नाईन नव्वेरे नगर मां च़लो जेव, ते तैसेरे चले ते होरे भी बड़े लोक तैन सेइं साथी थिये। 12 ज़ैखन तैना नगरेरे फाटके पुड़ नेड़े पुजे, त हेरतन, कि अक मुड़दो बेइर जो च़लेवरोए, ते तैन अपनि अम्मारू अक्के मट्टू थियूं, ते नगरेरे बड़े लोक तैस विधवा कुआन्शी सेइं साथी थिये। 13 एन लेइतां प्रभुए बड़ी तरस अव, ते तैस जो ज़ोवं, “लेरां न दे।” 14 फिरी यीशु नेड़े एइतां शिडी सेइं हथ लाव, ते छूनेबाले रुके, ते यीशुए ज़ोवं, “ए जवान, अवं तीं सेइं ज़ोतां, खड़ो उठ!” 15 तैखन मुड़दो उठो, ते गल्लां लगो केरने, ते यीशुए तै तैसेरी अम्मा सोंफतां छडू। 16 इन हेरतां सब लोक डेरि जे, ते परमेशररी तारीफ़ केरने लागे, “अक महान नबी असन मां ओरोए, ते परमेशरे अपने लोकन पुड़ अपनि सिधी नज़र रखोरीए। 17 एस्से गल्लरी वजाई सेइं ए खबर यहूदियारे ते आसेपासेरे सेब्बी मुलखन मां फैली जेई।” 18 ते यूहन्ना तैसेरे चलेई एन सैरी गल्लां केरि खबर दिती। 19 तैखन यूहन्ना एन शुन्तां दूई चले

कुजेइतां यीशु कां पुच्छने भेजे कि, “एजनेबालो तू आस, या असां होरि बलगम?” 20 तैनेई यीशु कां एइतां पुच्छू, “असां यूहन्ना बपतिस्मो देनेबाले तीं कां पुच्छने भेजोरिम, कि एजनेबालो तू आस, या असां होरि बलगम?” 21 तैखन यीशुए बड़े लोक बिमैरन ते तकलीफ, ते भूतन करां छुटाए, ते बड़े काने लोकन एछछन लौ दित्ती। 22 यीशु तैन जोंव, “जैन किछ तुसेई लाहेरूप ते शुनेरूप गेइतां यूहन्ना सेइं ज़ोथ, कि काने लातन, ते टोंटे चलतन, ते कोढ़ी केरू कोढ़ साफ भोते, ते टोंऊने शुन्तन, ते मुड़दे ज़ींते भोतन, ते गरीबन खुशखबरी शुनाई गाचे। 23 परमेशर तैस बरकत देते, जै मीं पुड़ शक न केरे।” 24 ज़ैखन यूहन्नारे बिस्तार देनेबाले लोक वापस चले जे, त यीशु यूहन्नारे बारे मां गवाही देने लगो, “तुस जंगले मां कुन हेरने जोरे थिये? कुन हवाई सेइं हिलते निरैठरे डाल? 25 त फिरी तुस होरू कुन हेरने जोरे थिये? कुन रोड़ं लगगोरां लिगड़न बालो मैन्हु? हेरा, जैना मगां लिगड़ं लाने बाले मैन्हु, ते जैना एश केरनेबाले लोक भोतन। तैना राज महलन मां रातन, 26 त फिरी तुस होरू कुन हेरने जोरे थिये? कुन कोई नबी? हॉ, अवं तुसन सेइं ज़ोताई, नेबी करां बट्टे। 27 ए तैए, जेसेरे बारे मां लिखोरूप, ‘हेर, अवं अपनो बिस्तार देनेबालो तीं अग्री-अग्री भेजताई, जै तेरी बत अग्रावं तियार केरेलो।” 28 यीशुए जोंव, “अवं तुसन सेइं सच ज़ोताई, कि जै कुआन्शन करां ज़रमोरोए, तैन मां यूहन्ना बपतिस्मो देनेबाले करां बट्टो कोई नई। पन जै परमेशररे राज़े मां निकडोए, तै यूहन्ना करां बट्टोए।” 29 ज़ैखन तैन लोकेई एन गल्लां शुनी त धड़त नेनेबालेई भी यूहन्ना बपतिस्मो देनेबाले करां बपतिस्मो नेइतां परमेशर धर्मा मन्नो। 30 पन फरीसी लोकेई ते शास्त्री लोकेई तैस करां बपतिस्मो न नेइतां परमेशररी मर्ज़ी अपने बारे मां टाली। 31 “बस्सा, अवं इस ज़मानेरे लोकां केरि मिसाल केस सेइं देई, तैना केसेरे ज़ेरेन? 32 तैना तैन मट्टां केरे ज़ेरेन जैना बज़ारे मां बिशोरां एक्की होरि जो हक देइतां ज़ोतन, ‘असेई तुशे लेइ बेंशोई बज़ाइ, ते तुस न नच्छे, असेई शीग मनाव, पन तुसेईं लेरां न दित्ती!” 33 किजोकि यूहन्ना बपतिस्मो देनेबालो न रोटी खांता अवं, न शराब पीता अवं, ते तुस ज़ोतथ, कि एस पुड़ भूतेरो सैयो आए। 34 मैनेरू मट्टू खातू पीतू अवं, ते तुस ज़ोतथ, ‘हेरा, तै पेटू ते शराबी मैन्हु, कने धड़त नेनेबाले ते पापी लोकां केरो दोस्त।’ 35 पन अक्ल अपने सेबमी मट्टन करां जादे सच्छी साबत भोइ।” 36 फिरी केन्चे फरीसे यीशु कां मिनत की, कि मीं सेइं साथी रोटी खा, बस्सा, तै तैस सेइं साथी तैसेरे घरे जेव, ते तैस सेइं साथी रोटी खांने लगो। 37 त हेरा, अक बदचलन कुआन्श जै तैस नगरेरी थी एन बुझतां कि यीशु फरीसेरे घरे रोटी खांने बिशोरोए, संगमरमरेरे एक्की भांडे मां इत्र आनो। 38 ते यीशुए पावन कां नेडे लेरां देंती खड़ी भोइ, ते तैसेरे पाव एखेइं सेइं सेले ते अपने दोगरे बालेई सेइं पोंछने लगो ते तैसेरे पावन फुम्मड़ी देने लगो कने पावन पुड़ इत्र लाव। 39 जैनी फरीसे यीशु कुजोरो थियो, तैनी एन लाव, त ज़ोने लगो, “अगर ए मैन्हु नबी भोथो त बुझेथो कि जै कुआन्श तैस कांए ते कौने ते ए केरि कुआन्शो? किजोकि ए बदचलने।” 40 यीशु

तैसेरे इन खियाल ज़ैनतां तैस सेइं ज़ोंव, “हे शमौन, मीं तीं सेइं किछ ज़ोनूए।” फरीसे ज़ोंव, “हे गुरू ज़ो।” 41 यीशुए तैस सेइं मिसाल देइतां ज़ोंव “केन्ची शोहकारोरे केन्ची दुईं ज़न्न कां कर्ज़ो थियो, एक्की कां 500 दीनार, ते होरि कां 50 दीनार थियो। 42 ज़ैखन तैन कां देने जो किछ न राऊं, त तैनी शोहकारे दुइने कर्ज़ो माफ़ कमाव। बस्सा, कौन तैन मरां जादे शोहकारे सेइं प्यार केरेलो?” 43 शमौने जुवाब दित्तो, “मेरे समझी सेइं त ज़ेसेरो जादे कर्ज़ो माफ़ कियो।” यीशुए ज़ोंव, “तीं ठीक फेसलो कियो।” 44 यीशु तैस कुआन्शरे पासे तेकतां शमौने ज़ोंव, “कुन तू इस कुआन्शरां तकतस? अवं तेरे घरे अवं, तीं मीं (रीतेरे मुताबिक) पव धोने जो पानी न दित्तू, पन इसां मेरे पाव एखेइं सेइं पव धोए ते अपने दोगरे बालेई सेइं पोंछे।” 45 तीं मीं (रीतेरे मुताबिक) फुम्मड़ी न दित्ती, पन एसां ज़ैखनेरो अवं इड़ी ओरोई मेरे पव्वन फुम्मड़ी देनी न उडैई। 46 तीं मेरे दोगे पुड़ तेल न मल्लो, पन एसां मेरे पावन पुड़ इत्र मल्लो। 47 “एल्हेरेलेइ अवं तीं सेइं ज़ोताई कि, एसांरे जादे पाप जैना एसां कियोरे थिये, माफ़ भोए, किजोकि एसां जादे प्यार कियो, पन जेसेरे थोड़े पाप माफ़ भोतन तै थोड़ो प्यार केरेते।” 48 यीशुए तैस कुआन्शी जो ज़ोंव, “गा तेरे पाप माफ़ भोए।” 49 एस गल्ली पुड़ जैना तैस सेइं साथी रोटी खांने बिशोरे थिये, अपने-अपने मने मां सोचने लगे, “ए कौने जै पाप भी माफ़ केरेते, पाप त सिर्फ परमेशर माफ़ केरेते?” 50 पन यीशुए तैस कुआन्शी सेइं ज़ोंव, “परमेशर तै एल्हेरेलेइ बचाई कि तीं मीं पुड़ विश्वास कियो, हुनी तू खुशी सेइं गा।”

8 थोड़े चिरेरां बाद एरू भोवं यीशु अपने तैन 12 चेलन सेइं साथी नगर-नगर ते इलव्वे-इलव्वे हंठतो ते प्रचार केरतो राव, ते परमेशररे राज़ेरी खुशखबरी शुनातो राव। 2 किछ कुआन्शां भी तैन सेइं साथी थी, जैन मरां भूतां केरो सैयो कढोरो थियो। ते जैन केरि बिमैरी दूर भोरी थी, तैना केरां नव्वां इना आन, मरियम जै मगदलीन इलव्वेरी राने बाली थी, जैस पुड़ं सत भूतां केरो सैयो कढोरो थियो, 3 हेरोदेस राज़ेरे भण्डारी खोज़ेरी कुआन्श योअन्ना ते सूसन्नाह ते होरि भी काई कुआन्शां थी जैना अपनि जेइदात देइतां यीशु ते तैसेरे चेलां केरि सेवा केरती थी। 4 फिरी ज़ैखन बड़े लोक तैस कां अकट्टे भोए, जैस मां नगरां-नगरां केरे लोक तैस कां एइते थियो। यीशुए तैन मिसाल देइतां ज़ोंव। 5 “एक्सां अक बीज बेनेबालो बीज बेने जो जेव। बीज बेते बार किछ बीज बत्तेरे इलेखी बिछड़ू ते अम्बरेरे चुड़ोलेई एइतां तैन बीज चुनू। 6 ते किछ बीज घोड़नबाली ज़मीनी पुड़ बिछड़ू, ते लगगू पन जल्दी शुक्की जेव, एल्हेरेलेइ कि तैस पानी न मैल्लू। 7 किछ बीज कंटां केरे झैल्लन मां बिछड़ू। ज़ैखन तैड़ी बूटो लगो, त कंटां केरे झैल्लेई भी बेड़ोइतां तै बूटो दबेइ छट्टो। 8 ते किछ बीज रोड़ी ज़मीनी मां बिछड़ू, ते लगू ते शौव गुणा फल लगो,” एन शुनेइतां तैनी तैन सेइं उच्छी आवाज़ी मां ज़ोंव, “जै कोई समझनू चाते, तै ध्याने सेइं शुने ते समझे।” 9 तैसेरे चेलेई तैस पुच्छू, “एस मिसालरो कुन मतलबे?” 10 यीशुए तैन ज़ोंव, “तुसन परमेशररे राज़ेरे भेदां केरि समझ दित्तीरोए, पन अवं होरि लोकन मिसाल देइतां

जोताई, 'तैन तैना बार-बार शुनेले, पन मेरी गल न समझेले।' 11 "एस मिसालरो ई मतलबे, कि बीज परमेशेरू वचने। 12 जैना मैन्हु परमेशेरू गल्लां शुन्तन, तैन मरां किछ लोक तैस बत्तेरे जेरे आन, जैडी बीज बिछड़ते। तैना त परमेशेरू गल्लां शुन्तन, पन शैतान अकदम एइतां तैन मैन्हु केरे दिले मरां तैन वचन धिनी गाते, कि एरू न भोए कि तैना विश्वास केरन ते तैन मुक्ति मैल्ले। 13 ते घोड़नबाले ज़मीनी मां बेवरू बीज तैने, जैना वचन शुन्तां खुशी सेइं मन्तन पन ज़ील न छड़े सेइं तैना थोड़े घिरे तगर विश्वास रखतन ते अज़मैशरे मौके मुडी गातन। 14 ते ज़ैन झल्लन मां बीज झड़ू तैना इना आन, जैना वचन शुन्तन, पन अग्रोवं चेलतां फिक्र ते दौलत ते जिन्दगरो एशो-अशरती मां फेसी गातन ते तैन केरो फल न पक्के। 15 पन रोडी ज़मीनी पुड़ेरूए बीज तैन्न, जैना वचन शुन्तन ते अमल भी केरतन, ते रोड़ेरारे दिले मां बसातन ते सबरी सेइं फल भी लगते। 16 "कोई दीयो बैलतां केन्ची भांडे हैठ ओइकतां न रखे, ते न खट्टी हैठ रखे बल्के उच्ची ठैरी रखतन ताके दीयो अन्तर एजने बालन लौ दे। 17 किजोकि कोई एरी चीज छपोरी नई, जै बांदी नई भोनी, ते कोई भेद छपोतो न रालो, पन सारो भेद बांदो भोलो। 18 बस्सा हुशार राथ, कि तुस केन्चेर शुन्तथ? जैस कां परमेशेरू मर्जी समझनेरी इच्छा आए, तैस परमेशर जादे समझ देलो। पन जैस कां परमेशेरू मर्जी समझनेरी इच्छा नई, तैस केरां थोडी ज़ेरि समझ, जै तैस कां आए, तै भी नी गाली।" 19 फिरी तैसेरी अम्मा ते तैसेरे ढूला तैस कां आए, पन हले मैन्हु केरि वजाई सेइं तैस कां न पुजी सके। 20 ते यीशुए पतो दित्तो, "तेरी अम्मा ते तेरे ढूला बेइर खड़े आन ते तैना तीं सेइं गल केरनि चातन।" 21 यीशुए तैन जुवाब दित्तो, "मेरी अम्मा ते मेरे ढूला इना आन जैना परमेशेरू वचन शुन्तन ते तैस पुड़ अमल भी केरतन।" 22 फिरी एक्की दिहाड़े एरू भोवं, कि यीशुए अपने चलन सेइं ज़ोवं, "एज्जा, समुन्दरे पार गाम ते तैना किशती मां च़ेइतां समुन्दरे पार च़ले जे।" 23 पन ज़ैखन किशती च़लोरी थी, त यीशुए झुली जेव ते समुन्दरे पुड़ बड़ो तूफान अव, ते किशती पैनी सेइं भरोने लग्गी, ते तैन खतरा भोइ जेव। 24 च़ेलेई तै बींइइइतां तैस सेइं ज़ोवं, "हे गुरु, असां मेरि गातम यीशु खड़े उठो ते हवाई जो ते पैनी जो ज़ोवं, रुकी गाथ ते तूफान रुकी जेव।" 25 यीशुए अपने चलन सेइं ज़ोवं, "तुशो विश्वास कोरां जेव?" तैना डेरि जे ते हैरान भोइतां एपू मांमेइं ज़ोने लगे, "ए कौने! ए हवाई त पैनी भी हुक्म देते ते तैना एसेरो हुक्म मन्तन।" 26 फिरी तैना गिरासेनी इलाके मां पुजे, जै गलील समुन्द्रे सामने पारे। 27 ज़ैखन तै बन्ने पुड़ ओस्सो, त तैस नगरेरो अक मैन्हु मैल्लो जैस पुड़ भूतां केरो सायो थियो, ते तै बड़े दिहाड़े केरो देंतो न लिंगड़ां लातो ते न घरे रातो थियो, बल्के कब्रन मां रातो थियो। 28 तैनी मैने यीशु लाव ते चिन्दां लगे मारने, ते तैसेरे सामने झुकतां ज़ोरे सेइं ज़ोने लगे, "हे यीशु परमप्रधान परमेशेरू मट्टां! तीं मीं सेइं कुन कम्मे? अव तीं कां मिनत केरताई मीं दुख न दे।" 29 किजोकि यीशु तैस भूते तैस मैन्हु मरां निसनेरो हुक्म देने लोरो थियो, एल्हेरेलेइ तै बड़े बुरे तरिके सेइं टूलेइतां रखोरो थियो, ते लोक तैस कैबू केरनेरे लेइ

अग्री भी रसन ते शंगलन सेइं बेंधतां रखते थिये, ते तै तैन भी टूलोइतो थियो, ते भूत तैस मैन्हु जंगले मां नेतू थियूं। 30 यीशुए तैस पुच्छू, "तेरू कुन नवं आए?" तैनी ज़ोवं "मेरू नवं फौज आए," किजोकि तैस मां बड़ां भूतां थियां। 31 ते तैनेई तैस कां मिनत की, "असन अथाह कुण्डे मां गानेरो हुक्म न दे।" (Abyssos g12) 32 तैडी पहैडी पुड़ अक सूरां केरो बड़ो घान थियो, ते तैनेई तैस कां मिनत की, "असन एन मां गाने दे ते यीशुए गाने दित्तां।" 33 ते तैना भूतां तैस मैन्हु मरां निस्तां तैन सूरन मां च़ेलि जेआं, ते सूरां केरो सारो घान उत्रेई उन्डे छालां मैरतां समुन्दरे मां डुबतां मेरि जेव। 34 सूरां केरे चारनेबाले एन हेरतां नेशशी जे, ते नगर मां ते ड़ोलोव्वन मां एस गल्लरी खबर शुनाई। 35 लोक ते तमाशो हेरने आए, ते यीशु कां ज़ैस मैन्हु मरां भूतां केरि फौजरो सैयो निसोरो थियो, तैनी लिंगड़ां लां ते होशी मां एइतां यीशु कां बिशरोरो लाव ते डेरि जे। 36 जैनेई तैना गल्लां पेइले लेवरी थी, तैनेई ज़ोवं, इस मैन्हु पुड़ भूतां केरो सैयो थियो ते ए केन्चेरे बेइजोव। 37 ते गिरासेनियों इलाके मां च़ेरे पासां केरे लोक यीशु कां मिनत केरने लग्गे, कि इट्टां च़लो गा, किजोकि तैना बड़े डरें थिये, ते यीशु किशती मां बिशतां वापस च़लो जेव। 38 पन ज़ैस मैन्हु मरां भूतां निस्सोरां थियां तै यीशु कां मिनत केरतां ज़ोने लगे, मीं एपू सेइं साथी रख पन यीशुए तै भेजो ते ज़ोवं। 39 "अपने घरे च़लो गा ते लोकन सेइं ज़ो, कि प्रभु परमेशरे तीं पुड़ दया केरतां तेरे लेइ केरू बडू कम कियोरूए। तैखन तै च़लो जेव ते सारे नगर मां एस गल्लारो प्रचार केरने लगे, कि यीशुए मेरे लेइ केरू बडू कम कियोरूए।" 40 ज़ैखन यीशु वापस एज्जा राहोरो थियो, ते लोक बड़े खुशी सेइं तैस सेइं मिले, किजोकि तैना सब तैस बलगते थिये। 41 ते हेरा यार्डर नव्वेरो अक मैन्हु ज़ै प्रार्थना घरेरो अक प्रधान थियो, यीशु कां अव ते तैसेरे पावन पुड़ पेइतां मिनत केरने लगे, "तू मेरे घरे च़ल।" 42 किजोकि तैसेरी अक्के कुई ज़ै 12 सालां केरि थी, तै मरनेबाली थी। ते ज़ैखन यीशु च़लोरो थियो, त लोक तैस उन्डे बिछड़ते थिये। 43 ते अक कुआन्श भी थी, जैस 12 सालां केरि खून च़लनेरी बिमारी थी। ते तैसां अपनो सारो जिन्दगरो पेंइसो हकीमन कां अल्लाजैरे लेइ खर्च कियोरो थियो, ते तै केन्चेरे हथ्थे ठीक न भोइ। 44 तै कुआन्श यीशु पतोरां एइतां तैसेरे चोगे सेइं हुरी, त अकदम तैसेरी खून च़लनेरी बिमारी बेज्जोई। 45 यीशुए ज़ोवं, "मेरे लिगड़े सेइं केनि हथ लाव?" ज़ैखन सब लोक इन्कार केरने लगे, त पतरसे ते तैसेरे सैथेई ज़ोवं, "ए गुरु, लोक तीं ढूलांघने ते तीं उन्डे बिछड़ने लोरेन।" 46 पन यीशु ज़ोवं, "केन्चे मीं सेइं हथ लोरोए किजोकि मीं पतो लगे कि मीं मरां शक्ति निसोरि।" 47 तैखन तैस कुआन्शां हेरू, कि अव छेप्पी न बेटि, त तै डरती-डरती सामने अई ते यीशुएरे पावन पुड़ बिछड़तां सैरी लोकां केरे सामने ज़ोने लगी, मीं तीं सेइं हथ लोरोए, ते ज़ेरो मीं हथ लोरोए अव अकदम बेज्जोरी। 48 यीशुए तैस कुआन्शी ज़ोवं, "हे कुईए, तेरे विश्वासे तू बज्जाई ते खुशी सेइं च़ली गा।" 49 यीशुए एन हेजू ज़ोतो थियो, त प्रार्थना घरेरे प्रधानेरे तैट्टां केन्चे मैने एइतां ज़ोवं, "तेरी कुई मेरि जेवरिए, हुनी गुरु तकलीफ न दे।" 50

पन यीशु एन शुन्तां जुवाब दित्तो, “न डर। सिर्फ मीं पुड़ विश्वास रख कुई बेंची गानीए।” 51 ज़ैखन तै तैस घरे मां जेव, त तैनी पतरस यूहन्ना ते याकूब ते कुइयरे हाज बच्चेरे अलावा होरो कोई अन्तर एजने न दित्तो। 52 सब लोक तैस कुइयरे लेइ लेरां देंते थिये, पन यीशुए ज़ोवं, “लेरां न देथ, ए कुई मूओरी नई बल्के झुलोरोए।” 53 लोक एन शुन्तां हसने लगे, किजोकि तैना ज्ञानते थिये कुई मेरि जेवरिए। 54 पन यीशुए तैस कुइयरो हथ ट्लाव ते ज़ोवं, “कुइये खड़ी उठ।” 55 ते तैसारे प्राण वापस आए ते तै लूशी खड़ी भोइ, ते यीशुए तैन ज़ोवं, एस कुइये किछ खाने जो देथ। 56 तैस कुइयरे हाज बव हैरान रेइजे, पन तैनी तैन सेइं समझैइतां ज़ोवं, जैन किछ इड़ी भोवं एन केन्ची सेइं न ज़ोइयथ।

9 यीशुए अपने 12 चले एप्पू कां कुजाए ते तैन शक्ति ते अधिकार दित्तो कि सैरी भूतन कढन ते बिमैरी दूर केरन। 2 ते यीशुए तैना परमेशरेरे राज़ेरो प्रचार केरनेरे लेइ ते बिमार बज़्जानेरे लेइ भेजे। 3 तैनी तैन सेइं ज़ोवं, “बत्तां जो किछ न नेइयथ, न सोटी न झोलो न रोटी न पेंडसे ते न दुइयोवं लिगड़ां। 4 ज़ैस घरे मां गाथ त तैड़ी बिशरी रेइयथ ज़ां तगर तुस तैस नगरे मरां न गाथ। 5 ते ज़ैस नगरेरे लोक तुसन कबूल न केरन त तैस नगर मरां गांते बार अपने पांवां केरि धूड ठुइकथ, ताके तैन पुड़ गवाही भोए।” 6 बस्सा, तैना चले जे, ते ड्लोव्वे-ड्लोव्वे गेइतां परमेशरेरी खुशखबरी शुनाते, ते लोकन बिमैन करां बज़्जाने चले जे। 7 मुलखेरो च़ेवरोवं हिस्से पुड़ हेरोदेस राज़ो राज़ केरतो थियो, तै एन सब शुन्तां डेरि जेव। किजोकि किछ ज़ोते थिये यूहन्ना मुइदन मरां ज़ीतो भोरोए। 8 ते किछ ज़ोते थिये एलिय्याह लेइहोरोए, ते किछ ज़ोते थिये नेबन मरां कोई ज़ीतो भोरोए। 9 पन हेरोदेसे ज़ोवं, “यूहन्नारी क्रोड़ी त मीं कट्टेरी थी, पन ए कौन आए, जेसेरे बारे मां एरी ज़ेरि गल्लां शुन्ने मां एजने लोरिन?” ते हेरोदेस यीशु हेरनेरी इच्छा की। 10 फिरी प्रेरितेईं वापस एइतां जैन किछ कियेरू थियूं, यीशु सेइं शुनावं, ते यीशु तैन अलग नेइतां बैतसैदा नव्वेरे नगर मां च़लो जेव। 11 ते बड़े लोक तैस पत्ती च़ले, ते यीशु बड़े खुशी सेइं तैन सेइं मिलो। ते तैन सेइं परमेशरेरे राज़ेरी गल्लां केरने लगे, ते ज़ैना बिमार ठीक भोनू चाते थिये, तैनी तैना बज़्जाए। 12 ज़ैखन दिहाड़ी डुबने लगी त तैन 12 चलेईं यीशु सेइं ज़ोवं, “एन लोकन भेजी छड़ एना कोस्कोई ड्लोव्वन मां गेइतां बिशन ते रोट्टारो इंतज़ाम केरन। किजोकि असां गैर आबाद ठैरी आमा।” 13 तैनी तैन सेइं ज़ोवं, “तुस्से एन किछ खाने जो देथ।” तैनेईं ज़ोवं, “असन कां पंच रोटी ते दूई मेछलीन करां जादे किछ भी नई, पन असां गेइतां एन जेईं रोटी मुल्ले घिन्तां आनतम, त इन भोइ बटते।” 14 (किजोकि तैन लगभग 5000 मड़द थिये।) यीशुए अपने चलन सेइं ज़ोवं, “एन लोकन 50-50 मैन्हु केरि हुन्डी मां बिशाला।” 15 ते चलेईं तैने कियूं ते तैना तेन्चरे बिशाले। 16 तैखन तैनी तैना पंच रोटी ते दूई मेछली नी, ते अम्बरेरां तेकतां शुक्र कियूं, फिरी तैनी तैना रोटी टलोड़ी ते चलन कां दित्ती, कि तैन बिशालोरे लोकन खाने जो देन। 17 सारे मैन्हु खेइतां रेज़्जी जे। तैल्ला पत्ती, यीशुएरे चलेईं बचारे टुकड़न सेइं 12 टोकरि

भेरि। 18 एक्की बार यीशु अकैल्लो प्रार्थना केरने लोरे थियो, ते चले भी तैस सेइं थिये। यीशुए तैन पुच्छू, “कि लोक मींजो कुन ज़ोतन?” 19 चलेईं जुवाब दित्तो, “किछ ज़ोतन यूहन्ना बपतिस्मो देनेबालो, ते किछ ज़ोतन एलिय्याह, ते किछ ज़ोतन नेबन मरां कोई अक ज़ीतो भोरोए।” 20 तैखन यीशुए चलन पुच्छू, “पन तुस मेरे बारे मां कुन सोचतथ कि अवं कौन आई?” पतरसे जुवाब दित्तो, “तू परमेशरेरो मसीह आस।” 21 तैखन तैनी तैन खबरदार केरतां ज़ोवं, “कि ए गल केन्ची सेइं न ज़ोइयथ।” 22 यीशुए ज़ोवं, “मैनेरे मट्टेरे लेइ ज़रूरी आए, कि तै बड़ो दुःख झैल्ले, यहूदी लोकां केरे बुजुर्गन, प्रधान याजकन, ते शास्त्री तैस घटिया सेमझतां मारेले, ते तै टलेइयोवं दिहाड़े फिरी ज़ीतो भोलो।” 23 फिरी यीशुए तैन सेम्भन ज़ोवं, “अगर कोई मीं पत्ती एजनेो चाए, त अपने आपरो इन्कार केरे, ते रोज़ अपनू कूस छूए ते मीं पत्ती च़ले। 24 किजोकि ज़ै कोई अपनि जान बचांनी चाते तै तैस गुवालो, पन ज़ै मेरे लेइ अपनि जान गुवालो त तै तैस बचालो। 25 मैन्हु अगर सारी दुनिया हासिल केरे, ते अपनि जानरो नुकसान केरे, या अपनो आप गुवाए, त तैस कुन फेइदो? 26 किजोकि अगर कोई मैन्हु मीं करां त कने मेरी गल्लन करां शरमाते, ते मैनेरू मट्टू यानी अवं भी तैस केरां शरमालो। जेइस अवं अपने बाजी केरि महिमा सेइं साथी त कने पवित्र स्वर्गदूतन सेइं साथी वापस एज्जलो, त तेइस अवं तैस केरां भी शरमालो।” 27 “अवं तुसन सेइं सच ज़ोतईं कि ज़ैना इड़ी खड़े आन, तैन मरां किछ मैन्हु एरे आन कि ज़ांतगर तैना परमेशरेरे राज़ेरी शक्ति न हेरेले, तांतगर तैना न मरेले।” 28 एन गल्लां केरे लगभग अठ दिहाड़ना बाद पतरस, ते यूहन्ना ते याकूब साथी नेइतां एक्की पहाड़े पुड़ प्रार्थना केरने च़ले जे। 29 ते ज़ैखन यीशु प्रार्थना लोरो थियो केरने, त तैसेरी शकल बेदलोईं जेई, ते तैसेरां लिगड़ां लोअरां ज़ेरां चमकने लगे। 30 ते हेरा, मूसा, ते एलिय्याह, इन्ना दूई मड़द तैस सेइं गल्लां केरने लगे। 31 इन्ना महिमा सेइं साथी लेइहोए, ते तैसेरे मरनेरी गलबात केरने लोरे थिये, जैन किछ यरूशलेम नगरे मां भोनेबालू थियूं। 32 पन पतरस ते तैसेरे सैथी केरि एछछी निडली सेइं गिरकी भोरी थी, ज़ैखन तैना बींजे, त तैनेईं तैसेरी महिमा ते तैना दूई मड़द भी लाए, ज़ैना तैस सेइं साथी खड़े थिये। 33 ज़ैखन तैना तैस करां च़ले, त पतरसे यीशु सेइं ज़ोवं, “हे गुरू, इश्शू इड़ी रानू रोडोए, कि असां टलाईं डेरे बनाम, अक तेरे लेइ, ते अक मुसेरे लेइ, ते एलिय्याहरे लेइ।” तैस पतो न थियो, कि तै कुन लोरोए ज़ोने। 34 तै इन ज़ोईं राओरो थियो, तैन पुड़ बिदलार घिरी जेई, ते ज़ैखन तैन केरे च़ेरे पासन बिदलारी घिरी त तैना डेरि जे। 35 तैखन तैस बिदलारी मरां अक आवाज़ आई, “एन मेरू ट्लारू मट्टू आए। ध्याने सेइं एसेरी गल शुना।” 36 ते तैस आवाज़ी सेइं साथी तैनेईं यीशु अकैल्लो लाव, ते तैना चुप राए ते ज़ैन किछ लाहेरू थियूं, तैन केन्ची सेइं न ज़ोवं। 37 होरसां एरू भोवं कि ज़ैखन तैना पहाड़े पुड़ेरां उन्हे ओरे थिये, त बड़े मैन्हु केरि भीड़ तैन कां आई। 38 ते हेरा, एक्की मैने तैन लोकन मरां बड़े ज़ोरे सेइं हक देइतां ज़ोवं, “ए गुरू अवं तीं कां ज़ोवले हथ केरतां कि

मेरे मट्टे पुड दया केर; तैन मेरू अक्के मट्टूए। 39 ते हेर, अक भूत तैस अपने कब्जे मां केरते, ते तैन अकदम चिन्डां मारते, ते कम्बने लगते, ते तैसेरे ऐशेरां शैमफ निसचे, ते भूत तैस बड़े बुरे तरीके सेइं ज़ख्मी केरतां शारते। 40 ते मीं तेरे चेलन कां बिनती कियोरी थी, कि तैस कढन, पन तैना न केढी सके।” 41 यीशुए जुवाब दित्तो, “हे विश्वास न केरने बालाव ते ढीठ लोकव, अवं केइस तगर तुसन सेइं साथी रेइलो ते तुशशी झैल्लेलो? अपने मट्टे इड़ी आन।” 42 तै मसां ओरो थियो, त भूते तैन मट्टू मुरोइतां शारू, पन यीशुए भूत झिइकतां कढू, ते तैन मट्टू बज़्जेइतां तैसेरे बाजैरे हवाले कियूं। 43 ते सब लोक परमेशेरी बेड़ि कुदरती हेरतां हैरान रेइजे, ते ज़ैखन सब लोक तैन कम्मां ज़ैन यीशु केरतो थियो हैरान रहते थियो। त तैनी अपने चेलन सेइं ज़ोवं। 44 “मेरी इन गल्लां रोइचारे शुना किजोकि मैनेरू मट्टू मैन्हु केरे हवाले भोने बालूए।” 45 पन यीशुएरी ए गल चेलान केरि समझी मां न आई, किजोकि तैन करां ए गल छपेरी थी। कि तैन न समझन, ते चले एस बारे मां यीशु पुच्छने करां डरते भी थियो। 46 फिरी चेलन एप्पू मांमेइं बड़ी बेंस भोइ, कि असन मां बड्डो कौन आए? 47 यीशु तैन केरि दिलेरी गल्लां बुझतां निकड़ो बच्चो आनो ते तै एप्पू कां खडू कियूं। 48 ते अपने चेलन सेइं ज़ोवं, “ज़ै इस बच्चे मेरे नंवे सेइं कबूल केरते, तै मीं कबूल केरते, ते ज़ै मीं कबूल केरते, तै मेरे भेजने बाले कबूल केरते। किजोकि ज़ै तुसन मां निकड़े करां निकड़ोए तै सेबन करां बड्डोए।” 49 तैखन यूहन्ना यीशु सेइं ज़ोवं, “ए गुरु, असेईं अक मैन्हु तेरे नंवे सेइं भूतां केरो सैयो कढतो लाव, ते असेईं तैस ठाकू किजोकि तै असन सेइं साथी मिलतां तीं पती न चले।” 50 पन यीशुए जुवाब दित्तो, “तैस न ठाका, किजोकि ज़ै तुशशे खलाफ नईं तै तुशशो पासे।” 51 ज़ैखन यीशुएरे उबरे नेनेरे दिहाड़े पूरे भोने पुड थी त तैनी पक्के चारे यरूशलेम नगरेरे पासे गानेरो खियाल कियो। 52 ते एप्पू करां अग्री-अग्री किछ बिस्तार देनेबाले लोक भेजे। ते लोक सामरी लोकां केरे एक्की डलोव्वें मां जे ताके यीशुएरे एजनेरी ठार तियारी केरन। 53 पन लोकेईं तै एजने न दित्तो, किजोकि तै यरूशलेम नगरे जो चलोरो थियो। 54 एन हेरतां तैसेरे चले याकूब ते यूहन्ना ज़ोने लगे, “हे प्रभु, कुन तू चातस, कि अस हुकम देम, अम्बरेरां अग बखेनतां एन लोकन भस्म केरे?” 55 पन तैनी बेदलोइतां तक्कू, ते तैना झिइके (ते ज़ोवं, “तुस न ज़ानथ कि तुस कौस आत्मारे आथ। 56 किजोकि मैनेरू मट्टू लोकां केरे प्राणन नाश केरने लेइ नईं बल्के बचाने ओरोए) तैखन तैना होरि डलोव्वेरे पासे चले जे। 57 ज़ैखन तैना बत्तां चलोरे थियो, त केन्चे तैस सेइं ज़ोवं, “तू ज़ैडी-ज़ैडी भी गालो, अवं तीं पत्ती चलेलो।” 58 यीशुए तैस सेइं ज़ोवं, “लौई केरि कूढां ते अम्बरेरे चुडोल्लू केरे आले भोतन, पन मैनेरे मट्टे यानी मीं कां कोई ठार नईं ज़ैडी अवं झुल्ली सेक्खी।” 59 फिरी यीशुए एक्की होरि जो ज़ोवं, “मीं पत्ती चल,” पन तैनी मैने ज़ोवं, “हे प्रभु मीं घरे गानेरी अज़ाज़त दे, मेरे बाजैरे मरनेरां बाद अवं तैस देबतां एज्जेलो ते फिरी तीं पत्ती चलेलो।” 60 यीशुए तैस जो ज़ोवं, “ज़ैना लोक आत्मिक तरीके सेइं मरें तैन अपने मैन्हु मरने बलगने दे, पन तू

गा ते परमेशेरे राज़्जेरे बारे मां लोकन मां प्रचार केर।” 61 एक्के होरे भी ज़ोवं, “ए प्रभु अवं तीं पत्ती चलेलो, पन पेइले मीं भेज कि अवं अपने घरेबालन ज़ोईं।” 62 यीशुए तैस सेइं ज़ोवं, “ज़ै कोई हल्लती पुड हथ रेखतां पत्रोवं फिरतां तकते, तै परमेशेरे राज़्जेरे काबल नईं।”

10 ते इन गल्लां केरे बाद प्रभुए 70 होरे चले ठहराए, कि तै ज़ैस-ज़ैस नगर ते ठैरी तैनी एप्पू गानेरे बारे मां सोचोरू थियूं, तैडी दूई-दूई मैन्हु एप्पू अग्री भेजे। 2 ते तैनी तैन सेइं ज़ोवं, “पकोरी फसलरे ज़ेरे बड़े लोक तियार आन ज़ैना परमेशेरे वचने पुड विश्वास केरनू चातन, पन कम केरनेबाले थोड़े आन ज़ैना तैन परमेशेरे राज़्जेरे बारे मां ज़ोन। एलहेरेलेइ तुस फसलरे मालिके कां प्रार्थना केरा कि ते जादे कम केरनेबाले भेजे, कि तैना लोकन परमेशेरे राज़्जेरे बारे मां ज़ोन।” 3 गाथ, अवं तुसन भेड्डां केरे ज़ेरे गिदम मां भेजताईं। 4 एप्पू सेइं साथी न बेटवे, न झोलो, न बूट नेइयथ, ते न बत्तां केन्ची जो नमस्कार जोइयथ। 5 ज़ेसेरे घरे मां गाथ त पेइले ज़ोथ कि, “इस घरे मां शान्ति भोए।” 6 अगर तैडी एरे लोक ज़ैना परमेशेरेरी शान्ति चातन तैडी रहते भोलो, त तुशशी शान्ति तैस पुड राली, नईं त तुशशी शान्ति तुसन पुड एज्जेली। 7 तैसेरे घरे मां राथ, ते ज़ैन किछ तैन करां मैल्ले, तैन्ने खाथ-पीथ किजोकि मज़दूर अपन मज़दूरो हकदार भोते, घरे-घरे न गेइयथ। 8 ते ज़ैस नगर मां गाथ, ते तैट्टेरे लोक तुसन अपने घरे मां नेन, त ज़ैन किछ तुशशे सामने रखू गाए तैन्ने खाथ। 9 तैट्टेरे बिमारन बज़्जाथ, ते तैन सेइं ज़ोथ, “परमेशेरे राज़ नेड़े ओरूए।” 10 पन ज़ैस नगर मां गाथ, ते तैट्टेरे लोक तुसन कबूल न केरन, त तैट्टेरे बज़ारन मां गेइतां ज़ोथ। 11 “कि तुशशे नगरेरी धूड भी इशशे पावन सेइं ज़ै लगेरीए अस तुशशे सामने तुडकतम ते फिरी भी बुझा कि परमेशेरे राज़ तुशशे नेड़े पुजेरूए।” 12 अवं तुसन सेइं सच्च जोताईं, तैस दिहाड़े तैस नगरेरी हालत सदोम नगरेरी हालत झैल्लनेरे काबल भोली। 13 “हे खुराजीन! तीं पुड अफ़सोस! हे बैतसैदा तीं पुड अफ़सोस! कि एना चमत्कार मीं तुसन इड़ी हिराए अगर मीं एना कम्मां सूर ते सैदा मां हरेवरां भोथां, त तैन लोकेईं केइसेरे देंते टाट पलेटतां ते दोगे पुड मांजंन छेइतां पापन करां मनफिरावरो भोथो। 14 पन फिरी भी इन्साफेरे दिहाड़े तुशशो हाल सूर ते सैदारे हाले करां जादे बुरो भोलो। 15 ते हे कफ़रनहूम नगरेरे लोकव, कुन तुस सोचतथ कि स्वर्गें मां तुशशी आदर भोनीए! ई तुस त नरके गाले ज़ैडी पैपी लोकन सज़ा मैलेली! (Hadēs g86) 16 ज़ै तुशशी शुन्ते, तै मेरी शुन्ते ज़ै तुसन घटिया समझते तै मीं घटिया समझते, ते ज़ै मीं घटिया समझते ते मेरे भेजने बाले घटिया समझते।” 17 तैना सतर चले खुशी सेइं वापस आए, ते ज़ोने लगे, “हे प्रभु तेरे नंवे सेइं भूतां भी इशशो हुकम मन्तन।” 18 तैनी तैन सेइं ज़ोवं, “मीं शैतान एन्चरे बिछड़तो लाव ज़ेन्चरे चड़क अम्बरेरां पेचे। 19 हेरा, मीं तुसन सप्पन ते बिचन ड्लेंचनेरो, ते दुश्मनेरी (शैतानेरी) सैरी शक्ति पुड अधिकारे दित्तोरोए, ते केन्ची चीज़ी सेइं तुसन नुकसान न भोलो। 20 फिरी भी तुस इस गल्ली सेइं खुशी न भोइयथ कि भूतां तुशशो हुकम मेनचन, पन इस गल्ली सेइं खुश भोइयथ कि तुशशू

नवं स्वर्गं मां लिखोरूप।” 21 तैखन यीशु पवित्र आत्मा सेइं मघन भोवं, ते ज़ोने लगे, “हे बाजी, स्वर्गरे त धरतेर प्रभु, अवं तेरु शुक्र केरताई, कि तीं इना गल्लां, अक्लमन्द ते समझदारन करां छुपेइतां रेख्खी, ते बच्चन पुड़ बेंदी की, हॉं, हे बाजी, किजोकि तेरी खुशी एस्से मां थी। 22 सैरी चीजां मेरे बाजेरी तरफां मेरे सुपुर्द कियोरिन, कोई होरो मट्टे न ज़ाने, सिर्फ बाजी ज़ानते; कोई बाजी न ज़ाने सिर्फ मट्टू ज़ानते, या तै मैन्हु बाजी ज़ानते ज़ैस पुड़ मट्टू बांदो केरने चाए।” 23 तैखन तैनी अपने चेलां केरे पासे फिरो अकैल्ले मां ज़ोवं, “धन आन तैना एछ्छी ज़ैना एना गल्लां हेरचन ज़ैना गल्लां तुस लातथ, 24 किजोकि अवं तुसन सेइं ज़ोतां, कि बडे नेबन ते राजां केरि खुवैइश थी, कि एना गल्लां हेरन, ज़ैना तुसेईं लेई, पन न लेईं सके, ते एना गल्लां शुन्न ज़ैना तुस शुन्नथ पन न शुनी बेटि।” 25 एकसां यीशु लोकन शिक्षा देने लोरो थियो, ते हेरा, अक शास्त्री खड़ी भोव, ते इन ज़ोइतां तैस अज़माने लगे, “ए गुरु, हमेशारी ज़िन्दगी हासिल केरनेरे लेइ अवं कुन केरि?” (aiōnios g166) 26 तैनी तैस जुवाब दित्तो, “मूसेरे कानूने मां कुन लिखोरूप? तू केन्चरे समझतस?” 27 तैनी जुवाब दित्तो, “तू प्रभु अपने परमेशरे सेइं अपने सारे दिले, सैरी जानी सेइं, ते अपनि सैरी ताकती सेइं ते अपनि सैरी अक्ल सेइं प्यार रख, ते अपने पड़ोसी सेइं अपने बराबर प्यार केर।” 28 तैनी तैस सेइं ज़ोवं, “तीं ठीक जुवाब दित्तो एन्ने केर, फिरी तीं हमेशारी ज़िन्दगी मैलेली।” 29 पन तैनी अपनो आप धर्मा ठहरानेरे लेइ यीशु पुच्छू, “फिरी मेरो पड़ोसी कौने?” 30 यीशुए तैस मिसाल देइतां जुवाब दित्तो, “अक मैन्हु यरूशलेम नगरेां यरीहो नगरे जो च़ल्लोरो थियो, ते तै डैकेइं तैस पुड़ हमलो कियो, ते ज़ैन किछ तैस कां थियूं नेव। ते तैसेरां लिगड़ां खोल्लां, ते मारो कुट्टो ते ज़ख्खी केरतां अधमरो बनेइतां तैड़ी ज़ेरे छड़तां च़ले जे। 31 ते एरू भोवं कि, अक याजक तैस बत्तां च़ल्लोरो थियो, तैनी तै लव ते थरकतो तैसेरी मद्दत केरने बगैर ड़लखमेइं निस्सो। 32 एन्चरे अक मन्दरे मां कम केरनेबालो लेवी भी निस्सो, ते तैस लेइतां तै भी ड़लखमेइं निस्सो। 33 फिरी अक सामरी मुसाफर भी तैस बत्तां निस्सो, ते तैस लेइतां तैस बड़ो तरस अव। 34 ते तै तैस कां जेव, ते तैसेरे ज़खमन तेल मल्लो ते दाछोरो रस लाव, ते तैसेरे ज़खमन पट्टी बंधी ते अपने गधे पुड़ च़ेढ़तां एक्की धर्मशाली मां तैसेरी सेवा की। 35 होरसां तैनी दूई दीनार केढतां धर्मशालेरे मालिके कां दित्ते, ते ज़ोवं, ‘एसेरी हेरगेश करां अगर जादे लगले त अवं वैपसी पुड़ देलो।’ 36 तेरे समझीं मां एन ट्लेइन मरां कौन तैसेरो पड़ोसीए ज़ै डैकेइं ट़लातोरो थियो?” 37 तैनी जुवाब दित्तो, “ज़ैनी तैस पुड़ दया की।” यीशुए तैस सेइं ज़ोवं, “गा, तू भी एरू केर।” 38 फिरी ज़ैखन यीशु त कने तैसेरे च़ेले गेइ रावरे थियो, त तैना एक्की ड़लव्वं मां जे, ते मार्था नव्वेरी एक्की कुआन्शां यीशु अपने घरे नीयो। 39 ते मरियम नव्वेरी तैसेरी अक बेइन थी, तै यीशुएरे पावन कां बिश्तां तैसेरी गल्लां शुनती थी। 40 पन मार्था किछ खास चीज़ बनेइ रावरी थी, ते यीशु कां आई ते ज़ोने लगी, “हे प्रभु तुसन ज़रां भी खियाल नई कि, मेरी बेइनां अवं कम केरनेरे लेइ अवं अकैल्ली छड़ोरी? ते एस

ज़ोथ, तै मेरी मद्दत केरे।” 41 प्रभुए तैस जुवाब दित्तो, “मार्था, हे मार्था, तू बेइ गल्लां केरे फिक्क केरतिस, 42 पन अक गल ज़रूरीए, मरियमा तै रोड़ो हिस्सो चुनोरोए, ज़ै तैस करां कोई न नेइ सके।”

11 फिरी यीशु एक्की ठैरी प्रार्थना लोरे थियो केरने। ते ज़ैखन तैनी प्रार्थना की, ते तैसेरे च़ेलन मरां एक्के ज़ोवं, “हे प्रभु, ज़ेन्चरे यूहन्ना अपने च़ेलन प्रार्थना केरनि शिखालोरिये तेन्चरे तू भी असन शिखाल।” 2 यीशुए तैन सेइं ज़ोवं, “ज़ैखन तुस प्रार्थना केरथ, त एन ज़ोइयथ, ‘हे बाजी, लोक तेरी आदर केरन किजोकि तू पवित्र परमेशर आस। ते तेरू राज एज्जे।’ 3 ‘इशशी रोज़ेरी रोट्टी असन दे। 4 इशशे पाप माफ़ केर, किजोकि अस भी ज़ैना इशशे खलाफ बुराई केरतन, तैन माफ़ केरतम। अज़मैइशेरे ज़िरिये असन पाप केरने न दे।’ 5 फिरी यीशुए तैन सेइं ज़ोवं, “फ़र्ज़ केरा तुसन मरां केन्चरो अक दोस्त एध्धी राती अपने दोस्ते ज़ोए, ‘तू मीं ट़लाई रोट्टी दे। 6 किजोकि मेरो अक दोस्त बडे दूरां हंठतो मेरे कां ओरोए, ते मेरे कां रोट्टी नई, कि अवं तैस रोट्टी देइ सेखी।’ 7 ते तै तैसेरो दोस्त अत्रां जुवाब दे, मीं दुःख न दे, हुनी त दार बंदे, मीं कां मेरे बच्चे झुलोरेन, ते अवं तीं रोट्टी न देइ सेखी। 8 अवं तुसन सेइं ज़ोताई कि, अगर तै तैसेरो दोस्ते ते तैस रोट्टी न दे, त तैसेरो दोस्तेरे बार-बार मिनत केरने सेइं ज़रूर तैस रोट्टी देलो ते ज़ेन्त्री रोट्टी केरि तैस ज़रूरत भोली देलो। 9 ते अवं तुसन सेइं ज़ोताई, मग्गा त तुसन दित्तू गालू। ते तोप्या, त तुसन मैल्ली गालू। ते दार गुड़काथ, त तुशशे लेइ खोल्लू गालू। 10 किजोकि ज़ै कोई मगते तै हासिल केरते, ते ज़ै कोई तोपते तैस मैल्ली गाते, ते ज़ै कोई दार गुड़काते त तैसेरेलेइ खोल्लू गाते। 11 तुसन मरां कौन ज़ेरो बाजी एरो भोए, कि ज़ैखन तैसेरू मट्टू रोट्टी मग्गे त तैस घोड़ दे? या मछली मग्गे, ते तै सप दे? 12 या ठूल मग्गे त तैस बिच्चू दे? 13 ते तुस बुरे भोनेरे बावजूद भी अपने मट्टन रोड़ी चीजां देनी ज़ानतथ त तुशशो स्वर्गोरो बाजी तैन, ज़ैना तैस करां मगतन पवित्र आत्मा किना देलो।” 14 फिरी तैनी एक्की लट्टे मरां भूतेरो सैयो कढो, ज़ैखन भूतेरो सैयो निस्सो, त ते लट्टो गल्लां लगे केरने, ते लोक हैरान रेइजे। 15 पन तैन मरां किछ मैनेईं ज़ोवं, “ए त भूतां केरे गुरु शैतानेरे मद्दती सेइं भूतां कढते।” 16 ते किछेईं अज़मानेरे लेइ तैस करां कोई अक अम्बेरो निशान मग्गो। 17 पन यीशुए तैन केरे मन्नां केरे खियाल ज़ैनतां तैन सेइं ज़ोवं, “ज़ैस-ज़ैस राज्जे मां फूट पेचे, तैन राज बनोरू न राए, ते ज़ैस खानदाने मां फूट पेचे, तैन भी बनोरू न राए। 18 अगर शैतान अपनि खलाफत एप्पू केरे, त फिरी तैसेरू राज केन्चरे रेइ सकते? फिरी तुस केन्चरे ज़ोतथ कि अवं शैतानेरे मद्दती सेइं भूतां कढताई। 19 अगर अवं शैतानेरी मद्दती सेइं भूतां कढताई त तुशशी औलाद कसेरे मद्दती सेइं कढती? तैना तुशशो फैसलो केरनेबाले हाकिम भोले। 20 पन अगर अवं परमेशरेरे शक्ति सेइं भूतां कढताई त परमेशेरू राज तुशशे नेइ पुजोरूप। 21 ज़ैखन कोई ज़ोरेबाले मैन्हु अपने घरेरो पैरहो केरते, त तैसेरू सब किछ बंचेरू रहते। 22 पन ज़ैखन तैस करां कोई निगर मैन्हु तैस पुड़ हमलो केरते त तैस अपने कब्जे मां केरतां तैसेरे सारे हथियार धिनी गाते

जैसे पुड़ तैसेरो भरोसो थियो, ते तैसेरी सारी जेइदाद लुटी गाते। 23 जै मीं सेइं साथी नई ते मेरे मुखालफ, ते जै मीं सेइं साथी अकोट्टू न केरे ते तै खिलारते। 24 “जैखन केन्ची मैन्हु मरां भूत निसते त तैन शुक्कोरो ठैरन मां आराम तोपते ते जैखन तैस तै आराम न मैल्ले त ज़ोते कि अवं वापस तैस्से घरे मां गालो ज़ैट्टां अवं निसरोई। 25 ते तैखन तैन भूत वापस एइतां तैन घर साफ सुथरु रौडू लाते। 26 तैखन तै एप्पू सेइं साथी सत होरां भूतां साथी घिन्तां तैस मां अन्तर गेइतां बिशतन, ते तैस मैनेरो हाल पेइले हाले करां जादे बुरो भोते।” 27 जैखन यीशु इना गल्लां ज़ोने लग्गोरो थियो, त भीड़ी मरां अक कुआन्श जोरे सेइं ज़ोने लगी, “धने तै कुआन्श ज़ैसां तीं ज़र्म दित्तू ते तू पालो।” 28 पन यीशुए ज़ोवं, “हाँ, पन धन आन तैना लोक ज़ैना परमेशेरू वचन शुन्तन ते तैस पुड़ अमल केरतन।” 29 जैखन हल्ले लोक भोने लगे त यीशु ज़ोवं, “इस ज़मानेरे लोक बुरेन, तैना निशान तोपतन, पन योनेरे निशानेरे अलावा एन होरो कोई निशान न दित्तो गालो। 30 किजोकि ज़ेन्चरे योना नबी नीनवेरे लोकन जो निशान बनो तेन्चरे मैनेरू मट्टू भी इस ज़मानेरे लोकां केरे लेइ निशान बनेलू। 31 पन दक्षिणेरी रानी आदालतरे दिहाड़े इस ज़मानेरे लोकन दोषी बनानी, किजोकि तै बड़े दूरेरां सुलैमानेरे ज़ानेरे बारे मां शुन्तां ओरी थी। ते इड़ी हेरा सुलैमाने करां भी बड्डोए। 32 नीनवेरे लोक आदालतरे दिहाड़े इस ज़मानेरे लोकन सेइं साथी खड़े भोइतां मुर्जम बनाले। किजोकि तैनेई योनेरे प्रचारे सेइं पापन करां मनफिरावरो थियो, पन इड़ी हेरा तै आए, ज़ै योना करां भी बड्डोए। 33 “कोई मैन्हु दीयो बैलतां भांडे हैठ या ओइकतां न छुडे, बल्के उच्चि ठैरी रखतन ताके अन्तर एजने बालन लौ भोए। 34 अछु जानेरे लेइ दीयेरी ज़ेरि आए, अगर तेरी अछु रोड़ीए, त तेरी जानी मां भी लौए, ते अगर तेरी अछुले बुरीए त तेरी जान भी आंधरीए। 35 एल्हेरेलेइ खबरदार रेइयां, कोस्कोई एरू न भोए कि ज़ै लौ तीं मां आए तै आंधरू न भोए। 36 अगर तेरी जानी मां लौए, त तैसेरो कोई भी हिस्सो आंधरो न भोए, त सब एरू भोलू, जैखन दीयो चमकतां लौ देते।” 37 जैखन तै एना गल्लां ज़ोने लोरो थियो, त केन्चे फरीसे यीशु कां मिनत की, कि मीं सेइं साथी रोटी खा, ते यीशु तैसेरे घरे जेव ते तैसेरे कां गेइतां रोटी खाने बिशशो। 38 फरीसी लोक एन हेरतां हैरान भोव, कि ए बगैर हथ-पाव धोने रोटी खाने बिशशी जेव। 39 पन प्रभुए फरीसी सेइं ज़ोवं, “हे फरीसाव तुस कटोरो, ते थाली बेइरमेई त बड़ी साफ केरतथ, पन तुशे अन्तर ज़ुलम ते लालच भेरतां। 40 हे बेअक्लाव, ज़ैनी बेरीयोवं हिस्सो बनावरोए, तैनी आंत्लेइयों हिस्सो नई बनेरो? 41 बरसा एन्त्री चीज़ दान केरा, त हेरा, सब किछ तुशे लेइ साफ भोइ गालू। 42 पन हे फरीसाव, तुसन पुड़ अफ्रसोस! तुस पुतनेरो ते ज़ीरिरो ते कने सेबज़ारो दशोवं हिस्सो देतथ, पन तुस इन्साफ केरने करां त परमेशेरु प्यारे करां दूर रातथ, लोइतू थियू कि दशोवं हेसे सेइं साथी इन भी केरेथे। 43 हे फरीसाव, तुसन पुड़ अफ्रसोस! तुस लोक चातथ कि प्रार्थना घरन मां तुसन एपी कुर्सन पुड़ बिशालन ते बज़ारन मां लोक तुसन कां झुकतां नमस्कार केरन। 44 पन हे फरीसाव तुसन पुड़

अफ्रसोस! तुस तैन छेपोरी कब्रां केरे ज़ेरेथ, ज़ैन पुड़ लोक च़लतन, पन तैन पतो न भोए।” 45 तैखन शास्त्री मरां एक्के तैस जुवाब दित्तो, “हे गुरु एना गल्लां ज़ोइतां तू इशशी तुहीन लोरोस केरने।” 46 यीशुए ज़ोवं, “हे शास्त्री लोकव, तुसन पुड़ अफ्रसोस! तुस मैन्हु पुड़ त एत्रो भारो लदतथ ज़ै छूरो असुखतो भोते ते पन एप्पू अपने कानूने मन्नेरी कोशिश भी न केरन। 47 तुसन पुड़ अफ्रसोस! तुस नेबी केरि कब्रां बनतथ ते तुशे दादे-पड़दादेई तैना मारोरे थिये। 48 बरसा, तुस शहातथ कि तुस अपने दादे-पड़दादां केरे कम्मां केरि पूरी तैइद केरतथ, किजोकि तैनेई त नबी कल्ल कमाए ते तुस तैन नेबी केरि कब्रां बनातथ। 49 एल्हेरेलेइ प्रभु परमेशेरु अक्लां ज़ोवं, नबी त प्रेरित तैन कां भेजनेन तैना तैन मरां किछ कल्ल केरेले ते किछन सताले। 50 बरसा ई कौम सारे नेबी केरे खूनेरे ज़ै दुनियारे शुरु करां देंतो बगेवरोए ज़िमेवार भोली। 51 हाबिलेरे खूने करां देंतो ते जकर्याहरे कल्ले तगर ज़ै तुसेईं मन्दरेरे ते बलिदान केरनेरे ठारारे मझाटे मन्दरेरे अंगने मां कल्ल कियोरो थियो। अवं ज़ोताई कि ए कौम तैन केरे खूनेरी ज़िमेवार भोली। 52 पन हे फरीसाव तुसन पुड़ अफ्रसोस! तुसेईं शास्त्री लोकेई चाबी त अपने कब्जे मां रखवी, पन तुस एप्पू भी दाखल न भोए ते ज़ैना दाखल भोनु चाते थिये तैना भी रोके।” 53 जैखन यीशु तैट्टां निस्सी जेव त शास्त्री ते फरीसी लोकेई तै घेरो ते सरकरे मारे चेन्ने पासना बड़े असुखते सवाल पुच्छने लगे। 54 ताके यीशुएरे ज़बा एरी गल निस्से ज़ैस सेइं लोक तैस पुड़ गलती लांन।

12 एत्रे मां हज़ारेई मैन्हु अकोट्टे भोइ जे, ते एककी होरि उन्हे खिरकते थिये त यीशुए सेबन करां पेइले अपने चलन खड़े भोइतां ज़ोवं, “फरीसी लोकां केरे पाखंडेरे खमीरे यानी तैन केरे रीति रूवाज़न करां हुशार रेइयथ। 2 कोई चीज़ ओइकोरी नई ज़ै बांदी न भोए, ते न कोई चीज़ छपोरीए ज़ै ज़ानी न गाए। 3 एल्हेरेलेइ ज़ैना गल्लां तुसेईं आंधरे मां ज़ोरिन तैना गल्लां लोई मां शुनोनिन, ते ज़ैना गल्लां तुसेईं अन्तर ज़ोरिन तैन केरू एलान लाए पुड़ भोनुए। 4 “दोस्तव अवं तुसन सेइं सच ज़ोताई कि तैन करां न डेरथ ज़ैना जानी नुकसान पुज़ातन तैसेरे बाद तैना किछ न केरि बटन। 5 पन अवं तुसन सेइं सच ज़ोताई कि केस करां डरू लोइते, ज़ैस जानी मारनेरे बाद तैसेरी आत्माई नरके मां छडनेरो अधिकारे, हँ अवं तुसन सेइं सच ज़ोताई कि तैस करां डरा। (Geenna 9:1067) 6 कुन दूई पेंइसन मां पंच च़डोली न बिकन? पन परमेशर तैन मरां केन्ची भी न बिसरे। 7 बल्के तुशे दोगेरे सारे बाल गनोरेन डरा नन्ना तुस त काई चुडोलन करां भी जादे कीमती आथ। 8 “अवं तुसन ज़ोताई कि ज़ै कोई मैन्हु केरे सामने मेरो इकरार केरेलो, त अवं मैनेरू मट्टू भी परमेशेरु स्वर्गदूतां केरे सामने इकरार केरेलो 9 पन ज़ै मैन्हु केरे सामने मेरो इकरार केरेलो त तैसेरो इन्कार परमेशेरु स्वर्गदूतां केरे सामने कियो गालो। 10 “ज़ैना लोक मैनेरे मट्टेरे खलाफ किछ ज़ोले तै तैस माफ़ केरेलो पन ज़ै पवित्र आत्मारी तुहीन केरेलो तैस माफ़ न केरेलो। 11 “जैखन तैना तुसन प्रार्थना घरन मां ते बड़े-बड़े ते अधिकैरन कां नेले त फिक्न न केरथ कि अस कुन ज़ोम ते केन्चरे जुवाब देम। 12 किजोकि

पवित्र आत्मा तुसन तैस वक्ते ज़ोलो कि तुसेई कुन ज़ोनूए।” 13 फिरी भीड़ी मरां केन्चे एक्के यीशु सेई ज़ोवं, “हे गुरु जी मेरे ढूलाए जो ज़ो, कि इशे बाजी केरि जेइदाती मरां मेरो हिस्सो मेरे हवाले केरे।” 14 यीशुए तैस जुवाब दित्तो, “अवं केनि तुशुशो हाकिम या बंटने बालो बनेवरोइं?” 15 ते यीशुए तैन सेई ज़ोवं, “हर किसमेरे लालचे करां दूर भोइयथ ते न केन्चेरी जेइदाद केन्चेरी जानी करां जादे भोए।” 16 तैखन यीशुए तैन अक मिसाल शुनाई, “केन्ची अमीररे ज़मीनी मां बड़ी फसल बनी। 17 तै अपने दिले मां सोचतां ज़ोने लगे, कि अवं कुन केरि, मीं कां ठारे नई कि ज़ैड़ी अवं अन्न रेख्खी सेखी? 18 तैखन तैनी ज़ोवं कि, ‘अवं अक कम केरताई, अपने पुराने कोठार पुटतां होरे बड़े कोठार बनेइ ते अपनू सारू अन्न तैस मां रखेलो। 19 फिरी मीं अपने आपे सेई ज़ोनूए कि, मीं कां त बड़े सालन तगर अन्न जम्हां भोरूए, मेरी जान आरामे सेई खा ते एश केर।’ 20 पन परमेशरे तैस मैन्हु जो ज़ोवं, ‘हे बेवकूफ अज़े राती तू मरेलो, ते ज़ैन किछ तीं अपने लेइ जम्हां केरतां रखेरूए तैन केसेरू भोलू?’ 21 एल्हेरेलेइ ज़ै अपने लेइ दौलत जम्हां केरते, पन परमेशरेरी नज़री मां तै अमीर न भोए एसेरो भी एरो हाल भोनोए।” 22 तैखन यीशुए अपने चलन सेई ज़ोवं, एल्हेरेलेइ तुस न अपने ज़िन्दगारी ज़रूरते लेइ फिक्क केरा, कि तुस कुन खाले, ते न अपने जानारी कि कुन लामेले। 23 किजोकि प्राण रोटी करां ते जान लिगड़े करां बेधतां भोते। 24 कांवां करां तक्का, तैना न बेन ते न कटन ते न तैन कां गुदाम या कोठार भोन, तांभी परमेशर तैन खाने जो देते ते तुस त चुड़ोलन करां भी जादे कीमती आथ। 25 तुसन मां एरो कौन आए, ज़ै फिक्क केरतां अपनि उमर अक घड़ी भी बधेई सकते? 26 बरस्सा, ज़ैखन तुस ए अक निकड़ी ज़ेरि गल भी न केरि बटथ, त बाकी बेड्डी चीज़ां केरि फिक्क किजो केरतथ? 27 सोसनेरे फूडू केरे तक्का कि तैना केन्चरे बेडोतन? तैना न मेहनत केरन ते न कत्तन, फिरी भी अवं तुसन सेई ज़ोताई कि राज़ो सुलैमाने भी अपने सारे धन दौलतरे बावजूद भी तैन केरां ज़ेरां लिगड़ा न लां। 28 बरस्सा ज़ैखन परमेशरे मैइदानेरो घास, ज़ै अज़ आए ते कालां लौवंने मां फुकनोए, एरी खुबसूरती देते, त हे घट विश्वासे बाले लोकव, कुन तै तुसन लिगड़ न देलो? 29 ते एस फिक्के मां न रेइयथ, कुन खामेले, या कुन पीमेले, या कुन लामेले, ते न शक केरथ। 30 किजोकि दुनियाारी सैरी कौमां एस्से फिक्के मां लेगोरी रेइचन, पन तुशुशो बाजी ज़ानते, कि तुसन कोनां-कोनां चीज़ां केरि ज़रूरत आए। 31 पेइले परमेशरेरे राज़ेरे तलाश केरा, फिरी तुसन एना सैरी चीज़ां मैल्ली गैली। 32 “तुस भैड्ठां केरे निकड़े केन्ने ज़ेरेथ, तुस कोन्ची गल्लरे लेइ न डरा, किजोकि तुशुशे बाजेरी खुशी एस्से मां आए, कि तै तुसन राज़ दे। 33 अपनू घरबार बेचतां धर्मरथ देथ, ते एप्पू जो अक बेटुवो बनाथ, ज़ै पुरानो न भोए, स्वर्ग मां दौलत जम्हां केरा ज़ै कथे न मुक्के, ज़ैड़ी न चोर पुजे ते न कीड़ो खाए। 34 किजोकि ज़ैड़ी तेरी दौलत भोली, तैड़ी तेरो दिल भी लग्गेलो। 35 “सेवा केरनेरे लेइ रोइंचारे कमर बेड्ढतां तियार भोथ, ते तुशुशे दीये सैरी राती बलते रान। 36 तुस मेरे एजनेरे लेइ एन्चरे तियार राथ, ज़ेन्चरे

मैन्हु केरे अपने मालिके, ज़ै इलाएरे धामी मरां वापस एजने बलगतन, कि ज़ैखन ते एज्जे ते दार गुडकान त अस दार खोल्लम। 37 तैना नौकर धन आन ज़ैना अपने मालिकेरे वापस एजने पुड़ बींझे मैलतन, अवं तुसन सेई सच ज़ोताई, कि तै एप्पू तैन रोइंचारे नौकरन लिगड़ां लेइतां तियार लाएलो, ते मालिक तैन सेई खुश भोइतां एप्पू सेई साथी रोटी खाने बिशालेलो ते तैन केरि सेवा केरेलो। 38 अगर मालिक एध्ठी राती या झेइरेपार एइतां अपने नौकरन बींझे लाए त तैन नौकरां केरे लेइ केत्री रोटी गल्ले। 39 पन याद रखा, अगर घरेरे मालिके, चोर एजनेरो पतो भोए त तै बींझो राथो ते अपने घरे चोरी न देखो भोने। 40 बरस्सा, तुस भी मेरे वापस एजनेरे लेइ तियार राथ, मैनेरू मट्टू यानी अवं तैस वक्ते एज्जेलो जेइस तुसन खियाल भी न भोलो।” 41 पतरसे पुच्छू, “हे प्रभु ज़ै मिसाल तीं शुनाई तै सिर्फ इशे लेइए या सेबमी केरे लेइए?” 42 प्रभुए ज़ोवं, “कौने ईमानदार अक्लमन्द नौकर ज़ेसेरो मालिक तैस अपने नौकरन पुड़ मुन्शी रखे ताके तैन केरि खूराक ठीक मौके पुड़ रोइंचारे बंटतो राए? 43 तै नौकर धने कि ज़ेसेरो मालिक एज्जे ते मालिक तैस रोइंचारे कम केरतू लाए। 44 अवं तुसन सेई सच ज़ोताई कि तै अपने सारे घरबारेरी हेरगैशरो अधिकार तैसेरे सुपुर्द केरेलो। 45 पन अगर तै नौकर अपने दिले मां ज़ोए कि मेरे मालिके एजने हेजू बडू चिरे ते होरि नौकरन ते नौकरन मार धाड़ केरनि शुरू केरे ते खेइ पीतां नशे मां मसत भोइ गाए। 46 ते तैस नौकरेरो मालिक केन्ची एरे दिहाड़े एज्जे जेइस तैस नौकरे एजनेरो पतो न भोए ते तै मालिक एज्जी गाए त तैस नौकरेरे टुकड़े-टुकड़े केरतां ते तैसेरी हालत बेइमाना केरि ज़ेरि भोली। 47 हर तै नौकर ज़ै ज़ानते कि तैसेरे मालिकेरी कुन मर्ज़ी आए, कि ते कुन केरे, मगर तै अपने आपे कम केरनेरे लेइ तियार न केरे ते अपने मालिकेरी मर्ज़ी पूरी न केरे तैस पक्की मार बज़नीए। 48 पन अगर कोई नौकरे ज़ैस नई पतो कि मेरे मालिकेरी कुन मर्ज़ी, कि अवं कुन केरि, ते तैन केरे ज़ैस सेई तैस सज़ा मैल्ले, त तैस घट सज़ा मैलेली।” 49 यीशुए ज़ोवं, “अवं धेरती पुड़ अग लांने ओरोई ते अगर अग लग्गोरी भोथी त रोडू थियू। 50 पन मीं बड़े जल्दी दुःख झैल्लनोए, ते अवं बड़ो परेशानई ज़ां तगर दुख न झैल्ली। 51 कुन तुस एन सोचतथ कि अवं धेरती पुड़ मेल कराने लेइ ओरोई? नई! अवं तुसन सेई ज़ोताई, कि अलग केरने ओरोई। 52 अज़्जेरे बाद अगर एक्की घरे मां पंच मैन्हु भोले त तैना एप्पू मांमेइ बेंटोले, ट्लाई ज़ैना मीं पुड़ विश्वास न केरन तैना दुइयां केरे खलाफ भोले, ते दूई, ट्लेइयां केरे खलाफ भोले। 53 बाजी मट्टेरे खलाफ भोलो ते मट्टू बाजेरे खलाफ भोलू, हैई कुइयरे खलाफ ते कुई हैईयरे खलाफ ते शिख नुशारे ते नुश शिखरे खलाफ भोनीए।” 54 फिरी यीशुए बड़े मैनन् मां ज़ोवं, “कि ज़ैखन तुस बिदलार डुबते पासेरां च़लती लातथ त तुस ज़ोतथ कि झ़ड़ी एजने बालीए ते तैन्ने भोते। 55 ते दक्षिणेरे पासेरां हवा च़ली त तुस ज़ोतथ गर्मी भोरीए ते तैन्ने भोते। 56 हे पाखंडी लोकव, तुस धरती ते अम्बरेरो हाल हेरतां मौसमेरो अंदाज़ो केरनो ज़ानतथ, पन इन न ज़ैनी बटथ कि, परमेशर कुन चाते? 57 “तुस एप्पू फैसलो केरा कि,

तुशे लेइ कुन रोइए। 58 जैखन तू लीडरे सेइं साथी हाकिमे कां गाथ त बते मां तैस सेइं फैसलो की न केरस, एरु न भोए तै तीं हाकिमे कां ने ते हाकिम सिपाहीएरे हवाले केरे, ते तू कैद भोइ गास। 59 अवं तुसन सेइं जोताई कि ज़ां तगर तू पाई-पाई न देले त तांतगर तैट्टां छुट्टी न सकेलो।”

13 तैस मौके किछ लोक तैड़ी आए, तैना यीशु सेइं तैन गलील इलाकेरे लोकां केरे बारे मां जोने लगे, जैन केरो खून, रोमेरे गवर्नर पिलातुसे मन्दरे मां जानवरां केरे बलिदाने सेइं साथी मलेवरो थियो। 2 यीशुए तैन जुवाब दित्तो, “कुन तुस एन समझतथ कि तैन गलीलेरे लोकां केरो एत्रो बुरो हाल एन्हरेलेइ भोवं, कि तैना बाकी गलीलेरे लोकन करां जादे पापी थिये? 3 अवं तुसन सेइं जोताई कि, अगर तुस भी पापन करां मन न फिराले त सब एन्हरे नाश भोनेथ। 4 या कुन तैना अठारे जन्हे जैन उन्दो शीलोलोरो गुम्मत बिछड़ोरो थियो, ते तैना सब तैस हैठ मेरि जे, ते तैना यरूशलेम नगरेरे होरि लोकन करां पापी थिये? 5 अवं तुसन सेइं सच जोताई, कि नई बल्के अगर तुस भी पापन करां मन न फिराले त तुस सब एन्हरे नाश भोइ गानेथ।” 6 तैसरां बाद यीशुए तैन अक मिसाल देइतां जोवं, “केन्चे मैने अपनि बागी मां अक फ्रेगोरो बुट लोरो थियो, ते तैस बुट्टे पुइ हर साल फल तोपने अव पन तैस फल न मैल्लो। 7 तैखन तैनी बागबने सेइं जोवं, ‘हेर अवं ट्लाई सालां केरो देंतो इस फ्रेगरे बुट्टे पुइ फल लोरोई तोपने, पन अज तगर एस पुइ फल न मैल्लो एस केटी छइ एनी किजो रोड़ी ठार त्रिकतां रखोरीए?’ 8 पन तैनी तैस जुवाब देइतां जोवं, मीं निदतां एसेरे च्नेरे पासन खाद छडनिये। 9 अगर फिरी भी फल न लगे त फिरी केटी देनोए।” 10 एक्की आरामेरे दिहाड़े यीशु प्रार्थना घरे मां शिक्षा देने लोरो थियो। 11 हेरा, तैड़ी अक कुआन्श थी जैस अठारे सालां केरि देंती भूतरे सैइयेरे वजाई सेइं कुबडी भोरी थी। तै सिधी न थी भोइ बटती। 12 यीशुए तै कुबडी कुआन्श लाई त एप्पू कां कुजाई ते जोवं, “हे कुआन्श, तू अपनि तकलीफि करां छुटी जेई।” 13 ते यीशुए तैस कुआन्शी पुइ हथ रखे ते तै लूशी बेइज्जोई ते परमेशरेरी तारीफ़ केरने लगी। 14 पन प्रार्थना घरेरो प्रधान यीशु पुइ नराज भोव कि, एनी ए कुआन्श, आरामेरे दिहाड़े किजो बज्जाई ते जोने लगे, “हफते मां शा दिहाड़े कम काज केरनेरे लेइ आन, ते तैने मां कोई बज्जावरो भी लोइचे, ते आरामेरी दिहैडी न।” 15 प्रभु यीशुए तैस जुवाब दित्तो, “ए पाखंडी लोकव कुन तुस आरामेरी दिहाड़ी अपने दांत या गधे खोलतां तैन पानी पियाने न नेथ? 16 त कुन एन रोइ न भोवं कि जै कुआन्श बेइज्जोइ तै अब्राहमेरे खानदाने मरां ए, जै अठारे सालां केरि देंती शैताने गुलैमी मां रखोरि थी त आरामेरे दिहाड़े ए कुआन्श छुटानी न थी?” 17 जैखन यीशुए एना गल्लां जोई त तैसेरे खलाफ जोने बाले सेम्भी केरि बेइज्जती भोइ, ते सारे लोक यीशुए जैना महिमारां कम्मां अपने हथेइं कियोरां थियां खुशी मनाने लगे। 18 तैखन यीशु तैन सेइं जोने लगे, “परमेशरेरु राज कौस चीज़री जेरुए अवं केस सेइं जोई? 19 तन शेरीएरे बीजेरु जेरु आए, जैन एक्की मैने एन्तां अपनि बागी मां बेवं, पन जैखन तैन बीज बेव गाते, तै उगतां सारे निक्के-निक्के बुट्टन

केरां बड्डो भोते। ते अम्बरेरां चुड़ोल्लू भी तैस पुइ बिशने लगां।” 20 यीशुए फिरी जोवं, “अवं परमेशरेरे राज़ेरी मसाल केस सेइं देई? 21 तैन खमीररु जेरुए, जैन केन्ची कुआन्शां आनु, ते हछे अट्टे मां मलाव ते सारु अट्टू खमीर बेनि जोवं।” 22 यीशु अपने चलन सेइं साथी यरूशलेम नगरे मांमेइं गांते बार नगरन मां ते इलौव्वन मां शिक्षा देंतो चलोरो थियो। 23 केन्चे यीशु पुच्छू, “हे प्रभु कुन थोड़े जेरे लोक हमेशारी सजाई करां बचले?” यीशु तैन सेइं जोवं। 24 “परमेशरेरे राज़े मां सुन्कड़े दारेरां बत्तां गानेरी कोशिश केरा, किजोकि अवं तुसन सेइं जोताई कि बडे लोक अन्तर गानेरी कोशिश केरेले पन न गेइ सकेले। 25 जैखन घरेरो मालिक एक्की बार दार बंद केरि छडते, त तुस बेइर खइ खडे दार गुडकाते, ते बिनती केरते राथ कि, ‘हे प्रभु इश्शे लेइ दार खोल्ल,’ ते तै तुसन जुवाब देते कि अवं तुसन न जैनी तुस कौन आथ ते कोट्टां ओरेथ? 26 तैखन तुस जोले कि, ‘असेई तीं सेइं साथी खोरी पियोरी नई, ते तीं इश्शे अंगने मां असन शिक्षा नई दित्तोरी।’ 27 पन तै तुसन सेइं जोलो, ‘अवं तुसन न जैनी तुस कौन आथ, ते कोट्टां ओरेथ हे बेइमानव मीं करां दूर भोथ।’ 28 जैखन तुस अब्राहम, इसहाक ते याकूब ते सब नेबन परमेशरेरे राज़े मां सामने लाएले ते अपनो आप बेइरोवं कढते लाएले, त लेरां देते ते दंत च़ापते राले। 29 लोक पूबेरां ते पछमरां ते उत्तर ते दक्षिणेरे देंते यानी दुनियारे सारे लोकन मरां लोक परमेशरेरे राज़ेरी धामी मां एइते लाएले। 30 ते हेरा किछ एरेन कि जैना पेइले आन, तैना पत्रोवं भोनेन ते जैना पत्रोवं आन, तैना पेइले भोनेन।” 31 तैखने किछ फरीसी लोक यीशु कां आए ते जोने लगे, “इट्टां निस ते चलो गा, किजोकि हेरोदेस तीं मारने चाते।” 32 पन यीशुए तैन जोवं, तैस मैन्हु सेइं जै लोई अरो जेरो आए, गेइतां तैस सेइं जोथ कि, “अवं अज ते कालां भूतां केरो सैयो कढने ते बिमारन बज्जानेरु कम केरने लोरोई ते एन कम ट्लेइ दिहाड़न मां मीं पूरू केरनूए। 33 बस्सा मीं अज ते कालां ते ट्लेईदी मीं सफर केरनूए, किजोकि नबी सिर्फ यरूशलेम नगरे मां मारे गाले। 34 “हे यरूशलेमे नगरेरे लोकव, हे यरूशलेमे नगरेरे लोकव, तुसेई केत्रे नबी कल्ल किये, जैना बडे पेइले तुसन कां आए, ते जैना तुसन कां भेजे तैन घोड़ेई बेई, मीं केही फेरेई सोचू कि तेरे बच्चन अकोट्टे केरि जेन्चरे कुकडी अपने बच्चन अपने फंगन हैठ रखचे, पन तुस राज़ी न भोए। 35 हेरा तुशू घर तुशे लेइ छडू गाते, ते अवं तुसन सेइं जोताई कि तुस मीं केन्ची तरीके भी न लेई सकेले, ज़ांतगर तुसन एन ज़ोनेरो मौको न एज्जेलो, धने तै जै प्रभुएरे नव्वे सेइं एइते।”

14 यीशु फिरी आरामेरे दिहाड़े एक्की फरीसेरे घरे रोटी खाने जेव त बडे फरीसी लोक ध्याने सेइं लोरे थिये तकने, ताके तैसेरी कोई गलती ट्लान। 2 तैड़ी अक बिमार मैन्हु थियो जेसेरी जंघां पैखड़ी शोजती थी ते पस-पाक च़लती थी, तै तैड़ी बिशोरो थियो। 3 यीशुए शास्त्री ते फरीसी लोकन पुच्छू, “कि आरामेरे दिहाड़े कानूनरे मुताबिक कोई बज्जानो जेइजे की नई?” 4 तैना चुप राए, तैखन यीशुए तैस बिमारे पुइ अपनो हथ रख्खो ते तै बज्जाव, ते घरजो भेजो। 5 ते फरीसन सेइं जोवं,

“तुसन मरां एरो कौने, जेसेरू मट्टू या दांत खड्डे मां खिरके ते आरामेरी दिहाड़ी भोए, ते तैस तैट्टां बेइर न कढे?” 6 ते तैन लोकेई यीशुएरी गल्लां केरो जुवाब न देइ बटो। 7 ज़ैखन यीशुए हेरू कि, ज़ैना लोक धाम ज़ोइतां रोटी खाने कुजोरेन केन्चरे खास लोकां केरि ठार चुनतन, तैनी तैन अक मिसाल दिती। 8 “ज़ैखन तुसन कोई इलाएरी धामी मां कुजाए। ज़ै तैनेई खास मैन्हु केरे लेइ ठार रखखोरी भोए, तुस तैडी न बिशशय, भोइ सकते कि होरो कोई तुसन करां जादे खास मैन्हु कुजेवरो भोए। 9 ते तुसन दुइये ज़न्न कुजाने बालो तुसन कां एइतां ज़ोए, ए ठार होरि केरे लेइए ते तुसन शरमेइतां खडे उठनू पे, ते सेबभन करां पत्र बिशनू पे। 10 ज़ैखन भी कोई तुसन धाम ज़ोइतां कुजाए त सेबभन करां पत्र बिशशा, ताके ज़ैखन तेरो कुजाने बालो एज्जे ते ज़ोए, ‘दोस्त, अगर एइतां खास ठैरी बिश,’ त तैन लोकां केरे सामने तेरी केत्री बड़याई भोनीए। 11 किजोकि ज़ै कोई अपनो आप बड्डो बनालो त तै निकडो बनाव गालो ते ज़ै कोई अपनो आप निकडो बनालो त तै बड्डो बनाव गालो।” 12 फिरी यीशुए, तैस फरीसी मैन्हु सेइ ज़ैनी तै कुजोरो थियो ज़ोव, “ज़ैखन तुस दिसेरी या रातरी धामी मां मैन्न कुजाथ, त अपने दोस्तन या इलान रिशतेदारन या अपने अमीर पड़ोसन न कुजेइयथ। किजोकि तैना भी तीं कुजेइतां तेरू एवसान मुकेइ छडेले। 13 बल्के ज़ैखन तुस धाम देथ त टोंटे, कानो, गरीब गुरबे, परदेशी कुजेइयथ। 14 ते परमेशर तुसन बरकत देलो, किजोकि तैन कां किछ भी नई ज़ैस सेइ तैना तुशू एवसान मुकेइ बटन, ते तेरे एस एवसानेरो फल धेर्मी लोकन जीते भोने सेइ साथी फैसलेरी दिहैड़ी मैलेलो।” 15 ट्लाहनन मरां एक्के एन गल्लां शुन्तां यीशु सेइ ज़ोव, “परमेशररे राज़ेरी धामी मां खाने बालो धन भोलो।” 16 यीशुए तैस जुवाब दितो, “केन्चे मैने अक बडी धाम दिती ते बडे लोक कुजाए। 17 ज़ैखन रोटी खानेरो वक्त अव त तैनी अपनो नौकर भेजो कि तैन लोकन ज़ैन जो इलाएरी धाम बनोरी थी, ‘एज्जा, रोटी बनोरोए।’ 18 पन धामी बालेई सेबभेई मिलतां एतराज कियो ते पेइले मैने ज़ोव, ‘मी ऊडार घिन्नेरू आए, मी तैस हेरने गानूए ते अवं तीं कां मिनत केरतां कि मीं राने दे।’ 19 त होरो ज़ोने लगो, ‘मीं पंच हल्लां दांत घिन्नेरेन ते अवं तैन लाने परखने च़लोरौई। अवं तीं कां मिनत केरतां कि मीं राने दे।’ 20 अक होरो मैन्हु लगो ज़ोने, ‘मीं इला बनावरोए, एल्हेरेलेइ अवं न एज्जी बेटि।’ 21 तैखन नौकरे वापस एइतां एन सैरी गल्लां अपने मालिके शुनेई, त मालिके बडी सरक अई, तैनी अपने नौकरे जो ज़ोव, ‘इस नगर मां गा ते लेंगे लुथे, गरीब गुरबे नगो, नियन्ने भत्ते, टोंटे, कानो इरां कुजा।’ 22 नौकरे ज़ोव, ‘हे मालिक ज़ैन तीं ज़ोव, मीं तैन्ने कमाव, पन फिरी भी ठार खाली आए।’ 23 मालिके नौकरे सेइ ज़ोव, ‘बत्तारे आसे पासे ऊडारन मांमेइ गा ते लोक मजबूर केरतां आन, ताके मेरू घर भरतां भोए। 24 किजोकि अवं तीं सेइ ज़ोताई कि ज़ैन लोक पेइले कुजेवरे थिये, यानी खास ठैरारे लेइ कुजेवरे थिये, तैन मरां कोई भी मेरी धामी मां रोटी न खेइ सकलेलो।” 25 बडे लोक यीशु पत्ती च़लारे थिये, यीशुए पत्रोवं तक्कू ते ज़ोव। 26 “अगर कोई मीं

कां एज्जे, ते अपने अम्मा बाजी, कुआन्श, बच्चन, इलान ते बेइन्न ते अपने जानी करां जादे प्यार मीं सेइ न केरे त तै मेरो चेलो न भोइ सके। 27 ते ज़ै कोई मेरो चेलो भोनेरी वजाई सेइ दुःख झैल्लनेरे लेइ त कने मरनेरे लेइ तियार नई, त तै मेरो चेलो न भोइसखे। 28 तुसन मरां एरो कोई भोए, ज़ै गुम्मत बनानू चाए, ते पेइले बिशतां हिसाब न केरे, कि पूरो केरनेरे लेइ मीं कां खर्चां आए कि नई। 29 कथे एरू न भोए कि खाइ कटनेरे बाद तैस बनेइ न सके ते तकने बाले हसते रान। 30 ‘ते ज़ोन एनी मैने बनानू त शुरू कियूं, पन बनेइ न बटो।’ 31 या फर्ज केरा कि कोई राज़ो होरि राज़े सेइ लड़ाई केरनेरे लेइ सोची राहोरो भोए त कुन पेइले एन न सोचे कि 10000 फौजी जवानन् सेइ अवं 20000 फौजी जवावन सेइ तैसेरो मुकाबलो केरि सकतां कि नई? 32 अगर तै मुकाबलो न केरि सखे त तैस फौजी सेइ ज़ै दूरे, मैन्हु भेजतां तैस सेइ सल्लारी मिनत केरेलो। 33 एन्चरे अगर ज़ै कोई तुसन मरां अपनू सब किछ न छडे त मेरो चेलो न भोइसखे। 34 “लून रोडी चीजे, पन अगर लूनरो लूनार मुकी गाए त तैन कोस सेइ लूने बनाव गालू? 35 लोक तैस बेइरोवं शेरी देले, ज़ै कोई समझनू चाते, तै ध्याने सेइ शुने ते समझो।”

15 बडे लोक धइत घिन्ने बाले ते पापी लोक यीशु कां एइतां तैसेरी गल्लां शुन्ने लोरे थिये। 2 फरीसी ते शास्त्री लोक शिकयत केरतां ज़ोने लगे, “कि ए मैन्हु पापी लोकन सेइ तालमेल रखते, ते तैन सेइ साथी खाते पीते।” 3 यीशुए तैन अक मिसाल देइतां ज़ोव। 4 “तुसन मां एरो कोई आए ज़ैस कां 100 भैट्टां भोन ते तैन मरां अक हेरोए ते 99 भैट्टां तैडी ज़ेरे जंगले मां छेइतां तोपने न गाए, ज़ां तगर तैस मैल्लोरी नई? 5 ते ज़ैखन ते तैस मैल्ले त खुशी सेइ कथे पुइ छुइतां आने। 6 ते अपने घरे एइतां अपने दोस्तन ते भियालन कुजेइतां ज़ोए कि, ‘अज़ मीं सेइ साथी खुशी मनाथ, किजोकि अज़ मेरी हेरोरि भैड मैलोरीए।’ 7 अवं तुसन सेइ ज़ोताई कि, एन्चरे 99 धर्मी ज़ैनेई पेइले अपने पापन करां मनफिरावरो तैन करां जादे ज़ैखन अक पापी, पापन करां मन फिराते स्वर्ग मां बडी खुशी बनाई गाचे। 8 “कुन एरी भी कोई कुआन्श भोली ज़ैस कां चेंदरे दश सिके भोन ते अक हेरोए ते तै दीयो बैलतां घरे अन्तर धूनी न दे, ते ज़ां तगर मैल्ले न तांतगर तोपती न राए? 9 ते तोपनेरे बाद अपने पड़ोसन ते अपनि सेहेलन कुजेइतां एन न ज़ोए कि, ‘एज्जा मीं सेइ साथी खुशी मनाथ किजोकि अज़ मेरो हेरोरो सिको मैलोरोए।’ 10 बरसा, अवं तुसन सेइ ज़ोताई कि एक्की पैपेरे, पापन करां मन फिराने सेइ परमेशररे स्वर्गदूतां केरे सामने बडी खुशी मनाई गाचे।” 11 यीशु फिरी होरि मिसाल दिती, “केन्ची मैनेरां दूई मट्टां थियां। 12 तैन मरां निकडे मट्टे अपने बव्वे सेइ ज़ोव, ‘हे बाजी जेइदाती मां ज़ै मेरो हिस्सो बनते तै मीं दे।’ तैनी दुइने हिस्सो बेटतां दितो। 13 थोडे दिहैइना पत्ती निकडे मट्टे अपनू सब किछ जेइदात होरि मुलखे जो नी, ते बुरे कम्मन मां लुद्राई। 14 ज़ैखन तैनी सब किछ मुकेइ छडू त तैस मुलखे मां बडो काल पेव, ते तैस कां खाने जो किछ न राऊं। 15 तैखन तै तैस मुलखेरे एक्की रानेबाले कां कम तोपने पुजो। तैनी तै अपने ऊडारन मां सूर च़ारनेरे

कम्मे लाव। 16 तैड़ी तै बड़ो ढूलुखोरो थियो, तै तैन खाने मां राजी थियो जैन सूर खाते थिये, किजोकि तैस केन्चे किछ खाने जो न दित्तू। 17 तैखन तैस समझ आई ते जोने लगे, 'मेरे बाजी केरे मजदूर रेजतां रोटी खातन, पन अवं इड़ी फाके लोरोई मरने। 18 मीं खडे उठतां अपने बाजी कां गानूए ते तैस सेईं ज़ोनूए हे बाजी अवं परमेशेरी नज़री मां ते तुशशी नज़री मां पापी आई। 19 हुनी अवं एस काबल त नई, कि तुशशू मट्टू भोड़, पन मीं भी अपने मजदूर मां रखा।" 20 "बस्सा, तैनी तै मुलख शारो ते वापस अपने बाजी कां चलो, ते हेजू तै बडे दूरे थियो, ते तैसेरे बाजे तै लाव ते तैसेरे बाजी तैस पुड़ बड़ो तरस अव, ते तै दौवड़तो अपने मट्टे कां जेव, ते तैन गले लाव ते बड़ो खुशी भोव। 21 मट्टे अपने बाजी सेईं ज़ोवं, 'ए बाजी अवं परमेशेरी नज़री मां ते तुशशी नज़री मां पापी आई। हुनी अवं एस काबल त नई कि, अपने आपे जो तुशशू मट्टू जोई।' 22 पन बाजे अपने नौकरन सेईं ज़ोवं, 'लूश केरा ते सेहभन करां पेड़ले रोड़ां लिगड़ां एस मट्टे लुवाथ, ते एसेरे हथ्ये आंवठी ते पावन बूट लुवाथ। 23 ते अक जानवर मारो ते बड़ी धाम बनेइतां बड़ी खुशी मनाई। 24 किजोकि मेरू मट्टू जैन जेन्चरे मेरि जोरू थियूं, अज़ ज़ींतू भोरूए, हेरोरू थियो, ते मैलोरूए।' बस्सा तैना खुशी मनाने लगे।" 25 "तेइस बडू मट्टू जैन ऊडारे मां कम केरतां घरजो ओरू थियूं ज़ैखन ते घरे नेडे पुजो त तैनी गीतां केरि त नचनेरी शौर शुनी। 26 तैनी अक नौकर कुजाव ते तैस पुच्छू, 'ए शौर कीजेई लोरी भोने?' 27 नौकरे तैस सेईं ज़ोवं, 'तेरो निकडो ढूला वापस घरे ओरोए ते तेरे बाजे अक जानवर मेरतां धाम बनोरीए, किजोकि तै ठीक ठाक घरे पुजोरोए।' 28 पन तैस मैनेरू बडू मट्टू नाराज़ भोवं ते अन्तर घरे मां भी न लगे एजने, पन तैसेरो बाजी बेडर अव, ते तैस मिठांनेरी कोशिश की, कि घरे अन्तर एज्जे। 29 बडे मट्टे अपने बाजी सेईं ज़ोवं, 'हेरा अवं केत्रे सालां केरि देंती तुशशी सेवा केरने लोरोई, ते कधे तुशशो हुकम नई मोड़ोरो ते तुसेईं कधे कोई छेडू नई दित्तोरोए कि अवं भी अपने दोस्तन सेईं खुशी मनेई। 30 पन ज़ैखन तुशशू निकडू मट्टू अपनू सब किछ लुटेइतां वापस अव, त तैसेरेलेइ जानवर मारो ते अक बड़ी धाम बनाई।' 31 तैसेरो बाजी ज़ोने लगे, 'मेरा मट्टां तू त मीं कां आस ते ज़ैन किछ मीं कांए तैन सब तेरूए। 32 पन असेईं खुशी मनानी ज़रूरी थी किजोकि तेरो ए निकडो ढूला ज़ै जेन्चरे मेरि जोरो थियो, अज़ ज़ींतो भोरोए, हेरोरो थियो ते अज़ मैलोरोए।"'

16 फिरी यीशुए अपने चेलन अक होरि मिसाल दिती कि, "केन्ची अमीरेरो अक मुन्शी थियो, लोकेई तैसेरी शकैइत तैसेरे मालिके सेईं लाई कि, ए तेरो माल बरबाद केरने लोरोए। 2 मालिके तै कुजाव ते ज़ोवं, 'एन कुने ज़ैन अवं तेरे बारे मां शुन्ने लोरोई? सारो हिसाब-किताब मां अज़ेरां बाद तू मेरो मुन्शी नई रालो।' 3 मुन्शे अपने दिले मां सोचू मेरो मालिक मेरे कम्मे करां मीं कढने लोरोए, मीं मजदूरी भी न केरोए ते शमरिमारे भीख भी न मैगोए। 4 'अवं ज़ानताई कि, मीं कुन केरनूए इट्टां कढनेरे बाद मीं लोक खुशी सेईं अपने घरे मां कबूल केरतन।' 5 बस्सा तैनी अपने मालिकेरो अक कर्जदार तोपते, पेड़ले एक्की पुच्छू तीं

कां मेरे मालिकेरे केत्रे रुपेइयेन? 6 तैनी जुवाब दितो, ज़ैतूनेरे तेलेरे 100 पीपां केरि कीमते, तैनी ज़ोवं इना रां तेरां काकलां, ते बिश्तां 50 पीपे बना। 7 फिरी तैनी मुन्शे होरि सेईं ज़ोवं, 'तीं कां केत्रो कर्जोए?' तैनी ज़ोवं, 'गेहुं केरि 100 बोरी,' तैनी ज़ोवं, 'थां काकलां ते बिश्तां 80 लिखी।' 8 मालिके तैस बेईमान मुन्शेरी तारीफ़ की, एल्हेरेलेइ कि तैनी बेडि चलेकी सेईं कम कियेरू थियूं। किजोकि इस दुनियारे लोक अपने लोकन सेईं सौदो केरनो परमेशेरे लोकन करां बडे हुशारी सेईं केरतन। (aiōn g165) 9 अवं तुसन सेईं ज़ोताई कि दौलत खर्च केरतां इस दुनियारे लोकन दोस्त बनाथ, तुसन मरनेरां बाद हमेशारू घर मैलनूए। (aiōnios g166) 10 ज़ै थोड़े ज़ेरे मां इमानदेरी सेईं रहते ते हछे मां भी ईमानदार रहते। ज़ै थोड़े करां थोड़े मां भी बेइमाने ते हछे मां भी बेइमाने। 11 बस्सा अगर तुस बेइमानेरे धन दौलती मां ईमानदार न भोए, त अपनि सज़री दौलत ज़ै स्वर्गें मां आए, कौन तुशशे हवाले केरेलो? 12 अगर तुसेईं होरि केरे माले मां ईमानदार न भोए, त ज़ै तुशशो अपनो माले कौन तुसन देलो? 13 कोई नौकर दूई मालिकां केरि सेवा एक्की वक्ते मां न केरि सके। न त एक्की सेईं दुश्मनी केरेलो ते होरि सेईं प्यार केरेलो, या एक्केरो बेनतां रालो त होरि न सुखालो। तुस परमेशेरी ते दौलतरी, दुइयां केरि सेवा न केरि सकतथा।" 14 तैखन फरीसी लोक ज़ैना दौलतरे लालची थिये, एन गल्लां शुन्तां यीशुएरी हासी बनाने लगे। 15 यीशु तैन जो ज़ोवं, "तुस तैना आथ ज़ैना लोकन मां अपनो आप बड़ो धर्मी हिरातन। पन परमेशर तुशशे दिलेरी हालत ज़ानते किजोकि ज़ै चीज़ लोकां केरे लेइ बड़ी बड्डीए ते तै परमेशेरी नज़री मां भिट्टी आए।" 16 "मूसेरे कानून ते नेबी केरि गल्लां यूहन्ना बपतिस्मो देनेवाले तगर रेड, ते फिरी परमेशेरे राज़ेरी खुशखबरी शुनाने लगे ते हर कोई तैस मां दाखल भोनेरी बड़ी कोशिश केरने लागेरेन। 17 पन धरती अम्बर टेली गालू पन परमेशेरे कानून मरां अक बिंदी भी न मिटेली। 18 ज़ै कोई अपनि कुआन्श शैरतां होरि सेईं इला बनाते तै तैस सेईं बदमाशी केरते ते ज़ै शैरोरी कुआन्शी सेईं इला बनाते तै भी बदमाशी केरते।" 19 "अक मैन्हु बड़ो अमीर थियो, ते तै बैंगनी लिगड़ां लातो थियो, ते बड़ां माघो लिगड़ां लातो थियो। ते रोज़ एश अशरती मां मसत रातो थियो। 20 अक बड़ो गरीब मैन्हु ज़ेसेरू नवं लाज़र थियूं, तैसेरे दारे कां एन्तां रखोरो थियो, तैसेरी सारी जान खेराड़ेइं सेईं भेरतां थी। 21 तै चातो थियो, कि अमीर मैनेरे टुकेइं सेईं अपनू पेट भरि, पन तैड़ी कुतरां एइतां थियां ते तैना तैसरां खेरड़ां भी चटतां थियां। 22 फिरी एरू भोवं कि तै गरीब लाज़र मेरि जेव स्वर्गदूतेईं तै छुइतां अब्राहमे कां पुजव, ते अमीर मैन्हु भी मेरि जेव ते तै दैब्बी छड्डो। 23 ज़ैखन तैनी पातालेरे दुखे मां अपनि एछछी घैड़ी? त दूरेरां तैनी अब्राहम ते तैस कां नेडे लाज़र लाव। (Hadēs g86) 24 तै चिन्डां मैरतां ज़ोने लगे, 'ए बाजी अब्राहम मीं पुड़ दया केर, एस लाज़रे भेज़ ते ए अपनि अंग्लोई पैनी सेईं सेलतां मेरे जिभी पुड़ लाए, किजोकि अवं अग्गी मां तडफने लोरोई।' 25 पन अब्राहमे ज़ोवं, 'मट्टां याद केर तीं त अपनि जवेंनी मां सब रोड़ी चीज़ां मैल्ली ते इस लाज़रे

सिर्फ बुरी चीजां मैल्ली, पन ए हुन्ना इड़ी आरामे मांए ते तू तकलीफी मां आस। 26 ते एन गल्लां केरे अलावा इश्शे ते तुश्शे मझाटे अक बड्डी खाईए, ताके ज़ै कोई पार गानू चाए न गेइ सखे ते ज़ै वार एजनु चाए न एज्जी सखे। 27 तैनी मैने ज़ोवं, ए बाजी अब्राहम, अवं ज़ोवले हथ केरतां जोताई कि, तू लाजरे दुनियाई मां मेरे बाजी केरे घरे भेज। 28 तैडी मेरे पंच दूला आन ते तै तैन हदायत दे कि, एरू न भोए ते तैना भी इस अग्गी मां एजन। 29 पन अब्राहमे तैस ज़ोवं, 'तैन केरि हदायतरे लेइ तैन कां मूसेरो कानूने ते नेबी केरि किताबां त आन तैना तैन शुनन् ते मनन्।' 30 तैनी मैने ज़ोवं, 'नई ए बाजी अब्राहम अगर कोई मुड़दन मरां जीतो भोइतां गाए त तैना ज़रूर पापन करां मन फिराले।' 31 पन अब्राहम तैस सेइं ज़ोवं, 'अगर तैना मूसेरी ते नेबी केरि न शुनी ते अगर कोई मुड़दन मरां जीतो भोइतां गाए त तैना तैसेरू भी याकीन न केरेले।"'

17 फिरी तैनी अपने चलन सेइं ज़ोवं, "एन न भोइसखे कि लोकन ठोकर न लग्गे, पन अफ़सोस तैस मैन्हु पुड़ ज़ै होरि केरे लेइ ठोकर बनते। 2 तैसेरेलेइ त एन्ने रोड़ थियूं कि दूलाटेरो दूलेइडोल तैसेरे गल्ले उन्डो छेडतां ते समुन्द्रे मां शैरतां छेड्डो गाथो, ताके तै होरि जो जैना विश्वासे मां कमज़ोरन ठोकर न बने। 3 बस्सा हुशार राथ तुस कुन केरतथ, अगर तुश्शो विश्वासी दूला पाप केरते त तैस समझाथ ते अगर तै पापन करां मन फिराए त तैस माफ़ केरा। 4 अगर तै एक्की दिहैड़ी मां तेरो सत्ते बार तेरो पाप केरे त अगर तै सत्ते फेरेई तीं कां एइतां माफ़ी मग्गे त तू सत्ते फेरेई तैस माफ़ केरा।" 5 प्रेरितेई प्रभु सेइं ज़ोवं, "हे प्रभु, इश्शी मद्दत केर कि अस होरे भी मज़बूती सेइं विश्वास केरम।" 6 प्रभु यीशुए ज़ोवं, "अगर तुश्शो विश्वास सिवलारे गलेवे बराबर भी भोलो त तुस इस तूतेरे बुटे जो जोई सकतथ इट्टां उखड़ ते समुन्द्रे मां लग त तै तुश्शो हुक्म मनेलो। 7 "तुसन मां एरो कौन आए, जेसेरो नौकर ऊडारां बेंतो भोए या गोरू चारतो भोए ते ज़ैखन तै ऊडारे मरां घरे एज्जे त तैसेरो मालिक तैस ज़ोए कि, 'लूशी बिश्श ते रोटी खा।' 8 या एन न ज़ोए कि मेरी रोटी तियार केरथ ते ज़ां तगर अवं खेइ पीं नन्ना ते ज़ां तगर अवं रेज़्जी नन्ना तू मेरी सेवा केरतो राए, तैल्ला पत्ती तू भी खा? 9 कुन तै एल्हरेलेइ नौकरेरू अहसान केरेलो कि, तीं तैन कियूं ज़ैन तीं केरमेरे लेइ ज़ोवरू थियूं? 10 एन्चरे ज़ैखन तुस एन सब केरेले ज़ैस केरनेरो तुसन हुक्म दित्तोरो थियो, त ज़ोथ कि, 'असां निकम्मे नौकर आम? असेई तैने कियूं ज़ैन केरनू चाते थियो।"' 11 एक्की फेरे यीशु त कने तैसेरे चले यरूशलेम नगरेरे पासे चल्लोरे थियो। तैना सामरिया ते गलीले इलाके मांमेइं चल्लोरे थियो। 12 ज़ैखन तैना एक्की इलव्वें मां पुज़ने बाले थियो ते तैडी दश कोढ़ी मैल्ले ज़ैना दूर खेडोरे थियो। 13 तैनेई बडे ज़ोरे सेइं ज़ोवं, "हे यीशु, हे प्रभु, असन पुड़ दया केर।" 14 यीशुए तैन लेइतां ज़ोवं, "यरूशलेम नगरेरे मन्दरे मां गाथ ते अपनो आप याजकन हिराथ, ते सच्चे एरू भोवं कि गाते बार बत्तां तैन केरू कोढ़ साफ़ भोइ जेवं।" 15 पन तैन मरां अक कोढ़ी अपनू कोढ़ हेरतां कि, तैसेरू कोढ़ साफ़ भोरोए

खुशी भोइतां बडे ज़ोरे सेइं परमेशेरी तारीफ़ केरतो वापस यीशु कां अव 16 ते यीशुएरे पावन पुड़ दोग्ग रेखतां शुक्रु लगे केरने। ए मैन्हु सामरी थियो। 17 यीशुए तैस पुच्छू, "कुन तैन दश कोढ़ी केरू कोढ़ साफ़ नई भोवरू? फिरी तैना कोरां जे? 18 कुन एस गैर यहूदी मैनेरे अलावा तैन होरन एत्री हिम्मत न अई, कि गेइतां परमेशेरी महिमा केरम?" 19 तैखन यीशुए तैस ज़ोवं, "खडो उठ ते चल्लो गा तीं मीं पुड़ विश्वास कियो तांए तू बेज़्जोरोस।" 20 फरीसी लोक यीशु पुच्छने लगे, "कि परमेशेरेरू राज़ केइस एजनूए? यीशुए तैन जुवाब दित्तो कि परमेशेरेरू राज़ एरू नई कि कोई तैस लेई बटे। 21 ते ज़ोन कि हेरा इड़ी या उडीए एन्चरे नई बल्के परमेशेरेरू राज़ तुश्शे मझाटे।" 22 यीशुए अपने चलन सेइं ज़ोवं, "तै दिहाड़ी भी एजनीए कि, जेइस तुस परमेशेरी दिहैइन मरां अक दिहाड़ी हेरनेरी इच्छा रेखले, जेइस मैनेरू मट्टे यानी अवं वापस एजनीई, पन तुस न लेई बटेले। 23 लोक तुसन सेइं ज़ोले कि, 'हेरा, मसीह इडीए,' या 'उडीए या हेरा तै इडीए!' पन तुस तैरां न गेइयथ ते न तैन पत्ती न चेल्लथ। 24 किजोकि जेन्चरे बिजली अम्बरे मरां चेमकतां एक्की पासेरां होरि पासे चल्ली गाचे, तेन्चरे मैनेरू मट्टू यानी अवं तैस दिहैड़ी बांदो भोलो। 25 पन ज़रूरीए कि तै पेइले दुःख झैल्ले ते इस ज़मानेरे लोक तैस घटिया समझन। 26 ते ज़ेरू इश्शे पूर्वज नूहेरे ज़माने मां भोरू थियूं, तेरहु मैनेरे मट्टेरे ज़माने मां भी भोलू। 27 तेइस भी लोक खाते पीते थियो ते इला भोंते रहते थियो। ते ज़ां तगर नूह किश्ती मां न थियो जोरो तांतगर सब किछ भोतू राव। ते फिरी तूफान अव ते सब किछ खतम भोइ जेवं। 28 ते ज़ेरू इश्शे पूर्वज लूतेरे ज़माने मां भोरू थियूं कि लोक खाते पीते थियो बुपार केरते, बागां लाते ते घरां बनाने मां मघन थियो। 29 पन ज़ैस दिहैड़ी लूत सदोम नगरे मरां बेडर निस्सो त पत्रोवं अम्बरेरां गंधकेरी अग बैखतां सब किछ खतम केरि छड़। 30 ते मैनेरे मट्टू यानी मेरू वापस एजनू भी अचानक भोलू। 31 "तैस दिहैड़ी ज़ै लाए पुड़ भोलो त तैसेरो माल सबाब अगर घरे मां भोलो त तैस नेने तै अन्तर न एज्जे, ते ज़ै ऊडारे मां भोलो तै भी वापस न गाए। 32 लूतेरी कुआन्शी सेइं कुन भोवं याद रेख्खा। 33 ज़ै अपनि जान बचांनेरी कोशिश केरेलो तै तैस गुवालो, ते ज़ै तैस गुवालो तै तैस बचालो। 34 अवं तुसन सेइं जोताई कि तैस राती दूई मैन्हु एक्की खट्टी पुड़ झुल्लोरे भोले, ते अक नीयो गालो, ते दुइयोवं तैडी रालो। 35 दूई कुआन्शां हिटलाट पइती भोली त अक नेनीए ते अक तैडी छडनियें। 36 दूई मैन्हु ऊडारे मां भोले त अक नेनोए ते अक तैडी छडनोए।" 37 एन शुन्तां तैनेई यीशुए पुच्छू, "हे प्रभु असन सेइं ज़ो, एन कोड़ि भोलू?" यीशुए तैन ज़ोवं, "ज़ैडी ज़िग्गा भोते तैडी इल्लां जम्हां भोइचन।"

18 यीशु अपने चलन अक मिसाल देइतां ज़ोवं, कि हिम्मत हारनेरे बगैर प्रार्थना केरती रावरी लोड़े। 2 "एक्की नगर मां अक हाकिम रातो थियो। तैन परमेशेरे करां डरतो थियो, ते न कोन्ची मैनेरी परवाह केरतो थियो। 3 तैस नगर मां अक विधवा कुआन्शा रहती थी ज़ै तैस हाकिमे कां एइती रहती थी, ते तैस कां मिनत केरती रहती थी कि, मेरो

इन्साफ केरतां मीं मेरे दुश्मने करां छुटा। 4 पेड़ले त तैनी एत्रो खियाल न कियो पन ज़ैखन ए हिसाब च़लतो राव, त तैनी अपने मने मां ज़ोवं, ‘अवं न परमेशरे करां डेरि ते न मैनेरी परवाह केरि। 5 पन ए विधवा कुआन्श मीं परेशान केरती राचे, एल्हेरेलेइ अवं एसारो इन्साफ केरेलो, नई त एसां अवं बड़ो ज़लील केरनोई।” 6 तैखन प्रभु यीशुए ज़ोवं, “शुना ए बेईमान हाकिम कुन लोरोए ज़ोने। 7 बस कुन परमेशर अपने चुनोरे लोकां केरो फैसलो केरने मां च़िर लालो, ज़ैना रात दिहैड़ी फरयाद केरते रातन? 8 अवं ज़ोताई, कि तै तैन केरो फैसलो केरेलो ते लूशी केरेलो। पन फिरी भी ज़ेइस मैनेरू मडू यानी अवं एज्जेलो त कुन लोक मीं पुड़ हेजू तगर विश्वास केरते भोलो?” 9 यीशुए किछ एरे लोकन अक मिसाल दिती कि, ज़ैन अपनो आपे बड़ो धर्मी समझते थिये ते होरन किछ न थिये बुझते। 10 “दूई मैनु प्रार्थना केरने मन्दरे मां जे अक फरीसी मैनु थियो, ते होरो धड़त (टेकस) घिन्ने बालो थियो। 11 फरीसी मैनु खड़ो भोइतां प्रार्थना केरने ते अपने बारे मां सोचने लागो, कि हे परमेशर अवं तेरू शुक्र केरताई, अवं होरि मैनु केरो ज़ेरो नई ज़ैना डैकू, अधर्मी, बदमाशी केरनेबाले, ते इस धड़त नेने बालेरो ज़ेरोई नई, 12 अवं हफते मां दूई बार बरत रखताई, ते अपनि कर्मईयरो दशोवं हिस्सो तींजो देताई। 13 “पन ते धड़त नेनेबालो ज़े दूर खड़खड़ो थियो, तैनी एत्रू भी न केरि बटु, कि अम्बरेरे पासे तक्के बल्के छाती पिट्टां ज़ोने लागो, ‘हे परमेशर मीं पैपी पुड़ दया केरतां माफ़ केर!’ 14 अवं तुसन सेइं सज़ ज़ोताई, ए धड़न नेनेबाले मैनु तैस फरीसी मैनु करां धर्मी निस्तां अपने घरजो जेव। किजोकि ज़ै कोई अपनो आप बड्डो बनालो ते निकड़ो बनाव गालो ते ज़ै अपनो आप निकड़ो बनालो तै बड्डो बनाव गालो।” 15 फिरी किछ लोक निक्के बचन यीशु कां आन्ने लगे ताके यीशु तैन पुड़ हथ रेखां बरकत दे। चेलैई तैन लाव त तैन धमकाए ते ठाकू। 16 पन यीशुए बच्चे एप्पू कां कुजाए ते चलन सेइं ज़ोवं, “बचन मीं कां एजने देथ एन न ठाका, किजोकि परमेशरेंरू राज़ एरां ज़ेरां केरूए। 17 अवं तुसन सेइं सज़ ज़ोताई, ज़ै कोई परमेशरेंरू राज़ मां गानेरे लेइ अपनो आप निक्के बचन बराबर न बनाए, तांतगर परमेशरेंरू राज़े मां दाखल न भोइसखे।” 18 केन्ची यहूदी मैने यीशुए पुच्छू, “हे रोड़े गुरू हमेशारी ज़िन्दगी हासिल केरनेरे लेइ अवं कुन केरि?” (aiōnios g166) 19 यीशु जुवाब दितो, “तू मींजो रोडू किजो ज़ोतस? परमेशरेंरू अलावा होरो कोई भी रोड़ो नई। 20 तू त परमेशरेंरू हुकमन ज़ानतस, यानी ‘खून न केरा, बदमाशी न केरा, च़ोरी न केरा, झूठी गवाही न देथ, धोखो न देथ, अपने हाज-बव्वां केरि इज़्जत केरा।” 21 तैनी मैने ज़ोवं, “एना सब हुकम अवं बचपनेरो मन्तो ओरोई।” 22 ज़ैखन यीशुए एन शुन्तां ज़ोवं, “तीं मां एक्की गल्लारी कमी आए, तू ज़ैन किछ तीं कां आए, तैन बेचतां गरीब मैनु दे, तैखन तीं स्वर्गं मां खज़ानो मैलेलो। ते एइतां मीं पत्ती च़ल।” 23 ए गल शुन्तां तै बड़ो उदास भोइ जेव किजोकि तै बड़ो अमीर थियो। 24 यीशुए तैस हेरतां ज़ोवं, “अमीरां केरू परमेशरेंरू राज़े मां दाखल भनू केत्रू आसुखतुए। 25 परमेशरेंरू राज़े मां अमीर मैनेरू दाखल भोने केरां

ऊँटेरू सांधनेरे पाए मरां निस्नु सुखू आए!” 26 ज़ैनेई ए गल शुनी त तैना पुच्छने लगे, “फिरी कसेरी मुक्ति भोइ सखे।” 27 यीशुए जुवाब दितो, “मैनन् करां त एन न भोइ सके पन परमेशरेंरू करां सब किछ भोइ बटते।” 28 पतरसे यीशु सेइं ज़ोवं, “हेर असां त सब किछ छेइतां तीं पत्ती च़लोरेम।” 29 यीशु तैन सेइं ज़ोवं, “अवं तुसन सज़ ज़ोताई, कि एरो कोई नई ज़ैनी परमेशरेंरू राज़ेरे लेइ अपनू घर या कुआन्श ते हाज या बव, ढ़ला या बच्चे शारोरे भोन। 30 तैस इस दुनियाई मां बडू जादे, ते एजने बैली दुनियाई मां हमेशारी ज़िन्दगी मैलनीए।” (aiōn g165, aiōnios g166) 31 यीशुए अपने 12 चले एप्पू सेइं साथी निये ते तैन ज़ोने लगे, हेरा, “अस यरूशलम नगरे जो च़लोरेम ते नेबेई ज़ैन किछ मैनेरे मट्टेरे बारे मां लिखोरूए तैन पूरू भोलू। 32 तै गैर कौमां केरे हथ्ये देनोए, ते तैना तैसेरो मज़ाक बनाले ते तैस बे इज़्जत केरेले ते तैसेरे तुतरे पुड़ थुकनूए। 33 तैस कोड़े मारले ते तैस मैरी छेइले पन तै टूलेइयोवं दिहाड़े फिरी ज़ींतो भोलो।” 34 तैनेई ए गल न सेमझी बटी ते यीशुएरी एस गल्लरो मतलब तैन करां छप्पोरो राव। 35 ते एरू भोवं कि ज़ैखन तैना यरीहो नगरेरे नेड़े पुज़्जे त अक कानो मैनु बत्तारे इलेखी बिशोरो भीख मगतो थियो। 36 ज़ैखन तैनी हळे मैनु केरि छेइ शुनी त तै पुच्छने लगे, “ए कोलहेरी शौर लोरी भोने?” 37 लोकेई तैस ज़ोवं, “यीशु नासरी कोस्कोई च़लरोए।” 38 तै चिन्डां मैरतां ज़ोने लगे, “हे यीशु नासरी दाऊदेरा मट्टां मीं पुड़ दया केर।” 39 यीशुए सेइं साथी च़लने बाले लोक तैस काने मैनु झिड़कने ते ज़ोने लगे, चुप रा, पन तै मना जादे ज़ोरे-ज़ोरे चिन्डां मैरतां ज़ोने लगे, “हे यीशु नासरी दाऊदेरे मट्टां मीं पुड़ दया केर।” 40 यीशु खेड़ोव ते हुकम दितो, एस मीं कां आनां ज़ैखन तै तैस कां अवं त यीशुए तैस पुच्छू। 41 ज़ो, “अवं तेरे लेइ कुन केरि?” तैनी काने मैने ज़ोवं, “हे प्रभु अवं चाताई कि अपनि एण्छेई सेइं लेई बेति।” 42 यीशुए तैस सेइं ज़ोवं, “बेज्झोई गा तेरे विश्वासे तू बज़्जावरिस।” 43 तै तैखने बेज़्झोव ते लहने लगे ते परमेशरेंरू तारीफ़ केरतो यीशु पत्ती च़लो जेव। एन हेरतां सब लोक परमेशरेंरू तारीफ़ केरने लगे।

19 यीशु यरीहो नगरे मांमैइं निस्तां च़लोरे थियो। 2 तैड़ी अक मैनु थियो, ज़ेसेरू नवं जक्कई थियूं, तै धड़त घिन्ने बालां केरो अफसर थियो, तै बड़ो अमीर थियो। 3 तैस यीशु हेरनेरो चाऊ थियो, पन तैसेरू कद छोट थियूं, तांए तै हळे मैनु मरां लेई न थियो बटतो। 4 एल्हेरेलेइ तै देवइतां अगर जेव ते फेगरे बुट्टे उबरो गुस्सो किजोकि ज़ैखन यीशु एज्जे त तैस रोड़ेचारे लेई सके। 5 ज़ैखन यीशु तैस ठेरी पुज़ो त तैनी उबरू तेकतां ज़ोवं, “जक्कई लूशी उन्ढो ओस, किजोकि अज़ मीं तेरे घरे टूलाहन च़ारेई एजनूए।” 6 जक्कई तैखने उन्ढो ओस्सो ते यीशु बेड़ि खुशी सेइं अपने घरे नीयो। 7 एन हेरतां सब लोक शकैइत केरतां ज़ोने लाए, “कि यीशु त एक्की पैपी मैनेरो मेहमान बनरोए।” 8 जक्कई रोटी खाते बारे खड़ो भोइतां प्रभु सेइं ज़ोने लगे, “हे प्रभु यीशु तक अवं अपनि अध्ठी जेइदात कंगालन देताई, अगर केन्चेरू किछ खोरू भोलू त तैस च़ेरे हिस्से वापस देइलो।” 9 तैखन यीशुए तैस सेइं ज़ोवं,

“अज्ञ इस घरे मां मुक्ति ओरिए, एल्हेरेलेइ इन भी पूर्वज अब्राहमेरू अक मट्टूए। 10 किजोकि मैनेरू मट्टू यानी अवं होरि लोकन हमेशारी सज़ाई करं मुक्ति देने एवरोई।” 11 ज़ैखन लोक यीशुएरी गल्लां शुन्ने लगगोरो थिये त तैनी तैन अक मिसाल देइतां ज़ोवं, किजोकि तैना यरूशलेम नगरेरे नेड़े पुजारे थिये ते लोकां केरो खियाल थियो परमेशेरू राज लूशी एजनु आए। 12 तैनी तैन ज़ोवं, “अक बड़ो अमीर मैन्हु होरि मुलखे मां चलो, ताके तैस मुलखेरो मेंत्रेरो ओदो घिन्तां वापस एज्जे। 13 तैनी अपने सेवादारन मरां दश ज़न्हे कुजाए, ते तैन दश मोहरां देइतां ज़ोवं, ‘भेरे वापस एजने तगर इस पेंडसे सेइं कारोबार केरथ।’ 14 पन तैस ठेरी लोक तैस सेइं नफरत केरते थिये, तैनेई किछ लोक भेजतां तैस जो बिस्तार भेजो, कि अस न चाम ए मैन्हु असन पुड़ राज़ केरे।” 15 “ज़ैखन तै हुकुमतरो ओदो हासिल केरतां वापस अव त तैनी अपने सेवादारे जो समाद भेजो। ज़ैना तैनी कारोबारेरे लेइ पेंडसे दित्तोरे थिये ताके सेबूभी केरो पतो केरे कि केनि केरू कियेरू आए। 16 पेइले मैने एइतां ज़ोवं, ‘हे मालिक मीं तेरी दश अश्रेफेइं सेइं दश होरि कर्मेई।’ 17 तैनी तैस सेइं ज़ोवं, ‘तीं दश अश्रेफेइं सेइं इमानदेरी सेइं कम कियू गा तीं दश नगरन पुड़ अधिकार दित्तो गाते।’ 18 दुइयोंवं मैने एइतां ज़ोवं, ‘हे मालिक मीं तेरी पंच अश्रेफेइं सेइं पंच होरि कर्मेई।’ 19 तैनी तैस सेइं भी ज़ोवं, ‘तीं भी पंच नगरन पुड़ अधिकार दित्तो गाते।’ 20 तैखन एक्की मैने एइतां ज़ोवं, ‘हे मालिक इना रेइ तेरी अश्रेफी मीं एन रूमाले मां बंधतां रखोरि थी।’ 21 किजोकि तू सखत मैन्स ते अवं तीं करां डरतो थियो। किजोकि तू ते चीज़ ज़ै तीं न भोए रखोरि तू तैस भी नेतस ते ज़ैन न भोए बेवरू तू तैन भी लुनतस। 22 तैनी तैस सेइं ज़ोवं, ‘हे दुष्ट नौकरा अवं तेरी गल्लेईं सेइं तींए मुज़म बनताइं। ज़द तीं पतो थियो, कि अवं बड़ो सखत मैन्हु आई, ते ज़ै चीज़ मीं नई रखोरि अवं तैस भी सलहतां ते ज़ैन नई बेवरू अवं तैन भी लुनतां। 23 फिरी तीं मेरे रुपैइये केन्ची कां किजो नई रखोरे ताके अवं वापस एइतां तैस करां सूते समेत उसुल केरेथो?’ 24 तैखन तैनी तैन सेइं ज़ोवं, ‘ज़ैन तैड़ी खड़खड़े थिये एस करां एन अश्रेफी एन्तां उस देथ ज़ैस कां दश अश्रेफीन।’ 25 तैना ज़ोने लगे हे मालिक एस कां पेइली दश अश्रेफीन! 26 तैनी तैन जुवाब दित्तो, अवं तुसन सेइं ज़ोताई कि, ‘ज़ैस कां परमेशेररी मर्ज़ीं समझनेरी खुवाइश आए, तैस परमेशार जादे समझ देलो। पन ज़ैस कां परमेशेररी मर्ज़ीं समझनेरी खुवाइश नई, तैस केरां, थोड़ी ज़ेरि समझ ज़ै तैस कां आए, तै भी नी गाली।’ 27 पन मेरे इन दुश्मन ज़ैन मीं न थिये सुखाते कि, ए असन पुड़ राज़ केरे एन इरां आनां ते मेरे सामने एन मैरी छुड़ा।” 28 एना गल्लां ज़ोइतां यीशु अपने चलन सेइं साथी अग्रोवं जेव कि यरूशलेम नगरे मां गाए। 29 ज़ैखन तैना ज़ैतूनेरे पहाड़े बैतफगे ते बैतनिय्याह मां पुजे त यीशुए दूई चले एन ज़ोइतां अग्रोवं भेजो। 30 “तुस सामने उस इलव्वें मां गाथ ते तैड़ी तुसन अक गधेरो बच्चो बन्धोरो मैलनोए। ज़ैस पुड़ अज्ञ तगर कोई नई चढोरो तैस खोलतां इड़ी मीं कां आनां। 31 ते अगर तुसन कोई पुच्छे, कि तुस एस किजो लोरेथ खोलने त तुस

जोइयथ, कि प्रभुए एसेरी ज़रूरत आए।” 32 अग्रोवं गानेबाले चलेई तैने कियू ज़ैन यीशुए ज़ोरू थियू। 33 ज़ैखन तैना गधेरो बच्चे खोलने लगगोरो थिये त तैसेरो मालिक तैन पुच्छेने लगे, “तुस एस बच्चे किजो लोरेथ खोलने?” 34 तैनेई जुवाब दित्तो, “प्रभुए एसेरी ज़रूरते।” 35 तैनेई तै बच्चो खोलतां यीशु कां आनो, ते यीशुए तैस पुड़ अपना लिगडां छेडतां तैस पुड़ च़ेइतां च़लो जेव। 36 ज़ैखन तैना च़लोरे थिये त लोकेई अपना लिगडां बत्ती मां बिछां। 37 ज़ैखन तैना यरूशलेम नगरे नेड़े पुजे त ज़ैइं बत ज़ैतून पहाड़े पुड़ेरां उन्डी गातीए तैड़ी सारे चलेई एना चमत्कार हेरतां ते खुशी भोइतां परमेशेररी तारीफ़ केरने लगे कि, 38 “धने तै राज़ो ज़ै परमेशेर नव्वें सेइं एइते! ते स्वर्गें मां महिमा ते अम्बरे मां शान्ति भोए।” 39 तैन मैन्स मां किछ फरीसी लोक भी थिये। तैना यीशु सेइं ज़ोने लगे, “हे गुरू अपने चलन ज़ो कि चुप केरन।” 40 यीशुए तैन जुवाब दित्तो, “अवं तुसन ज़ोताई, अगर एना लोक चुप केरन त इना घोड़ ज़ोरे सेइं परमेशेररी तारीफ़ केरेले।” 41 यरूशलेम नगरे मां पुजतां यीशु यरूशलेम नगरेरो हाल हेरतां तैस लेरां छुटी। 42 ते ज़ोने लगे, “अगर तुस सिर्फ़ इस दिहेइरे बारे मां जानते भोथे, ज़ै तुसन शैन्तरे पासे नेती! पन ई गल हुना तुशे एछ़छ़न करां छपोरीए। 43 तीं तैना दिहाड़े हेरने पेनेन ज़ेइस तेरे दुश्मन तेरे च़ेरे पासन मोरचो बंधतां ते तीं घेरो देले, ते हर पासेरां तीं पुड़ हमलो केरेले। 44 तुशे दुश्मन तुसन नाश केरेले, ते सैरी लोकन मारेले, ते तीं पुड़ घोड़े पुड़ घोड़ बाकी न रालो। किजोकि ज़ेइस परमेशार तुसन बचानेरे लेइ ओरो थियो तुसेईं न पिशानो।” 45 तैखन तै मन्दरे मां जेव ते तैड़ी तैने बुपारी ते गाक बेइरोवं कढने शुरू किये। 46 तैनी तैन सेइं ज़ोवं, “पवित्रशास्त्रे मां लिखोरूए ‘मेरू मन्दर प्रार्थनारू घर भोलू’ पन तुसेईं त डैकू केरो अड्डो बनेइतां रखोरोरूए।” 47 ते तै तैस पवित्र दहैड़ी मन्दरे मां शिक्षा देतो थियो, पन प्रधान याजक ते शास्त्री लोकेई यीशु मारनेरी कोशिश मां लगगोरो थिये। 48 पन तैन एन केरनेरो मौको न थियो मैलतो, किजोकि सारे लोक यीशुएरी गल्लां शुन्नेरे लेइ च़ेरे पासन बिशोरे रहते थिये।

20 एक्की दिहाड़े ज़ैखन यीशु मन्दरे मां शिक्षा लोरो थियो देने, ते तैन खुशखबरी लोरो थियो शुनाने त प्रधान याजक ते शास्त्री ते यहूदी बुजुर्ग यीशु कां पुजे। 2 ते तैना ज़ोने लगे, “तू एन सैरी गल्लां कसेरे अधिकारे सेइं केरतस या तीं ए अधिकारे केनि दित्तोरोरूए?” 3 यीशु तैन जुवाब दित्तो, “अवं भी तुसन अक गल पुछतई, मीं ज़ोथ। 4 यूहन्नारो बपतिस्मो स्वर्गेरे तरफां थियो या मैन्हु केरे तरफां थियो?” 5 तैना एप्पू मांमेइं बेंस केरने लगे, “कि अगर अस ज़ोम, ‘स्वर्गेरे तरफां थियो,’ त तै पुछेलो कि, ‘फिरी तुसेईं याकीन की नई कियेरू?’ 6 पन अगर अस ज़ोम कि, ‘मैन्हु केरे तरफां थियो,’ त लोकेई असन घोड़ेईं देनिन, किजोकि तैना यूहन्ना नबी मन्ते थियो।” 7 एल्हेरेलेइ तैनेई जुवाब दित्तो, “कि अस न जानम कि केसेरी तरफां थियो।” 8 यीशु तैन सेइं ज़ोवं, “त अवं भी तुसन सेइं न ज़ोई कि एना कम्मां कसेरे अधिकारे सेइं केरताई।” 9 फिरी यीशु तैन लोकन अक मिसाल देइतां ज़ोने लगे, “एक्की मैने

दाहरी बाग लाई ते ते ठेकेदारन ठेके पुड देइतां एण्णू खरे चिरे कोस्कोई दूर मुलखे चलो जेव। 10 जेइस दाह पकनेरो मौसम अव त तैनी अपनो हिस्सो नेनेरे लेइ अक नौकर बागी मां भेजो। पन तैनेई तै खूब कुटो ते खाली वापस भेजो। 11 ते फिरी तैनी अक होरो नौकर भेजो, पन तैनेई तैसेरी भी बेइजती की, ते ते भी झुस कुट केरतां खाली वापस भेजो। 12 फिरी तैनी अक टलेइयोवं होरो नौकर भेजो, पन तैनेई तैसेरी भी बेइजती की ते ज़ख्मी केरतां कढो। 13 तैखन बागारे मालिके ज़ोवं, “अवं अपनू ट्लारू मट्टू भेजताई शैइद तैना तैसेरो लिहाज़ केरेले।” 14 पन ज़ैखन ठेकेदारैइ तै लाव त एण्णू मांमेइं मुशोरो केरने लगे, ए मालिके, एज्जा एस्से मारम ताके जेइदात इश्शी भोइ गाए। 15 तैनेई तैन मट्टू बागी मरां बेइर शैरी छट्टू, ते मारू तुस सोचा कि फिरी बागारे मालिके तैन सेइं कुन केरेलो। 16 ते मालिक एइतां तैन मैरी छडेलो ते बाग होरि केरे हवाले केरेलो।” तैनेई एन शुन्तां ज़ोवं, “परमेशर न केरे एरू न भोए।” 17 तैनी तैन केरे पासे तेकतां ज़ोवं, “फिरी इन कुने ज़ैन पवित्रशास्त्रे मां लिखोरूए कि, “जै घोइ मिस्त्रेई रद्दी कियो, तैए घोइ कूनेरो घोइ भोलो।” 18 ज़ै मैन्हु इस घोड़े पुइ बिछड़ेलो त तैसेरे टुकड़े-टुकड़े भोइ गाले, ते ज़ैस उन्ढो ए घोइ बिछड़ेलो तैस ए पितां छडेलो।” 19 शास्त्री लोकेई ते प्रधान याजकेई यीशु ट्लानेरी कोशिश की। किजोकि तैना बुझी ज़ोरे थिये, कि तैनी ए मिसाल एन केरे बारे मां शुनेवरी थी, पन तैना लोकन करां डरते थिये। 20 तैना लोक यीशुए ट्लानेरो मौको तोपने लोरे थिये, तैनेई विशवैसी केरे रूपे मां जासूस भेजे ताके तैसेरी कोई गल टलेइ सखन ते फिरी राज़ेरे अधिकारे मां देइ देन। 21 तैनेई यीशु पुच्छू, “हे गुरु अस ज़ानतम कि तू सच़्यो आस ते सच़्येरी शिक्षा देतस, ते केन्चेरी तरफदारी न केरस बल्के सच़्ये सेइं परमेशेरी बत्तरी शिक्षा देतस। 22 कुन असन महाराजे जो धइत देनी जेइजे कि नेई?” 23 यीशुए तैन केरि चलाकी बुझतां तैन जो ज़ोवं। 24 “मीं अक दीनार हिराथ ते एस पुड केसेरी शकल ते केसेरू नंवे?” तैनेई ज़ोवं, “महाराजेरी।” 25 यीशु तैन सेइं ज़ोवं, “ज़ैन महाराजेरू तैन महाराजे जो देथ, ते ज़ैन परमेशेरू ए, तैन परमेशरे जो देथ।” 26 ते तैना लोकां केरे सामने तैसेरी कोई गल न टलेइ सखे बल्के तैसेरे जुवाबे सेइं तैना हैरान भोइतां चुप रेइजे। 27 फिरी सदूकी ज़ैन ज़ोते थिये कि मुवोरे ज़ींते न भोन ते फिरी किछ यीशु कां एइतां पुच्छने लगे। 28 “हे गुरु असन जो मूसेरो हुक्मे कि अगर केन्चेरो ढ़ला अपनि कुआन्शारे भोंते संते ओईट्ल मेरि गाए त तैसेरो ढ़ला तैस कुआन्शी सेइं इला बनाए, ताके तै अपने ढ़लाएरे लेइ औलाद पैदा केरे। 29 सत ढ़ला थिये पेइले इला बनाव ते ओईट्ले मेरि जेव। 30 फिरी होरे तैस सेइं इला बनाव। 31 फिरी तैल्ला पत्ती टलेइयोवं तै कुआन्श रख्खी फिरी एन्चरे सेइं सत्तेई ज़नेई इला बनाव, पन सब बेऔलाद मेरि जे। 32 ते आखकार तै कुआन्श भी मेरि जेई। 33 ते ज़ींते भोने पुइ तै केसेरी कुआन्श भोली? किजोकि तै सत्ते ढ़लां केरि कुआन्श बनोरी थी।” 34 यीशुए तैन सेइं ज़ोवं, “इस दुनियारे लोकन मां त इला बनानेरो दस्तूरे। (aiōn g165) 35 पन ज़ैना लोक एजने बैली दुनियारे काबल भोले, ते ज़ैना

मुइदन मरां ज़ींते भोले तैना इला न बनाले। (aiōn g165) 36 तैना मरेले भी नन्ना एल्हेरेलेइ की तैना स्वर्गदूतां केरे ज़ेरे भोले ते तैन जो ज़ींते भोनेरां ते परमेशेरां मट्टां ज़ोले। 37 ते ज़ैडी तगर मुइदां केरो ज़ींते भोनेरी गल्ले, जेन्चरे मूसा नेबेरे ज़लते झैल्लोवेरे बारे मां, तेन्चरे इशारो कियो किजोकि तै परमेशर अब्राहमेरो परमेशर, इसहाकेरो परमेशर ते याकूबेरो परमेशर जोइतां फुकारतो थियो। 38 पन परमेशर मुइदां केरो नई बल्के ज़ींतां केरो परमेशरे। किजोकि तैसेरे नेडे सब ज़ींतेन।” 39 शास्त्री लोकन मरां किछेईं जुवाब दितो, “हे गुरु तीं त बडू रोडू ज़ोवं।” 40 फिरी तैन मरां केन्ची हिम्मत न अई, कि एस होरू किछ पुछन। 41 फिरी यीशुए तैन सेइं ज़ोवं, “फिरी मसीह जो दाऊदेरू मट्टू केन्चरे सेइं ज़ोतन? 42 किजोकि दाऊद त एण्णू भजना केरे किताबी मां ज़ोते, परमेशरे मेरे प्रभु सेइं ज़ोवं, मेरे देइने पासे बिश। 43 कि ज़ां तगर अवं तेरे दुश्मन तेरे पावन हैठ न बिशैली। 44 दाऊद त तैस जो प्रभु ज़ोते, फिरी तैन तैसेरू मट्टू केन्चरे भोवं?” 45 ज़ैखन सब लोक शुनी राहोरे थिये त यीशुए अपने चलन सेइं ज़ोवं। 46 “शास्त्री लोकन करां हुशार रेइयथ तैना लम्मे-लम्मे कुरते लाने पसंद केरतन, ते होरू एन चातन कि लोक बज़ारन मां तैन जो नमस्कार ज़ोन, ते तैना प्रार्थना घरे मां उच्ची कुर्सी तोपतन ते धामन मां बड़े खास बन्नु चातन। 47 तैना विधवां कुआन्शां केरां घरां लुटतन ते लोकन हिरानेरे लेइ बडी लम्मी प्रार्थना केरतन। तैन हलछी सज़ा मैलनीए।”

21 यीशु अमीर लोकां केरे पासे तकने लगे, ज़ैना-ज़ैना दान-पेट्टी मां दान लोरे थिये छडने। 2 तैनी अक बडी गरीब विधवा कुआन्श लाई ज़ैसां दूई पेंइसे यानी अक धेलो च़ाढो। 3 तैखन यीशुए ज़ोवं, “अवं तुसन सेइं सच़ ज़ोताई कि दान-पेट्टी मां दान देने बालन मरां सेब्धन करां जादे इस विधवा कुआन्शां दान दित्तू। 4 किजोकि तैनेई त अपनि दौलती मरां सिर्फ़ धगसेरे पेंइसे परमेशरे घरे मां दित्तोरेन पन इस कुआन्शां अपनि गरीब हालती सेइं ज़ैन किछ एसारे पल्ले थियूं सब किछ देइ छडू।” 5 किछ लोक मन्दरे बारे मां ज़ोने लोरे थिये, कि बड़े माघे घोड़ेईं सेइं ते दान कियोरी चीज़न सेइं बनोरूए, त यीशुए ज़ोवं। 6 “तैना दिहाड़े एजने बालेन कि इन चीज़ां ज़ैना तुस इडी लहने लोरेथ इडी घोड़े पुइ घोइ नई रानो ज़ै बछोडो न गालो।” 7 तैनेई यीशुए पुच्छू, “हे गुरु जी एन गल्लां केइस भोनिन? ते तैन केरो दुनियाई मां एजनेरो कुन निशान भोनेए।” 8 यीशुए तैन ज़ोवं, “खबरदार टेपलोईयथ नन्ना, किजोकि काई लोक मेरे नंवे सेइं एजनेन ते तैनेई ज़ोनूए कि अक्वे मसीह आई, ते मौको भी नेडे पुजोरोए तुस तैन पत्ती न गेइयथ। 9 ते ज़ैखन तुस लडेइयरी त उलझनरी अफुवां शुनेले त डेरथ नन्ना, किजोकि एन गल्लां केरू पेइले भोनू ज़रूरीए, पन तेइसे खातमों नई भोनो।” 10 तैखन यीशुए ज़ोवं, “किजोकि कौमी पुइ कौम, ते राज़े पुइ राज़ चढहाई केरेलू। 11 ठारी-ठारी बडे-बडे भुंजल एजनेन ते काल पेनोए ते बिमारी फैलनिंए ते बुरी-बुरी गल्लां भोनिन ते अम्बरे मां आजीब निशान लेइहोनेन। 12 एन सब गल्लां भोने करां पेइले तुशे दुश्मन तुसन सिर्फ़ मेरे नच़ेरे वजाई सेइं ढपेले ते तुसन सताले ते प्रार्थना घरेरी आदालती मां हाज़र केरेले ते

कैद केरेले ते गवर्नरन ते कने राजन कां पैश केरेले। 13 तैखन तुसन मेरी गवाही देनेरो रोडो मौको मैलेलो। 14 पन तुसन कोई ज़रूरत नई, कि पेडले फिक्र केरने लगथ कि अस कुन ज़ोमेलो। 15 किजोकि अवं तुसन एरी ज़बान ते अक्ल देइलो, कि कोई भी मुखालफ तुशे सामने खडो न भोइ सकेलो ते न लोक तुशे खलाफ किछ जोई सकेलो। 16 ते तुशे हाज बव ते दूला ते रिशतेदार ते दोस्त तुसन सेइं बैर केरेले ते तुसन मरां किछन मारेले भी। 17 ते मेरे नव्वरे वजाई सेइं सारे लोक तुसन सेइं नफरत केरेले। 18 पन तुशे दोगगरो कोई बाल बांको न भोलो। 19 सब किछ झललां तुस अपनि जान बचेइ साखेलो।” 20 “जेइस तुस यरूशलेम नगर च़ेरे पासन फौवजेइं सेइं घेरू लाले, त बुझथ कि एस नाश भोनेरे दिहाड़े नेडे ओरेन। 21 तैस मौके ज़ैन यहूदिया मां भोले तैना पहाड़े पुड़ जो नेश्थी गान ते ज़ैना यरूशलेम नगरे मां भोले त तैन बेइरोवं निसन ते ज़ैना इल्लोव्वन मां भोले त तैना नगर मांजो न गान। 22 किजोकि एना बदलेरे दिहाड़े भोले, एन मां तैन सब किछ ज़ैन पेइलू पवित्रशास्त्रे मां लिखोरू तैन पूरू भोनूए। 23 तैन दिहाड़न मां ज़ैना दोर्जींती त दुद्ध पियाती कुआन्श भोली, तैन केरे लेइ अफ़सोस! किजोकि धेरती पुड़ बड़ी मुसीबत एजनीए ते एस कौमी पुड़ बड़ी आफत एजनीए। 24 तैना सब तलवारी सेइं मारे गाले ते गुलाम बेनतां सेबभी कौमन मां पुजेले ते गैर कौमां केरो मौको पूरो भोने तगर यरूशलेम नगर गैर कौमैई सेइं पस्त भोंतो रालू। 25 “दिहाड़े चेंदनरी ते तारन मां निशान बांदे भोनेन ते धेरती पुड़ कौमन बड़ी तकलीफ पुज़नियें, किजोकि समुन्द्रेरी लैहरें केरि शौरी सेइं तैना डेरि गानेन। 26 डरें मारे एजने बैली मुसीबतरे इंतज़ार केरते-केरते तैन केरे होश उड़ी गानेन, किजोकि अम्बेरी सैरी शक्ति हिल्लेली। 27 तैखन लोक मैनेरू मट्टू बेड़ि शक्ति ते महिमा सेइं बिदलारी मां एंडतू लाएलो। 28 ज़ैखन एन गल्लां भोनी शुरु भोली त सिधे खडे भोइतां उबरू तेकथ, किजोकि तुशे छुटकारो भोने बालोए।” 29 फिरी यीशुए तैन अक मिसाल देइतां ज़ोवं, “तुस फ़ेगरे बुट ते हीरि बुटन भी हेरतथ। 30 ज़ेरि तैस गुडी लेगनी शुरु भोइचन? त तुस हेरतां बुझतथ कि नेला ओरोए। 31 एसेरो ज़ेरो, ज़ैखन तुस एना गल्लां, ज़ैना मीं जोई, भोते हेरेले, त तुस बुज़्ज़ी छड्ठा कि परमेशेरू राज़ नेडे ओरूए। 32 अवं तुसन सेइं सत्र ज़ोताई, कि ज़ां तगर एन गल्लां पूरी न भोन, एस कौमरो खातमों न भोलो। 33 धरती अम्बर टेली गालू पन मेरी गल्लां कधे न टेलेली। 34 “बस्सा खबरदार भोथ कोस्कोई एरू न भोए कि तुशे दिल नशे मां मसत भोइतां इस जिन्दगरे फिक्रे सेइं कमज़ोर भोए, ते तैस दिहाड़े तुशे लेइ अक मुसीबत बने। 35 किजोकि ते इस सैरी धेरती पुड़ ज़ेरे लोकन तैन सेबभन पुड़ एन्चरे एजनीए। 36 बस्सा, हर वक्त तियार राथ ते प्रार्थना केरते राथ, ताके तुस एन गल्लन करां ज़ैना भोने बैलिन बेंचतां राथ, ते मैनेरे मट्टे कां खडे भोनेरे काबल भोथ।” 37 यीशु रोज़ मन्दरे मां शिक्षा देतो थियो, ते राती ज़ैतून पहाड़े पुड़ रातो थियो। 38 झेझां सारे लोक यीशुएरी गल्लां शुन्नेरे लेइ मन्दरे मां तैस कां एइते थिये।

22 अखमीरी तिहारेरी दिहाड़ी ज़ैस जो फ़सह ज़ोतन नेडे ओरी थी।

2 प्रधान याजक ते शास्त्री मौको तोपने लोरे थिये कि यीशु केन्चरे मारम। किजोकि तैना लोकन करां डरते थिये। 3 ते शैतान यहूदा मां बेस्सी जेव तैस जो इस्करियोती भी ज़ोते थिये, ते तै यीशुएरे 12 चेलन मां गनो गातो थियो। 4 दे ते प्रधान याजकन ते प्रार्थना धरेरे किछ खास पुच्छने गन्ने लोकन कां जेव ते तैन सेइं मुशोरो केरने लगे कि केन्चरे सेइं यीशु तैन केरे हवाले केरी बटते। 5 तैना बडे खुशी भोए ते तैस पेंडसे देनेरो वादो कियो। 6 तैनी तैन केरि गल मन्नी ते मौको तोपने लगे, कि यीशु केन्चरे सेइं तैन केरे हवाले केरे ते केन्ची पतो न लगगे। 7 अखमीरी रोट्टरू तिहार नेडे ओरू थियू, ज़ैस फ़सह तिहारे मां गबडेरू बलिदान देनू ज़रूरी थियू। 8 यीशुए पतरस ते यूहन्ना एन जोइतां भेजे, “कि गाथ ते इश्शे लेइ फ़सह तिहारेरी रोटी तियार केरा।” 9 चेलेई पुच्छू, “कि तू कोडि चातस कि अस तींजो फ़सह तिहारेरी रोटी तियार केरम?” 10 यीशुए तैन जुवाब दितो, “नगर मां गाते तुसन अक मैन्हु मैलनोए ज़ै पैनरो घड़ी धिन्तां च़लोरो भोनोए, तैस पत्ती गेइयथ ते ज़ैस घरे मां ते गालो तुस भी गेइयथ। 11 तैसेरे मालिके सेइं ज़ोइयथ कि गुरे ज़ोरूए कि द्लाहना केरि ठार कोडि आए, ज़ैड़ी अवं अपने चेलन सेइं साथी फ़सह तिहारेरी रोटी खेइ सेखी? 12 तै तुसन दोपरे नेइतां अक बड्डो कमरो हिरालो ज़ै खूब रोडेचारे सज़ेवरो भोनोए तैड़ी इश्शे लेइ तियारी केरथ।” 13 तैनेई तैड़ी गेइतां सब किछ तेरहु लाव ज़ेरू तैनी ज़ोरू थियू, ते तैड़ी फ़सह तिहारेरी रोटी तियार की। 14 ज़ैखन रोटी खानेरो मौको अव त यीशु अपने प्रेरितन सेइं साथी बिशोरे थिये। 15 ते यीशुए तैन सेइं ज़ोवं, “मेरी ए बड़ी इच्छा थी, कि अपनो दुःख झल्लने (मरने) करां पेडले एक्की बार फ़सह तिहारेरी रोटी तुसन सेइं साथी खेइ। 16 किजोकि अवं तुसन सेइं ज़ोताई, कि अज़ेरां पत्ती तांतगर न किछ खेइ सेखी, ज़ां तगर परमेशेरें राज़ेरू कम पूरू न भोए।” 17 फिरी यीशुए दाखरे रसेरो कटोरो द्लातो ते परमेशेरू शुक केरतां चेलन दितो ते ज़ोवं, “यांथ ते एप्पू मांमेइं बंटा। 18 किजोकि अवं तुसन सेइं ज़ोताई कि अज़ेरां पत्ती दाखरो ए रस फिरी तांतगर न पीलो ज़ां तगर परमेशेरू राज़ न एज्जे।” 19 फिरी यीशुए रोटी द्लाती ते परमेशेरू शुक केरतां दलोड़ी ते तैसेरे दुक्डे बनेइतां अपने चेलन एन जोइतां दित्ती, “कि ई मेरी जाने ज़ै तुशे लेइ अवं देताई ते तुस भी मेरी यादागैरी मां एन्ने केरते रेइयथ।” 20 एन्चरे रोटी खानेरे बाद तैनी कटोरो द्लातो ते चेलन कां दितो ते ज़ोवं, “कि ई कटोरो मेरो तैस खूनरो नव्वो करारे ज़ै तुशे लेइ दित्तोरोए। 21 पन हेरा मीं द्लुवाने बालो मीं सेइं साथी खाने लोरोए। 22 किजोकि मैनेरू मट्टू त हुनी च़लोरोस ज़ेन्चरे कि तैसेरेलेइ पेइले एन पक्कू भोरूए पन तैस मैन्हु पुड़ अफ़सोस ज़ेसेरे हथेइं तै गिरफ़्तार भोए।” 23 एन शुन्तां तैना एप्पू मांमेइं पुच्छने लगे, “असन मां एरो ज़ेरो कौने ज़ै एन कम केरेलो?” 24 तैन एस गल्ली पुड़ एप्पू मांमेइं बेंस भोइ कि असन मां बड्डो कौने? 25 यीशु तैन सेइं ज़ोवं, “गैर कौमन पुड़ तैन केरे राज़े राज़ केरतन, ते ज़ैन केरो तैन पुड़ अधिकारे भोते तैन जो भलाई केरनेबाले ज़ोतन। 26 पन

तुसन मां एरू लोडे भोवरू, तुसन मां ज़ै बड्डोए तै निकडेरें बराबर बने ते ज़ै खास आए तै सेवकेरे बराबर बने। 27 किजोकि बड्डो कौने? ज़ै तैस कां साथी बिशोरिए या तै ज़ै तैसेरो चेलोए? कुन तै तैस कां नई बिशोरि? पन अवं त तुसन मां अक सेवकेरे बराबर आई। 28 पन तुस तैना आथ जैना मेरी अज़मैइशरे मौके बराबर मीं सेइं साथी रातथ। 29 ज़ेन्चरे बाजी मीं अक राज़ दितोरूए अवं भी तुसन अक राज़ देताई। 30 ताके तुस मेरे राज़े मां मीं सेइं साथी बिश्तां खाथ पीथ, बल्के बडे-बडे शाही तखतन पुड़ बिश्तां इस्राएलेरे 12 गोत्रां केरो इन्साफ़ केरेले।” 31 “शमौन, शमौन, खबरदार रा, शैताने परमेशरे करां अज़ाज़त मग्गोरिए कि तुसन सेबभन परखे, कि रोडे बुरे करां अलग केरे ज़ेन्चरे ज़मीनदार गेहुन करां झाझ अलग केरते। 32 पन मीं तेरे लेइ प्रार्थना की, कि तू मीं पुड़ विश्वास केरनो न शारस, ज़ैखन तू मन फिरास त अपने विश्वासी दूलान मज़बूत केरां।” 33 पतरसे यीशु सेइं ज़ोवं, “हे परमेशर तौं सेइं अवं कैद भोने बल्के मरनेरे लेइ भी तियार आई।” 34 पन यीशुए ज़ोवं, “हे पतरस अवं तौं सेइं ज़ोताई कि अज़ कुकड़े बांग देने करां पेइले तू मेरो ट्लाई बार इन्कार केरेलो कि अवं एस न ज़ैनी।” 35 यीशुए तैन सेइं ज़ोवं, “कि ज़ेइस मीं तुस खुशखबरी शुनाने, बगैर बेटवे, बूटां ते झोल्लेरे बगैर भेजोरे थिये त तुस केन्ची चीज़ारे घटी भोइ?” तैनेई ज़ोवं, “केन्ची चीज़ारी नई।” 36 यीशु तैन सेइं ज़ोवं, “पन हुनी ज़ैस कां बेटवो भोए ते साथी रखे ते एन्चरे झोल्लो भी ते ज़ैस कां तलवार न भोए तै अपनू कोट बेचतां भी तलवार घिन्ने। 37 अवं तुसन सेइं ज़ोताई कि ई गल्ले ज़ै पवित्रशास्त्रे मां लिखोरिए, कि ते पूरी भोए। तै बुरे लोकन सेइं साथी गनो जेव! एल्हेरेलेइ मेरे बारे मां लिखोरि गल्लां पूरी भोने लोरिन।” 38 तैनेई ज़ोवं, “हे प्रभु हेर इडी दूई तलवारन।” तैनी तैन सेइं ज़ोवं “बेड़ि आन।” 39 फिरि तै बेइर निस्सो ते ज़ेन्चरे तैसेरो दस्तूर थियो, तै ज़ैतून पहाड़े पुड़ जो चलो जेव ते तैसेरे चले भी तैस सेइं साथी चले जे। 40 तैस ठैरी पुज़तां तैनी तैन सेइं ज़ोवं, “प्रार्थना केरा ताके तुस अज़मैइशी मां न पेथ।” 41 यीशुए तैन करां थोडे ज़ेरे अग्गर गेइतां ज़ैधू केरे भारे बिश्तां प्रार्थना केरने लगे। 42 “हे बाजी अगर तेरी मर्ज़ी भोए त ई दुखेरो कटोरु मीं करां दूर केर, पन फिरि भी मेरी मर्ज़ी पूरी न भोए बल्के तेरी मर्ज़ी पूरी भोए।” 43 तैखन तैनी अम्बरेरां अक स्वर्गदूत लाव ज़ै तैस शक्ति देतो थियो। 44 ते तै परेशान भोइतां होरि जादे दिले सेइं प्रार्थना केरने लगे ते तैसेरो पिस्सीनो बुझा कि खूनेरे बडे-बडे तेप्पु तल्ले झड़ते थिये। 45 प्रार्थना केरनेरे बाद यीशु अपने चेलन कां वापस अव ते तैना गम्मेरे मारे झुलोरे मैल्ले। 46 यीशुए तैन सेइं ज़ोवं, “तुस किजो झुल्लोरेथ उठा ते प्रार्थना केरा ताके अज़मैइशी मां न राथ।” 47 हेजू यीशुए गल ज़ोने लोरो थियो, त मैन्हु केरो अक जथो तैडी पुजो ते बारहन मरां अक ज़ेसेरू नवं यहूदा थियूं, तैन सेइं अग्ग्री-अग्ग्री थियो, ते तै यीशु फुम्मड़ी देने अगर अव। 48 पन यीशुए तैस सेइं ज़ोवं, “यहूदा कुन तू एक्की फुम्मड़ी सेइं मीं मैनेरे मट्टे टुलुवातस?” 49 ज़ैखन यीशुएरे सैथेई एन सब हेरू त तैनेई ज़ोवं, “हे प्रभु कुन अस तलवार चलाम?” 50 ते तैन मरां एक्के

महायाजकेरे नौकरे पुड़ तलवारां चलाई ते तैसेरो तैनी कन्न उडाव। 51 पन यीशुए जुवाब दितो, “बस्सा बड्डू भोइ जेवं।” ते यीशुए तैसेरो कन्न तैखने हथ लेइतां बड्डाव। 52 तैखन यीशुए प्रधान याजकन ते मन्दरेरे सिपाही ते बुजुर्ग ज़ैन तैस गिरफ्तार केरने ओरे थिये तैन जो ज़ोवं, “तुस कुन तलवारां ते डंडे घिन्तां मीं डैकू बुझतां टलाने ओरेथ? 53 ज़ेइस अवं तुसन सेइं साथी मन्दरे मां भोतो थियो, त तुसेईं मीं सेइं हथ न लाव, पन ई त तुशुओ आंधेरेरे मौकेरो अधिकारे।” 54 ज़ैखन तैनेई यीशु टलातो तैस तैट्टां नेइतां महायाजकेरे घरे नीयो, पतरस भी पत्तपति बल्हे-बल्हे तैरां जेव। 55 तैनेई अंगने मां अग बालोरी थी ते सब बिश्तां अग तपने लोरे थिये ते पतरस भी तैन मां थियो। 56 ते अक कुआन्श अग्गी कां बिशोरी तकने लोरी थी ते पतरसेरां तेकतां ज़ोने लगी, “कि ई मैन्हु भी तैस सेइं साथी थियो।” 57 पन पतरसे इन्कार केरतां ज़ोवं, “हे कुआन्शे अवं एस न ज़ैनी ए कौने।” 58 थोड़ी सैइत्रां पत्ती होरे एक्के पतरसेरां तेकतां ज़ोवं, “तू भी तैना केरो साथिस।” पन पतरसे ज़ोवं, “नई अवं नई।” 59 कोई एक्की घेठेरे बाद केन्चे होरे बडे याकीने सेइं ज़ोवं, “ई मैन्हु पक्को तैस सेइं साथी थियो, किजोकि ए भी गलीली आए।” 60 पन पतरसे इन्कार केरतां ज़ोवं, “अवं एस न ज़ैनी तू कुन ज़ोतस?” हेजू पतरसे ए गल ज़ोने लोरो थियो, त कुकड़े बांग दित्ती। 61 ते प्रभुए फिरतां पतरसेरे पासे तककू ते पतरसे परमेशेरी तै गल याद आई, ज़ै तैनी पतरसे सेइं ज़ोरी थी, “कि अज़ कुकड़े बांग देने करां पेइले तू मेरो ट्लाई बार इन्कार केरेलो।” 62 ते पतरस बेइर गेइतां ज़ोरे-ज़ोरे लेरां देने लगे। 63 ज़ैने मैनेई यीशु अपने कब्जे मां कियोरो थियो, तैना तैसेरी हासी बनाते थिये ते कने तैस बाते थिये। 64 तैना यीशुएरी एछछन पुड़ पट्टी बेन्धतां बाते थिये ते पुछते थिये, “भविविधवाणी केर ते ज़ो केनि बाहोरिए?” 65 ते तैनेई एन्चरे होरि भी बेड़ि गल्लां ज़ोई ते तैसेरी तुहीन की। 66 झेइंजां बुजुर्ग लोक ते प्रधान याजक ते शास्त्री लोकेई यीशु अपने महासभाई मां आनो, 67 ते ज़ोने लगे, “अगर तू मसीह आस त ज़ो।” यीशुए तैन सेइं ज़ोवं, “अगर अवं तुसन ज़ोई भी त तुस मेरू याकीन न केरेले। 68 ते अगर अवं तुसन पुछी त तुस जुवाबे न देले। 69 पन अज़ेरां बाद मैनेरू मट्टू परमेशेरेरे देइने पासे बिशोरू लाएले।” 70 एस गल्ली पुड़ तैना सब ज़ोने लगे, “तू परमेशेरेरू मट्टू आस?” यीशुए जुवाब दितो, “तुस एप्पू मींजो ज़ोतथ कि तू आस?” 71 तैनेई ज़ोवं, “हुनी असन होरि शाहादतां केरि कुन ज़रूरीए? किजोकि असेई एसेरी ज़बान शुनेरूए।”

23 तैखन तैना सब तैट्टां उठे ते यीशुए पिलातुसे कां घिन्तां जे। 2 ते तैस जो एन ज़ोइतां ए इलज़ाम लाने लगे, “कि ए इश्शे लोकन भड़काते ते महाराजे जो थड़त देनेरे लेइ ठाकते, ते अपने आपे जो मसीह राज़ो ज़ोते।” 3 तैखन पिलातुसे यीशुए पुछू, “तू यहूदी केरो राज़ोस?” यीशु तैस जुवाब दितो, “तू एप्पू ज़ोतस!” 4 पिलातुसे प्रधान याजकन ते लोकन सेइं ज़ोवं, “कि अवं एस मैन्हु मां कोई कसूर न लेई।” 5 पन तैना बडे घमण्डे सेइं ज़ोने लगे, “ए यहूदियारे इलाके करां गलील इलाके तगर बल्के इडी तगर लोकन अपनि शिक्षाई सेइं भड़काते।” 6 ज़ैखन

पिलातुसे एन शुनू त तैनी पुच्छू, “कुन ए मैन्हु भी गलील इलाकेरो आए।” 7 ते ज़ेरो तैस पतो लगे, कि ए हेरोदेसेरे इलाकेरो रानेबालोए, त पिलातुसे तै हेरोदेस कांजो भेजो। किजोकि तैस वक्ते मां तै एप्पू भी यरूशलेम नगरे मां थियो। 8 ज़ैखन हेरोदेसे यीशु लाव त बड़ो खुशी भोव। किजोकि तैस चरोक्नी देंती यीशु हेरनेरी इच्छा थी। तैनी तैसेरे बारे मां बेड़ि गल्लां शुनोरी थी, ते तैस बड़ी उमीद थी, कि यीशुएरो कोई चमत्कार हेरे। 9 तैनी यीशुए बडू किछ पुच्छू, पन यीशुए तैस कोई जुवाब न दित्तो। 10 पन याजक ते प्रधान याजक ते कने शास्त्री लोक बड़े ज़ोरे शोरे सेइं यीशु पुड़ इलज़ाम लाने लगे। 11 तैखन हेरोदेस भी अपने सैथन सेइं मिलतां यीशुएरी तुहीन की, ते तैसेरी हासी बनाई फिरी तैस अक चमकतो कुरतो लुवेइतां पिलातुसे कां वापस भेजो। 12 पेइले पिलातुस त हेरोदेस दुश्मन थियो, तैस दिहाड़े तैना दोस्त बेनि जे। 13 तैखन पिलातुसे प्रधान याजक ते सरदार ते होंरे लोक अकोट्टे कियो। 14 “ते पिलातुसे तैन सेइं ज़ोवं तुसेई ए मैन्हु मीं कां एन ज़ोंतो आनोरोए कि, ए लोकन भड़काते ते मिमी एसेरी पुछ गन की, पन ज़ैस जुमैरो दोष तुस एस पुड़ लातथ, अवं एल्लेरो एसमां कोई कसूर न लेई। 15 ते न हेरोदेस ज़ैनी ए असन कां भेजोरोए तैस भी कोई दोष न मैल्लो, ते असन कां एरू कोई सबूत बरॉमद न भोवं, ज़ैस सेइं ए कल्ल कियो गाए। 16 तैल्लेरेलेइ अवं एस कोड़ेइं बाएतां छैडी देताई।” 17 पिलातुस यहूदी केरे फ़सह तिहाररे मौके पुड़ अक कैदी हथरां छड़तो थियो। 18 तैना सारे लोक चिन्डां लगे मारने, “कि एस मैन्हु सज़ा देथ ते बरअब्बा इश्शे लेइ हथरां छड्डो।” 19 बरअब्बा नगर मां गड़बड़ी केरनेरे ते कतलेरे बारे मां पाबंद भोरो थियो। 20 पिलातुसे यीशु हथरां छड़नेरे इरादे सेइं लोकन दुबारू पुच्छू। 21 पन तैना लोक मना चिन्डां लगे मारने, “कि तू एस क्रूसे पुड़ च़ाढ़ एस क्रूस पुड़ च़ाढ़।” 22 तैखन पिलातुसे तैन टलेइयोंव फेरे फिरी ज़ोवं, “किजो आखर एनी कुन जुर्म कियोरोए? हेरा एसमां एरू कोई सबूत बरॉमद न भोवं, कि ए मौतरे सज़ारो हकदार भोए, तैल्लेरेलेइ अवं एस कुटेइतां छैडी देताई।” 23 पन तैना चिन्डां मैरी-मैरी ज़ोने लगे, ए क्रूसे पुड़ च़ाढ़ोरो लोइते, ते तैन केरि चिन्डां मारनेरी उमीद पूरी भोइ। 24 बरसा, पिलातुसे ज़ोवं कि तैन केरे मेरज़ेरे मुताबिक कियू गाए। 25 ते ज़ै मैन्हु हुकुमतरे खलाफ ते खूनेरे जुर्म मां कैद थियो, ते ज़ैस हथरां छड़नेरे लेइ तैनेई दरख्वास कियोरी थी, तै हथरां छड्डो पन यीशु तैन केरि मेर्ज़ा सेइं सिपाही केरे हवाले कियो। 26 ज़ैखन तैना यीशु नेइतां च़लारे थियो, त तैनेई शमोन कुरेनी ज़ै एक्की इलोवेंरां ओरो थियो, टलातो ते क्रूस तैस कां छूने जो दित्तू, कि तू ई क्रूसे छुइतां यीशु पत्ती च़ला। 27 ते बड़े लोक तैस पत्ती च़लारे थियो ते किछ कुआन्शां भी थी ज़ैना यीशुएरे लेइ शौग बनैती थी। 28 यीशुए तैन केरे पासे मुइतां ज़ोवं, “हे यरूशलेम नगरेरी कुइयाव मेरे लेइ लेरां न देथ, बल्के अपने बच्चां केरे लेइ लेरां देथ। 29 किजोकि तैना मुश्किल दिहाड़े एजने बालेन ज़ैखन लोक एन ज़ोले कि, ‘धन आन तैना कुआन्शां ज़ैना बेओलादन ते बच्चे न पाले।’” 30 “तैस वक्ते लोक पहाड़न सेइं ज़ोले, ‘असन उन्ढे बिछड़ा ते उच्ची

ठारन जो ज़ोले, कि असन छपाथा।’ 31 किजोकि ज़ैखन तैनेई सब्ज बुट्टे सेइं एन केरू, त शुक्कोरे बुट्टे सेइं कुन न केरेले?” 32 ते सिपाहेई दूई होंरे मुर्जम भी यीशु सेइं साथी च़लवरे थियो ताके तैन भी मारन। 33 ज़ैखन तैना तैस ठैरी पुजे ज़ैस जो “खोपड़ी” ज़ोतन त तैडी यीशु क्रूसे पुड़ च़ाढ़े, ते तैना दूई मुर्जमन भी एक्की यीशुएरे देइने पासे ते होरि बांए पासे क्रूसे पुड़ च़ाढ़े। 34 यीशु ज़ोवं, “हे बाजी एन माफ़ करां एन न जानन् कि एना कुन लोरेम केरने।” ते तैनेई तैसेरे लिगड़ां केरे लेइ परेची छेइतां शर्त रखवू ते एप्पू मांमेइं बंटां। 35 लोक खडखड़े एन सब किछ हेरने लोरे थियो ते सरदार ज़ोरे-ज़ोरे सेइं ज़ोते थियो, “एनी होंरे त बचाए ते अगर ए मसीहे ते परमेशरेरो चुनोरे त अपने आपे किजो न बचाए।” 36 सिपाही भी तैस कां एइतां तैसेरी हासी बनाने लगे (किजोकि तै अपनो आप राज़ो बनातो थियो), ते घटया दाछारो रस पीनेरे लेइ तैस देने लगे। 37 “ते ज़ोते थियो तू अगर यहूदी केरो राज़ोस त अपनो आप बचा।” 38 ते तैस क्रूसे पुड़ यानी यीशुएरे दोगे करां बहा अक पखड़ी लिखतां लेवरी थी, ते तैस पुड़ एन लिखेरू थियू, “ए यहूदी केरो राज़ आए।” 39 तैन दूई डैकू ज़ैना मारे जे तैन मरां एक्के यीशु जो तुहीन केरतां ज़ोवं, “अगर तू मसीह आस त एप्पू भी बंच ते असन भी बचा।” 40 पन होंरे दुइयोंव डैके तैस जो झिड़कतां ज़ोवं, “तीं परमेशरेरो भी डर नई? ज़ै सज़ा तैस मैलने लावरी तीं भी त तैए सज़ा मैलने लोरीए। 41 असन त इन्साफेरे मुताबिक अपने बुरे कम्मां केरि सज़ा मैलने लोरी पन एनी त कोई गलत कम नई कियेरू।” 42 तैखन तैनी ज़ोवं, “हे यीशु ज़ैखन तू अपने राज़े मां एज्जेलो त मीं भी याद केरां।” 43 यीशुए तैस जो ज़ोवं, “अवं तीं सेइं सच ज़ोताई कि तू अज़े मीं सेइं साथी स्वर्गं मां भोलो।” 44 दीसारे 12 बजेई सारे मुलखे मां आंधरू भोवं, त टलेइ बज़न तगर रावं। 45 दिहाड़ो भी कालो भोव ते मन्दरेरो पड़ो बां देंता बुन तगर फेटतां दूई टुकड़े भोइ जे। 46 यीशुए बड़े ज़ोरे सेइं ज़ोवं, “हे बाजी अवं अपनि आत्मा तेरे हथ्ये मां सोंफताई,” ते एन ज़ोइतां यीशुए प्राण दित्ते। 47 ज़ैखन रोमी सूबेदारे एन सब हेरू त परमेशरेरी तारीफ़ केरते ज़ोवं, “ए मैन्हु सच्चे धर्मी थियो।” 48 ते सारे लोक ज़ैना तैडी थियो ए अनर्थ हेरतां छाती पिट्टे च़ले जे। 49 पन यीशुएरे सारे दोस्त ते तैना कुआन्शां ज़ैना गलील इलाके मरां यीशुए पत्पती ओरी थी दूर ज़ेरे खेड़ोइतां, ज़ैन किछ भोइ रावरू थियू सब किछ हेरी रेवरी थी। 50 अक मैन्हु थियो, ज़ेसेरू नवं यूसुफ थियू, तै यहूदी केरि आदालतरो अक मुलाज़म भी थियो, ते अक बड़ो नेक ते धर्मी मैन्हु थियो। 51 तै बेड्डी आदालत अफसरं केरे फेसलेरे हके मां न थियो। तै यहूदी केरे नगर अरिमतियाह रानेबालो थियो, ते परमेशरेरे राज़ेरे तलाशी मां थियो। 52 तैनी पिलातुसे कां गोइतां यीशुएरी लाश मगी। 53 ते लाश क्रूसे पुड़ेरां ओसैलतां मलमलेरे कपड़े मां पलेटतां ते एक्की कन्नी मां रख्वी, ज़ै एक्की शफ़ड़ी मां बनेवरी थी, तैस कन्नी मां पेइले कोई लाश न थी रखोरि। 54 तै तियेरारी दिहाड़ी थी ज़ै आरामेरी दिहाड़ी शुरू भोने बाली थी। 55 ते तैना दूई कुआन्शां ज़ैना गलील इलाके मरां यीशुए पत्पती ओरी थी, यूसुफे पत्पती जेई ते

तैनेई तै कन्न हेरी, कि यीशुएरी लाश एसमां केन्चरे सेइं रखोरीए। 56 तैखन तैना अपने घरे वापस आए, ते खुशबूदार चीजां ते इत्र तियार कियो ते आरामेरे दिहाड़े मूसरे कानूनेरे मुताबिक आराम कियो।

24 हफतेरी पेइले दिहैड़ी झंझां किछ कुआन्शां खुशबूदार चीजां नेइतां जेई, जैना तैनेई तियार कियोरी थी ते एन्तां कन्नी कां पुजी। 2 पन तैनेई तै घोड़ कन्नी करां बिछड़ोरो लाव। 3 जैखन तैना अन्तर जेई त तैन यीशुएरी लाश न मैल्ली। 4 तैखन तैना एन हेरतां परेशान भोइ त दूई मैन्हु जैन छितां लिगडां लेगोरां थियां, तैन कुआन्शन कां एइतां खेडोए। 5 तैना कुआन्शां डेरि जेई ते तैना ज़मीनरे पासे तकने लगगी। तैन मैनेई तैन जो ज़ोवं, “तुस ज़ीते, मुइदन मां किजो लोरिथ तोपने। 6 ते इड़ी नई बल्के ज़ीतो भोरुए तुसन याद नई कि जेइस तै गलीले मां थियो, त तैनी तुसन ज़ोरू थियू कि, 7 मैनेरू मटू यानी अवं पापी लोकां केरे हथ्ये देनोए ते क्रूसे पुड़ च़ाढनोई ते फिरी ट्लेइ दिहाडां बाद फिरी ज़ीतो भोनोई।” 8 तैखन तैना यीशुएरी गल्लां याद एई। 9 तैखन तैना कन्नी करां ज़ेलि जेई, त तैनेई यीशुएरे 11 चेलन ते बाकी होरि चेलन भी एस गल्लरो पतो दित्तो। 10 जैनेई प्रेरितन सेइं गल्लां की, मरियम मगदलीनी योअन्ना ते याकूबेरी अम्मा मरियम ते तैस सेइं साथी होरि भी काई कुआन्शां थी। 11 पन तैन, तैन केरि गल्लां कहानी लगगी, ते तैनेई तैन केरू याकीन न कियू। 12 पन पतरस उठो ते तै कन्नरे पासे दौवइतो तैस ठैरी कां जेव, ते तैड़ी तैनी लिक्तां अन्तर तक्कू ते सिर्फ कफन तैड़ी लाव, ते एस गल्ली पुड़ हैरान भोइतां तैइं च़लो जेव। 13 फिरी एरू भोवं कि तैन मरां दूई चले तैस दिहैड़ी एक्की इलॉव्वेरे पासे च़लोरे थिये, तैस इलॉव्वेरू नवं इम्माऊस थियू। तैन यरूशलेम नगरेरां 11 किलोमीटर दूर थियू। 14 तैना एप्पू मांमेइं एरसे बारे मां गल्लां केरते च़लोरे थिये जै बितना बीतोरी थी। 15 जैखन तैना गल्लन मां मसत थिये, ते एप्पू मांमेइं गलबात लोरे थिये केरने त यीशु एप्पू तैन कां नेड़े एइतां तैन सेइं साथी-साथी च़लने लगो। 16 पन तैनेई यीशु न पिशानो किजोकि परमेशरे तैना पिशान्ने करां रोकोरे थिये। 17 यीशुए तैन जो ज़ोवं, “तुस लोक एप्पू मांमेइं कुन गल्लां केरने लोरेथ?” तैना रुकी जे, ते तैन केरू तुतर उदास लेइहोने लग्गू। 18 तैखन तै जेसेरू नवं क्लियुपास थियू, तैस सेइं ज़ोने लगो, “यरूशलेम नगरे मां सिर्फ तू अक मैन्हु आस जैस पतो नई कि, आखरी दिहाइन मां कुन-कुन भोने लोरूए।” 19 यीशुए ज़ोवं, “कुन लोरूए भोने?” तैनेई तैस सेइं ज़ोवं, “नासरत नगरेरो यीशु, जै नबी थियो, तै परमेशरे ते मैन्हु केरे सामने कम्मन मां ते शिक्षा देने मां बेड़ि शेक्ति बालो थियो। 20 ते प्रधान याजकेई ते हाकिमेई केन्चरे सेइं रोमी गवन्रि हवाले कियो ते तैस जो कतलैरे हुक्म देइतां तै क्रूस पुड़ च़ाढो। 21 पन असन त उमीद थी कि ए मैनुए, जै इस्राएली लोकन रोमेरे राज़े करां आज़ाद केरेलो, एन गल्लन अज़ ट्लेइयोवं दिहाड़ीए। 22 हुन्ना असन मरां किछ कुआन्शां अज़ झंझां कन्नी कां जोरी थी, तैन केरे ज़ोने सेइं असां हैरान भोए। 23 जैखन तैन लाश न मैल्ली त तैना एन ज़ोती एई, असेईं स्वर्गदूत लाए ते तैनेई ज़ोवं, कि यीशु ज़ीतो भोरुए। 24

तैखन किछ इश्शे साथी भी कन्नी कां जे, ते जेन्चरे कुआन्शेई ज़ोरू थियू, तेरहु लाव पन यीशु न लाव।” 25 यीशु तैन दूई चेलन सेइं ज़ोवं, “हे बेअक्ल लोकव! तुश्शे लेइ पवित्रशास्त्र मां नेबी केरि ज़ोरी गल्लन पुड़ भी विश्वास केरनो केत्रो मुशकले। 26 कुन मसीहरे लेइ ज़रूरी न थियू, कि दुःख झल्लले ते फिरी अपनि महिमा मां दाखल भोए?” 27 यीशु अपने बारे मां तैना सैरी गल्लां समझेइ, जैना पवित्रशास्त्रे मां मूसा करां देंते सारे नेबेई ज़ोरिन। 28 एत्रे मां तैना तैस इलव्वे नेड़े पुजे ज़ैड़ी तैनेई गानू थियू, तैनेई बुद्धू कि यीशु अग्रोवं गानूए। 29 पन तैनेई एन ज़ोइतां मजबूर कियो, “कि असन कां बिश किजोकि दिहाड़ी डुबोरीए आंधरू भोने बालूए।” बस्सा ते बिशनेरे लेइ तैन सेइं साथी अन्तर च़लो जेव। 30 जैखन तै तैन सेइं साथी रोटी खाने बिश्शो त तैनी रोटी ट्लाती ते बरकत देइतां ट्लोड़ी ते तैन देने लगो। 31 तैखन तैन केरि एछड़ी खुल्ली ते तैनेई ते पिशानो, पन तै तैन करां आलोप भोइ जेव। 32 तैना एप्पू मांमेइं ज़ोने लगे, “जैखन तै बत्तां असन सेइं साथी गल्लां लोरो थियो केरने, ते असन पवित्रशास्त्रेरो मतलब मसमझातो थियो, त असन केरी उमीद भोरी थी।” 33 तैना तैखने तैइं उठे ते यरूशलेम नगरे मां आए ज़ैड़ी तैना याहरे चले ते होरे तैन केरे साथी एक्की ठैरी मैल्ले। 34 तैना ज़ोने लोरे थिये, “कि प्रभु सच्चरे ज़ीतो भोरुए ते शमौन पतरसे लाहोरोए।” 35 तैनेई बत्तरी सैरी गल्लां शुनेई ते फिरी केन्चरे असेईं यीशु रोटी ट्लोइते बार पिशानो। 36 तैना गल्लां केरने लोरे थिये त यीशु तैन केरे मझाटे खड़ो भोइतां ज़ोने लगे, “तुसन शान्ति मैल्ले।” 37 पन तैना एत्रे डेरि जे, कि तैना समझने लगे कि असां आत्मा लहने लोरेम। 38 यीशुए तैन सेइं ज़ोवं, “तुस किजो डरेंथ ते तुश्शे मने मां शक किजो भोतीए। 39 मेरे हथ पाव हेरा अवं तैए आई, मीं हथ लेइतां हेरा, किजोकि आत्माई हठी त कने मास न भोए जेरू तुस मीं मां लातथ।” 40 एन ज़ोनेरे पत्ती तैनी अपने हथ पाव हिराए। 41 पन खुशी सेइं तैन याकीन न भोवं, कि यीशु ज़ीतोए, ते तैना हैरान भोए, यीशुए तैन सेइं ज़ोवं, “तुसन कां खाने जो किछ आए?” 42 तैनेई तैस ट्लाडोरी मेछलरो अक टुकड़ा दित्तो। 43 तैनी ट्लाती ते तैन केरे सामने खाइ। 44 तैनी तैन सेइं ज़ोवं, “जैखन अवं तुसन सेइं साथी थियो, त मीं तुसन एना गल्लां जोरी थी, कि मूसरे कानूने मां ते नेबी केरि किताबन मां ते भजना केरि किताबी मां मेरे बारे मां जैन किछ लिखोरूए तैन पूरू भोमू ज़रूरीए।” 45 तैखन तैनी तैन केरि मद्दत की, ताके पवित्रशास्त्रे सेमझी सखन। 46 ते तैन सेइं ज़ोवं, “एन पवित्रशास्त्र मां लिखोरूए कि मसीह दुःख झल्लेलो ते ट्लेइयोवं दिहाड़े मुइदन मरां ज़ीतो भोलो। 47 ते तैसेरे नव्वे सेइं यरूशलेम नगरेरां शुरु केरतां सैरी कौमन मां पापन करां मनफिरानेरे मैफारो प्रचार कियो गालो। 48 किजोकि तुस एना सैरी गल्लां केरे गवाहथ। 49 हेरा, अवं एप्पू तुसन पवित्र आत्मा देइलो, जेसेरो वादो बाजी परमेशरे कियोरोए। पन ज़ां तगर स्वर्गें शक्ति न मैल्ले तांतगर इस नगर मां राथ।” 50 फिरी यीशुए तैना नगरेरे बेडर बैतनिय्याह इलॉव्वेरे नेड़े ने। ते अपनो हथ खड़ो केरतां तैन बरकत दित्तो। 51 जैखन तै तैन बरकत देने लोरो थियो, त तैन

करां अलग भोड् जेव ते परमेशरे तै स्वर्गे जो नीयो। 52 चलेई तैसेरी
आराधना की ते फिरी खुशी सेइं यरूशलेम नगरे जो वापस चले जे। 53
ते तैना हर वक्त मन्दरे मां एइतां परमेशरेरी तारीफ़ केरते थिये।

यूहन्ना

1 (दुनियारे रचनेरे पेड़लो) शुरुआती मां वचन थियूं। तैन वचन परमेशरे सेइं साथी थियूं। तैन वचन परमेशर थियूं। 2 शुरुआती मां परमेशरे सेइं साथी तैन वचने थियूं। 3 सब किछ वचनेरे जिरिये बनाव जेव। त जैन किछ बनाव ज़ोवं, तैस मरां कोई भी चीज़ तैसेरे बगैर न बनाई जेई। 4 तैस (वचने) मां ज़िन्दगी थी; ते तै ज़िन्दगी सारे मैनन् लौ देचे। 5 त तै लौ आंधरे मां (हमेशा) चमकचे, त आंधरू लोई कधी कैबू न केरि सके। 6 परमेशरिरी तरफां अक मैन्हु भेजो जेव, जेसेरू नवं यूहन्ना थियूं। 7 तै तैस लोअरे बारे मां ज़ोने ओरो थियो, ताके सब लोक तैसेरे जिरिये सेइं (तैस लोई पुड़) विश्वास केरन। 8 तै एप्पू लौ न थियो, पन लोअरे बारे मां लोकन गवाही देने ओरो थियो। 9 सच्छी लौ ज़ै हर एक्की मैन्हु (परमेशररे बारे मां ज़ान्नेरी) लौ देचे, तै दुनियाई मां एजनेबाली थी। 10 तैन वचन दुनियाई मां (ओरू) थियूं, त दुनिया तैसेरे जिरिये बनाई जेई, पन दुनियारे लोकेई तैन न पिशानू (कि तै कौन आए)। 11 तै अपने लोकन कां अव, पन तैसेरे अपने लोकेई तै कबूल न कियो। 12 पन ज़ोत्रे लोकेई तै कबूल कियो, तैनी तैनन् परमेशररे बच्चे भोनेरू हक दिनु; यानी सारे लोकन ज़ैना तैसेरे नंब्वे पुड़ विश्वास केरतन। 13 तैना न हाज-बच्चे सेइं, न मैन्हु केरे मेर्ज़ी सेइं, न तैस मैनेरे मेर्ज़ी सेइं ज़ै बच्चे पैदा केरनेरी इच्छा रखते, बल्के परमेशररे मेर्ज़ी सेइं पैदा भोरेन! 14 तैन वचन मैन्हु बेनतां किछ वक्त असन सेइं साथी रावं, ते (इस दुनियाई मां) डेरो कियो। तैनी असन पुड़ बड़ो अनुग्रह कियो ते परमेशररे बारे मां सारी सच्छाई हिराई। (ज़ताली तै इड़ी थियो, तैखन) असेई तैसेरी महिमा लाई। (जेन्चरां की) तै अपने बाजी परमेशरे करां अव, त तैसेरी ज़ेरि महिमा कोन्ची मां नई थी। 15 यूहन्ने तैसेरे बारे मां गवाही दिती, ते ज़ोरे सेइं लोकन सेइं ज़ोवं, “ई तै आए, जेसेरे बारे मां मीं ज़ोरू थियूं, कि ज़ै मेरे बाद एज्जी राओरोए, तै मीं करां बड़ो महान आए, किजोकि तै मीं करां पेड़लो थियो। 16 तैसेरी भरपूरी सेइं (यानी, तैसेरे सारे अनुग्रह ते सच्छाई सेइं) असन सेब्वन आशिर्वाद पत्ती आशिर्वाद मैल्लू। 17 मूसा नेबेरे जिरिये असन कानून मैल्लो, पन यीशु मसीहरे जिरिये असन कां (परमेशरे करां) अनुग्रह ते सच्छाई पुज्ज़ी। 18 परमेशर केन्चे कधी भी नई लावरो, पन तैसेरू अक्के मट्टू (यीशु) ज़ैन बाजी परमेशररे कुम्मे मां आए, तैन्ने असन परमेशर हिराव।” 19 यूहन्ने यीशु मसीहरे बारे मां ई गवाही दिती, (एकसां) ज़ैखन यहूदी लोकां केरे लीडरेई यरूशलेम नगरेरां यूहन्ना कां किछ याजक त लेवी भेजे, त तैनेई तैस पुच्छू, “तू कौन आस?” 20 यूहन्ने तैन सेइं सन्न ज़ोवं ते किछ भी छपानेरी कोशिश न की, त तैनी तैन सेइं ज़ोवं, “अवं मसीह नई।” 21 तैखन तैनेई तैस पुच्छू, “फिरी तू कौन आस? कुन तू एलिय्याह नबी आस?” यूहन्ने तैनन् जुवाब दितो, “अवं तै नई।” तैनेई फिरी पुच्छू, “कुन तू कोई नबी आस?” तैनी जुवाब दितो, “नई।” 22 तैखन तैनेई तैस पुच्छू, “फिरी तू कौन आस? (असन ज़ो) ताके अस तैनन् जुवाब देम ज़ैनेई अस

भेजोरेम। तू अपने बारे मां कुन ज़ोतस?” 23 तैनी जुवाब दितो, “जेन्चरे यशायाह नेबे (मेरे बारे मां) ज़ोरूए, तेन्चरे अवं सुनसान ठैरी मां लोकन हक देइतां ज़ोताई कि, ‘तुसन कां प्रभु एजनेबालो आए, तैसेरेलेइ बत तियार केरा।’ (यानी, प्रभुएरे लेइ तुस अपने दिल साफ केरा)” 24 फरीसी लोकां केरे तरफां किछ मैन्हु यूहन्ना कां भेजोरे थियो। 25 तैनेई यूहन्ना पुच्छू, “अगर तू न मसीह आस, न एलिय्याह, त न नबी, त फिरी (तीं कुन अधिकार आए) लोकन बपतिस्मो किजो देतस?” 26 यूहन्ने जुवाब दितो, “अवं त (लोकन) पैनी सेइं बपतिस्मो देताई, पन तुसन सेइं साथी रानेबालो अक एरो आए, ज़ैस तुस हकीकति मां न पिशानथ। 27 ई तै आए, ज़ै मेरे बाद एजनेबालो आए, तै मीं करां महान आए। अवं त तैसेरो गुलाम भोनेरे काबल भी नई कि तैसेरे बूटेरे तसमे खोल्ली।” 28 एना गल्लां, यरदन दरियारे पार बैतनिय्याह नगरे मां भोइ, ज़ैड़ी यूहन्ना लोकन बपतिस्मो देतो थियो। 29 एग्री दिहाड़े यूहन्ने यीशु अपने पासे एइतो लाव, त तैनी यीशुएरे बारे मां लोकन सेइं ज़ोवं, “तक्का, परमेशरे तरफां भेजोरू (बलिदानेरू) गबडू, ज़ैन सैरी दुनियारे लोकां केरे पाप नेते! 30 ई तै आए, जेसेरे बारे मां मीं ज़ोरू थियूं कि, ‘अक मैन्हु मेरे बाद एजनेबालो आए, ज़ै मीं करां बड़ो महान आए, किजोकि तै मीं करां पेड़लो थियो।’ 31 हुन्ना तगर अवं त एप्पू भी तैस पिशानतो न थियो। पन एल्लेरेलेइ अवं (इड़ी) एजतां लोकन पैनी सेइं बपतिस्मो देताई, ताके तै मैन्हु इस्राएलेरे लोकन मां बांदो भोए।” 32 तैखन यूहन्ने लोकां केरे सामने गवाही दिती, “मीं पवित्र आत्मा कबूचरेरे शकली मां अम्बरेरां एइतो लाव, ते तै तैस पुड़ बिश्शो। 33 अवं त एप्पू पिशानतो न थियो कि यीशु हकीकति मां कौन थियो, पन परमेशरे ज़ैनी अवं लोकन पैनी सेइं बपतिस्मो देने भेजो, तैनी मीं सेइं ज़ोवं, ‘ज़ैस पुड़ तू पवित्र आत्मा एइतो त बिश्शो लाएलो, तैए लोकन पवित्र आत्मा सेइं बपतिस्मो देनेबालो आए।’ 34 तै मीं लाव, त अवं तुसन गवाही देताई, कि ए मैन्हु परमेशरेरू मट्टू आए!” 35 दुइयोवं दिहाड़े, फिरी यूहन्ना त तैसेरे चलन मरां दूई तैड़ी खडे भोरे थियो, 36 त यीशु तैलमेइं च़लारो थियो। ज़ैखन यूहन्ने यीशु लाव, त तैनी यीशुएरे बारे मां अपने चलन सेइं ज़ोवं, “तक्का, इन परमेशरे तरफां भेजोरू (बलिदानेरू) गबडू आए!” 37 ज़ैखन यूहन्नारे दुइये चेलेई एन शुनू, त तैना यीशु पत्ती च़ले। 38 यीशुए बेदलोइतां तैना एइते लाए ते तैन पुच्छू, “तुस केस लगेरेथ तोपने?” तैनेई ज़ोवं, “हे गुरू, तू कोडि रातस?” 39 तैनी तैन ज़ोवं, “च़ला तुस एप्पू हेरेले।” तैखन तैनेई गेइतां तैसेरे रानेरी ठार हेरी, ते तैस दिहाड़े तैना तैस साथी राए। तै कोई इलोइरी च़ेरे बज़ां केरो मौको थियो। 40 तैन दूई चलन मरां, ज़ैना यूहन्नेरी गल्लां शुन्तां यीशु पत्ती च़लारे थियो, अक अन्द्रियास थियो, ज़ै शमौन-पतरसेरो ढ़ला थियो। 41 तैनी पेड़लू एन कम कियूं कि अपने ढ़ला शमौन-पतरस तोपतां तैस सेइं ज़ोवं, “असन मसीह मैलरोए!” 42 तैखन अन्द्रियासे यीशु कां शमौन आनो। यीशुए तैसेरे पासे तक्कू ते ज़ोवं, “तू यूहन्नेरू मट्टू शमौन आस। पन अज़्जेरे बाद तेरू नवं कैफा भोलू।” यूनानी भाषाई मां कैफारो मतलब “पतरस” आए। (एसेरो

मतलब घोड़।) 43 होरसां दुइयोवं दिहाड़े यीशुए गलील इलाके मां गानू चाव। तैनी फिलिप्पुस लेइतां तैस सेइं ज़ोवं, “मीं सेइं साथी च़ल (ते मेरो चेलो बन)।” (फिलिप्पुस यीशु सेइं साथी च़लो।) 44 फिलिप्पुस बैतसैदा नगरे मां रातो थियो, ज़ैड़ी अन्द्रियास त पतरस भी राते थियो। 45 तैल्ला पत्ती फिलिप्पुस गेइतां नतनएले सेइं मिलो त ज़ोने लगे, “असन मसीह मैलोरोए, जेसेरे बारे मां (बड़े पेइले) मूसेरे कानूने मां लिखोरोए त कने नेबई भी अपनि किताबी मां लिखोरोए। तै यूसुफेरू मट्टू नासरत नगरे बालो यीशु आए, ज़ै नासरत नगरेरो आए!” 46 नतनएले तैस सेइं ज़ोवं, “कुन नासरते मरां कोई रोड़ी चीज़ निस्सी सकतीए?” फिलिप्पुसे ज़ोवं, “एइतां एप्पू हेरा।” (त नतनएल फिलिप्पुसे सेइं साथी च़लो।) 47 यीशुए नतनएल अपने पासे एइतो लाव ते तैनी तैसेरे बारे मां एन ज़ोवं, “ई असली इस्राएली मैन्हु आए, एसमां कोई पाखंड नई!” 48 नतनएले यीशु पुच्छू, “तू मीं केन्चरे ज़ानतस?” यीशुए तैस जुवाब दित्तो, “फिलिप्पुस तीं कुजाने करां पेइले ज़ैखन तू फेगरे बुट्टे हैठ थियो, मीं तू तैड़ी लावरो थियो।” 49 तैखन नतनएले ज़ोवं, “हे गुरु, (हुन्ना अवं ज़ानतां कि) तू परमेशेरू मट्टू आस! तू इस्राएल लोकां केरो राज़ो आस!” 50 यीशुए तैस जुवाब दित्तो, “कुन तू मीं पुड़ एल्हेरेलेइ विश्वास केरतस कि मीं तीं सेइं एन ज़ोवं, कि मीं तू फेगरे बुट्टे हैठ लावरो थियो? तू इस करां भी बेड़ी-बेड़ी गल्लां लाएलो!” 51 फिरी तैल्ला पत्ती यीशुए ज़ोवं, “अवं तुसन सेइं सच-सच ज़ोताई कि, तुस स्वर्ग खुल्लू त कने परमेशेरे स्वर्गदूतन उबरे गाते त मैनेरे मट्टे पुड़, यानी मीं पुड़ उतरते लाएले।”

2 तैल्ला पत्ती, टलेइयोवं दिहाड़े गलील इलाकेरे काना नगरे मां केन्चेरो इला थियो। यीशुएरी अम्मा भी तैड़ी थी। 2 यीशु ते तैसेरे चलन भी धाम कियोरी थी। 3 ज़ैखन दाछेरो रस मुक्को, त यीशुएरी अम्मा तैस सेइं लगी ज़ोने, “एन कां दाछेरो रस मुकोरोए।” 4 यीशु लगे ज़ोने, “अम्मा, मीं तीं सेइं कुन कम? हेजू मेरो वक्त नई ओरो।” 5 तैसेरे अम्मा नौकरन सेइं ज़ोवं, “ज़ैन किछ यीशु तुसन सेइं ज़ोए, तैन्ने केरथा।” 6 तैड़ी नेड़े घोड़ां केरे शा (बट्टे) घड़े रखेरे थियो, ज़ैन मां दूई-दूई टलाई-टलाई मन (पानी) लगतू थियूं। यहूदी लोक अपने रुवाजेरे मुताबिक (अपने आपे त कने चीज़न धोनेरे लेइ एन घड़े (मां पानी भरतां) इस्तेमाल केरते थियो। 7 यीशुए नौकरन सेइं ज़ोवं, “घड़न मां पानी भरा।” तैनेई पूरे घड़े भरे। 8 तैखन यीशुए तैन सेइं ज़ोवं, “हुन्ना, घड़े मरां किछ पानी केढतां धामारे प्रधाने कां (चखनेरे लेइ) देथ। तैनेई तैस कां नेव। 9 ज़ैखन धामारे प्रधाने तैन पानी चख्खू, ज़ैन दाछेरो रस बनोरू थियूं, तैन थियो ज़ानतो कि एन कोट्टां ओरूप, पन नौकर ज़ानते थियो, ज़ैनेई तैन केढतां आनेरू थियूं। एल्हेरेलेइ धामारे प्रधाने लाड़ो कुजाव, ते तैस सेइं ज़ोवं, 10 ‘हर कोई मैन्हु (आम तौर, धामी मां) पेइलो रोड़ो दाछारो रस देते, त ज़ैखन लोक पीतां रज़ज़तन, त बादे मां घट रोड़ो ज़ेरो दाछारो रस देते, पन तीं रोड़ो हेजू पत्रोवं रखोरो थियो।” 11 गलील इलाकेरे काना नगरे मां यीशुए पेइलो चमत्कार कियो। एन केरतां तैनी अपनि महिमा बांदी की, त तैसेरे चेलेई तैस पुड़ (होरो भी जादे) विश्वास

कियो कि तै मसीह आए। 12 तैल्ला पत्ती यीशु त तैरेरी अम्मा ते तैसेरे इला ते कने तैसेरे चले कफरनहूम नगरे मां जे, ते किछ दिहाड़े तैड़ी राए। 13 ज़ेइस यहूदी लोकां केरू फ़सह तिहार नेड़े अवं, त यीशु यरूशलेम नगरे जो च़लो जेव। 14 त तैड़ी मन्दरेरे अंगने मां तैनी (बलिदानेरे लेइ) दांत, भैइटां त कबूतर बेचने बाले लाए त कने पेंइसे बदलनेबाले भी अपने मेज़न पुड़ बिशोरे लाए। 15 तैखन तैनी रेस्सरो अक कोड़ो बनेइतां, तैनन सेबनन त भैइटां त दांत मन्दरे मरां बेइर कढे, त बुपारी केरे पेंइसे (इरां उरां) शारे, त तैन केरे मेज़ उलटाए। 16 त कबूतर बेचनेबालन सेइं ज़ोवं, “इना इट्टां नेइ गाथा! मेरे बाजी केरे मन्दरे बुपारी लोकां केरू घर न बनाथा!” 17 ज़ैखन तैसेरे चेलेई एन शुनू, त तैनन् याद अवं कि (परमेशेरी किताबी मां) लिखोरूप कि (मसीहे परमेशेरे सेइं ज़ोवं) “तेरे घरेरे लेइ मेरी भक्ति, (हे परमेशर) मेरे अन्तर अगारी ज़ेरि ज़लतीए!” 18 तैखन यहूदी लोकां केरे किछ लीडरेई तैस सेइं ज़ोने लगे, “तू असन कोई निशान (चमत्कार) हिरा कि मन्दरेरे अंगने मरां लोकन कढेरे लेइ तीं कां परमेशेरे तरफां अधिकार आए?” 19 यीशुए तैन जुवाब दित्तो, “एस मन्दरे डोला, ते अवं टलेइ दिहैइन मां एस (दुबारो) बनेइलो।” 20 यहूदी लोकेई यीशु जुवाब दित्तो, “कुन इस मन्दरे बन्ने मां 46 साल लगेरेन, कुन तू एस टलेइ दिहैइन मां (दुबारो) बनेइ सकतस?” 21 तैनेई गलत समझू यीशुए ज़ैस मन्दरेरी गल कियोरी थी, तै तैसेरी अपनि जान थी। 22 एल्हेरेलेइ (बादे मां) ज़ैखन यीशु (कूसे पुड़ मरो त) मुड़न मरां ज़ीतो भोव, त तैखन तैसेरे चलन याद अवं कि यीशुए (अपने मौत त कने ज़ीतो भोनेरे बारे मां) असन ई गल ज़ोरी थी। त (एसेरे वजाई सेइं) तैनेई पवित्रशास्त्रे मां लिखोरी गल्लन पुड़ त कने यीशु मसीहेरी ज़ोरी गल्लन पुड़ होरो भी जादे विश्वास कियो। 23 ज़ताली यीशु फ़सह तिहारेरे मौके यरूशलेम नगरे मां थियो, त बड़े लोकेई तैसेरे चमत्कार, ज़ैना तैनी कियो, लेइतां तैस पुड़ विश्वास कियो। 24 पन फिरी भी यीशुए तैन पुड़ अतबार न कियो, किजोकि तै सेबभी केरो इन्सानी सोच ज़ानतो थियो। 25 तैस ए ज़रूरत न थी कि कोई मैन्हु तैस केन्ची हारि मैनेरे बारे मां ज़ोए, किजोकि तै (पेइले) मैन्हु केरि सोच ज़ानतो थियो।

3 फरीसी लोकन मां अक मैन्हु थियो ज़ेसेरू नवं नीकुदेमुस थियूं। तै यहूदी लोकां केरो अक लीडर थियो। 2 एक्की राती तै यीशु कां एइतां ज़ोने लगे, “हे गुरु, अस ज़ानतम कि तू परमेशेरी तरफां गुरु भोइतां ओरोस; किजोकि ज़ैना चमत्कार तू हेरातस, होरो कोई न हेरेई सके, ज़ांतगर परमेशर तैस सेइं साथी न भोए।” 3 यीशुए जुवाब दित्तो, “अवं तुसन सेइं सच-सच ज़ोतां कि ज़ांतगर कोई मैन्हु दुबारो ज़मं न घिन्ने, त तै परमेशेरेरू राज़ न लेई सके।” 4 नीकुदेमुस पुच्छने लगे, “ज़ैखन मैन्हु बुढो भोते, त तै केन्चरे सेइं दुबारो पैदा भोइ सकते? कुन तै अम्मारे पेटे मां गेइतां दुबारो ज़ेरमी सकते?” 5 यीशुए जुवाब दित्तो, “अवं तुसन सेइं सच-सच ज़ोताई कि ज़ांतगर कोई मैन्हु पैनी सेइं ते आत्माई सेइं पैदा न भोए, तै परमेशेरेरे राज़े मां दाखल न भोइ सके। 6

किजोकि हाज-बव अपने बचन सिर्फ एस जानेरी ज़िन्दगी देइ सकतन, पन सिर्फ (पवित्र) आत्मा लोकन आत्मिक ज़िन्दगी देइ सकते। 7 हैरान न भो कि मीं तीं सेइं कुन ज़ोवं कि, “तीं दुबारे ज़र्म धिन्नु ज़रूरीए।” 8 हवा ज़ेरां चलनू चातीए तैरां चलचे, त तू तैसारी आवाज़ त शनतस, पन एन न ज़ानस कि तै कोट्टां एइचे त कोरां गाचे। तेन्चरे कोई भी न हेरी सके त न समझी सके कि केन्चरां पवित्र आत्मा लोकन (नव्वी) ज़िन्दगी देते।” 9 तैखन नीकुदेमुसे पुच्छू, “एना गल्लां केन्चरे सेइं भोइ सेकतिन पवित्र आत्मा केन्चरां लोकन नव्वी आत्मिक ज़िन्दगी देते?” 10 यीशुए तैस सेइं ज़ोवं, “तू इस्पाएली लोकां केरो (अक खास) गुरु भोइतां भी कुन इना गल्लां न समझस? 11 अवं तीं सेइं सच-सच ज़ोताई, ज़ैन अस ज़ानतम तैन्ने (लोकन) ज़ोतम, त ज़ैन असेई लावरूप तैसरे बारे मां (लोकन) गवाही देतम, पन फिर भी तुस लोक इश्शी गवाही न मन्थ। 12 मीं त तुसन सेइं धेतराी गल्लां केरे बारे मां गल की, त तुसेई (मीं पुड़) विश्वास न कियू, त अगर अवं स्वर्गेरी गल्लां ज़ोई त तुस केन्चरे विश्वास केरेले? 13 (स्वर्गेरी गल्लां ज़ान्नेरे लेइ कथी) कोई मैन्हु स्वर्गे मां नई जोरो, सिर्फ तैए ज़ै स्वर्गेरां ओरो, यानी अवं मैनेरू मट्टू ज़ैन स्वर्गे मां आई। 14 ज़ेन्चरे मूसा सुनसाने मां (परमेशरेरे लोकन बचानेरे लेइ पितल सेइं बनोरो) सप (खंभे पुड़) उच्चे पुड़ चढ़ाव, तेन्चरे एन ज़रूरी आए कि (अवं) मैनेरू मट्टू भी उच्चे पुड़ चढ़ाव गाए। 15 ताके ज़ै कोई तैस पुड़ विश्वास केरे, तैस हमेशारी ज़िन्दगी मैल्ले।” (aiōnios g166) 16 “किजोकि परमेशरे दुनियारे लोकन सेइं एत्रो प्यार कियो कि तैनी अपनू अक्के मट्टू दित्तू, ताके ज़ै कोई तैस पुड़ विश्वास केरे, तै नाश न भोए, बल्के हमेशारी ज़िन्दगी हासिल केरे। (aiōnios g166) 17 किजोकि परमेशरे अपनू मट्टू दुनियाराई मां एल्हेरेलेइ नई भेजोरू कि तै दुनियारे लोकन (तैन केरे पापां केरि) सज़ा दे, बल्के एल्हेरेलेइ कि दुनियारे लोक तैसरे ज़िरिये सेइं (पापां केरि सज़ाई करां) मुक्ति हासिल केरन। 18 ज़ै तैस पुड़ विश्वास केरते, तैस सज़ा न मैल्ले। पन ज़ै मट्टे पुड़ विश्वास न केरे, तै पेइलोए दोषी भोइ जोरोए, किजोकि तैनी परमेशरेरे अकैल्ले मट्टेरे नव्वे पुड़ विश्वास नई कियोरो। 19 परमेशर लोकन सज़ा देनेरी वजा ई आए कि ज़ैस जो लौ ज़ोतन तै दुनियाराई मां ओरिए, परमेशरे अपनि लौ दुनियाराई मां भेज़ी, पन लोक ते कने तैन केरां कम्मां बुरां थियां, एल्हेरेलेइ तैनेई तैस लोई करां जादे पापेरू आंथरू पसंद कियू। 20 ज़ै कोई बरू कम केरते, तै लोई सेइं नफरत केरते त लोअरे नेडे न एज्जे, एरू न भोए कि तैसरे कम्मन पुड़ दोष लाव गाए। 21 पन हर कोई ज़ै परमेशरेरी सच्छाई पुड़ चलते, तै लोई कां एइते, ताके लोई सेइं बांदो भोए कि तैसरे सब कम्मां परमेशरेरी शक्ति सेइं साथी किये गातन।” 22 एना गल्लां केरे बाद यीशु त तैसरे चले यहूदिया इलाके मां आए, त तैड़ी रेइतां लोकन बपतिस्मो देने लगगे। 23 यूहन्ना भी शालेम नगरेरे नेडे एनोन नव्वेरे ठैरी लोकन बपतिस्मो देतो थियो। किजोकि तैड़ी हच्छू पानी थियू त लोक बपतिस्मो नेनेरे लेइ तैस कां एइते राते थियो। 24 किजोकि यूहन्ना हेजू कैदखाने मां न थियो छड़ोरो। 25 एक्सां यूहन्नारे चेलां केरि केन्ची यहूदी

मैन्हु सेइं (रुवाजेरे मुताबिक) शुद्ध भोनेरे बारे मां बेंस भोइ। 26 एल्हेरेलेइ यूहन्नारे चले तैस कां एइतां ज़ोने लगगे, “हे गुरु, (तीं पतो आए) तै मैन्हु ज़ै यरदन दरियारे पार तीं सेइं साथी थियो त कने तीं तैसरे बारे मां गवाही दितोरी थी, हेर, तै भी लोकन बपतिस्मो देते त सब लोक तैस कां गातन।” 27 यूहन्ना जुवाब दित्तो, “(तै रोड़ी गल आए, किजोकि) मैन्हु किछ न हासिल केरि सके, ज़ांतगर तैस स्वर्गेरां (यानी परमेशरे करां) न मैल्ले। 28 तुस एप्पू मेरे गवाह आथ, कि मीं तुसन सेइं ज़ोरू थियू कि अवं मसीह नई, पन अवं तैस करां पेइले (परमेशरेरां तरफां) भेजोरोई। 29 जेसेरी महरनीए त तै महारावे, पन महारावेरो दोस्त ज़ै खडोए महारावेरी हर गल खुशी सेइं शनतो रहते; हुनी मेरी ई खुशी पूरी भोइ। (कि सब लोक तैस कां गातन)। 30 एन ज़रूरीए कि तै बथै ते अवं घैटी।” 31 “(मसीह) ज़ै स्वर्गेरां एइते तै होरि सेबन करां महान भोते। त ज़ै मैन्हु धेरती पुड़ेरां भोते, तै धेतरािओ त धेतराी गल्लां केरते। ज़ै स्वर्गेरां एइते तै सेबनना उच्चो महान भोते। 32 तैनी (परमेशरे तरफां) ज़ैन किछ लाव ते शुनेरू, तैसरे बारे मां लोकन शुनाते, पन तैसेरी गवाही कोई न शुने। 33 ज़ै कोई तैसेरी गवाही पुड़ विश्वास केरते, तै तैसेरी तसदीक केरते कि परमेशर सच्छो आए। 34 किजोकि (मसीह) ज़ै परमेशरे भेजोरोए, तै परमेशरेरी गल्लां ज़ोते, किजोकि परमेशर तैस पवित्र आत्मा नैपतां न दे। 35 (परमेशर) बाजी मट्टे सेइं प्यार रखते, त तैनी सब किछ तैसरे हावाले कियोरूए। 36 ज़ै (परमेशरेरे) मट्टे पुड़ विश्वास केरते तैस हमेशारी ज़िन्दगी मैल्ले, पन ज़ै मट्टे पुड़ विश्वास न केरे तै ज़िन्दगी करां दूर रालो, ते तैस पुड़ परमेशरेरो क्रोध (हुन्ना करां लेइतां हमेशा) राते।” (aiōnios g166)

4 फिरी ज़ैखन प्रभु पतो लगगे कि फरीसी लोकेई शुनोरूए, यीशु, यूहन्ना करां जादे चले बनाते ते बपतिस्मो देते। 2 (हालांकी सच एन थियू यीशु एप्पू नई बल्के तैसरे चले बपतिस्मो देते थियो), 3 तैखन तैना यहूदिया इलाके शैरतां गलील इलाके जो चले जे। 4 ते तैसेरू सामरिया इलाके मांमेइं भोइतां गानू ज़रूरी थियू। 5 एल्हेरेलेइ तै सामरिया इलाकेरे सूखार नगर मां अव, तै ठार तैस ज़मीनरे नेडे थी ज़ै याकूबे अपने मट्टे यूसुफे दित्तोरी थी। 6 याकूबे ज़ैन खुह बनोरू थियू तैन तैड़ी थियू, ते यीशु सफर केरतां थकोरो थियो, ते तैस खुहे पुड़ बिश्शो। तैखन दुपाहरां केरो मौको थियो। 7 एत्रे मां अक सामरी कुआन्शा तैड़ी पानी भरने आई। यीशुए तैस जो ज़ोवं, “मीं पानी पीया।” 8 किजोकि तैसरे चले रोटी आन्नेरे लेइ नगर मां जोरे थियो। 9 तैस सैमरी कुआन्शां तैस जो ज़ोवं, “तू यहूदिस ते अवं त सामरी, तू मीं पानी पीयानेरे लेइ किजो ज़ोतस?” किजोकि यहूदी सैमरन सेइं मिलनू जुलनु न थियो सुखाते। 10 यीशुए तैस जुवाब दित्तो, “अगर तू ज़ानेथी कि परमेशर तीं कुन देनू चाते, त एन भी ज़ानेथी कि, तीं करां कौन पानी मगने लोरोए, त तू तैस करां मगेथी, ते तै तीं ज़िन्दगरू पानी देथो।” 11 तैस कुआन्शां ज़ोवं, “हे प्रभु, तीं कां पानी भरनेरे लेइ कोई भांड नई, ते खुह बडू डुघू आए, ते तीं ज़िन्दगरू पानी कोट्टां मैल्लू? 12 कुन तू इश्शे पूर्वज याकूबे करां भी बड्डोस, ज़ैनी

एन खुह असन दित्तेरूप, ते तैनी एप्पू भी ते तैसेरी औलादां ते तैसेरे गोरू गब्बेई भी एप्से मरां पिव?" 13 यीशुए तैस जुवाब दित्तो, "जै कोई एस खुहे मरां पियेलो तैस फिर भी ट्लिश रानीए। 14 पन जै कोई तैन पानी पीते जैन अवं देताई ते हमेशारे लेइ ट्लिशोरो न रालो, बल्के जैन पानी अवं तैस देलो तैन तैस मां अक नाग बनेलो जै पानी देतो रालो, जैस सेइं तैस हमेशारी जिन्दगी मैलेली।" (aion g165, aiōnios g166) 15 तैस कुआन्शां यीशु जो ज़ोवं, "हे प्रभु, मीं भी तैन पानी दे ताके मीं ट्लिश न लगगे ते मीं बार-बार पानी भरने इस खुहे पुड़ न एजनु पे।" 16 यीशुए तैस जो ज़ोवं, "गा, अपनो मुन्श कुजा।" 17 तैसां कुआन्शां जुवाब दित्तो, "मेरो कोई मुन्श नई।" यीशुए तैस जो ज़ोवं, "तीं सच्च ज़ोवं, 'कि मेरो कोई मुन्श नई।' 18 किजोकि तीं पंच मुन्श बनोरन ते जैस सेइं साथी तू हुन्ना आस, ते तेरो मुन्श नई, तीं जैन किछ ज़ोवं तैन सच्च ज़ोरुए।" 19 तैस कुआन्शा ज़ोवं, "हे प्रभु, मीं लगगते तू कोई नबी आस। 20 इश्शे दादे-पड़दादेई इस पहाड़े पुड़ आराधना की, पन तुस यहूदी लोक ज़ोतथ कि ज़ैड़ी आराधना कियोरी लोड़वे, ते ठार सिर्फ यरूशलेम आए।" 21 यीशुए तैस कुआन्शी जो ज़ोवं, "हे कुआन्श, मेरी गल्लरो विश्वास केर, कि ते मौको भी एज्जी राहोरोए, कि तुस लोक बाजी केरि आराधना न त इस पहाड़े पुड़ केरेले ते न यरूशलेमे मां केरेले। 22 तुस सामरी लोक ज़ेसेरी आराधना केरतथ तैस न ज्ञानथ, पन अस यहूदी लोक ज़ेसेरी आराधना केरतम तैस ज्ञानतम, किजोकि मुक्ति यहूदन मरां आए। 23 पन ते मौको एज्जी राहोरोए बल्के ओरोए, ज़ैखन सच्च भक्त बाजेरी आराधना आत्मा ते सच्चैई सेइं केरेले, किजोकि बाजी एरे ज़ेरे सच्च भक्त तोपते। 24 परमेशर आत्मा आए, एल्हेरेलेइ तैसेरे भक्त तैसेरी आराधना आत्मा ते सच्चैई सेइं केरना।" 25 कुआन्शां तैस सेइं ज़ोवं, "अवं ज्ञानती कि मसीह, जैस जो ख्रिस्त ज़ोतन एजनेबालोए, ज़ैखन ते एज्जेलो ते सब किछ समझालो।" 26 तेखन यीशुए ज़ोवं, "अवं ज़े तीं सेइं गल्लां लगेरोई केरने तैए मसीह आई।" 27 एत्रे मां तैसेरे चले आए ते तैनेई तैएक्की कुआन्शी सेइं गल्लां केरतो लेइतां हैरान राए, पन केन्चे तैस एन न पुच्छू, "तू कुन चातस?" या "एस कुआन्शी सेइं किजो गल्लां लगेरोस केरने?" 28 ते कुआन्शा पैनरो घड़ो तैड़ी छेइतां वापस नगर मां जेई ते मैनु सेइं ज़ोने लगी। 29 "एज्जा, एक्की मैनु सेइं मिला तैनी मीं सेइं सब किछ ज़ोवं जैन मीं अज तगर कियेरु थियूं, कुन ए ते मसीह त नई?" 30 तैना मैनु नगर मरां निस्तां यीशु हेरनेरे लेइ तैसेरे पासे चलने लगे। 31 यीशुएरे चले तैस कां मिनत केरने लगगे, "हे गुरु, रोटी खा।" 32 पन यीशुए तैन सेइं ज़ोवं, "मीं कां खानेरे लेइ अक एरी रोटी आए, पन तुसन तैसेरे बारे मां कोई पतो नई।" 33 तैखन चले एप्पू मांमेइं ज़ोने लगे, "कुन केन्चे पेइलू एसेरे लेइ किछ खाने जो आनोरुए?" 34 यीशुए तैन सेइं ज़ोवं, "मेरी रोटी ईए कि, परमेशेरी मर्जी पूरी केरि जैनी अवं भेजोरोई ते तैन कम पूरू केरि जैन तैनी दितोरुए। 35 कुन तुस न ज़ोथ कि, फसल पकने हेजू चेरे महीन बाकिन? अवं तुसन जो ज़ोताई कि, अपनि एछड़ी घाड़! ते एजनेबाले मैनु हेरा, जैना पक्कोरे

ऊडारां केरि फसलारे ज़ेरे आन। 36 फसल कटने बालन कम केरतां मज़दूरी मैल्ली राओरीए, यानी तैना लोकन अकोट्टे केरि राओरेन जैना लोकन हमेशारी जिन्दगी हासिल केरेले, ताके ज़े बेते ते कटते साथी खुशी मनान। (aiōnios g166) 37 एल्हेरेलेइ अक कहावते कि बेनेबालो कोईए ते कटने बालो होरो कोईए, तैन सच्च। 38 मीं तुस भेजे कि गाथ तैस फसली कट्टा ज़े तुसेईं नई बेवरी, होरेई मेहनती सेइं कम कियूं ते तुसन तैन केरि मेहनतरो फल मैल्लो।" 39 नगरेरे बड़े लोकेई तैस सैमरी कुआन्शारी गल शुन्तां यीशु पुड़ विश्वास कियो, किजोकि तैसां तैन लोकन सेइं ज़ोवं कि तैनी मीं सेइं सब किछ ज़ोवं, जैन मीं कियेरु थियूं। 40 जैस नगरेरे सामरी लोक यीशु कां ओरे थिये, मिनत केरतां ज़ोने लगे, असन कां बिश फिरी ते दूई दिहाड़े तैड़ी राव। 41 होरे भी बड़े लोक थिये जैनेई तैसेरी गल्लां शुन्तां तैस पुड़ विश्वास कियो। 42 तैनेई तैस कुआन्शी जो ज़ोवं, "असेई तेरी गल्लां शुन्तां विश्वास नई कियोरो, बल्के असेई अपने कन्नेई शुनेरुए ते असेई एन हुनी बुझू कि ए मैनु सच्च दुनियाई मुक्ति देनेबालोए।" 43 दूई दिहेइना बाद यीशु फिरी गलीलेरे पासे चलो जेव। 44 ते यीशुए एप्पू ज़ोरु थियूं, कि कोई नबी अपने मुलखे मां इज्जतरे काबल न समझो गाए। 45 ज़ैखन ते गलीले मां अव त गलीली लोक तैस सेइं खुशी सेइं मिले, एल्हेरेलेइ कि तैनेई तैन सब किछ जैन तैनी फसहरे मौके यरूशलेम नगरे मां कियेरु थियूं, तैनेई अपनि एछड़े सेइं लावरु थियूं तैखन तैना एप्पू भी तैड़ी थिये। 46 दुइयोवं बार ज़ैखन ते गलील इलाकेरे काना इलव्वें मां ओरो थियो ज़ैड़ी तैनी पानी दाछरो रस बनोरो थियूं। तैड़ी अक बड़ो बड़ो राजेरो अफसर थियो तैसेरु मट्टू कफरनहूम नगर मां बिमार भोरु थियूं। 47 ज़ैखन तैनी अफसरे शुनु कि यीशु यहूदिया इलाकेरां गलील इलाके मां ओरोए त ते यीशु कां पुजो ते मिनत केरतां ज़ोने लगे मेरु मट्टू मरने बालूए तू चल ते तैस बड़्झा, किजोकि तैन मरने बालू थियूं। 48 यीशुए तैस सेइं ज़ोवं, "जांतगर तुस लोक निशान ते चमत्कार न लाएले कथे विश्वास न केरेले कि, अवं मसीह आई।" 49 तैनी बड़े अफसरे ज़ोवं, "प्रभु लूश केर एरु न भोए कि मेरु मट्टू मेरि गाए।" 50 यीशुए जुवाब दित्तो, "चल तेरु मट्टू ज़ींतू भोनूए।" तैनी तैसेरी गल्लरो विश्वास कियो ते तैटां चलो जेव। 51 ते हेजू बत्तां थियो ते तैसेरे नौकर तैस मैल्ले ते ज़ोने लगे, "तेरु मट्टू ज़ींतूए।" 52 तेखन ते पुच्छने लगे, "मेरु मट्टू कैखन ज़ेरे बेज्जोने लगोरु थियूं?" ते तैनेई ज़ोवं "तैसेरो भुखार हीज दीसां एक्की बज्जे उतरी जोरो थियो।" 53 तैखन तैसेरे बाजी याद अवं कि, तैए मौको थियो, ज़ैखन यीशुए ज़ोरु थियूं, "गा तेरु मट्टू ज़ींतूए" तैखन तैनी भी ते तैसेरे पूरे टब्बरे यीशु पुड़ विश्वास कियो। 54 ई दुइयोवं चमत्कारेरो निशान थियो ज़े यीशुए यहूदिया इलाकेरां वापस एजनेरां बाद गलील इलाके मां कियोरो थियो।

5 एन गल्लन पत्ती यहूदी केरु अक तिहार भोवं, ते यीशु यरूशलेम नगरे जो जेव। 2 यरूशलेम नगरे मां भैट्टां केरे दारे कां अक हावदे, जैस जो इब्रानी भाषाई मां बैतहसदा ज़ोतन, तैसेरां पंच अंगना थियां। 3 एन मां बड़े बिमार, काने, टॉटे, नीपाते (पानी हीलनेरे इंतज़ारे मां) भोते

थियो। 4 (किजोकि वक्ते पुड़ परमेशेरो स्वर्गादूत हावदे पुड़ एइतां पानी हिलातो थियो, ते पानी हिलनेरां पत्ती ज़ै कोई पेइलो हवदे मां गातो थियो तै ठीक भोतो थियो, चाए तैसेरी कोई भी बिमारी किना भोए)। 5 तैड़ी अक मैन्हु थू, ज़ै 38 सालां केरो बिमार थू। 6 यीशुए तै तैड़ी बिशोरो लाव ते एन ज़ेनतां कि ए बड़ी चरोकनो इस हालती मांए, ते तैस पुच्छू, “कुन तू ठीक भोनू चातस?” 7 तैने बिमारे जुवाब दित्तो, “हे प्रभु, मीं कां कोई मैन्हु नई, कि ज़ताली पानी हिलाव गाए त मीं कोई हावदे मां गाने लेइ मेरी मद्दत केरे, मेरे पुजते-पुजते तांतगर होरो कोई गाते।” 8 यीशुए तैस सेइं ज़ोवं, “उठ अपनि खट सल्ल ते चल फिर।” 9 तै मैन्हु तैखने ठीक भोव, ते अपनि खट छुइतां चलने फिरने लगो। 10 तै आरामेरी दिहाड़ी थी एल्हेरेलेइ यहूदी लीडर तैस सेइं ज़ै ठीक भोरो थियो, ज़ोने लगगे, “अज़ त आरामेरी दिहाड़ी आए, तीं खट छूनी जेइज नई।” 11 तैने तैन जुवाब दित्तो, “ज़ैने अव ठीक कियो, तैने मीं सेइं ज़ोवं, ‘अपनि खट छू ते चल फिर।’” 12 तैनेई तैस पुच्छू, “तै कौन मैन्हु ज़ैने तीं सेइं ज़ोवं, ‘खट छुइतां चल फिर?’” 13 ज़ै ठीक भोरो थियो ते न थियो ज़ानतो कि तै कौन आए, किजोकि तैस ठेरी भीड़ भोनेरे वजाई सेइं यीशु तैस ठैरां होरि पासे चुपचारे चलो जोरो थियो। 14 एन गल्लन पत्ती यीशु तै मन्दरेरे अंगने मां मैल्लो, यीशुए तैस सेइं ज़ोवं, “तक, तू ठीक भोरोस, फिरी पाप न करां, एरू न भोए कि, एस करां बड्डी आफत एज्जे।” 15 तैने मैने यहूदी लीडरन सेइं ज़ोवं, कि ज़ैने अव ठीक कियोरोई तै यीशुए। 16 एल्हेरेलेइ यहूदी लीडर यीशु सताने लाए, किजोकि तै एरां ज़ेरां कम्मां आरामेरे दिहाड़े केरतो थियो। 17 एस पुड़ यीशुए तैन सेइं ज़ोवं, “मेरो बाजी यानी परमेशार हमेशा कम केरते, मीं भी कम कियोरू लोड़े।” 18 एस वजाई सेइं यहूदी लीडर मनां जादे तैस मारनेरी कोशिश केरने लाए, किजोकि तै न सिर्फ आरामेरे दिहाड़ेरो हुकम न थियो टूलोतो बल्के परमेशारे अपनो बाजी ज़ोतो थियो ते अपनो आप परमेशारे बराबर बनातो थियो। 19 यीशुए तैन सेइं ज़ोवं, “अवं तुसन सेइं सघ-सघ ज़ोताई, मट्टू यानी अव एप्पू किछ न केरि बेटि, सिर्फ तैन ज़ैन बाजी परमेशारे करां केरतू लाताई, किजोकि ज़ैना-ज़ैना कम्मां बाजी करां केरतो लाते तैन मट्टू भी तैस्से तरीके सेइं केरते। 20 किजोकि बाजी, मट्टे सेइं प्यार केरते, ते ज़ैना-ज़ैना कम्मां तै एप्पू केरते, तैना सब मट्टे भी हिराते, ते तैन एस करां भी बड्डां कम्मां हिरालू, ताके तुस हेरान भोथ। 21 किजोकि जेन्चरे बाजी मुडदण ज़ोतो केरते, तेन्चरे मट्टू भी ज़ैस चाते तैस ज़ोतो केरते। 22 बाजी केन्चेरी इन्साफ न केरे, पन तैने इन्साफ केरनेरू सारू कम मट्टे दित्तेरूए। 23 कि सब लोक जेन्चरे बाजेरी आदर केरतन तेन्चरे मट्टेरी भी आदर केरन, ज़ै मट्टेरी आदर न केरे, तै बाजी केरि ज़ैने तैन भेजोरूए तैसेरी आदर न केरे। 24 अवं तुसन सेइं सघ ज़ोताई ज़ै मेरू वचन शुन्तां मेरे भेजने बाले पुड़ विश्वास केरते, हमेशारी ज़िन्दगी तैसेरीए, ते तैस पुड़ सज़ारो हुकम न भोए, बल्के तै मौतरां पार भोइतां हमेशारे ज़िन्दगी मां दाखल भोते।” (aiōnios g166) 25 “अवं तुसन सेइं सघ-सघ ज़ोताई, कि तै वक्त एजनेबालोए, बल्के हुन्नाए ज़ैस

मां मुड़दे परमेशारे मट्टेरी यानी मेरी आवाज़ शुनेले, ते ज़ैना शुनेले तैना हमेशा जीएले। 26 किजोकि जेन्चरे बाजी अपने आपे मां ज़िन्दगी रखते तेन्चरे तैने मट्टे भी ए अधिकार दित्तोरोए, कि अपने आपे मां ज़िन्दगी रखे एल्हेरेलेइ तैन मैनेरू मट्टूए। 27 बल्के बाजी परमेशारे तैस सैरी लोकां केरि आदालत केरनेरो भी अधिकार दित्तोरोए, एल्हेरेलेइ कि तैन यानी अव मैनेरू मट्टू आई। 28 एसमां हेरान न भोथ, किजोकि तै वक्त एइते कि जेन्चरे कन्न मां आन तैसेरी आवाज़ शुन्तां ज़ोते भोनेन। 29 ज़ैनेई भलाई कियोरीए हमेशारे ज़िन्दगी लेइ ज़ोते भोनेन ज़ैनेई बुरी ज़िन्दगी ज़ोयोरीए तैना सज़ारी लेइ ज़ोते भोनेन।” 30 “अवं अपने आपे सेइं किछ न केरि बेटि, जेन्चरे मेरो बाजी मीं ज़ोते तेन्चरे अव लोकां केरि आदालत केरताई, ते मेरी आदालत सच्चीए, किजोकि अव अपने मेर्जी सेइं नई पन अपने भेजने बालेरी मर्जी सेइं चाताई। 31 अगर अव अपनि गवाही एप्पू देई, त मेरी गवाही सच्ची नई। 32 अक होरो आए, यानी मेरो बाजी ज़ै मेरी गवाही देते, ते अव ज़ानताई ज़ै गवाही तै मेरे बारे मां देते तै सच्चीए। 33 तुसेई मैन्हु यूहन्ना कां मेरे बारे मां पुच्छने भेजे, ते तैनी सच्चेरी गवाही दित्तोरीए। 34 पन अव अपने लेइ मैनेरी गवाही न चैई, पन यूहन्ना ज़ै गवाही दित्ती तैसेरे बारे मां मीं एल्हेरेलेइ ज़ोवं ताके तुसन मुक्ति मैल्ले। 35 तै त बलतो ते चमकतो दीयेरो ज़ेरो थियो, पन तुसन थोड़े चिरेरे लेइ तैसेरी लोई मां खुश भोनू रोडू लग्गू। 36 पन मीं कां ज़ै गवाहीए तै यूहन्नारी गवाही करां भी बड्डीए। किजोकि ज़ैन कम बाजे मीं केरनेरे लेइ दित्तेरू मतलब इन्ने कम्मां ज़ैना अव केरताई, तैना मेरी गवाही देतन कि बाजे अव भेजोरोई। 37 ते बाजी ज़ैने अव भेजोरोई तैने मेरी गवाही दित्तोरीए, तुसेई न कधी तैसेरी आवाज़ शुनोरी, ते न तै आमने सामने लोरोए। 38 तुसेई तैसेरी शिक्षा अपने मने मां नई रख्खोरी, किजोकि तुसेई मीं पुड़ विश्वास न कियो, कि अव परमेशारे भेजोरोई। 39 तुस पवित्रशास्त्रे मां एन पढतथ, किजोकि तुस सोचतथ कि हमेशारी ज़िन्दगी तैस मां मैलतीए, तै ईए, ज़ै मेरे बारे मां गवाही देते। (aiōnios g166) 40 फिरी भी तुस हमेशारे ज़िन्दगी हासिल केरनेरे लेइ मीं कां न एजन्नु चाथ। 41 अव मैन्नु करां तारीफ़ न चैई। 42 पन अव तुसन ज़ानताई तुशे दिले मां परमेशारे लेइ प्यार नई। 43 अव अपने बाजेरे अधिकारे सेइं ओरोई, ते तुस मेरी गल न मन्नथ। अगर होरो कोई अपने अधिकारे सेइं एज्जे, त तैसेरी गल मन्नेले। 44 तुस मीं पुड़ विश्वास न केरि बटथ, किजोकि तुस एक्की होरि करां तारीफ़ चातथ, ते तुस तै तारीफ़ न चाथ ज़ै सिर्फ परमेशारे तरफांए। 45 इन न समझा कि अव बाजेरे सामने तुसन पुड़ दोष लेइएलो, तुसन पुड़ दोष लानेबालोए त मूसोए, ज़ैस पुड़ तुसेईं भरोसो रख्खोरोए। 46 किजोकि अगर तुसेईं मूसेरो विश्वास कियोरो भोथो, त मेरो भी विश्वास केरथे, किजोकि तैने मेरे बारे मां लिखोरूए। 47 तुस त तैसेरे कानूनेरे गल्लन पुड़ विश्वास न केरथ, ते फिरी तुस किजो मेरी गल्लन पुड़ विश्वास केरेले?”

6 एन गल्लन पत्ती यीशु गलीलेरे समुन्दरेरे मतलब तिबिरियुसेरे समुन्दरेरे पार जेव। 2 ते अक बड़ी भीड़ तैस पत्ती चली, किजोकि

जैना चमत्कार तै बिमारन पुड़ हीरतो थियो, ते तैना ठीक भोते थिए ते लोक एन हेरते थिए। 3 तैखना यीशु पहाड़े पुड़ च़ेढ़तां अपने चलन साथी तैड़ी बिश्शो। 4 ते यहूदी केरे फ़सहेरू तिहार नेडू थियूं। 5 ज़ैखन यीशुए अक बड़ी भीड़ अपने पासे एंडती लाई, त तैने फिलिप्पुसे सेइं ज़ोवं, “असां एना केरे लेइ रोटी कोट्टां घिन्म?” 6 पन तैनी तै गल तैस अज़मानेरे लेइ ज़ोई, किजोकि तै एप्पू ज़ानतो थियो कि तै कुन केरेलो। 7 फिलिप्पुसे तैस जुवाब दित्तो, “एन केरे लेइ 200 दीनारां केरि रोटी भी पूरी न भोली कि तेन थोड़ी-थोड़ी मैली गैली।” 8 तैसेरे चलन मरां शमौन पतरसेरे ढूलाए अन्द्रियासे तैस सेइं ज़ोवं। 9 “इड़ी अक मट्टूए ज़ैस कां जोआं केरि पंच रोट्टिन, तै दूई मेछलीन, पन एत्रे लोकन जो कुन तैना पूरी भोनिन?” 10 यीशुए ज़ोवं, “लोकन बिशाला।” तैड़ी बड़ो घास थियो। तैखन लोक ज़ैना लगभग 5000 मड़द बिश्शोरे थियो। 11 तैखन यीशुए रोटी टूलेइ ते शुक्र केरतां बिशने बलना दित्ती, ते तेन्चरे मेछलीन मरां भी ज़ेरी तैना चातो थियो बेन्टी। 12 ज़ैखन तैना खेइतां रज़्जे त तैनी अपने चलन सेइं ज़ोवं, “बचोरे टुकड़े अकोट्टे केरा, ताके किछ शारू न गाए।” 13 ते तैनेई अकोट्टे केरे, ते जोआं केरे पंच रोटी केरे टुकड़न मरां ज़ैना खाने बालन करां बचोरे थिए 12 टोकरे थिए। 14 तैखन तै चमत्कार ज़ै तैनी कियोरो थियो लोक हेरतां ज़ोने लाए, “तै नबी ज़ै दुनियाई मां एजनेबालो थियो सच़्चे ईए।” 15 यीशुए एना ज़ेनतां कि एना मीं राज़ो बनानेरे लेइ टूलानो चातन, फिरी तै अकैल्लो पहाड़े पुड़ जेव। 16 ज़ैखन ड़लोइ भोइ, त तैसेरे चले समुन्दरेरे बन्ने जे। 17 ते किशती मां च़ेढ़तां समुन्दरेरे पार कफरनहूम नगर जो च़ले, तैस वक्ते आंधरू भोरू थियूं, ते यीशु हेजु तगर तेन कां न थियूं ओरो। 18 ते बड़ी तेज हवा च़लारी थी ते समुन्दरे मां छेल्ली उठने लेइ। 19 ज़ैखन तै लगभग टूलाई च़ेरे मील नेड़े अव, त तैनेई यीशु समुन्दरे पुड़ च़लतो लाव ते किशतरे नेड़े एइतो लाव ते डरे। 20 पन यीशुए तैन सेइं ज़ोवं, “अवं आई डरा न।” 21 ते तै तैस किशती मां च़ड़नेरे लेइ तियार भोव, ते तैखने किशती तैस ठैरी पुड़ पुज़ी ज़ैड़ी तैना च़लारे थियो। 22 दुइयावं दिहाड़े तैस मैन्हु केरि भीड़ां ज़ै समुन्दरेरे पार खड़ी थी, इन हेरतां कि एक्की किशतरे अलावा होरि कोई न थी, यीशु अपने चलन साथी तैस किशती पुड़ न च़ढोरो थियो, पन सिर्फ तैसेरे चले थियो। 23 (तैखन होरि किशती तिबिरियुस नगरेरां तैस ठैरी एई, ज़ैड़ी तैनेई प्रभुएरू शुक्र केरतां रोटी खोरी थी) 24 एल्हेरेलेइ ज़ैखन लोकेई हेरू कि इड़ी न यीशु ते न तैसेरे चले, ते तैना फिरी तैना निक्की-निक्की किशतन पुड़ च़ेढ़तां यीशु तोपते कफरनहूम नगर ए पुजे। 25 समुन्दरेरे पार ज़ैखन तैना तैस मैल्ले त तैने ज़ोवं, “हे गुरू, तू इड़ी कताली अव?” 26 यीशुए तैन जुवाब दित्तो, “अवं तुसन सेइं सच़-सच़ ज़ोताई, तुस मीं एल्हेरेलेइ न तोपथ कि तुसेईं चमत्कार लाव, बल्के एल्हेरेलेइ कि रोटी खेइतां रज़्जे। 27 नाश भोनेबैली रोट्टरे लेइ मेहनत न केरा। पन तैस रोट्टरे लेइ मेहनत केरा ज़ै हमेशारी ज़िन्दगी देतीए, ज़ै मैनेरू मट्टू यानी अवं तुसन देइलो, किजोकि बाजी परमेशरे मीं एन्चरां केरनेरो अधिकार दित्तोरोए।” (aiōnios g166) 28 तैनेई तैस्से सेइं ज़ोवं,

“परमेशरेरू कम केरनेरे लेइ अस कुन केरम?” 29 यीशुए तैन जुवाब दित्तो, “परमेशर तुसन करां एन कम चाते कि तुस तैस पुड़ यानी मीं पुड़ विश्वास केरा ज़ैनी अवं भेजोरोई।” 30 तैखन तैनेई तैस सेइं ज़ोवं, “फिरी तू कुन निशान हीरातस कि अस तैस हेरतां तेरो विश्वास केरम? तू कोन ज़ेरू कम हीरातस? 31 इश्शे दादेई-पड़दादेई जंगले मां स्वर्गरी रोटी खेइ, ज़ैस जो मन्नो ज़ोतन। जेन्चरे पवित्रशास्त्रे मां लिखोरूए, तैनी तैन खानेरे लेइ स्वर्गरां रोटी दित्ती।” 32 यीशुए तैन सेइं ज़ोवं, “अवं तुसन सेइं सच़-सच़ ज़ोताई कि मूसा तुसन तै रोटी स्वर्गरां न दित्ती, पन मेरो बाजी तुसन सच़्ची रोटी स्वर्गरां देते। 33 किजोकि ज़ै रोटी परमेशर देते, ते तै ईए ज़ै स्वर्गरां एइतां दुनियारे लोकन ज़िन्दगी देतीए।” 34 तैखन तैनी तैस्से सेइं ज़ोवं, “हे प्रभु, ए रोटी असन स्वर्गरां देतो रा।” 35 यीशुए तैन सेइं ज़ोवं, “ज़िन्दगरी रोटी (ज़ै ज़िन्दगी देनेबाली रोटी) अक्वे आई, ज़ै मीं कां एजते ते कथी निअन्नो न भोलो, ते ज़ै मीं पुड़ विश्वास केरेलो तै कथी टूलिशोरो न भोलो। 36 पन मीं तुसन सेइं पेडलू ज़ोरूए, कि तुसेईं अवं लोरोई फिरी भी मीं पुड़ विश्वास न केरथ। 37 ज़ैन किछ बाजी मीं देते तैन सब किछ मीं कां एजनुए, ते ज़ै कोई मीं कां एज्जेलो अवं तैस ज़रूर कबूल केरेलो। 38 किजोकि अवं अपनि मर्ज़ी नई, बल्के परमेशरेरी मर्ज़ी पूरी केरनेरे लेइ स्वर्गरां ओरोई ज़ैनी अवं भेजोरोई। 39 ईए मेरे बाजेरी मर्ज़ी आए ज़ैनी अवं भेजोरोई कि ज़ैन किछ तैनी मीं दित्तोरोए तैस मरां अवं किछ न हिरेई, पन आखरी दिहेई फिरी तैस ज़ीतो केरेलो। 40 किजोकि मेरे बाजेरी मर्ज़ी ईए कि ज़ै कोई मट्टे हेरे ते तैस पुड़ विश्वास केरे, तैस हमेशारी ज़िन्दगी मैल्ले, ते अवं तैस आखरी दिहेई फिरी ज़ीतो केरेलो।” (aiōnios g166) 41 एल्हेरेलेइ यहूदी लोक तैस पुड़ कुड़कुड़ाने लगगे, किजोकि तैनी ज़ोरू थियूं, “ज़ै रोटी स्वर्गरां ओरिए तै अवं आई।” 42 ते तैनेई ज़ोवं, “कुन एन यूसुफेरू मट्टू यीशु नई, जेसेरे अम्मा बाजी अस ज़ानतम? त तै केन्चरे ज़ोते कि अवं स्वर्गरां ओरोई?” 43 यीशुए तैन जुवाब दित्तो, “एप्पू मांमेइं न कुड़कुड़ाथ। 44 कोई मीं कां न एज्जी बट्टे ज़ांतगर बाजी, ज़ैनी अवं भेजोरोई, तैस मीं कां न आने, ते अवं तैस आखरी दिहेई फिरी ज़ीतो केरेलो। 45 नेबी केरे पवित्रशास्त्रे मां एन लिखोरूए, ‘तैना सब परमेशरेरे तरफां शिखोरे भोनेन।’ ज़ैनी बाजी करां शुनोरूए त शिखोरोए तै मीं कां एइते। 46 एसेरो मतलब ई नई कि केन्चे बाजी लोरोए, पन ज़ै परमेशरेरे तरफांए यानी मीं बाजी लोरोए। 47 अवं तुसन सेइं सच़-सच़ ज़ोताई ज़ै कोई विश्वास केरते हमेशारी ज़िन्दगी तैसेरीए।” (aiōnios g166) 48 ज़िन्दगरी रोटी (ज़िन्दगी देनेबाली रोटी) अक्वे आई। 49 तुश्शे दादे-पड़दादेई जंगले मां मन्नो खाऊ ते मरे। 50 ई तै स्वर्गरी रोटीए कि मैन्हु खान ते न मरन। 51 ज़िन्दगरी रोटी ज़ै स्वर्गरां ओरिए अक्वे आई। अगर कोई इस रोटी मरां खाए, त हमेशा ज़ीतो रालो, ते ज़ैस रोटी सेइं दुनियारे लोकन हमेशारी ज़िन्दगी मैलचे, तैन मेरू मासे।” (aiōn g165) 52 एस पुड़ यहूदी लोक एप्पू मांमेइं बेंस केरने लाए, “ई मैन्हु असन अपनू मास केन्चरे खाने जो देइ बटते?” 53 यीशुए तैन सेइं ज़ोवं, “अवं तुसन सेइं सच़-सच़ ज़ोताई, कि ज़ांतगर तुस

मैनेरे मट्टेरू यानी मेरू मास न खाले, ते मेरो खून न पीले, तुसन हमेशारी ज़िन्दगी न मालेली। 54 ज़ै मेरू मास खाते ते मेरो खून पीते हमेशारी ज़िन्दगी तैसेरीए ते आखरी दिहैड़ी अवं फिरी तैस ज़ीतो केरेलो। (aiōnios g166) 55 किजोकि हकीकति मां मेरू मास खानेरी चीजे ते मेरो खून पीनेरी चीजे। 56 ज़ै मेरू मास खाते ते खून पीते तै मीं मां बनोरो राते, ते अवं तैस मां। 57 जेन्चरे ज़ीते बाजी अवं भेजोरोई, ते अवं बाजी केरे कारन जोताई, तेन्चरे तै भी ज़ै मीं खालो मेरे कारन ज़ीतो रालो। 58 ज़ै रोटी स्वर्गें ओरिए, तैस रोटी ज़ेरि नई ज़ै तुशे दादे-पड़दादेई खाइ ते बादे मां मरे, पन ज़ै कोई ई रोटी खालो ते हमेशा ज़ीतो रालो।” (aiōn g165) 59 इना गल्लां तैनी कफरनहूम नगरेरे एक्की प्रार्थना घरे मां जोई। 60 एल्हेरेलेइ तैसेरे चेलन मरां बड़ेई एन शुन्तां ज़ोवं, “ए शिक्षा सकते, एस कौन मेन्नी बटते?” 61 यीशु अपने मने मां एना बुद्धतां कि मेरे चले एस गल्ली पुड़ एप्पू मांमेइ कुड़कुडाने लोरेन, तैन पुच्छू, “कुन इना गल्लां तुसन मीं पुड़ विश्वास केरने करां रोकतिन?” 62 अगर तुस मैनेरू मट्टे यानी अवं ज़ैड़ी पेइलो थियो उबरे (स्वर्गें) गातो लाएले, त कुन भोलू? 63 परमेशेरी आत्मा त ज़िन्दगी देने बालीए, मैन्हु केरि ताकती सेइं किछ न केरोए, ज़ैना गल्लां मीं तुसन सेइं ज़ोई तैना परमेशेरी आत्मारे तरफां आन ते तैना ज़िन्दगी भी आन। 64 पन तुसन मां किछ एरे आन ज़ैना विश्वास न केरन। किजोकि यीशु पेइलो ज़ानतो थियो कि ज़ैना विश्वास न थी केरते तैना कौन आन, ते तैस कौन टूलवालो। 65 ते तैनी ज़ोवं, “एल्हेरेलेइ मीं तुसन सेइं ज़ोरू थियू, ज़ांतगर बाजी केरे तरफां एन वरदान न मैल्ले तांतगर कोई मीं कां न एज्जी बट्टे।” 66 एस पुड़ तैसेरे चेलन मरां बड़े उलटे फिरे, ते तैल्ला पत्ती तैस साथी न चले। 67 तैखन यीशुए 12 चेलन सेइं ज़ोवं, “कुन तुस भी चलू गानू चातथ?” 68 शमौन पतरस तैस जुवाब दित्तो, “हे प्रभु अस केस कां गाम? हमेशारी ज़िन्दगारी देने बैली गल्लां त तींए कां आन। (aiōnios g166) 69 ते असेई तीं पुड़ विश्वास कियो ते ज़ानू कि तू परमेशेरो पवित्र मैन्हु आस।” 70 यीशुए तैन जुवाब दित्तो, “कुन मीं तुस 12 न चुने। फिर भी तुसन मरां अक मैन्हु शैताने।” 71 तैने इन तैस शमौन इस्करियोतेरे मट्टे यहूदा इस्करियोतेरे बारे मां ज़ोवं। हांलाकि तै तैन 12 चेलन मरां अक थियो, ज़ै यीशु टलुवाने बालो थियो।

7 एना गल्लन पत्ती यीशु गलील इलाके मां फिरतो राव, किजोकि यहूदी लीडर तैस मारनेरी कोशिश केरि राओरे थियो, एल्हेरेलेइ तै यहूदिया इलाके मां फिरनू न चातो थियो। 2 यहूदी केरू झोंफडी केरू तिहार (तेम्बु) नेडू थियू। 3 एल्हेरेलेइ तैसेरे ढूलाएई तैस ज़ोवं, “इड़ी न रा। यहूदिया इलाके मां गा ज़ैड़ी तिहार मनाने लोरेन, कि ज़ैना चमत्कार तू केरतस तैना तेरे तैना चले भी हेरन, ज़ैना यहूदिया इलाके मां रातन। 4 किजोकि एरो कोई न भोलो कि ज़ै मशूर भोनू चाए, ते छेपतां कम केरे। अगर तू कम केरतस, त अपनो आप हिरा।” 5 किजोकि तैसेरे ढूला भी तैसेरो विश्वास न थी केरते। 6 तैखन यीशुए तैन सेइं ज़ोवं, “मेरो लेइ ठीक वक्त हेजू नई ओरो, पन तुस केन्ची वक्त मां भी गेइ

सकतथ। 7 इस दुनियारे लोक तुसन सेइं बैर न केरि सकन, पन मीं सेइं बैर रखतन किजोकि अवं तैन केरे खलाफ इन ज़ोताई कि तैना बुरां कम्मां केरतन। 8 तुस तिहारे मां गाथ, मीं हुना एस तिहारे मां नई एजनु, किजोकि मेरो हेजू ठीक वक्त नई ओरो।” 9 ते तै तैन सेइं एना गल्लां केरतां गलीले मां राव। 10 पन ज़ैखन तैसेरे ढूला तिहारे मां चले जे त तै बांदो न पन छेपतां जेव। 11 यहूदी लीडर तिहारे मां यीशु तोपने लाए। तैना लोकन पुछ्छी राओरे थियो, “तै मैन्हु कोडि आए?” 12 ते लोकन मां तैसेरे बारे मां बल्हे-बल्हे बेडि गल्लां भोइ, किछ ज़ोते थी, “तै रोडो मैनुए।” ते किछ ज़ोते थी, “नई तै मैनु गुमरा केरते।” 13 फिरी भी यहूदी लोकां केरे प्रधानां केरे डरे सेइं केन्ची भी मैन्हु तैसेरे बारे मां खुलतां तैसेरे बारे मां गल केरनेरी हिम्मत न भोइ। 14 ज़ैखन तिहाररे अर्थे दिहाड़े बीते, त यीशु मन्दरेरे अंगने मां गेइतां शिक्षा देने लगो। 15 तैखन यहूदी लीडरेई हैरान भोइतां ज़ोवं, “एनी त पवित्रशास्त्रेरी शिक्षा केन्ची करां नई पढ़ोरीए, फिरी एस केन्चरे एना गल्लां एई?” 16 यीशुए तैन जुवाब दित्तो, “मेरी शिक्षा मेरी अपनि नई, बल्के परमेशेरे तरफां आए, ज़ैने अवं भेजोरोई। 17 अगर कोई तैसेरी मेर्ज़ी पुड़ चलनू चाए, त तै इस शिक्षारे बार मां ज़ानेलो कि ए परमेशेरे तरफांए या अवं अपने तरफां ज़ोताई। 18 ज़ै अपने तरफां किछ ज़ोते तै अपनि बड़याई चाते, पन ज़ै अपने भेजने बालेरी बड़याई चाते तै ईमानदार आए, ते तैस मां कोई बेइमानी नई। 19 तुसन मूसे कानून दित्तो, पन तुसन मरां कोई भी तैस पुड़ न चले! पन तुस लोक मीं मारनेरी कोशिश केरतथ।” 20 लोकेई जुवाब दित्तो, “तीं पुड़ भूतेरो सैयोए! कौन तीं मारनेरी कोशिश केरते?” 21 यीशुए जुवाब दित्तो, “मीं अक चमत्कार कियो, ते तुस हैरान भोए। 22 एल्हेरेलेइ मूसा तुसन खतनेरो हुक्म दित्तो (एना नई कि मूसेरे तरफांए बल्के बाप दादां करां चलतो ओरोए) ते तुस आरामेरे दिहाड़े मैनेरो खतनो केरतथ। 23 एल्हेरेलेइ आरामेरे दिहाड़े मैनेरो खतनो कियो गाते ताके मूसेरे कानूनेरो हुक्म न टले, त तुस मीं पुड़ किजो क्रोध केरतथ, कि मीं आरामेरे दिहाड़े अक मैन्हु रोडेचारे ठीक केरो। 24 तुतर हेरतां इन्साफ न केरा बल्के ठीक-ठीक आदालत केरा।” 25 तैखन किछ यरूशलेम नगरेरे रानेबाले एप्पू मांमेइ एक्की होरि पुच्छने लगे, “कुन ए तै नई, ज़ैस मारनेरी कोशिश चलोरिए? 26 पन तक्का, तै त खुले आम गल्लां केरते, ते कोई एस किछ न ज़ोए। कुन लीडरेई सच्चे, सच ज़ानू कि ए मसीहे? 27 पन ए मैन्हु मसीहे केन्चरे भोइ सकते? एस त अस ज़ानतम कि ए कोट्टां ओरोए, पन ज़ेइस मसीहे एज्जेलो त कोई न ज़ानेलो कि तै कोट्टां एज्जेलो।” 28 तैखन यीशुए मन्दरे अंगने मां शिक्षा देते बारे ज़ोरे सेइं ज़ोवं, “तुस मीं ज़ानतथ ते इन भी कि अवं कोट्टां ओरोई। अवं एप्पू नई ओरो, पन मेरो भेजने बालो सच्चोए, तैस तुस न ज़ानाथ। 29 पन अवं तैस ज़ानताई, किजोकि अवं तैसेरे तरफां ओरोई, ते तैनी अवं भेजोरोई।” 30 एस पुड़ लीडरेई तै टूलानो चाव, फिरी भी केन्चे तैस सेइं हथ न लव, किजोकि तैसेरो मरनेरो वक्त हेजू न थियो ओरो। 31 फिरी भी भीड़ी मरां बड़े लोकेई तैस पुड़ विश्वास कियो, ते

जोने लाए, “मसीह जैखन एज्जेलो ते एट्टां जादे चमत्कार हिरालो जैना एने हीराहे?” 32 फरीसी लोकेई, लोक तैसेरे बारे मां बल्हे-बल्हे एना गल्लां करेते शुने, ते प्रधान याजकेई ते फरीसी लोकेई तैस ट्लानेरे लेइ मन्दरेरे पहरदार भेजे। 33 एस पुइ यीशुए ज़ोवं, “अवं थोडे छिरे तगर हेजू तुसन साथी आई, फिरी अवं अपने भेजने बाले कां वापस गानोई। 34 तुस मीं तोप्लेले, पन अवं नई मैलनो, ते ज़ैडी अवं आई, तैडी तुस न एज्जी बटथा।” 35 एस पुइ यहूदी लीडर एप्पू मांमेई ज़ोने लगे, “ए कोरां च़ल्लेरे, ज़ेरां अस न गेइ बटम? कुन ए तैन कां गालो ज़ैना यूनान नगरे मां तितर-बितर भोइतां रातन, ते यूनानेरे लोकन भी शिक्षा देलो?” 36 एस गल्लरो कुन मतलबे ज़ै एनी ज़ोई, कि तुस मीं तोप्लेले, पन अवं तुसन न मैलेलो, ते ज़ैडी अवं आई तैडी तुस न एज्जी बटतथ? 37 तिहारेरे आखरी दिहाडे, ज़ै खास दिहाडी भोतीए, तेइस यीशु खडो भोइतां ज़ोने लगे, “अगर कोई ट्लिशशोरो भोए त मीं कां एज्जे ते पीये। 38 ज़ै मीं पुइ विश्वास केरे, ज़ेन्चरे पवित्रशास्त्रे मां लिखेरूए, तैसेरे दिले मरां तै पैनेरे दरिया निस्सेले ज़ैना ज़िन्दगी देतन।” 39 यीशुए एना गल्लां पवित्र आत्मारे बारे मां ज़ोई, ज़ै विश्वास केरेने बालन पुइ एज्जेनेबाली थी, किजोकि पवित्र आत्मा हेजू तगर न थी दित्तोरी, किजोकि यीशु हेजू तगर अपनि महिमा मां वापस न थियो जोरोए। 40 तैखन भीडी मरां किछेई एना गल्लां शुन्तां ज़ोवं, “सच्चे ई तै नबी आए, ज़ेसेरे एज्जेनेरी अस उमीदी मां आम।” 41 किछ लोकेई ज़ोवं, “ई मसीहे,” पन किछेई ज़ोवं, “कुन मसीह गलील इलाकेरां एज्जेनेरी? 42 पवित्रशास्त्र मां लिखेरू कि मसीह दाऊदेरे खानदाने ते बैतलहम इलव्वे मरां एज्जेलो, ज़ैडी दाऊद राज़ो रातो थियो।” 43 यीशुएरे बारे मां लोकां केरो अलग-अलग खियाल थियो, एल्लेरेलेइ तैन एप्पू मांमेई अनबन भोइ। 44 किछ तैन मरां तैस ट्लाने चाते थिये, पन केन्चे तैस सेई हथ न लव। 45 तैखन मन्दरेरे पहरदार, प्रधान याजकन ते फरीसन कां एइतां तैन सेई ज़ोवं, “तुसेई तै किजो न आनो?” 46 पहरदारई जुवाब दित्तो, “केन्चे मैने कधी एत्री रोडो गल्लां न कियोरी, ज़ेरि गल्लां ए मैन्हु करेते।” 47 फरीसेई तैन जुवाब दित्तो, “कुन तुस भी टेपलोरेथ? 48 कुन सरदारन ते फरीसन मरां केन्चे तैस पुइ विश्वास कियोरोए? 49 पन एन लोक ज़ैना मूसेरे कानूने न ज़ानन् तैन पुइ परमेशरेरो फिटकार भोते।” 50 नीकुदेमुसे ज़ै पेइलो तैस कां राती ओरो थियो, ते तैना मरां अक थियो, तैनी ज़ोवं, 51 “कुन इश्शे कानून केन्ची मैन्हु सज़ा देनेरी अज़ाज़त देते, ज़ांतगर तैसेरी गल शुन्तां इन न ज़ानन कि तै कुन करेते?” 52 तैनेई तैस जुवाब दित्तो, “कुन तू भी गलील इलाकेरो आस! पवित्रशास्त्रे मां तोप ते ज़ान, कि गलीलेरां कोई नबी त नई निसने बालो!” 53 (तैखन सब अपने-अपने घरे च़ले जे)।

8 पन यीशु अपने चेलन सेई साथी ज़ैतून पहाडे पुइ जेव। 2 होरसां तै झेझां-झेझां मन्दरेरे अंगने मां जेव, बडे लोक तैस कां आए ते तै बिश्तां तैन शिक्षा देने लगे। 3 तैखन शास्त्री ते फरीसी लोक एक्की कुआन्शी ज़ै बदमैशी मां ट्लेइयोरी थी, तै मझाटे खडी केरतां यीशु सेई ज़ोवं, 4 “हे गुरु, ई कुआन्श बदमैशी केरते वक्त ट्लोरीए। 5 मूसेरे

कानूने मां मूसा असन हुक्म दित्तोरोए कि एरी ज़ेरि कुआन्शी घोडेई बैइतां मारा, ते तू एस कुआन्शरे बारे मां कुन ज़ोतस, कि अस एस कुन केरम?” 6 तैनेई यीशु परखनेरे लेइ ए गल ज़ोई, ताके तैस पुइ दोष लाने जो गल मैल्ले। पन यीशु उन्डे लिक्तां एंगलोई सेई ज़मीनी पुइ लिखने लव। 7 ज़ैखन तैना तैस पुछते राए, त तैनी उबरे तेक्तां तैन सेई ज़ोवं, “तुसन मरां ज़ैनी पाप न भोए कियोरोए, तैए पेइलो घोडे बाए।” 8 ते फिरी उन्डे लिक्तां एंगलोई सेई ज़मीनी पुइ लिखने लव। 9 पन तैना एना शुन्तां बड्डन करां निकडन तगर सारे एक्की पत्ती अक तैट्टां च़ले जे, ते यीशु अकैल्लो राव, ते तै कुआन्श मझाटे खडी राई। 10 यीशुए उबरे तेक्तां तैस पुछ्छ, “हे कुआन्श, तैना कोरां जे? कुन केन्चे तीं पुइ सज़ारो हुक्म न दित्तो?” 11 तैसां ज़ोवं, “हे प्रभु केन्चे नई।” यीशुए ज़ोवं, “अवं भी तीं सज़ारो हुक्म न देई। अपने घरे जो गा ते फिरी पत्ती पापेरी न ज़िन्दगी ज़ीयां।” 12 यीशुए फिरी लोकन सेई ज़ोवं, “दुनियारी लौ अव्वे आई, ज़ै मीं पत्ती एज्जेलो त तै आंधरे मां न च़लेलो, पन तै लौ हासिल केरेलो ज़ै ज़िन्दगरी देचे।” 13 फरीसी लोकेई तैस सेई ज़ोवं, “तू अपनि गवाही एप्पू देतस, तेरी गवाही सच्ची नई।” 14 यीशुए तैन जुवाब दित्तो, “भला अवं अपनि गवाही एप्पू देताई फिरी भी मेरी गवाही सच्चीए, किजोकि अवं ज़ानताई कि अवं कोट्टां ओरोई ते कोरां गाताई? पन तुस न ज़ानाथ कि अवं कोट्टां ओरोई ते कोरां गाताई। 15 तुस इन्सानेरी सोचरे मुताबिक इन्साफ केरतथ, अवं केन्चेरी इन्साफ न केरि। 16 ते अगर अवं इन्साफ केरि भी त मेरो इन्साफ सच्चीए, किजोकि अवं अकैल्लो नई, पन अवं ते मेरो बाजीए, ज़ैनी अवं भेजोरोई। 17 मूसेरे कानूने मां भी लिखोरोए कि दूई ज़नां केरि गवाही मिलतां सच्ची भोतीए। 18 अक त अवं अपनि गवाही देताई, ते दुइयोवं गवाही मेरो बाजी देते ज़ैनी अवं भेजोरोई।” 19 तैनेई तैस पुछ्छ, “तेरो बाजी कोडि आए?” यीशुए जुवाब दित्तो, “न तुस मीं ज़ानतथ न मेरे बाजी, अगर मीं ज़ानते त मेरे बाजी भी ज़ानते।” 20 एना गल्लां तैनी मन्दरेरे अंगने मां शिक्षा देते भण्डार घरे मां ज़ोई, ते केन्चे तै न ट्लाव, किजोकि तैसेरो वक्त हेजू न थियो ओरो। 21 यीशुए फिरी तैन सेई ज़ोवं, “अवं ज़ानताई कि तुस मीं तोप्लेले ते पाप केरते-केरते मरेले, ज़ैडी अवं गाताई तैडी तुस न एज्जी बटथा।” 22 एस पुइ यहूदी लीडरेई ज़ोवं, “कुन एने अपनो आप मारनोए, ज़ैन ज़ोते कि ज़ैडी अवं गाताई तैडी तुस न एज्जी बटतथ?” 23 यीशुए तैन सेई ज़ोवं, “तुस इस दुनियाई मां ज़मारेथ, अवं स्वर्गां ओरोई। तुस दुनियारेथ, अवं दुनियारो नई। 24 एल्लेरेलेइ मीं तुसन सेई ज़ोरू थियूं, कि तुस अपने पापन मां मरेले, किजोकि अगर तुस विश्वास न केरेले कि अवं तैए आई त अपने पापन मां मरेले।” 25 यहूदी लीडरेई तैस सेई ज़ोवं, “तू कौन आस?” यीशुए तैन सेई ज़ोवं, “ज़ैन शुरू करां ज़ोतो ओरोई, अवं तैए आई। 26 तुश्शे बारे मां मीं बडू किछ ज़ोनुए ते फैसलो केरनोए, पन मेरो भेजने बालो सच्चीए, ते ज़ैन मीं तैस करां शुनोरूए तैन दुनियारे लोकन सेई ज़ोताई।” 27 तैनेई एन न समझू कि असन सेई बाजी केरे बारे मां कुन ज़ोने लोरोए। 28 तैखन यीशुए ज़ोवं, “ज़ैखन तुस मैनेरे मठे यानी

मीं उच्चे पुड़ ज़ाढेले, त ज़ानेले कि अवं तैए आई, अवं अपने आपे सेइं किछ न केरि, ज़ेन्चरे मेरो बाजी मीं शिखालते तेन्चरे तैना गल्लां केरताई। 29 मेरो भेजने बालो मीं साथीए, तैनी अवं अकेल्लो नई शारोरो किजोकि अवं हमेशा तैन कम केरताई ज़ैस सेइं तै खुश भोते।” 30 बड़े लोकेई यीशुएरी तैना गल्लां शुन्ते वक्त ज़ैना तै ज़ोई राओरो थियो तैस पुड़ विश्वास कियो। 31 तैखन यीशुए तैन यहूदन सेइं ज़ैनेई तैस पुड़ विश्वास कियोरो थियो ज़ोवं, “अगर तुस मेरे वचने मां बनेरे राले, त सच्चे मेरे चले भोले। 32 तुस सत्र ज़ानेले ते सत्र तुसन आज़ाद केरेलू।” 33 तैनेई तैस जुवाब दित्तो, “अस त अब्राहमेरे औलादी मरां आम, ते कधी केन्चरे गुलाम नई भोरे, फिरी तू केन्चरे ज़ोतस कि तुस आज़ाद भोले?” 34 यीशुए तैन जुवाब दित्तो, “अवं तुसन सेइं सत्र-सत्र ज़ोताई कि ज़ै कोई पाप केरते ते पापेरो गुलामे। 35 गुलाम हमेशा घरे न रेइ सके, मटू हमेशा रहते। (aiōn g165) 36 एल्हेरेलेइ अगर मटू तुसन आज़ाद केरे त सच्चे तुस आज़ाद भोले। 37 अवं ज़ानताई कि तुसा अब्राहमेरे औलादी मरां आथ, फिरी भी मेरी शिक्षा तुस मन्थ, एल्हेरेलेइ तुस मीं मारने चातथ। 38 अवं तेन्ने ज़ोताई ज़ैन मीं लव, ज़ैखन अवं अपने बाजी सेइं साथी थियो, ते तुस तेन्ने केरतथ ज़ैन तुसेईं अपने बाजी केरां शुनोरू।” 39 तैनेई तैस जुवाब दित्तो, “इश्शो पूर्वज त अब्राहमे।” यीशुए तैन सेइं ज़ोवं, “अगर तुस अब्राहमेरे औलादी मरां भोथे त अब्राहमेरां ज़ेरां कम्मां केरेथ। 40 पन हुन्ना तुस मीं मारनो चातथ, किजोकि मीं तुसन तैना सच्ची गल्लां ज़ोई ज़ैना मीं परमेशरे करां शुनी, एरू त अब्राहमे न थियू कियोरू। 41 तुस अपने बाजेरां ज़ेरां कम्मां केरतथ।” तैनेई तैस सेइं ज़ोवं, “अस बदमेशी सेइं नई ज़मरे, इश्शो अक्के बाजीए, ते ते परमेशरे।” 42 यीशुए तैन सेइं ज़ोवं, “अगर परमेशर तुश्शो बाजी भोथो, त तुस मीं सेइं प्यार केरेथ, किजोकि अवं परमेशरेरे करां ओरोई, अवं अपने तरफां नई ओरो, बल्के तैनी भेजोरोई। 43 तुस मेरी गल्लां किजो न समझथ? एल्हेरेलेइ कि तुस मेरी शिक्षा मन्नी न चाथ। 44 तुस अपने बाजी शैतानेरेथ, ते तैसेरी मर्ज़ा पूरी केरनि चातथ। ते त शुरु करां खूनी आए ते सच्चे पुड़ बनोरो न राव, किजोकि सत्र तैस मां अथ्थी नई। ज़ैखन ते झूठ ज़ोते त अपने सुभावेरे मुताबिक ज़ोते, किजोकि ते झूठो बल्के झूठेरो बाजीए। 45 पन अवं सत्र ज़ोताई तांए तुस मेरो विश्वास न केरथ। 46 तुसन मां मीं कौन पापेरो दोष लाते? अगर अवं सत्र ज़ोताई त फिरी मेरो विश्वास की न केरथ? 47 ज़ै परमेशरेरे तरफां भोते ते परमेशरेरी गल्लां केरते, ते तुस एल्हेरेलेइ न शुनथ किजोकि तुस परमेशरेरे तरफां नई।” 48 एना शुन्तां यहूदेई तैस सेइं ज़ोवं, “कुन अस ठीक न थिये ज़ोते, कि तू सामरी मैन्हु आस, ते तीं मां भूते!” 49 यीशुए जुवाब दित्तो, “मीं मां भूत नई, पन अवं अपने बाजेरी इज़्जत केरताई, ते तुस मेरी निरादर केरतथ। 50 पन अवं अपनि बड़याई न चैई, हाँ अक्के ज़ै चाते कि लोक मेरी बड़याई केरन, ते ते आदालत केरनेबालो भी आए। 51 अवं तुसन सेइं सत्र-सत्र ज़ोताई कि ज़ै कोई मैन्हु मेरे वचने पुड़ चले ते कथे न मरेलो।” (aiōn g165) 52 यहूदेई तैस सेइं ज़ोवं, “हुनी त असेई बुझू, कि तीं मां भूते,

अब्राहम ते नबी भी मरे, ते तू ज़ोतस, अगर कोई मेरे वचने पुड़ चले त ते कधी न मरेलो। (aiōn g165) 53 इश्शो पूर्वज अब्राहम मरो, कुन तू तैस करां भी बड़ो आस? ते नबी भी मरे, तू अपने बारे मां कुन सोचतस कि तू कौन आस?” 54 यीशुए जुवाब दित्तो, “अगर अवं अपनि बड़याई केरि त मेरी बड़याई किछ भी नई। पन मेरी बड़याई केरनेबालो मेरो बाजीए, ज़ैस तुस ज़ोतथ कि ते तुश्शो परमेशरे। 55 तुसेईं त ते न ज़ानो, पन अवं तैस ज़ानताई, अगर अवं ज़ोई कि तैस न ज़ैनी, त तुश्शो ज़ेरो झूठो भोइ। पन अवं तैस ज़ानताई ते तैसेरे वचने पुड़ चलताई। 56 तुश्शो पूर्वज अब्राहम मेरी दिहाड़ी हेरनेरे उमीदी पुड़ बड़ी खुश थियो, ते तैनी हेरी, ते खुश भोव।” 57 यहूदेई तेस्से सेइं ज़ोवं, “हेजू तू 50 साला केरो भी नई भोरो फिरी भी तीं अब्राहम लोरोए?” 58 यीशुए तैन सेइं ज़ोवं, “अवं तुसन सेइं सत्र-सत्र ज़ोताई कि अब्राहम पैदा भोने करां पेड़लो, अवं आई।” 59 तैखन तैनेई तैस मारनेरे लेइ घोड़ सल्ले, पन यीशु छेपतां मन्दरे मरां निस्सी जेव।

9 फिरी यीशुए अपने चलन सेइं साथी च़ल्लोरो थियो, ते तैनेई अक मैन्हु लाव, ज़ै ज़र्मनेरो कानो थियो। 2 तैसेरे चेलेई तैस पुच्छू, “हे गुरु, केने पाप कियो कि ए कानो ज़रमो, एने मैने या एसेरे अम्मा बाजे?” 3 यीशुए जुवाब दित्तो, “न एने पाप कियो, न एसेरे अम्मा-बाजेई, पन ते एल्हेरेलेइ कानो ज़रमो ताके परमेशरेरे चमत्कार एसमां लेईहोन। 4 ज़ैने अवं भेजोरोई, असेई तैसेरू कम लूशी केरनू ज़रूरीए, ज़ैन कम तैनी असन दित्तोरूए, ते रात एजने बालीए ज़ैस मां कोई भी कम न केरि सके। 5 ज़ांतगर अवं दुनियाई मां आई, अवं दुनियारी लौ आई।” 6 एन ज़ोइतां तैनी ज़मीनी पुड़ थुकू, ते तैस थुके सेइं मित्ती सन्नी, ते ते मित्ती कानेरे एछ्छन पुड़ लाई। 7 ते तैस सेइं ज़ोवं, “गा शीलोह नंब्बेरे हावदे मां अपनू तुत्तर धो” (शीलोहेरे मतलब भेजरो) तैनी गेइतां धोवं, ते लांतो वापस अव। 8 तैखन तैस मैनेरे पड़ोसेई त ज़ैनेई ते भीख मगतो लावरो थियो, एक्की होरि सेइं ज़ोने लगगे, “कुन ई तैए मैन्हु नई ज़ै पेड़लो बिश्तां भीख मगतो थियो?” 9 किछ मैन्हु ज़ोने लाए, “ई तैए,” हारेई ज़ोवं, “नई तैसेरो ज़ेरो कोई होरो भोनोए,” तैनी ज़ोवं, “अवं तैए आई।” 10 तैखन तैना तैस पुच्छने लगगे, “तेरी एछ्छन केन्चरां लौ आई?” 11 तैनी जुवाब दित्तो, “यीशु नंब्बेरे एक्की मैने मित्ती सन्नी, ते मेरी एछ्छन पुड़ लेइतां मीं सेइं ज़ोवं, गा शीलोह हावदे मां गेइतां अपनू तुत्तर धो, ते अवं जेव ते मीं तुत्तर धोवं, ते लांने लाव।” 12 तैनेई तैस पुच्छू, “तै मैन्हु कोइ आए?” तैनी ज़ोवं, “मीं नई पतो।” 13 लोकेई ते ज़ै पेड़लो कानो थियो फरीसी लोकन कां नेव। 14 ज़ैस दिहाड़े यीशुए मित्ती सेनतां तैसेरी एछ्छी लौ दित्तो थी, ते आरामेरी दिहाड़ी थी। 15 फिरी फरीसी लोकेई भी तैस पुच्छू, “तैसेरी एछ्छन लौ केन्चरे आई?” तैनी तैन सेइं ज़ोवं, “तैनी मेरी एछ्छन पुड़ मित्ती लाई, फिरी मीं तुत्तर धोवं, ते अवं हुनी लाताई।” 16 एस पुड़ किछ फरीसी लोक ज़ोने लगगे, “ए मैन्हु परमेशरेरे तरफां नई, किजोकि ए आरामेरी दिहाड़ी न मन्ने।” हारेई ज़ोवं, “एरो ज़ेरो पापी मैन्हु एरे चमत्कार केन्चरे हिरैई बटते?” ते

तैन एप्पू मांमेइं अनबन भोइ। 17 तैनेईं काने फिरी पुच्छू, “जैने तेरी एछ्छी खोलोरेन, तू तैसेरे बारे मां कुन ज़ोतस?” तैनी ज़ोवं, “तै नबी आए।” 18 पन यहूदी लीडरन विश्वास न भोव, कि तै कानो थियो ते हुनी लाते, ज़ांतगर तैनेईं, तैसेरे अम्मा-बाजी न कुजाए। 19 तैन पुच्छू, कुन एन तुश्शू मट्टूए, “जैस तुस ज़ोतथ कि कानो ज़मोरू थियू? फिरी हुना केन्चरं लाते?” 20 तैसेरे अम्मा बाजीए जुवाब दित्तो, “असां त ज़ानतम कि एन इश्शू मट्टूए, ते कानो ज़मोरू थियू। 21 पन अस इन न ज़ानतम कि अज़ केन्चरे लाते, ते न इन ज़ानतम कि केने एसेरी एछ्छन लौ दित्ती, एन हुनी बड्डूए एस पुछ्छा, ए अपने बारे मां एप्पू ज़ोलो।” 22 एना गल्लां तैसेरे अम्मा बाजे एल्हेरेलेइ ज़ोई तैना यहूदी लीडरन करां डरते थिये, किजोकि यहूदी लीडर सारे अक भोरे थी, कि अगर कोई जोए, कि ए मसीहे त तै प्रार्थना घरे मरां कड्डो गाए। 23 एल्हेरेलेइ तैसेरे अम्मा बाजे ज़ोवं, “एन बड्डूए, एस्से पुछ्छा।” 24 तैखन तैस मैन्हु ज़ै कानो थियो, दुइयोवं बार कुजेइतां ज़ोवं, “सच ज़ोइतां परमेशेरी बड्डयाईं केर, अस ज़ानतम तै मैन्हु पापीए।” 25 तैनी जुवाब दित्तो, “अवं न ज़ैनी कि ए पापी कि नईं, अवं अक गल ज़ानताईं, कि अवं कानो थियो हुनी लाताईं।” 26 तैनेईं तैस पुच्छू, “तैने तीं सेइं कुन कियू? तैनी केन्चरे तेरी एछ्छन लौ दित्ती?” 27 तैनी तैन सेइं ज़ोवं, “मीं त तुसन सेइं ज़ोवरूए, ते तुसेईं न शुन्, हुनी दुइयोवं बार किजो शुन् चातथ? कुन तुस भी तैसेरे चले बन्ने चातथ?” 28 तैखन तैना तैस बरू भलू ज़ोने लाए, “तूए तैसेरो चेलोस, अस त मूसेरे चलेम।” 29 अस ज़ानतम परमेशेरे मूसा सेइं गल्लां की, पन एस न ज़ानतम कि ए कोट्ठां ओरोए। 30 तैनी तैन जुवाब दित्तो, “ए त बडी बड्डी गल्ले कि तुस न ज़ानाथ कि ए कोट्ठां ओरोए, फिरी भी तैनी मेरी एछ्छन लौ दित्ती। 31 अस ज़ानतम की परमेशर पापी केरि न शुने, पन कोई परमेशेरो भक्त भोए त तैसेरे मेज़ीं पुड़ चलतो भोए, त परमेशर ते तैसेरी शुनते। 32 दुनिया रचनेरे वक्ते करां कथे शुन्ने मां नईं ओरोए कि केन्चे ज़र्मनेरे कानेरी एछ्छन लौ दित्तोरी, (aiōn g165) 33 अगर ए मैन्हु परमेशेरे तरफां न भोथो त किछ न केरि सकेथो।” 34 तैनेईं तैस ज़ोवं, “तू त बिलकुल पापन मां ज़मोरोस, तू असन शिखालतस?” ते तैनेईं तै प्रार्थना घरे मरां बेइरोवं कड्डो। 35 यीशुए शुन् कि तै बेइरोवं कड्डोरोए, ते ज़ैखन तैसेरी तैस सेइं मुलाकात भोइ, त तैस सेइं ज़ोवं, “कुन तू मैनेरे मट्टे पुड़ विश्वास केरतस?” 36 तैनी तैस जुवाब दित्तो, “हे प्रभु, मीं सेइं ज़ो कि तै कौने, ताके अवं तैस पुड़ विश्वास केरि?” 37 यीशुए तैस सेइं ज़ोवं, “अव्वं आईं, तीं अवं पेइलो लोरोईं, ज़ै तीं सेइं गल्लां केरि राओरोए।” 38 तैनी ज़ोवं, “हे प्रभु, अवं तीं पुड़ विश्वास केरताईं।” ते तैस कां मथ्यो टेको। 39 तैखन यीशुए ज़ोवं, “अवं इस दुनियाईं मां इन्साफ केरने ओरोईं, ज़ैना न लान तैना लान, ते ज़ैना लातन तैना काने भोन।” 40 ज़ैना फरीसी लोक तैस सेइं साथी थिये तैनेईं ज़ोवं, “कुन तू असन जो भी काने ज़ोतस?” 41 यीशुए तैन सेइं ज़ोवं, “अगर तुस काने भोथे त पापी न भोथे, पन हुनी ज़ोतथ कि अस लातम, एल्हेरेलेइ तुश्शे पाप माफ़ न भोले।”

10 “अवं तुसन सेइं सच-सच ज़ोताईं, कि ज़ै कोई दारेरे बत्तां बाडे मां न गाए, पन होरि बत्तां गाते, ते चोर ते डैकूए। 2 पन भैड्ठां केरो पुहाल दारेरे बत्तां गाते। 3 तैसेरेलेइ दरबान दार खोलते, ते भैड्ठां तैसेरी गल पिशैनतिन, ते ते अपनि भैड्डन नंवे सेइं कुजाते ते बेइर नेते। 4 ते ज़ैखन तै अपनि सैरी भैड्ठां बेइर कढते, त तैन केरे अग्री-अग्री चलते, ते भैड्ठां तैस पत्ती-पत्ती गैतिन, किजोकि तैना तैसेरी आवाज़ पिशैनचन। 5 तैना बखले पत्ती न गैली, पन तैस करां नशशेली, किजोकि तैना बखलेरी आवाज़ न पिशानन।” 6 यीशुए तैन सेइं मिसाल देइतां ज़ोवं, पन तैनेईं न समझू कि एसेरी गल्लां केरो कुन मतलबे, ज़ैना तै असन सेइं ज़ोते। 7 तैखन यीशुए तैन सेइं फिरी ज़ोवं, “अवं तुसन सेइं सच-सच ज़ोताईं, भैड्ठां केरू दार अव्वं आईं। 8 ज़ेत्रे मीं करां पेइले आए सब चोर ते डैकून, पन मेरी भैड्डईं तैन केरि न शुनी। 9 दार अवं आईं, अगर कोई मेरे ज़िरिये अन्तर गालो, त परमेशर तैस मुक्ति देलो, ते तै अन्तर बेइर एइतो गालो ते खूराक पालो। 10 चोर होरि कोन्ची कम्मरे लेइ न एज्जे, बल्के चोरी केरने ते मारने ते नाश केरने एइते, अवं एल्हेरेलेइ ओरोईं कि तैन भरपूर ज़िन्दगी जीन। 11 रोडो पुहाल अव्वं आईं, रोडो पुहाल भैड्ठां केरे लेइ अपनि जान देते। 12 ज़ैखन नौकर गिद एंटू लाते त तै भैड्ठां शैरतां नेशी गालो। किजोकि ते तैन केरो न पुहाले न मालिके, ते गिद तैन पुड़ हमलो केरतां तितर-बितर केरते। 13 तै एल्हेरेलेइ नशते कि तै नौकर आए, ते तैस भैड्ठां केरि फिक्र नईं। 14 रोडो पुहाल अवं आईं, अवं अपनि भैड्ठां पिशानताईं, ते मेरी भैड्ठां मीं पिशैनचन। 15 ज़ेन्चरे बाजी मीं ज़ानाते, तेन्चरे अवं भी तैस ज़ानताईं, ते अवं भैड्ठां केरे लेइ अपनि जान देताईं। 16 ते मेरी होरि भी भैड्डन, ज़ैना इस बाडे मां नईं, मीं तैना भी ऐनिन ज़रूरिन, तैना मेरी आवाज़ पिशैनेली, फिरी अक्के डेरो ते अक्के पुहाल भोनोए। 17 अवं अपनि जान देताईं, एल्हेरेलेइ बाजी मीं सेइं प्यार केरते, कि अवं फिरी ज़ींतो भोईं। 18 कोई मेरी ज़िन्दगी मीं करां न थसोडे, बल्के अवं एप्पू देताईं, मीं तैस देनेरू भी अधिकारे ते नेनेरो भी अधिकारे, ई हुकम मीं मेरे बाजी करां मैलोरोए।” 19 एल्लां पत्ती, यहूदन मां फिरी अनबन भोइ। 20 तैन मरां बडे ज़ोने लाए, “तैस मां भूते, ते तै पागले, तैसेरी किजो शुनातथ?” 21 होरे लोकेईं ज़ोवं, “एना गल्लां एरे मैनेरी नईं ज़ैस मां भूत भोए, कुन भूत कांना केरि एछ्छी खोल्ली बटते?” 22 यरूशलम नगरे मां तिहार भोवं, ते हीवतडेरो मौसम थियो। 23 यीशु सुलैमानेरे मन्दरेरे अंगने मां हठने फिस्ने लगगोरो थियो। 24 तैखन यहूदेईं तै घेरो ते पुच्छू, “तू केइस तगर इश्शे दिले डामाडोल केरतस? असन सेइं साफ-साफ ज़ो। कुन तू मसीह आस?” 25 यीशुए तैन जुवाब दित्तो, “मीं तुसन सेइं ज़ोवं पन तुस विश्वास न केरथ। ज़ैना कम्मां अवं अपने बाजी केरे अधिकारे सेइं केरताईं तैना मेरे गवाह आन। 26 पन तुस एल्हेरेलेइ विश्वास न केरथ कि मेरी भैड्डन मरां नईं। 27 मेरी भैड्ठां मेरी आवाज़ पिशैनचन, अवं तैन ज़ानताईं, ते तैना मीं पत्ती-पत्ती चेलचन। 28 ते अवं तैन हमेशारी ज़िन्दगी देताईं, तैना कधी नाश न भोले, ते कोई तैन मेरे हथ्ये मरां न थसोड़ी सके। (aiōn g165, aiōnios

g166) 29 मेरो बाजी, जैनी तैना मीं दितोरिन, सेबन करं महान आए, ते कोई तैन बाजी केरे हथ्ये मरां न नेइ बटे। 30 अवं त बाजी अक्के आम।” 31 दुबारां फिरी, यहूदेई तैस घोडेव देनेरे लेइ फिरी घोड़ सल्ले। 32 एस पुड़ यीशुए तैन सेइं ज़ोवं, “मीं अपने बाजी केरे तरफां बड़ां रोड़ां कम्मां हिरां, तैन मरां कोस कम्मरे लेइ घोड़ेव देतथ?” 33 यहूदेई तैस जुवाब दित्तो, “रोड़ां कम्मां केरे लेइ अस तीं पुड़ घोड़ेव नई केरने लेवरे, पन परमेशरेरी तुहीन केरनेरे लेइ, एल्हेरेलेइ कि मैन्हु भोइतां अपनो आप परमेशर बनातस।” 34 यीशुए तैन जुवाब दित्तो, “मूसरे कानूने मां एन लिखोरू कि परमेशरे अपने लोकां केरे लीडरन सेइं ज़ोवं कि तैना ईश्वरन। 35 (तुसन पत्तोए पवित्रशास्त्रेरी गल कोई भी बेदली न बटे) अगर परमेशरे तैन लोकन जो ईश्वर ज़ोवं ज़ैन कां परमेशेरू वचन पुज्जू, 36 फिरी तुस किजो ज़ोतथ कि तू तुहीन केरतस, ज़ैखन अवं ज़ोताई कि अवं परमेशेरू मट्टू आई? बाजी परमेशरे अवं पवित्र ठहरेइतां दुनियाई मां भेजो। 37 अगर अवं अपने बाजेरू कम न केरि, त मेरो विश्वास न केरा। 38 पन अगर अवं अपने बाजेरू कम केरताई, त चाए तुस मेरो विश्वास न भी केरा, पन तैन कम्मन पुड़ विश्वास केरा। तैखन तुस बुज्जोले ते समझेले कि बाजी मीं मां आए, ते अवं बाजी मां आई। 39 तैनेई फिरी तैस ट्लानेरी कोशिश की, पन तै तैन करं चलो जेव।” 40 फिरी यीशु यरदन दरियारे पार तैस ठैरी जेव, ज़ैड़ी यूहन्ना पेइले बपतिस्मो देतो थियो, ते तैड़ी राव। 41 बड़े लोक तैस कां एइतां ज़ोते थिये, “यूहन्ना त कोई चमत्कारी निशान न हिराव, पन ज़ैन किछ यूहन्ना एसरे बारे मां ज़ोवं, तैन सब सच थियूं।” 42 ते तैड़ी बड़ेई यीशु पुड़ विश्वास कियो।

11 मरियम ते तैसेरी बेइन माथरि डलव्वें बैतनिय्याह मां लाज़र नव्वेरो अक मैन्हु थियो 2 ई तैए मरियम थी ज़ैसां बादे मां प्रभु पुड़ इत्र छेइतां अपने बालन सेइं तैसेरे पाव पूंछेरे थी, एसेरो दूला लाज़र बिमार थियो। 3 तैखन तैसेरी बेइने यीशु कां अक बिस्तार भेजो, “हे प्रभु, ज़ैस सेइं तू प्यार केरतस ते बिमारे।” 4 ज़ैखन यीशुए एन शूनू त ज़ोवं, “ए बिमारी मरनेरे लेइ नई बल्के परमेशरेरी महिमारे लेइ आए, ताके तैसेरे ज़िरिये परमेशरेरे मट्टेरी महिमा भोए।” 5 यीशु मार्था ते तैसेरी बेइन मरियम ते लाज़रे सेइं प्यार केरतो थियूं। 6 ज़ैखन यीशुए शूनू कि, लाज़र बिमारे, पन फिर भी दूई दिहाड़े तैड़ी बिशो ज़ैड़ी ते थियो। 7 दूई दिहेइना बाद यीशुए अपने चलन सेइं ज़ोवं, “एज्जा, अस फिरी यहूदिया इलाके मां गाम।” 8 चले ज़ोने लगे, “हे गुरु, थोड़े चिरि पेइले यहूदी लीडर तीं घोड़ेई बाते थिये, ते तू फिरी तैड़ी गानू चातस?” 9 यीशुए जुवाब दित्तो, “कुन दिहेइदी मां 12 घंटे न भोन? ज़ै दीसां चलते तैस ठोकर न लगे, एल्हेरेलेइ कि ते दुनियारी लोई मां चेलि सकते। 10 पन अगर ते राती चलते त आंधरे मां तैस ठोकर लगवे, किजोकि तैस कां लौ नई।” 11 तैनी एना गल्लां ज़ोई, ते अपने चलन सेइं ज़ोने लगे, “इशशो दोस्त लाज़र झुलोरोए पन अवं तैस बीइजाने चलोरोई।” 12 तैसेरे चले ज़ोने लगे, “हे प्रभु अगर तै झुलोरोए त तै बीइजोली।” 13 यीशुए लाज़रेरे मरनेरे बारे मां ज़ोरू थियूं, पन तैसेरे चलेई बुज्जु कि तैसेरो मतलब

निइलारे बारे मां झुलोरोए, पन अवं तैस बीइजाने चलोरोई। 14 तैखन यीशुए रोड़ेचारे ज़ोवं, “लाज़र मेरि जेवरोए। 15 अवं खुश आई कि तुशो लेइ फेइदोए, कि अवं तैड़ी न थियो ज़ैस सेइं विश्वास केरथ। हुनी एज्जा अस तैड़ी गाम।” 16 तैखन थोमा ज़ैस जो दिदुमुस ज़ोतन, होरि चलन सेइं ज़ोने लगे, “एज्जा, अस भी तैस सेइं साथी मरनेरे लेइ गाम।” 17 ज़ैखन यीशुए बैतनिय्याह डलव्वें मां पुज्जो त तैस पतो लगे, कि लाज़र दब्बारे चेत्रे दिहाड़े भोरेन 18 बैतनिय्याह यरूशलेम नगरेरां कोई ट्लोई किलोमीटर दूर थियूं। 19 बड़े यहूदी लोक मार्था ते मरियमी कां तैन केरे दूला लाज़रेरे मरनेरां पत्ती तैना तसल्ली देने ओरे थिये। 20 ज़ैखन मार्था शूनू कि यीशु ओरोए तै तैस सेइं मिलनेरे लेइ बेइर निस्सी, पन मरियम बेइर न निस्सी। 21 मार्था यीशुए सेइं ज़ोने लगी, “हे प्रभु, अगर तू इड़ी भोथो त मेरो दूला न थियो मरनो। 22 पन अवं ज़ानती, हुनी ज़ैन किछ तू परमेशरे करं मगेलो, ते परमेशर तीं देलो।” 23 यीशुए तैस ज़ोवं, “तेरो दूला ज़ींतो भोइ गानोए।” 24 मार्था तैस सेइं ज़ोवं, “अवं ज़ानती तै आदालतरे दिहाड़े ज़ेइस सारे लोक ज़ींते भोनेन, तेइस तै भी ज़ींतो भोइ गानोए।” 25 यीशुए तैस ज़ोवं, “मैनन् मुइदन मरां ज़ींते केरनेबालो अव्वें आई। ज़ै मां पुड़ विश्वास केरते तै मरनेरां बाद भी ज़ींतो रालो। 26 ते ज़ै कोई ज़ींतोए, ते मीं पुड़ विश्वास केरते, तै कथे न मरेलो, कुन तू इस पुड़ विश्वास केरचस?” (alon g165) 27 मार्था जुवाब दित्तो, “हाँ प्रभु, मेरो विश्वास तीं पुड़े, कि तू परमेशेरू मट्टू मसीह ज़ैन दुनियाई मां एजनेबालू थियूं।” 28 ज़ैखन तैसां ए गल ज़ोई त तै वापस चली जेई, ते अपनि बेइन मरियम कनारे कुजेइतां ज़ोने लगी, “गुरु जी ओरेन ते तीं कुजाने लगेरेन।” 29 ते एन शन्तां लूशी उदुतां यीशु सेइं मिलने चली आई। 30 यीशु हेजु डलव्वें मां न थियो पुजोरो, पन ते तैड़ी थियो ज़ैड़ी मार्था तैस सेइं मिलोरी थी। 31 तैखन तैना यहूदी लोक ज़ैना मरियमी तस्सली देने ओरे थिये मरियम लूशी खड़ी उदुतां बेइर जेई, त तैना भी तैस पत्ती बेइर जे, कि भोइ सकते ए लेरां देने कब्री पुड़ चलोरोए। 32 ज़ैखन मरियम तैस ठारी पुज्जी ज़ैड़ी यीशु थियो त तैस लेइतां ते तैसेरे पवन पुड़ बिछड़ी जेई ते ज़ोने लगी, “हे प्रभु अगर तू इड़ी भोथो त मेरो दूला न थियो मरनो।” 33 ज़ैखन यीशुए तै ते तैस सेइं साथी एजनेबाले यहूदी लोक लेरां देते लाए, तै आत्माई मां उदास भोइतां बड़ो दुःखी भोव। 34 ते पुच्छू, “तुसेई लाज़र कोइ रख्खोरोए?” तैना ज़ोने लगे, “हे प्रभु, असन सेइं साथी एइते एप्पू हेर।” 35 यीशु लेरां देने लगे। 36 तैखन यहूदी लोक ज़ोने लगे, “हेरा, ए लाज़रे सेइं केजो प्यार केरतो थियो।” 37 पन तैन मरां किछ ज़ोने लगे, “कुन ज़ैनी कानेरी एछ्छन लौ दित्ती, इन भी न केरि बट्टू, कि ए मैन्हु न मरेथो?” 38 यीशु दुखी दिले सेइं कब्री कां अवं, तै अक कुइ थी, ज़ैस पुड़ अक घोड़ छडोरो थियो। 39 यीशु ज़ोने लगे, “घोड़ खडो केरा।” मार्था ज़ै लाज़री बेइन थी तै ज़ोने लगी, “हे प्रभु एस मरां त मुशक लोरीए एजने, किजोकि एस चेत्रे दिहाड़े मरे भोरेन।” 40 यीशुए तैस सेइं ज़ोवं, किजोकि, “मीं तुसन न थियूं ज़ोरू कि अगर तेरो विश्वास भोलो, त तू परमेशरेरी महिमा हेरेली।” 41 तैखन तैनेई

तै घोड़ घिसाव, ते यीशुए उबरे तेकतां ज़ोने लगे, “हे बाजी, अवं तेरू शुक्र केरतां कि तीं मेरी शुनी। 42 अवं ज्ञानतो थियो, कि तू मेरी प्रार्थना शुन्तस पन अवं एन लोकां केरे लेइ ज़ैना चेत्रे पासन खेड़ोरेन एन ज़ोरू थियूं कि एना भी विश्वास केरन, कि तीं अवं भेजोरोई।” 43 एन ज़ोनेरां पत्ती यीशुए ज़ोरे सेइं ज़ोवं, “लाज़र बेडर निस!” 44 ते तै मुओरो लाज़र बेडर निससो ज़ेसेरे हथ पाव कफने सेइं बंधोरे थिये ते दोगे अक कपडो बंधोरे थियो। यीशुए तैन सेइं ज़ोवं, “एस खोल्ला ते एस गाने देथ।” 45 बड़े यहूदी लोक ज़ैना मरियम सेइं मिलने ओरे थिये। ते तैसेरां इन्ना कम्मां हेरतां तैस पुड़ विश्वास कियो। 46 पन तैन मरां किछेईं फरीसन कां गेइतां सब शुनावं ज़ैना यीशुए कियेरू थियूं। 47 एस पुड़ प्रधान याजकन ते फरीसी लोक महासभारे लोक अकोट्टे किये ते ज़ोने लगे, “अस कुन केरम? ए मैन्हु त इड़ी बड़े चमत्कार लोरोए केरने। 48 अगर अस एस हुन्ना न रोकमेले त सारे लोक तैस पुड़ विश्वास केरेले, कि ए मसीह आए, ते फिरी रोमेइं इड़ी एइतां इश्शे मन्दरे ते इश्शी कौमी दुइने नाश केरेले।” 49 तैखन तैन केरे टोली मरां अक ज़ेसेरू नवं कैफा थियूं, ज़ै तैस साल मन्दरेरो महायाजक थियो ज़ोने लगे, “तुस लोक किछ न ज़ानाथ, 50 तुसन इन न समझथ कि, तुश्शे लेइ रोडूए, इश्शे लोकां केरे लेइ अक मैन्हु मरे, न कि इश्शे सारे लोक।” 51 ए गल तैनी अपने आपे सेइं न थी ज़ोरी, पन तैस साल महायाजक भोइतां भविष्यद्वाणी, कि यीशु इसएलेरे सारे लोकां केरे लेइ अपनि जान देलो। 52 तै सिर्फ इसएलेरे लोकां केरे लेइ नई, पन एल्हेरेलेइ भी कि ज़ैना परमेशरे बच्चे तितर-बितर भोरेन तैन अकोट्टे केरतां अक बनाए। 53 बस्सा, यहूदी लीडरेईं तैस दिहाड़े बाद यीशु मारोरो इरादो कियो। 54 एल्हेरेलेइ यीशुए तैस वक्ते करां यहूदन मां बांदे मां न फिरो, पन जंगलेरे नेड़े एप्रैम नगरे मां जेव, ते अपने चलन सेइं साथी तैड़ी राने लगे। 55 तेइस यहूदी केरू फ़सह तिहार नेड़े अव, ते बड़े लोक आसेपासरे इलाकन मरां यरूशलेम नगरे मांजो चले जे, ताके अपनो आप शुद्ध केरन। 56 तैना यीशु तोपते थिये तेइस तैना मन्दरे मां अकोट्टे भोए, ते एक्की होरि सेइं ज़ोने लगे, “तुस कुन समझतथ? कोई पत्तोए कुन तै इड़ी फ़सह तिहारे मां एज्जेलो कि नई?” 57 ते प्रधान याजकेईं ते फरीसी लोकेईं हुकम दित्तोरो थियो कि अगर केन्ची पतो लगे कि यीशु कोइं आए त ज़ोथ दे ताके असां तैस गिरफ्तार केरम।

12 फ़सह तिहारे करां शा दिहाड़े पेइले यीशु बैतनिय्याह इलव्वं मांजो चलो अव, ज़ैड़ी लाज़र रातो थियो, ज़ै यीशुए मुइदन मरां जीतो कियोरो थियो। 2 तैड़ी तैनेईं यीशुएरी खातरदारी केरनेरे लेइ धाम बनाई। ते मार्था सेवा लोरी थी केरने, लाज़र भी तैन मरां अक थियो ज़ैना यीशु सेइं साथी रोटी खाने बिश्शारे थियो। 3 तैखन मरियमा जटामासी सेइं बनोरो अथ्यो लीटर खुशबूदार इत्र ज़ै बड़ो कीमती थियो, यीशुएरे पावन मल्लो, ते अपने दोगेरे बालन सेइं पोंछने लगी, ते सारू घर रोड़ी मुशकी सेइं भरोई जेव। 4 पन तैसेरे चलन मरां अक यहूदा इस्करियोती नव्वेरो अक चेलो, ज़ैनी यीशु ट्लुवेवरो थियो ज़ोने लगे, 5 “ई इत्र 300

दीनारन मां बेघतां गरीबन किजो न दित्तो?” 6 तैनी एना गल्लां एल्हेरेलेइ न थी ज़ोरी, कि तैस गरीबां केरो खियाल थियो, पन एल्हेरेलेइ ज़ोवं कि ते चोर थियो, तैस कां पेइसां केरि झोली भोती थी, ते ज़ैन किछ तैस मां रखते थी तै कढतो थियो। 7 यीशुए ज़ोवं, “एस तंग न केरा, एसां वक्तेरे पेइले मेरी जान दबबनेरी तियारी कियोरीए। 8 किजोकि गरीब लोक त तुसन सेइं साथी सदा रातन, पन अवं तुसन सेइं साथी सदा नई रानो।” 9 मैन्हु केरि बड़ी भीड़ी तैड़ी आई ज़ैखन तैनेईं शुनु कि यीशु तैड़ी अव। तैना सिर्फ यीशु नई बल्के लाज़रे भी हेरने ओरे थिये, ज़ै तैनी मुइदन मरां जीतो कियोरो थियो। 10 तैखन प्रधान याजके लाज़र भी मारनेरी सलाह की। 11 किजोकि बड़े लोक यहूदी लीडरन करां चले जे, ते तैनेईं यीशु पुड़ विश्वास कियो। 12 होरसां मैन्हु केरि बड़ी भीड़ तिहारे मां आई। ज़ैखन तैनेईं शुनु कि यीशु भी यरूशलेम नगरे मां एजनेबालोए, 13 त तैनेईं खजूरां केरि डेलड़ी हथ्यन मां रेखतां नहरे देते तैस सेइं मिलनेरे लेइ निस्से ते ज़ोने लगे, “होशाना (तारीफ़) धने इस्राएलेरो राज़ो, ज़ै प्रभुएरे नव्वे सेइं एइते।” 14 ज़ैखन यीशु अक गधरो बच्चो मैल्लो, ते तै तैस पुड़ बिश्तां यरूशलेम नगरे मांजो अव, ज़ेन्चरे पवित्रशास्त्रे मां लिखोरूए तेन्चरे एन भोवं, 15 “हे सियोनेरी कुई (यरूशलेमेरे लोक), तू न डर, हेर, तेरो राज़ो एज्जी राओरोए, ते ते गधेरे बच्चे पुड़ चढ़तां एज्जी राओरोए।” 16 पेइलू त यीशुएरे चलेईं किछ न समझू, पन ज़ैखन यीशुएरी महिमा बांदी भोइ, तैनेईं तैना सैरी गल्लां याद की, एन सब गल्लां तैसेरे बारे मां लिखोरी थी, ते लोकेईं एरो ज़ेरो सलूख कियोरो थियो। 17 तैखन भीड़रे लोकेईं ज़ैना तैस सेइं थी, ई गवाही दिती, कि तैनी लाज़र कब्री मरां कुजाव, ते मुइन मरां जीतो कियो। 18 एल्हेरेलेइ लोक तैस सेइं मिलनेरे लेइ आए, किजोकि तैनेईं शुनोरू थियूं, तैनी ई चमत्कार कियोरे। 19 फरीसी लोक एन हेरतां एक्की होरि सेइं ज़ोने लगे, “सोचा, तुस लोक किछ नई केरि लोरे बटने, हेरा सारी दुनिया एस पत्ती चली।” 20 ज़ैना लोक फ़सह तिहारे मां यरूशलेम नगरे मां आराधना केरने ओरे थिये, तैन मां किछ यूनानी थिये। 21 तैना फिलिप्पुसे कां जे ज़ै गलीलेरे नगर बैतसैदा मां रातो थियो, तै ज़ोवले हथ केरतां ज़ोने लगे, “जनाब अस यीशु सेइं मिलनू चातम।” 22 फिलिप्पुसे अन्द्रियासे सेइं ज़ोवं, ते अन्द्रियास फिलिप्पुसे सेइं साथी जेव ते यीशु सेइं ज़ोवं। 23 यीशुए तैन जुवाब दित्तो, “कि मैनेरे मट्टेरी यानी मेरी महिमा बांदी भोनेरो वक ओरोए। 24 अवं तुसन सेइं सघ्न-सघ्न जोताई, कि ज़ांतगर गेहुं केरो ग्लेव मिच्छी मां न मरें, तै अक्के रहते, पन ज़ैखन मरते त बड़ो फल आनते, (तेन्चरे मीं सेइं साथी भोनूए)। 25 ज़ै अपनि जान ट्लारी रखते ते अपनि जान गुवाते, पन ज़ै अपनि जानी सेइं बेर रखते ते अक हमेशारी ज़िन्दगी बघालो। (aiōnios g166) 26 ज़ै कोई मेरी सेवा केरनि चाते त तैसेरेलेइ ज़रूरीए ते मेरो चेलो बने, ताके ज़ैड़ी अवं आई तैड़ी मेरो सेवक भी भोए, ज़ै मेरी सेवा केरते मेरो परमेशर तैस इज़्ज़त देलो।” 27 “हुना मेरो दिल बड़ो उदास भोरोए। एल्हेरेलेइ अवं कुन जोई? ‘हे बाजी इस दुखेरी घेड़ी करां मीं बघा,’ पन अवं इस दुनियाईं मां एल्हेरेलेइ ओरोई कि

दुःख झेल्ली। 28 हे बाजी तू केत्रो महिमा बालोस इन बांदू केर।” तैखन स्वर्गों अक आवाज़ अई, “मीं तेरी केत्री महिमा बांदी कियोरीए ते फिरी भी केरेलो। 29 तैखन तैड़ी ज़ैना मेन्हु खड़े भोइतां शुनी रावरे थिये, तैनेई ज़ोवं, गुडने लोरूप,” ते होरेई ज़ोवं, “केन्चे स्वर्गदूते तैस सेइं गल की।” 30 यीशुए ज़ोवं, “ई आवाज़ मेरे फेइदरे लेइ नई बल्के तुशं लेइ आए। 31 इस वक्त परमेशर दुनियारे लोकां केरो इन्साफ केरेलो, ते अवं इस शैतानेरी शक्ति नाश केरेलो ज़ै इस दुनियाई पुड़ राज़ केरते। 32 ते ज़ैखन अवं ज़मीनी पुड़ां उच्चे च़ादो गालो, तैखन अवं सैरी लोकन एप्पू कांजो आनेलो।” 33 एन ज़ोइतां तैनी साफ च़ारे बांदू कियूं, ते तै केन्चरं मरने बालो। 34 एस पुड़ लोकेई ज़ोवं, “असेई मूसेरे कानूने मां ई गल शुनोरीए, कि मसीह हमेशा रानोए, फिरी तू केन्चरे ज़ोतस कि मैनेरू मट्टू उच्चे पुड़ च़दूनू ज़रूरीए? एन मैनेरे मट्टे कौने?” (aiōn g165) 35 यीशुए तैन सेइं ज़ोवं, “लौ तुसन कां थोड़े च़िरे तगरे आए, ज़ां तगर लौ तुसन साथीए, तांतगर च़लते राथ, एरू न भोए आंधरू तुसन घेरे, ज़ै आंधरे मां च़लते तै न ज़ाने तै कोरां च़लरोए। 36 ज़ांतगर लौ तुसन सेइं साथीए, त लोई पुड़ विश्वास केरा ताके तुस लोअरे बच्चे बनथ।” इना गल्लां ज़ोइतां यीशु छेप्पी जेव। 37 तैनी तैन केरे सामने बड़े चमत्कार हिराए, फिरी भी तैनेई विश्वास न कियो। 38 ताके यशायाह नेबेरू ज़ोरू वचन पूरू भोए, “हे प्रभु, केन्चे इशे खुशखेबरी पुड़ विश्वास न कियो, ते बड़े लोकेई परमेशरेरी शक्ति हेरतां भी कबूल न की।” 39 एल्हेरेलेइ तैना विश्वास न केरि सके यशायाह एककी होरि ठैरी ज़ोते: 40 “तैनी तैन केरि एछछी केनि की, ते मन सखत कियोरोए, एरू न भोए कि तैना एछछन सेइं लान ते मने सेइं बुझन, ते माफ़ी मगन ते अवं तैन बज़्जेई।” 41 यशायाह नबी एल्हेरेलेइ ज़ोतो थियो, कि तैनी यीशुएरी एजनेबाली महिमा लवरी थी, ते तैसेरे बारे मां गल भी की। 42 फिरी भी लीडरन मरां बड़ेई यीशु पुड़ विश्वास कियो, पन फरीसी लोकां केरे वजाई सेइं बांदे मां न थिये मन्ते, एरू न भोए कि असन प्रार्थना घेरे मरां कढन। 43 किजोकि मैन्हु केरि बडयाई तैन परमेशरेरी बडयाई करां जादे रोड़ी लगती थी। 44 तैखन यीशुए ज़ोरे सेइं ज़ोवं, “ज़ै कोई मीं पुड़ विश्वास केरते तै मीं पुड़ नई पन मेरे भेज़ने बाले परमेशरे पुड़ विश्वास केरते। 45 ते ज़ै मीं हेरते तै मेरे भेज़ने बाले हेरते। 46 अवं दुनियाई मां अक लौ बेनतां ओरोई, ताके ज़ै मीं पुड़ विश्वास केरे तै आंधरे मां न रालो। 47 अगर कोई मेरी गल्लां शुन्तां तैन पुड़ अमल केरे, त अवं तैस दोष न लेइलो, अवं दुनियारे लोकन पुड़ दोष लाने नई पन मुक्ति देने ओरोई। 48 ज़ै मेरो इन्कार केरते ते मेरी गल्लां कबूल न केरे, तैस पुड़ दोष लानेबालो अक्के, मतलब ज़ैन वचन मीं ज़ोरूप, तैन आखरी दिहाड़े तैस दोषी ठैरालू। 49 किजोकि मीं अपने अधिकारे सेइं किछ नई ज़ोरू, पन बाजी ज़ैने अवं भेज़ोरोई तैनी मीं हुक्म दित्तोरोए, कि कुन-कुन ज़ोई ते कुन-कुन शुनेई? 50 ते अवं ज़ानताई कि तैसेरो हुक्म मन्ने सेइं हमेशारी ज़िन्दगीए मैलतीए, एल्हेरेलेइ अवं तुसन सेइं तैने ज़ोताई ज़ैन ज़ोनेरो हुक्म मेरे बाजे मीं दित्तोरोए।” (aiōnios g166)

13 फ़सह तिहारेरे पेइले दिहाड़े यीशुए ज़ैनी छड्डू, कि मेरो दुनियाई मरां बाजी कां वापस गानेरो वक्त ओरोए। ते अपने लोकन सेइं ज़ैना दुनियाई मां थिये ज़ेरो प्यार केरतो थियो, तेरहो प्यार आखरी तगर केरतो राव। 2 शैताने शमौनेरे मट्टे यहूदा इस्करियोतेरे दिले मां पेइले यीशु दलुवानेरो खियाल छडोरो थियो। यीशु त कने तैसेरे चले इलाई खानेरो लोरे थिये। 3 यीशु पतो थियो कि बाजे सैरी चीज़ां तैसेरे हथ्ये मां दित्तोरिन, ते कने तै परमेशरेरी तरफां ओरोए ते परमेशरे कांजो वापस च़लरोए। 4 एल्हेरेलेइ तै रोटी छेइतां खडो उठो ते अपनू कोट खोल्लू, ते अक तोलियो अपने लखे सेइं पलैटो। 5 तैखन तैनी अक भांड ट्लावं ते तैस मां पानी छाडु ते अपने चेलां केरे पाव धोइतां लखे बन्धेरे तोलिये सेइं पोंछे। 6 ज़ैखन तै शमौन पतरस कां अवं त पतरसे ज़ोवं, “हे प्रभु, कुन तू मेरे पाव धोने लोरस?” 7 यीशुए जुवाब दित्तो, “ज़ैन अवं केरने लोरोई तू हुन्ना न बुझस, पन पत्ती तू बुझेलो।” 8 पतरसे तैस सेइं ज़ोवं, “तू मेरे पाव कधे न धोई सकसां” यीशुए तैस सेइं ज़ोवं, “अगर अवं तेरे पाव न धोई, त तू मेरो चेलो नई।” (aiōn g165) 9 शमौन पतरस यीशु सेइं ज़ोने लगे, “हे प्रभु, तू मेरे पाव नई बल्के हथ ते दोग भी धो।” 10 यीशुए तैस सेइं ज़ोवं, “ज़ैनी निहावरूप, तैस पावां केरे अलावा होरू धोनेरू किछ ज़रूरत नई। तै बिलकुल शुद्धे, ते तुस शुद्धथ, पन सारे नई।” 11 तै त दलुवांने बाले ज़ानतो थियो एल्हेरेलेइ तैनी ज़ोवं, “तुस सब शुद्ध नई।” 12 ज़ैखन यीशुए सेबभी केरे पाव धोए त अपनू कोट लेइतां अपनि ठैरी बिश्शो तैखन तैनी तैन पुच्छू, “कुन तुस समझतथ कि मीं तुसन सेइं कुन कियूं? 13 तुस मींजो गुरु, ते प्रभु ज़ोतथ, तुशू ज़ोनू ठीके, किजोकि अवं आई। 14 अगर मीं तुशू गुरु त कने प्रभु भोइतां तुशू पाव धोए, त तुशू भी फ़जै कि एककी होरेरे पाव धोथ। 15 किजोकि मीं तुसन अक नमूनो हिराव, कि जेन्चरे मीं पाव धोए तुस भी एरू केरथ। 16 अवं तुसन सेइं सच-सच ज़ोताई, कि नौकर अपने मालिके करां बड्डो न भोए, ते न भेज़ोरो भेज़ने बाले करां। 17 तुस त एना गल्लां ज़ानतथ, ते अगर तैन पुड़ अमल केरतथ त तुस धन आथ। 18 अवं तुसन सेबभी केरे बारे मां न ज़ोई, ज़ैना मीं चुनोरेन अवं तैन ज़ानताई, पन इन एल्हेरेलेइ आए, कि पवित्रशास्त्रेए एन वचन पूरू भोए, ज़ैने मेरी रोटी खाइ, तैए मेरे खलाफ भोव। 19 अवं तैन भोने करां पेइले तुसन ज़ोताई कि ज़ैखन भोए त विश्वास केरथ कि अवं तैए आई। 20 अवं तुसन सेइं सच-सच ज़ोताई कि, ज़ै मेरे भेज़ोरे कबूल केरते तै मीं कबूल केरते, ते ज़ै मीं कबूल केरते तै मेरे भेज़नेबाले बाले कबूल केरते।” 21 एना गल्लां ज़ोइतां यीशु आत्माई मां उदास भोइतां बडो दुःखी भोव, ते अपने चेलन सेइं ज़ोने लगे, “अवं तुसन सेइं सच-सच ज़ोतां, कि तुसन मरां एक्के अवं दलुवानोई।” 22 चले एककी होरेरे पासे तकने लगे, किजोकि तैन पतो न थियो कि ए केसरे बारे मां ज़ोने लोरोए। 23 तैसेरे चेलन मरां अक चेलो जैस सेइं यीशु प्यार केरतो थियो, यीशुएरे नेड़े बिशोरो थियो। 24 तैखन शमौन पतरसे तैसेरे पासे इशारे सेइं पुच्छू, “ज़ो कसेरे बारे मां ज़ोने लोरोए?” 25 तैखन तेन्चरे यीशुएरे छैतरे पासे लिक्तां पुच्छू, “हे प्रभु, तै

कौने?” 26 यीशुए जुवाब दित्तो, “जैस अवं ई रोट्टरो टुकडो डोबतां देइलो तैए।” ते यीशुए टुकडो डोबतां शमीनेरे मट्टे यहूदा इस्करियोती दित्तो। 27 ते टुकडो नेनेरे पत्ती तै शैतानेरे बस्से मां भोइ जेव, तैखन यीशुए तैस ज़ोवं, “तीं ज़ैन किछ केरनूए, लूशी केर।” 28 पन होरि केन्ची ए पतो न लगो कि ए गल यीशुए केसेरे बारे मां की। 29 यहूदा कां पेइसां केरी थेलडी भोती थी, ते किछेई समझू, कि यीशु तैस सेइं ज़ोते, कि ज़ैन किछ असन तिहारेरे लेइ लोडते तैन धिन्ने, या गरीबन किछ दे। 30 तैखन यहूदा टुकडो खेइतां बेइर च़लो जेव, तै रातरो वक्त थियो। 31 ज़ैखन तै बेइर जेव त यीशु ज़ोने लगे, “हुनी मैनेरे मट्टे यानी मेरी महिमा भोइ, ते मेरे ज़िरिये परमेशेरी महिमा भोइ, 32 ते परमेशर भी मीं एप्पू महिमा बालो केरेलो, बल्के जल्दी केरेलो। 33 हे मेरे दोस्तव, अवं किछ च़िरेरे लेइ हेजू तुसन सेइं साथी आई, फिरी तुस मीं तोप्पेले, ते जेन्चरे मीं यहूदन भी ज़ोवं, ज़ैडी अवं गाताई तैडी तुस न एज्जी बटथ, तेन्चरे अवं तुसन सेइं भी ज़ोताई। 34 अवं तुसन अक नंब्बो हुकम देताई कि, एक्की होरि सेइं प्यार केरा, जेन्चरे मीं तुसन सेइं प्यार कियो तुस भी एक्के होरि सेइं प्यार केरा। 35 अगर तुस एक्के होरि सेइं प्यार केरेले त सेबभी लोकन पतो लग्गेलो, कि तुस मेरे चेलेथ।” 36 शमौन पतरसे तैस पुच्छू, “हे प्रभु तू कोरां च़लोरोस?” यीशुए जुवाब दित्तो, “ज़ेरां अवं च़लोरोई तू हुना मीं सेइं साथी न एज्जी सकस, पन बादे मां एज्जी सकतस।” 37 पतरसे ज़ोवं, “हे प्रभु अवं हुना तीं सेइं साथी किना एज्जी सेखी? अवं त तेरे लेइ अपनि जान भी देनेरे लेइ तियार आई।” 38 यीशुए जुवाब दित्तो, “कुन तू मेरे लेइ अपनि जान देलो, अवं तीं सेइं सन्न-सन्न ज़ोताई कि कुकड़ बांग देने करां पेइले तू मेरो ट्लेइ बार इन्कार केरेलो।”

14 “तुशो दिल उदास न भोए, तुस परमेशरे पुड़ विश्वास केरतथ, मीं पुड़ भी विश्वास केरा। 2 मेरे बाजेरे घरे मां बड़े कमरेन, अगर न भोथी त अवं तुसन सेइं ज़ोथो, किजोकि अवं तुशे लेइ ठार तियार केरने च़लोरोई। 3 अगर गेइतां तुशे लेइ ठार तियार केरि त वापस एइतां तुसन एप्पू सेइं साथी नेलो, ताके ज़ैडी अवं भोलो तुस भी तैडी भोथ। 4 ते ज़ेरां अवं च़लोरोई तुस तैठेरी बत ज़ानतथ।” 5 थोमा तैस ज़ोवं, “हे प्रभु, असन नई पतो तू कोरां च़लोरोस, ते फिरी बत केन्चरे ज़ानम?” 6 यीशुए तैस सेइं ज़ोवं, “बत, सच्छी ते हमेशारी ज़िन्दगी अर्व्वे आई, कोई मेरे ज़िरियेरे बगैर बाजी कां न एज्जी सके। 7 अगर तुसेईं अवं पिशानोरो भोथो त मेरे बाजी भी पिशानेथे, पन हुनी तुस तैस ज़ानतथ ते कने लाव भी।” 8 फिलिप्पुसे तैस सेइं ज़ोवं, “हे प्रभु असन बाजी हिरा, तैन्ने इश्शे लेइ बडू आए।” 9 यीशुए तैस सेइं ज़ोवं, “फिलिप्पुस, एत्रे च़िरे अवं तुसन सेइं साथी राव कुन तू मीं न ज़ानस ज़ैनी अवं लाव तैनी बाजी भी लाव तू किजो ज़ोतस असन बाजी हिरा? 10 कुन तू विश्वास न केरस, कि अवं बाजी मां आई ते बाजी मीं मां आए? अवं ज़ैना गल्लां तुसन सेइं ज़ोताई तैना गल्लां अवं अधिकारे सेइं न ज़ोई, बल्के बाजी मीं मां रेइतां अपनू कम केरते। 11 मेरो विश्वास केरा, कि अवं बाजी मां आई ते बाजी मीं मां आए, नई त ज़ैना कम्मां केरताई तैन हेरतां मीं पुड़ विश्वास केरा।”

12 अवं तुसन सेइं सन्न-सन्न ज़ोताई, “कि ज़ै मीं पुड़ विश्वास केरते, एना कम्मां ज़ैना अवं केरताई ते भी केरेलो, बल्के मीं करां भी बडां कम्मां केरेलो, किजोकि अवं बाजी कां च़लोरोई। 13 ज़ैन किछ तुस मेरे नंब्बे सेइं मगले अवं तुसन देलो कि बाजी केरि महिमा मट्टेरे वजाई सेइं बांदा भोए। 14 अगर तुस मेरू नंब्बे सेइं किछ भी मगले त अवं तैन केरेलो।” 15 “अगर तुस मीं सेइं प्यार केरतथ त मेरे हुकमन मन्नेले। 16 ते अवं बाजी कां प्रार्थना केरेलो ते ते तुसन अक मदतगार देलो कि हमेशा तुसन सेइं साथी रालो। (aiōn g165) 17 मतलब तै आत्मा ज़ै परमेशेरे बारे मां सन्न बांदू केरेली, ज़ै दुनिया कबूल न केरि सके, किजोकि न तैस लेइहोए न ज़ाने, तुस तैस ज़ातथ किजोकि ते तुसन साथी रहती, ते ते तुसन मां भोली। 18 अवं तुसन अकैल्लो न शेरिलो बल्के अवं तुसन कां एज्जेलो। 19 ई दुनिया किछ च़िरेरां बाद मीं न लाएली, पन तुस मीं लांते राले, किजोकि अवं ज़ींतोई ते तुस भी ज़ींते राले। 20 ज़ैखन अवं ज़ींतो भोलो तेइस तुसन पतो लग्गेलो, कि अवं अपने बाजी मां आई ते तुस मीं मां आथ ते अवं तुसन मां आई। 21 ज़ैस कां मेरे हुकम आन ते तैन मन्ते, त तैए मीं सेइं प्यार केरते ते मेरो बाजी तैस सेइं प्यार केरेलो, ते अवं तैस सेइं प्यार केरेलो, ते अपनो आप तैस पुड़ बांदो केरेलो।” 22 तैखन यहूदा (तै यहूदा इस्करियोती न थियो बल्के होरो चेलो थियो) तैस सेइं ज़ोवं, “हे प्रभु कुन भोव कि तू अपनो आप असन पुड़ बांदो केरनो चातस ते दुनियारे लोकन पुड़ नई?” 23 यीशुए जुवाब दित्तो, अगर कोई मीं सेइं प्यार केरते त तै मेरी शिक्षाई मन्ते, ते मेरो बाजी भी तैस सेइं प्यार केरेलो, ते अस तैस कां एजमेले ते तैस सेइं साथी रामेले। 24 ज़ै मीं सेइं प्यार न केरे, तै मेरे शिक्षाई न मन्ने, ज़ै शिक्षा तुस शुन्ने लोरेथ, मेरी नई पन मेरे बाजी केरि ज़ैने अवं भेजोरोई। 25 “एना सैरी गल्लां मीं तुसन साथी रेइतां ज़ोई। 26 पन तै मदतगार यानी पवित्र आत्मा ज़ैस बाजी मेरे ठैरी भेजेलो, तुसन सैरी गल्लां शिखालेलो, ते हर गल ज़ै मीं तुसन सेइं ज़ोरी याद करालो।” 27 अवं तुसन शान्ति देइतां ज़ै मीं कां आए, जेन्चरे दुनिया देचे तेन्चरे नई, तुशो दिल उदास न भोए ते न डेरथ। 28 तुसेईं शुन्, मीं तुसन सेइं ज़ोवं, अवं गाताई तुसन कां फिरी एज्जेलो अगर तुस मीं सेइं प्यार केरते भोते त खुशी भोने थिये, कि अवं बाजी कां च़लोरोई किजोकि बाजी मीं करां बड्डोए। 29 मीं सैरी गल्लां पेइले तुसन ज़ोरिन कि ज़ैखन तैना पूरी भोन त तुस विश्वास केरेले। 30 हुनी अवं तुसन सेइं जादे गल्लां न केरेलो, किजोकि शैतान एइते, ज़ै इस दुनियाई पुड़ राज़ केरनेबालोए। मीं पुड़ तैसेरो किछ अधिकार नई। 31 जेन्चरे बाजीए मीं हुकम दित्तो, अवं तेन्चरे केरताई। पन एन एल्हेरेलेइ भोते कि दुनिया ज़ाने, कि अवं बाजी सेइं प्यार केरताई। ते उठा इट्टां च़लम।

15 यीशुए ज़ोवं “अवं दाछारू सच्छू बड्डह अर्व्वे आई, ते मेरो बाजी बागबाने। 2 ज़ै डालडी मीं मां आए, ते तैस फल न लगे, तै कट्टी गानीए, ते ज़ैस फल लगते तैस छान्ते कि जादे फल लगे। 3 तुस तैस शिक्षाई सेइं ज़ै मीं तुसन दित्तोरोए शुद्ध आथ। 4 तुस मीं मां बनोरे राथ,

ते अवं तुसन मां, जेन्चरे डालडी अगर बड़हे सेइं बनोरी न राए, त अपने आप सेइं तैस फल न लगे। तेन्चरे तुसन भी अगर मीं मां बनोरे न राले त तुस फलदार न भोइ सकेले। 5 अवं दाछारू बड़ह आई, तुस डेलडी आथ, जै मीं मां बनोरो रहते तैस खूब फल लगते, किजोकि मीं करां अलग भोइतां तुस किछ न केरि सखत। 6 अगर कोई मीं मां बनोरो न राए, त तैस डेलडारो जेरोए जैस केटतां शारतन, ते शुक्की गाचे, ते लोक घेरतां अग्गी मां फुकी छडतन। 7 अगर तुस मीं मां बनोरे रातथ ते मेरी गल्लां तुसन मां बनोरी रैतित न जैन चाहेले ते मगोले तुसन दितू गालू। 8 मेरे बाजेरी महिमा एसमां आए कि तुस हछो फल आनां, फिरी तुस मेरे चले भोले। 9 जेन्चरे बाजे मीं सेइं प्यार कियो, तेन्चरे मीं भी तुसन सेइं प्यार कियो। मेरे प्यारे मां बनोरे राथ। 10 अगर तुस मेरे हुकमन मन्नेले, त मेरे प्यारे मां बनोरे राले, जेन्चरे मीं अपने बाजेरे हुकम मन्ने, ते तैसेरे प्यारे मां बनोरो राव। 11 मीं एना गल्लां एल्हेरेलेइ तुसन ज़ोरिन, कि मेरी खुशी तुसन मां बनोरी राए।” 12 “मेरो हुकमे ई आए जेन्चरे मीं तुसन सेइं प्यार कियो, तुस भी एक्की होरि सेइं प्यार केरा 13 एस करां जादे प्यार केन्चे नई कियोरो, कि कोई अपने दोस्तां केरे लेइ अपनि जान दे। 14 जै हुकम अवं देताई, अगर तुस तैस मन्न्थ, त मेरे दोस्त आथ। 15 अज़ेरे बाद अवं तुसन जो नौकर न ज़ोइलो, किजोकि नौकर न ज़ाने कि तैसेरो मालिक कुन केरते। मीं तुसन जो दोस्त ज़ोरूए, किजोकि जैन किछ मीं बाजी करां शुनोरूए तुसन भी शुनावरू आए। 16 तुसेईं अवं नई चुनोरो पन मीं तुस चुनोरेथ ते ठहरावरे भी आथ, ताके तुस गेइतां फल आनथ, ते तुशो फल बनोरो राए, कि तुस मेरे न्वंचे सेइं बाजी करां जैन किछ मगथ, ते तुसन देलो किजो तुस मेरे चलेथ। 17 अवं इन गल्लां केरो हुकम एल्हेरेलेइ देताई, कि तुस एक्की होरि सेइं प्यार केरा।” 18 “अगर दुनियारे लोक तुसन सेइं दुश्मनी रखतन, त याद रखा कि तैनेईं पेइले मीं सेइं दुश्मनी रखबोरी। 19 अगर तुस दुनियारे भोथे, त दुनिया अपने लोकन सेइं प्यार केरती, पन हुनी तुस दुनियारे लोक नई किजोकि मीं तुस दुनियाईं मरां चुनोरेथ तांए दुनियारे लोक तुसन सेइं दुश्मनी रखतन। 20 तै गल जै मीं तुसन सेइं ज़ोरी थी याद रखवा, नौकर अपने मालिके करां बड्डो न भोए, अगर दुनियां अवं सतेवरोइं त तैना तुसन भी सताले, अगर तैनेईं मेरी गल्ली पुइ अमल कियूं त तुशशी गल्ली पुइ भी अमल केरेले। 21 पन तैना लोक तुसन सेइं एरो जेरो बर्ताव केरेले, किजोकि तुस मेरे चलेथ। तैना मेरे भेजने बाले परमेशरे न ज़ानन्। 22 अगर मीं एइतां तैन सेइं गल्लां न भोथी कियोरी त तैना पापी न थिये भोने, पन हुनी तैन केरे पापेरो तैन कां कोई बहानो नई। 23 जै मीं सेइं दुश्मनी रखते, ते तै मेरे बाजी सेइं भी दुश्मनी रखते। 24 अगर मीं तैन केरे सामने तैना चमत्कार न भोथे कियोरे, जैना कथी होरे केन्चे नई कियोरे त तैना पापी न थिये भोने, पन हुनी तैनेईं सब किछ लाव, ते मीं भी ते बाजी सेइं दुश्मनी रखबी। 25 पन एन एल्हेरेलेइ भोवं कि तैन केरे कानूने मां लिखोरी तै गल पूरी भोए, तैनेईं मीं सेइं खामखा दुश्मनी रखबी। 26 पन ज़ैखन तै मद्दतगार एज्जेलो जैस अवं अपने बाजेरे तरफां

भेजेलो, मतलब सच्चेरी आत्मा, जै बाजी केरि तरफां एइतीए, तै मेरी गवाही देली। 27 ते तुस भी गवाह आथ किजोकि तुस भी शुरू करां मीं सेइं साथी थिये।”

16 “मीं तुसन एना सैरी गल्लां एल्हेरेलेइ जोई कि तुशशो विश्वास न द्लुटे। 2 तैनेईं तुस प्रार्थना घरन मरां कढनेथ, खास केरतां एरो जेरो वक्त एज्जी राहोरोए, जै तुसन मारेलो तै इन समझेलो कि तै परमेशरेरी सेवा केरने लोरोए। 3 तैन एन सब एल्हेरेलेइ केरेले कि न तैनेईं कथी मेरो बाजी ज़ानो ते न कथी अवं। 4 पन मीं एना सैरी गल्लां एल्हेरेलेइ तुसन सेइं जोई, कि ज़ैखन तैना पूरी भोनेरो वक्त एज्जेलो, त तुसन याद एज्जे, कि मीं तुसन एन पेइलू ज़ोरू थियूं। जेइस तुस मेरे चले बनोरे थिये। मीं एना गल्लां केरे बारे मां पेइलू एल्हेरेलेइ न ज़ोवं, कि अवं एप्पू तुसन सेइं साथी थियो।” 5 “पन हुन्ना अवं अपने भेजने बाले कां ज़लोरौई, पन तुसेईं केन्चे भी न पुच्छू कि तू कोरां ज़लोरौस? 6 पन मीं तुसन सेइं जोई छड़ेरूए एल्हेरेलेइ तुशशो मन उदास आए। 7 फिरी भी अवं तुसन सेइं सच ज़ोताई कि मेरू इट्ठां गानू तुशशे लेइ फैइदोए, अगर अवं न गेइलो त तै मद्दतगार तुसन कां नई एजनो, पन अवं ज़लो जेव त तैस अवं तुसन कां भेजी देलो। 8 ते ज़ैखन तै एज्जेलो त दुनियाईं पाप ते धार्मिकता ते इन्साफेरे बारे मां सब किछ बांदू केरेलो। 9 पापेरे बारे मां एल्हेरेलेइ कि दुनियां मीं पुइ विश्वास न कियो, 10 धार्मिकतारे बारे मां एल्हेरेलेइ कि अवं वापस बाजी कां ज़लोरौई ते तुसेईं अवं फिरी नई लहानो, 11 इन्साफेरे बारे मां एल्हेरेलेइ कि, शैतान जै दुनियाईं पुइ राज़ केरनेबालो मुर्जम बनोरोए।” 12 “अवं तुसन सेइं होरू भी बडू किछ ज़ोनू चाताई, पन हुन्ना तुसेईं तैन झैली नई बटनू। 13 पन ज़ैखन तै मतलब सच्चेरी आत्मा एज्जेली त तै सच्चेरी बत हिराली, किजोकि तै अपने तरफां न ज़ोली, पन ज़ैखन किछ परमेशरे करां शुनेली तैने ज़ोली, ते एजने बैली गल्लां ज़ोली। 14 ते मेरी महिमा केरेली किजोकि तै मेरी गल्लां ज़ोली, किजोकि तै मेरी गल्लन मरां तुसन सेइं ज़ोली। 15 जैन किछ बाजी केरूए, तैन सब मेरूए, एल्हेरेलेइ मीं ज़ोवं, कि तै मेरी गल्लन मरां शुनालो।” 16 “थोड़े चिरेरां पत्ती तुसेईं अवं फिरी नई लहानों, ते तैसेरे थोड़े चिरेरां पत्ती तुसेईं अवं फिरी लांनोई।” 17 तैखन तैसेरे किछ चेलेईं एप्पू मांमेइं ज़ोवं, इन कुने, “ए कुन ज़ोते, थोड़े चिरेरां पत्ती तुस मीं न लाएले, ते फिरी थोड़े चिरेरां पत्ती तुस मीं लाएले? कि अवं बाजी कां गाताई?” 18 तैखन तैनेईं ज़ोवं, “थोड़े जेरे चिरेरां बाद, एन जै ए ज़ोते, कुन आए? अस न ज़ानम कि कुन?” 19 यीशुए एन जैनतां, कि एना मीं पुछनू चातन, “कुन तुस मेरी इस गल्लरे बारे मां एप्पू मांमेइं गलबात केरने लोरेथ, कि एस गल्लारो कुन मतलबे, थोड़े चिरेरां पत्ती मीं न लाएले, ते फिरी थोड़े चिरेरां पत्ती लाएले? 20 अवं तुसन सेइं सच-सच ज़ोताई, कि तुस लेरां देले ते शोग बनाले, पन दुनियारे लोक खुशी भोले, पन ज़ैखन तुस मीं दुबारां लाएले त तुशशो दुःख, खुशी मां बेदलोईं गानोए। 21 ज़ैखन कुआन्श ज़ातीए त तैस बडी तकलीफ भोतीए, किजोकि तैसेरे दुःखेरी घडी नेडे पुजोरीए, पन ज़ैखन बच्यो

जर्मते त एस खुशी मां कि दुनियाई मां अक मैनुहु पैदा भोरुए अपनि तकलीफ बिस्सरी गाचे। 22 ते तुसन भी हुन्ना तेरही तकलीफ, पन अवं तुसन सेइं फिरी मिलेलो, ते फिरी तुशुशे मने मां खुशी भोली, ते खुशी तुसन करां कोई न नेही सकेलो। 23 तैस वक्ते तुस मीं कोई किछ न पुछेलो, अवं तुसन सेइं सच-सच ज़ोताई, तुस मेरे नंवे सेइं बाजी करां जैन किछ मगथ, तै तुसन देलो किजो तुस मेरे चेलथ। 24 तुसेईं मेरू नवं धिन्तां हुना तगर बाजी करां किछ नईं मगेरू, मगले त तुसन मैल्ली गालू, ते तुशुशी खुशी पूरी भोली।” 25 “अवं तुसन एना गल्लां मिसाल देइतां ज़ोताई, पन तै वक्त ओरोए कि अवं कहैन्ना मां फिरी न ज़ोइलो, पन रोडे चारे बाजरे बारे मां तुसन सेइं गल्लां केरेलो। 26 तैस वक्ते तुस मेरू नवं धिन्तां प्रार्थना केरेले, अवं इन न ज़ोई, कि तुशुशे लेइ बाजी सेइं बिनती केरि। 27 किजोकि बाजी परमेशर तुसन सेइं एप्पू प्यार केरते, एल्हेरेलेइ कि तुसेईं मीं सेइं प्यार कियो, ते तुसेईं विश्वास कियोरोए कि अवं परमेशरी तरफां ओरोई। 28 अवं बाजी करां दुनियाई मां ओरोई, हुनी दुनियाई मरां भोइतां वापस बाजी कां ज़लोरोई।” 29 तैसेरे चलेईं ज़ोवं, “हुन्ना तू साफ-साफ गल लोरस केरने, ते कोई मिसाल देइतां न ज़ोस। 30 हुन्ना असेईं बुझू कि तीं सब किछ पत्तोए, ते ज़रूरत नईं कि कोई तीं पुछे, असां विश्वास केरतम कि तू परमेशरे करां ओरोस।” 31 यीशुए तैन सेइं ज़ोवं, “हुनी तुस विश्वास केरतथ! 32 हेरा, तै वक्त एज्जी राओरोए बल्के पुजोरोए, कि तुस सब नेशतां अपने-अपने बत्तां गानेथ, ते अवं अकैल्लो शारनोई पन फिरी भी अवं अकैल्लो नईं, किजोकि मेरो बाजी मीं सेइं साथीए। 33 मीं तुसन एना गल्लां एल्हेरेलेइ ज़ोई, ताके तुसन शान्ति मैल्ले, किजो तुस मेरे चेलेथ, तुस दुनियाई मां मुसीबत त उठाताथ, पन हिम्मत रखा, मीं शैताने पुइ ज़ींत हासिल कियोरीए, ज़ै इस दुनियाई पुइ राज़ केरते।”

17 ज़ैखन यीशुए अपने चेलन सेइं एना सब गल्लां ज़ोई, त तैनी उबरू स्वर्गां तेकतां ज़ोवं, “हे बाजी हुन्ना तै वक्त ओरोए कि तू अपने मट्टेरी महिमा केर, कि मट्टू भी तेरी महिमा केरे। 2 किजोकि तीं तैस सेबभी मैन्न पुइ अधिकार दित्तोरोए, ज़ैना तीं तैस दित्तोरेन हमेशारी ज़िन्दगी दे। (aiōnios g166) 3 ते हमेशारी ज़िन्दगी तै आए, कि तैना सिर्फ तीं एककी सच्चे परमेशरे ज्ञानन् ते यीशु मसीहे भी ज्ञानन् ज़ै तीं भेजोरोए। (aiōnios g166) 4 मीं तैन कम ज़ैन तीं मीं दित्तेरू थियू मुकेइतां धेरतली पुइ तेरी महिमा की। 5 ते हुनी हे बाजी मीं एप्पू सेइं साथी मेरी तै महिमा केर ज़ै दुनियारे पेइली मेरी तीं साथी थी।” 6 “मीं तेरू नवं तैन कां बांदू कियूं, ज़ैना तीं दुनियाई मरां चुनतां मीं दित्तोरेन तैना तेरे थिये, पन तीं मींजो दित्तोरेन ते तैनेईं तेरे बचने पुइ अमल भी कियोरूए। 7 हुनी तैना ज्ञानतन, कि ज़ैन किछ तीं मीं दित्तेरू तैन सब तेरी तरफांए। 8 एल्हेरेलेइ मीं तैना गल्लां ज़ैना तीं मीं दित्तोरी थी, मीं तैन पुजेईं ते तैनेईं तैन पुइ विश्वास कियो, ते सच पिशानू, कि अवं तेरी तरफां ओरोई, ते ई भी विश्वास कियो कि तीं अवं भेजोरोई। 9 अवं तैन केरे लेइ प्रार्थना केरताई, दुनियारे लोकां केरे लेइ न केरि, पन तैन केरे लेइ ज़ैना तीं मीं

दित्तोरेन, किजोकि तैना सब तेरे आन। 10 ते ज़ैन किछ मेरू आए, तैन सब किछ तेरूए, ते ज़ैन तेरू तैन मेरूए, ते इन सेइं मेरी महिमा बांदी भोई। 11 मीं हुनी इस दुनियाई मां नईं रानू, पन तैना हेजू इस दुनियाई मां आन, ते अवं तीं कां एजताई, हे पवित्र बाजी, अपने तैस नंवे सेइं ज़ैन तीं मीं दित्तोरोए, तैन केरि हफाज़त केर, कि तैना असन बराबर भोन। 12 ज़ैखन अवं तैन सेइं साथी थियो, मीं तेरे तैस नंवे सेइं, ज़ैन तीं मीं दित्तोरोए, तैन केरि हफाज़त की, मीं तैन केरि देख भाल की, नाश भोनेबाले मैनेरे अलावा कोई नाश न भोव, एल्हेरेलेइ पवित्रशास्त्रेरी गल पूरी भोइ। 13 पन हुन्ना अवं तीं कां एजताई, ते इना गल्लां अवं दुनिया मां ज़ोताई, कि तैना मेरी खुशी एप्पू मां पूरी केरन। 14 मीं तैन तेरू वचन तैन कां पुजेवरुए, ते दुनियारे लोकेईं तैन सेइं दुश्मनी रख्खी, किजोकि जेन्चरे अवं दुनियारो नईं, तैना भी नईं। 15 मेरी प्रार्थना ई नईं कि तू तैन दुनियाई मरां ने, पन तू तैन शैताने करां बचेइतां रख। 16 जेन्चरे अवं दुनियारो नईं तैन भी इस दुनियारे नईं। 17 तेरू वचन सच्चे। सच्चेरे ज़िरिये सेइं तैन पवित्र केर। 18 जेन्चरे तीं अवं दुनियाई मां भेजोरोई तेन्चरे मीं भी तैना दुनियाई मां भेजोरेन। 19 अवं अपनी आप तैन केरे लेइ पवित्र केरताई, ताके तैना भी सच्चेरे ज़िरिये सेइं पवित्र भोन।” 20 “मेरी प्रार्थना सिर्फ चले केरे लेइ नईं, पन तैन केरे लेइ भी ज़ैना तैन वचनेरे ज़िरिये मीं पुइ विश्वास केरेले। 21 कि तैना सब अक भोन, जेन्चरे तू बाजी मीं मां आस, ते अवं तीं मां आई तेन्चरे तैना असन मां भोन, एल्हेरेलेइ दुनियारे लोक विश्वास केरन, कि तींए अवं भेजोरोई। 22 ते तै महिमा ज़ै तीं मीं दित्तोरीए, कि जेन्चरे अस अक आम तैन भी अक भोन। 23 अवं तैन मां भोइलो, ते तू मीं मां भोलो, ताके तैन पूरो अकीजो भोए, ते दुनिया ज़ाने कि तीं अवं भेजोरोई। जेन्चरे तीं मीं सेइं प्यार कियो, तेन्चरे तीं तैन सेइं भी प्यार कियो। 24 हे बाजी अवं चाताई कि ज़ैना तीं मीं दित्तोरेन, जैड़ी अवं आई तैड़ी तैना भी मीं सेइं साथी भोन, कि तैना भी मेरी महिमा हेरन, ज़ै तीं मीं दित्तोरीए। दुनियारे रचने करां भी पेइले तीं, मीं सेइं प्यार कियोरोए। 25 हे धर्मा बाजी, दुनियां तू न पिशानो, पन मीं तू पिशानो, ते तैन चलेईं भी अवं पिशानो कि तीं अवं भेजोरोई। 26 मीं तैन पुइ बांदू कियूं, कि तू कौन आस, ते बांदू केरतो रालो, जैस प्यारे सेइं तीं मीं प्यार कियो, तै तैन मां भोए, ते अवं तैन मां बनोरो रेई।”

18 यीशुए ए प्रार्थना केरतां झाड़ी, त अपने चेलन सेइं साथी किद्रोन वेदरे पार जेव। तैड़ी अक बाग थी तै ते तैसेरे चले तैड़ी जे। 2 तैस दलुवाने बालो यहूदा तैस ठारारो बाकम थियो, किजोकि यीशु अपने चेलन सेइं साथी तैड़ी केही फेरेईं जोरो थियो। 3 तैखन यहूदे, रोमी सिपाही ते किछ प्रधान याजक ते फरीसी केरे तरफां भेजोरे लोकन सेइं साथी एन्तां दीये ते मिसालां ते हथियार धिन्तां तैड़ी पुजाए। 4 तैखन यीशु सब गल्लां ज़ैना तैस सेइं भोनेबेली थी, बुझतां तैन सेइं ज़ोने लगो, “तुस केस लोरेथ तोपने?” 5 तैनेईं तैस जुवाब दित्तो, “यीशु नासरी।” यीशुए तैन सेइं ज़ोवं, “अवं तैए आई।” तैस दलुवाने बालो यहूदा भी तैन

सेइं साथी खडखडो थियो। 6 जैखन यीशुए ज़ोवं, “अवं तैए आई,” तैना पत्रोवं ज़मीनी पुड झड़े। 7 एल्हेरेलेइ तैनी फिरी पुच्छू, “तुस केस लोरेथ तोपने?” तैनेईं जुवाब दित्तो, “यीशु नासरी।” 8 यीशुए जुवाब दित्तो, “मीं त ज़ोवं कि अवं तैए आई, अगर तुस मीं तोप्पतथ, त एन लोकन गाने देथ।” 9 एन एल्हेरेलेइ भोवं, कि तैन वचन पूरू भोए, “ज़ैना तीं मीं दित्ते, तैन मरां मीं अक भी न हिरवा।” 10 शमौन पतरसे कां अक तलवार थी, तैनी तलवार केढतां महायाजकेरे नौकरे बाई ते तैसेरो देइने कन्न केटव। तैस नौकरे नवं मलखुस थियूं। 11 तैखन यीशुए पतरसे ज़ोवं, “अपनि तलवार मियाने मां रख, कुन अवं ते दुखेरो कटोरो न पीं ज़ै मेरे बाजे मीं पीनेरे लेइ दितोए?” 12 तैखन रोमी फोवजी ते तैन केरे सूबेदार ते यहूदी केरे लीडरेईं यीशु ट्लाव तै बंधे। 13 ते पेइलो हन्ना कां नीयो किजोकि ते कैफारो शेरहो थियो ज़ै तैस सालेरो महायाजक थियो। 14 ई तैए कैफाए ज़ैनी यहूदन सलाह दित्तोरी थी, कि इश्शे लोकां केरे लेइ एककी मैनेरू मरनू रोडू आए। 15 शमौन पतरस ते अक होरो चेलो यीशु पत्ती जे। ते चेलो महायाजकेरो बाकम थियो, ते यीशु सेइं साथी महायाजकेरे अंगने मां जेव। 16 पन पतरस बेइर दारे पुड खडो थियो, ते होरो चेलो ज़ै महायाजकेरो बाकम थियो वापस अव, ते तैस नौकरैनी सेइं ज़ै दारे पुड थी गल केरतां पतरस अन्तर नीयो। 17 तैस नौकरैनां ज़ै दारे पुड थी पतरसे पुच्छू, “कुन तू भी तैसेरे चलन मरां आस?” पतरस ज़ोवं, “नईं अवं नईं।” 18 ठंडारे वजाईं सेइं नौकरेईं ते मन्दरेरे पहरदारेईं अग बालोरी थी, ते पतरस भी तैन सेइं साथी अग लोरो थियो तपने। 19 तैखन महायाजक यीशुएरे चेलां त कने तैसेरी शिक्षारे बारे मां पुच्छने लगे। 20 यीशुए जुवाब दित्तो, “मीं त सेव्भी केरे सामने सैरी गल्लां कियोरिन, मीं त रोज़ तुश्शे प्रार्थना घरन ते मन्दरे मां, ते ज़ैडी यहूदी अकोट्टे भोतन तैडी शिक्षा दित्ती, ते छेपतां किछ भी न ज़ोवं। 21 तू मीं ए सवाल किजो पुछतस? शुन्नेबालन पुच्छू, कि मीं तैन सेइं कुन ज़ोवरूए? हेर तैन पतोए, कि मीं कुन ज़ोवरूए।” 22 ज़ैखन तैनी ज़ोवं, त मन्दरेरे पहरदारन मरां अक ज़ै तैडी खडो थियो, तैनी यीशुए थप्पड बैइतां ज़ोवं, “कुन तू महायाजक एन्चरे जुवाब देतस?” 23 यीशुए तैस जुवाब दित्तो, “अगर मीं किछ बुरू ज़ोरूए त साबत केर, पन अगर रोडू ज़ोरूए त थप्पड किजो बातस?” 24 तैसेरां बाद हन्ना यीशुएरे हेजू बन्धोरो थियो तेन्चरे महायाजक कैफा कां भेजो। 25 शमौन पतरस खडखडो अग लोरो थियो तपने। तैखन केन्चे तैस पुच्छू, “कुन तू भी तैसेरे चलन मरां आस?” पतरस इन्कार केरतां ज़ोवं, “नईं अवं नईं।” 26 महायाजकेरे नौकरन मरां अक ज़ै तैसेरो रिशतेदार थियो, जेसेरो कन्न पतरसे तलवारी सेइं कटोरो थियो, ज़ोने लगे, “कुन मीं तू बागी मां यीशु साथी नईं लाहोरो?” 27 पतरसे फिरी इन्कार कियो, ते तैखन कुकड़े भी बांग दित्ती। 28 तैनेईं यीशु झेलां कैफा करां रोमी गवर्नर पिलातुसेरे महले मां नीयो, पन तैना एप्पू अन्तर न जे, ताके भिटे न भोन, ते फ़सह तिहारेरी रोटी खेइ बटन। 29 तैखन पिलातुस तैन कां बेइर अव ते ज़ोने लगे, “तुस इस मैन्हु पुड कुन इलज़ाम लातथ?” 30 तैनेईं तैस जुवाब

दित्तो, “ए मैन्हु मुर्ज़म न भोथो त असेईं ए तीं कां न थियो आन्नो।” 31 पिलातुसे तैन सेइं ज़ोने लगे, “तुस एस नेथ ते अपने कानूनरे हिसाबे सेइं फैसलो केरा।” यहूदी लीडर ज़ोने लगे, “असन त केन्ची भी मारनेरी अज़ाज़त नईं।” 32 एन एल्हेरेलेइ भोवं कि ज़ैन गल्लां यीशुए ज़ोरी थी, कि ते केरही मौतां मरेलो पूरी भोन। 33 तैखन पिलातुस फिरी महले मां जेव ते तैनी यीशु कुजेइतां तैस पुच्छू, “कुन तू यहूदी केरो राज़ोस?” 34 यीशुए जुवाब दित्तो, “तू ए गल अपनि भोती ज़ोने लोरोस कि होरेईं मेरे बारे मां तीं सेइं ज़ेवरीए?” 35 पिलातुसे जुवाब दित्तो, “कुन अवं यहूदी आई? तेरी कौमरे ते प्रधान याजकेईं तू मेरे हवाले कियोरोस, तू ज़ो तीं कुन कियोरूए?” 36 यीशुए जुवाब दित्तो, “मेरू राज़ इस दुनियारू नईं, अगर दुनियारू भोथू त मेरे चले जंग केरेथे, ते मीं यहूदी लोकां केरे प्रधानां केरे हथ्थे ट्लेयोने न देथे, पन हन्ना मेरू राज़ इट्टेरू नईं।” 37 पिलातुसे ज़ोवं, “त कुन तू राज़ोस?” यीशुए जुवाब दित्तो, “तू ज़ोतस कि, अवं राज़ोईं, अवं एल्हेरेलेइ ज़रमोरोईं, ते एल्हेरेलेइ दुनियाईं मां ओरोईं कि सच्छेरे बारे मां शिक्षा देईं। ज़ैना सच्छे मन्तन तैना मेरी गल शुन्तन।” 38 पिलातुसे पुच्छू, “सत्र कुने?” एन ज़ोइतां ते यहूदी लीडरन कां जेव ते ज़ोने लगे, “अवं त एस मैन्हु मुर्ज़म न सेमझी।” 39 पन तुश्शे रीतरे मुताबिक अवं फ़सह तिहारेरे मौके पुड अक कैदी हथरां छडताईं। कुन तुस चातथ कि अवं तुश्शे लेइ यहूदी केरे राज़े हथरां छेड्डी? 40 तैना फिरी ज़ोरे-ज़ोरे सेइं ज़ोने लगे, ए नन्ना इश्शे लेइ बरअब्बा हथरां छड। बरअब्बा अक डैकू थियो।

19 पिलातुसे सिपेहिन हुक्म दित्तो, कि यीशु नेइतां कोडे बान। 2 ते सिपाहीयेईं कंटां केरू ताज बनेइतां यीशुएरे दोग्गे पुड रखवू, ते तैस बैजनी रंगरां लिगडां लुवां। 3 ते तैन केरे सामने तैन कां एइतां ज़ोने लगे, “हे यहूदी केरे राज़ा, नमस्कार!” ते तैस थप्पड बाहे। 4 तैखन पिलातुसे फिरी बेइर गेइतां लोकन सेइं ज़ोवं, हेरा, “अवं तैस तुसन कां फिरी बेइर आनताईं, तुसन पतो लगे कि मीं एसमां कोई ज़ुरम न लेइहोव।” 5 ज़ैखन यीशु कंटां केरू ताज दोग्गे पुड रेखतां ते बैजनी लिगडां लेइतां बेइर आनो त पिलातुसे तैन सेइं ज़ोवं, “हेरा ई मैन्हु।” 6 ज़ैखन प्रधान याजक ते मन्दरेरे पहरदारेईं यीशु लाव त ज़ोरे-ज़ोरे चिन्डां मरैतां ज़ोने लगे, “एस कूसे पुड च़ाढा, एस कूसे पुड च़ाढा!” पिलातुसे तैन सेइं ज़ोवं, “तुसे एस नेथ ते कूसे पुड च़ाढा, किजोकि अवं एसमां कोई दोष न लेहीं।” 7 यहूदी लीडर ज़ोने लगे, “इश्शो भी कानूने, ते तैसेरे कानूनरे मुताबिक ए मौतरे सज़ारे काबले। किजोकि ए अपने आपे जो परमेशेरू मट्टू ज़ोते।” 8 ज़ैखन पिलातुसे एन शुनू त तै मन्ना डरो। 9 ते फिरी अपने महले मां जेव ते यीशु सेइं फिरी ज़ोवं, “तू कोट्टां ओरोस?” पन यीशुए तैस किछ जुवाब न दित्तो। 10 पिलातुसे तैस सेइं ज़ोवं, “तू मीं सेइं गल कि न केरस? कुन तीं पतो नईं कि मीं अधिकार कि अवं तीं हथरां छेडी या कूसे पुड च़ेदेईं।” 11 यीशुए जुवाब दित्तो, “अगर ए अधिकार तीं परमेशेरे करां न भोथो मैलोरो त तेरो कोई अधिकार मीं पुड न थियो भोनो, पन ज़ैनी अवं तेरे हवाले कियोरोईं

ते हछे पापेरो हकदार भोरोए।” 12 तैसेरां बाद पिलातुसे यीशु हथरां छडनो चाव, पन यहूदी लोक चिन्डां मेरतां ज़ोने लगे, “अगर तू एस मैन्हु हथरां छाडेलो त तू महाराजरे पासे नई, जै कोई अपनो आप राज़ो बनाते त महाराजरे खलाफ भोते।” 13 ज़ैखन पिलातुसे एन शूनू त तैनी यीशु बेइर कुजेइतां अपने आदालतरे तखते पुड़ बिश्शो ज़ैस जो इब्रानी भाषाई मां, गब्बता, ज़ोतन। 14 ते फ़सह तिहारेरी तियेरारी दिहाड़ी थी ते दुपहारां केरे करीब थियो, तैखन पिलातुसे यहूदी लोकन जो ज़ोवं, “हेरा, ई तुश्शो राज़ो!” 15 पन तैना ज़ोरे-जोरे सेइं ज़ोने लगे, “एस इटां दूर ने! इटां दूर ने! ते एस क्रूसे पुड़ च़ाढ़ो!” पिलातुसे ज़ोवं, “कुन अवं तैस ज़ै तुश्शो राज़ो क्रूसे पुड़ च़ैदी?” प्रधान याजकेई ज़ोवं, “महाराजरे अलावा इश्शो कोई राज़ो नई।” 16 एसेरां बाद पिलातुसे यीशु तैन केरे हवाले कियो, ताके तैना तैस क्रूसे पुड़ च़ाढ़न। 17 यीशु अपनू क्रूस छुइतां खोपड़ी जो च़लो ज़ैस जो इब्रानी मां गुलगुता ज़ोतन। 18 तैड़ी तैनेई यीशु ते तैस सेइं साथी दूई डैकू भी क्रूसे पुड़ च़ाढ़ो, अक तैसेरे देइने पासे होरो बांए पासे ते यीशु मज़ाटे। 19 पिलातुसे एक्की पेखड़ी पुड़ तैसेरो दोष लिखतां क्रूसे पुड़ लाई तैस पुड़ लिखेरू थियूं, “यीशु नासरी यहूदी केरो राज़ो।” 20 काई यहूदेई तैन पढ़ू, किजोकि ज़ैस जगाई यीशु क्रूसे पुड़ च़ाढ़ोरो थियो ते जगा यरूशलेम नगरेने नेड़े थी, ते पेखड़ी पुड़ इब्रानी, लातीनी ते यूनानी भाषाई मां लिखेरू थियूं। 21 यहूदी केरे प्रधान याजकेई पिलातुसे कां दरखुवास की, “यहूदी केरो राज़ो न लिखा पन एन लिखा कि ए ज़ोते, ‘अवं यहूदी केरो राज़ोई।’” 22 पिलातुसे जुवाब दित्तो, “मीं ज़ैन लिखी छाडु, तैन लिखू।” 23 ज़ैखन स्पेहियेई यीशु क्रूसे पुड़ च़ाढ़ो ते तैनेई यीशुएरे लिगड़ा बंटां ते तैन केरे च़ेरे हिस्से किये, ताके सेभन अक-अक हिस्सो मैल्ले सिर्फ तैसेरू कोट बाकी राऊं, ज़ैन बा ते बुना तगर अक्के थियूं। 24 तैना एप्पू मांमेई ज़ोने लगे, “एसेरे टोटे केरनेरे बजाए शर्त रखम ज़ेसेरे नंवे पुड़ परची निसेली लिगड़ां तैस भोलां।” एन एल्हेरेलेइ भोवं कि ज़ैन पवित्रशास्त्रे मां लिखेरू थियूं तैन पूरू भोए कि, “तैनेई मेरां लिगड़ां बंटा ते मेरे कोटरे लेइ शर्त रखवू ते सिपैहीयेई एन कियूं।” 25 यीशुएरे क्रूसे कां तैसेरी अम्मा ते तैसेरी अम्मारी बेइन मरियम ज़ै क्लोपासेरी कुआन्श थी, मरियम मगदलीनी खड़खड़ी थी। 26 यीशुए अपनि अम्मा ते अक अपनो चेलो ज़ैस सेइं तै प्यार केरतो थियो, तैस कां नेइ खड़खड़ो लाव त तैनी अपने अम्मा सेइं ज़ोवं, “हे कुआन्श, हेर, तेरू मडूए।” 27 ते चेले जो ज़ोवं, “अजेरां बाद, ई तेरी अम्मा आए, तैनी चेले तैखने तै अपने घरे नेइ।” 28 ज़ैखन यीशुए ज़ानू कि हुनी सैरी गल्लां पूरी भोइजेइ, एल्हेरेलेइ ज़ेन्नेरे पवित्रशास्त्रेरे मां लिखेरू थियूं तैन पूरू भोवं त तैनी ज़ोवं, “मीं टलिश लग्गोरीए।” 29 तैड़ी अक भांड सिरके सेइं भेरतां रखेरू थियूं, केन्ने जूफेरी डालड़ी तैस मां डोबतां यीशुएरे ऐशी सेइं हुराई। 30 ज़ैखन यीशुए च़खू त तैनी ज़ोवं, “पूरू भोवं” ते क्रोड़ी टलोइतां अपने प्राण दित्ते। 31 ते एल्हेरेलेइ कि तै तियेरारी दिहाड़ी थी, होरसां आरामेरी दिहाड़ी ते कने फ़सह तिहार थियूं। ई यहूदी केरे लेइ खास दिहाड़ी थी, यहूदी न थिये चाते कि आरामेरे

दिहाड़े लाशां क्रूसन पुड़ टंगोरी रान, एल्हेरेलेइ तैनेई पिलातुसे कां गेइतां ज़ोवं, कि मुर्जमां केरि ज़न्घां टलोइतां तैन केरि लाशां उन्डी उसालम। 32 सिपाही आए तैनेई पेइले मैनेरी ज़न्घां टलोइ, फिरी होरेरी भी, ज़ैना यीशु सेइं साथी क्रूसे पुड़ च़ाढ़ोरे थियो। 33 पन ज़ैखन यीशुएरी बारी अई त तैनेई हेरू कि ते पेइले मेरि जेवरोए, ते तैनेई तैसेरी ज़न्घां न टलोइ। 34 पन सिपेहिन मरां एक्के अपनि बलम एन्तां यीशुएरे देल्लोड़ी मां बाई ते तैखने खून त पानी बगने लगू। 35 ज़ैनी मैने एन हेरू, तैनी गवाही दित्ती, ते तैसेरी गवाही सच़्चीए, ते तै ज़ानते, कि सच़ ज़ोते कि तुस भी विश्वास केरा। 36 एना सैरी गल्लां एल्हेरेलेइ भोइ कि पवित्रशास्त्रे मां लिखेरू पूरू भोए, “तैसेरी कोई हडी न टलोइ गए।” 37 पवित्रशास्त्रेरे एक्की होरि वचने मां लिखेरूए, “तैस ज़ैनेई बलमी सेइं बाई तैना तैस हेरेले।” 38 एना गल्लां केरे पत्ती अक मैन्हु यूसुफ नंवेरो ज़ै अरिमतियाह इलांवेरो रानेबालो थियो, पिलातुसे कां बिनती केरने लगे, कि यीशुएरी लाश दे, ए मैन्हु यहूदी लोकां केरे प्रधानां केरे डरे सेइं छेपतां यीशुएरो चेलो थियूं, तै पिलातुसे तैस अज़ाज़त दित्ती, ते तैनी यीशुएरी लाश नेही। 39 नीकुदेमुस भी अव, ज़ैनी एक्की बार राती यीशु सेइं मुलाकात कियोरी थी, तैनी गन्धरस ते एलवा आनोरे थियो, एन तेत्ती किल्लो थियूं। 40 तैखन तैनेई यीशुएरी लाश नेइतां यहूदी केरे दबनेरे रसमेरे मुताबिक तैस खुशबूदार चीज़ां लेइतां कफने मां पलेटतां रखवी। 41 ज़ैड़ी यीशु क्रूसे पुड़ च़ाढ़ोरो थियो तैड़ी बागी मां अक नंवी कन्न थी, ज़ैस मां पेइली कोई लाश न थी। 42 ते ए यहूदी केरि आरामेरी तियेरारी दिहाड़ी थी ते कन्न भी नेड़े थी तैनेई यीशुएरी लाश तैड़ी रखवी।

20 हफतेरी पेइली दिहैड़ी झेइतां हेजू आंधरू थियूं मगदलीन इलंवेरी मरियम कन्नो पुड़ आई, तैसां हेरू कि कन्नो करां घोड़ भी खड़ो कियोरोए। 2 ते दौवइती शमौन पतरस ते होरि चेलो कां पुज्जी ज़ै यीशु सेइं प्यार केरतो थियो, ज़ोने लगी, “तैनेई प्रभुएरी लाश कन्नो मरां केढतां नीयोरो, ते असन नई पतो तै कोइ रखखोरोए।” 3 एना शुन्तां पतरस त अक होरो चेलो कन्नारे पासे च़ले। 4 ते दुइये साथी-साथी दौवइतां च़लोरे थियो, पन तै होरो दुइयोवं चेलो पतरस करां अग्रोवं निस्सी जेव, ते तैस करां पेइलो कन्नो पुड़ पुज्जो। 5 तैनी लिकतां तक्कू ते कफन लाव ते अन्तर न जेव। 6 तैखन शमौन पतरस भी पत्ती-पत्ती तैड़ी पुज्जो ते सिधो कन्नो मां जेव तैनी हेरू कि तैड़ी लिगड़ां थियां। 7 ते कफनेरो तै रुमाल भी ज़ै यीशुएरे दोग्गे सेइं पलेटोरो थियो, लिगड़न मां नई पन अलग ठैरी थियो। 8 तैखन तै होरो चेलो भी ज़ै कन्नो पुड़ पेइलो पुज्जोरो थियूं अन्तर जेव तैस भी लेइतां याकीन भोवं। 9 किजोकि तैनेई पवित्रशास्त्रेरी ए गल न थी समझोरी जेसेरे बारे मां यीशुएरू मुड़दन मरां ज़ींतू भोनु ज़रूरी थियूं। 10 तैखन एना चेले वापस घरजो च़ले जे। 11 पन मरियम कन्नो करां बेइर लेरां देंती थी। लेरां देंती-देंती तैसां लिकतां कन्नो मांजो तक्कू। 12 त तैड़ी तैसां दूई स्वर्गदूत लाए ज़ैन छिंतां लिगड़ां लग्गोरां थियां, ज़ैड़ी यीशुएरी लाश रखोरि थी तैड़ी अक शरेइंते ते होरो परेइंते बिश्शोरे लाए। 13 तैनेई तैस पुच्छू, “हे कुआन्शो तू किजो लोरिस लेरां देने?” मरियम

जोवं, “तैनेई मेरे प्रभुएरी लाश नेवरीए ते पतो नई कोड़ि रख्खोरोए।” 14 एना जॉते ते पत्रोवं बदलोई त तैड़ी यीशु खड्खडो लाव, पन तैस पिशान न आई कि ए यीशुए। 15 यीशुए जोवं, “हे कुआन्शे तू किजो लेरां देने लोरिस? तू केस तोपने लोरिस?” तैसां समझू कि कोई बागबाने, तैसां जोवं, “हे जनाब अगर तीं ते नीयोरोए त ज़ो कि तीं कोड़ि रख्खोरोए ते अवं तैस नेड़।” 16 यीशुए तैस सेइं जोवं, “मरियम!” तैसां तैसेरे पासे फिरतां इब्रानी मां जोवं, “रब्बूनी!” जेसेरो मतलब हे गुरु। 17 यीशुए जोवं, “मीं सेइं न हुरा किजोकि अवं बाजी कां बाह हेजू नई जोरो, पन मेरे दूलान गेइतां जो कि अवं अपने बाजी ते तुशे बाजी ते अपने परमेशर ते तुशे परमेशरे कां बा चलोरोई।” 18 मरियम मगदलीनी तैट्ठां चली जेई ते चलन कां गेइतां तैन पतो दितो, “मीं प्रभु लाहोरोए ते तैनी मीं सेइं एना गल्लां की।” 19 तैस्से दिहैड़ी जै हफतेरी पेइली दिहाड़ी थी इलोइरे मौके सारे चले एककी ठेरी थिये, ते यहूदी लोकां केरे प्रधानां केरे डरे सेइं दार बन्द केरतां बिशशोरे थिये, तैखन यीशु अव ते मझाटे खडो भोइतां ज़ोने लगे, “तुसन शान्ति मैलती राए।” 20 एन जोइतां तैनी अपने हथ ते अपनि देल्लोड़ी तैन हिराई, चले तैस हेरतां खुशी भोए। 21 यीशुए फिरी जोवं, “तुसन शान्ति मैलती राए, ज़ेन्चरे बाजी अवं भेजोरोई, तेन्चरे अवं भी तुसन भी इस दुनियाई मां भेजताई।” 22 एन जोइतां तैनी तैन जो फुक दित्ती ते ज़ोवं, “पवित्र आत्मा नेथ। 23 जैन केरे पाप तुस माफ़ केरेले त तैन केरे पाप माफ़ भोले, जैन केरे तुस रखेले तैना राले।” 24 पन बादे मां 12 चलन मरां अक मैन्हु मतलब थोमा जैस दिदुमुस ज़ोतन, जैखन यीशु अव त ते तैन साथी न थियो। 25 जैखन होरि चले तैस सेइं जोवं, “कि असेईं प्रभु लाव,” तैखन तैनेईं जोवं, “जां तगर अवं तैसेरे हथ्यन मां कीलां करां गत्तन मां एंगलोई न छेड्डी, तांतगर विश्वास न केरि।” 26 अठ दिहैड़ना बाद यीशुएरे चले एककी बार फिरी तैस्से ठेरी बिशशोरे थिये, ते थोमा भी तैड़ी थियो ते दार भी बंद थियूं, ते यीशु एइतां तैन मझाटे खडो भोव, ते तैन जो ज़ोने लगे, “तुसन शान्ति मैल्ले।” 27 फिरी तैनी थोमा जो जोवं, “अपनि अंगलोई आन ते मेरो हथ हेर ते अपने हथ्ये सेइं मेरी दल्लोड़ी हेर, शक न केर बल्के मीं पुड़ विश्वास केर।” 28 थोमा तैस जो जोवं, “हे मेरे प्रभु हे मेरे परमेशर!” 29 यीशुए तैस जो जोवं, “तीं लेइतां तीं मीं पुड़ विश्वास कियो, धन तैना ज़ैना बगैर लाहने मीं पुड़ विश्वास केरन।” 30 यीशुए अपने चेलां केरे सामने होरे भी बड़े चमत्कार कियोरे थिये, ज़ैना इस किताबी मां नई लिखोरे। 31 पन ज़ैना लिखोरन, एल्लेरेलेड लिखोरेन, कि तुस विश्वास केरथ, कि यीशु परमेशरेरू मडू, मसीहे आए, ते विश्वास केरतां तैसेरे नंबे सेइं हमेशारी ज़िन्दगी हासिल केरथ।

21 बादे मां यीशुए एप्पू एककी फेरे फिरी अपने चलन पुड़ तिबिरियुस समुन्द्रेो बन्ने एन्चरे बांदो भोव। 2 शमौन पतरस, थोमा जैस जो दिदुमुस ज़ोतन, नतनएल ज़ै गलीलेरे काना नगर मां रातो थियूं, ते जेबेदरू मडू ते होरे चले भी तैड़ी थियो। 3 शमौन पतरस तैन सेइं जोवं, “अवं मेळली दलाने गाताई।” तैनेईं जोवं, “अस भी तीं साथी चलतम।” तैना

तैट्ठां निस्से ते किशती मां चेट्टां जे, पन तैस राती तैन किछ न मैल्लू। 4 झेइं सुबेलो यीशु बन्ने पुड़ एइतां खडो भोव, पन चलेईं न पिशानो कि ए यीशुए। 5 तैखन यीशुए तैन जोवं, “हे बचव, कुन तुसन कां किछ खाने जो आए?” तैनेईं जुवाब दितो, “नई।” 6 यीशुए जोवं, “ज़ाल किशतरे देइने पासे छडथ त तुसन किछ मेळली मैलनिन।” तैनेईं ज़ाल छडु ते मेळली एत्री ज़ाले मां लेगि कि ज़ाल खिचोने न लगू। 7 तैखन यीशु जैस चले सेइं प्यार केरतो थियो तैनी पतरस सेइं जोवं, “ए त प्रभुए।” जेरू शमौन पतरसे शुन्नु कि प्रभुए, तैनी अपनो चोगो, ज़ै कम केरनेरे लेड खोल्लोरो थियो लाव ते पैनी मांजो छाल मारी। 8 होरे चले ज़ैना किशती मां थिये ज़ाल ज़ैना मेळलेईं सेइं भेरतां थियूं तैनेईं खिचतां आनु, किजोकि तैना 100 मीटर दूर थिये। 9 जैखन तैना बन्ने पुड़ ओस्से, त तैनेईं मूरन पुड़ मेळली रेखोरिन ते इलेखी रोटी भी लेई। 10 यीशुए तैन सेइं जोवं, “ज़ैना मेळली तुसेईं दलेतोरेन तैन मरां किछ इरां आनां।” 11 शमौन पतरस किशती मां चढो ते ज़ाल इलेखी पुड़ खिचतां आनु जैस मां 153 मेळली लेगोरी थी, ते फिरी भी ज़ाल नई छींदोरू। 12 यीशुए तैन सेइं जोवं, “एज्जा केलोव खाथा।” पन चलन मरां केन्ची हिम्मत न अई कि पुछन, “कि तू कौन आस?” तैना ज़ानते थिये कि ए प्रभुए। 13 यीशुए रोटी दलाती ते तैना भी दित्ती ते मेळली भी दित्ती। 14 यीशु मुडन मरां ज़ीतो भोनेरां पत्ती दलेइयोवं फेरे अपने चलन पुड़ बांदो भोइ जेव। 15 जैखन तैनेईं केलोव खाव, त यीशुए शमौन पतरसे सेइं जोवं, “शमौन,” यूहन्नेरे मट्टा, “कुन तू होरि चलन करां जादे मीं सेइं प्यार केरतस?” तैनी जोवं, “हाँ प्रभु तू त मीं ज़ानतस कि अवं तीं सेइं प्यार केरताई।” यीशुए जोवं, “मेरां गबडां चार।” 16 यीशुए फिरी तैन सेइं जोवं, “शमौन, यूहन्नेरे मट्टा, कुन तू मीं सेइं प्यार केरतस?” तैनी जोवं, “हाँ प्रभु, अवं तीं सेइं प्यार केरताई।” यीशुए तैस सेइं जोवं, “मेरी भैड्डां सम्भाल।” 17 तैनी दलेइयोवं फेरे फिरी पुच्छू, “शमौन यूहन्नेरे मट्टा, कुन तू मीं सेइं प्यार केरतस?” पतरस दुःखी भोइतां जोवं, “प्रभु तू एप्पू सैरी गल्लां ज़ानतस, तू ज़ानतस, कि अवं तीं सेइं प्यार केरताई,” यीशुए, जोवं, “मेरी भैड्डां चार।” 18 अवं तीं सेइं सत्र ज़ोताई, जैखन तू नौजवान थियो त अपनू मज़ एप्पू बंधतो थियो, ते ज़ैड़ी चातो थियो, एप्पू गातो थियो, पन जैखन तू बुडो भोलो, त अपने हथ अग्रोवं केरेलो, ते होरो तेरू मज़ बंधेलो ज़ैड़ी तू न चालो तैड़ी तीं नेले। 19 यीशुए ए गल जोइतां इशारो कियो कि पतरस कोस मौतां मेरतां परमेशरेरी महिमा बांदी केरेलो। तैखन यीशुए जोवं, “मीं पत्ती चल।” 20 पतरसे फिरतां तक्कू, कि यीशु सेइं प्यार केरनेबालो चेलो तैस पत्ती चलोरोए थियो, ए तै चेलो थियो ज़ैनी रोटी खाते यीशुएरे पासे लिकतां पुछेरू थियूं, “हे प्रभु तै कौने, ज़ै तीं दलुवालो?” 21 पतरसे तैसेरे पासे तेकतां यीशुए पुच्छू, “हे प्रभु एस चले सेइं कुन भोलू।” 22 यीशुए जुवाब दितो, अगर अवं चेईं कि, “अगर मेरे वापस एजने तगर ज़ीतो राव त एसमां तीं कुन? तू मीं पत्ती चल।” 23 एन्चरे दूलान मां ए गल सेभीए फैली जेई, कि ए चेलो न मरेलो, पन यीशुए एन न थियूं ज़ोरू, कि तै न मरेलो अगर अवं

चैई कि, “अगर मेरे वापस एजने तगर ज़ींतो राव, त एसमां तीं कुन?”
24 ई तै चेलोए, ज़ै इना गल्लां केरि गवाही देते, ते ज़ैनी एना गल्लां
लिखोरिन, असां ज्ञानतम कि तैसेरी गवाही सच्चीए। 25 यीशुए होरां भी
बड़ां कम्मां कियोरां थियां, अगर सेबभी केरे बारे मां लिखनू भोए त अवं
समझताई, कि तैना किताबां अज़ भोथी त तैन केरे लेइ इस दुनियाई मां
ठार न थी भोनी।

प्रेरितों के काम

1 जनाब थियुफिलुस, मीं अपनि पेइली किताब मां तैना सैरी गल्लां लिखोरिन, जैना यीशु शुरू मां केरतो ते शिखालतो राव, 2 तैस दिहैड़ी तगर जेइस तै स्वर्ग मांजो नीयो जेव। तैस करां पेइले तैनी अपने चुनोरे प्रेरितन पवित्र आत्मारै शक्त्तरे जिरिये सेइं किछ हुकम भी दित्तोरे थी। 3 यीशुए दुःख झैलनेरां ते मौतरे बाद तैनी अपने ज़ीतें भोनेरां काई पक्कां सबूतां तैन हिरां, ते 40 दिहाड़न तगर तैन लेइहोतो राव, ते परमेशरैरे राज़ेरै गल्लां शुनातो राव। 4 एककी फेरे जैखन यीशुए अपने चलन सेइं साथी थियो तैनी तैन ठाकू, “कि तुस यरूशलेम नगरे मरां बेइर न गेइयथ ते मेरे बाजी परमेशरैरो तै वादो पूरो भोनेरो इंतज़ार केरथ, जेसेरे बारे मां तुसेईं मीं करां शुनोरू भी आए। 5 किजोकि यूहन्ना त लोकन पैनी सेइं बपतिस्मो दित्तो, पन तुसन थोड़े दिहैड़ना पत्ती पवित्र आत्मा सेइं बपतिस्मो दित्तो गालो (यानी परमेशर पवित्र आत्मा भेजेलो जै तुसन सेइं साथी रालो)।” 6 ज़ताली प्रेरित दुबारा यीशु सेइं मिले, त तैनेईं तैस पुच्छू, “हे प्रभु, कुन तू इस वक्ते फिरी इस्राएले तैसेरू राज़ देने बालोस?” 7 तैनी तैन सेइं ज़ोवं, “तैस वक्तेरो या जेइस तैना गल्लां भोली, तैन केरे बारे मां तुसन ज़ान्नेरी कोई ज़रूरत नई, ज़ैना बाजी परमेशरै अपने अधिकार मां रेखोरिन। 8 पन पवित्र आत्मा जैखन तुसन पुड़ उतरेली त तुसन शक्ति मैलेली, ते तुस यरूशलेम नगर ते सारे यहूदिया ते सामरिया इलाकन मां बल्के धेरतारे हर पासे मेरे गवाह भोले।” 9 एना गल्लां ज़ोनेरां पत्ती यीशु तैन केरे सामने हेरते-हेरते परमेशरै तै स्वर्ग जो नीयो, ते बिदलारां तै तैन केरे एछछन करां छुपाव। 10 जैखन तैना यीशुए अम्बरे मांजो गांतो तकने लोरे थिये, त अचानक, दूईं मड़द जैन छित्तां लिगड़ां लगगोरां थियां तैन कां एइतां खड़े भोए। 11 ते ज़ोने लगे, “हे गलीली मड़दाव तुस खड़खड़े अम्बरेरे पासे कुन तकने लोरेथ? एहे यीशु जेन्चरे तुशे सामने परमेशरै, स्वर्ग मांजो नीयो, जेन्चरे तुसेईं स्वर्ग मांजो गांतो लाहोरोए तेन्चरे फिरी एइतो लाएले।” 12 जैखन चले जैतून पहाड़े पुडेरं जैन यरूशलेम नगरेरे नेड़े एककी किलोमीटर दूरे, यरूशलेम नगरे मांजो वापस आए। 13 नगरे मां एइतां तैना तैस कमरे मां जे ज़ैड़ी तैना रहते थिये, तै कमरो दुइयोवं छते थियो। तैना प्रेरित इना थिये, पतरस, यूहन्ना, याकूब, अन्द्रियास, फिलिप्पुस थोमा, बरतुल्मै, मत्ती ते हलफईरू मट्टू याकूब ते शमौन जेलोतेस ते याकूबेरू मट्टू यहूदा रहते थिये। 14 एना सब मड़द ते किछ होरि कुआन्हां जैनेईं यीशुएरी मद्दत कियोरी थी, ते यीशुएरी अम्मा मरियम ते यीशुएरे ढलान सेइं साथी अक मन भोइतां लगातार प्रार्थनाईं मां लगगोरे थिये। 15 ते तैने दिहाड़न मां पतरस तैन ढलां केरि टोली मां जैन केरि तैधात कोई 120 थिये, पतरस खड़ो भोइतां ज़ोने लगे। 16 “हे मेरे ढलाव, पवित्रशास्त्रेरी तै गल जै पवित्र आत्मा दाऊद राज़ेरी जिरिये पेइले ज़ोरी थी, पूरी भोनी ज़रूरी थी, तै गल यहूदारे बारे मां ज़ोरी थी, जैनी यीशुएरे टलुवाने बालां केरि मद्दत कियोरी थी। 17 तै असन सेइं साथी सेवा केरनेबालो थियो, ते असन साथी

तै गनो गातो थियो। 18 तैनी नीच कमैयरे लेइ यीशु टलुवाव, ते फिरी तैनी तैना पेइसे यहूदी लीडरन वापस दित्ते, ते तैनेईं तैन पेइसां केरू अक ऊडार घिन्नु, जैड़ी तै दोगेरे भारे खिरकोरो थियो, ते तैसेरू पेट फेटतां तैसेरी एंटलोड़ी बेइर निस्सी।” 19 यरूशलेम नगरेरे सारे लोकन ए पतो लगगोरो थियो, तैनेईं अपने भाषाईं मां तैस उडारेरू नवं हकलदमा रख्खू, जेसेरो मतलबे, “खूनेरू ऊडार।” 20 किजोकि दाऊदे भजना केरि किताबी मां लिखोरूए कि, “तैसेरू घर उड़ड़े, ते तैस मां कोई बसने बालो न भोए, ते इन भी लिखोरूए, तैसेरी पदवी कोई होरो ने।” 21 एल्हेरेलेइ एन ज़रूरीए कि अक एरो मैन्हु चुनो गाए, जै प्रभु यीशुएरे सारे कम्मां केरे गवाह भोए, यानी यीशुएरो यूहन्ना करां बपतिस्मो नेने करां लेइतां असन करां यीशुएरे स्वर्ग गाने तगर 22 तैन मरां अक मैन्हु चुनो गाए, जै असन सेइं साथी यीशुएरे ज़ीतें भोनेरो गवाह भोए। 23 तैखन तैनेईं दुइये ज़ने नामज़द किये, अक यूसुफ ज़ैस जो बरसब्बास ज़ोते थिये, जेसेरो खताब यूस्तुस थियो, ते दुइयोवं मत्तियाह थियो। 24 ते एन ज़ोइतां प्रार्थना की, “हे प्रभु, तू सेबभी केरे दिले ज़ानतस ते असन पुड़ बांदू केर, कि इन दुईंन मां तीं कौन ज़ेरो चुनोरोए। 25 कि तै इस सेवकाई ते प्रेरिताइयोरो पद ने, जै यहूदा शैरतां अपने ठैरी जेवरोए।” 26 तैनेईं तैसेरे बारे मां शर्त रखेरू थियूं, जैन मत्तियाह नंवे पुड़ निस्सू, एल्हेरेलेइ तै 12 प्रेरितन सेइं साथी गनो जेव।

2 जेइस यहूदी केरे पिन्तेकुस्त तिहारेरी दिहाड़ी आई, त तैना सब एककी ठैरी अकोट्टे थिये। 2 अचानक अम्बरेरां आवाज़ आई, जेन्चरे बड़ो बात चलने लोगोरो थियो, ते तैस सेइं सारू घर घुमने लगू जैड़ी तैना बिशशोरे थिये। 3 ते तैनेईं अगारी लप्परी ज़ेरि ज़िभां लेई, ज़ैना अलग-अलग भोइतां तैन सेबभन पुड़ एइतां टिकी। 4 ते तैना सब पवित्र आत्माई सेइं भरपूर भोए, ते आत्मारै वरदाने सेइं तैना अलग-अलग भाषा केरने लगे। 5 तैस वक्ते मां, बड़े यहूदी भक्त ज़ैना तिहारे मां दुनियारी सैरी मुलखन मरां ओरे थिये, तैना यरूशलेम नगरे मां राने लोरे थिये। 6 जैखन तैनेईं ए बातेरी ज़ेरि आवाज़ शुनी त बड़े लोक जम्हां भोए, ते सब लोक बड़े हैरान रेइजे, किजोकि हर कोई चलन अपने-अपने भाषाईं मां गल्लां केरते शुन्ने लोरे थियो। 7 ते सब बड़े हैरान भोइतां ज़ोने लगे, हेरा, “कुन एना ज़ोनेबाले सारे गलील इलाकेरे रानेबाले नई? 8 फिरी एन कुन भोइ रावरूए कि, असन मरां हर कोई अपनि-अपनि भाषा शुन्ने लोरोए। 9 असन मरां किछ इन इलाकन मरां आन, पारथी, मेदी, एलामी ते मेसोपोटामिया, यहूदिया, कप्पडूकिया, पुन्तुस ते आसिया, 10 फ्रूगिया, पंफूलिया, मिस्र मुलख, ते लीबिया मुलखे जै कुरेन नगरेरे नेड़े, इन सब मुलखां केरे रानेबाले ते रोमी मुसाफर, 11 कुन यहूदी, ते कुन यहूदी पंथ धारण केरनेबाले, क्रेती ते अरब मुलखेरे लोक भी आन, पन अस अपनि-अपनि भाषाईं मां तैन करां परमेशरैरां बड़ों-बड़ों कम्मां केरि चर्चा शुन्ने लोरेम।” 12 तैना सब बड़े हैरान भोइ जे ते घबरेइतां एककी होरि पुच्छने लगे, “कि एन कुन भोइ रावरूए?” 13 पन किछ तैन केरि हासी बनेइतां ज़ोने लगे, “कि एनेईं सज़री शराप पियोरीए।” 14 तैखन पतरस 11

प्रेरितन सेइं साथी खडो भोव, ते बडे ज़ोरे सेइं ज़ोने लगे, “हे लोकव हे यहूदियारे रानेबालव ते हे यरूशलेम नगरेरे राने बालाव, मेरी गल ध्याने सेइं शुना, अवं तुसन ज़ोताई इड़ी एन कुन भोने लोरूए। 15 ज़ैन तुस बुझने लोरेथ तैन नई, एना मैन्हु नशे मां नई, किजोकि हुन्ना त झेझोरे नौ बजोरेन, 16 बल्के ए ते गल्ले, ज़ै परमेशरे योएल नेबेरे ज़िरिये ज़ोरी थी, 17 परमेशर ज़ोते कि, आखरी दिहैइन मां एरू भोलू, अवं अपनि आत्मा सेब्भी लोकन देइलो, ते तुशशां मट्टां कुइयां भविष्यवाणी केरेलां, ते तुशशे नौजवान दर्शन हेरेले, ते बुडे सुपना हेरेले। 18 बल्के अवं तैन दिहैइन मां अपने सेवादार मइदन ते सेवादार कुआन्शन पुइ अपनि आत्मा उतरेलो, ते तैना भविष्यवाणी केरेले। 19 अवं अम्बरे मां आजीब-आजीब कम्मां ते ज़मीनी पुइ निशान, यानी अग, खून ते कालो तूएरी बिदलार हिरियेलो। 20 प्रभुएरी दिहाड़ी एजने करां पेइले, दिहाड़ो आंधरो भोइ गानोए, ते चाँदनी खूनेरी ज़ेरी भोनीए, तै अक महान ते खास दिहाड़ी भोनीए। 21 ते ज़ै कोई परमेशरेरू नवं घिन्नेलो तैस मुक्ति मैलेली।” 22 “हे इस्राएलेरे लोकव, इना गल्लां शुना, यीशु नासरत नगरेरो अक मैन्हु थियो, ज़ै परमेशर तुशशे लेइ भेजोरो थियो, ते एस गल्लारी तसदीक तैसेरे खास चमत्कारां केरे सबूतेई सेइं भोचे, ज़ैना परमेशरे तैसेरे ज़िरिये सेइं इशशे सामने हिरां, ज़ेन्चरे कि तुस एप्पू भी ज़ानतथ। 23 ज़ैखन तै परमेशरेरे इंतज़ामेरे पूरे मौके पुइ ज़ानेरे हिसाबे सेइं टलुवाव, ते तुसेई तै अधर्मी लोकां केरे हथ्ये क्रूसे पुइ टंगइतां माराव। 24 पन परमेशरे तै मौतरे सक्के मरां छुटेइतां ज़ीतो कियो, किजोकि एन भोइ न थियू सकतु, कि तै मौतरे कब्जे मां राए। 25 किजोकि दाऊद मसीहेरे बारे मां एन ज़ोते, हेरा, प्रभु हर वक्त मेरे सामने, अवं तैन लोकन करां न डरेलो ज़ैना मेरो नुकसान चातन। 26 तांए मेरो दिल बडो खुश भोव, ते अवं खुशी सेइं जोइलो, बल्के मेरी जान उमीदी सेइं जीएली। 27 किजोकि तू मेरे प्राणन पाताले मां राने न देलो, ते न अपने पवित्र मैन्हु शइने देलो! (Hadēs g86) 28 तीं मां जिन्दगरी बत हेरेवरिए, तू अपने हज़ूरी सेइं मीं भरपूर केरेलो।” 29 “हे मेरे ढ्वाव, अवं कौमारे बुजुर्ग दाऊदरे बारे मां तुसन सेइं साफ-साफ जोई सकताई, कि तै मेरे भी जेव, ते दब्बो भी ते तैसेरी कन्न अज़ तगर इशशे सामने मौजूद। 30 तै नबी थियो, ते तै ज़ानतो थियो, कि परमेशरे तैस सेइं वादो कियोरो थियो, ‘अवं तेरी खानदनी मरां अक मैन्हु तैसेरे तखते पुइ बिशैलेलो।’ 31 तैनी पेइले भोनेबैली गल्लां ते मसीहेरे मुइदन मरां ज़ीते भोनेरे बारे मां बियांन कियेरू थियू, कि न तै पाताले मां राने देलो, ते न अपने पवित्र मैन्हु शइने देलो! (Hadēs g86) 32 “एहे यीशु परमेशरे ज़ीतो कियो ज़ेसरे अस सब गवाह आम। 33 ते हुना तै स्वर्ग मां खास ठेरी यानी परमेशरेरे देइने पासे आए। ते तैने बाजी परमेशरे करां पवित्र आत्मा हासिल की, ज़ेसरो तैने वादो कियोरो थियो, यीशुए असन पवित्र आत्मा भरपूरी सेइं दितोरीए, ज़ैन तुस लातथ ते शुन्तथ। 34 किजोकि दाऊद त एप्पू स्वर्ग मां नई जोरो, पन फिर भी तै एप्पू ज़ोते, प्रभु परमेशरे मेरे प्रभु सेइं ज़ोवं, मीं सेइं साथी राज़ केर। 35 ज़ांतगर अवं तेरे दुश्मन तेरे अधीन न केरि। 36 एल्हेरेलेइ, इस्राएलेरे सारे लोकन पतो

लगे, कि परमेशरे, यीशु ज़ै तुसेई क्रूसे पुइ चाढ़ो तै प्रभु भी कियो ते मसीह भी कियो।” 37 एना गल्लां शुन्तां तैन बडो एसास भोव कि तैना पापिन, तैखन तेनेई पतरसे ते होरि प्रेरितन सेइं ज़ोवं, “हे ढ्वाव अस कुन केरम?” 38 पतरसे तैन सेइं ज़ोवं, “पापन करां मनफिराथ ते तुसन मरां सारे यीशु मसीहेरे नंवे सेइं बपतिस्मो घिन्ना, त परमेशर तुसन माफ़ केरेलो ते पवित्र आत्मा तुसन इनामे मां मैलेली। 39 एल्हेरेलेइ कि ए वादो तुसन त तुशशी औलादी सेइं आए ते तैन सेबभन सेइं ज़ैना दूर-दूर रातन, ते ज़ैन इशशो प्रभु परमेशरे एप्पू कां कुजाते।” 40 पतरसे होरि भी बेडि गल्लां केरि गवाही दित्ती, ते तैन बार-बार ज़ोवं, कि अपनो आप एस टैरी कौमी करां बचाथ। 41 ते तेनेई तैसेरी गल्लां कबूल की, तैनी तैन बपतिस्मो दितो, तैस दिहैड़ी लगभग कोई 3000 मैन्हु तैन मां शामिल भोए। 42 एना लोक प्रेरितन करां शिक्षा हासिल केरते थिये, ते संगती रखते थिये, ते साथी रोटी खाते थिये, ते प्रभु भोज मनाते थिये ते प्रार्थना केरने मां मघन रहते थिये। 43 प्रेरितां केरे ज़िरिये सेइं बडे चमत्कार ते निशान भोते थिये, ते यरूशलेमेरे सारे लोक डेरि जे। 44 यीशु मसीह पुइ विश्वास केरनेबाले सारे अकोट्टे रहते थिये, ते सैरी चीज़न मां एक्की होरि बराबर हिस्सेदार रखते थिये। 45 ते तैना अपनि जेइदात ते माल सबाब बेचतां एक्की होरेरी ज़रूरतेर मुताबिक रकम बंटतां सेब्भी केरि ज़रूरत पूरी केरते थिये। 46 तैना रोज़ अक मन भोइतां मन्दरे मां अकोट्टे भोते थिये, ते घरन मां साथी रोटी खाते थिये ते प्रभु भोज मनाते थिये, ते अकोट्टे भोइतां खुशी सेइं खाते थिये। 47 तैना परमेशरेरी तारीफ़ केरते थिये, तैना सैरी केरि नज़री मां रोडे थिये। ज़ैन पापन करां मुक्ति मैलती थी, परमेशर तैन लोकन तैन केरि टोली मां शामिल केरतो थियो।

3 एक्की दिहाड़े पतरस ते यूहन्ना प्रार्थना केरने दीसरे टलेइ बजेई मन्दरे मांजो च़लारे थियो। 2 ते मैनेई अक ज़र्मिनरो टोंटो छुइतां आनोरोए थियो, ते तैस मन्दरेरे दारे पुइ छडते थिये, ज़ैस दारेरू नवं “रोडू” थियू, ताके अन्तर गाने बालन करां भीख मगगे। 3 ज़ैखन तैनी पतरस ते यूहन्ना मन्दरे मांजो गांते लाए त तैन करां भीख मगाने लगे। 4 पतरस ते यूहन्ना तैसेरे पासे खेड़ोइतां ज़ोने लगे, “इशशे पासे तक।” 5 ते तैस उमीद भोइजेइ कि एन करां किछ मैलेलू, तै तैन केरे पासे तकने लगे। 6 पतरसे ज़ोवं, “सोन्नु चाँदी त असन कां अथ्थी नई, पन ज़ैन मीं कां आए तैन अवं तीं देताई, तू यीशु मसीह नैसरेरे नंवे सेइं खडो उठ ते च़ल फिर।” 7 पतरसे ज़ेरो तैसेरो देइनो हथ टलेइतां खडो कियो, त तैसेरे पावन मां ते गुडन मां ताकत आई। 8 ते तै तैखने खडो भोव, ते च़लने फिरने लगे, ते फिरि छालां मारतो ते परमेशरेरी तारीफ़ केरतो तैन सेइं साथी मन्दरेरे अंगने मां च़लो जेव। 9 ते सेब्भी लोकेई तै च़लतो फिरतो ते परमेशरेरी तारीफ़ केरतो लाव। 10 ते पिशानो ई त तैए, ज़ै मन्दरेरे रोडे दारे पुइ बिशतां भीख मगतो थियो, ते ज़ै चमत्कार एन लोकां केरे सामने भोव, त तैना लोक बडे हैरान राए। 11 ज़ैखन तै मैन्हु पतरस ते यूहन्ना टलेइतां खडखडो थियो, त सब लोक ज़ैना तैड़ी खडखडे थिये, बडे हैरान भोइतां सुलैमानी अंगने मां देवइतां तैन कां आए। 12 पतरसे एन हेरू त

तै लोकन कां एन्चरे खड़ो भोव, ते ज़ोने लगे, “हे इस्राएली लोकव तुस एस गल्ली पुड़ किजो हैरान भोरेथ, ते असन एन्चरे किजो तकने लोरेथ, असेई अपने शक्ति या भक्ति सेइं ए टोटो मैन्हु चलने फिरनेरे काबल नई बनेवरोए। 13 अब्राहम ते इसहाक ते याकूबेरे परमेशरे ते इश्शे पूर्वजां केरे परमेशर अपने दासे यीशु महिमा दित्ती, पन तुसेई तै यहूदी लीडरन कां दित्तो कि तैना तैस मारन। पिलातुसे तै हथरां छडनेरो इरादो कियो, पन तुसेई यीशुएरो इन्कार कियो। 14 तुसेई यीशु अक एरो पवित्र ते धर्मी मैन्हु रद कियो, ते पिलातुसे कां दरखुवास की, कि तै तुश्शे लेइ अक कातली हथरां छडे। 15 तुसेई त ज़िन्दगी देनेबालो मारो, पन अस गवाह आम, कि परमेशरे तै मुडदन मरां ज़ीतो कियो। 16 तैसेरे नव्वेरी शक्ति एस टोटो, जै तुश्शे सामने ते जैस तुस ज्ञानतथ शिफा दित्तोरिये ते ए मैन्हु यीशुएरे नव्वे सेइं ते यीशु पुड़ विश्वास केरने सेइं बिलकुल ठीक भोव, ते ए एप्पू तुश्शे सामने। 17 “हे मेरे ह्वाव अवं ज्ञानताई कि जैन किछ तुसेई ते तुश्शे लीडरेई यीशु सेइं कियूं, तैन तुसेई अनजान भोइतां कियूं। किजोकि तुसन न थियो पतो कि तै मसीह आए। 18 पन परमेशरे एना सैरी गल्लां जैना तैनी अपने नेबी केरे ज़िरिये जोरी थी, कि मसीह दुःख ऊठालो ते मरेलो ते तैनी तैना एन्चरे पूरी की। 19 बरसा पापन करां मनफिराथ ते परमेशरेरे पासे फिरा ते तै तुश्शे पाप माफ़ केरेलो, ते परमेशरेरी तरफां तुश्शे लेइ परमेशरे तरफां रोड़े दिहाड़े एज्जले। 20 ते तै मसीह यानी यीशु जै तैनी ठहरावरो आए, तुश्शे लेइ भेजे। 21 पन ज्ञांतगर तैना सैरी चीजां बहाल न केरे, जैन केरे बारे मां परमेशरे बड़े पेड़ले अपने पवित्र नेबी केरि ज़बानी जोरूप, तांतगर यीशुएरू स्वर्ग मां रानू ज़रूरीए। (aiōn g165) 22 जेन्चरे मूसा एस बारे मां जोरू थियूं, प्रभु परमेशर तुश्शे ह्वालन मरां तुश्शे लेइ मेरो ज़ेरो अक नबी भेजेलो, जैन किछ तै तुसन सेइं जोए, तुस तैसेरी गल शुनथ। 23 पन जै तैस नेबेरी गल न शुनेलो, तै लोकन मरां नाश कियो गालो। 24 ते शमूएल परमेशरेरी गल्लां जोनेबाले करां देइतां पेड़ले तमाम नेबेई इन दिहाड़ां केरे बारे मां शुनावरू। 25 तुस नेबी केरि खानदनी ते जै करार परमेशरे इश्शे पूर्वजन सेइं कियोरो थियो, तैस मां तुस सब शामलथ, परमेशरे अब्राहमे सेइं जोरू थियूं, कि तेरे मट्टेरे ज़िरिये सेइं दुनियारी तमाम कौमन बरकत मैलेली। 26 परमेशरे अपनो सेवक मुडदन मरां ज़ीतो कियो ते पेड़लो तुसन कां भेजो, ताके तुसन ते बरकत दे, कि तुसन मरां हर कोई पापेरी ज़िन्दगी शैरतां परमेशरेरे पासे फिरे।”

4 हेजू पतरस ते यूहन्ना लोकन सेइं गल्लां केरते थिये, त किछ याजक ते मन्दरेरे पेरहेदार ते किछ सदूकी लोक तैड़ी पुजे। 2 तैना बड़े सेरकोए, कि पतरस ते यूहन्ना लोकन एरी शिक्षा देते कि परमेशरे मरे लोकन ज़ीतो केरेलो, जेन्चरे तैनी यीशु मुडदन मरां ज़ीतो कियोरोए। 3 तैनेई तैना दुइयोंव दिहेड़ी तगर गिरफ्तार रखवे, किजोकि तै ड्लोझारो मौको थियो। 4 पन केही लोकेई वचन शुन्तां यीशु पुड़ विश्वास कियो, ते तैन केरि तैथात 5000 मडद भोइ। 5 होरसां एरू भोव कि तैन केरे लीडर ते बुजुर्ग ते शास्त्री यरूशलेम नगरे मां जम्हां भोए। 6 हन्ना

महायाजक तैड़ी थियो, ते कैफा ते यूहन्ना महायाजक ते सिकन्दर ते खानदनेरे होरे लोक भी तैड़ी थियो। 7 तैनेई पतरस ते यूहन्ना मझाटे खड़े किये ते तैन पुच्छू, “तुसेई केसेरे शक्ति या केसेरे अधिकारे सेइं एन कम कियोरूप?” 8 तैखन पतरस पवित्र आत्माई सेइं भरपूर भोइतां तैन एन्चरे सेइं ज़ोने लगे, “हे कौमरे लीडराव ते बुजुर्गव। 9 अगर अज़ असन एल्हेरेलेइ पूछ ताछ की गातीए, कि असां एक्की रोड़े कम्मरो जुवाब देम, जैन असेई एक्की टोटो मैनेरे लेइ कमाव ते तैस शिफ़ा दित्ती। 10 ते तुसन ते सारे इस्राएलिन ए पतो लगगे, कि ए मैन्हु यीशु मसीह नैसेरे नव्वेरी शक्ति सेइं बेइज्जोइतां तुश्शे सामने खड़ोए, जै यीशु तुसेई क्रूसे पुड़ चाढ़ोरो थियो, पन परमेशरे तै मुडदन मरां ज़ीतो कियोरोए। 11 ए तैए घोड़े, जै तुसेई मिस्त्रेई रद्दी कियोरो थियो, पन तैए घोड़ कूनेरो खास घोड़ भोइ जेव। 12 ते पापां केरि माफ़ी केन्ची होरेरे ज़िरिये सेइं नई, किजोकि अम्बरेरां बुन मैनन् मां कोई होरू दुइयोंव नवं नई दित्तेरू, जेसेरे ज़िरिये सेइं मुक्ति मैल्ले, सिर्फ़ यीशुएरे नव्वे सेइं मुक्ति आए।” 13 जैखन तैनेई पतरस ते यूहन्नारी दिलेरी हेरी, त तैखन तैन पतो लगे, कि एना त अनपड़ ते मामुली मैन्हु आन ते तैना बड़े हैरान भोए, तैखन तैनेई बुड्डी कि एना लोक यीशु सेइं साथी राहोरेन। 14 तैनेई पतरस ते यूहन्नारे खलाफ किछ न जोई बटु, एल्हेरेलेइ कि जै मैन्हु बेइज्जोरो थियो, तै मैन्हु तैन सेइं साथी खडखडो थियो। 15 तैखन तैनेई पतरस ते यूहन्ना महासभा करां बेइर नेनेरे लेइ ज़ोव, ते एप्पू मामेईं मुशोरो केरने लगे। 16 “असां एन लोकन सेइं कुन केरम? यरूशलेम नगरेरे सब लोक ज्ञानतन कि एन लोकेई अक बडो चमत्कार कियोरोए, जेसेरो अस इन्कार न केरि बटम। 17 पन एल्हेरेलेइ अस एन न चाम कि ए गल लोकन मां जादे मुशूर न भोए, रोडू त एन्ने कि अस एन धमकेइतां जोम कि अजेरे बाद एन नवं घिन्तां केन्ची सेइं गल न केरन।” 18 तैखन तैनेई पतरस ते यूहन्ना अन्तर कुजेइतां हदैयत दित्ती, “यीशुएरू नवं घिन्तां केन्ची सेइं गल न केरथ, ते न शिक्षा देइयथ।” 19 पन पतरस ते यूहन्ना तैन जुवाब दित्तो, “तुस एप्पू ए फैसलो केरा, कि कुन ए गल परमेशरेरी नज़री मां ठीके, फिरि अस तुश्शी गल मन्म कि परमेशरेरी? 20 किजोकि एन नई कि जैन किछ असेईं शुनु ते लाहू, ते तैसेरे बारे मां ज़ोतम।” 21 तैखन तैनेई पतरस ते यूहन्ना धमकेइतां हथरां छडे, द्रासले मां तैना फैसलो न केरि सके, कि एन सज़ा त देम पन केन्चरे देम, किजोकि तमाम लोक ए चमत्कार हेरतां परमेशरेरी महिमा केरते थिये। 22 किजोकि जैस मैन्हु पुड़ शिफ़ा देनेरो चमत्कार हिरावरो थियो, तै 40 सालन करां जादे उमरारो थियो। 23 पतरस ते यूहन्ना तैड्डां छुटनेरां बाद अपने लोकन कां चले जे, ते जैन किछ प्रधान याजक ते बुजुर्गेई तैन जोरू थियूं, तैन सेइं शुनावं। 24 जैखन तैनेई एना गल्लां शुनी त अक भोइतां बड़े ज़ोरे सेइं परमेशरे कां प्रार्थना केरने लगे, तीं धरती त कने अम्बर ते समुन्द्रे ते जैन किछ एसमां आए बनोरूप। 25 तीं पवित्र आत्मारे ज़िरिये सेइं अपने सेवक इश्शे पूर्वज दाऊदरी ज़िरिये जोरू थियूं, “कि कौमेई किजो हैल्लो मचाव? ते मुलखां-मुलखां केरे लोक किजो बेफैइदे खियाल केरतन?

26 ज़मीनरे राजे, प्रभु ते तैसेरे मसीहरे खलाफ खड़े भोए ते हाकिम साथी खड़े भोए। 27 “एन सञ्जे कि हेरोदेस पुन्तियुस ते पिलातुस भी गैर यहूदी ते सब इस्राएली लोकन सेइं साथी तेरे पवित्र सेवक यीशुएरे खलाफ नगर-नगरे मां खड़े भोए, जै तीं मसीह ठहरावरो थियो। 28 तैना एल्हेरेलेइ अकोट्टे भोरे थिये कि जैन किछ तू अपनि कुदरतारो इरादेरे मुताबिक पेइले तैनी ठहरावरू थियूं, तैस पुइ अमल केरम। 29 हुनी हे प्रभु, तैन केरि धेमकी शुन, ते अपने दासन इन वरदान दे, कि तेरू बच्चन बेड़ि दिलेरी सेइं लोकन शुनेई बटम। 30 अपनो हथ अग्रोवं रख, ते अपने पवित्र सेवक यीशुएरे नञ्चे सेइं शिफा दे, ते चमत्कार ते निशान हिरा।” 31 ते ज़ैखन तेनेई प्रार्थना की, त ज़ैस ठैरी तैना अकोट्टे जम्हां थिये, त तै ठार हिल्ली, ते तैना सब पवित्र आत्माई सेइं भरोए, ते परमेशेरू बच्चन बेड़ि दिलेरी सेइं शुनाने लगे। 32 विश्वास केरनेबालां केरि मण्डली अक मन ते अक जान थी, कोई भी एरो न थियो जै अपनो माल अपनो समझतो भोए, बल्के होरन भी सैरी चीज़न मां शामल रखते थिये। 33 ते प्रेरित बेड़ि शेक्ति सेइं प्रभु यीशुएरे मुइदन मरां जीति भोनेरी गवाही देते थिये, ते तैन पुइ परमेशेरु बड़ो अनुग्रह थियो। 34 तैन मरां कोई भी गरीब न थियो, किजोकि ज़मीना केरे त घरां केरे मालिक तैन बेचतां तैन केरि कीमत प्रेरितन कां आनते थिये। 35 ते तैना तै रकम प्रेरितन देते थिये, ते हर केन्ची तैसेरी ज़रुरतारे मुताबिक बेटतां देते थिये। 36 यूसुफ नञ्चरो अक लेवी थियो, जै साइप्रसरो रानेबालो थियो, ते प्रेरितेई तैसेरू नवं बरनबास रखेरू थियूं, (जेसेरो मतलबे शैनतरू मडू)। 37 तैनी अपनू ऊडार बेचू, ते कीमत एन्तां प्रेरितन दिती।

5 हनन्याह नञ्चरो अक मैन्हु थियो, ते तैसेरी कुआन्शरू नवं सफ़ीरा थियूं ते तेनेई अपनि जेईदातरो किछ हिस्सो बेची छड्डो। 2 ते कीमती मरां किछ पेंडसे एप्पू कां रखे, जेसेरो तैसेरी कुआन्शी भी पतो थियो, ते बाकी होरे पेंडसे एन्तां प्रेरितन दिते। 3 पन पतरसे तैस सेइं ज़ोवं, “हे हनन्याह! शैताने तेरे मने मां ए गल केन्चरे छडी, कि तू पवित्र आत्माई सेइं झूठ जोस, ते ज़मीनारे पेंडसन मरां किछ रेख्खी छड्डस? 4 कुन बेचने करां पेइले ज़मीन तेरी न थी, पन बेचनेरां बाद कुन पेंडसो तेरो न भोव? तीं अपने मने मां किजो सोचू? तीं मैन्हु सेइं नई बल्के परमेशेरे सेइं झूठ जोरूए।” 5 हनन्याह एन शुनते खिरकी जेव, ते तैसेरे प्राण निस्से, ते जैन लोकेई एन शुनू त तैना बड़े डेरि जे। 6 तैखन किछ नौजवान आए ते तेनेई तैसेरी लाश कफने मां पलेटतां ते बेइरोवं नेइतां देबतां छडी। 7 ट्लेइ घेन्टना पत्ती तैसेरी कुआन्श आई, ते तैस एस बारे मां कोई पतो न थियो। 8 पतरसे तैस पुच्छू, “मीं ज़ो, कुन तुसेई दुइयेई ज़मीन एत्रे मां बेचोरी थी?” तैसां ज़ोवं, “हाँ कुल कीमत एत्री मैल्लोरी थी।” 9 पतरसे तैस सेइं ज़ोवं, “प्रभुएरी आत्मा अज़मानेरे लेइ तुस केन्चरे सेइं राजी भोए, ते जैन लोकेई तेरो मुन्श दबोरोए, तैन केरे पाव हेर दारे पुइ आन, ते तैना तीं भी बेइरोवं धिनी गाले।” 10 तै कुआन्श तैखने तल्ले बिछड़ी, ते तैसारे भी प्राण निस्से, ते ज़ैखन नौजवान अन्तर आए त तै कुआन्श मरीं लेइतां तै भी छुइतां तैसारे मुन्शे ड्लाखोरां देबतां छडी। 11 सैरी

यरूशलेमेरी कलीसिया ते एन गल्लां केरे शुन्ने बाले बड़े डेरि जे। 12 प्रेरितां केरे ज़िरिये बड़े चमत्कार ते निशान बांदे भोए, ते सारे विश्वासी अक भोइतां सुलैमानी अंगने मां जम्हां भोते थियो। 13 हालांकी होरे लोक तैन केरि बड़ी इज़्जत केरते थिये, पन केन्ची हिम्मत न आई कि तैन मां शामिल भोन। 14 बड़े मडदेइं ते कुआन्शेई विश्वास कियो ते तैन लोकां केरि मेनडली मां शामिल भोए, ते परमेशर मन्ने बालां केरि तैथात बद्धती चली। 15 जैन प्रेरितेई कियूं तैसेरो नीतीजो ई भोव, कि लोक बिमारन खटन पुइ ते पिट्टी पुइ छुइतां सडकी मां रखते थिये, कि पतरस ज़ैखन तैस बत्तां एज्जे त तैसेरी छव त तैन पुइ पे। 16 यरूशलेम नगरेरे चेत्रे पासना ड़लोवां केरे बड़े लोक बिमारन ते जैन पुइ भूतां केरो सैयो, एप्पू सेइं साथी आनते थिये, ते तैना सब बेइज़्जोते थिये। 17 तैखन महायाजक ते तैसेरे साथी ज़ैना सडूकी केरे फिरके मरां थिये, तैन बड़ी जलन भोने लगी ते तैना प्रेरितां केरे खलाफ खड़े भोए। 18 ते तेनेई प्रेरित ट्लुवेइतां कैद मां छेड़ी दिते। 19 पन प्रभुएरो राती स्वर्गदूत कैदखाने मां दार खोलतां प्रेरितन कां जेव, ते तैना बेइर केडतां तैन सेइं ज़ोने लगे। 20 “गाथ ते मन्दरेरे अंगने मां खड़े भोइतां हमेशारे ज़िन्दारे बारे मां लोकन बिस्तार देथा।” 21 तैना एन शुन्तां झेइं मन्दरेरे अंगने मां पुजे ते जेन्चरे तैन स्वर्गदूते हुकम दित्तोरो थियो, तेन्चरे लोकन शिक्षा देने लगे, ते ज़ैखन इस्राएली महायाजक ते तैसेरे साथी तैड़ी आए, ते तेनेई महासभा ते सब यहूदी केरे सारे बुजुर्ग कुजाए, ते तेनेई यीशुएरे प्रेरित कैदखाने मरां कुजाए। 22 ज़ैखन मन्दरेरे पेरहेदार कैदखाने मां पुजे त तैन प्रेरित तैड़ी न मैल्ले, ते वापस एइतां तैन खबर दिती। 23 “असेई कैदखानो रोड़ेचारे बंद कियोरी थियो, ते पेरहेदार भी असन दारे मां खडखडे मैल्ले, पन ज़ैखन असेई कैदखानो खोल्लो त अन्तर कोई न मैल्लो।” 24 एना गल्लां शुन्तां मन्दरेरे पहेरेदारां केरो प्रधान, प्रधान याजक ते सारे लोक हैरान रेइजे, ते तैन केरि फिक्री मां पे कि हुनी कुन भोनूए! 25 तैखन केन्चे एइतां ज़ोवं, “तैना मैन्हु ज़ैना तुसेई कैदे मां छडोरे थिये, तैना मन्दरे मां खड़े भोइतां शिक्षा देने लागोरेन।” 26 तैखन मन्दरेरे पहेरेदारां केरे प्रधान अपने सिपाही साथी घिन्तां जे, ते प्रेरित कुजेइतां आने पन ज़बरदस्ती नई, किजोकि तैना लोकन करां डरते थिये, कि एरू न भोए एना असन घोड़ेई बान। 27 तेनेई प्रेरित एन्तां महासभा मां पैश किये, ते महायाजके तैन पुच्छू। 28 “असेई तुसन ठाकेरू थियूं, कि यीशुएरू नवं घिन्तां शिक्षा न देइयथ? फिरी भी हेरा, तुसेई सारे यरूशलेम नगरे मां अपनि शिक्षा फैलाई, ते तैस मैनेरो खूनेरो दोष असन पुइ लानो चातथा।” 29 पतरस ते होरि प्रेरितेई जुवाब दित्तो, “असन मैन्हु केरो हुकम मन्नेरे बजाहे परमेशेरु हुकम मन्नो जादे ज़रूरीए। 30 इशे दादे-पडदादां केरे परमेशेरे ए यीशु मुइदन मरां जीतो कियो, जै तुसेई क्रूसे पुइ चढ़तां मारो। 31 तैए परमेशेरे, प्रभु ते मुक्ति देनेबालो बनेइतां अपने देइने पासे बिशालो, ताके तै इस्राएलिन मन फिराने ते पापां केरि मैफारो मौको दे। 32 असां एन गल्लां केरे गवाह आम, ते पवित्र आत्मा भी, जै परमेशेरे तैनी अपनो हुकम मन्ने बालन दित्तोरीए।”

33 जैखन तैनेई एन शुनू त फुकोई जे, ते तैन केरि मर्जी लगी ज़ोने कि एन मैरी छडम। 34 पन अक फरीसी मैन्हु ज़ेसरे नवं गमलीएल थियूं, ते ज़ै शास्त्री भी थियो, ते ज़ै सेबमी लोकन मां इज़्जतदार थियो, तैनी महासभा मां खडे भोइतां हुक्म दित्तो कि एना मैन्हु थोडे चिरे बेडर भेजा। 35 तै एन ज़ोने लगी, “हे इस्राएली लोकव तुस ज़ैन किछ एन मैन्न् सेई केरनू चातथ तैन रोडेचारे सोचा। 36 किजोकि थोडे चिरे पेइले थियूदास इन जोइतां खडो भोरो थियो, ते ज़ोतो थियो, अवं भी किछ आई, ते लगभग 400 मैन्हु तैस सेई मिले, पन तै मारो जेव, ते तैसेरे मन्नेबाले सारे तितर-बितर भोइ जे, ते तैन केरो नामो निशान मिटी जेव। 37 तैसेरां पत्ती मैन्हु केरे गिनतरे वक्ते गलील इलाकेरो यहूदा निसोरो थियो, ते तैनी काई लोक अपने पासे खिचोरे थिये, तै भी मारो जेव, ते तैसेरे जेत्रे साथी थिये, सब तितर-बितर भोइ जे। 38 हुनी अवं तुसन एन्ने ज़ोताई कि एन मैन्न् करां दूर भोथ, ते एन गाने देथ, किजोकि अगर एना चमत्कार, मैन्हु केरि तरफां भोले त एप्पू खतम भोइ गानेन। 39 पन अगर एना कम्मां परमेशरेरी तरफां भोलां, त तुस एन मैन्हु केरू किछ न बिगैडी सकत, ते तुस परमेशरेरे खलाफ लड़नेबाले भोले, तैनेई तैसेरी सल्लाह मन्नी।” 40 ते प्रेरित अन्तर कुजेइतां तैन डंडेई बावैहीतां तैन ज़ोवं, कि अजेरां बाद यीशुएरे नवंवे सेई कोई गल न केरथ, ते तैना हथरां छडे। 41 प्रेरित महासभा मरां चले जे, तैना एस गल्ली पुड़ खुशी थिये, कि असां यीशुएरे नवंवे सेई बेइज़त भोनेरे काबल त भोए। 42 तैनेई शिक्षा देनी बंद न की, बल्के रोज़ मन्दरे मां गेइतां ते घर-घर गेइतां लगातार खुशखबरी शुनाते राए कि यीशु ही मसीह आए।

6 ई गल तेइसेरीए ज़ेइस चले केरि गिनती बधने लगीरी थी, यूनानी भाषा ज़ोनेबालो यहूदी चेलैई इब्रानी भाषा ज़ोनेबाले यहूदी चलां केरि शकैइत केरने लगे, कि हर दिहैदरे सेवाई मां विधवां केरि खबर न की गाए। 2 एन शुन्तां 12 प्रेरितेई सारे यरूशलमेरे सारे विश्वासी लोक (चले) अकोट्टे किये, ते ज़ोवं, “इश्शे लेइ एन मुनासब नई कि अस परमेशरेरी वचनेरू प्रचार केरनो छेइतां खाने पीनेरी सेवाई मां लगमग 3 एल्हेरेलेइ हे मेरे दूलाव, अपने लोकन मरां सत भलमानस मैन्हु चुना, ज़ैना पवित्र आत्माई सेई भरपूर ते अक्लमन्द भोन, ताके आस तैन एस कम्मेरी ज़िमेबारी सौफमा।” 4 पन अस त प्रार्थना केरने ते बचन शुनानेरी ते शिक्षा देनेरी सेवाई मां लगगोरो रानेमा। 5 ए गल सारे लोकन पसंद आई, ते तैनेई अक स्तिफनुस ज़ै विश्वास ते पवित्र आत्माई सेई भरपूर थियो चुनो, ते हारे ज़ैना चुने तैन केरां नव्वां इना आन, फिलिप्पुस प्रुखुरुस, नीकानोर, तीमोन, परमिनास ते नीकुलाउस ज़ै अन्ताकिया नगरेरो रानेबालो थियो, ते यहूदी फिरके मां ओरो थियो। 6 ते तैना प्रेरितन कां हाज़र किये, ते तैन केरे लेइ तैनेई प्रार्थना की, ते तैन पुड़ हथ रखवे। 7 एन्चरे सेई परमेशरेरू बचन फैलतु जेवं, ते यरूशलम नगरे मां चलां केरि गिनती बद्धती जेई, ते याजकां केरि अक टोली विश्वासे मां आई ते मसीही भोइजेइ। 8 स्तिफनुस अनुग्रह ते शक्ति सेई भरपूर भोइतां लोकन चमत्कार ते निशान हिरातो थियो। 9 आज़ाद भोरे यहूदी

लोकां केरू अक प्रार्थना घर थियूं, कुरेनी ते सिकन्दरिया ते किलिकियारे ते आसियारे किछ लोकन मरां किछ स्तिफनुसे सेई बेंस केरने लगे। 10 तैना तैन गल्लां केरो जुवाब न देइ बटे, ज़ैना पवित्र आत्मा तैस ज़ोनेरी समझ दिती। 11 तैखन तैनेई किछ लोक शिखाले, कि तुस झूठ ज़ोइयथ कि, “असेई स्तिफनुस मूसेरे त कने परमेशरेरे खलाफ तुहीन केरते शुनोरोए।” 12 तैखन तैनेई किछ लोक, बुजुर्ग ते शास्त्री स्तिफनुसेरां खलाफ बमकाए ते तै टलेइतां महासभा मां पैश कियो। 13 तैनेई बडे झूठे गवाह पैश किये, “ते तैनेई गवाही दिती कि ए मैन्हु पवित्र ठारारे ते मूसेरे कानूनेरे खलाफ तुहीन केरने करां बाज़ न एज्जे। 14 ते असेई एस मैन्हु करां एन भी ज़ोतू शुनू, कि यीशु नासरी इस मन्दरे डोलेलो, ते तैना रसमां ज़ैना मूसा नेबे दित्तोरिन बदलेलो।” 15 तैखन लोक ज़ैना महासभा मां बिश्शारे थी, तैसेरे पासे तक्कू कि तैसेरू तुतर स्वर्गदूतेरे ज़ेरू लेइहोतू थियूं।

7 तैखन महायाजके स्तिफनुसे सवाल पुछो, “कुन एना इलज़ाम सज़्जे आन?” 2 तैनी ज़ोवं, “हे दूलाव ते मेरे बुजुर्गाव, मेरी गल शुना, इश्शो पूर्वज अब्राहमे हारान नगरे मां बसने करां पेइलो मेसोपोटामिया इलाके मां थियो, ते महिमा बाले परमेशरे तैस दर्शन दित्तू 3 ते परमेशरे तैस सेई ज़ोवं, अपने देश त अपने रिशतेदारन शैरतां तैस मुलखे मां गा, ज़ै अवं तीं हरेइलो। 4 तांए तै कसिदी केरे मुलखे शैरतां हाराने मां बसोरो थियो, तैसेरे बाजरे मरनेरां पत्ती परमेशरे तै तैस मुलखे मां आनो ज़ैस मां अज़ तुस बसोरेथ। 5 पन परमेशरे तैस इडी किछ भी जेइदात न दिती, बल्के पाव रखने जो भी ज़मीन न दिती, पन वादो ज़रूर कियो कि ई ज़मीन अवं तीं ते तेरी औलादी कब्जे मां देलो हालांकी तेइस अब्राहमे कोई औलाद न थी। 6 परमेशरे इन भी ज़ोवं, तेरी औलाद एक्की बखले देशे मां परदेशी भोली, तैना तैन गुलाम बनाले, ते 400 सालन तगर तैन दुख देले। 7 फिरी परमेशरे ज़ोवं, ज़ै कौम तैन गुलाम बनली तैन अवं सज़ा देइलो, ते तैसेरां बाद तैना तैस मुलखे मरां निस्सतां इडी एज्जेले ते मेरी आराधना केरेले। 8 ते परमेशरे अब्राहमे सेई करार कियो ते तैस सेई ज़ोवं, कि निशानेरे रूपे मां सेबमी घरानेरे नर मैन्हु केरो खतनो केर। ज़ैखन इसहाक ज़रमो ते अठे दिहैडी केरो भोव, त अब्राहमे तैसेरो खतनो कियो, ते एन्चरे इसहाके अपने मट्टे याकूबेरो खतनो कियो, ते याकूबेरे अपने 12 मट्टां केरो खतनो कियो। 9 याकूबेरे मट्टेई जलनी सेई अपनो दूला यूसुफ मिस्र मुलखे जो गाने बालन जो बेचो, ते तैनेई यूसुफ मिस्रे मां नेइतां गुलाम बनाव? पन परमेशर यूसुफे सेई साथी थियो। 10 परमेशरे तै सैरी मुसीबतन करां छुटेइतां, ते तैस बड़ी अक्ल दिती, ते मिस्रे फ़िरौन राज़ेरे सामने बड़ी काबलीत दिती, ते फ़िरौन राज़े, यूसुफ मिस्र मुलखेरो ते अपने महलेरो गवर्नर बनाव। 11 ज़ैस वक्ते यूसुफ थियो त मिस्र मुलख ते कनानारे सारे मुलखे मां काल पेव, ते बड़ी मुसीबत आई, ते इश्शे दादे-पेइदादन खाने जो अन न मैल्लू। 12 ज़ैखन याकूबे शुनू कि मिस्रे मां अन्न आए, त तैनी इश्शे पूर्वज मिस्र मुलखे मां पेइली बार भेजे, तैना यूसुफ सेई मिले ते अन आनू पन तैनेई तैन न पिशानो। 13

जैखन तैना दुइयोवं फेरे मिस्र मुलखे मां अन्न आन्ने जे, त यूसुफे अपने आप तैन पिशानाव, ते फ़िरौने भी यूसुफेरी कौमरो पतो लगे कि ए इब्रानी आए। 14 तैसेरां बाद यूसुफे अपने बाजी याकूब ते तैसेरे 75 मैन्हु केरू टब्बर मिस्र मुलखां मांजो एजनेरो बिस्तार भेजो। 15 किछ वक्तेरां बाद याकूब मिस्र मुलखे मां जेव, ते ते त इश्शे दादे-पड़दादे तैडी मेरि जे। 16 तैन केरि लाशां तैठां इश्शे मुलख कनाने मां वापस एन्ही, ते तैनेई याकूब, तैस ठैरी दफन कियो, जै ठार अब्राहमे चाँदी देइतां घिन्नीरी थी, ते याकूबेरां मट्टां शेकेम नगरेरे तैस ठैरी दफन कियां, जै याकूबे हामोरेरी औलादी करां घिन्नीरी थी।” 17 “परमेशरे अब्राहमे सेइं अक वादो कियोरो थियो, तैस वादेरो पूरो भोनेरो मौको अव त मिस्रे मां इश्शे लोकां केरि गिनती भी बड़ी बेडी जेई। 18 तैस मौके अक होरो राजो मिस्र देशे मां राज करेने लगे, जै यूसुफे न थियो ज्ञानतो। 19 तैनी इश्शी कौमी सेइं एरी चलाकी कि ते इश्शे दादन-पड़दादन सेइं एरी बदसलूकी की, तैना एत्रे मजबूर किये कि तैना अपने जर्मते बच्चे बेइरोवं शारन ताके तैना मेरि गान। 20 तैन्ने दिहैइन मां मूसा पैदा भोव, तै परमेशेरी नजरी मां बड़ो रोडो थियो, ते तै टलाई महीन्न तगर अपने बाजेरे घरे मां छेपतां पलतो राव। 21 पन जैखन जादे चिरे तगर छुपेई न बटे, तै दरियाए मां शारो त फ़िरौनेरे कुइयां तै नेव ते अपने मट्टेरो ज़ेरो पालो। 22 मूसा नबी मिस्री केरि सैरी शिक्षारो ते तैन केरि सैरी गल्लां केरि वाकफित भोइजेइ, ते गलबाती ते कम्मे मां मजबूत थियो।” 23 “जैखन मूसा नबी 40 सालां केरो भोव, त तैसेरे मने मां ए गल आई, कि अवं अपने इस्पाएली ढूलां केरो हाल पतो केरि। 24 मूसा एक्की इस्पाएली मैन्हु पुड़ जुलम भोंतो लाहू त तैनी तै बचाव, ते तै ज़ालम मिस्री मेरतां जैस पुड़ जुलम भोरो थियो बदलो घिंनो। 25 तैनी सोचू, कि तैसेरे ढूलां समझेले, कि परमेशरे तैसेरे ज़िरिये सेइं तैन मिस्री केरि गुलामी करां तैन मुक्ति देलो, पन तैनेई न समझू। 26 मूसा होरसां दूई इस्पाएली एप्पू मांमेइं लइते लाए, ते तैन समझानेरी कोशिश की, ते मूसा तैन ज़ोवं, हे जवानव तुस त एप्पू मांमेइं ढूला भोतथ, ते तुस किजो एक्की होरि पुड़ जुलम केरतथ? 27 पन जै मैन्हु अपने पड़ोसी पुड़ जुलम केरने लोरो थियो, त तैनी मैने मूसा जो धमकेइतां ज़ोवं, तू केनि असन पुड़ हुकूमत केरनेबालो या हाकिम बनेवरोस? 28 जेन्चरे तीं तै मिस्रेरो रानेबालो हीज मारोरो थियो, तेन्चरे तू अज़ मीं मारने चातस? 29 ए गल शुनते मूसा तैठां नशो, ते मिद्यान मुलखे मां परदेशी भोइतां राने लगे, ते तैडी तैसेरां दूई मट्टां पैदा भुआं। 30 40 साल मिद्यान मुलखे मां रानेरे बाद तैस सीने पहाड़ेरे सुनसान ठारी मां एक्की झल्लेरी अग्गी स्वर्गदूत लाव, ते परमेशरे स्वर्गदूतेरे ज़िरिये तैस सेइं गल की। 31 मूसा झल्लेरी अग्गी लेइतां कि झल फुकोने नई लोरू त तै हैरान रेइ जेव, ते जैखन तै हेरनेरे लेइ नेइे जेव त तैनी प्रभुएरी आवाज़ शुनी। 32 “अवं तेरे दादे-पड़दादां केरो यानी अब्राहम, इसहाक ते याकूबेरो परमेशर आई,” तैखन मूसा डेरतां कम्बने लगे, इन तगर कि तैस हेरनेरी हिम्मत न भोइ। 33 तैखन प्रभुए तैस जो ज़ोवं, अपने पांवां केरी जुट्टी खोल्ल, किजोकि जैस ठैरी तू खड़ोस तै

पवित्र ठारे। 34 मीं मिस्र मुलखे मां अपने लोकां केरि बुरी हालत हेरी, मीं तैन केरू कर लानू ते लेरां शुनोरिन, एल्हेरेलेइ अवं तैन छुटानेरे लेइ उन्डो ओरोई, हुनी एई अवं तीं फिरी वापस मिस्र मुलखे जो भेजताई। 35 “एहे तै मूसो आए जेसेरो इस्पाएली लोकेई पेइलो इन्कार कियोरो थियो, कि तू केनि असन पुड़ हुकूमत केरनेबालो या हाकिम बनेवरोस, ते एहे तै मूसा परमेशरे अपने स्वर्गदूतेरे ज़िरिये सेइं जै तैनी बलते झैल्लोए मां लाहोरो थियो, ते छुटानेबालो बनेइतां भेजो। 36 एनी मैने मिस्र मुलखे ते लाल समुन्द्रे मां 40 सालन तगर सुनसान ठैरी मां चमत्कार ते निशान हिराए। 37 एनी मूसा इस्पाएली लोकन सेइं ज़ोरू थियू, परमेशर तुश्शे ढूलान मरां तुश्शे लेइ अक मेरो ज़ेरो नबी खड़ो केरेलो। 38 एहे मूसा, इश्शे दादा पड़दादां केरो नबी राव जैखन तैन सुनसान ठारी मां अकोट्टे भोरोए, परमेशरे एक्की स्वर्गदूत सीने पहाड़े पुड़ मूसे कानून दितो ते तैनी इश्शे दादे पड़दादन तैन कानून दितो, मूसे ज़िन्दगी देनेबाले वचन मैल्ले, तैनी तैना असन तगर पुजाए। 39 पन इश्शे दादे-पड़दादेई तैसेरो हुकूम न मन्नी चाव, बल्के इकरार कियो, ते तैना मिस्र मुलखेरे जो वापस गानू चाते थियो। 40 तैनेई मूसेरे ढूलाए हारूने सेइं ज़ोवं, तू इश्शे लेइ अक देबतो बना, जै असन अग्गी-अग्गी मिस्र मुलखे जो चले, किजोकि अस न ज्ञानम कि मूसा ज़ैनी असां मिस्र मुलखे मरां केढतां आनोरेम, तैस कुन भोवं? 41 तैस वक्ते तैनेई बछड़ेरी अक मूरत बनाई, ते तैस कां बलिदान च़ाढू, ते अपने हथ्यां केरे बनेवरी मूरती कां बड़ी खुशी मनाने लाए। 42 एल्हेरेलेइ परमेशरे तैन करां अपनू तुतर फिराव, ते तैना दिहाड़ेरी ते च़ेदनेरे ते अम्बरेरे तारां केरि ईश्वरेरे रूपे मां तैन केरि आराधना केरनेरे लेइ शारे, जेन्चरे नेबी केरि किताबी मां लिखोरूए, हे इस्पाएली लोकव, कुन तुस 40 सालन तगर सुनसान ठैरी मां जानवरां केरू बलिदान ते होरू बलिदान मेरे लेइ केरते राए? 43 बल्के तुसेई एप्पू सेइं साथी मोलेक देबतेरी मूरती ते रिफान देबतेरे तारे छुइतां चलते थियो, एना तैना मूरतिन ज़ैन कां तुस मथ्यो टेकते थियो, एल्हेरेलेइ अवं तुसन बाबेले करां भी दूर बसेइलो।” 44 “सुनसान ठारी मां इश्शे दादन पड़दादन कां गवाहोरो तेम्बु थियो, परमेशरे तै ठहराव ते तैनी मूसा सेइं ज़ोवं, जेन्चरे तीं लोरूए तैसेरे मुताबिक बना। 45 बड़े सालना बाद तैए तेम्बु इश्शे दादे-पड़दादेई यहोशू सेइं साथी इडी आनो, जैस वक्ते तैनेई गैर कौमन पुड़ अधिकार हासिल कियो, जैना परमेशरे इश्शे दादे-पड़दादां केरे सामने कढे, ते तै तेम्बु दाऊद राजेरे वक्ते तगर राव। 46 दाऊद पुड़ परमेशरे अनुग्रह कियो, ते तैनी मिनत की, कि अवं याकूबेरे परमेशरेरे लेइ अक घर बनेइं। 47 पन तैसेरे मट्टे सुलैमाने तैसेरेलेइ मन्दर बनाव। 48 पन परमप्रधान परमेशर हथ्यां केरे बनेवरे मन्दरन मां न राए, जेन्चरे यशायाह नेबेरे किताबी मां लिखोरूए, 49 प्रभु ज़ोते, स्वर्ग मेरो तखते, ते ज़मीन मेरे पांवां केरि चौकीए, तुस फिरी मेरे लेइ केरू ज़ेरू मन्दर बनाले? ते मेरे आराम केरनेरी ठार केरही ज़ेरि भोली? 50 कुन मीं एप्पू सैरी चीज़ां नई बनेवरी? 51 “हे ढीठ लोकव, तुस तैसेरी शुन्नी ते मन्नी न चाथ, तुस पवित्र आत्कारी हमेशा खलाफत केरतथ। जेन्चरे तुश्शे दादे-पड़दादे केरते थियो, तुस भी

तेन्चरे केरतथ। 52 नेबन मरां को तुशसे दादे-पड़दादेई नई स्तेवरो? ज़ैनेई तैस एजनेबाले मसीहेरे बारे मां ज़ोवं ज़ै धर्मी आए, ते ज़ैखन मसीह अव ते तुसेई धोखे सेइं तै टलुवेइतां मारो। 53 तुसन स्वर्गदूतन करां मूसेरे कानून त मैल्लो, पन तैस पुड़ अमल न कियूं।” 54 ज़ैखन तैनेई एना गल्लां शुनी त यहूदी लीडर फुकोई जे, ते स्तिफनुसे जो दंत लगे चापने। 55 पन तैनी पवित्र आत्माई सेइं भरोइतां अम्बरेरे पासे तक्कू, ते तैनी परमेशरेरी महिमा ते यीशु परमेशरेरे देइने पासे खड़खड़ो लाव। 56 तैनी ज़ोवं, “हेरा, अवं स्वर्ग खुल्लू लाताई, ते मैनेरे मट्टे परमेशरेरे देइने पासे खड़खड़ो लाताई।” 57 एन शुन्तां तैना ज़ोरे सेइं चिन्डां मारने लगे, ते अक भोइतां सेभेई तैस पुड़ हमलो कियो। 58 ते तै दीलतां यरूशलेम नगर करां बेइर नीयो ते तैस जो घोड़ेई बाने लगे ते तै मारो, तैखन तैस पुड़ दोष लाने बालेई अपने चोगे खोलतां शाऊल नव्वेरे एक्की मैन्हु कां रेखतां छुड़े। 59 ते ज़ैखन तैना स्तिफनुसे जो घोड़ेई बाने लगगोरो थिये, ते तै स्तिफनुस इन जोइतां प्रार्थना केरने लगे, “हे प्रभु यीशु, मेरी आत्मा कबूल केर। 60 फिरी तैनी ज़ैधू केरे भारे बिशतां ज़ोरे सेइं ज़ोवं, ‘हे प्रभु एन इस पापेरो दोषी न बनेइयां।’” एन ज़ोनेरां पत्ती तैनी प्राण दिते।

8 शाऊल तैसेरी मौती सेइं राजी थियो। तैस्से दिहाड़े यरूशलेम नगरेरे कलीसियाई पुड़ जुलम भोने लाव ते प्रेरितां केरे अलावा सारे लोक यहूदिया ते सामरियारे इलाकन मांजो तितर-बितर भोए। 2 किछ परमेशरेरे भक्त मैनेई स्तिफनुस नेइतां देबतां छुड़े, ते तैसेरे मरने पुड़ बड़ो शोग कियो। 3 पन शाऊल कलीसियाई सताने लोरो थियो, ते तै घर-घर गातो थियो, ते विश्वासी मड़दन ते कुआन्शन बेइरोवं घसीटतो थियो, ते कैद केरतां छड़तो थियो। 4 पन ज़ैना विश्वासी तितर-बितर भोते थिये तैना खुशखबरी शुनाते चले। 5 ते फिलिप्पुस सामरियारे एक्की नगर मां गोइतां मसीहेरो प्रचार केरने लगे। 6 ज़ैना गल्लां तैन लोकेई फिलिप्पुसेरी करां शुनी, ते ज़ैना निशान ते हिरातो थियो, तैन हेरी-हेरी, तैनेई अक भोइतां मन लाव। 7 ज़ैखन फिलिप्पुसे हुक्म दितो, त बड़े लोकन मरां भूतां चिन्डां मैरतां निस्सी जेआं, ते बड़े लोक अथरंगी ते टोंटे बेइज्जोइ जे। 8 ते तैन केरे वजाई सेइं नगरेरे बड़े लोक खुश भोइजेइ। 9 शमौन नव्वेरे एक्की मैने सामरियारे नगर मां सारे लोक अपने जैदेइं सेइं हैरान कियोरे थिये, ते अपने आपे बड्डो खास मैन्हु बनातो थियो। 10 निक्के बडे सब तैसेरे पासे भोइतां ज़ोने लगे, “ए मैन्हु परमेशरेरी तै शक्ति ज़ैस ज़ो महान ज़ोतन।” 11 तैनी अपने जैदू सेइं बड़े चिरेरां देंते सब हैरान कियोरे थिये, एल्हेरेलेइ तैना लोक तैसेरी बड़ी इज्जत केरते थिये। 12 पन ज़ैखन फिलिप्पुसे परमेशरेरे राज़ेरे ते यीशु मसीहेरी खुशखबरी प्रचार की त लोकेई विश्वास कियो, ते मड़देइं कुआन्शई बपतिस्मो नेव। 13 तैखन शमौने भी फिलिप्पुसेरे प्रचारे पुड़ विश्वास कियो, ते बपतिस्मो नेइतां फिलिप्पुसे सेइं साथी राने लगे ते तै बड़े चमत्कार ते निशान हेरतां हैरान रेइ जेव। 14 ज़ैखन यरूशलेम नगरे मां प्रेरितेई शुनु कि सामरियारे लोकेई परमेशरेरे बचवन कबूल कियोरूपे ते तैनेई पतरस त यूहन्ना तैन कां भेजे। 15 ज़ैखन तैना तैड़ी पुजे त तैनेई तैन लोकां केरे लेइ

प्रार्थना की, कि एन पुड़ पवित्र आत्मा उतरे। 16 एल्हेरेलेइ कि तैन पुड़ पवित्र आत्मा हेजून न थी उतरोरी, तैनेई सिर्फ प्रभु यीशु मसीहेरे नव्वे सेइं बपतिस्मो निहीयोरो थियो। 17 तैखन यूहन्ना ते पतरस तैन पुड़ हथ रेखतां प्रार्थना की, ते तैन भी पवित्र आत्मा उतरी। 18 ज़ैखन शमौने हेरू कि प्रेरितां केरे हथ रखने सेइं पवित्र आत्मा उतरते, त शमौने पेंडसे एन्तां प्रेरितन कां पैश कियो। 19 ते शमौन ज़ोने लगे, “मीं भी शक्ति देथ, कि अवं भी ज़ैस पुड़ हथ रेख्खी त तैस पुड़ पवित्र आत्मा उतरे।” 20 पतरसे तैस सेइं ज़ोवं, “तेरे पेइंसे तीं सेइं साथी गर्क भोन, किजोकि तू पेंडसन सेइं परमेशरेरे दान घिन्नु चातस। 21 एस सेवाई मां तेरो कोई भी हिस्सो नई किजोकि तेरो मन परमेशरे कां साफ नई। 22 तू अपनि इस बुरेई करां मनफिरा, ते प्रभु कां प्रार्थना केर, शैइद प्रभु तेरी इस बुरे खियाले माफ़ केरे। 23 मनफिरा अवं हेरताई कि तू बड़े जलनी ते पापेरी गुलैमी मां आस।” 24 तैखन शमौने जुवाब दित्तो, “मेरे लेइ प्रभु कां प्रार्थना केरा, कि ज़ैन किछ तुसेईं ज़ोरूपे, तैन मीं पुड़ न एज्जे।” 25 ते पतरस ते यूहन्ना गवाही देइतां ते प्रभु यीशुएरू वचन शुनेइतां यरूशलेम नगरे मां वापस आए, ते एइते बारे सामरी लोकां केरे बड़े डुल्लोवन मां खुशखबरी शुनाई। 26 फिरी एरू भोवं कि परमेशरे एक्की स्वर्गदूते फिलिप्पुसे सेइं ज़ोवं, “उठ ते दक्षिणेरे बत्तां गा, ज़ै यरूशलेम नगरेरां गाज़ा नगरे जो गातीए। ई रेगिस्तानी बत आए।” 27 तै उठो ते चलो जेव, ते बत्ती मां तैस अक कूश मुलखेरो खोजो मैल्लो, ज़ै कूशी केरि रानी कन्दाकारो खज़ानची थियो, ते आराधना केरने यरूशलेम नगरे मां ओरो थियो। 28 तै अपने रथे पुड़ च़ेढ़तां अपने मुलखे जो वापस ओरो थियो, ते यशायाह नेबेरी किताब ज़ोरे-ज़ोरे सेइं पढ़ने लगगोरो थियो। 29 पवित्र आत्मा फिलिप्पुसे सेइं ज़ोवं, “नेड़े गोइतां रथे सेइं साथी च़ला।” 30 फिलिप्पुस देवइतां रथे कां नेड़े पुजो, त तैस करां यशायाह नेबेरी किताब पढ़ती शुनी, ते तैस पुच्छू, “तू ज़ैन पढ़ने लोरोस कुन तैन समझतस?” 31 तैनी ज़ोवं, “जां तगर कोई मीं न समझाए त अवं केन्चरे सेमझी?” ते तैनी फिलिप्पुसे कां मिनत की, कि एई रथे पुड़ बिश। 32 पवित्रशास्त्रे मरां ज़ैन तै पढ़ने लगगोरो थियो, त तैन इन थियूं, “तैनेई तै भैडारो ज़ेरो मारने जो नीयो, ज़ेन्चरे गबडू अपनि उन्ना बरथाने बालां केरे सामने चुप राते, तेन्चरे तैनी भी अपनु आशी न खोल्लू।” 33 तै घटया समझो जेव ते तैस कोई इन्साफ न मैल्लो, ते कोई भी तैसेरे वंशेरे बारे मां न जोई सके, किजोकि धेरती पुड़ तैसेरे वंश भोने करां तैस मारतन। 34 खोजे फिलिप्पुसे पुच्छू, “अवं तीं कां मिनत केरतां, मीं सेइं ज़ो कि ए नबी कसेरे बारे मां ज़ोते, अपने या होरि केन्चरे बारे मां ज़ोते?” 35 तैखन फिलिप्पुसे ज़ोनू शुरु कियूं, तैनी पवित्रशास्त्रे करां शुरु केरतां यीशुएरो खुशखबरी शुनाई। खोजे तैना गल्लां शुनी ते विश्वास कियो। 36 बत्तां च़लते-च़लते तैना एक्की तालाबे कां पुजे, तैखन खोजे ज़ोवं, “इड़ी तालाब आए, हुनी मीं बपतिस्मो नेने करां कौन रोकी सकते?” 37 फिलिप्पुसे ज़ोवं, “अगर तू पूरे दिले सेइं विश्वास केरतस त बपतिस्मो नेही सकतस,” तैनी जुवाब दित्तो, “अवं विश्वास केरताई कि यीशु ही

परमेशरू मट्टूए।” 38 फिरी तैनी रथ रोकनेरे लेइ हुकम दित्तो, ते खोजो ते फिलिप्पुस दुइये तालाबे मां जे, ते फिलिप्पुसे तैस बपतिस्मो दित्तो। 39 ज़ैखन तैना पैनी मरां बेइर निस्से त प्रभुएरी पवित्र आत्मा फिलिप्पुस तैदुं नेव, ते खोजे तै फिरी न लाव, परमेशरू तै बचाव ते तै बड़ी खुशी सेइं वापस अपने मुलखे जो जेव। 40 ते फिलिप्पुस अशुदोदे मांमेइं निसतो चलतो सारे इल्लोवन्न मां खुशखबरी शुनातो कैसरिया मां पुजो।

9 शाऊल प्रभुएरे चलन धमकाने ते मारने मां मघन थियो, ते तै महायाजके कां जेव। 2 ते तैस करां दमिश्क नगरेरे प्रार्थना घरां केरे लेइ चिट्टी मेगगी, कि चाए कोई मडद भोए या कुआन्श ज़ै यीशु पत्ती चलने बालो भोए, तैस टलेइतां यरूशलेम नगरे मां आने। 3 ज़ैखन तै चलतो-चलतो दमिश्क नगरेरे नेडे पुजो, त अचानक अम्बरेरां लौ आई ते तैसेरे चेन्ने पासन चमकने लगी। 4 ते शाऊल ज़मीनी पुड़ खिरको, ते तैस प्रभुएरी आवाज़ आई, “हे शाऊल, हे शाऊल तू मीं किजो स्तातस?” 5 शाऊले एन पुच्छू, “हे प्रभु, तू कौन आस?” तैनी ज़ोवं, “अवं यीशु आई, जैस तू सतातस। 6 हुनी उठ ते नगरे मां गा, तैड़ी तीं सेइं ज़ोवं गालू, कि तीं कुन केरनूए।” 7 ज़ैना लोक तैस सेइं साथी थियो, तैना चुपचारे रेइजे, तैन आवाज़ त शुनोती थी, पन लेइहोतू किछ भी न थियुं। 8 तैखन शाऊल ज़मीनी पुड़ां खड़े उठो, त तैनी अपनि एछछी घैडी त तैस किछ भी न लगू लेइहोने, ते तै तैसेरे सैथेईं हथेरां टलेइतां दमिश्क नगरे मां पुजाव। 9 ते तैनी टलाई दिहाइन तगर न लेई बटु, ते न तैनी किछ खाव ते पिव। 10 दमिश्क नगरे मां यीशुएरो अक चेलो रातो थियो, प्रभु यीशुए तैस दर्शन देइतां ज़ोवं, “हे हनन्याह!” तैनी ज़ोवं, “हाँ प्रभु ज़ो।” 11 तैखन प्रभुए तैस जो ज़ोवं, “उस गेली मां गा ज़ैस जो ‘सिद्धी’ ज़ोतन, ते यहूदारे धरे गा तैड़ी शाऊल नव्वेरो अक मैनुए, ज़ै तरसुस नगरेरो रानेबालोए, तू तैसेरे बारे मां पुछां, किजोकि हेरा तै प्रार्थना केरने लोरोए। 12 तैनी हनन्याह नव्वेरो अक मैनुए अन्तर एइतो लाव, ते एप्पू पुड़ हथ रखतो लाहोरोए कि तै अपनि एछछेईं सेइं फिरी लाए।” 13 हनन्याहे जुवाब दित्तो, “हे प्रभु, मीं एस मैनेरे बारे मां लोकन करां बेइडि गल्लां केरती शुनोरिन, ते एन भी कि एनी तेरे लोकन सेइं यरूशलेम नगरे मां कुन-कुन बुरू कियोरूए। 14 एस प्रधान याजकन करां अधिकार मैलोरोए, कि इड़ी भी ज़ैना लोक तीं पुड़ विश्वास केरतन, तैन गिरफ्तार केरतां यरूशलेम नगरे जो ने।” 15 पन प्रभुए तैस सेइं ज़ोवं, “तू गा किजोकि मीं तै मैनु चुनोरोए, कि तै गैर कौमन, राज़न, ते इस्राएलेरे लोकन मेरे बारे मां प्रचार केरे, ते तै मीं चुनोरोए कि तै मेरी सेवा केरे। 16 ते अवं तैस ज़ोइलो, लोकन मेरे बारे मां ज़ोमेरे वजाईं तैस केन्ने-केन्ने दुःख झूलनो पेनोए।” 17 तैखन हनन्याह तैस घरे मां जेव, ज़ैड़ी शाऊल थियो, ते तैस पुड़ हथ रेखतां ज़ोवं, “हे ढूला शाऊल, प्रभु, मतलब यीशु, ज़ैस बत्तां तू ओरोस ते तीं लेइहोरो थियो, तैनी अवं भेजोरोई, कि तू फिरी लास ते पवित्र आत्माई सेइं भेरोस।” 18 ते तैखन तैसेरे एछछन मरां ज़ेरां शेकड़ां झड़ां ते तै लहने लगे, ते खड़े उठतां बपतिस्मो नीयो। 19 ते किछ रोटी खेइतां तैस हिम्मत आई, ते किछ दिहाड़े तै चलन सेइं

साथी दमिश्क नगरे मां राव। 20 तैसेरां बाद अकदम तै दमिश्क नगरेरे प्रार्थना घरन मां प्रचार केरने लगे, कि यीशु परमेशरू मट्टूए। 21 सब शुन्ने बाले हेरान भोइतां ज़ोने लगे, “कुन ई तैए मैनु नई, ज़ै यरूशलेम नगरे मां ज़ैना यीशु मसीह पुड़ विश्वास केरते थियो मारतो थियो? ते इड़ी भी एल्हेरेलेइ ओरो थियो, कि एन लोकन टलेइतां प्रधान याजकां केरे हवाले केरे?” 22 पन एसेरां बाद शाऊल होरो भी शक्ति सेइं प्रचार केरतो राव, ते एस गल्लरू सबूत देइ-देइ कि यीशु ही मसीहे, दमिश्क नगरेरे रानेबालां यहूदी केरू आशी बंद केरतो राव। 23 ज़ैखन शाऊले दमिश्के मां बड़ो वक्त बीतो त यहूदेईं मिलतां तैस मारनेरो मुशोरो कियो। 24 पन शाऊले एस गल्लरो पतो लगे, तैना त तैस मारनेरे लेइ रात दिहेड़ी दारन पुड़ रहते थियो। 25 पन राती तैसेरे चेलेईं तै टोकरे मां रख्यो, ते नगरेरे दुवारी पुड़ां रस्से सेइं टोकरां मां ओसैलतां बुन पुजाव। 26 ज़ैखन शाऊल यरूशलेम नगरे मां पुजो त तैनी चलन सेइं मिलनेरो इंतज़ाम कियो, पन सब तैस करां डरते थी कि तै भी चेलोए। 27 पन बरनबासे शाऊल एप्पू सेइं साथी प्रेरितन कां आनो ते तैन ज़ोवं, कि केन्चरे दमिश्क नगरेरे बत्तां चलते-चलते एस प्रभु यीशु लेइहोरोए, ते प्रभुए एस सेइं गल्लां कियोरिन, ते एनी केन्ने दिलेरी सेइं दमिश्क नगरे मां यीशुएरे नव्वेरो प्रचार कियोरोए। 28 प्रेरितेईं बरनबासेरी गल्लां केरो विश्वास कियो, ते शाऊल तैन सेइं साथी राव, ते यरूशलेम नगरे मां गातो राव। 29 ते यूनानी भाषा केरनेबाले यहूदन सेइं भी गलबात केरतो थियो, दिलेर भोइतां प्रभुएरो प्रचार केरतो थियो, पन तैना तैस मारनेरी कोशिश मां रहते थी। 30 एल्हेरेलेइ विश्वासी ढूलाएई तै कैसरिया नगरे मांजो नीयो, ते तैदुं तरसुसे नगरे जो भेजो। 31 त सारे यहूदिया इलाके मां ते गलील इलाके ते सामरिया इलाकेरी कलीसियान मां चैन भोव, ते तरक्की भोती जेई, ते तै प्रभुएरे डरे मां ते पवित्र आत्मा रे शैन्ति मां चलती ते बड़े लोकेई यीशु मसीह पुड़ विश्वास कियो। 32 फिरी एरू भोवं कि पतरस सारे इलाके मां हंठतो फिरो, ते तैन पवित्र लोकन साथी भी पुजो, ज़ैना लुद्दा नगरे मां रहते थियो। 33 त तैस तैड़ी ऐनियास नव्वेरो अक मैनु मैल्लो, तैस अधरंग थियो, ते अठे सालां केरो देंतो खट्टी पुड़ राहोरो थियो। 34 पतरस तैस जो ज़ोवं, “हे ऐनियास! यीशु मसीह तीं बड़ाते, उठ अपनू बछान खडू केर,” तैखने तै बेज्झोइतां खडो भोव। 35 तैखन लुद्दा नगरेरे ते शारोमेरे राने बालेई एन हेरतां प्रभु यीशु पुड़ विश्वास कियो। 36 याफा नगरे मां अक कुआन्श थी, जेसारू नवं तबीता थियू (यूनानी भाषाई तैसेरू दोरकास थियू, जेसेरो मतलब हिरनी) ते विश्वासी थी, ते रोड़ां-रोड़ां कम्मां केरती ते गरीबां केरि मद्दत केरती थी। 37 तैने दिहाइन मां जेइस पतरस लुद्दा मां थियो, तै बिमार भोइतां मेरि जेई, ते तैसारी लाश नेइतां दोपरेरे कमरे मां रखोरि थी। 38 लुद्दा याफारे नेडे थियू, ते ज़ैखन चेलेईं शुनु कि पतरस लुद्दा मां आए, त दूई मैनु भेजतां मिनत की, “कि असन कां एजने मां ठह न ला।” 39 तैखन पतरस तैन सेइं साथी चलतो जेव, ते ज़ैखन तैड़ी पुजो त तै बा तैस कमरे मां नीयो, सैरी विधवां कुआन्शां लेरां देती थी, ते तैस इलखमेईं खेइ थी, ते तैना लिगड़ां ज़ैना

दोरकास सियोरां थियां हिराने लेगि। 40 पतरसे तैना सब बेइरोवं कढे, ते एप्पू ज़ैधू केरे भारे प्रार्थना केरने लगे, फिरी तैनी लाशारे पासे तुत्तर फरेइतां ज़ोवं, “हे तबीता, उठ।” तैखन तैसां अपनि एछ्छी खोल्ली, ते पतरसे तेकतां खड़ी भोइ। 41 पतरसे हथेरां टलेइतां खड़ी की, ते विश्वासी ते विधवां कुआन्सां कुजेइतां ज़ींती ते होशी मां तैन केरे सुपुई की। 42 एस गल्लरी खबर सारे याफा नगरे मां फैली जेई, ते बड़े लोकेईं प्रभु यीशु पुड़ विश्वास कियो। 43 पतरस किछ त्रिरे तगर याफा नगरे मां शमौन नव्वेरो एककी मैनेरे कां राव, ज़ै चमड़ेरू कम केरतो थियो।

10 कैसरिया नगरे मां अक मैन्हु थियो, तैसेरू नवं कुरनेलियुस थियूं, ते तै अक इतालियानी फौवजरो सूबेदार थियो। 2 कुरनेलियुस त तैसेरे घरे सारे लोक परमेशरे करां डरने बाले थिये, कुरनेलियुस यहूदी लोकन बडू दान देतो थियो, ते परमेशरे कां लगातार प्रार्थना केरतो रातो थियो। 3 एककी दिहाड़े कुरनेलियुस दीसां अक रोड़े चारे दर्शन हेरू, परमेशरेरो अक स्वर्गादूत तैस कां अव, ते ज़ोने लगे, “हे कुरनेलियुस।” 4 तैनी ते रोड़े-चारे लाव ते डेरतां ज़ोवं, “हे मालिक कुने?” तैनी तैस सेईं ज़ोवं, “तेरी प्रार्थना ते तेरू दान यादगैरेय लेइ परमेशरे कां पुजेरू आए। 5 हुनी तू मैन्हु याफा नगरे मां भेजतां तैस मैन्हु ज़ेसेरू नवं शमौन पतरसे अपने घरे कुजा। 6 तै शमौनेरे घरे बिशोरो थियो, ज़ै चमड़ेरू कम केरनेबालो थियो, ज़ेसेरू घर समुद्रे बन्ने।” 7 ज़ैखन स्वर्गादूत एना गल्लां केरतां चलो जेव, त कुरनेलियुस अपने दूई सेवकन ते अपने सिपेहिन मरां अक भक्त सिपाही कुजाव। 8 ते तैन सारो बिस्तार ज़ोइतां याफा नगरे जो भेजे, कि पतरसे कुजान। 9 होरसां ज़ैखन तैना भेजोरे लोक चलते-चलते नगर नेड़े पुजे। तै दुपारहरां केरो वक्त थियो, तैस वक्ते पतरस बा छती पुड़ प्रार्थना केरने लावरो थियो। 10 तैस दलुख लग्गी ते तै किछ खानू चातो थियो, पन ज़ैखन मैन्हु रोटी बनाने लगे त तैस बेहोशी ज़ेरे भोइजेइ। 11 ते तैनी हेरू कि अम्बर खुल्लूए, ते अक च़ादर लाई ज़ै च़ेरे कूना टेंगोरी अम्बरेरे पासेरां उन्डी ज़मीनेरे पासे ओरी। 12 ज़ैस मां ज़मीनेरे सारे जानवर ते पेटेरे भारे चलने बाले जन्तू ते अम्बरेरां चुड़ो लू तैस च़ादरी मां थियां। 13 तैखन अक आवाज़ आई, “हे पतरस, उठ ते मार ते खा।” 14 पन पतरसे जुवाव दित्तो, “नईं प्रभु, कथे नईं, किजोकि मीं अज़ तगर कोई अपवित्र ते भिद्री चीज़ नईं खोरी।” 15 फिरी दुइयोवं बार तैनी आवाज़ शुनी, “ज़ैन किछ परमेशरे शुद्ध कियोरूए, तू तैस जो भिटू न ज़ो।” 16 टलेइ बार ए आवाज़ आई, ते फिरी तै च़ादर अम्बरेरे पासे च़ली जेई। 17 पतरस दिले मां सोचने लग्गोरो थियो, कि एस दर्शनेरो कुन मतलब भोइ सकते, ज़ैन अज़ मीं लाव, एत्रे मां कुरनेलियुसेरे भेजोरे मैन्हु शमौनेरू घर तोपते-तोपते दारे मां पुजे। 18 तैनेईं हक देइतां पुच्छू, “शमौन ज़ैस जो पतरस ज़ोतन इडी तुशे कां आए?” 19 हेजू पतरस दर्शनेरे बारे मां सोचने लग्गोरो थियो, त पवित्र आत्मा तैस जो ज़ोवं, “शमौन, हेर दलाई मैन्हु तीं पुच्छने लगोरेन। 20 खड़ो उठ ते बुन गा, तैन सेईं साथी गाने करां न डेरां, किजोकि तैना मीं भेजोरेन।” 21 पतरस बुन अव, ते तैन मैनु सेईं

ज़ोने लगे, “ज़ैस मैन्हु तुस तोपने लगोरेथ तै अवं आई, ते तुस किजो ओरेथ?” 22 तैनेईं जुवाव दित्तो, “असां कुरनेलियुस सूबेदार ज़ै धर्मी ते परमेशरे करां डरने बालोए, ते सारे यहूदी तैसेरी तारीफ़ केरतन, एक्के पवित्र स्वर्गादूते तैस जो ज़ोरूए, तू शमौन पतरसे अपने घरे कुजेइतां तैसेरी गल्लां शुन।” 23 तैखन पतरसे तैना अन्तर कुजाए, ते तैन केरि खातरदारी की। होरसां पतरस तैन सेईं साथी च़लो जेव, ते याफा नगरेरे काईं दलान मरां किछ तैस सेईं साथी च़ले जे। 24 एप्रो दिहाड़े तैना कैसरिया नगरे मां पुजे, कुरनेलियुस अपने रिशतेदारन ते अपने दोस्तन अकोट्टे केरतां तैन बलगने लाव। 25 पतरस ज़ैखन कुरनेलियुसेरे घरे पुजो, त कुरनेलियुसे तैसेरी बड़ी आदर खातरी सेईं इज़त की, ते क्रोडी पव्वन कां रेखतां तैस कां मथ्यो टेको। 26 पन पतरसे तै खड़ो कियो ते ज़ोवं, “खड़ो भो किजोकि अवं भी त अक मैन्हु आई।” 27 फिरी तै कुरनेलियुसे सेईं गल्लां केरतो अन्तर जेव, तैडी बड़े लोक अकोट्टे बिशोरे लेइतां, 28 तैस सेईं ज़ोवं, “तुसन पत्तोए इश्शे यहूदी केरे लेइ गैर कौमी सेईं मिलनू जुलनु कानूनेरे खलाफे, पन परमेशरे मीं सेईं ज़ोरूए कि अवं केन्ची मैन्हु जो अपवित्र या भिट्टो ज़ोई। 29 एल्हेरेलेइ तुसेईं अवं कुजाव त अवं चुपचारे च़लो अव। हुनी अवं तुसन पुछ्छताई कि तुसेईं अवं किजो कुजेवरोई?” 30 कुरनेलियुसे ज़ोवं, “अवं च़ेरे दिहाड़ना पेइले अपने घरे मां इस मौके कोई टलेइ बजेईं प्रार्थना लोरो थियो केरने, त अचानक अक मैन्हु चमकतां लिगड़ां लग्गोरो मेरे तुत्तरे अगर खड़ो भोव। 31 ते ज़ोने लगे, हे कुरनेलियुस, तेरी प्रार्थना परमेशरे शुनोरीए ते तेरू दान भी कबूल कियोरूए। 32 एल्हेरेलेइ कोन्ची याफा नगरे मां भेजतां शमौन ज़ैस जो पतरस ज़ोतन, कुजा। तै शमौनेरे कांए ज़ै चमड़ेरू कम केरनेबालो, ते समुद्रे बन्ने रहते। (ज़ैखन तै एज्जेलो त तै परमेशरे बारे मां ज़ोलो) 33 तैखन मीं मैन्हु भेजे, ते तीं बडू रोडू कियूं कि तू अव। हुनी अस परमेशरेरे सामनेम, ताके ज़ैन किछ परमेशरे ज़ोरू तैन शुनमा।” 34 तैखन पतरस ज़ोने लगे, हुनी मीं याकीन भोव, कि परमेशार केन्चेरो तरफदार नईं। 35 बल्के हर कौमी मरां ज़ै परमेशरे करां डरते ते रोड़ां कम्मां केरते परमेशार तैस कबूल केरते। 36 इस्राएली लोकां केरे लेइ परमेशरेरे भेजोरे सन्देशेरे बारे मां तुसन पतो आए। परमेशरे यीशु मसीहेरे ज़िरिये सेईं ज़ै सेब्मी केरो प्रभुए शनतरी खुशखबरी शुनाई। 37 यूहन्नारे बपतिस्मेरो प्रचार केरने करां लेइतां गलील इलाके करां शुरू भोइतां सारे यहूदिया इलाके मां कुन-कुन भोवं, तुस भी ज़ानतथ। 38 केन्चेरे प्रभु यीशु नासरी पवित्र आत्माई सेईं ते शक्ति सेईं अभिषेक कियूं, ते तै लोकां केरू भलू केरतो राव, तैनी सब ज़ैना शैतानेरे ज़ाले मां फासोरे थिये, तैना छुटाए, किजोकि परमेशार तैस सेईं साथी थियो। 39 तैनी ज़ैन किछ यहूदी केरे मुलखे मां ते यरूशलेम नगरे मां कमाव, असां तैसेरे गवाह आम, ते तैए यहूदी लीडरेईं यरूशलेमे मां क्रूसे पुड़ टेंगेइतां माराव। 40 परमेशरे तैए टलेइयोवं दिहाड़े फिरी ज़ीतो केरतां हिराव। 41 तै सैरी लोकेईं नईं बल्के गवाहेईं लाव, ज़ैना परमेशरे पेइले चुनतां रखोरे थिये, यानी असां ज़ैनेईं तैसेरे मुइदन मरां ज़ीते भोनेरां बाद तैस सेईं साथी रोटी

खोरीए। 42 ते तैनी असन हुकम दितो कि लोकन मां प्रचार केरम ते गवाही देम, कि ई तैए जै परमेशरे ज़ीते ते फटरां केरो हाकिम भोए। 43 सारे नबी तैसेरे बारे मां गवाही देतन, कि जै कोई तैस पुड़ विश्वास केरेलो त तैस तैसेरे नंबे सेइं पापां केरि माफ़ी मैले। 44 पतरस हेजू एन ज़ोंतो थियो, त पवित्र आत्मा तैन पुड़ उतरी, जैना बचन शुन्ने लोरे थिये। 45 ते जेत्रे यहूदी विश्वासी पतरसे सेइं साथी ओरे थी, तैना सब हैरान भोए कि गैर कौमन पुड़ भी पवित्र आत्मा उतरोरीए। 46 किजोकि तैनेई तैना किसमे-किसमेरी भाषां केरते, ते परमेशरेरी तारीफ़ केरते शुनोरी थिये, तैखन पतरसे ज़ोवं। 47 “जेन्चरे परमेशरे असन पवित्र आत्मा दितोरीए तेन्चरे तैन भी दितोरीए, कुन कोई एन मैनन् पेनेरो बपतिस्मो नेने करां रोकी सकते?” 48 एल्हेरेलेइ पतरसे हुकम दितो, कि एन लोकन यीशु मसीहेरे नंबे सेइं बपतिस्मो देथ, तैखन तैनेई पतरसे कां मिनत की, कि किछ दिहाड़े असन कां हेजू बिश।

11 यहूदिया मां रानेबाले प्रेरितेई ते विश्वासी ढूलाएई ए खबर शुनी, कि गैर यहूदेई भी परमेशरेरू बचन कबूल कियूं। 2 ते ज़ैखन पतरस वापस यरूशलेम नगरे मां अव, त यहूदी विश्वासी लोक तैस सेइं बेंस केरने लगे। 3 “तू गैर कौमां केरे घरे जेव, ते तैन सेइं साथी बिशतां रोटी भी खाइ।” 4 पतरस तैन सेइं सारो बिस्तार पत्रां देंतो ते आखरी तगर एन्चरे शुनाव, कि कुरनियुसेरे घरे कुन भोवं। 5 “अवं याफा नगर मां प्रार्थना केरने मां मघन थियो, त मीं किछ बेहोशी ज़ेरी भोइजेइ, ते मीं अक दर्शन लाव, ते अक चादर ज़ेरी चेत्रे कूना टेंगोइतां अम्बरेरे पासेरां उन्ही एइतां मीं तगर पुजी। 6 अवं तैस मां तकने लगे त कुन हेरताई कि, तैस मां ज़मीनरे सारे चेत्रे ज़ेघेइं चलने बाले जानवर ते पेटेरे भारे चलने बाले जीप ते अम्बरे मां उडरने बालां चुड़ो लु थियां। 7 तैखन मींजेई अक आवाज़ आई, जै ज़ोने लगी, ‘हे पतरस खडो उठ ते इन मार ते खा।’ 8 मीं जुवाब दितो, प्रभु नई, किजोकि मीं अज़ तगर कोई भी अपवित्र या भिट्टी चीज़ नई खोरी। 9 एसेरे जुवाबे मां अम्बरेरां होरि आवाज़ आई, ‘जैन किछ परमेशरे पवित्र बनेवरीए, तू तैस जो भिटू न जो।’ 10 ए आवाज़ ट्लेइ बार आई, ते फिरी तै चादर अम्बरेरे पासे खिचोइतां चली जेई। 11 ठीक तैस्से मौके ट्लाइं मैन्हु जैना कैसरिया नगरे मरां कुरनुलियुसे मीं कां भेजोरे थिये, तैस घरे कां सामने खड़े भोए, जैडी अवं थियो। 12 तैखन पवित्र आत्मा मीं सेइं ज़ोवं, बेधड़क चारे एन सेइं साथी गा, एना 6 ढूला भी मीं सेइं साथी आए, ते असां तैस मैनेरे घरे जे। 13 तैनी असन सेइं ज़ोवं, कि केन्चरे सेइं तैनी अक स्वर्गदूत घरे लाव ते ज़ोने लगे, याफा मां केन्ची मैन्हु भेज़तां शमौन ज़ैस जो पतरस ज़ोतन, तैस अपने घरे कुजा। 14 तै एइतां तीं अक एरो बिस्तार देलो, जेसेरे ज़ोने सेइं तेरी खानदानेरे सारे मैनन् परमेशर मुक्ति देलो। 15 ज़ैखन मीं तैडी गेइतां तैन सेइं गल्लां शुरू की, त पवित्र आत्मा तैन पुड़ उतरी, जेन्चरे पेइले असन पुड़ उतरोरी थी। 16 तैखन मीं प्रभुएरू तैन वचन याद आऊं, जैन तैन ज़ोवरो थियूं, कि यूहन्ना त पैनी सेइं बपतिस्मो दितो, पन तुसन पवित्र आत्माई सेइं बपतिस्मो मैलेलो। 17 बस्सा अगर परमेशरे

तैन भी तैए तोफो दितो, जै असन प्रभु यीशु मसीह पुड़ विश्वास केरने सेइं मैल्लो, त अवं कौन भोताई कि परमेशरे रोकी?” 18 ज़ैखन यहूदी विश्वासी लोकेई एन शुनू त चुप रेइजे, “ते परमेशरेरी तारीफ़ केरने लगे, तां त सच्चरे कि परमेशरे गैर कौमन भी पापन करां मन फिरेइतां यीशु पुड़ विश्वास केरतां हमेशारी ज़िन्दगी हासिल केरनेरो तोफो दितोरोए।” 19 त तैना लोक जैना तैस दुखेरे मारे जै स्तिफनुसेरे मौतरे वक्ते शुरू भोरो थियो, तितर-बितर भोइजेइ, ते चलते-चलते फीनीके इलाके ते साइप्रस ते अन्ताकिया नगरे तगर पुजे, पन तैना यहूदी केरे अलावा होरन परमेशरेरू वचन न थिये शुनाते। 20 पन तैन मरां किछ साइप्रसेरे रानेबाले ते किछ कुरेनेरे रानेबाले थिये, जैना अन्ताकिया नगरे मां एइतां यूनानी लोकन भी प्रभु यीशु मसीहेरी खुशखबरी शुनाने लगे। 21 ते प्रभुपरी शक्ति तैन पुड़ थी, ते बड़े गैर कौमरे लोकेई तैन केरे सन्देशे पुड़ विश्वास कियो, ते प्रभु यीशु पुड़ भरोसो केरनो शुरू कियो। 22 तैखन तैन केरि खबर यरूशलेम नगरेरे कलीसियारे लोकन तगर पुजी, ते तैनेई बरनबास अन्ताकिया नगरे जो भेजो। 23 तै तैडी पुज़तां, ते परमेशरेरो अनुग्रह हेरतां बड़ो खुशी भोव, ते तैन ए गल ज़ोई कि अपने तने मने सेइं प्रभु सेइं लिपटोरे रान। 24 बरनबास अक रोडो मैन्हु थियो, तै पवित्र आत्माई ते विश्वासे सेइं भरपूर थियो, ते बड़े लोक प्रभु मां आए। 25 तैखन बरनबास अन्ताकिया नगर शैरतां शाऊले तोपने तरसुस नगरे जो चलो जेव। 26 तैनी शाऊल तोपतां अन्ताकिया नगरे मां आनो, तैडी तैना एककी साले तगर दुइये जन्हे कलीसियाई मां लोकन प्रभु यीशुपरी शिक्षा देते राए, ते लोक चलन जो सेरुभन करां पेइले अन्ताकिया नगरे मां मसीही ज़ोने लगे। 27 तैने दिहाइन मां किछ विश्वासी जैना नबी थिये, यरूशलेम नगरेरां अन्ताकिया नगरे मां आए। 28 तैन मरां अक नबी जेसेरू नवं अगबुस थियूं खड़े भोइतां ते पवित्र आत्माेरे ज़ोने सेइं एन ज़ोने लगे, कि सैरी दुनियाई मां अक बड़ी काल पेनोए। ए काल क्तौदियुस हाकिमेरे वक्ते पेव। 29 तैल्हेरेलेइ चेलेई फैसलो कियो कि, असन मरां हर कोई अपनि-अपनि हैसयतरे मुताबिक किछ दान देथ, ताके यहूदिया इलाके मां रानेबाले मसीही ढूलां केरि मद्दत भोइसखे। 30 बस्सा तैनेई किछ रकम अकोट्टी की ते बरनबास ते शाऊलेरे हथ्थे यरूशलेम नगरेरे बुजुर्गन कांजो भेजी।

12 तैस्से वक्ते मां हेरोदेस राज़ो कलीसियारे किछ मैनन् दुःख देनेरे लेइ तैना टूलाने शुरू कीए। 2 ते यूहन्ना प्रेरितेरो ढूला याकूब तलवारी सेइं मराव। 3 ज़ैखन तैनी हेरू कि यहूदन ए गल बड़ी खुशी अई, त तैन दिहाइन मां पतरस भी टूलाव। तैना दिहैडी अखमीरी रोट्टरी तिहारिरी थी। 4 ते तैस टूलानेरां बाद हेरोदेस तै कैदखाने मां छुडो, ते तैसेरी निगरेनारे लेइ चेत्रे टोली बनाई, हर टोली चेत्र-चेत्र सिपाही केरि थी, हेरोदेसेरो खियाल थियो कि फ्रसह तिहाररे बाद तै कैदे मरां केढतां लोकां केरे सामने पैश केरे। 5 कैदखाने मां पतरस बड़े दिहाइन तगर पेरहे मां थियो, पन सारी कलीसिया तैसेरेलेइ परमेशरे कां प्रार्थना केरने लगेरी थी। 6 हेरोदेसे, पतरस लोकां केरे सामने आने करां पेइले अक रात

जैखन पतरस दूई पहरेदारों केरे मझाटे बंधोरो झूलोरो थियो, ते सिपाही कैदखानेरे डेवढी पुड़ पैरहो देंते थियो। 7 त अचानक परमेशेरो स्वर्गदूत कैदखाने मां अव, ते सारो कैदखानो टलकडो भोइ जेव, स्वर्गदूते पतरसे खिची देइतां बीझाव ते ज़ोव, “उठ, ते लूश केर।” ते शंगलां पतरसेरे हथ्यन सैहीयेंरां खुल्ली जेई। 8 स्वर्गदूते पतरसे सेईं ज़ोव, “अपनू मज़ बन्ध ते बूट ला।” पतरसे तैन्ने कियूं, ते फिरी ज़ोव, “अपनो चोगो ला ते मीं पत्पती एई।” 9 पतरस स्वर्गदूत पत्पती कैदखाने मरां बेइर अव, पन तैस ए पतो न थियो, कि स्वर्गदूते ज़ैन केरने लगोरोए एन सञ्जे या कोई दर्शन हेरने लगोरोइं। 10 तै दुइयोवं पेरहेदारे करां बेइर निस्तां अव, ते लोहरे फाटके कां पुजो, ज़ै नगरेरे पासे खुलतो थियो, तै फाटक तैन केरे लेइ अपने आप खुल्लो, ते तैना तैट्ठां निस्तां दूर पुजे, स्वर्गदूत पतरसे तैड़ी पुजेइतां गैइब भोइ जेव। 11 तैखन पतरस होशी मां अव, ते ज़ोने लगे, “हुनी मीं पूरू याकीन भोव, कि परमेशेरे अपनो स्वर्गदूत भेजतां अवं हेरोदेसेरे हथ्ये मरां छुटाव, ते यहूदी लीडेरेईं ज़ैन सोचेरू थियूं, तैन बन्ने न दित्तू।” 12 ज़ैखन तै एस बारे मां सोचने लगगोरो थियो, त मरियमेरे घरे पुजो, ज़ै यूहन्ना ज़ैस जो मरकुस ज़ोते थियो तैसेरी अम्मा थी। तैड़ी बडे विश्वासी लोक अकोट्टे भोइतां प्रार्थना केरने लगगोरो थियो। 13 पतरसे बेइरू दार गुडकावं त अक नौकरानी ज़ेसारू नवं रुदे थियूं, तै दार खोलने आई। 14 तैसां पतरसेरी गल शुनी ते तैसां गल पिशानी ते बगैर दार खोलनेरां दौवइती खुशी भोइतां आई, ते ज़ोने लगी, पतरस बेइर दारे मां ओरोए। 15 तैना मैन्हु ज़ोने लगे, “तू कुन पागल भोरिस।” पन ज़ैखन तैसां रोडेचारे ज़ोव, कि तै पतरसे, त तैना ज़ोने लगे “पतरस त नई पन पतरसेरो स्वर्गदूत भोलो।” 16 ते पतरस बेइर दार गुडकातो राव, ते ज़ैखन तैनेईं दार खोल्लू त पतरस लेइतां हैरान रेइजे। 17 पतरसे तैन जो हथ्ये सेईं इशारो कियो, कि चुप राथ, ते फिरी अन्तर एइतां सारो बिस्तार शुनाव, कि अवं केन्चरे परमेशेरे कैदखाने मरां बेइर कढो, ते फिरी ज़ोव, “याकूबे त तैसेरे होरि मसीह ढूलान भी पतो देइयथा।” ते एप्पू केन्ची होरि जगाई जो च़लो जेव। 18 ज़ैखन झेझ भोइ त सिपेहिन एप्पू मामेईं खलबली मेञ्चि जेई, कि पतरस कोरां जेव। 19 ज़ैखन हेरोदेसे तैस तोप्पनेरो हुक्म दित्तो त तैनी सिपेही केरू बियांन घिन्नेरां पत्ती तैन जो कतलेरो हुक्म दित्तो, ते पतरस यहूदिया इलाके मरां कैसरिया नगरे जो च़लो जेव, ते किछ च़िरे तगर तैड़ी राने लाव। 20 हेरोदेस सूर ते सैदारे नगरेरे लोकन पुड़ बड़ो नाराज़ थियो, तैखन तैना लोक मिलतां तैस कां आए, ते बलास्तुसे ज़ै राज़ेरो खास मैन्हु थियो, मनेइतां मेल केरनो चाव, किजोकि राज़ो एरे मुलखेरां तैन केरे मुलखे खर्चां मैलतो थियो। 21 तैखन तैनी अक दिहाड़ी ठुवहलाई ते हेरोदेस राज़ो अपना राज़ेरां लिगइतां लेइतां आदालतरे तखते पुड़ बिश्तां लोकन सेईं ज़ोने लगे। 22 तैनेईं ज़ैखन शूनू त ज़ोने लगे, “ए मैन्हु केरि आवाज़ नई बल्के परमेशेरेरी आवाज़े।” 23 किजोकि हेरोदेसे परमेशेरेरी तारीफ़ न की, तैल्हेरेलेइ तैस परमेशेरे स्वर्गदूतेरी एरी मार पेई कि तैसेरी सैरी जानी कीडे लगे, ते तै मेरि जेव। 24 पन परमेशेरेरू बच्चन अग्रोवं बद्धू जेव, ते विश्वासी लोकां

केरि गिनती बद्धती जेई। 25 ज़ैखन बरनबास ते शाऊल अपनि सेवा ज़ै तैन केरे सुपर्द कियोरी थी, तैनेईं पूरी की त अन्ताकिया नगरेरां यरूशलेम नगरे जो वापस आए, ते यूहन्ना ज़ैस जो मरकुस ज़ोते थियो, एप्पू सेईं साथी आनो।

13 अन्ताकिया नगरेरे कलीसियाई मां काई नबी ते गुरू थियो, मतलब बरनबास, शमौन ज़ैस जो नीगर भी ज़ोतन, लूकियुस कुरेनी, ते मनाहेम ज़ै मुलखेरे च़ेवरोवं हिसे पुड़ हाकिम थियो ज़ै हेरोदेसेरो दुद्र ढूला थियो, ते शाऊल थियो। 2 ज़ैखन तैना बरत रेखतां प्रभुएरी आराधना केरने लगगोरो थियो, त पवित्र आत्मा तैन सेईं ज़ोव, “ज़ैस सेवारे लेइ बरनबास ते शाऊल मीं कुजोरेन, तैसेरेलेइ तैन अलग केरा।” 3 तैखन तैनेईं बरत रेखतां प्रार्थना की, ते तैन पुड़ हथ्ये रेखतां तैना परमेशेरेरे कम्मरे लेइ भेजे। 4 शाऊल ते बरनबास पवित्र आत्मारी तरफां भेजोरे सिलूकिया नगरे जो जे, ते तैट्ठां तैना ज़िहाजे पुड़ च़ेइतां साइप्रस टैपू जो च़ले। 5 ज़ैखन तैना सलमीसे मां पुजे, त तैड़ी तैना यहूदी केरे प्रार्थना घरे मां परमेशेरेरू वचन शुनाव, ते यूहन्ना मरकुस भी तैन केरि मद्दत केरनेरे लेइ तैड़ी थियो। 6 ज़ैखन तैनेईं सारे जज़ीरे ते नगरन-नगरन मां हंटु फिरू, त तैना पाफुसे नगरे मां पुजे, त तैन केरि मुलाकात एक्की डैइंनोडे यहूदी ते झूठे नेबी सेईं भोइ, ज़ेसेरू नवं बार-यीशु थियूं। 7 तै टैट्टेरे हाकिम सिरगियुस, पौलुस सेईं साथी थियो, ज़ै अक अक्लमन्द मैन्हु थियो, ते तैनी बरनबास ते शाऊल कुजाए ते परमेशेरेरू वचन शुन्नु चाऊ। 8 पन एलीमास डैइंनोडो (किजोकि तैसेरे न्वंचेरो मतलब डैइंनोडो ए) तैन केरि खलाफत केरने लगे, तैन हाकिम यीशु पुड़ विश्वास केरने करां रोकनो चाव। 9 तैखन शाऊल ज़ेसेरू नवं पौलुस भी आए, पवित्र आत्माई सेईं भेरोइतां ध्याने सेईं एलीमास डैइंनोडेरे पासे तकने लगे, ते तैस सेईं ज़ोव, 10 “हे शैतानेरे कोआ, तू हर किसमेरी पाखंडे सेईं ते च़लैकी सेईं भरतस, ते नेकारो दुश्मन, कुन तू परमेशेरेरी बत बगाइने करां बाज़ न एजस? 11 हुनी प्रभु तेरे खलाफे, तू कानो भोइगानोस, ते किछ च़िरे तगर तू दिहाडो न लाएलो।” तैखने तैस आंधरू लेइयोने लगू, ते तै इरां-उरां तोपने लगे, ताके कोई तैस हथेरां टलेइतां च़लाए। 12 तैखन हाकिमे एन हेरतां, ते प्रभुएरी शिक्षा शुन्तां हैरान राव, ते प्रभु यीशु पुड़ विश्वास कमाव। 13 पौलुस ते तैसेरो साथी पाफुस नगरेरां ज़िहाजे मां पंफूलिया इलाकेरे पिरगा नगरे मां आए, ते यूहन्ना तैन शैरतां वापस यरूशलेम नगरे जो च़लो जेव। 14 ते तैना पिरगा नगरेरां निस्तां पिसिदिया इलाकेरे अन्ताकिया नगरे मां पुजे ज़ै गलतिया इलाके मां आए। ते आरामेरे दिहाडे प्रार्थना घरे मां गेइतां बिश्शी जे। 15 मूसेरो कानून ते नेबी केरि किताबी मां पढ़नेरे बाद तैट्टेरे प्रार्थना घरेरे प्रधाने तैन ज़ोव, “अगर मैन्हु केरि भलैइयेरे लेइ तुस भी किछ ज़ोनु चातथ त ज़ोथा।” 16 तैखन पौलुस खडो उठो ते हथ्ये सेईं इशारो केरो कि चुप रान ते ज़ोने लगे, “हे इस्राएली लोकव ते परमेशेरेरो डर मन्नेबाले गैर कौमां केरे लोकव मेरी गल शुना। 17 इन इस्राएली लोकां केरे परमेशेरे इश्शे दादे-पड़दादे चुने, ज़ैखन तैना मिस मुलखे मां परदेशी भोइतां रहते

थिये, तैन परमेशरे तरक्की दित्ती, ते बड़े शक्ति सेइं तैट्टां कढे। 18 ते तै सुनसान ठैरी मां लगभग 40 सालन तगर तैन केरि झैल्लतो राव, तैना बार-बार हुकम ट्लोडते राए। 19 कनान मुलखे मां परमेशरे सत कौमां नाश केरतां तैन केरि ज़मीन अपने इस्राएली लोकन विरासती मां दित्ती। 20 एना गल्लां पूरी भोने लगभग 450 साल लगे, तैसेरां बाद परमेशरे तैन केरे लेइ शमूलए नेबेरे वक्ते तगर हाकिम रखे। 21 ज़ैखन हेजु शमूलए तैन केरो हाकिम थियो त तैन लोकेईं राज़ो बनानेरे लेइ दरखुवास की, ते परमेशरे बिन्यामीनेरे गोत्रे मरां कीशेरू मट्टू शाऊल राज़ो बनावं ते तैनी 40 साल यरूशलेम नगरे मां राज़ कियूं। 22 फिरी तैनी शाऊल हटेइतां दाऊद तैसेरी ठैरी तैन केरो राज़ो बनाव, ज़ेसरे बारे मां तैनी गवाही दित्ती, मीं यिशेरू मट्टू दाऊद मेरे मनरे मुताबिक मैलोरूए, तैस पुड़ अवं खुश आई, ते तैए मेरी मज़ी पूरी केरेलो। 23 परमेशरे अपने वादेरे मुताबिक तैसेरे वंशरे मरां पापन करां मुक्ति देनेरे लेइ इस्राएले कां यीशु मसीह भेजो। 24 ज़ेसरे एजने करां पेडले यूहन्ना इस्राएलेरे सारे लोकन प्रचार कियो, कि पापन करां मनफिराथ ते बपतिस्मो नेथ।” 25 ज़ैखन यूहन्नारू कम पूरू भोनेबालू थियूं त तैनी ज़ोवं, “तुस मीं कुन समझतथ? ‘अवं मसीह नई!’ बल्के हेरा, ते मेरे बाद एजनेबालोए, किजोकि अवं त एस काबल नई कि तैसेरे बूटां केरे तसमे भी खोल्ली सेखी।” 26 “हे मेरे दूलाव, तुस ज़ैना अब्राहमेरे औलादारे लोकव, ते परमेशरेरो डर मन्नेबाले गैर कौमां केरे लोकव, इस मुक्तरो बिस्तार तुसन कां भेजरोए। 27 यरूशलेम नगरेरे रानेबाले लोकेईं ते तैन केरे प्रधानेईं यीशु मसीह न पिशानो, ते न नेबी केरि गल्लां सेमझी, ज़ैना हर आरामेरे दिहाड़े पेढतां शुनेईं गैती थी। 28 हालांकी तैन मौतरी सज़ारे काबल सबूत न मैल्लू, पन फिरी भी तैनेईं पिलातुस गवनेर कां दरखुवास की, कि ए मारो गाए। 29 ते तैनेईं सब किछ ज़ैन तैसेरे बारे मां पवित्रशास्त्रे मां लिखेरू थियूं, पूरू कियूं, त तै कूसे पुड़ कील देइतां मारो, ते ओसैलतां एक्की कब्री मां छुडो। 30 पन परमेशरे तै मुडदन मरां भी ज़ींतो कियो। 31 ते ज़ैना लोक गलील इलाके मरां तैस सेइं साथी यरूशलेम नगरे मां ओरे थिये, तैन चेलन काई दिहाड़न तगर यीशु लेइयोतो राव, ते हुनी तैना लोक ज़ैनेईं तै लाहोरोए गवाही देतन। 32 असां तुसन खुशखबरी शुनातम, कि ज़ै वादो परमेशरे इश्शे दादे-पड़दादन सेइं कियोरो थियो। 33 कि परमेशरे यीशु मसीह मुडदन मरां ज़ींतो केरतां ते वादो पूरू कियो, ते भजना केरि किताबी मां परमेशर मसीहरे बारे मां ज़ोते, तू मेरू मट्टूस ते अवं तेरो बाजी भोव। 34 एन सच्छे, कि परमेशरे तै मुडदन मरां भी ज़ींतो कियो, ताके तैन न शड़े, परमेशरे बचने मां एन्ने बियांन कियोरूए, कि अवं तीं पवित्र ते सच्छी बरकत देलो, ज़ैन केरो वादो परमेशरे दाऊदे सेइं कियोरो थियो। 35 ते होरि भजने मां दाऊद ज़ोते, तू अपने पवित्र मैन्हु शड़ने न देलो। 36 किजोकि दाऊद त अपने वक्ते मां परमेशरेरी मज़ी पूरी केरनेरां पत्ती मेरि जेव, ते अपने दादन-पड़दादन सेइं साथी दफन भोव, ते तैसेरी जान शैडी जेई। 37 पन ज़ै (यीशु मसीह) परमेशरे मुडदन मरां ज़ींतो कियो, त तैसेरे शड़नेरी नौबत न आई। 38 “एल्हेरेलेइ, हे

दूलाव, बुझा कि यीशुएरे ज़िरिये सेइं तुसन पापां केरि मैफारी खबर शुनाई गावे। 39 तुस मूसा नेबेरे कानूने मुताबिक धर्मी न थी भोने, पन ज़ै कोई यीशु पुड़ विश्वास केरे तै धर्मी भोए। 40 “एल्हेरेलेइ खबरदार राथ, कोस्कोई एरू न भोए कि नेबी केरि ए गल तुसन पुड़ सच्छे बीते, 41 तुस ज़ैना होरि केरि तुहीन केरतथ, हेरा, ते हैरान भोथ, ते बरबाद भोथ, किजोकि अवं तुश्शे ज़ींते ज़ागते एरू कम केरनेबालोईं, कि अगर कोई तुसन सेइं तैसेरे बारे मां गलबात भी केरे, त तुस कधे विश्वास न केरेले।” 42 ज़ैखन पौलुस ते बरनबास प्रार्थना घरे मरां चले, त लोक तैन कां मिनत केरतां ज़ोने लगे, कि होरि आरामेरी दिहाड़ी भी एन्ने गल्लां केरे बारे मां ज़ोवं गाए। 43 ज़ैखन लोक आराधनारे बाद बेइर निस्से, त बड़े लोक पौलुस ते बरनबासे पत्ती चले, ते तैन मां किछ यहूदी थिये, ते किछ नंवे यहूदी पंथ धारण कियोरे थिये, ते तैनेईं तैन सेइं गलबात केरतां तैन समझाव, कि परमेशरे अनुग्रहे मां बनोरे राथ। 44 होरि आरामेरे दिहाड़े लगभग सारू नगर परमेशेरू वचन शुन्नेरे लेइ अकोट्टू भोवं। 45 ज़ैखन यहूदी लीडरेईं एत्रे हले लोक लाए त तैन जलन भोइ, ते पौलुसेरे खलाफ गल्लां लगे केरने। 46 तैखन पौलुस ते बरनबासे दिलेर भोइतां तैन ज़ोवं, “ज़रूरी एन थियूं, कि असां पेडले तुसन परमेशेरू बच्चन शुनाम, पन तुस त इन्कार केरने लोरथ, ते अपनो आप हमेशारी ज़िन्दगरे काबल न समझथ, त हेरा हुनी असां गैर कौमां केरे पासे गातम। (aiōnios g166) 47 किजोकि प्रभुए असन ई हुकम दितोरोए, मीं तू मीं तू गैर कौमां केरे लेइ लौ बनोरस, ताके तुश्शे ज़िरिये सारे ज़मीनी पुड़ मुक्ति आनी गाए, ते तू ज़मीनेरे हर पासे मुक्तू दार भोस।” 48 इन शुन्तां गैर कौमां केरे लोक बड़े खुशी भोए, ते परमेशरेरी तारीफ़ केरने लगे, ते ज़ैना परमेशरे हमेशारी ज़िन्दगरे लेइ ठहरावरे थिये, तैनेईं विश्वास कियो। (aiōnios g166) 49 ते प्रभुएरू बच्चन सारे मुलखे मां फैली जेवं। 50 पन यहूदी लीडरेईं बड़े भक्त ते इज़्जतदार कुआन्शां ते नगरेरे काई खास मैन्हु भड़काए, तैनेईं पौलुस ते बरनबासे सिंतेइतां तैना तैस इलाके मरां भी केडी छुडे। 51 तैखन पौलुस ते बरनबासे तैन केरे सामने अपने पावां केरि धूड़ ठुड़कतां तैना इकुनियुम नगरे जो चले जे। 52 ते चले इकुनियुम नगरे मां खुशी ते पवित्र आत्माई सेइं भरपूर भोते राए।

14 इकुनियुम नगरे मां पौलुस ते बरनबास दुइये ज़ने प्रार्थना घरे मां जे, ते एरू भाषण केरने लगे ते बड़े यहूदी लोकेईं ते यूनानी लोकेईं विश्वास कियो। 2 पन विश्वास न केरनेबाले यहूदेईं, गैर यहूदी लोक भड़काए ते तैनेईं विश्वासी मैन्हु विश्वासे करां दूर किये, ते तैन केरे खलाफ क्रोध पैदा कियो। 3 ते पौलुस ते बरनबास काई दिहाड़े तैडी राए, ते प्रभुएरी भरसे पुड़ दिलेरी सेइं गल्लां केरते थिये, ते प्रभु तैन केरे ज़िरिये चमत्कार ते निशान करेइतां अपने अनुग्रहेरे वचने सच्छो साबत केरतो राव। 4 पन नगरेरे लोकन एप्पू मामेईं फूट भोइजेइ, किछ लोक यहूदी केरे पासे भोए, ते किछ प्रेरितां केरे पासे भोए। 5 यहूदी ते गैर यहूदी अपने प्रधान सेइं मिलतां तैन बेइजत केरने ते तै घोड़ेईं बाने लगे। 6 त तैन एस गल्लरो पतो लगे, तैना तैट्टां नेशशी जे, ते लुकाउनिया

इलाकेरे नगरन लुस्त्रा ते दिरबे मां ते तैसेरे आसे-पासेरे इलाके मां चले जे। 7 ते तैड़ी तैना खुशखबरी शुनाने लगे। 8 लुस्त्रा नगरे मां अक मैन्हु बिशोरो थियो, जे पांवां केरो कमजोर थियो, ते जर्मनेरो टोन्टो थियो, ते तै कधी न थियो चल्लोरो। 9 ते पौलुसेरी गल्लां ध्याने सेइं शुन्ने लगगोरो थियो, पौलुसे तैसेरे पासे ध्याने सेइं तक्कू त जानू, कि एसमां एत्रो विश्वासे कि ए बेज्जोइ सकते। 10 ते पौलुसे तैस मैन्हु ज़ोरे सेइं ज़ोवं, “अपने पावन पुड़ खड़ो भी।” ते तै तैखने खड़ो भोव, ते चल्लने लगे। 11 ज़ैखन लोकेई पौलुसेरू एन कम हेरू त लुकाउनिया भाषाईं मां ज़ोरे सेइं ज़ोने लगे, “कि देबतो असन कां मैनेरो शकली मां ओरोए।” 12 ते तैन लोकेई बरनबासेरू नवं ज्यूस रख्खू, (जैन यूनानी देबतेरू नवं थियूं), ते पौलुसेरू हिर्मस नवं रख्खू, (जै होरि देबतां केरो बिस्तार देने बालन मरां प्रधान थियो) किजोकि तै गल्लां केरने मां जादे माहिर थियो। 13 ते ज्यूस देबतेरू मन्दर नगरेरे सामने थियूं, तैसेरो पुजारी दांत ते फूडू केरे हार एन्तां नगरेरे फाटके पुड़ पुजो, किजोकि तैना लोक चाते थिये कि असां प्रेरितां केरे लेइ बलिदान केरन। 14 ज़ैखन बरनबास ते पौलुस प्रेरितेई एन शुन्नु, त तैना दुखी भोए, ते तैनेई अपना लिगड़ां छिन्दां ते मैन्नु मां जे ते ज़ोरे-ज़ोरे ज़ोने लगे। 15 “लोकव तुस एन कुन केरने लगारेथ? असां भी तुशे ज़ेरे दुःख सुख झैल्लने बाले मैन्हु आम, ते तुसन खुशखबरी शुनातम, ताके तुस एना फुजूल चीजां शैरतां जींते परमेशरेरे पासे एज्जथ, जैनी धरती त कने अम्बर ते समुन्द्रे ते जैन किछ भी एसमां आए तैनी बनोरूए। 16 तैनी बीतोरे वक्ते मां सैरी कौमन अपनि-अपनि बत्तां चल्लने दित्तु। 17 फिरी भी तैनी अपनो आप बेगवाह न बनाव, पन अपनि भलाई हेरानेरे लेइ तैनी अम्बरेरां झड़ी दित्ती, ते फसलां केरे लेइ मौसम बनाए, ताके तुसन हछु अन भोए ते तुशे दिल खुशी सेइं भरे।” 18 एना गल्लां ज़ोइतां तैनेई लोक बेड़ि मुशकली सेइं रोके, कि एना इशे लेइ बलिदान न देन। 19 तैखन किछ यहूदी अन्ताकिया नगरे ते इकुनियुम नगरे मरां आए, ते तैनेई लोक अपने पासे केरतां पौलुसे पुड़ पथराव केरने लगे, ते तै मुओरो बुझतां नगर करां बेडरोवं घसीटतां नीयो। 20 ज़ैखन चले तैड़ी पुजे त तैनेई पौलुस घरे मां आनो ते तै खड़ो उठो ते वापस नगर मां अव, ते होरसां बरनबासे सेइं साथी दिरबे नगरे जो चल्लो जेव। 21 पौलुस ते बरनबासे तैस नगर मां खुशखबरी शुनाई ते बडे चले बनाए, ते तैसेरां बाद तैना लुस्त्रा ते इकुनियुम नगरे ते अन्ताकिया नगरे मां वापस आए। 22 तैना हर एक्की नगरेरे चेलां केरे मन मजबूत केरते ते ई शिक्षा देते थिये कि विश्वासे मां बनोरे राथ, ते इन ज़ोते थी, “ते असेईं बडो दुःख झैल्लतां परमेशरेरे राज़े मां दाखल भोनुए।” 23 ते तैनेई हर कलीसियाईं मां तैन केरे बुजुर्ग ठहराए, ते बरतां रेखतां प्रार्थना की, ते तैना प्रभुएरे सुपुर्द किये, जैस पुड़ तैनेई विश्वास कियोरो थियो। 24 फिरी तैना पिसिदिया इलाके मरां निस्तां पंफूलिया इलाके मां पुजे। 25 ते पिरगा नगरे मां वचन शुनेइतां त अत्तलिया नगरे मां आए। 26 तैट्ठां जिहाजे मां चेट्ठां वापस अन्ताकिया नगरे मां आए, ते तैड़ी तैनेई तैस सेवारे लेइ जै तैनेई पूरी कियोरी थी, परमेशरेरे अनुग्रहेरे सुपुर्द कियोरी

थी। 27 अन्ताकिया नगरे मां पुजतां तैनेई कलीसियारे लोक अकोट्टे किये, कि परमेशरे असन सेइं साथी भोइतां केरहां-केरहां बडां कम्मां कियां! ते गैर कौमां केरे लेइ बत खोल्ली, कि तैना भी यीशु पुड़ विश्वास केरन। 28 ते तैना चलन सेइं साथी बडे दिहाइन तगर राए।

15 फिरी किछ लोक यहूदिया इलाके मरां आए, ते विश्वासी दूलान ए शिक्षा देने लगे, “अगर मूसरेरे रसमरे मुताबिक तुशे खतनो नई भोरो त तुसन मुक्ति न मैल्ली बटे।” 2 एस गल्ली पुड़ पौलुस ते बरनबासेरो तैन लोकन सेइं बडो मतभेद ते बडी बेंस भोइ, ते कलीसियारे लोकेई पौलुस ते बरनबास ते किछ होरे मैन्हु चुने कि तैना यरूशलेम नगरे मां गेइतां तैड़ी एस मसले पुड़ प्रेरितन ते बुजुर्गन सेइं गलबात केरतां हल कडन। 3 तैखन कलीसियारे लोकेई तैना खर्चो देइतां भेजे, ते ज़ैखन तैना फीनीके ते सामरियारे इलाकन मांमेइं चल्लोरे थिये, तैनेई ज़ोवं, कि केन्चरे गैर कौमां केरे लोक खुशखबरी शुन्तां मसीह पुड़ विश्वास कियो, ते कलीसियाईं मां शामल भोए, एन शुन्तां सारे मसीह दूला बडे खुश किये। 4 ज़ैखन तैना यरूशलेम नगरे मां पुजे, त तैठीरी कलीसियारे लोक ते प्रेरित ते बुजुर्ग तैन सेइं बेड़ि खुशी सेइं मिले, ते तैखन पौलुस ते बरनबासे सब किछ बिस्तार दित्तो, कि परमेशरे तैन केरे ज़िरिये सेइं केत्रा-केत्रा कम्मां कियां। 5 पन फरीसी पंथेरे किछ लोकेई जैनेई विश्वास कियोरो थियो, तैन मरां किछ ज़ोने लगे, “गैर कौमन मरां विश्वास केरनेबालां केरो खतनो कियोरो लोडे, ते एन मूसा नेबेरे कानूने पुड़ अमल केरनेरो हुक्म दित्तोरो लोडेते।” 6 तैखन प्रेरित ते बुजुर्ग ए गलबात केरनेरे लेइ अकोट्टे भोए। 7 बडी बेंस भोनेरे बाद पतरसे तैन खडे भोइतां ज़ोवं, “हे मेरे दूलाव, तुस ज़ानतथ कि बडे चिरे पेइले परमेशरे अवं तुसन लोकन मरां चुनो, ताके गैर कौमन मेरे ज़िरिये खुशखबरी शुनाई गाए ते तैना विश्वास केरन। 8 परमेशर जै दिलेरो हाल ज़ानते, तैनी तैन भी इशरी ज़ेरि पवित्र आत्मा देइतां इन हिराव, कि परमेशरे तैना अपने लोकां केरे ज़ेरे कबूल किये। 9 ते विश्वास केरनेरे ज़िरिये सेइं तैन केरे मन पवित्र केरतां असन मां ते तैन मां कोई फर्क न रख्खो। 10 त हुनी तुस परमेशरेरी अज़मैइश किजो केरतथ? कि गैर कौमन मरां ओरे चलन (यानी विश्वासी लोकन) पुड़ एत्रो बोझ किजो रखतथ, जैन न असेईं छुड़योए ते न इशे दादे-पड़दादे छुड़योए। 11 एरू केरनु ठीक नई, किजोकि इशु याकीन त इने कि प्रभु यीशु मसीहेरे अनुग्रह सेइं तैन केरे पापां केरि मुक्ति भोली, तेन्चरे इशरी मुक्ति भोली, न कि मूसरे कानूने सेइं।” 12 तैखन सारे लोक चुपचाप बरनबास ते पौलुसेरी गल्लां शुन्ने लगगे, कि परमेशरे केन्चरे गैर कौमन मां तैन केरे ज़िरिये केरहे-केरहे निशान ते चमत्कार किये। 13 ज़ैखन तैना चुप भोए त याकूब ज़ोने लगे, “मेरे दूलाव मेरी गल शुना।” 14 शमौन पतरसे रोड़ेचारे ज़ोवं, कि परमेशरे पेइले केन्चरे गैर कौमन पुड़ सिद्धी नज़र की, ताके तैन मरां मैन्हु चुनतां अपने लोक बनाए। 15 नेबी केरू बच्चन भी एसेरू ज़ेरूए ज़ेन्चरे लिखोरूए कि। 16 एसेरां बाद अवं फिरी एइतां दाऊदेरू राज़ बनेइलो, जैन तैसेरे दुश्मनेई नाश कियोरू थियूं। 17 ताके बाकी सारे लोक ते गैर कौमन समेत ज़ैना मीं कुजोरेन मेरे लोक

भोन, ते मीं तोप्पन। 18 ए तैए प्रभु जोते जै दुनियारे शुरुआती करां इन गल्लां केरि खबर देतो अव। (aiōn g165) 19 “एल्हेरेलेइ मेरो खियाल ईए, गैर कौमन मरां जैना लोक परमेशरे कां एदतन, तैन अस यहूदी केरो कानून मन्नेरे लेइ मजबूर न केरम। 20 बल्के तैन चिट्ठी लिखतां एन जोम कि मूरतन कां चैदोरी चीजां करां दूर रान, ते बदमैशी ते गलचैटी देइतां मारोरे जानवरां केरू मास न खान ते खून न खान। 21 किजोकि बडे पेइले नगर-नगरे मां मूसेरे कानूनरो प्रचार केरनेबाले भोते आए, ते तैना हर आरामेरे दिहाड़े प्रार्थना घरे मां पेढ़ी गाती थी।” 22 तैखन प्रेरित ते बुजुर्ग ते सारी यरूशलेमेरे सारे कलीसिया मिलतां एन रोडू समझू, कि असन मरां किछ मैन्हु चुने गान, मतलब यहूदा, जैस जो बरसब्बास जोतन ते सीलास जैना दलान मां खास आन, ते तैन पौलुस ते बरनबासे सेइं साथी अन्ताकिया नगरेरे कलीसियाई मां भेजम। 23 ते तैनेई तैन केरे हथ्ये इन लिखतां भेजू, “अन्ताकिया नगरे ते सीरिया ते किलिकिया इलाकां केरे रानेबाले विश्वासी दलान जैना गैर कौमन मरां आन, प्रेरितां ते बुजुर्ग दलां केरू नमस्कार! 24 असेईं शुनेरूपे, कि किछ मैन्हु बगैर अजाजतां तुश्शे इडी आए, ते तैनेई अपनि गल्लेईं सेइं तुश्शो दिल परेशान कियो। 25 एल्हेरेलेइ असेईं एन ठीक समझू, कि इट्टां दूईं मैन्हु अपने दलारे बरनबास ते पौलुस सेइं साथी तुसन कां भेजम। 26 एना एरे मैन्हु आन कि जैन इश्शे प्रभु यीशु मसीहेरे लेइ अपनि जानरी भी परवाह नई। 27 एल्हेरेलेइ असेईं यहूदा ते सीलास भेजोरेन, ते तैना एप्पू भी एना गल्लां शुनाले। 28 पवित्र आत्मा, ते असेईं एन ठीक समझू, कि इना ज़रूरी गल्लां केरे अलावा तुसन पुइ होरो बोझ न देम। 29 बरसा तुस मूरतन कां चाढ़ोरे बलिदाने ते खून करां ते गल दुबेइतां मारोरे जानवरे करां ते बदमाशी केरने करां दूर राथ एन तुश्शे लेइ रोडू भोलू। अग्रोवं जो शुभकामना” 30 बरसा तैना मैन्हु ज़लते-ज़लते अन्ताकिया नगरे मां पुजे, तैडी तैनेई कलीसियारे लोक अकोट्टे केरतां ए चिट्ठी तैन केरे हवाले की। 31 तैना चिट्ठी मां लिखोरी गल्लां पेढ़तां बडे खुशी भोए। 32 यहूदा ते सीलास एप्पू भी नबी थिये, तैनेई तैट्टेरे विश्वासी दलान शिक्षा दिती ते तैना विश्वासे मां पक्के बनाए। 33 किछ दिहाड़ना बाद तैट्टेरे विश्वासी दलाएई आनन्दे सेइं ते प्रार्थना केरतां वापस भेजे, ताके अपने भेजने बालन कां वापस गान। 34 सीलासे अन्ताकिया नगरे मां रानेरो फैसलो कियो ते यहूदा अकैल्लो वापस यरूशलेमे जो अव। 35 ते पौलुस ते बरनबास अन्ताकिया नगरे मां रुकी जे, तैडी तैना काई होरि लोकन सेइं मिलतां लोकन प्रभु यीशुएरे वचनेरी शिक्षा देते राए ते खुशखबरी शुनाते राए। 36 किछ चिरेरां बाद पौलुसे बरनबास सेइं जोवं, “ज़ल असां तैन सारे नगरन मां गाम, जैडी असेईं खुशखबरी शुनावरी थी, ते तैन विश्वासी दलान सेइं मुलाकात केरम, ते हेरम कि तैन केरो कुन हाले।” 37 तैखन बरनबासे यूहन्ना जैस जो मरकुस जोतन, साथी नेनो चाव। 38 पन पौलुसे ठीक न समझू, कि यूहन्ना तैन सेइं साथी गाए, किजोकि तै पंफूलिया इलाके मां कम शैरतां अलग भोरो थियो। 39 पौलुस त बरनबासे एप्पू मांमेइं बडी अनबन भोइ, ते तैना अलग भोए,

बरनबास ते मरकुस जिहाजे मां साइप्रस जो चलो जे। 40 पन पौलुसे सीलास एप्पू साथी नीयो, ते विश्वासी दलाएई तैन केरे लेइ प्रार्थना की, ते तैना परमेशरेरे अनुग्रहेरे सुपुर्द किये ते तैना तैट्टां चले जे। 41 पौलुस सीरिया ते किलिकिया इलाकन मांमेइं निस्सो चलतो ते कलीसियां केरे विश्वासी लोकन मजबूत केरतो जेव।

16 तैना फिरी दिरबे नगरे ते लुस्त्रा नगरे मां आए, तैडी अक चेलो तीमथियुस नव्वेरो रातो थियो, तैसेरी अम्मा यहूदी थी, ते तै मसीह पुइ विश्वास केरती थी, पन तैसेरो बाजी यूनान मुलखेरो रानेबालो थियो। 2 तीमथियुस लुस्त्रा नगरे मां ते इकुनियुम नगरेरे विश्वासी दलान मां बडो रोडो मैन्हु थियो। 3 पौलुसेरी इच्छा ई थी, कि तै तैस साथी ने, तैन यहूदी केरि वजाईं जैना तैडी रहते तैसेरो खतनो कियो, किजोकि तैना सब ज्ञानते थी कि तैसेरो बाजी यूनान मुलखेरो रानेबालो थियो। 4 पौलुस ते तैसेरे साथी नगर-नगरे मांमेइं ज़लते जे, तैट्टेरे विश्वासी लोकन तैना हुक्मां केरे बारे मां ज़ोते जे, जैना यरूशलेम नगरे मां प्रेरितेईं ते बुजुर्गेईं मिलतां ठहरावरे थिये, ताके लोक तैन पुइ अमल केरन। 5 बरसा कलीसियां विश्वासे मां पेक्की भोती जेईं, ते तैन केरि कलीसियां केरि तैधात बढ़ती जेईं। 6 पौलुस ते तैसेरे साथी फ्रूगिया ते गलातिया इलाकन मांमेइं निस्तां जे, किजोकि पवित्र आत्मा तैना आसिया इलाके मां बच्चन शुनाने करां रोकोरे थिये। 7 ते तैना मूसिया इलाकेरे नेडे पुजतां, बितूनिया इलाके मां गानू चाते थिये, पन यीशुएरे आत्मा गाने न दिते। 8 एल्हेरेलेइ तैना मूसिया इलाकेरे नेडेरां त्रोआस नगरे मांजो चले जे। 9 राती पौलुसे अक मैन्हु दर्शन मां लाव, “तै मकिदुनी इलाकेरो थियो, तै खडो भोइतां पौलुसे कां मिनत केरने लोरो थियो, कि पार समुन्दरेरे मकिदुनिया इलाके मां एइते इश्शी मदत केर।” 10 तैसेरे इस दर्शन हेरनेरां पती लूथी अस पार मकिदुनिया इलाके मां गानेरे लेइ तियार भोइ जे, किजोकि असेईं बुझू कि परमेशरेरी असां तैडी खुशखबरी शुनानेरे लेइ कुजवरमे। 11 असां त्रोआस नगरेरां जिहाजे मां जे, ते पैनैरू सफर केरतां सुमात्राके टैपू पुइ आए, ते तैट्टां होरसां नियापुलिस नगरे मां आए। 12 तैट्टां असां फिलिप्पी नगरे मां पुजे, जैन मकिदुनिया इलाके मां खास नगरे, ते रोमी केरि बेसती मांए, ते अस तैस नगरे मां किछ दिहाड़े राए। 13 आरामेरे दिहाड़े असां नगरेरे फाटके मरां निस्तां दरियाए पुइ पुजे, किजोकि असन उमीद थी कि तैडी यहूदी केरि प्रार्थना केरनेरी कोई ठार भोनीए, असां तैडी गोइतां बिश्शी जे, तैडी किछ कुआन्शां थी, असां तैन सेइं गल्लां केरने लगे। 14 इश्शी गल्लां शुन्ने बैली कुआन्शन मां अक परमेशरेरी भक्त लुदिया नव्वेरी थी, तै थुआतीरा नगरेरी राने बाली थी, ते बेंगनी लिंगडां बेचने बाली थी, ते प्रभुए तैसेरो मन खोल्लो, कि तै पौलुसेरे गल्लन पुइ ध्यान केरे। 15 जैखन तैसां ते तैसांरे पूरे टब्बरे बपतिस्मो नीयो त तै बिनती केरतां जोने लगी, “अगर तुस लोक मीं प्रभुएरी ईमानदार दासी समझतथ, त मेरे घरे ज़ला ते बिश्शी राथ,” ते तैसारी मिनत शुन्तां असां खुशी भोए। 16 एक्की फेरे असां प्रार्थना केरनेरी ठारी जो ज़लोरे थिये त असन अक दासी मैल्ली जै भूतां केरे मदती सेइं एजनेबाले वक्तेरे बारे मां

जोती थी। ते अपने मालिकां केरे लेइ बड़े पेंडसे कमाती थी। 17 तै पौलुसे पत्ती ते असन पत्ती चली ते ज़ोने लगी, “ए मैन्हु परमप्रधान परमेशेररो दासे, ते एना असन पापां केरि मुक्करी बत हिरातन।” 18 तै काई दिहाड़े एन्ने केरती राई, पन पौलुसे जिच भोव, ते मुड़तां तैस भूते जो जोवं, “अवं तीं यीशु मसीहरे नंवे सेई हुक्म देताई निस्सी गा, ते तै तैखने तैस मरां निस्सी जेई।” 19 ज़ैखन तैसेरे मालिकेई हेरू कि इश्शी कमैइयरी उमीद ट्लुटी जेई, त तैनेई पौलुस ते सीलास ट्लेइतां चौके मां प्रधानां केरे हवाले किये। 20 तैनेई पौलुस ते सीलास हाकिमन कां पेश किये, ते ज़ोने लगे, “एना यहूदीन ते इश्शे नगर मां बड़ी खलबली मघाने लगारेंन। 21 ते एरे रुवाज़ेरी शिक्षा देतन, ज़ैन केरू केरनू ते मन्नू असन रोमे मां रानेबालान केरे इश्शे लेइ बिलकुल भी ठीक नई।” 22 एन शुन्तां सारे लोक पौलुस ते सीलासेरे खलाफ अकोट्टे भोए, ते हाकिमेई तैन केरां लिगड़ां खोलतां छिन्दां ते सोटेई बानेरो हुक्म दित्तो। 23 सिपैहीयेई तैन खूब बेंतेई बेही ते कैदखाने मां छडे, ते कैदखानेरे प्रधाने हुक्म दित्तो, कि रोड़ेचारे परहो दित्तो गाए। 24 तै हुक्म शुन्तां तैना आँधरी कोठी मां छडे, ते तैन केरे पावन लेकडरी बेड़ि लेइ। 25 एथ्थी राती पौलुस ते सीलास प्रार्थना केरने मां मघन थिये, ते परमेशेररां भजना लोरे थी ज़ोने, ते होरे कैदी भी शुन्ने लोरे थिये। 26 अचानक अक भुंजल अव, ते कैदखानेरे बुनीयाद हिल्ली ते सारां दारां खुल्ली जेआं, ते सैरी कैदी केरि बेड़ि भी खुल्ली जेई। 27 कैदखानेरो प्रधान बींज़ो ते खड़ो उठो, ते तकने लगे, ते हेरते कि कैदखानेरां दारां खुल्ली जोरेन, त तैनी समझू कि सारे कैदी नश्शोरेंन, ते तैनी अपनि तलवार खिचची कि अवं अपनो आप मेरी छेड़ी। 28 पन पौलुसे ज़ोरे सेई ज़ोवं, “अपनो आप न मार किजोकि असां सब इड़ी आम।” 29 तैखन तै दीयो बैलतां अन्तर जेव, ते पौलुसे ते सीलासेरे पावन पुड़ पेव, 30 फिरी तैनी तैना बेइर आने ते ज़ोने लगे, “जनाब अवं कुन केरि, कि मेरी मुक्ति भोए?” 31 तैनेई ज़ोवं, “प्रभु यीशु मसीह पुड़ विश्वास केर, त तीं ते तेरे टब्बरे पापन करां मुक्ति मैल्लनीए।” 32 ते तैनेई तैस त तैसेरे टब्बरे प्रभुएरू वचन शुनाव। 33 तैखने तैने राती पौलुस ते सीलास नेइतां तैन केरे ज़खम धोए, ते तैनी तैसेरे सारे टब्बरे बपतिस्मो नीयो। 34 फिरी तैनी तैना अपने घरे ने, ते तैन खाने जो रोटी दित्ती, ते सारे टब्बरे परमेशरे पुड़ विश्वास केरतां बड़े खुश थिये। 35 होरसां झेइ हाकिमेई सिपाही भेजतां बिस्तार भेजो, कि तैन मैनन् हथरां छेड़ी देथ। 36 दरोगा पौलुसे जो ज़ोवं, “हाकिमे हुक्म दित्तोरौए कि पौलुस ते सीलास कैदखाने मरां हथरां छडा, एल्हेरेलेइ तुस खुशी सेई चले गाथ।” 37 पन पौलुसे तैन सेई ज़ोवं, “तैनेई अस ज़ैना रोम मुलखेरे राने बालेम, बगैर कसूर सेब्भी केरे सामने मारे कुटे ते कैदखाने मां छडे, ते हुनी चुपचारे हथरां छडने चाते? पन एन न भोइसखे, तै एप्पू एज्जे ते असन बेइर कडे।” 38 सिपैहीयेई गेइतां हाकिमन बिस्तार दित्तो, कि पौलुस ते सीलास रोम मुलखेरे राने बालेन, ते तैना डेरि जे। 39 तैनेई तैड़ी एइतां तैन करां माफ़ी मग्गी, ते फिरी तैना कैदखाने मरां बेइर आने ते मिनत की, कि नगर मरां चले गाथ। 40 बस्सा

पौलुस ते सीलास कैदखाने मरां बेइर निस्से ते लुदियारे घरे जे, ते तैड़ी विश्वासी ढलान सेई मिले ते तैन शान्ति देइतां चले जे।

17 पौलुस ते सीलास तैसेरां बाद अम्फिपुलिस ते अपुल्लोनिया नगरन मांमेई गेइतां थिस्सलुनीके नगरे मां आए, तैड़ी यहूदी केरू अक प्रार्थना घर थियूं। 2 पौलुस अपने रीतेरे मुताबिक प्रार्थना घरे मां ट्लाई आरामेरे दिहाइन तगर पवित्रशास्त्रेरी किताबी मरां तैन सेई बेंस केरतो राव। 3 पौलुस तैन केरो मतलब खोल्ली-खोल्ली समझातो थियो, “कि यीशु मसीहरे दुःख झैल्लनो ते मुड़न मरां जीतू भनू जरूरी थियूं, कि ज़ैस यीशुएरे बारे मां अवं प्रचार केरतम, तैए मसीह आए।” 4 तैन मरां किछ यहूदी ते गैर कौमां केरे लोक ज़ेनेई विश्वास कियोरो थियो, ते होरि भी बेड़ि भक्त कुआन्शां ज़ेनेई विश्वास कियोरो थियो पौलुसे ते सीलासे सेई मिली जेई। 5 पन यहूदेई जलनी सेई काई नगरन मां बुरे लोक अकोट्टे केरतां हंगामो केरनो शुरू कियो। तैनेई यासोनेरे घरे पुड़ हमलो कियो ताके पौलुसे ते सीलासे लोकां केरे सामने आनन। 6 पन ज़ैखन तैना न मैल्ले त यासोन त काई होरे विश्वासी ढला घसीटतां नगरेरे हाकिमन कां आने, ते ज़ोरे-ज़ोरे सेई ज़ोने लगे, “एन मैनेई हर ठेरी परेशानी फैलावरी, ते अज़ इड़ी भी पुजोरेन। 7 ते एना यासोने अपने घरे मां रखोरेन, ते एना लोक महाराजोरे हुकमेरी खलाफत केरतन, ते ज़ोतन कि राजो त यीशु आए।” 8 ए गल शुन्तां नगरेरे हाकिम ते सारे लोक परेशान भोए। 9 ते तैनेई यासोन ते बाकी लोक ज़मानती पुड़ हथरां छडे। 10 इलोइज़ां विश्वासी ढलाएई पौलुस ते सीलास तैइं बिरीया नगरे जो भेजे, ज़ैखन तैना तैड़ी पुजे त तैना यहूदी केरे प्रार्थना घरे मां जे। 11 बिरीया नगरेरे लोक थिस्सलुनीके नगरेरे यहूदन करां भले थिये, तांए तैनेई खुशखबरी बेड़ि खुशी सेई कबूल की, तैना रोज़ एना गल्लां केरे बारे मां गलबात केरते थिये, कि पौलुसेरी गल्लां सेच्छी आन कि नई। 12 एल्हेरेलेइ काई यहूदेई ते काई होरि यूनानी इज़्जतदार कुआन्शेई भी यीशु पुड़ विश्वास कियो। 13 ज़ैखन थिस्सलुनीके नगरेरे यहूदन पतो लगे कि पौलुस बिरीया नगरे मां परमेशेरू वचन शुनाते, ते तैना लोकन भटकाने ते हलचल मघाने लगे। 14 तैखन विश्वासी ढलाएई पौलुस समुन्दरेरे बन्ने भेजो, पन सीलास त तीमुथियुस तैड़ी राए। 15 ते पौलुसेरी मद्दत केरनेबाले एथेंस नगरे तगर जे, ते सीलास ते तीमुथियुसेरे लेइ बिस्तार नेइतां चले जे, कि मीं कां जल्दी एज्जे। 16 ज़ैखन पौलुस एथेंस नगरे मां तैन बलगने लगगोरो थियो, त एन तकते कि सारू नगर मूरती सेई भरतांए त तैसेरो दिल बड़ो उदास भोव। 17 एल्हेरेलेइ तै प्रार्थना घरे मां यहूदन ते तैन सेई ज़ैना परमेशेररो डर मन्नेबाले (भक्त) गैर कौमन मरां यहूदन मां ओरे थिये चौके मां गेइतां मिलतो थियो, ते तैन सेई रोज़ बेंस केरतो थियो। 18 किछ इपिकूरी ते किछ स्तोईकी उस्ताद तैस सेई बेंस केरने लगे, ते तैन मरां किछ ज़ोने लगे, “बकवादी कुन ज़ोन चाते?” ते किछ ज़ोने लगे, “ए त होरि देवतां केरो पतो देनेबालो भोइ सकते, किजोकि पौलुस यीशुएरो ते कने जींते भोनेरी खुशखबरी शुनातो थियो।” 19 तैखन तैनेई तैएप्पू सेई साथी अरियुपगुस नव्वेरे मन्दरे मां

नेव, ते तैस पुच्छू, “कुन अस जैनी सकतम कि जैस नव्वं पंथेरी तू शिक्षा देतस, तै कुने? 20 असां तरे ऐशेरां बेड़ि आजीब गल्लां शुन्ने लोरंम, ते असां एन ज्ञाननू चातम कि एन केरो कुन मतलबे?” 21 (द्रासले मां एथेंसेरे लोक कुन देशी कुन परदेशी अपनि फुरस्तरो सारो मौको होरि कम्मां केरे बजाहे सिर्फ नव्वीं-नव्वीं गल्लां ज़ोने ते शुन्ने मां गुज्जारते थियो।) 22 तैखन पौलुस अरियुपगुसे नव्वेरे मन्दरे मझाटे खडो भोइतां ज़ोने लगे, “हे एथेंसेरे लोकव, अवं हेरताई कि तुस हर गल्ली मां देबतन बडो उच्चो द्रजो देतथ। 23 ज़ैखन अवं तुशे नगर मां हंठतो फिरतो थियो, त मेरी नज़र तुशे पूजनेरी चीज़न पुड़ ते बलिदानेरी ठारी पुड़ पेई, जैस पुड़ लिखोरू थियू, अनज्ञान परमेशरेरे लेइ, बस्सा तुस जैस ज्ञानथ नन्ना ते तैसेरी पूजा केरतथ, अवं तुसन तैसेरे बारे मां ज़ोताई। 24 ज़ैनी परमेशरे दुनिया ते सैरी चीज़ां बनेवरिन, तै धेरतरो ते अम्बरेरो मालिके, तै हथ्यां केरे बनेवेर मन्दरन मां न राए। 25 तैस मैनेरे मद्दतरी ज़रूरत नई, किजोकि तै केन्ची चीज़री ज़रूरत नई, तै सैरन ज़िन्दगी ते सांस ते सब किछ देते। 26 तैनी एक्की मैन्हु सेइं हर कौमारे लोक पैदा किये, ताके सारे ज़मीनी पुड़ आबाद भोन, तैनी तेन केरि ज़िन्दगरे दिहाड़े बनाए ते रानेरे लेइ ठार बनाई। 27 परमेशरे एन कियू ताके लोक तैस तोप्पन ते शैइद तोपते-तोपते तैन मैल्ली गाए, हालांकी तै असन केन्ची करां दूर नई। 28 किजोकि तै असन सेइं साथी आए ते ज़ींते रातम ते च़लतम फिरतम, ज़ेन्चरे कि तुशे लिखने बालेईं भी ज़ोरूए, ‘असां त तैसेरे बच्चेमां।’ 29 ते परमेशरेरे बच्चे भोइतां सोचेरू लोड़े, कि ईश्वरत्व सोन्ने, चेंदरी, या घोड़ेरी मूरतरीए ते ज़ै केन्ची मैनेरे हाथां केरि कारीगिरीए ते खियाले सेइं आए। 30 एल्हेरेलेइ परमेशरे लोकां अज्ञानतारे वक्ते पुड़ ध्यान न दित्तू, ते हुनी तै मैन्नू सेबभी ठैरन हुक्म देते कि मन फिरान। 31 किजोकि तैनी अक दिहाड़ी ठुवालेवरीए ज़ैखन तै सच्चे सेइं दुनियारो इन्साफ एक्की एरे मैनेरे ज़िरिये सेइं केरेलो, ज़ै तैनी रखबोरए, ते तै तैनी मुड़दन मरां ज़ींते केरतां ए गल सैरी मैन्नू साबत कियोरि।” 32 ज़ैखन तैनेईं मुड़दां केरि आदालतरे बारे मां शुनू त तैन मरां किछ एस गल्लरी मज़ाक बनाने लगे, ते किछेईं ज़ोवं, “अस एस बारे मां फिरी कोस्कोईं शुन्मेले।” 33 एन हेरतां पौलुस तैट्टां निस्तां च़लो जेव। 34 पन किछ लोक तैस सेइं मिली जे, ते तैनेईं प्रभु पुड़ विश्वास कियो, तैन मरां अक दियुनुसियुस ज़ै अरियुपगुसेरो प्रधान थियो, ते अक कुआन्श थि, तैसारू नवं दमरिस थियू, ते तैन केरे अलावा हारे भी बड़े मैन्हु थियो।

18 तैसेरां बाद पौलुस एथेंस नगरे मरां निस्तां कुरिन्थुस नगरे मां अव। 2 तैड़ी तैस अक यहूदी मैल्लो, तैसेरू नवं अक्विला थियू, ते तै पुन्तुस इलाकेरो रानेबालो थियो, ते तैसेरी कुआन्शरू नवं प्रिस्किल्ला थियू, ते दुइये साथी इतालिया इलाकेरां ओरां थियां, किजोकि क्लौदियुस हाकिमे हुक्म दित्तोरो थियो, कि सारे यहूदी रोमे मरां च़ले गान ते पौलुस तैन कां जेव। 3 किजोकि पौलुसेरो ते अक्विलारो तेम्बु बनानेरो बुपार थियो, तांए पौलुस तैस सेइं साथी राव, तैना कम केरने लगे। 4 ते पौलुस हर आरामेरे दिहाड़े तैन केरे प्रार्थना घरे मां गातो थियो, ते यहूदी लोकन

ते यूनानी लोकन समझाने लगे कि, यीशु पुड़ विश्वास केरा। 5 ज़ैखन सीलास ते तीमूथियुस मकिदुनिया इलाके मां आए, त पौलुस वचन शुनाने मां मघन थियो, ते लगातार यहूदन सेइं एन ज़ोतो थियो कि यीशु ही मसीह आए। 6 पन ज़ैखन यहूदी खलाफत त कने तुहीन केरने लगे, त पौलुसे अपना लिगडां ठुड़कां ते ज़ोने लगे, “तुशे खून तुशे दोग्गे पुड़ भोए! अवं बेइलज़ाम आई, अज़्जेरे बाद अवं गैर कौमन कां गेइलो।” 7 तैखन प्रार्थना घरे मरां निस्तां तीतुस यूस्तुस नव्वेरे एक्की परमेशरेरे भक्त मैनेरे घरे जेव, ज़ै गैर कौमी मरां थियो, ज़ेसेरू घर प्रार्थना घरे सेइं साथी थियू। 8 एस प्रार्थना घरेरो प्रधान क्रिस्पुसे ते तैसेरे सारे टब्बरे प्रभु पुड़ विश्वास कियो, ते बड़े कुरिन्थिसेरे लोकेईं शुन्तां विश्वास कियो ते बपतिस्मो नीयो। 9 एक्की राती प्रभुए पौलुसे सेइं दशनि मां गल की, ते ज़ोवं, “डर नन्ना ते तू ज़ो ते चुप न रा, 10 किजोकि अवं तीं सेइं साथी आई, ते कोई तीं पुड़ हमलो केरतां नुकसान न पुजेईं सकेलो, किजोकि इस नगर मां बड़े लोकन ज़ैना मीं पुड़ भरोसो रखखेले।” 11 पौलुस तैड़ी डैढ साल राव, ते तैन परमेशरेरी खुशखबरी शिखालतो राव। 12 ज़ैखन गल्लियो, अखाया इलाकेरो हाकिम थियो, त यहूदेईं मिलतां पौलुसे पुड़ हमलो कमाव, ते पौलुस ट्लेइतां आदालतरे तखते कां नीयो, ते ज़ोने लगे। 13 “एन लोकन समझाते, कि परमेशरेरी आराधना एन्चरे केरा, ज़ै मूसेरे कानूनेरे बिलकुल बरखलाफे।” 14 पौलुस ज़ैखन किछ ज़ोने बालो थियो, त गल्लियोए यहूदन सेइं ज़ोवं, “हे यहूदी लोकव, अगर केन्ची जुमेरी या कोई बड़ी बुरी गल भोथी त अवं तुशेरी शुनेथो। 15 पन तुशेरो इलज़ाम त सिर्फ खाली गल्लां केरो ते नव्वां केरो ते तुशे कानूनेरे बारे मां आए, ते अवं न ज़ैनी, किजोकि अवं एन गल्लां केरो हाकिम बन्नो न चेईं।” 16 ते गल्लियोए हुक्म दित्तो कि एन तखते करां बेइरोवं कडे। 17 तैखन तैनेईं सेबभेईं प्रार्थना घरेरो प्रधान सोस्थिनेस इन्साफेरे तखतेरे सामने कुटो, पन गल्लियोए एन गल्लां केरि किछ भी परवाह न कमाई। 18 पौलुस काई दिहाड़े कुरिन्थुस नगरे मां राव, ते फिरी तै विश्वासी हलान करां च़लो जेव ते किखिया मां अपनि मिनत पूरी केरनेरे लेइ अपने दोगेरी टिंड बनाई। ते बादे मां समुन्दरी ज़िहाजे मां सीरिया इलाके जो च़लो जेव, ते प्रिस्किल्ला ते अक्विला भी तैस सेइं साथी थियां। 19 ज़ैखन तैना इफिसुस नगरे मां पुजे त पौलुसे प्रिस्किल्ला ते अक्विला तैड़ी छडां, ते पौलुस एक्की प्रार्थना घरे मां जेव ते यहूदन सेइं बेंस केरने लगे। 20 ज़ैखन तैन लोकेईं तैस कां मिनत की, “कि तू हेजू किछ दिहाड़े असन कां बिश।” त पौलुसे तैन सेइं मन्नु, 21 पन ज़ैखन पौलुस तैट्टां च़लो त तैनी तैन सेइं वादो कियो, “अगर परमेशरेरी मर्ज़ी भोइ त अवं फिरी तुसन कां एज्जेलो।” ते फिरी पौलुस ज़िहाजे मां च़ेइतां इफिसुसे जो च़लो जेव। 22 ते कैसरिया नगरे मां ज़िहाजे मरां ओस्सो त तैनी यरूशलेम नगरे मां गेइतां तैन केरि कलीसियारे लोकन सेइं मिलने जेव, ते फिरी तै अन्ताकिया नगरे मां अव। 23 अन्ताकिया नगरे मां किछ च़िर बितनेरे बाद तै तैट्टां च़लो जेव, ते गलालिया ते फ़ूगिया इलाकां केरे सब चलन मज़बूत केरतो जेव। 24 अपुल्लोस नव्वेरे अक यहूदी थियो,

तैसेरू जर्म सिकन्दरिया नगरे मां भोरू थियूं, तै बड़ो ज्ञानी मैन्हु थियो, ते पवित्रशास्त्रे बारे मां बड़ो ज्ञानकार थियो, तै इफिसुस मां अव। 25 तैनी प्रभुएरे बत्तरी शिक्षा शिखोरी थी, ते लगातार यीशुएरे बारे मां ठीक-ठीक शुनातो ते शिखालतो थियो, पन तै सिर्फ यूहन्नारे बपतिस्मे तगर ज्ञानतो थियो। 26 तै प्रार्थना घरे मां बेधड़क चारे जोने लगे, पन प्रिस्किल्ला ते अक्विला तैसेरी गल्लां शुन्तां, तैनेई तै अपने घरे नीयो, ते परमेशेरी बत्तारे बारे तैस होरू भी रोड़े चारे जोंवं। 27 जैखन तैनी थापू कि पार ओस्तां अखाया इलाके जो गाए ते विश्वासी ढूलाएई तैस हिम्मत दिती, ते तैट्टेरे चलन जो चिट्ठी लिखी, कि एस सेइं रोड़ेचारे मिलाथ, ते तैनी तैडी पुजतां तैन केरि बड़ी मद्दत की, जैनेई अनुग्रहरे वजाई सेइं विश्वास कियोरो थियो। 28 किजोकि तै बड़े ज़ोरे शोरे सेइं यहूदन सेइं बेंस केरतां खुल्ले आम पवित्रशास्त्रे सेइं साबत केरतो थियो, कि यीशु ही मसीह।

19 जैखन अपुल्लोस कुरिन्थुस नगरे मां थियो, त पौलुस बेइए सारे इलाकन मेइं इफिसुस नगरे मां अव, तैसेरी तैडी होरे भी काई चलन सेइं मुलाकत भोइ। 2 तैनी तैन पुच्छू, “कुन विश्वास केरते बार तुसन पुड़ पवित्र आत्मा उतरोरी थी?” तैनेई जुवाब दितो, “असेईं त पवित्र आत्मा बारे मां शुनेरू भी नई।” 3 तैखन पौलुसे ज़ोवं, “फिरी तुसेईं कोस किसमेरो बपतिस्मो नीयो?” तैनेई जुवाब दितो, “यूहन्नारो।” 4 पौलुसे ज़ोवं, “यूहन्ना त तैन लोकन बपतिस्मो दितो जैनेई पापन करां मनफिराथ, ते यूहन्ना इस्राएली लोकन ज़ोवं, जै मेरे बाद एजनेबालोए, तैस पुड़ विश्वास केरा, जै मसीह आए।” 5 एन शुन्तां तैनेई प्रभु यीशु मसीहेरे नंवे सेइं बपतिस्मो नीयो। 6 ते जैखन पौलुसे तैन पुड़ हथ रखे त पवित्र आत्मा तैन पुड़ उतरी, त तैना अलग-अलग भाषा केरने लगे, ते भविष्यवाणी केरने लगे। 7 एना सब लगभग 12 मैन्हु थिये। 8 फिरी पौलुसे प्रार्थना घरे मां गेइतां दलेइ महीन तगर बड़े निडर भोइतां परमेशेरे राज्जरे बारे मां लोकन सेइं बेंस केरने समझाने लाव। 9 पन तैन मरां किछ सकत दिलेरे भोइ जे, ते तैनेई विश्वास केरनेरे बजाहे इन्कार कमाव, ते एस पंथेरे बारे मां बुरू जोने लगे, एल्हेरेलेइ पौलुस तैन करां कनारे भोइ जेव, ते चले भी कनारे किये ते तुरन्नुसरे सुकुले मां बेंस केरतो ते तैन शिखालतो राव। 10 दूई सालन तगर एरू भोतू राव, एड़ी तगर कि आसिया इलाकेरे रानेबाले कुन यहूदी ते कुन यूनानी सेबभेई प्रभुएरू बचन शुनू। 11 ते परमेशर पौलुसेरे ज़िरिये सेइं बडां-बडां कम्मां ते चमत्कार हिरातो थियो। 12 एड़ी तगर कि पौलुस जैस रूमाले सेइं या फटके सेइं हथ लातो थियो, त तैना बिमारन पुड़ छुडते थिये, त तैना बिमार बेज्जोते थिये, ते अगर तैन पुड़ भूतां केरो सैयो भोतो थियो, त तैना लोक ठीक भोते थिये। 13 पन किछ यहूदी मड़द जैना फुक-फक केरते थी, ते एन केरने लगे कि, जैन पुड़ भूतां केरो सैयो भी भोए तैन पुड़ यीशुएरे नंवे इन जोइतां फुक फक देने लाए, “जैस यीशुएरो प्रचार पौलुस केरते, अवं तैसेरी कसम देताई।” 14 यहूदी प्रधान याजक जेसेरू नवं स्क्कवा थियूं, तैसेरां सत मट्ठां थियां, तैना एन्ने कम्मां केरतां थियां।

15 ते भूते जुवाब दितो ते ज़ोवं, “अवं यीशु मसीह भी ज्ञानताई ते पौलुसे भी ज्ञानताई, पन तुस कौन आथ?” 16 तैखन तै मैन्हु जैस पुड़ भूतेरो सैयो थियो, तैन यीशुएरे नंवे सेइं फुक-फक देने बालन जो पेव, ते तैना अपने कब्जे मां केरतां एत्रे कुट्टे कि तैना ज़ख्मी भोइतां नगनेगे तैट्ठां नशे। 17 जैखन इफिसुस नगरेरे रानेबाले यहूदन ते यूनानी लोकन एस गल्लरो पतो लगे, त तैना डेरि जे, ते प्रभु यीशु मसीहेरी बड़याई की। 18 ते जैनेई विश्वास कियोरो थियो, तैनेई एइतां अपने-अपने बुरे कम्मां केरो इकरार सेबभी केरे सामने कियो। 19 ते केही लोकेई जैना जैदू केरते थिये, तैना किताबां सैरेई एन्तां सेबभी केरे सामने फुकी, ते जैखन तैन किताबां केरि कीमतारो हिसाब लाव त कोई 50000 चेंदरे सिकन करां जादे थी। 20 एन्चरे प्रभुएरो वचन बड़े तकड़े चारे फैलतो जेव ते भारी राव। 21 एन गल्लां केरे बाद पौलुसे फैसलो कियो, कि अवं मकिदुनिया ते अखाया इलाकां केरे विश्वासी लोकन सेइं मिलतां यरूशलेम नगरे जो गेइ, ते तै ज़ोवं, “यरूशलेम नगर मां गेइतां रोम नगर भी मां गानू भी जरूरीए।” 22 एल्हेरेलेइ अपने सैथन मरां तीमुथियुस ते इरास्तुस दूई मैन्हु मकिदुनिया इलाके जो एप्पू करां पेइले भेजे, ते एप्पू भी किछ चिरे आसिया इलाके मां राव। 23 तैस वक्ते तैस पंथेरे बारे मां हंगामो भोव। 24 किजोकि अक चेंदरो करीगिर थियो, तैसेरू नवं दिमेत्रियुस थियूं, ते अरतिमिस देबारे मन्दरेरी मूरती बनेइतां, कारीगिरन बडू कम दुवेरू थियूं, जैस सेइं तैन केरो बड़ो बुपार च़ल्लोरो थियो। 25 तैनी एन कम ज्ञान्ने बाले सारे कारीगिर अकोट्टे कमाए ते ज़ोने लगे, “हे मेरे ढूलाव असां इन कम केरतां बड़े पेंडसे कमातम। 26 पन तुस हेरतथ ते शुन्तन कि एना दूई मैन्हु पौलुसेरे ज़ेरे केन्चरे इफिसुस नगरे ते लगभग सारे आसिया इलाकेरे नगरन मां लोकन टपलाने लोरेन ते ज़ोतन कि जै हथ्थरां केरि कारीगिरीए, तै ईश्वर नई। 27 डर एस गल्लरो नई, सिर्फ कि इशे पैशेरी बदनामी भोली, बल्के पुरानी देबी अरतिमिस, जै आए तैसारू मन्दर भी घटया समझू गालू, जेसेरी पूजा सारे आसिया इलाके मां ते सारे दुनियाई मां केरतन, तैसेरी इज़्ज़त भी खतम भोइगानिये।” 28 जैखन तैन लोकेई शुनू त तैना सरकी सेइं भेरोई जे, ते ज़ोरे-ज़ोरे नहरे देने लगे, “इफिसी केरि देबी अरतिमिस, महान आए!” 29 हेरते-हेरते सारे नगर मां हलचल मेचि जेई, लोकेई गयुस ते अरिस्तर्खुस, मकिदुनी इलाके जैना पौलुसे सेइं साथी ओरे थिये, तैना दलेइतां घसीटते तमाशो हेरनेरी ठैरी जो दौबड़ते ने। 30 पौलुस भी सभाई मां गानू चातो थियो पन चेलेई तै रोको। 31 ते आसिया इलाकेरे हाकिमन मरां भी तैसेरे काई दोस्तेई तैस जो बिस्तार भेजतां ते मिनत केरतां ज़ोवं, कि तमाशो हेरने न गेइयां किजोकि तैडी बड़ो खतराए। 32 तैडी पैन्चयती मां खलबली मच़ौरी थी, किजोकि किछ लोक नहरे देते थिये, ते बड़े लोकन पतो न थियो कि तैना तैडी किजो अकोट्टे भोरेन। 33 तैखन तैनेई सिकन्दर, जै यहूदी लोकेई खडो कियोरो थियो, भीडी मरां किछ लोकेई तै अग्रोवं कियो, ते सिकन्दर हथ्थे सेइं इशारो केरतां लोकां केरे सामने जुवाब देनो चातो थियो। 34 पन ज़ेरो लोकन पतो लगे कि ए यहूदी आए, त

सब ज़ोरे-ज़ोरे लगभग दूई घंटन तगर चिन्दां मारने लगगे, “इफिसुस नगरेरे देवी अरतिमिस, महान आए।” 35 तैखन एककी मंत्री नगरेरे लोकन चुप करेइतां ज़ोने लागो, “कि इफिसुस नगरेरे रानेबालो कौन न ज़ाने कि इफिसुस नगर लोक अरतिमिस देबारु मन्दरे, ते एसेरे मूरतरो बड्डो रखवालन, ज़ैन अम्बरेरां बिछड़ोरो थी। 36 ज़ैखन एना गल्लां केरे खलाफ केन्चे किछ न ज़ोवं त ठीक थियू कि तुस चुप राथ ते बगैर सोच सेमझतां किछ न केरेथ। 37 तुसेई ज़ैना मैन्हु इडी आनोरेन तैनेई न मन्दरे लुटेरूए न इश्शी देबारे खलाफ तुहीन कियोरीए। 38 अगर दिमेत्रियुस ते एसेरे कारीगिरन केन्ची पुड़ दाओ केरनोए त आदालतरू दार खुल्लूए, ते हाकिम भी आन, ज़ैडी तुस एककी होरि पुड़ दाओ केरि सकतथ। 39 पन अगर तुस होरि कोन्ची चीज़रे बारे मां पुछ्नु चातथ त तैसेरो फैसलो भी पंचैइती मां कियो गालो।” 40 मीं इस गल्लरो डरे कि अगर हाकिम इस हंगामेरे बारे मां शुनेलो त ज़ोलो कि अस रोमी सराकारारी खलाफनज़ी केनेरी कोशिश केरने लोरेम, ते अस एत्रे लोकां केरे अकोट्टे भोनेरो कुन जुवाब देमेले। 41 एन ज़ोनेरां बाद तैनी पैन्चैयत खतम कमाई।

20 ज़ैखन हंगामो मुक्को त पौलुसे चेले कुजाए ते तैन केरो होसलो बथव, ते तैन बिश्शा ज़ोइतां मकिदुनिया इलाके जो च़लो जेव। 2 तैस सारे मुलखे मांमेइं चेलन होसलो देइतां यूनान इलाके मां (ज़ैस जो अखाया इलाको भी ज़ोतन) अव। 3 तैडी तै ट्लाई महिने राव, ते ज़ैखन ते समुन्दरी जिहाजे मां सीरिया इलाकेरे पासे गानेबालो थियो, त यहूदी केरे लीडरेई तैस बत्तां मारनेरी साज़िश बनाई, तैस पतो लगो त एल्हेरेलेइ तैनी एन रोडू समझू कि मकिदुनिया इलाके मांमेइं जो सीरिया इलाके जो गाए। 4 बिरीया नगरेरे रानेबाले पुरुसेरू मटू सोपत्रुस, ते थिस्सलुनीकि मांमेइं अरिस्तर्खुस ते सिकुन्दुस ते दिरबे नगरेरो गयुस, ते तीमथियुस ते आसियारो तुखिकुस ते त्रुफिमस आसिया इलाके तगर असन सेइं साथी च़ले जे (लूका भी तैन सेइं साथी थियो)। 5 पन तैना अग्रोवं गेइतां त्रोआस नगरे मां असन बलगते राए। 6 ते अस अखमीरी रोटी केरे तिहारे बाद फिलिप्पी नगरे मरां सफर केरतां पंच दिहैडी मां त्रोआस नगरे मां तैन कां पुजे, ते रात दिहैडी तैडी राए। 7 हफतेरे पेइले दिहाड़े असां प्रभु भोजेरे लेइ अकोट्टे भोए, ते पौलुसे होरसां तैटां अग्रोवं गानू थियू, त एल्हेरेलेइ तै तैन सेइं गल्लां केरने लाव ते एध्डी राती तगर तैन शिक्षा देने लाव। 8 दोपरे ज़ैडी असां सब अकोट्टे बिश्शोरे थिये, त तैडी काई दीये बलते थिये। 9 त अक नौजवान दैरी मां बिशोरो थियो, ते तैसेरू नवं यूतुखुस थियू, तै पौलुसेरो प्रचार ठड्डी तगर शुन्तां तैस निड्ल आई, ते ट्लेइडयोवं छतरां उन्डो खिरको, ते तै मेरि जेव। 10 पौलुस बुन अव ते तै नौजवान ट्लेइतां तैस सेइं लिपटो ते ज़ोने लागो, “कि डरा नन्ना ए ज़ींतोए।” 11 फिरी तैनेई बा गेइतां सेम्भेई मिलतां रोटी खाइ, ते फिरी ट्लेकडोने तगर बचचन शुनाने लागो, तैखन तै तैटां च़लो जेव। 12 लोकेई तै नौजवान ज़ींतो घरजो नीयो, ते तैन बडी खुशी भोइ। 13 असां अगगर गेइतां जिहाजे मां सुवार भोइ जे, ते अस्सुस नगरे जो च़ले जे, ताके तैडी पौलुसे भी जिहाजे मां च़ाढ़म, किजोकि

पौलुसे पेइले पैदल गानेरो बिस्तार कियोरो थियो। 14 ज़ैखन तै असन अस्सुस नगरे मां मैल्लो त तै असेई जिहाजे मां च़ाढ़ो ते असां मितुलेन नगरे मां आए। 15 तैटां असां जिहाजे मां सुवार भोइ जे ते अस खियुस जज़ीरेरे सामने पुजे, ते अग्री दिहाड़े असां सामुसे मां पुजे, ते होरसां अस मीलेतुस नगरे मां आए। 16 पौलुसे थापेरू थियू, कि अव इफिसुस नगरे मां उतरेलो, किजोकि तै आसिया इलाके मां जादे वक्त बीतानो न थियो चातो, किजोकि तै जल्दी मां थियो, कि अगर भोइसखे, त तै पित्नेकुस्त तिहारेरे दिहाड़े यरूशलेम नगरे मां राए। 17 ज़ैखन अस मीलेतुस नगरे मां ओस्से, त पौलुसे इफिसुस नगरेरे कलीसियारे बुजुर्जन जो बिस्तार भेजो कि तैना एज्जन। 18 ज़ैखन तैना तैस कां आए, त तैनी तैन सेइं ज़ोवं, तुस ज़ानतथ कि पेइले दिहाड़ेरां ज़ैखन अव आसिया इलाके मां पुजो, अव तेइसेरो देंतो अज़ तगर हर वक्त तुसन सेइं साथी केन्चरां राव। 19 मतलब बडे नेरमी सेइं, ते ऐंखरू बछोडी-बछोडी, ते तैन अज़मैइश मां ज़ैना यहूदी केरि च़लैकी सेइं मीं पुड़ ईई, अव प्रभुएरी सेवा केरतो राव। 20 ते ज़ैना-ज़ैना गल्लां तुश्शे लेइ फैइदेरी थी, तैना मीं तुसन सेइं बगैर केन्चेरे डरे तुसन सेइं ज़ोई छेडी, ते बल्के ज़ैन किछ भी शिखालू दिले सेइं ते घर-घर गेइतां शिखालू। 21 बल्के अव यहूदी लोकां ते यूनानी लोकां केरे दुइयां केरे सामने गवाही देताई कि तैना परमेशरेरे सामने पापन करां मन फिरान, ते इश्शे प्रभु यीशु मसीह पुड़ विश्वास केरन। 22 हेरा हुनी अव पवित्र आत्मारो गल मेन्तां यरूशलेम नगरे जो गाताई, ते मीं पतो नई कि तैडी मीं पुड़ केरि-केरि गुजरेली। 23 अव सिर्फ एत्रू ज़ानताई कि पवित्र आत्मा मीं हर नगर मां एन ज़ोती राई, कि बन्थना ते मुसीबत मेरे लेइ तियारन। 24 पन मेरी जान, मेरे लेइ कोई कदर कीमत न रख्खे, त बस्सा अव एन चाताई कि मेरी दौड़ पूरी भोए ते तैस सेवाई पूरी केरि, ज़ै मीं परमेशरेरे अनुग्रहेरे खुशखबरी पुड़ गवाही देनेरे लेइ प्रभु यीशु करां मैल्ली। 25 ते हुनी अव ज़ानताई, कि तुसेई अव ज़ैन मां परमेशरेरे अनुग्रहेरी खुशखबरी हर पासे शुनातो राव, त मीं फिरी न लाएले। 26 एल्हेरेलेइ अव तुसन साफ-साफ ज़ोई छडताई, कि ज़ैना लोक यीशु पुड़ विश्वास केरने बगैर मरेले, त अव तैन केरे ज़िमेवार नई। 27 किजोकि अव बगैर केन्ची डरेरां तुसन शिखालतो राव, कि परमेशरेरी मर्जीं तुश्शे लेइ कुने। 28 बस्सा अपने ते सारे विश्वासी लोकां केरो खियाल रखा, जेसेरे लेइ तुस पवित्र आत्मारो तरफां चुनोरेथ, कि परमेशरेरी कलीसियारी रखवाली केरा, ज़ै लोक तैनी अपने खूने सेइं घिन्नेरेन। 29 अव ज़ानताई कि मेरे गानेरां बाद झूठे उस्ताद मारने बालां गिदां केरे ज़ेरे तुसन मां एज्जेले, ते ज़ेन्चेरे तैना भैड्डन मारतन तेन्चेरे तैना झूठे उस्ताद तुसन नुकसान पुज़ाले। 30 बल्के तुसन मरां भी एरे लोक खडे भोले ज़ैना सज़ ट्लोइ मरोइ केरतां छडेले, ताके चेलन अपने पासे केरन। 31 एल्हेरेलेइ बींझे राथ ते याद रखा, कि अव ट्लाई साल लेरां देंतो रात दिहैडी हर एककी तैन खबरदार केरतो राव। 32 हुनी अव तुसन परमेशरे, ते तैसेरे अनुग्रहेरे वचनेरे सुपुर्द केरताई, कि ज़ै तुसन विश्वासे मां मज़बूत केरि सकते, ते तुसन तैस जागिरारो हकदार बनेइ

सकते, जेसेरो वादो तैनी कियोरोए जैनी तुस पवित्र कियोरेथ। 33 मीं केन्बेरे सोन्ने चेंदरू या लिगडां केरू लालच नई कियेरू। 34 तुस एप्पू ज्ञानतथ कि मीं अपने हथेइं सेइं अपने ते अपने सैथी केरि हर अक ज़रूरत पूरी कियोरीए। 35 मीं तुसन सब किछ केरतां हिराव, कि एन्बेरे सेइं कमजोरन समैली सकतम, कि प्रभु यीशु मसीहेरी गल्लां याद रखम, “कि देनू नेने करां जादे धने।” 36 एन गल्लां केरे बाद पौलुसे ज़ैधू केरे भारे बिशतां तैन सेबभन सेइं साथी प्रार्थना की। 37 तैना सब गले मिलतां लेरां देने लगे, ते पौलुसे फुम्मडी देने लगे। 38 खास केरतां तैना इस गल्ली सेइं दुखी थी, जैना तैनी ज़ोरी थी, कि तुस मीं फिरी कथी न लाएले, ते तैनेई ते जिहाजे तगर पज़ाव।

21 ज़ैखन असां तैन करां चले जे त समुन्दरेरे सफर शुरू कियूं, त सिधे बत्तां कोस जज़ीरे मां आए, ते होरसां अस रुदुस मां पुजे, ते फिरी तैट्टां पतरा जज़ीरे मां चले जे। 2 ते अक जिहाजे फीनीके इलाके जो गांतू मैल्लू, त असां तैस पुड़ च़ेढतां सफर शुरू कियूं। 3 ज़ैखन इश्शी नज़र साइप्रस जज़ीरे पुड़ पेई, त अस तैस बांए हथ्ये ओसैलतां सीरिया इलाके जो चले जे, सूर नगरे मां ओरसे, किजोकि इश्शी जिहाजे तैडी किछ बोझ उसालनो थियो। 4 तैडी असन चले मैल्ले ते तैन कां असां सत दिहाड़े राए। तैनेई पवित्र आत्माेरे ज़ोने मुताबिक पौलुसे यरूशलेम नगरे मां गानेरे लेइ ठाको। 5 सत दिहैइना बाद कुआन्शां मट्टन समेत नगरेरे बेडर तगर साथी आए, ते समुन्दरेरे बन्ने पुजतां असेई ज़ैधू केरे भारे बिशतां प्रार्थना की। 6 फिरी असां तैन करां अलग भोए त जिहाजे मां च़ेढतां चले जे, ते तैना भी अपने-अपने घरजो चले जे। 7 ज़ैखन असां सूर नगरे मरां सफर पूरू केरतां पतुलिमयिस मां पुजे, ते विश्वासी ढलान जो नमस्कार केरतां तैन सेइं साथी अक दिहाड़ी राए। 8 ते होरसां असां तैट्टां च़ेलतां कैसरिया नगरे मां आए, ते फिलिप्पुस खुशखबरी प्रचार केरनेबालेरे घरे जे ते तैडी राए, ज़ै सत्तन मरां अक थियो। 9 तैसेरी च़ेरे कुवैरी कुइयां थी, ते तैना भविष्यवाणी केरती थी। 10 ज़ैखन अस तैडी काई दिहाड़े राए, त तैडी अक नबी थियो, जेसेरू नवं अगबुस थियूं, तै यहूदिया इलाकेरां ओरो थियो। 11 तैनी असन कां एइतां पौलुसेरे मजे सेइं अपने हथ पाव बंधे ते ज़ोने लगे, “पवित्र आत्मा इन ज़ोतीए कि जैस मैनेरू इन मज़ आए, तैस यरूशलेम नगरेरे यहूदी इसेरे ज़ेरे बंधेले, ते गैर कौमां केरे लोकां केरे हवाले केरेले।” 12 ज़ैखन असेई एना गल्लां शुनी, त असेई ते होरि लोकेई पौलुसे कां मिनत की, कि यरूशलेम नगरे मां न गेइयां। 13 पन पौलुसे जुवाब दित्तो, “तुस एन कुन केरने लोरेथ? तुस किजो लेरां देइ-देइ मेरो दिल ट्लोडने लोरेथ? अवं यरूशलेम नगरे मां प्रभु यीशु मसीहेरे नंबे सेइं सिर्फ बंधोनेरे लेइ नई बल्के मरनेरे लेइ भी तियार आई।” 14 ज़ैखन तैनी न मन्तू त असां चुप राए, “कि प्रभुएरी मर्जी पूरी भोए।” 15 किछ दिहाड़ना बाद असां सफरेरी तियारी केरने लगे, ते फिरी असां यरूशलेम नगरे जो चले जे। 16 कैसरिया नगरेरे किछ चले असन सेइं साथी चले, ते असेई मनासोन नंबेरो साइप्रसेरो अक पुरानो चेलो साथी आनो कि अस तैसेरे घरे रहम। 17 ते ज़ैखन

असां यरूशलेम नगरे मां पुजे, त इश्शे विश्वासी ढला बड़े खुशी सेइं असन सेइं मिलने आए। 18 होरसां असां पौलुसे साथी नेइतां याकूबे सेइं मिलने जे, तैडी सब बुजुर्ग अकोट्टे भोरे थिये। 19 तैखन तैनी नमस्कार केरतां, जैना-जैना कम्मां परमेशेरे तैसेरी सेवारे जिरिये सेइं गैर कौमन मां कियोरां थी, अक-अक केरतां सब ज़ोआं। 20 तैनेई इन शुन्तां परमेशेरी तारीफ की, ते फिरी पौलुसे सेइं ज़ोने लगे, “हे ढला तू ज्ञानतस, कि यहूदन मरां हज़ारेई लोकेई विश्वास कियोरोए, ते तैना सब मूसेरे कानूने पुड़ अमल केरने मां मघनन्। 21 ते तैन तेरे बारे शिखालेरू कि तू गैर कौमन मां रानेबाले सारे यहूदन ए शिक्षा देंतो ओरोस, कि मूसा नेबेरे कानूनेरे शारने, ते अपने मट्टां केरो खतनो न केरा, ते न यहूदी केरे रीतन पुड़ न चला। 22 त फिरी कुन कियूं गाए? लोकेई ज़रूर शुनेले कि इडी ओरोस। 23 एल्हेरेलेइ ज़ैन अस तीं सेइं ज़ोतम, तैन केर। इश्शे इडी च़ेरे मैन्हु आन ज़ैनेई मिनत मगोरीए। 24 तू तैन एप्पू सेइं साथी ने ते तैन सेइं मिलतां अपनो आप शुद्ध केर, ते तैन केरो खर्चो भी दे, ताके तैना अपनो दोग्गेरी टिंड बनान। तैखन सेबभन पतो लगनोए कि जैना गल्लां तेरे खलाफ फैलेवरिन, तैन केरि कोई बुनीयाद नई, ते तू एप्पू भी सच्चे दिले सेइं मूसेरे कानूने पुड़ अमल केरतस। 25 ते ज़ैडी तगर तैन गैर कौमां केरो सवाले, कि ज़ैनेई विश्वास कियोरोए, तैन केरे बारे मां असेई पेइले फैसलो केरतां लिखतां भेजू, कि तैना मूरतन कां बलिदान कियेरू मास ते खूने करां ते गलचैटी देइतां मारोरे जानवरां केरे मासे करां परहेज केरन, ते बदमाशी न केरन। 26 होरसां पौलुसे तैना मैन्हु साथी ने, ते तैन सेइं साथी अपन आपे शुद्ध केरतां मन्दरे मां जेव, ते खबर दिती कि तैन केरे शुद्ध भोनेरे बाद च़ढतल च़ाढनेरे दिहाड़े केइस पूरे भोनेन।” 27 ज़ैखन शुद्ध भोनेरे सत दिहाड़े पूरे भोनेबाले थिये, त आसिया इलाकेरे यहूदेई पौलुस मन्दरे मां लाव त लोक भड़काए, ते तैस टलेइतां चिन्डां मारने लगे। 28 “हे इस्राएली लोकव इश्शी मदत केरा, ईए ते मैनुए, ज़ै हर ठैरी लोकन इश्शे कानूनेरे खलाफ ते मन्दरेरे खलाफ शिक्षा देंतो रहते, ते एनी एसेरां अलावा गैर कौमां केरे लोक इश्शे मन्दरे मां एन्तां तै पवित्र ठार अपवित्र कराते।” 29 तैनेई एन एल्हेरेलेइ ज़ोवं कि तैनेई पौलुस इफिसुस नगरेरे रानेबाले त्रुफिमस सेइं साथी लाहोरो थियो, ते समझते थिये कि पौलुसे तै ज़रूरी मन्दरे मां नीघोरो भोनेए। 30 तैखन सारे नगर मां हलचल मेचि जेई, ते मैन्हु देवइतां जम्हां भोए, ते पौलुस टलेइतां मन्दरे मरां घसीटतां बेडर आनो, ते लूशी दारां बंद कियां। 31 ज़ैखन तैना तैस मारनेरी कोशिश केरने लवरे थिये, त फौजी टोलरे सरदारो कां खबर पुजी, कि बड़े लोकेई यरूशलेम नगरे मां खलबली मचोरीए। 32 तैखन तैना सिपेहिन ते सूबेदारन एन्तां तैन कांजो दौड़ो, ते तैनेई फौजी टोलरे सरदारो ते सिपाही लेइतां पौलुस मारनो कुटनो बंद कियां। 33 फौजी टोलरे सरदारो नेड़े गेइतां पौलुस अपने कब्जे मां कियां, ते तैस दूई शांगलेइ सेइं बंधनेरो हुक्म दित्तो, ते फिरी तैनी पुच्छू, “ए मैन्हु कौने ते एनी कुन कियेरू आए?” 34 तैस भीडी मां किछ लोक चिन्डां मारते थिये, ते एत्री शौर मचोरी थी, कि तैस पूरो पतो न लगे ते तैनी

हुकम दितो, कि पौलुसे किल्लै मां पुजाथ। 35 ज़ैखन पौलुस सिपाहीयेईं पेवड़न उबरो चलेवरो थियो, त लोकां केरे वजाईं सेईं सिपाहीयेईं पौलुस उबरो छुड़तां नेव। 36 सारे लोक ज़ैना पौलुसे पती पेवेरे थिये, तैना चिन्डां मारते थिये, “एस मार।” 37 पौलुसे सिपाही किल्लै मां पुजांने बाले थिये, त तैनी फौजी टोलरे सरदारे सेईं ज़ोवं, “कुन मीं अज़ाज़ते कि अवं तीं सेईं किछ ज़ोईं?” ते तैनी पुच्छू, “तू यूनानी भाषा ज्ञानतस?” 38 कुन तू ते मिस्र मुलखेरो रानेबालो नई, ज़ैनी किछ चिरे पेड़ले सरकारी खलाफत कियोरी थी, ते 4000 मैनुन ज़ैन कां हथियार थिये तैना जंगले मां नीयोरे थिये? 39 पौलुसे ज़ोवं, “अवं त यहूदी आई, ते तरसुस नगरेरो राने बालोई, ज़ैन किलिकिया इलाकेरू मुशूर नगर, अवं तीं कां मिनत केरताईं मीं लोकन सेईं गल केरने दे।” 40 ज़ैखन तैनी अज़ाज़त दिती, त पौलुस पेवड़न पुड़ खड़ो भोड़तां लोकन जो हथ्ये सेईं इशारो कमाव कि चुप रान। ते ज़ैखन तैनेईं चुप कमाईं त पौलुसे इब्रानी भाषाईं मां ज़ोनु शुरु कमाव:

22 “मेरे ढूलाव ते बुजुर्गाव, मेरी गल शुना, ज़ै अवं अपनि सफैईं मां पैश लोरोईं केरने।” 2 ज़ैखन लोकेईं तैस करां इब्रानी भाषा ज़ोती शुनी त तैना चुप रेड़जे, तैखन पौलुसे ज़ोवं: 3 “अवं त यहूदी आई, ते अवं किलिकिया इलाकेरे तरसुस नगरे मां ज़रमो, पन इस नगर मां गमलीएल करां शिक्षा हासिल की, ते अपने दादां-पड़दादां केरे कानूने ठीक तरीके सेईं शिखोरीए, ते अवं भी परमेशरेरे लेइ एरो मघन थियो, ज़ेरे अज़ तुस आथ। 4 मीं मड़दने ते कुआन्शन बंधतां, ते कैद केरतां, ई पंथ इड़ी तगर सताए, ते तैना माराए भी। 5 एप्पू महायाजक ते सब बुजुर्ग एस गल्लरे गवाह आन, कि मीं दमिश्क नगरे मां रानेबाले यहूदी ढूलां केरे लेइ चिट्ठी एन्होरी थी, ते अवं तैड़ी एस नीती सेईं जोरो थियो, ते ज़ैना तैड़ी भोन तैन सज़ा देनेरे लेइ बेन्धतां यरूशलम नगरे जो नेही।” 6 “अवं ज़ैखन सफर केरते-केरते दमिश्क नगरेरे नेड़े पुजो, त तै दुपाहरां केरो मौको थियो। ते अम्बरेरां अक बड़ी लौ आई ते मेरे चेरे पासन बलने लगी। 7 ते अवं तल्ले बिछड़ी जेव, ते मीं अक आवाज़ शुनी, ज़ै मींजो ज़ोने लोरी थी, हे शाऊल, हे शाऊल तू मीं किजो स्तातस? 8 त मीं पुच्छू, हे प्रभु तू कौन आस? त तैनी मींजो जुवाब दितो, अवं यीशु नासरी आई, ज़ैस तू सतातस। 9 मेरे सैथेईं लौ त लाई पन तैन कोई गल न समझी, कि ते आवाज़ मीं सेईं कुन लोरीए ज़ोने? 10 त मीं पुच्छू, हे प्रभु अवं कुन कम्मईं, प्रभुए ज़ोवं, उठ दमिश्क नगरे मां गा तैड़ी तीं ज़ैन तेरे केरनेरे लेइ रखेरुए तैड़ी तीं सेईं ज़ोवं गालू। 11 मेरे सैथेईं अवं हथ्येरां टलेइतां दमिश्क नगर मां पुजाव। किजोकि तैस बड़े महिमारे वजाईं सेईं मीं किछ न लेइयोवं।” 12 “तैड़ी अक मैनु हनन्याह नव्वेरो कानूनेरे मुताबिक भक्त मैनु अव, ते तैठेरे यहूद मां बड़ो इज़्जतदार थियो। 13 तै मीं कां खड़ो भोड़तां ज़ोने लगे, हे ढूला, शाऊल, अपनि एछछी खोल्ल, ते मेरी एछछी तैखने खुल्ली जेई, ते अवं तैस लहने लगे। 14 तैखन तैनी ज़ोवं, इशसे बुजुर्गां केरे परमेशरे तू चुनोरोस, ताके तू तैसेरी मर्जी पूरी केरस ते मसीह लास ते तैसेरी गल्लां शुनस। 15 किजोकि तू सैरी

लोकन मां तैसेरो गवाह भोलो, ते तैन ज़ोलो कि तीं कुन लाहेरुए ते कुन शुनेरुए। 16 हुनी चिर किजो लातस? उठ, ते बपतिस्मो ने ते तेरे पाप माफ़ भोन।” 17 “ते ज़ैखन अवं यरूशलम नगरे मां वापस अव, ते अवं मन्दरे मां प्रार्थना केरने लोरो थियो, त मीं दर्शन लावं। 18 ते तै लाव ते एन ज़ोतू शुनू कि लूश केरे, ते यरूशलम नगरे मरां लूशी निस, किजोकि एना लोक मेरे बारे मां तेरी गवाही कबूल न केरेले। 19 मीं ज़ोवं, हे प्रभु एना लोक ज्ञानतन कि अवं हर प्रार्थना घरे मां गातो थियो, ते केन्चरे अवं तेरे मन्ने बालन कैद केरतो ते कुटतो थियो। 20 ते ज़ैखन तेरे गवाह स्तिफनुस मारने लोरे थिये, त अवं भी तैड़ी थियो, ते तैसेरे मारने मां खुशी थियो। ते अवं मारने बालां केरां लिगडां पहरतो थियो। 21 ते प्रभुए मीं सेईं ज़ोवं, ‘गा अवं तीं गैर कौमन कां दूर-दूर भेजेलो।’” 22 सारे लोक तैसेरी गल्लां शुने लोरे थिये, पन ज़ैखन ते इड़ी तगर पुजो त सारे लोक ज़ोरे-ज़ोरे चिन्डां मारने लगे, “ए ज़ीतो रखनेरे काबल नई।” एस मार। 23 ज़ैखन लोकां केरि शौर ते चिन्डां चेलती रेइ, त तैना चोगे शैरतां थूड़ आसमाने उडारने लगे। 24 त फौजी पलटनरे सरदारे पौलुस किल्लै मां नेनेरो हुकम दितो, “एस कोड़ेइं सेईं बाथ ते एसेरू बियांन घिन्ना ताके पतो लगे, कि लोक किजो चिन्डां मारने लोरेन।” 25 ज़ैखन तैना कोड़ेइं सेईं बानेरे लेइ पौलुस रेसी सेईं बंधो, त तैनी एक्की सूबेदारे सेईं ज़ोवं ज़ै तैड़ी नेड़े थियो। “कुन अक रोमी नगरेरे मैनु बगैर कसूरे झुसुनो जेइजें?” 26 ज़ैखन तैनी सूबेदारे एन शुनू त तै फौजी पलटनरे सरदारे कां जेव, “तू कुन ज़ोतस? ए त अक रोमी मैनुए।” 27 फौजी पलटनरे सरदारे पौलुसे कां एइतां पुच्छू, “कुन तू रोमीस?” तैनी ज़ोवं, “हाँ।” 28 इन शुन्तां फौजी पलटनरे सरदारे ज़ोवं, “कि मीं रोमी भोनेरी पदवी बड़े पेंडसे देइतां हासिल कियोरीए।” ते पौलुसे ज़ोवं, “पन अवं त ज़र्मनेरो रोमी।” 29 ज़ैना लोक पौलुसेरू बियांन घिन्ने बाले थिये, तैना नेशशी जे, फौजी पलटनरे सरदारे भी इन बुझतां कि ई रोमीए, ते तैनी तै बंधो, ते डेरि जेव। 30 होरसां तै ठीक-ठीक ज्ञान्नेरी इच्छा सेईं कि यहूदी तैस पुड़ किजो दोष लातन, एल्लेरेलेइ तैनी तै खोल्लो, ते प्रधान याजक ते सारी महासभा अकोट्टी केरनेरो हुकम दितो, ते पौलुस बुन गेइतां तैन केरे सामने खड़ो कियो।

23 पौलुसे महासभारे लोकां केरे पासे रोड़ेचारे तेकतां ज़ोवं, “हे ढूलाव अवं बेड़ि नेक नीती सेईं परमेशरेरे हुकमां केरे मुताबिक ज़िन्दगी गुज़ारतो ओरोई।” 2 महायाजक हनन्याह पौलुसेरी एना गल्लां शुन्तां पौलुसे कां खड़े भोरे लोकन हुकम दितो, कि एसेरे तुत्तरे पुड़ थप्पड़ बाथ। 3 पौलुसे तैस सेईं ज़ोवं, “हे पाखंडी, परमेशर तीं बाए। तू इड़ी बिशोरोस कि मूसेरे कानूनेरे मुताबिक मेरो इन्साफ केरस, ते कुन तू मूसेरे कानूनेरे खलाफ बानेरो हुकम देतस?” 4 ज़ैना तैड़ी खड़खड़े थिये, त तैना ज़ोने लगे, “कुन तू परमेशरेरे महायाजकेरी तुहीन केरतस?” 5 पौलुसे तैन सेईं ज़ोवं, “ढूलाव मीं पतो न थियो, कि ए महायाजक, किजोकि लिखोरुए, तू अपने लोकां केरे प्रधाने जो बुरु न ज़ो।” 6 पौलुस ज्ञानतो थियो, कि तैन मां किछ सदकूकी भी आन, ते किछ फरीसी

लोक भी आन ते तै महासभाई मां ज़ोरे सेइं ज़ोने लगे, “हे ढूलाव अवं त फरीसी लोकां केरे खानदेंनी मरां आई, ते मीं पुड़ एनेई एल्हेरेलेइ मुकदमो चलेवरोए, कि अवं उमीद रखताई कि मुडदे फिरी ज़ींते भोले।” 7 पौलुसेरू एन ज़ोंते फरीसी ते सटूकी लोकन एण्पू मांमेइं लडाईं शुरू भोइजेइ, ते सेब्भन एण्पू मांमेइं खल बनो। 8 किजोकि सटूकी ज़ोतन कि मुडदे ज़ींते नईं भोने, ते न स्वर्गदूतन ते न कोई आत्मा आए, पन फरीसी लोक एन दुइये गल्लन पुड़ विश्वास केरतन। 9 तैखन तैना बेंस केरने लगे, शास्त्री लोकन मरां ज़ैना फरीसी लोकन मां थिये, तैना खडे भोइतां लडाईं केरतां ज़ोने लगे, “असां इस मैन्हु मां कोई कसूर न लहम, अगर केन्ची आत्मा या स्वर्गदूते एस सेइं कोई गल कियोरीए त फिरी कुन भोंव?” 10 गल एत्री बेड्डी जेई, कि फौजी पलटनरे सरदारे बुड्डी, कि एरू न भोए कि पौलुसेरे टोटे-टोटे बनान, त तैनी हुकम दित्तो कि बुन गाथ ते पौलुसे ज़बरदस्ती तैदुं कढा ते किल्लै मांजो आनां। 11 तैस्से राती प्रभू यीशुए पौलुसे कां एइतां ज़ोंव, “हे पौलुस हिम्मत रख ज़ेन्चरे तीं यरूशलेम नगरे मां मेरी गवाही दित्तोरीए, तेन्चरे तीं रोमे मां भी गवाही देनी भोली।” 12 होरसां ड्रेइं किछ यहूदी मैनेई मिलतां फेसलो कियो, ते कसम कमाई कि ज़ांतगर असां पौलुसे कत्ल न केरम, तांतगर किछ न खाम ते न पीम। 13 एस साज़िशि मां 40 मैन्न करं जादे थिये। 14 तैना प्रधान याजकन ते बुजुर्गन कां जे, ते ज़ोने लगे, “असन पुड़ लानत भोए, अगर असां पौलुसे मारनेरे बगैर किछ खाम या पीम, असेईं त तैस खतम केरनेरी कसम कमेवरीए। 15 एल्हेरेलेइ तुस सब महासभा मां मिलतां फौजी पलटनारे सरदारे कां दरखुवास देथ, कि तै पौलुसे लोकां केरे सामने आने, ताके एस मुकदमेरी सारी हकिकत फिरी पतो चले, एस करां पेइले पौलुस इडी पैश कियो गाए, असां तियार आम, कि तैस मारम।” 16 पन ज़ैखन पौलुसेरे बेइनारे मट्टे एस साजशरो पतो लगे, त तैनी किल्लै मां गेइतां पौलुसे पतो दित्तो, कि तैना लोक तैस मारनो चातन। 17 तैखन पौलुसे सूबेदारन मरां अक कुजाव, ते तैस सेइं ज़ोंव, “कि इस जवाने फौजी पलटनरे सरदारे कां नेथ, किजोकि ए किछ ज़ोनेरे लेइ ओरोए।” 18 बरसा, तैनी तै फौजी पलटनरे सरदारे कां साथी नीयो, ते ज़ोने लगे, “अवं पौलुसे ज़े कैदी आए, तैनी अवं कुजाव, ते तैनी मीं कां दरखुवास कियोरीए, कि इस जवाने अवं तीं कां एन्ही, किजोकि ए किछ तीं सेइं ज़ोनु चाते।” 19 फौजी पलटनरे सरदारे तैस जवानेरो हथ टलेइतां तै कनारे ज़ेरे नीयो ते तैस पुच्छने लगे, “तू मीं सेइं कुन ज़ोनु चातस?” 20 तैनी जवाने ज़ोंव, “यहूदी लीडरेई अकट्टे भोइतां तीं कां दरखुवास देनेरो फैसलो कियोरोए। कि तू पौलुसेरी पुछ गन केरनेरे बहाने तैस महासभा मां आनस। 21 तू तैन केरि गल न मेन्ना, किजोकि कोई 40 मैन्न करं जादे यहूदी तैस पुड़ हमलो केरनेरी कोशिशी मां आन, तैनेई कसम कमेवरी कि ज़ांतगर असां पौलुसे न मारम तांतगर असां किछ खाम या पीम, त असन लानत भोए, हुनी तैना तियारन, सिर्फ तेरे वादेरो इंतज़ारे।” 22 फौजी पलटनरे सरदारे तै जवान वापस भेजो, ते तैस ज़ोंव कि गा, “एना गल्लां केरो ज़ैना तीं मीं सेइं ज़ोई, होरि

केन्ची पतो न लोड़ी लगगेरो।” 23 तैखन तैनी दूई सूबेदार कुजाए, ते तैन सेइं ज़ोंव, “तुस 200 सिपाही ते 70 सुवार ते 200 भाले च़लानेबाले तियार रख्खा, तैनेई राती 9 बजेई कैसरिया नगरे मां गानूए। 24 ते पौलुसेरे लेइ घोड़े तियार रखा, ताके तै गवर्नर फेलिक्स कां हफाज़ती सेइं पुजाव गाए।” 25 ते फौजरे प्रधाने अक चिट्ठी एस तरिकेरी लिखी। 26 “श्रीमान फेलिक्स गवर्नर क्लौदियुस लूसियासे जो नमस्कार। 27 ए तै मैनुए, ज़ै यहूदेई ट़लातोरो थियो, ते एस तैना मारनेबाले थिये, त अवं सिपाही नेइतां साथी जेव, ते तै छुटाव, किजोकि मीं पतो थियो, कि तै अक रोमेरो रानेबालोए, त फौजी पलटन नेइतां छुटाव। 28 लिहाज़ा एन ज़ान्नेरी केरनेरे लेइ कि तैना तैस पुड़ कुन इलज़ाम लातन, मीं तै तैन केरि महासभा मां पैश कियो। 29 ते पतो लगे, कि तैन केरो इलज़ाम तैन केरे कानूनरे मुताबिक एसेरे खलाफ कोई एरो इलज़ाम नई, कि जेसेरे ज़िरिये सेइं असां तैस कैद केरम या मौतरी सज़ा देइ सखम। 30 मीं पतो लगगेरोए कि एसेरे खलाफ कोई साज़िश भोइ राहोरीए, ते मीं ए जल्दी तीं कांजो भेजोरोए, ते मीं तैस पुड़ दाओ केरनेबालन भी ज़ोरूए, कि तैना भी तीं कां अपनो मुकदमो पैश केरन।” 31 सिपाही, फौजी पलटनरे सरदारे हुकमेरे मुताबिक पौलुसे एण्पू सेइं साथी नेइतां रातो रात अन्तिपत्रिस नगरे मां पुजाव। 32 होरसां दीसां घोड़ सुवारन तैस सेइं साथी अग्री-अग्री गानेरो हुकम दित्तो, ते तै एण्पू किल्लै मांजो वापस च़लो जेव। 33 ज़ैखन घोड़ सुवार कैसरिया नगरे मां पुजे त तैनेई गवर्नरे कां चिट्ठी देइतां पौलुस तैस कां पैश कियो। 34 गवर्नर चिट्ठी पेइतां पुच्छू, “ए कौस इलाकेरो रानेबालोए?” ज़ैखन तैस पतो लगे कि ए किलिकिया इलाकेरो रानेबालोए। 35 त तैनी ज़ोंव, कि अवं तेरो मुकदमो तैखन शुनेलो, “ज़ैखन तीं पुड़ दोष लाने बाले भी इडी हाज़र भोले।” तैखन तैनी हुकम दित्तो कि पौलुसे हेरोदेसेरे पहरे मां रख्खा।

24 पंचे दिहैइना बाद हनन्याह महायाजके किछ बुजुर्ग ते तिरतुल्लुस नंवेरो वकील साथी कैसरिया नगरे मां पुजे, ते गवर्नरे कां पैश भोइतां पौलुसेरां खलाफ फरयाद कमाई। 2 ज़ैखन पौलुस पैश कियो त तिरतुल्लुस इलज़ाम लेइतां ज़ोने लाव, “हे महान फेलिक्स, तेरे वजाई सेइं अस बडे खुशी सेइं रातम, ते तेरे ज़िरिये सेइं इस कौमरी केत्री बुरैई सुधैरी गैतिन। 3 एन अस हर ठैरी हर किसमे सेइं मन्तम। 4 पन हुनी अवं तेरो जादे वक्त नेनो न चैई, अवं तेरी मिनत केरताई कि इश्शी अक दूई गल शुन। 5 असेईं लाहेरूए कि ई मैन्हु बड़ो फसाद केरनेबालोए, ई दुनियारे सारे यहूदन मां फितनाबाजे, ते नासरी कुपंथेरो प्रधान आए। 6 एनी त मन्दरे भी अशुद्ध केरनेरी कोशिथ की, ते एल्हेरेलेइ असेईं ए दलेइतां एस पुड़ अस अपने कानूनरे मुताबिक मुकदमो च़लानो चाते थिये। 7 पन फौजी पलटनरो सरदार लूसियास असन करां ज़बरदस्ती नेही जेव। 8 ते इस पुड़ दोष लाने बाले तीं कां हाज़र भोनेरो हुकम दे। इन सेब्भी गल्लां केरे बारे मां अस एस पुड़ दोष लातम, तू एण्पू सच़ जान।” 9 यहूदी लोकेई भी तैस सेइं साथी भोइतां ज़ोंव, कि एना गल्लां केन्चां भोइ सेकतिन। 10 ज़ैखन गवर्नरे पौलुसे बियांन देनेरे लेइ इशारो कियो,

त पौलुसे जुवाब दितो, “अवं ज्ञानताई कि तू केही सालां केरो देंतो इस कौमरो इन्साफ केरनेबालो आस, एल्हेरेलेइ अवं अपनि सफाई तीं कां पैश केरताई। 11 तू एप्पू पतो केरि सखत्स कि अवं 12 दिहाड़े पेड़ले यरूशलेम नगरेरे मन्दरे मां आराधना केरनेरे लेइ जोरो थियो। 12 मेरे मुदेइयेई अवं मन्दरे मां केन्ची सेई भी बेंस केरतो नई लाहोरो, ते प्रार्थना घरे मां ते नगर मां इरां उरां लड़ाई केरतो भी नई लाहोरो। 13 हुनी एना इलज़ाम जैना मीं पुड़ लाने लोरेन, ते तेरे सामने साबत न केरि सखे। 14 हाँ अवं इकरार ज़रूर केरताई कि ज़ैस पंथे एना कुपंथ ज़ोतन, अवं तैसेरे मुताबिक अपने दादे-पड़दादां केरे परमेशेरी आराधना केरताई, ते ज़ैन किछ मूसैरे कानूने ते नेबी केरि किताबी मां लिखोरूप, तैन सेबभन पुड़ मेरो विश्वास आए। 15 अवं परमेशेरे पुड़ तैए भरोसो रखताई, ज़ै तैना रखतन कि धर्मी लोकन ते पापी लोकन परमेशर मुड़दन मरां जीतो केरेलो। 16 ते एल्हेरेलेइ मेरो ज़मीर परमेशेरे कां भी ते इन्साने कां भी बेइलज़ाम राए। 17 केही सालां केरे बाद अवं अपने गरीब लोकन दान पुजाने, ते चढ़तल च़ाढ़ने ओरो थियो। 18 तैखन एनेई अवं मन्दरे मां लाव, त अवं शुद्ध भोनेरी रीत पूरी केरने लोरो थियो, बगैर लोक अकोट्टे केरतां ते बगैर कोन्ची हंगामे इन कम केरतो लाव। पन तैना आसिया इलाकेरे किछ यहूदी थी, ते तैन जाईइ थियूं। 19 अगर मीं किछ गलत कियोरू भोथू त तैनेई इड़ी तेरे सामने मीं पुड़ दोष लोरो लोड़तो थियो, किजोकि तैनेई एप्पू लावरूप कि मीं मन्दरे मां कुन कियूं। 20 इना लोक जैना इड़ी ओरेन, एना ज़ोन कि ज़ैखन अवं महासभा मां पैश भोरो थियो, त एनेई मीं मां कुन कसूर लाहोरो थियो? 21 सुवाए इस गल्लेरे कि ज़ै मीं बड़े ज़ोरे सेई आवाज़ देइतां ज़ोरी थी, कि अवं ई विश्वास केरताई परमेशेरे मुड़दन जीते केरते, एल्हेरेलेइ मीं पुड़ मुकदमो च़लाने लागोरें।” 22 फेलिक्स ज़ै इस पंथेरे बारे मां ठीक-ठीक ज्ञानतो थियो, एन ज़ोइतां मुकदमो बंद कियो, “ज़ैखन फौजी पलटनरो सरदारे लूसियास इड़ी एज्जेलो त अवं तुशेरे सामने इस मुकदमरो फैसलो केरेलो।” 23 तैनी सूबेदारे हुक्म दितो, कि पौलुसे परेह मां रखवा, ते तैसेरे दोस्तन मरां केन्ची भी तैसेरी सेवा केरनेरे लेइ न रोकथ। 24 केही दिहैइना बाद गवर्नर फेलिक्स अपनि कुआन्श द्रुसिल्ला ज़ै यहूदी थी, तै तैस सेई साथी कैसरिया मां अव, तैनी पौलुसे जो समाद भेजो ते यीशु मसीह पुड़ विश्वास केरनेरे बारे मां गल्लां शुनाए। 25 ज़ैखन पौलुस एन ज़ोवं, कि परमेशेरी नज़री मां कुन रोड़ए ते अपने इच्छा कैबू केरनेरे बारे मां ते एजनेबाले परमेशेरे इन्साफेरे बारे मां भी ज़ोवं, त फेलिक्स डेरि जेव, ते ज़ोने लगे, “हुनी तू गा, अगर फुर्सत मैलेली त अवं तीं फिरी तीं कुजेइलो।” 26 तैस पौलुसे करां किछ मैलनेरी उमीद थी, एल्हेरेलेइ तै तैस बार-बार कुजातो थियो, ते तैस सेई गल्लां केरतो थियो। 27 पूरे दूई सालना बाद पुरकियुस फेस्तुस, फेलिक्सैरे ठैरी गवर्नर बनो, ते फेलिक्से यहूदी खुश केरनेरे लेइ पौलुस कैदखाने मां रखवो।

25 फेस्तुस तैस इलाके मां पुजतां टलेइ दिहैइना बाद कैसरिया नगरेरां यरूशलेम नगरे मांजो जेव। 2 ज़ैडी प्रधान याजकेई ते

यहूदी लीडर तैस कां एइतां पौलुसेरे खलाफ दोष लाने लगे। 3 तैना तैस कां मिनत केरने लगे, कि लूशी पौलुसे यरूशलेम नगरे मां हाज़र भोनेरो हुक्म दे, द्रासले मां तैनेई तैस बत्तां मारनेरी साज़िश कियोरी थी। 4 फेस्तुसे जुवाब दितो, “पौलुस कैसरिया नगरे मां कैदे, ते अवं भी तैड़ी लूशी गाने बालोई।” 5 फिरी ज़ोवं कि तुसन मरां किछ खास अधिकार रखनेबाले मीं सेई साथी च़लन, “अगर सच्चे तैनी कोई गलत कम कियेरू भोए त तैस पुड़ दोष लान।” 6 ते फेस्तुस अठ दश दिहाड़े यरूशलेम नगरे मां राव, ते फिरी कैसरिया नगरे जो च़लो जेव, तैड़ी तै दुइयोंवं दिहाड़े आदालतरी तखते पुड़ बिश्शो, ते हुक्म दितो कि पौलुसे हाज़र केरा। 7 ज़ैखन पौलुस हाज़र भोव, त यरूशलेम नगरेरे यहूदी लीडरेई तैस चुफुरतां घेरो देइतां बड़े झूठे इलज़ाम लाने शुरू कियो। पन कोई पक्कू सबूत न मैल्लू। 8 पौलुसे अपनि सफाई देंते बार यहूदी केरे झूठे इलज़ामा केरे लेइ इन्कार कियो, ते ज़ोवं, “मीं त यहूदी केरे कानूनेरे खलाफ कोई कसूर नई कियोरो, ते न मन्दरेरे खलाफ ते न महाराज़ेरे खलाफ कोई कसूर कियोरोए।” 9 पन फेस्तुस एप्पू यहूदी लीडरन खुश केरनेरे लेइ पौलुसे पुच्छू, “तीं यरूशलेम नगरे जो गानू मन्जुरे, ताके अवं एस मुकदमरो फैसलो तैड़ी केरि?” 10 पौलुसे ज़ोवं, “अवं इड़ी महाराज़ेरे इन्साफेरे तखतेरे सामने खड़ो आई, ते मेरे मुकदमरो फैसलो इस्से ठैरी भोरो लोड़ते, ज़ैडी रोमी मैनेरो इन्साफ भोरो लोड़े, तू एप्पू भी रोड़ेच़ारे ज्ञानतस कि मीं यहूदी केरो कोई कसूर नई कियोरो। 11 अगर अवं कुसुरवार आई त मौतरी सज़ारे काबल आई त मेरो मरनेरो इन्कार नई, पन अगर ज़ैना झूठे इलज़ाम यहूदी मीं पुड़ लाने लागोरें ते अगर तैना झूठेन त केन्ची हक नई कि मीं तैन केरे हवाले केरे। ते अवं इड़ी महाराज़े कां बिनती केरताई, कि मेरो इन्साफ इड़ी कियो गाए।” 12 तैखन फेस्तुस सल्लाकारन करां मुशोरो केरतां जुवाब दितो, “तीं महाराज़े कां बिनती कियोरीए त तू महाराज़े कां गालो।” 13 किछ दिहैइना बाद अग्रिपपा राज़ो ते तैसेरी निकडी बेइन बिरनीके कैसरिया नगरे मां एइतां फेस्तुसे सेई मुलाकात की। 14 तैन केरे बड़े दिहाड़े तैड़ी रानेरे बाद फेस्तुसे पौलुसेरे बारे मां राज़े ज़ोवं, “अक मैन्हु आए, ज़ै फेलिक्सै कैद कियोरोए। 15 ज़ैखन अवं यरूशलेम नगरे मां थियो, त प्रधान याजक ते यहूदी बुजुर्ग तैस पुड़ दोष लगे लाने, कि एस सज़ा दित्ती गाए। 16 पन मीं तैन ज़ोरू थियूं, कि रोमी केरे दस्तूरेरे मुताबिक कोई मैन्हु सज़ा देनेरे लेइ हवाले न कियो गाए, ज़ांतगर तैस अपने मुदेइ केरे सामने तैन इलज़ामा केरे बारे मां अपनि सफाई पैश केरनेरो मौको न दितो गाए। 17 एल्हेरेलेइ ज़ैखन यहूदी लीडर इड़ी आए, त मीं ठढ न लाई, पन होरसां इन्साफेरे तखते पुड़ बिश्तां हुक्म दितो, कि पौलुस आदालती मां आनो गाए। 18 ज़ैखन तैसेरे मुदेइ अपनो दाओ पैश केरनेरे लेइ खड़े भोए त, तैनेई कोई एरो इलज़ाम तैस पुड़ न लाव, जेसेरी बारे मां अवं समझतो थियो। 19 पन अपने फिरकेरे बल्के तैन केरि लड़ाई तैन केरे अपने धर्मेरे केन्ची यीशु नव्वेरे मैनेरे बारे मां थी। तै मेरि जेवरोए, पन पौलुस तैस जो जीतो ज़ोते। 20 अवं बेड़ि उलझनी मां राहोरोई कि केन्चरे एन गल्लां

केरो पतो केरि, एल्हेरेलेइ मीं पौलुसे पुच्छू, कि तीं यरूशलेम नगरे मां गानू मन्जुरे, ताके एन गल्लां केरो फैसलो तैड़ी भोए? 21 पन पौलुसे बिनती कमाई कि इस मुकदमेरो फैसलो महाराजे कां लोइते भोरो, एल्हेरेलेइ मीं हुक्म दित्तो कि तै महाराजे कां गाने तगर इड़ी पाबंद राए।” 22 अग्रिप्पा राजे फेस्तुसे सेइं जोंव, “अवं भी एस मैनेरी गल्लां शुननी चाताई।” तैनी जुवाब दित्तो, “तू तैसेरी गल्लां कालां शुनी सखत्स।” 23 होरसां अग्रिप्पा राजे ते कने बिरनीके बेडिं शानीं सेइं आए, ते फौजी पलटनेर सरदारेइं ते नगरेरे खास लोक सभा मां दाखल भोए, फेस्तुसे हुक्म दित्तो कि पौलुसे हाजर केरा। 24 फिरी फेस्तुस जोंव, “हे अग्रिप्पा राजा ते बाकी लोकव तुस इस मैन्हु हेरतथ एसेरे खलाफ सैरी यहूदी कौमां मीं कां यरूशलेम नगरे मां भी ते इड़ी भी चिन्डां मैरतां दरखुवास कियोरी थी, कि ए मैन्हु ज़ीतो रखनो ठीक नई। 25 पन मीं पतो लगे कि एनी कोई एरू गलत कम नई कियेरू, कि ए कल्ल कियो गाए, एल्हेरेलेइ एनी इड़ी बिनती कियोरीए, त अवं ठीक समझतां कि एस रोम नगरे मां भेज़ी। 26 पन मीं तैसेरे बारे मां कोई ठीक गल न मैल्ली, कि महाराजे जो लिखी, एल्हेरेलेइ मीं तै तुशशे सामने ते खास केरतां अग्रिप्पा राजा, तेरे सामने पैश कियोरोए, ताके पुछू गन केरनेरे बाद अगर कोई खास गल भोए त अवं लिखी। 27 किजोकि केन्ची कैदी भेज़ते बार तैसेरे इलज़ाम अगर अवं केन्ची न शुनेई त मेरी लेइ ठीक नई।”

26 अग्रिप्पा राजे पौलुसे जो जोंव, “तीं अपने बारे मां ज़ोनेरी अज़ाज़ते।” तैखन पौलुस अपनो हथ्ये सेइं इशारो केरतां अपनि सफाई पैश केरने लगे। 2 “हे अग्रिप्पा राजा, अवं अपनो आप खुश किस्मत समझताई, कि तेरे सामने खडो भोइतां यहूदी लोकां केरे प्रधानां केरे इलज़ामा केरे खलाफ अपनि सफाई पैश केरने लगेरोइं। 3 खास केरतां तू सारे यहूदी केरि रीति रुवाज़ेरे बारे मां ज्ञानतस, ते एल्हेरेलेइ अवं तीं कां मिनत केरताई, कि तू सबरी सेइं मेरी गल शुन। 4 यहूदी मीं रोइंयारे ज्ञानतन कि पेइले अवं अपने लोकन मां ते यरूशलेम नगरे मां ते मेरी जवेंनरो चालचलन केरहो थियो। 5 तैना पेइले देंते मीं ज्ञानतन ते अगर चान त मेरे हके मां गवाही देइ सकतन, कि अवं अपने पंथेरे मुताबिक फरीसी भोइतां अपने धमेरे सच्चे पंथे सेइं जिन्दगी गुजरतो ओरोईं। 6 परमेशेरे इशशे दादे-पडदादन सेइं अक वादो कियोरो थियो, मीं उमीदे कि तै पूरो भोलो, तैस उमीदारी वजाई सेइं मीं पुड़ मुकदमो चलेवरोए। 7 एस वादेरे पूरे भोनेरी उमीद इशशे 12 केरे 12 गोत्रने, एल्हेरेलेइ तैना दिले सेइं रात दिहाड़ी परमेशेरी सेवा केरते रातन। हे अग्रिप्पा राजा मेरी इस उमीदेरे लेइ यहूदी मीं पुड़ दोष लातन। 8 ज़ां कि परमेशर मुडदन फिरी ज़ीते केरते, तुस इस गल्ली पुड़ विश्वास कि न केरथ? 9 “पेइले अवं भी समझतो थियो, कि यीशु नैसरेरे नव्वेरी हर तरीके मुखालफत केरनि मेरो फरजे। 10 एल्हेरेलेइ अवं यरूशलेम नगरे मां एन्ने केरतो राव, मीं प्रधान याजकन करां अज़ाज़त एन्तां बड़े परमेशेरे सेवक कैद केरतां छेडे, ते ज़ैखन तैना मारे गाते थिये, त अवं भी तैड़ी खलाफत केरतो थियो। 11 अवं प्रार्थना घरन मां गातो थियो, ते

तैन केरि तुहीन केरतो थियो। ते लोकन यीशुपरे खलाफ तुहीन केरनेरे लेइ मजबूर केरतो थियो। ते मसीही लोकां केरि मुखालफत केरने सेइं मीं एत्री खुशी भोती थी, कि अवं दूर-दूर नगरन मां गेइतां तैन सतातो थियो।” 12 “एक्की बार प्रधान याजकन करां अधिकार एन्तां एस्से कम्मरे लेइ दमिश्क नगरेरे सफर केरने लगगोरो थियो। 13 त हे राजा अवं हेजू बत्तां थियो, त मीं दुपहरां केरे मौके अम्बेरां अक लौ एइती लाई, ज़ै दिहाड़ेरी लौई करां भी जादे थी, ते तै इशशे चेत्रे पासन चमकने लगी। 14 असां सब ज़मीनी पुड़ बिछड़ी जे, ते मीं अक आवाज़ शुनी, ज़ै मीं सेइं इब्रानी भाषाई मां एन ज़ोने लगेरी थी। कि हे शाऊल हे शाऊल तू मीं किजो स्तातस? मीं सेइं लड़ाई केरनि तेरे लेइ बेकारे। 15 “त मीं जुवाब दित्तो, हे प्रभु तू कौन आस, त प्रभुए मीं जुवाब दित्तो अवं यीशु आई ज़ैस तू सतातस? 16 पन उठ ते अपने पवन पुड़ खडो भो, किजोकि मीं तीं एल्हेरेलेइ दर्शन दित्तोरूए, कि तीं अवं अपनो सेवक बनेइं, ते ज़ैन किछ तीं लाहेरूए तू तैसेरो गवाह बनस। 17 अवं तीं तेरे लोकन करां ते गैर कौमन करां बचातो रेइलो अवं तीं तैन मां भेज़ताई। 18 ताके तू तैन केरि एछ्छी खोल्लस ते तैन आंधेरे मरां लौई मां आनस ते कने शैताने करां छुटेइतां परमेशेरेरे पासे आनस, ताके तैना मीं पुड़ विश्वास केरन ते परमेशर तैन केरे पाप माफ़ केरे, ते तैन लोकन मां शामिल भोन ज़ैना पवित्र कियोरेन, तैना विरासत हासिल केरन।” 19 ते एल्हेरेलेइ, “हे अग्रिप्पा राजा मीं एस स्वर्गेर दर्शनेरो इन्कार नई कमेवरो। 20 ते पेइले मीं दमिश्क नगरेरे लोकन मां ते फिरी यरूशलेम नगरेरे ते सारे यहूदिया इलाकेरे रानेबालो ते गैर कौमन भी प्रचार केरतो कियो। कि पापन करां मनफिराथ, ते परमेशेरेरे पासे फिरा ते अपने रूभावे सेइं साबत केरा कि तुसेईं पापन करां मन फिरावरोए। 21 एन्ने गल्लां केरे लेइ यहूदेईं अवं मन्देरे मां टलातो ते मारनेरी कोशिश की। 22 “पन अवं परमेशेरी किर्पाई सेइं अज़ तगर ज़ीतोईं, ते सेब्भी निक्के बड्डन कां अवं गवाही देताई, कि ज़ैना गल्लां अवं ज़ोताई कि ज़ैना नेबेईं ज़ोरी थी, ते मूसा नेबे भी ज़ोरी थी। 23 कि मसीह बडो दुख भोगेलो, ते सेब्भन करां पेइलो मुडदन मरां ज़ीतो भोइतां यहूदी कौमी त गैर कौमां केरे लोकन बचालो ज़ै लौअरो ज़ेरो आए।” 24 ज़ैखन पौलुस एन ज़ोने लगगोरो थियो, त फेस्तुस ज़ोरे सेइं जोंव, “तू पागल भोइ जेव। जादे ज्ञाने सेइं तू पागल भोइजेवरोस।” 25 पौलुसे जुवाब दित्तो, “जनाब फेस्तुस साहब अवं पागल नई भोरो, अवं ज़ैन किछ ज़ोने लगेरोइं तैन सच्चे ते ज्ञाने सेइं आए। 26 राज़ो भी ज़ेसेरे सामने अवं निडर भोइतां एन गल्लां ज्ञानते, ते मीं याकीने कि एन मरां कोई भी गल तैस करां छुपोरी नई, किजोकि ए चमत्कार कोई एरो नई भोरो। 27 हे अग्रिप्पा राजा कुन तू नेबी केरो, अवं ज्ञानताई कि तू मनतस?” 28 अग्रिप्पा राजे पौलुसे सेइं जोंव, “कुन तू थोड़ी ज़ेरि गल्लेईं सेइं मीं तू मसीही बनानो चातस?” 29 पौलुसे जुवाब दित्तो, चाए थोड़ी ज़ेरि या जादे गल्लेईं सेइं, “पन अवं त परमेशेरे कां प्रार्थना केरताई कि, न सिर्फ तू बल्के ज़ेत्रे भी अज़ मेरी गल्लां शुनी रावरेन सब मेरे ज़ेरे मसीही भोन, पन इन शंगलां केरे बगैर।” 30 तैखन

अग्रिप्या राजो ते गवर्नर ते बिरनीके ते तैस सेइं साथी होरे भी खड़े भोए ते चले जे। 31 ते बेडर निस्तां एक्की होरि सेइं ज़ोने लगे, “कि ए मैंहु कोई एरू कम त नईं लोरो केरने, कि एस मौतरी सज़ा दिती गाए, या कैदखाने मां रख्खो गाए। 32 अग्रिप्या राजे फेस्तुस सेइं ज़ोवं, अगर एनी मैने महाराजे कां फरयाद न भोथी कियोरी त ए छुटी सकतो थियो।”

27 ज़ैखन फिस्तुस हाकिमेरे ज़िरिये ए बिस्तार बनो कि असां लोक जिहाज़े मां इतालिया जो गाम, त पौलुस त होरे कैदी यूलियुस नंवे औगुस्तुस फौजी पलटनेर सरदाररे एक्की सूबेदाररे सुपुर्द किये। 2 असां अद्रमुत्तियुम नगरेरां एक्की समुन्दरी जिहाज़े मां च़ेढतां आसिया इलाकेरे नेडेरै ठैरी गानेबाले थिये, त अरिस्तार्खुस नंवे थिस्सलुनीके नगरेरो अक मकिदुनी असन सेइं साथी थियो। 3 होरसां ज़ैखन जिहाज़ सैदा मां रूकी जेवं, त यूलियुसे पौलुसे पुड़ महरबानी केरतां तैस अपने दोस्तन सेइं मुलाकात केरनेरी अज़ाज़त दिती, ताके तैसेरे ज़िरिये सेइं पतो लगे। 4 तैट्ठां फिरी असां जिहाज़े मां च़ेढतां चले जे, ते साइप्रसेरे आडी मांमेइं निस्से, किजोकि हवा बड़ी ज़बरदस्त थी। 5 फिरी किलिकिया नगरे ते पंफूलिया नगरेरे नेडे समुन्द्रेरी बत्तां निस्तां अग्रोवं चले जे, त लूसिया इलाकेरे मूरा नगर मां ओस्से। 6 तैडी सूबेदाररे सिकन्दरिया नगरेरू अक जिहाज़ इतालिया इलाके जो च़लेरू मैल्लू, तैनी असां तैस मां च़ाढ़े। 7 असां बड़े दिहाड़न तगर बल्हे-बल्हे अग्रोवं च़लते राए, ते कनिदुस नगरेरे सामने पुजे। पन तेज हवा च़लने सेइं असन अग्रोवं गानेरी मुशकिल भोइजेइ, ते एल्हेरेलेइ असां सलमोनेरे सामने निस्तां क्रेतेरी आडी मां निस्से। 8 ते बेडि मुशकली सेइं समुन्द्रेरे बन्ने-बन्ने अग्रोवं च़लते शुभलंगरबारी नंवेरी एक्की ठैरी पुजे, ज़ैट्ठां लसया नगर नेडू थियू। 9 तैडी असन केही दिहाड़े बीते, पैनेरे सफरे मां मुशकिल एल्हेरेलेइ भोती थी, कि छुटकारेरी दिहाड़ी तिहाररे बरतेरे दिहाड़ो बीतेरे थी, ते पौलुसे तैन एन ज़ोइतां खबरदारी दिती, 10 “जनाब मां एरू लगगते कि इश्शू सफर बडू खतरनाक भोलू, कि न सिर्फ इश्शू माल सबाब ते जिहाज़े बल्के इश्शी जानी भी खतरए।” 11 पन सूबेदाररे कपताने ते जिहाज़ेरे मालिकेरी गल पौलुसेरी गल करां जादे मन्नी। 12 किजोकि ते बंदरगह ठंढारो मौसम कटनेरे लेइ रोड़ी न थी, एल्हेरेलेइ इश्शो फैसलो ए थियो, कि असां केन्ची तरीके अग्रोवं निस्सम ते असन उमीद थी, कि फीनिक्स मां पुजतां हीवतडेरो मौसम तैडी गुजैरी गामेले। ए क्रेते अक बंदरगह थी, ज़ैसेरां दारां क्षिण-पश्चिम ते उत्तर-पश्चिम पासे खुलतां थियां। 13 ज़ैखन दक्षिणी पासेरां हवा च़लने लगी, त तैनेईं सोचू कि तैन केरि मज़ीं पूरी केरनेरे लेइ रोड़ो वक्ते, ते तैनेईं जिहाज़ेरू लैंगर तैट्ठां खडू कियू, ते समुन्दरेरे बन्ने अग्रोवं च़लते जे। 14 पन लूशी अक बड़ी तूफानी हवा च़ली ज़ैस जो यूरकुलीन ज़ोतन। 15 ज़ैखन तैन जिहाज़ अपने पलैट्रे मां कियू, ते जिहाज़ ढलैक्कां खाने लगू, ते असेईं जिहाज़ हावारे बहावे पुड़ छड़ू। 16 तैखन कौदा नंवेरो अक निकड़ी टैपू अव, त असेईं भी रुड़ते-रुड़ते ते डुंगी ज़ै जिहाज़ेरे पत्तोरां बंधोरी थी, त बेडि मुशकली सेइं कैबू मां की। 17 ते जिहाज़ेरे टोलरे मैनेईं तै उब्री च़ेढतां जिहाज़ टलुटने

करां बचानेरे लेइ रेस्सेइं सेइं बंधतां छड़ू। किजोकि तैन डर थियो, कि एरू न भोए, कि जिहाज़ सुरतिसेरे रेती मां डुबी गाए, एल्हेरेलेइ तैनेईं भारी सामान ओसालू ते जिहाज़े मां रुड़ते-रुड़ते चले जे। 18 ज़ैखन तूफानी हवाई सेइं जिहाज़ जादे ढलैक्कां खाने लगू, त होरसां असेईं जिहाज़ेरो माल समुन्द्रे मांजो शारनो शुरू कियो, 19 टलेइयोवं दिहाड़े तैनेईं जिहाज़ेरू सामान भी समुन्द्रे मांजो शैरी छड़ू। 20 त काई दिहाड़े न असेईं दिहाड़ो लाव ते न तारे ते तूफान भी मन्ना जादे ज़ोर केरने लगारो थियो, ते असन बचनेरी हुनी कोई उमीद न राई। 21 रोटी खाने काई दिहाड़े भोरे थिये, एल्हेरेलेइ पौलुसे तैन मां खड़े भोइतां ज़ोवं, “ढलाव अगर तुसेईं मेरू ज़ोनू मन्नोरू भोथू, ते क्रेते मरां अग्रोवं न ओरे भोथे, त ई नुकसान ते ई तकलीफ किजो भोनी थी? 22 “पन अवं तुसन कां मिनत केरताई कि, हिम्मत न हारा तुसन मरां कोई भी न मरेलो, चाए जिहाज़ डुबी किना गाए। 23 किजोकि ज़ैस परमेशेरी अवं आराधना केरताई, तैसेरो स्वर्गदूत हीज राती मां ओरो थियो। 24 ते तै ज़ोने लगे, हे पौलुस डर नन्ना तू महाराजे कां ज़रूर पैश भोलो ते परमेशर तेरी वजाई सेइं एन सेब्भी केरि जान बचालो, ज़ैना जिहाज़े मां तीं सेइं साथी आन। 25 एल्हेरेलेइ हे जनाब तुस हिम्मत रखा कि मेरे परमेशेरे ज़ैन किछ मां सेइं ज़ोरूए तैन्ने भोलू। 26 असां ज़रूर केन्ची टैपू पुड़ पुजी गामेले।” 27 च़ेवधोवं राती ज़ैखन असां अद्रिया समुन्द्रे मां इरां उरां फिरते थिये, त जिहाज़े बाले मैनेईं अंदाज़ो लाव कि असां बन्नेरे नेडे पुजी जोरेम। 28 तैनेईं पानी रेसी सेइं नापू त 37 मीटर निससू ते थोड़े अगगर गेइतां नापू त 27 मीटर निससू। 29 एस डरे सेइं कि कोस्कोई शफ़डी सेइं न बज़म, ते तैनेईं जिहाज़ेरे पैतरां पासे च़ेरे लैंग्र समुन्द्रे मां छडां ते झेझेरे लौअरे लेइ प्रार्थना केरने लगे। 30 जिहाज़ च़लानेबाले मुझाटेरां बेडरोवं निसनेरे लेइ डोंगी उन्डी ओसाली। पन तैना जिहाज़ेरे एग्री पासेरां लैंग्र पैनी मां छडनू चाते थिये। 31 तैखन पौलुसे सूबेदाररे ते सिपेहिन सेइं ज़ोवं, “अगर इना लोक जिहाज़े मां न भोले त तुश्शू लोकां केरू बचनू मुशकले।” 32 एल्हेरेलेइ सिपैहीयेइ डूंगारी रेस्सी केटतां समुन्द्रे मांजो शैरी दिती। 33 झेझ भोने करां पेइले पौलुसे सेब्भन कां मिनत कमाई, कि तुस किछ रोटी खाथ। तैनी ज़ोवं, “तुस च़ेवधे दिहैडी केरे देंते बचनेरे खियाले मां पेवरेथ, ते तुस रोटी सेइं हुरोरे भी नईं। 34 अवं तुसन कां मिनत केरताई कि तुस रोटी खाथ, किजोकि तुश्शे लेइ रोड़ू एन्ने कि याकीन केरा कि तुश्शो बाल बिंगो न भोलो।” 35 ज़ैखन तैनी एन ज़ोवं, त तैनी रोटी टलाई ते सेब्भी केरे सामने परमेशेरेरू शुक्र केरतां टलोडी ते खाने लगे। 36 तैस करां लेइतां होरन भी हिम्मत आई, ते तैना भी रोटी खाने लगे। 37 असां सब मिलतां कोई 276 मैन्हु थिये, ज़ैना इस जिहाज़े मां सुवार थिये। 38 ज़ैखन तैनेईं रेजतां रोटी खाइ त तैनेईं सारे गेहुं समुन्द्रे मांजो शारने शुरू किये, ताके जिहाज़ पोल्लु भोए। 39 ज़ैखन दिहाड़ो निस्सो त तैनेईं तै ठार न पिशानी, पन अक ठार लाई ते तै पासो साफ थियो, तैनेईं बिस्तार कमाव कि अगर भोइसखे त असां जिहाज़ एस पुड़ च़ाढम। 40 बस्सा लैंगर खोलतां समुन्द्रे मां छैडी दित्तू, ते पत्रवारां केरि रेसी भी

दिल्ली छैडी, एग्रीयों बादबानं भी बा चैडी छुट्टो, ते एप्पू बन्नेरे पासे जो चले। 41 पन जिहाज़ खुशकी पुड़ गेइतां रेती पुड़ टिकी जेवं, ते जिहाज़रो एग्रीयों पासो रेती मां डुबी जेवं ते पैत्रीयों पासो छेल्लेई सेइं बज़कने लगे। 42 सिपेही केरि सल्लाह थी कि कैदन मारम ताके तैन मरां कोई तारी देइतां नेशी न गान। 43 पन सूबेदार पौलुसेरी जान बचांनेरे लेइ एन न दित्तु केरने, ते हुक्म दित्तो कि जै तारी जानते त ते पेइलो छाल मारे, ते खुशकी पुड़ पुज़तां अपनि जान बचाए। 44 ते बाकी हारे लेकड़ारे तखतन पुड़ ते जिहाज़ेरी होरि चीजां केरि मद्दती सेइं अपनि जान बचाथ, ते बरसा सब एस तरीके सेइं खुशकी पुड़ ठीक ठाक पुजी जे।

28 ज़ैखन असां ठीक ठाक बन्ने पुड़ पुजे, त असन पतो च़लो कि इस टैपू जो माल्टा ज़ोतन। 2 तैट्टेरे राने बालेई असन सेइं बड़ो रोड़ो बर्ताव कियो, झड़ी लगगोरी थी, ते ठंड भी बड़ी थी, तैनेई अग बाली ते इश्शी बड़ी आदर कमाई। 3 पौलुसे कैडु केरो अक लेगु बनावं, ते ज़ैखन तै तैना कैडु अग्गी मां छुडने लगे त अगारे सेके सेइं तैन कैडन मरां अक सप निस्सो, ते पौलुसेरे हथ्ये सेइं पलेटोव। 4 ज़ैखन तैन लोकेई सप पौलुसेरे हथ्ये सेइं पलेटोरो लव, त एप्पू मांमेइं ज़ोने लगे, “ए मैन्हु ज़रूर कोई खूनी आए, ए समुन्द्रे मां गर्क भोने करां त बचोरोए, पन इन्साफे ए ज़ीतो न राने न दित्तो।” 5 पन तैनी तैस सप्ये अग्गी मांजो घिल देइतां ट्लट्टो, ते तैस किछ नुकसान न भोव। 6 तैना लोक बलगने लगगोरो थिये, कि एसेरी सारी जान एफरी गानीए ते ए मेरि गानोए, ते बड़े च़िरे तगर बलगनेरे बाद पौलुसे किछ न भोवं, त तैना लोक सोचने लगे, “ए ज़रूर कोई देबतोए।” 7 तैस ठैरारे आसे-पासेरे टैपेरी प्रधान पुबलियुसेरी ज़मीन थी, तैनी असां अपने घरे ने ते ट्लाई दिहाड़े इश्शी आदर खातर की। 8 पुबलियुसेरे बाजी भुखार ते पैचसी सेइं बड़ो बिमार भोरो थियो, ते पौलुसे तैस कां गेइतां तैसेरेलेइ प्रार्थना की, ते तैस पुड़ हथ रेखतां तै बड़ाव। 9 फ़िरी तैस टैपेरे बाकी बिमार लोक आए ते तैना ठीक भोइ जे। 10 तैन लोकेई इश्शी बड़ी इज़्ज़त की, ते असां तैट्टां अग्रोवं गानेरे लेइ तियार भोए, त तैनेई इश्शी ज़रुरतरी सेरी चीजां जिहाज़े मां छैडी दित्ती। 11 इश्शू जिहाज़ बिगड़नेरे ट्लेइ महिना बाद असां सिकन्दरियारे एक्की जिहाज़े मां च़ले जे, ज़ैन ठंड मुकने तगर तैस टैपू मां रुकेरु थियूं, तैस मां यूनेनी केरि दूई अकोठी देबतेरी मूरतां बनोरी थी। 12 पेइले असां सुरकूसा नगरे मां पुजे, ते ट्लाई दिहाड़े तैडी राए। 13 तैट्टां असां च़लते-च़लते रेगियुम नगरे मां पुजे, ते होरसां दक्षिणी हवा च़लने लगी ते असां होरसां पुतियुली नगरे मां पुजे। 14 तैडी असन किछ ढूला भी मैल्ले, तैनेई असां कुजाए ते असां तैडी सत दिहाड़े राए, ते तैसेरां बाद असां रोमे मां पुजे। 15 तैट्टेरे मसीही ढूलान पतो लगे, कि असां ओरेम त तैना असन अगराने अप्पियुसेरे चौके ते ट्लेइ धर्मशालन तगर आए, पौलुसे तैना लेइतां परमेशरेरु शुक्र कियूं ते तैस बड़ी हिम्मत भोइ। 16 ज़ैखन अस रोम नगरे मां पुजे ते पौलुसे अज़ाज़त मैल्ली, कि तै एक्की पैरहेदारी निगरेनी मां ज़ैडी चाए गेइ सकते। 17 ज़ैखन ट्लाई दिहाड़े बीते त पौलुसे यहूदी केरे प्रधान कुजाए, ते ज़ैखन तैना अकोठे

भोए त पौलुसे तैन सेइं ज़ोवं, “ढूलाव मीं अपनि कौमेरे ते अपने दादे-पड़दादां केरे रसमरे खलाफ कोई कम नई कियेरु त फिर भी अवं पाबंद केरतां यरूशलेम नगरे मां रोमी सरकारारे हवाले कियो। 18 तैनेई पुछु गन केरनेरे बाद अवं हथरां छुडनो थियो। किजोकि मीं कोई एरु कम न थियूं कियेरु कि ज़ैस सेइं मीं मौतरी सज़ा देथे। 19 पन ज़ैखन यहूदेई मुखालफत की, त मीं महाराज़े कां बिनती की। पन एल्लेरेलेइ नई कि अवं अपनि कौमी पुड़ कोई इलज़ाम लांनो चातो थियो। 20 एल्लेरेलेइ मीं एन रोडू समझू, कि तुसन सेइं मिलतां गल केरि, अवं इस्राएलेरी एक्की उमीदी ज़ै मसीह आए शांगलन सेइं बंधोरोइ।” 21 तैनेई तैस सेइं ज़ोवं, “असन यहूदन करां न कोई चिट्ठी मैल्ली ते न तैट्टां एजनेबाले इश्शे लोकेई तेरे बारे मां कोई खबर दित्ती, ते न तेरे खलाफ किछ ज़ोवं। 22 पन असां तेरे बारे मां ज़ाननू चातम, ए त असन पतोए, कि लोक सेब्थी ठैरन एस पंथेरे खलाफ गल्लां केरतन।” 23 तैखन यहूदी लोकेई पौलुसेरी गल्लां शुन्नेरे लेइ अक दिहाड़ी ठुवलहाई, ज़ैखन तै दिहाड़ी आई, त लोक पेइले लोकन करां भी जादे अकोठे भोए। पौलुसे तैन परमेशरेरे राज़ेरे बारे मां समझाव, ते साथी यीशुपरे बारे मां मूसेरे कानूने ते नेबी केरे किताबन मरां तैन रोड़ेच़ारे समझेइतां झेज़ां करां इलोड़ी तगर गल्लां शुनातो राव। 24 किछ तैसेरी गल्लां शुन्तां मघन भोइ जे ते मन्नु ते किछेई विश्वास भी कियो। 25 ज़ैखन तैना एप्पू मांमेइं अक न भोए, त पौलुसे तैन गाने करां पेइले अक गल ज़ोई, “पवित्र आत्मारे ज़िरिये यशायाह नबी तुश्शे दादे-पड़दादां केरे बारे मां ठीके ज़ोरु थियूं।” 26 एन लोकन कां गा, ते एन ज़ो कि, “तुस शुन्ते त राले, पन समझेले न, ते तकते त राले पन पिशानेले न। 27 किजोकि एन लोकां केरे दिले मोट्टे भोरोरेन, ते एना टोव्ने भोरोरेन, ते एनेई अपनि एछछी निकोल कियोरिन। किजोकि एरु न भोए, कि एना लहन ते कन्न सेइं शुन्न ते दिले सेइं समझन, ते एना मेरे पासे फिरन ते अवं एन शिफ़ा देई। 28 “एल्लेरेलेइ अवं चाताई कि तुस ज़ानथ कि परमेशेरी मुक्ति गैर कौमन कां भी भेजोरोए ते तैना तैस शुनेले।” 29 ज़ैखन पौलुसे एन ज़ोवं, त यहूदी एप्पू मांमेइं बेंस केरते तैट्टां च़ले जे। 30 पौलुस पूरे दूई सालन तगर क्रैइयेरे मुकाने मां राव, 31 ते ज़ै भी तैस सेइं मिलने एइतो थियो, पौलुस तैस सेइं मिलतो थियो, ते बेथड़क भोइतां परमेशरेरे राज़ेरी खुशखबरी शुनातो थियो, ते प्रभु यीशु मसीहेरे बारे मां शिक्षा देंतो राव।

रोमियों

1 अवं पौलुस यीशु मसीहोरो दास आई, ते प्रेरित भोनेरे लेइ परमेशरे चुनोरोई, ते परमेशरेरी खुशखबरी प्रचार केरनेरे लेइ ठहरावरो आई। 2 जेसेरी तैने पेइले अपने नेबी केरे जिरिये पवित्रशास्त्रे मां, 3 अपने मट्टे इश्शे प्रभु यीशुएरे बारे मां वादो कियोरो थियो, जै जिसमेरे मुताबिक त दाऊदरे खानदाने मरां पैदा भोव। 4 ते पवित्र आत्मा रे जिरिये सेइं मुडदन मरां ज़ातो भोनेरे वजाई सेइं ते शक्ति सेइं परमेशरेरू मट्टू भोव। 5 जेसेरे जिरिये असन अनुग्रह ते प्रेरिताई मैल्ली; कि तैसेरे नंवे सेइं सब कौमां केरे लोक विश्वास केरतां तैसेरी मन्न। 6 जैन मरां तुस भी यीशु मसीहोरे भोनेरे लेइ कुजोरेथ। 7 अवं ई चिट्टी तुश्शे सेब्भी केरे नंवे लिखाताई, जैना तुस रोम नगरे मां रातथ, ते परमेशरेरे ट्लारेथ, ते पवित्र भोनेरे लेइ चुनोरेथ। इश्शे बाजी परमेशार ते प्रभु यीशु मसीहोरे तरफां तुसन शान्ति ते अनुग्रह मैलतो राए। 8 पेइलो अवं तुश्शे सेब्भी केरे लेइ यीशु मसीहोरे जिरिये परमेशरेरू शुक्र केरताई, किजोकि तुश्शो विश्वास जै यीशु मसीह पुड़ आए, तैसेरी चर्चा हर पासे भोने लोरो। 9 परमेशार जेसेरी सेवा अवं अपने पूरे दिले सेइं तैसेरे मट्टेरी खुशखबरी प्रचार केरतां केरताई, तै मेरो गवाहे; कि अवं तुसन कोस तरीके सेइं लगातर प्रार्थनाई मां याद केरताई। 10 ते लगातार अपने प्रार्थनान मां बिनती केरतो राताई, कि केन्चरे हेजू भी तुसन कां एजनेरे लेइ मेरू सफर परमेशरेरे तरफां कामयाब भोए। 11 किजोकि अवं तुसन सेइं मिलनेरे लेइ कोशिश केरताई, कि अवं तुसन कोई आत्मिक वरदान देई, जैस सेइं तुस विश्वासे मां मज़बूत भोए। 12 मतलब इन, कि अवं तुसन कां एइतां तुसन सेइं साथी तैस विश्वासेरे जिरिये, जै मां मां ते तुसन मांए, तैसेरे जिरिये अस हिम्मत हासिल केरम। 13 ते टूलाव ते बेइनव, अवं चाताई तुस ज्ञानथ, कि मां तुसन कां बार-बार एजनु चाव। जेन्चरे मां गैर कौमरे लोकन विश्वास केरनेरे लेइ बढनेरी मद्दत की, तेन्चरे तुश्शी भी मद्दत केरि, पन हुना तगर रुकोरो राव। 14 अवं संस्कारी लोकन ते असंस्कारी लोकन, पढेरे लोकन या अनपड़ लोकन सेबन खुशखबरी शुनेइलो। 15 ते अवं तुसन भी जैना रोम नगरे मां रातथ, खुशखबरी शुनानेरे लेइ हर वक्त तियार आई। 16 किजोकि अवं यीशु मसीहोरी खुशखबरी प्रचार केरने करां न शरमेई, एल्हेरेलेइ परमेशार अपने शक्ति सेइं तैन लोकन मुक्ति देते, जैना खुशखबरी पुड़ विश्वास केरतन, पेइले यहूदन फिरी गैर यहूदन। 17 किजोकि खुशखबरे जिरिये परमेशार असन अपने नज़री मां धर्मी बनाते, जैन शुरू करां आखरी तगर विश्वासे सेइं भोते। जेन्चरे पवित्रशास्त्रे मां लिखोरूए, “जै मैनु विश्वासेरे जिरिये सेइं परमेशरेरे सामने धर्मी बनाव गाते तैए ज़ातो रालो।” 18 परमेशरेरो क्रोध तैन लोकन पुड़ स्वर्गां एइते, जैना बुरां ते दुष्टां कम्मां केरतन, ते जैना सच्चे अर्धमे सेइं दबेइतां रखतन। 19 किजोकि परमेशरेरे बारे मां ज्ञान तैन मैनु केरे मन्न मां बांदूए, एल्हेरेलेइ कि परमेशरे तैन पुड़ बांदू कियोरूए। 20 किजोकि तैसेरे आहरे गुण, मतलब तैसेरी सदारी शक्ति, ते परमेशरेरो सुभाव दुनियाई

बनानेरे वक्तेरे देंतो तैसेरे कम्मन सेइं हेरने मां एइते, इडी तगर कि तैन लोकन कां कोई बहानो नई। (aidios g126) 21 हालांकि तैनेई परमेशार त पिशानो, पन परमेशरेरी तैस काबल बडयाई न की, ते न शुक्र कियूं, पन बेकार सोचने लाए, इडी तगर कि तैन केरो बेअक्ल मन आंधरो भोव (मतलब तैना गलत सोचने लगे)। 22 तैना अपने आपे अक्लमन्द सेमझतां बेवकूफ बने। 23 ते न मरने बाले परमेशरेरी महिमा मरने बाले मैनु, ते चुड़ो लू ते जानवरां, ते पेटेरे भारे चलने बाले जीपां केरे मूरतन मां बदली। 24 एल्हेरेलेइ परमेशरे तैना तैन केरे मनेरे खुवैइशां केरे मुताबिक अशुद्ध भोनेरे लेइ शारे कि, एप्पू मांमेइं अपने जानां केरी अनादर केरन। 25 किजोकि तैनेई परमेशरेरी सच्चाई बेदलतां झूठ बनाई, ते सृष्टारी पूजा ते आराधना केरि, न कि तैस बनाने बालेरी, जै हर वक्त धन ते रोड़ोए। आमीन। (aiōn g165) 26 एल्हेरेलेइ परमेशरे तैना नीच खुवाइशन मां शारे, इडी तगर कि तैन केरि कुआन्शोई भी स्थाविक कम्मां बेदलतां तैन केरे जैना स्थाविक आन तैन केरे खलाफ बदला। 27 तेन्चरे तैन केरे मडद भी कुआन्शन सेइं सुभाविक कम्मां शैरतां एप्पू मांमेइं गंदे कम्मन मां मसत भोए, मतलब कि मडदेइं, मडदन सेइं रिशतो रेखतां प्रभु करां ठीक बदलो नेव। 28 ते तैनेई इन जेइज न समझू कि परमेशरे कबूल केरन, एल्हेरेलेइ परमेशरे भी तैना तैन केरे मनेरे हालती पुड़ शारे; कि बुरां कम्मां केरन। 29 ते तैना हर किसमेरे अर्धमे, दुष्टे, लालचे, बैरे सेइं भेरोई जे; ते कपट, ते खून केरनो, ते लड़ाई केरनि, ते धोखो देनो, ते जलनी सेइं भेरोए, ते चोगलखोर, 30 बदनाम केरनेबाले, परमेशरे सेइं नफरत केरनेबाले, जैन केरि इज़्जत केरी लोडे तैन केरि इज़्जत न केरनेबाले, घमण्डी, बडकां मारनेबाले, बुरी-बुरी गल्लां बनाने बाले, अम्मा बैपू केरो हुकम न मन्नेबाले। 31 बेवकूफ, धोखो देनेबाले, सच्चे प्यारे करां खाली, दया न केरनेबाले भोइजेइ। 32 हालांकी तैना परमेशरेरो ई हुकम ज्ञातन, कि एरां जेरां कम्मां केरनेबाले मौतरे सज़ारे लाइकन, फिरी भी न सिर्फ एप्पू एरां कम्मां केरतन बल्के एरां कम्मां केरनेबालन सेइं भी खुश भोतन।

2 एल्हेरेलेइ हे दोष लाने बाला, तू कोई की न भोस; तीं कां कोई बहानो नई, किजोकि जैस गल्लरो तू होरन पुड़ दोष लातस, तैस्से गल्लरी पुड़ तू अपनो आप भी दोषी बनातस, एल्हेरेलेइ तू एप्पू भी तैने कम केरतस। 2 ते अस ज्ञानतम कि, जैना एरां कम्मां केरतन परमेशार तैन केरो इन्साफे केरतां तैन सज़ा देते। 3 ते हे मैनु, तू जै बुरां-बुरां कम्मां केरनेबालन पुड़ दोष लातस, ते एप्पू भी तैने कम केरतस; कुन तू समझतस, कि तू परमेशरेरे सज़ाई करां बचेलो? 4 कुन तू परमेशरेरी कृपा, ते बरदाश केरनू, ते सबरा धन घटया समझतस, ते कुन इन न समझस, कि परमेशरेरी कृपा तीं पापन करां मन फिरानो शिखालतीए? 5 पन तू जिद्दी आस ते अपने पापन करां मन फिरानेरो इन्कार केरतस, जैस दिहाड़े परमेशार अपनो क्रोध हिरालो, तैस मां परमेशरेरो सच्चो इन्साफ बांदो भोलो, त परमेशार तेरो रोड़ेचारे इन्साफ केरेलो। 6 परमेशार हर एककी तैसेरे कम्मां केरे मुताबिक बदलो देलो। 7 जैना लोक रोड़ां कम्मां केरतां परमेशरेरी तरफां मैलने बैली महिमा, ते आदर, ते कथे न

खतम भोने बाली जिन्दगरे तोपी मां रातन, परमेशरे तैन हमेशारी जिन्दगी देलो। (aiōnios g166) 8 पन जैना खुदगारज़न, ते सच्चे न मन्नेबालेन, बल्के बुराई केरनि चातन, तैन पुड़ परमेशरेरो क्रोध, ते कोप एज्जेलो। 9 ते मुसीबत ते दुःख हर एक्की मैन्हु पुड़ एज्जेलो जै बुराई केरते। परमेशर पेड़लो यहूदी लोकां केरो इन्साफ केरेलो फिरी गैर यहूदी लोकां केरो इन्साफ केरेलो। 10 हर अक मैन्हु जै रोड़ां कम्मां केरते तैस महिमा, आदर, ते शान्ति मैलेली, पन परमेशर इना सैरी चीजां पेड़ले यहूदी लोकन देलो फिरी गैर यहूदी लोकन। 11 किजोकि परमेशर केन्चेरी तरफदारी न केरे। 12 एल्हेरेलेइ कि जैन गैर कौमारे लोकेई बगैर मूसेरो कानून मेलतां पाप कियो, परमेशर तैन बगैर मूसेरो कानूने सज़ा देलो, ते जैनेई मूसेरो कानून मेलतां पाप कियो, परमेशर तैन सज़ा भी मूसेरे कानूनेरे मुताबिक देलो। 13 किजोकि परमेशरेरे नज़री मां मूसेरो कानून शुनेने बाले धर्मी नई, बल्के मूसेरे कानूने पुड़ चलने बाले धर्मी ठहराए गानेन। 14 फिरी जैखन होरि कौमां केरे लोक जैन कां मूसेरो कानून नई, सुभावे सेइं किछ मूसेरे कानूनेरे गल्लन पुड़ चलतन, ते मूसेरो कानून तैन कां न भोनेरे बावजूद भी अपने लेइ एप्पू कानून आन। 15 तैना इन हिरातन कि परमेशरेरो कानून तैन केरे दिलन मां लिखोरोए, ते तैन केरे ज़मीर भी इस गल्ली पुड़ गवाही देतन, किजोकि तैन केरे अपने खियाल भी तैन पुड़ दोष लातन या बेइलज़ाम ठहरातन। 16 एरू तेइस भोलू ज़ेइस परमेशर जै खुशखबरी मां शुनावरीए तैसेरे मुताबिक यीशु मसीहरे ज़िरिये मैन्हु केरि छेपोरी गल्लां केरो इन्साफ केरेलो। 17 तू एप्पू जो यहूदी ज़ोतस, ते मूसेरे कानूने पुड़ तेरो विश्वासे, ते तू अपने आपे पुड़ घमण्ड केरतथ, कि तू परमेशरेरो खास मैन्हु आस। 18 ते तू परमेशरेरी मज़ीं ज़ानतस, ते तू इन भी ज़ानतस कि कोनां गल्लां रोड़ी आन, किजोकि तीं इना गल्लां केरू ज़ान मूसेरे कानूने करं मैलोरीन। 19 ते तू भरोसो रखतस, कि तू कान्न परमेशरेरी बत हिरानेबालोस, ते जैना आंधरे मां आन तैन केरे लेइ लोअरो ज़ेरे आस। 20 ते बेअक्लन शिखालने बालोस, ते बच्चां केरो उस्तादातस, ते तीं पक्को पतो कि परमेशरेरो कानून तीं पूरू ज़ान ते सच्चाई शिखालते। 21 ते जैन तू होरन शिखालतस, अपने आपे की न शिखालस? तू होरन शिक्षा देतस कि चोरी नई केरनि, कुन तू चोरी केतस? 22 तू जै ज़ोतस, “बदमाशी नई केरनि,” कुन तू बदमाशी केरतस? तू जै मूरतन सेइं नफरत केरतस, कुन तू मन्दरन लुटतस? 23 तू जै घमण्ड केरतस कि तू परमेशरेरे कानूने ज़ानतस, एप्पू किजो कानून न मेन्तां, परमेशरेरी तुहीन केरतस? 24 “किजोकि तुश्शे यहूदी लोकां केरे वजाई सेइं गैर कौमन मां परमेशरेरे नंब्वेरी तुहीन भोतीए,” एल्हेरेलेइ पवित्रशास्त्रे मां एरू लिखोरूए। 25 अगर तू मूसेरे कानूने पुड़ चलस, त खतनो कराने सेइं तीं फेइदो त आए, पन अगर तू मूसेरो कानून न मन्स त तीं मां ते तैस मां, ज़ेसेरो खतनो नई भोरो कोई फर्क नई। 26 ते अगर कोई मैन्हु ज़ेसेरो खतनो न भोए भोरो, त तै मूसेरे कानूने पुड़ चले, त परमेशरेरे लेइ तै मैन्हु ते ज़ेसेरो खतनो भोरोए दुइये बराबर आन। 27 ते जैस मैनेरो खतनो नई भोरो, अगर तै मूसेरे कानूने पूरू केरे, त तै तीं दोषी

ठहरालो। किजोकि तीं कां मूसेरो कानूने ते तेरो खतनो भी भोरोए, पन फिरी भी तू कानूने पुड़ न चलस। 28 किजोकि सच्चे यहूदी तै नई ज़ेसेरू ज़र्म यहूदन मां भोरू या ज़ेसेरो खतनो भोरोए। 29 बलके सच्चे यहूदी तैए, ज़ेसेरो मन परमेशरे कां सच्चेओए, ते सच्चे खतनो तैए जै पवित्र आत्मा के कम्मां केरे ज़िरिये दिलेरो भोरोए, न की मूसेरो कानून मन्ने सेइं भोरोए। एरे लोकां केरि बड़याई लोक नई बल्के परमेशर एप्पू केरते।

3 (किछ लोक पुछतन) यहूदी केरि कुन बड़याई, या खतनेरो कुन फेइदो? 2 हर किसमे सेइं बड़ू किछ। पेड़लू त इन कि सारू परमेशरेरू वचन तैन सोंफू। 3 अगर किछ यहूदी परमेशरे कां ईमानदार न निस्से त कुन भोव? कुन तैन केरे ईमानदार न राने सेइं परमेशर तैन केरे लेइ अपने वादे पूरे केरने मां झूठो भोव? 4 नई, कथे नई! बल्के परमेशर हमेशा सच ज़ोते, ते हर अक मैन्हु झूठो भोव, जेन्चरे पवित्रशास्त्रे मां परमेशरेरे बारे मां लिखोरूए, “जैस सेइं तू एपनी गल्लन मां धर्मी भोस, ते इन्साफेरे वक्ते तीं ज़ीत मैल्ले।” 5 अगर इश्शां बुरां कम्मां परमेशरेरी धार्मिकता ठहराते, त अस कुन ज़ोम? कुन इन कि परमेशर क्रोध केरते ते असन सज़ा देते। (इन अव इन्सानेरी रीति पुड़ ज़ोताई)। 6 नई, कथे नई! अगर परमेशर इश्शो यहूदी केरो इन्साफ रोड़े चारे न केरेलो, त तै किजो दुनियारो इन्साफ केरेलो? 7 किछ ज़ोतन, अगर मेरे झूठेरे वजाई सेइं परमेशरेरी सच्चाई बांदी भोतीए ते तैसेरी महिमा भोतीए, त फिरी किजो पैपी केरो ज़ेरो मीं पुड़ हुक्म दित्तो गाते? 8 “एज्जा, अस बुराई केरम, कि इस सेइं भलाई पैदा भोए?” पन असन पुड़ दोष भी लव गाते, ते केत्रे ज़ोतन, कि एन केरू भी एने ज़ोनू आए। पन एरे ज़ेरेन पुड़ दोष लानो ठीक आए। 9 त फिरी अस कुन ज़ोम? कुन अस यहूदी होरन करं रोडेम? नई, कधी नई; किजोकि असेईं यहूदी लोकन पुड़ ते गैर यहूदी लोकन पुड़ ई दोष लोरोए, कि तैना सारे पापेरे कब्जे मां आन। 10 जेन्चरे पवित्रशास्त्रे मां लिखोरूए, “कोई परमेशरेरे सामने धर्मी नई, अक भी नई। 11 कोई सच्चे समझदार नई, कोई परमेशरे तोपने बालो नई। 12 सारे परमेशरे करं दूर भोरेन, सारे निकम्मे बनोरेन, कोई भलाई केरनेबालो नई, अक भी नई। 13 तैन केरू गल खुल्ली कब्रे, तैनेई अपने ऐशी सेइं धोखो दित्तो, तैन केरे ओठन पुड़ सप्पां केरू ज़ेरे। 14 ते तैन केरू भाषण लानती, ते टूलिठे सेइं भेरतांए। 15 तैन केरे पव खून केरने लेइ तेज्जन। 16 तैना ज़ेरां भी गातन तुबाही ते कलेश तैन पती गाते। 17 तैन न ज़ानन शैन्ति सेइं केन्चरां जीतन। 18 तैन मां परमेशरेरो डर बिलकुल भी नई।” 19 अस ज़ानतम, कि मूसेरो कानून जैन किछ ज़ोते, तैन्ने सेइं ज़ोते, जैना तैस मन्तन, एल्हेरेलेइ कि केन्ची कां कोई बहानो न भोए, ते सारी दुनिया परमेशरेरे सज़ारे लायिक भोए। 20 किजोकि मूसेरे कानूनेरे मुताबिक कम्मां केरने सेइं कोई मैन्हु परमेशरेरे सामने धर्मी नई भोनो, एल्हेरेलेइ कि मूसेरे कानूने सेइं पिशान भोतीए कि अस पापी आम। 21 पन हुनी बगैर मूसेरो कानून मन्ने सेइं तै धार्मिकता बांदी भोरीए जै परमेशरेरे तरफां एइतीए, ज़ेसेरे बारे मां मूसेरे कानूने ते नेबी केरि किबातन मां लिखोरूए। 22 मतलब परमेशरेरी तै धार्मिकता जै यीशु

मसीह पुड़ विश्वास करेनेबालां केरे लेइए; किजोकि तैन मां किछ भेद भाव नई। 23 एल्हेरेलेइ कि सेबभेई पाप कियो, ते तैस महिमा करां दूर आन जै परमेशर देते। 24 पन परमेशरे अपने अनुग्रहे सेइं अस पापां केरि सजाई करां यीशु मसीहेरे ज़िरिये छुटाए ते मुफ्ते मां धर्मी ठहराए। 25 परमेशरे मसीहेरे खूनेरे वजाई सेइं अक एरो छुटकारो ठहराव, जै विश्वास करेने सेइं फैइदामंद भोते, कि ज़ैना पाप पेइले केरे, ते ज़ैना परमेशरे अपने बर्दाशती सेइं टाले; तैन केरे बारे मां तै अपनि धार्मिकता बांदी केरते। 26 बल्के इस्से वक्ते तैसेरी धार्मिकता बांदी भोए; कि ज़ैस सेइं तै एप्पू धर्मी ठहरे, ते जै यीशु पुड़ विश्वास केरे, तैसेरो धर्मी ठहराने बालो भोए। 27 ते घमण्ड केरनू कोइ राव? तैसेरी त ठारे नई। कोस कानूनेरे वजाई सेइं? कुन मूसैरो कानून मन्ने सेइं? नई, बल्के विश्वासेरे वजाई सेइं। 28 एल्हेरेलेइ अस ज्ञानतम, कि मैन्हु मूसैरो कानूनेरे मुताबिक कम्मां केरनेरे बगैर यीशु मसीह पुड़ विश्वास केरने सेइं धर्मी भोते। 29 कुन परमेशर सिर्फ यहूदी केरोए? कुन गैर कौमां केरो नई? हाँ गैर कौमां केरो भी आए। 30 किजोकि अक्के परमेशरे, जै खतने बालन भी विश्वासे सेइं, ते ज़ैन केरो खतनो नई भोरो तैन भी विश्वासे सेइं धर्मी ठहरालो। 31 ते कुन अस विश्वासे सेइं मूसैरे कानूने रद केरतम? नई, कथे नई; बल्के मूसैरे कानूने बनोरू रखतम।

4 त अस कुन ज़ोम, कि इश्शे पूर्वज अब्राहमे कुन मैल्लू? 2 किजोकि अगर अब्राहम रोड़े कम्मन सेइं धर्मी ठहरावरो भोथो, त तैस घमण्ड केरनेरी ठार भोथी, पन रोड़ां कम्मां केरू घमण्ड परमेशरेरे सामने नई। 3 पवित्रशास्त्र कुन ज़ोते, इन कि “अब्राहमे परमेशरेरे वादन पुड़ विश्वास कियो, ते तै तैसेरेलेइ धार्मिकता गनो जेव।” 4 कम केरनेबालेरी मजदूरी देनी दान नई, पन हक समझू गाते। 5 पन ज़ै (पुन्नेरू) कम न केरे बल्के पापी मैन्हु धर्मी ठहराने बाले पुड़ विश्वास केरते, तैसेरो विश्वास तैसेरेलेइ धार्मिकता गनो गाते। 6 ज़ैस परमेशर बगैर (पुन्नेरे) कम्मां केरे धर्मी ठहराते, तैस दाऊद भी धन ज़ोते। 7 “धने तै ज़ेसेरे अधर्म माफ़ भोए, ते ज़ैन केरे पाप ढके जे। 8 धने तै मैन्हु ज़ैस परमेशर पापी न ठहराए।” 9 ते इन धन ज़ोनू, कुन खतने बालां केरे लेइ आए, या ज़ैन केरो खतनो नई भोरो तैन केरे लेइ भी आए? अस पवित्रशास्त्रे मरां ज़ोतम, “अब्राहमे परमेशरेरे वादन पुड़ विश्वास कियो ते तै तैसेरेलेइ धार्मिकता गनो जेव।” 10 इन तैसेरो खतनो भोने करां पेइलू भोव न कि खतनो भोनेरे बाद। 11 परमेशरे तै पेइलो कबूल कियो ते धर्मी ठहराव, ज़ेइस हेजू तैसेरो खतनो न थियो भोरो, ते तैस खतनेरो निशान मैलो, कि तैस धार्मिकता पुड़ छाप भोए, किजोकि तै तैन सेबभी केरो (आत्मिक) बाजी ठहरे ज़ैना विश्वास त केरतन पन तैन केरो खतनो नई भोरो। तैना भी तैन केरे विश्वासेरे वजाई सेइं धर्मी भोन। 12 ते ज़ैन केरो खतनो भोरोए तैन केरो पूर्वज भोए, ज़ैन केरो न सिर्फ खतनो कियोरोए, पन ज़ैन इश्शे पूर्वज अब्राहमेरो ज़ेरो विश्वास आए, ज़ै तैनी बगैर खतनेरी हालती मां कियोरी थियो। 13 परमेशरे अब्राहमे ते तैसेरे वंश सेइं वादो कियोरो थियो कि

तैना दुनियारे बारस भोले। ई वादे एल्हेरेलेइ नई दित्तोरो कि अब्राहमे मूसैरो कानून मन्नो, बल्के तैसेरो विश्वास ज़ै परमेशरे पुड़ थियो तैसेरे वजाई सेइं तै धर्मी ठहराव जेव। 14 ज़ै वादो परमेशरे दित्तोरो थियो कि तैना दुनियारे बारस भोले अगर मूसैरो कानून मन्ने सेइं आए, त फिरी विश्वास बेमतलब, ते वादो बेकार भोव। 15 परमेशर तैस पुड़ क्रोध केरते ज़ै कानूने रोड़े चारे न मन्ने, ते ज़ैडी कानून नई, तैडी तैसेरू ट्लोइनू भी नई। 16 एल्हेरेलेइ परमेशरेरे वादे विश्वासेरे ज़िरिये हासिल भोतन, ताके तैना वादे अनुग्रहेरे ज़िरिये पक्के भोन, ते सारे वादे अब्राहमेरे वंशेरे लेइ आन, न सिर्फ यहूदी केरे लेइ, ज़ैना मूसैरू कानून मन्तन बल्के तैन सेबभी केरे लेइ भी आन, ज़ैना अब्राहमेरो ज़ेरो विश्वास केरनेबालन, तैए इश्शो सेबभी केरो पूर्वज। 17 जेन्चरे पवित्रशास्त्रे मां लिखोरूए, “मीं तू बेडि कौमां केरो पूर्वज बनेवरोस” परमेशरे पुड़ तैन विश्वास कियो, ते ज़ै मुडदन ज़ीतो केरते ते ज़ैना चीज़ां वाजूद नई, तैन भी हाज़र केरते। 18 परमेशरेरे वचनेरे मुताबिक कि “तेरू खानदान एरू भोलू” तैना बेडि कौमां केरे पूर्वज भोन। तैनी न उमीदी मां भी उमीदी रेखतां विश्वास कियो, 19 ते अब्राहम ज़ै लगभग 100 सालेरो थियो, अपने मरे जानी, ते सारारे मरे पेटेरे हालीती पुड़ भी विश्वासे मां कमज़ोर न भोव। 20 ते गैर विश्वासी भोइतां परमेशरेरे वादे पुड़ शक न की, पन विश्वासे मां मजबूत भोइतां परमेशरेरी बड़याई की। 21 ते तैस पूरो भरोसो भोव, कि ज़ैस गल्लरो वादो परमेशरे कियोरोए, तै तैस पूरो केरनेरी शक्ति भी रखते। 22 अब्राहमेरो विश्वास तैसेरेलेइ धार्मिकता गनो जेव। 23 ते ई वचन, “विश्वास तैसेरेलेइ धार्मिकता गनो जेव,” न सिर्फ तैसेरेलेइ लिखो जेव। 24 बल्के इश्शे लेइ भी ज़ैन केरे लेइ विश्वास धार्मिकता गनो जेव, मतलब इश्शे लेइ ज़ैना अस परमेशरे पुड़ विश्वास केरतम, ज़ैने इश्शो प्रभु यीशु मसीह मुडदन मरां ज़ीतो कियो। 25 यीशु इश्शे पापां केरे लेइ मारनेरे लेइ ट्लुवाव जेव, ते असन धर्मी ठहरानेरे लेइ परमेशरे ज़ीतो भी कियो।

5 एल्हेरेलेइ असां विश्वासे सेइं धर्मी भोए, ते ज़ैन किछ इश्शे प्रभु यीशु मसीहे इश्शे लेइ कियोरू तैसेरे ज़िरिये इश्शो मेल मलाप परमेशरे सेइं भोरोए। 2 ते इश्शे विश्वासेरे वजाई सेइं मसीहे अस इस अनुग्रहे तगर पुजाए, ज़ैडी अज़ अस खड़े भी आम, ते असां पूरे याकीने ते आनन्दे सेइं परमेशरेरी महिमा बंटनेरे लेइ उमीदी मां रातम। 3 सिर्फ एन्ने नई, बल्के मुसीबतन मां भी अस आनन्द केरम, किजोकि अस ज्ञानतम कि मुसीबतन सेइं सबर बढ़ती। 4 परमेशर असन रोड़े समझते किजोकि केन्चरे सबर केरनि असेईं शिखोरिए, ते तै असन रोड़े समझते तांए असन उमीदे। 5 ई उमीदी असन शरमिन्दा न केरे, किजोकि पवित्र आत्मा ज़ै परमेशरे असन दित्तोरोए तैसेरे ज़िरिये सेइं तैसेरो प्यार इश्शे दिलन मां भरोरोए। 6 किजोकि ज़ैखन अस अपनो आप बचानेरे लेइ कमज़ोर थिये, त मसीह परमेशरेरे ठहरावरे वक्ते पुड़ इश्शे पैपी केरे लेइ मरो। 7 केन्ची धर्मी मैनेरे लेइ भी कोई मरे, इन बडू मुशकले, पन शैइद केन्ची धर्मी मैनेरे लेइ कोई अपनि जान देनेरी जुरत केरे। 8 पन परमेशरे

अपनो महान प्यार एन्चरे बांदो कियो, कि ज़ैखन असां पापी थियो तैखन मसीह इश्शे लेइ मरो। 9 ते अस तैसेरे खूने सेइं धर्मी ठहरे, त मसीहरे ज़िरिये सेइं परमेशरेरे हमेशारी सज़ाई करां ज़रूर बचमेले 10 किजोकि ज़ैखन अस परमेशरेरे दुश्मन थियो त तैसेरे मट्टे मौती सेइं इश्शो मेल तैस सेइं भोव, ते फिरी मेल मलाप भोरोए त तैसेरे ज़िन्दगी सेइं असन पक्की मुक्ति मैलेली। 11 ते सिर्फ इन्ने नई, पन हुनी प्रभु यीशु मसीहरे ज़िरिये सेइं इश्शो मेल परमेशरे सेइं भोरोए, एल्हेरेलेइ अस परमेशरे मां आनन्द केरतम। 12 एल्हेरेलेइ ज़ेन्चरे एक्की मैनेरे ज़िरिये यानी आदमेरे ज़िरिये पाप दुनियाई मां अव, ते पापे सेइं मौत आई, ते एन्चरे मौत सेबभी मैनन मां फेली। किजोकि सेबभई पाप केरो। 13 मूसेरो कानून देने करां पेइले पाप दुनियाई मां त थियो, पन ज़ैडी कानून नई, तैडी पाप गनो न गाए। 14 फिरी भी आदमे करां मूसा तगर सेबभी लोकेई पाप कियो ते सब लोक मरे, ज़ैन लोकेई तैस आदमेरो ज़ेरो पाप न कियो तैना भी मरे, आदम मसीहरो ज़ेरो थियो, ज़ै मसीह एजनेबालो थियो। 15 पन परमेशरेरु वरदान आदमेरे पापेरु ज़ेरु नई, इन सच्चे कि एक्की मैन्हु यानी आदमेरे पापेरे वजाई सेइं बडे लोक मरे। पन परमेशरेरे अनुग्रह त कने तैसेरु वरदान बडे लोकां केरे लेइ महान आए ज़ैन एक्की मैन्हु यानी यीशु मसीहरे अनुग्रहे सेइं एइते। 16 ज़ैन वरदान परमेशरे असन दित्तु तैन आदमेरे पापेरु ज़ेरु नई, किजोकि एक्की मैनेरो पाप सज़ा घिन्तां अव। पन हालांकी असेईं भी बडे पाप कियोरेन फिरी भी परमेशरे असन एरु वरदान दित्तोरुए ज़ैन असन परमेशरेरी नज़री मां धर्मी ठहराते। 17 किजोकि एक्की मैनेरे पापेरे वजाई सेइं सब लोक मरे, त ज़ैन लोकन अनुग्रहेरु ते धार्मिकतारु बडू वरदान एक्की मैनेरे ज़िरिये मैलते, तैना लोक ज़ीते राले ते एक्की मैन्हु यानी यीशु मसीहरे ज़िरिये राज़ केरेले। 18 एल्हेरेलेइ ज़ेन्चरे एक्की मैनेरो पाप सेबभी मैनेरु केरे लेइ सज़ा आनते, तेन्चरे मसीहरे धार्मिकतारु कम सेबभी मैनेरु केरे लेइ धर्मी ठहराने लेइ वजा बनू, ज़ैस सेइं ज़िन्दगी मैलतीए। 19 किजोकि ज़ेन्चरे एक्की मैनेरे हुक्म न मन्ने सेइं बडे लोक पापी भोए, तेन्चरे एक्की मैनेरे हुक्म मन्ने सेइं बडे लोक धर्मी भोले। 20 मूसेरो कानून एल्हेरेलेइ दित्तोरो थियो कि सारे लोकन पतो लग्गे कि तैना केत्रे पापिन। पन ज़ेन्चरे लोकेई ज़ेत्रे जादे पाप कियो तेन्चरे परमेशरेरो अनुग्रह तैस करां भी बडो जादे भोव, 21 कि ज़ेन्चरे सेबभी लोकेई पाप कियो ते मरे, तेन्चरे परमेशरेरो अनुग्रह राज़ केरते ते परमेशरे अस इश्शे प्रभु यीशु मसीहरे वजाई सेइं धर्मी ठहरावरेम। मतलब असन हमेशारी ज़िन्दगी मैलेली।

(aiōnios g166)

6 त अस कुन ज़ोम? कुन अस पाप केरते रहम, कि परमेशरेरो अनुग्रह बढतो गाए? 2 नई, कधी नई! अस ज़ैखन पापेरे लेइ मरे ते फिरी किजो अग्रोव जो पापे मां ज़िन्दगी बीताम? 3 तुस ज़ानतम कि ज़ैखन असेईं सेबभी लोकेई यीशु मसीह सेइं साथी अक भोनेरे लेइ बपतिस्मो नीयोरो थियो, तैखन अस तैस सेइं साथी मरे थियो। 4 ज़ैखन असेईं

बपतिस्मो नीयोरो थियो तैखन अस मसीह सेइं साथी मरे ते दबे जे, ताके अस भी नर्वी ज़िन्दगी ज़ीम, ज़ेन्चरे मसीह बाजी परमेशरेरी महिमा सेइं मुडदन मरां ज़ीतो कियो। 5 किजोकि अगर अस बपतिस्मेरे ज़िरिये मसीहरी मौती मां शामिल भोरेम, त अस भी पक्के तैसेरे ज़ेरे ज़ीते भोमेले। 6 अस ज़ानतम कि इश्शी पुरानी इन्सानयत यीशु मसीह सेइं साथी क्रूसे पुड़ चाढोरीए, ताके पापेरो जिसम बेफाइदो भोए, ते अस अग्रोव जो पापेरे गुलामी मां न रहम। 7 ज़ैखन मैन्हु मरते त तैखन तै पापेरी शक्ति करां आज़ाद भोते। 8 एल्हेरेलेइ अगर अस मसीह सेइं साथी मरे, ते इश्शो विश्वास ईए कि तैस सेइं साथी ज़ीते भी भोमेले। 9 किजोकि अस एन ज़ानतम, कि मसीह मुडदन मरां ज़ीतो भोरोए ते तै फिरी न मरेलो, ते तैस पुड़ फिरी मौतरु राज़ नई भोनु। 10 ज़ैखन मसीह मरो त तै एक्की बार सेबभी केरे पापेरे लेइ मरो; पन हुनी तै ज़ीतोए, ते सिर्फ परमेशरेरे लेइ ज़ीतोए। 11 एन्चरे तुस अपने बारे मां भी सोचा कि तुस पापेरे लेइ त मरोरेथ, पन यीशु मसीहे तुसन ज़िन्दगी दित्तोरीए ते तुस परमेशरेरे लेइ ज़ीते आथ। 12 एल्हेरेलेइ तुस अपने जानी मां पापेरी इच्छान राज़ केरने न देथ, ते तुस तैन केरे मुताबिक न चला। 13 ते अपने जिसमेरे अंगन बुरे कम्मां केरे लेइ पापे न सोंफा, पन अपने आपे मुडदन मरां ज़ीते सेमझतां परमेशरे सोंफा। ते अपने जिसमेरे अंगन धार्मिकतारे कम्मां केरे लेइ परमेशरे सोंफा। 14 ते तुसन पुड़ पापेरु राज़ न भोलू, किजोकि तुस मूसेरे कानूनेरे अधीन नई बल्के अनुग्रहेरे अधीन आथ। 15 त कुन भोव कि अस एल्हेरेलेइ पाप केरम, कि असां मूसेरे कानूनेरे अधीन नई बल्के अनुग्रहेरे? नई, कथे नई। 16 तुस ज़ानथ, कि ज़ैखन तुस ज़ेसेरो हुक्म मन्नेरे लेइ अपनो आप गुलामां केरे ज़ेरे सोफतथ त तुस तैसेरे गुलाम आथ। चाए पापेरी ज़ेसेरो अन्त मौते, चाए हुक्म मन्नेरे ज़ेसेरो अन्त धार्मिकताए। 17 तुस त पेइले पापेरे गुलाम थियो पन हुनी तुसन ज़ै शिक्षा मैलोरी थी तैस पूरे दिले सेइं मन्नेबाले भोए, एल्हेरेलेइ अवं परमेशरेरु शुक्र केरताई। 18 ते हुनी परमेशरे तुस पापेरी शक्ति करां छुटेइतां आज़ाद कियो, ते तुस परमेशरेरे गुलाम बने ताके तुस ज़ैन रोडू तैन केरि बटथ। 19 अवं ई मिसाल एल्हेरेलेइ इस्तेमाल केरने लोरोई, किजोकि तुश्शे लेइ इन समझनू मुश्किले। ज़ेन्चरे तुसेईं पेइले अपनो आप गुलामेरे ज़ेरो बुरां कम्मां केरे लेइ अधर्म ते बुरेइरे लेइ सोंफोरे थियो, तेन्चरे हुनी तुस अपने आपे परमेशरेरी सेवारे लेइ सोंफा ताके तुस पूरे तरीके सेइं तैसेरे भोथ। 20 ज़ेइस तुस पापेरे गुलाम थियो, त तुसन परमेशर खुश केरनेरी कोई ज़रूरत न थी। 21 तुसन पुरैनी ज़िन्दगी सेइं कुन फैइदो मैलो? सिर्फ तुस शरमातथ, किजोकि ज़ैन तुसेईं कियु तैसेरो नितीजो सिर्फ मौते। 22 पन हुनी तुस पापे करां आज़ाद भोरेथ ते तुस परमेशरेरे दास बनोरेथ। किजोकि इना गल्लां तुसन पवित्र बनैली ते तुसन हमेशारी ज़िन्दगी मैलेली। (aiōnios g166) 23 किजोकि पापेरी मज़दूरी त मौते, पन परमेशेरु वरदान इश्शे प्रभु यीशु मसीह मां हमेशारी ज़िन्दगी आए। (aiōnios g166)

7 हे ढूलाव ते बेडनव, कुन तुस न ज्ञानथ अवं मूसेरो कानून ज्ञाने बालन सेइं जोताई, कि ज्ञांतगर मैनू ज्ञांतो रहते, तांतगर तैस पुड मूसेरे कानूनेरो अधिकार भोते? 2 मिसालरे तोरे पुड, इलावरी कुआन्श कानूनेरे मुताबिक ज्ञांतगर तैसेरो मुन्श ज्ञांतोए तांतगर तैसेरी पाबंदे। पन अगर मुन्श मेरि गाए, त तै मुन्शेरे कानूने करां छुटी जेई। 3 ते अगर मुन्श हेजू ज्ञांतो ते होरि मडदेरी भोए त तै बदमाश भोतीए, पन मुन्श मेरि गाए, त तैसेरे कानूने करां छुटी, इडी तगर कि होरि मडदेरी भोए, फिरी भी बदमाश न ठहरेली। 4 हे ढूलाव ते बेडनव, जैखन तुस मसीह सेइं साथी मरे, त तुस कानूनेरे लेइ मरे। हुनी तुस मसीहेरे आथ जै मुडदन मरां ज्ञांतो कियोरोए, ताके तुस परमेशेरे लेइ फलदार जिन्दगी ज़ीथ। 5 किजोकि जेइस अस अपने सुभावेरे मुताबिक चलते थिये, त पापी सुभाव असन मां कम केरतो थियो, ते कानूने तैना पापी इच्छां उकसेइं, ते ज़ैन किछ असेईं कियूं तैसेरो फल मौत थियो। 6 पन जेसेरे बंधने मां अस थिये, तैसेरेलेइ मेरतां, हुनी कानूने करां ए छुटोरेम, पन आत्माे नव्वे तरीके पुड सेवा केरतम, न कि लफसन सेइं। 7 त अस कुन ज़ोम? कुन मूसेरो कानून पापे? नई, कधी नई! बल्के बगैर मूसेरे कानूने अवं पापे न पिशैनी, अगर मूसेरो कानून न ज़ोथो कि “लालच न केर” त अवं लालच न ज़ैनेथो। 8 पन पापे मौको लेइतां हुकमे सेइं मीं मां हर किसमेरू लालच पैदा कियूं, किजोकि बगैर मूसेरे कानूने पाप मरों आए। 9 अवं त मूसेरे कानूने बगैर पेइलो ज्ञांतो थियो, पन ज़ैखन हुकम अव, त पाप ज्ञांतो भोव ते अवं मरो। 10 ते तैए हुकम जै जिन्दगरे लेइ थियो, मेरे लेइ मौतरी वजा बनो। 11 किजोकि पापे मौको मेलतां हुकमे सेइं मीं धोखो दित्तो, ते तैस सेइं अवं आत्मिक तोरे पुड मरो। 12 एल्हेरेलेइ मूसेरो कानून पवित्र आए, ते हुकम भी पवित्र, ठीक ते रोडोए। 13 ते कुन ज़ै चीज़ रोडी थी मेरे लेइ मौत बनी? नई, कथे नई! पन पापे तैस रोडी चीज़ी सेइं मेरे लेइ मौत पैदा केरतां अवं मारो, कि तैसेरो पाप भोनों बांदो भोए, ते हुकमे सेइं पाप बडो जादे बुडोए। 14 किजोकि अस ज्ञानतम कि मूसेरो कानून त आत्मिके, पन अवं जिसमानी ते पापेरो गुलाम भोनेरे लेइ बिकोरोई। 15 ते ज़ैन अवं केरताई, तैस न ज़ैनी, किजोकि ज़ैन अवं चाताई, तैन न केरि, पन ज़ैस सेइं मीं नफरते, तैन्ने केरताई। 16 ते अगर, ज़ैन अवं न चेई तैने केरताई, त अवं मनताई, कि मूसेरो कानून रोडो आए। 17 ते एस हालती मां बुरी चीज़ां केरनेबालो अवं नई, बल्के पापे, ज़ै मीं मांए। 18 किजोकि अवं ज्ञानताई, कि मीं मां मतलब मेरे जिसमे मां कोई रोडी चीज़ नई, रोडू केरनेरी इच्छा त मीं मां आए, पन मीं करां न केरोए। 19 किजोकि ज़ैस रोडे कम्मरी इच्छा अवं केरताई, तैन मीं करां न बने, पन ज़ैस बुरेइयरी इच्छा भी न केरि तैस केरताई। 20 पन अगर अवं तैन्ने केरताई, जेसेरी इच्छा न केरि, ते तैन केरनेबालो अवं नई, बल्के पापे ज़ै मीं मांए। 21 ते मीं ई कानून मैलते, कि ज़ैखन रोडे कम्मरी इच्छा केरताई, त अवं बुराई केरताई। 22 किजोकि अवं ज़मीरे सेइं त परमेशेरे कानूने सेइं बडो खुश भोताई। 23 पन मीं अपने जिसमेरे अंगन मां होरि जेरो कानून लेइहोते, ज़ै मेरी अक्लरे कानूने सेइं लइते, ते मीं

पापेरे गुलैमेरे कानूने मां छडते ज़ै मेरे जिसमेरे अंगन मांए। 24 अवं केरो नुभाघ मैनू आई, मीं इस जिसमे करां ज़ै मौतरे पासे नेते कौन छुटालो? 25 अवं परमेशेरेरू शुक्र केरताई ज़ैने यीशु मसीहेरे ज़िरिये अवं बचाव, ते अवं अपनि अक्ली सेइं त परमेशेरे कानूनेरो इस्तेमाल केरताई, पन अपने जिसमे सेइं पापेरी कानूनेरो इस्तेमाल केरताई।

8 एल्हेरेलेइ हुनी ज़ैना मसीह यीशु मां आन, तैन पुड सज़ारो हुकम नई। 2 किजोकि पवित्र आत्मा तुसन जिन्दगी देलो, ज़ै यीशु मसीह करां एइती ते तै तुसन पाप ते मौती करां आज़ाद केरेलो। 3 किजोकि ज़ैन कम कानूने इश्शे पापी सुभावेरे वजाई सेइं कमज़ोर भोइतां न केरि बटु, तैन परमेशेरे कियूं, मतलब अपने मट्टे इश्शे पैपी केरो जेरो भोनेरे लेइ, ते पापेरे बलिदानेरे लेइ भेजू, परमेशेरे मसीहेरे जिसमे मां पापेरी सज़ा दिती। 4 परमेशेरे एन एल्हेरेलेइ कियूं ताके अस अपने पापी सुभावेरे मुताबिक नई, पन पवित्र आत्माे मुताबिक चलतां ज़ै हुकम कानून देते तैस केरि बटम। 5 किजोकि ज़ैना लोक पापी सुभावेरे मुताबिक जिन्दगी बीतातन, तैना पापेरे बारे मां सोचतन, पन ज़ैना लोक पवित्र आत्माे मुताबिक जिन्दगी बीतातन, तैना आत्मिक गल्लां केरे बारे मां सोचतन। 6 अगर इश्शो मन इश्शे पापी सुभावेरे मुताबिक चलते त अस मरमेले, पन अगर इश्शो मन आत्माे मुताबिक चलते त असन कां जिन्दगी ते शान्ति मैलेली। 7 किजोकि पापी सुभावेरे मुताबिक चलनू परमेशेरे सेइं बैर रखनोए, किजोकि न त पापी सुभाव परमेशेरे कानूनेरे अधीने, ते न कानूनेरे मुताबिक चले बटते। 8 ते ज़ैना पापी सुभावेरे मुताबिक चलतन तैना परमेशेरे खुश न केरि बटन। 9 पन ज़ैखन परमेशेरो आत्मा तुसन मां बरसते, ते तुस पापी सुभावेरे मुताबिक न चलथ बल्के पवित्र आत्माे मुताबिक चलतथ, अगर कोन्वी मां पवित्र आत्मा नई त तै मसीहेरो मैनू नई। 10 ते अगर मसीह तुसन मांए, त जिसम पापेरे वजाई सेइं मरेलो, पन आत्मा धार्मिकतारे वजाई सेइं ज्ञांतोए। 11 ते अगर तैसेरी आत्मा ज़ैने यीशु मुडदन मरां ज्ञांतो कियो तुसन मांए। ते ज़ै मसीह तैने मुडदन मरां ज्ञांतो कियो, तैए तुश्शे भी नाश भोनेबाले जिसमे अपनि आत्मा सेइं ज्ञांतो केरेलो, ज़ै तुसन मांए। 12 हे ढूलाव ते बेडनव, असेईं एन्चरे न लोडे ज़ीयेरू जेन्चरे अस अपने पापी सुभावेरे मुताबिक ज़ीनू चातम, पन असेईं एन्चरे ज़ीयोरू लोडे जेन्चरे परमेशेरो आत्मा चाते। 13 किजोकि अगर तुस अपने पापी सुभावेरे मुताबिक ज़ीले त तुस मरेले, पन अगर तुस पवित्र आत्माे मुताबिक चलेले त तुस अपने पापी सुभावरां कम्मां केरनां बंद केरेले ते फिरी तुस ज्ञांतो राले। 14 किजोकि जेन्ने परमेशेरे आत्माे चलाने सेइं चलतन तैना परमेशेरे बच्चेन। 15 किजोकि ज़ै आत्मा तुसन मैलोरोए तुसन फिरी गुलाम बेनतां रानेरे लेइ नई, बल्के तै तुसन परमेशेरे बच्चे बनाते। तैसेरे ज़िरिये अस परमेशेरे जो हे अब्बा, हे बाजी ज़ोतम। 16 पवित्र आत्मा एप्पू इश्शी आत्मा सेइं मिलतां गवाही देते, कि अस परमेशेरे बच्चेम। 17 किजोकि अस परमेशेरे बच्चेम ते असां तैना बरकतां हासिल केरमेले ज़ैना परमेशर अपने लोकां केरे लेइ रेखोरिन, ते मसीहेरे लेइ भी ज़ैन परमेशेरे रेखोरूए, तैन भी अस

मसीह सेईं साथी हासिल केरमेले; किजोकि अगर अस मसीहेरे जेरे दुःख झूलमेले त अस भी मसीहे साथी महिमा हासिल केरमेले। 18 मीं पूरू याकीने, कि जैना दुःख अस झूल्लने लोरेम, तैस महिमारे सामने, जै परमेशर असन देनेबालोए, किछ भी नई। 19 किजोकि सैरी रचनारी चीजां बडे बे सबरी सेईं तैस वक्तेरो इंतज़ार केरने लोरिन, कि जेइस परमेशरे इन बांदो केरनू तैसेरे सच्चे बच्चे कौन आन। 20 किजोकि जैन किछ परमेशरे बनाव, तैन सैरी चीजेईं अपने कीमत गवाइ, एल्हेरेलेइ नई कि तैना अपने आप चैती थी, पन परमेशरे एन भोने दित्तू। पन फिरी भी उमीदे। 21 कि सृष्टि एप्पू भी खुश आए कि विनाशे करां छुटकारो हासिल केरतां, परमेशरेरे बच्चां केरे महिमारी अजैदी मां खुशी मनाली। 22 किजोकि अस ज्ञानतम कि सारी सृष्टि मिलतां हुना तगर कर लातीए ते तकलीफा मां तडफतीए, जेन्चरे दोर्जांती गल्हे बिशनेरी तकलीफ भोतीए। 23 सिर्फ तैना नई पन अस भी जैन एजने बैली महिमारो पेइले फलेरो स्वाद चखनेरे लेइ पवित्र आत्मा दित्तो, पन अस हेजू भी परमेशरेरे वक्ते बलगने लोरेम जैखन परमेशर अपने बच्चे केरे रूपे मां कबूल केरेलो, ते असन जिसमेरे बुरैईं करां छुटकारो देलो। 24 हुनी परमेशरे असन मुक्ति दित्तोरीए, असन ई उमीदे। पन अगर तुस कोन्ची चीजी हासिल केरनेरे लेइ उमीद केरथ जै तुसन कां पेइली आए, त फिरी तै उमीद नई। किजोकि जैस चीजी कोई हेरने लोरोए तैसेरी उमीद कुन केरे? 25 पन जैस चीजी अस न लहम, अगर तैसेरी उमीद रखतम, त सबरी सेईं तैस बलगत भी रातम। 26 एन्चरे पवित्र आत्मा इशशी मदत केरते जैखन अस परमेशरे पुइ भरोसो रखने मां कमजोर भोतम, किजोकि अस न ज्ञानम, कि प्रार्थना केन्चरे केरतन; पन पवित्र आत्मा एप्पू कर लेइतां जै बयानेरे बेइरे, इशशे लेइ बिनती केरतीए। 27 ते परमेशर जै मनां केरो ज्ञान्ने बालोए ज्ञानते, कि पवित्र आत्मा कुन लोरो ज्ञोने। किजोकि तै पवित्र लोकां केरे लेइ परमेशरेरे मेर्जी सेईं बिनती केरते। 28 ते अस ज्ञानतम, कि जैना लोक परमेशरे सेईं प्यार केरतन, परमेशर तैन केरे लेइ सब गल्लां केरे जिरिये भलाई पैदा केरते; मतलब तैन केरे लेइ जैना तैनी अपने मेरजारे मुताबिक चुनोरेन। 29 किजोकि तैने जैना पेइले चुने, ते पेइले ठहराए भी कि तैसेरे मट्टेरे रूपे मां भोन, ताके तै बडे ढलान मां जेठो भोए। 30 फिरी जैना तैने पेइले ठहराए, तैना चुने भी, ते जैना चुने, तैना धर्मी भी ठहराए, ते जैना धर्मी ठहराए तैन महिमा भी दित्तोरीए। 31 ते अस एन गल्लां केरे बारे मां कुन जोम? अगर परमेशर इशशे पासे, ते इशशे खलाफ कौन भोइ बटते? 32 परमेशरे अपनू मट्टू भी अपने लेइ न रखवू, बल्के तैन इशशे सेबभी केरे लेइ तैसेरे दुश्मना केरे हवाले दित्तू, ते तै मसीह सेईं असन तैन सब किछ देलो जेसेरो वादो तैने असन सेईं कियोरोए। 33 अस परमेशरेरे चुनोरम, कोई असन पुइ परमेशरेरे सामने दोष न लेईं बटे, किजोकि तैए जैने अस धर्मी ठहरावरेम। 34 फिरी कौने जै सजारो हुकम देलो? कोई नई, यीशु मसीह तैए जै मरो, बल्के मुइदन मरां जीतो भोव, ते परमेशरेरे देइने पासे, ते इशशे लेइ बिनती भी केरते। 35 कौन असन मसीहेरे प्यारे करां अलग केरि बटते? मुसीबत या

तंगी, या जुलम, या काल, या नगूपन, या खतरो, या तलवार? इन मरां कोई भी चीज असन मसीहेरे प्यारे करां अलग न केरि बटे। 36 जेन्चरे पवित्रशास्त्रे मां लिखोरूए, “तेरे लेइ अस हर वक्त मौतरे खतरे मां रातम; अस मैरोने बैली भैड्ठां केरे जेरे गने जोरेम।” 37 पन जैने असन सेईं प्यार कियोरोए, तैसेरे जिरिये असन पूरे तरीके सेईं एन सैरी बुरी गल्लां पुइ जीत हासिल आए। 38 किजोकि मीं पूरू याकीने, कि न मौत, न जिन्दगी, न स्वर्गदूत, न हकोमतां, न जै वक्त चलोरोए, न एजनेबालो वक्त, न शेक्ति, न उचार, 39 न दुघार ते न कोई होरि सृष्टि, असन परमेशरेरे प्यारे करां जै इशशे प्रभु यीशु मसीह मांए अलग केरि सकेली।

9 अवं मसीह मां सद्य जोताई, झूठ न जोई, ते मेरो ज़मीर भी पवित्र आत्माई मां गवाही देते। 2 कि मीं बडो दुःखे, ते मेरो दिल लगातार मेरे लोकां केरे लेइ उदास भोते। 3 किजोकि मेरे यहूदी ढला ते बेइनां केरे लेइ, अवं हमेशारे लेइ श्रापित भोथो ते मसीह करां अलग भोथो अगर तैन इस वजाई सेईं तैन मुक्ति मैलती। 4 तैना इस्राएलिन; ते तैना परमेशरेरे लेपलक बच्चे भोनेरे लेइ चुनोरेन, ते परमेशरेरे अपने महिमा तैन पुइ बांदी की। ते तैनी तैस सेईं करार कियो, ते तैन मूसेरो कानून दित्तो। ते तैनी तैन अपने आराधना ते अपने खूबसूत वादे पूरे केरनेरे लेइ हासिल केरनेरो मौको दित्तो। 5 अब्राहम, इसहाक ते याकूब तैन केरे दादे पइदादे थिये, ते मसीह भी जिसमेरे लिहाजे सेईं तैने मरां अवं, तै परमेशरे ते सेबभन करां बाए जै सेबभन पुइ राज़ केरते, तैसेरी महिमा हमेशा भोती राए। आमीन। (aiōn g165) 6 पन इन नई, कि परमेशरेरू वचन टलू कि, सारे जैना इस्राएलेरे वंशन, तैना सब सच्चे इस्राएली नई। 7 ते न अब्राहमेरे वंश मां ज़र्म भोने सेईं सब परमेशरेरे बच्चे भोन। पन पवित्रशास्त्रे मां परमेशर अब्राहमे सेईं जोते, “जैना इसहाकेरे वंशे मरां पैदा भोले तैन्ने तेरू वंश मन्नु गालू।” 8 मतलब जैना कुदुरती तरीके सेईं ज़र्म घिन्तन तैना परमेशरेरे बच्चे नई, पन सिर्फ वादेरे बच्चे अब्राहमेरे बच्चे गने गातन। 9 किजोकि वादेरू वचन इने, “अवं एग्री साल इस वक्ते फिरी एज्जेलो, ते सारारू अक मट्टू भोनूए।” 10 ते सिर्फ एन नई, पन जेइस रिबका भी एक्की सेईं मतलब इसहाके सेईं दोर्जांती थी ते तैसेरे पेदे मां दूई बच्चे थिये। 11 ते हेजू तगर तैना बच्चे न थिये ज़मोरो, ते न तेनेईं रोडू या बुरू कियेरू थियूं, कि परमेशरे रिबका सेईं ज़ोवं, तेरू बडू मट्टू निकडेरी सेवा केरेलू। परमेशरे एन एल्हेरेलेइ ज़ोवं कि एन हिराए, कि तै अपने मेर्जी सेईं फैसले केरते ते इन तैन मट्टां केरे रोडां या बुरे कम्मां केरे वजाई सेईं न थियूं। 13 जेन्चरे पवित्रशास्त्रे मां लिखोरूए, “मीं याकूबे सेईं प्यार कियो, पन एसावोरो इन्कार कियो।” 14 ते अस कुन जोम, कि परमेशर बेइन्साफे कि ते जैस चाते चुनते? नई, कथे नई। 15 किजोकि परमेशर मूसे सेईं जोते, “अवं जैस केन्ची पुइ दया केरनि चैईं, तैस पुइ दया केरेलो ते जैस पुइ तरस केरनो चैईं तैस पुइ तरस केरेलो।” 16 एल्हेरेलेइ परमेशर तैस चुनेलो जैस पुइ तै दया हिरानी चाते; तैसेरी इच्छा लोक जैन चातन या केरनेरी कोशिश केरतन तैस पुइ निर्भर नई। 17 किजोकि पवित्रशास्त्रे मां परमेशरे मिसरे राजे फ़िरौन सेईं

जोवं, “मीं तू एल्हेरेलेइ राजा बनोरोस, कि तीं मां अपनि शक्ति हिरेई, ते मेरे नंवेरो प्रचार सैरी ज़मीनी पुड़ भोए।” 18 ते ज़ैस पुड़ ते चाते, तैस पुड़ दया केरते; ते ज़ैस चाते ढीठ केरते। 19 ते किछ लोक मीं सेइं ज़ोले, “अगर एन्चरे, त फिरी परमेशर केन्चरे फैसलो केरि बटते कि अस गलत आम? एल्हेरेलेइ कोई भी तैस ज़ैन ते चाते केरने करां न रोकी बटे।” 20 हे मैन्हु, तू कौन आस, ज़ै तू परमेशरे सेइं बेंस केरतस? कुन बानोरी चीज बनाने बाले सेइं जोई बटतीए, “तीं अवं एरी किजो बनाई?” 21 कुन कुम्हारे मिती पुड़ अधिकार नई, कि एककी लुनदे मरां, अक भांड आदरारे लेइ बनाए, ते होरू नरादराए लेइ बनाए? 22 (परमेशरे अपने बनावरो लोकन सेइं ज़ैन ते चाए तैन केरनेरो अधिकारे) ज़ैना नाश भोनेरे काबल थिये, तैन केरे खलाफ परमेशर अपनो क्रोध हिरानो ते अपनि सामर्थ्य बांदी केरनेरी चातो थियो, पन तैसेरे बदले मां तैनी सबर की। 23 (तैनी एन कियूं) किजोकि ते हिरानू चातो थियो (मसीहेरे मौतरे बलिदानेरे ज़िरिये) ते केत्रो महान आए, ज़ैखन ते तैन लोकन पुड़ दया केरते ज़ैना तैनी अपनि महिमा मां शामिल भोने लेइ चुनोरेन। 24 मतलब असन पुड़ ज़ैना तैने न सिर्फ यहूदन मरां बल्के गैर कौमन मरां भी चुने। 25 जेन्चरे ते होशे नेबेरे किताबी मां ज़ोते, “ज़ैना मेरे लोक न थी, तैन अवं अपने लोक ज़ोलो। ते ज़ैना लोक मेरे टलारे न थिये, तैन जो टलारे ज़ोइलो। 26 ते तैस्से ठैरी ज़ैडी परमेशरे ज़ोरू थियूं, तुस मेरे लोक नई, तैस्से ठैरी ज़ींतो परमेशर तैन ज़ोलो तुस मेरे बच्चे।” 27 ते यशायाह नबी इस्राएली लोकां केरे बारे मां ज़ोते, “चाए इस्राएलेरी कुटमेरी गिनती समुद्रे किनारे रेतरी ज़ेरि बडी जादे भोली फिर भी तैन मरां थोड़े बच्चेले। 28 किजोकि प्रभु जल्दी दुनियारे सेब्वी लोकां केरो सेखती सेइं इन्साफ केरेलो।” 29 जेन्चरे यशायाह नेबे पेइलू भी ज़ोरू थियूं, “कि सर्वशक्तिमान परमेशरे इश्शे लेइ इश्शू वंश न बाचाथो, त अस सदोम ते अमोरा नगरां केरे ज़ेरे भोने थिये, ज़ैना परमेशरे पूरे तरीके सेइं बरबाद कियां।” 30 ते अस कुन ज़ोम? इन कि ज़ैना गैर कौमां केरे लोक ज़ैना धार्मिकता न थी तोपते, तैनेई धार्मिकता हासिल की, मतलब ते धार्मिकता ज़ै विश्वासे सेइं आए। 31 पन इस्राएली लोक मूसेरो कानून मेन्तां परमेशरेरे करां धर्मी जुवानू चाते थिये, पन तैन न भोइ बटु। 32 किजो नई? एल्हेरेलेइ कि तैना विश्वासे सेइं नई, पन मूसेरो कानून मेन्तां धर्मी भोनेरी कोशिश केरते थिये, तैनेई तैस ठोकर खानेबाले घोड़े सेइं ठोकर खाइ। 33 जेन्चरे पवित्रशास्त्रे मां लिखोरूए; “तका अवं सिय्योने मां अक ठेस लानेबालो घोड़, ते ठोकर खाने बाली चट्टान रखताई; ते ज़ै तैस पुड़ विश्वास केरेलो, ते शरमिन्दा न भोलो।”

10 हे ढूलाव ते बेइनव मेरे मनेरी इच्छा ते इस्राएली लोकां केरे लेइ परमेशरे कां मेरी ई प्रार्थनाए, कि तैन मुक्ति मैल्ले। 2 अवं ज्ञानताई कि तैना परमेशरेरे लेइ जोशे मां रहतन, पन सच्चे ज्ञाने सेइं नई। 3 किजोकि तैना तैस धार्मिकताई करां अनज्ञान राए ज़ै परमेशरे तरफां मैलतीए, ते तैनेई अपनि धार्मिकता बनानेरी कोशिश की, एल्हेरेलेइ तैनेई

अपनो आप परमेशरेरी धार्मिकतारे अधीन न कियो। 4 किजोकि मसीहे ते मकसद पूरो कियोरोए ज़ेसेरे लेइ मूसेरो कानून दित्तोरो थियो, ताके ज़ै कोई मसीह पुड़ विश्वास केरे ते परमेशरेरी नज़री मां धर्मी भोए। 5 किजोकि मूसे इन लिखोरूए, “ज़ै मैन्हु तैस धार्मिकता मुताबिक चलते ज़ै कानूनेरे ज़िरिये आए, ते तैसेरे ज़िरिये सेइं ज़ींतो रालो।” 6 पन ज़ै धार्मिकता विश्वासे सेइं आए, तैसेरे बारे मां पवित्रशास्त्र इन ज़ोते, “तू अपने मने मां इन न जोइयां कि स्वर्ग पुड़ कौन चढ़ेलो?” (मतलब मसीह आन्ने) 7 या इन न जोइयां “पाताले मां कौन गालो?” (मतलब मसीह मुड्डन मरां ज़ींतो केरतां बा आने) (Abyssos g12) 8 पन पवित्रशास्त्र इन ज़ोते “परमेशरेरू वचन तेरे नेड़े, ते तेरे ऐशी मां ते मने मां आए,” इन तैन वचने ज़ैन असन परमेशरे पुड़ विश्वास केरनेरे बारे मां ज़ोते, जेसेरो अस प्रचार केरतम। 9 अगर तू अपने ज़बाना यीशुए, प्रभु ज़ेनतां मन्सस ते अपने दिल सेइं विश्वास केरस, कि परमेशरे ते मुड्डन मरां ज़ींतो कियो, त तीं परमेशर पक्की मुक्ति देलो। 10 किजोकि इश्शे विश्वासेरे ज़िरिये सेइं अस परमेशरेरी नज़री मां धर्मी भोतम, ते इश्शे इकरार केरने सेइं मुक्ति मैलोरीए। 11 किजोकि पवित्रशास्त्र इन ज़ोते, “ज़ै कोई तैस पुड़ विश्वास केरे, ते शरमिन्दा न भोलो।” 12 इन एल्हेरेलेइ आए कि यहूदन ते गैर कौमन मां कोई फर्क नई, किजोकि परमेशर सेब्वी केरो प्रभुए; ते ज़ैना तैसेरू नवं घिन्तन ते तैन बरकत देते। 13 जेन्चरे पवित्रशास्त्र ज़ोते, “ज़ै कोई प्रभुएरू नवं घिन्नेलो, तैस मुक्ति मैलेली।” 14 पन प्रभु पुड़ लोकेई विश्वास न कियो त तैना तैसेरू नवं किजो घिन्न? ते ज़ेसेरे बारे मां तैनेई शुनोरू नई तैस पुड़ केन्चरां विश्वास केरेले? ते अगर तैसेरे बारे मां कोई प्रचार न केरे त तैना केन्चरां शुनी बटतन? 15 ते अगर कोई प्रचार केरनेरे भेजो न गाए त तैना केन्चरे शुनेई बटतन? जेन्चरे पवित्रशास्त्र ज़ोते, “तैन केरे पव केत्रे रोडेन, ज़ैना खुशखबरी शुनातन!” 16 पन सेब्वेई ते खुशखबरी कबूल न की। यशायाह नबी ज़ोते, “हे प्रभु कोई इश्शे सन्देशे पुड़ विश्वास न केरे।” 17 एल्हेरेलेइ मसीहेरे बारे मां सन्देश शुन्नेरे बगैर कोई भी तैस पुड़ विश्वास न केरि बटे। 18 पन अवं पुछतई, “कुन इस्राएली लोकेई न शुनू?” हॉ तैनेई ज़रूर शुनू, पन पवित्रशास्त्रे मां लिखोरूए “तैन केरू वचन सैरी ज़मीनी पुड़, ते तैन केरि गल्लां दुनियारे हर पासे पुजोरिन।” 19 अवं फिरी पुछतई, कुन इस्राएली लोकेई तैन वचन न समझू? पेइलो त प्रभुए मूसेरे ज़िरिये ई जुवाब देते, “अवं तैन केरे ज़िरिये ज़ै कौम नई, इस्राएली लोकन जलन करालो, अवं बेवकूफ गैर कौमां केरे लोकां केरे ज़िरिये तुसन सरकालो।” 20 फिरी यशायाह बड़े दिलेरी सेइं परमेशरेरे लेइ ज़ोते, “ज़ैना मीं न थी तोपते, तैन अवं मैलो, ते ज़ैना मीं पुछते भी न थी, तैन पुड़ अवं बांदा भोव।” 21 पन इस्राएलेरे बारे मां परमेशर इन ज़ोते, “अवं हुक्म न मन्नेबाले ते बेंस केरनेबाले लोकन सैरी दिहैडी कुजातो राव।”

11 एल्हेरेलेइ अवं पुछतई, कुन परमेशरे अपने लोक शारे? नई, कधे नई! अवं भी त इस्राएली आई, अब्राहमेरे खानदाने ते बिन्यामीनेरे गोत्रे मरां आई। 2 परमेशरे अपने तैना लोक न शारोरे, ज़ैना तैने पेइले

चुने, कुन तुस न ज्ञानथ, कि पवित्रशास्त्र एलिय्याहेरे बारे मां कुन ज्ञोते, कि एलिय्याह नेबे इस्राएली लोकां केरे खलाफ परमेशरे कां बिनती केरते? 3 तैने ज़ोवं “हे प्रभु, तैनेई तेरे नबी मारे, ते तेरी बलिदान केरनेरी ठारां बरबाद की, ते सिर्फ अवं ए ऐकैलो बच्चोरोई ज़ै तीं मन्ने बालोई, हुनी तैना मीं भी मारने चातन।” 4 पन परमेशरे एलिय्याहे जुवाब दित्तो, “मीं अपने लेइ 7000 मड़द रखोरेन, ज़ैनेई बाल देबतेरे मूरती कां मथ्यो नई टेकोरो।” 5 एन्चरे इस वक्ते भी थोडे ज़ेरे लोक बज़ोरेन, ज़ैना परमेशरे अपने अनुग्रह वजाई सेइं चुनोरेन। 6 अगर इन परमेशरेरे अनुग्रहे सेइं भोरुए, ते फिरी मूसरे कानूनेरे मुताबिक कम्मन केरने सेइं नई, नई त फिरी अनुग्रह, अनुग्रह न राव। 7 ते फिरी नितीजो कुन भोव? कि इस्राएली ज़ेसेरी तोपी मां आन, तै तैन न मैलो; पन चुनोरेन मैलो, ते होरे बाकी लोक सखत कियोरेन। 8 जेन्चरे पवित्रशास्त्रे मां लिखोरुए, “परमेशरे अज़्जरे दिहाड़ी तगर तैन केरो मन ते दिल सुस्त कियो, ते एरी एछ्छे दित्ती कि ताके तैना लेई न बटन, ते एरे कन ताके तैना शुनी न बटन।” 9 ते राज़ो दाऊद ज़ोते, “अवं परमेशरे कां प्रार्थना केरताई कि तै तैन केरे तिहारन मां टलेइ बटे ते फसाए, ते परमेशर तैन झुकाए ते तैन सज़ा देइ बटे। 10 ते तैन केरि एछ्छन पुड़ आंथरु भोए, ताके तैना लेई न बटन, ते परमेशर तैन, तैन केरि परेशेनी केरे वजाई सेइं दुखी केरि बटे।” 11 त अवं पुछतई, कुन यहूदी लोक ठोकर लगनेरे वजाई सेइं हमेशारे लेइ बिछड़े? नई, कधे नई! पन तैन केरे विश्वास न केरनेरे वजाई सेइं गैर कौमन मुक्ति मैल्ली ताके तैन जलन भोए। 12 ते अगर तैन केरे विश्वास न केरनेरे वजाई सेइं गैर कौमरे लोकां केरु भलू भोवं, हकीकति मां गैर कौमां केरे लेइ बड़ू रोड़ू भोलू जेइस यहूदी लोक परमेशरे कां वापस एज्जेले। 13 अवं तुसन गैर कौमरे लोकन सेइं एन ज़ोताई। कि अवं गैर कौमरे लोकां केरो प्रेरित आई, ते अपने सेवारे बारे मां घमण्ड केरि। 14 ताके अवं कोन्ची तरीके सेइं अपने लोकन जलन करेइतां तैन मरां किछन मुक्ति दूवेई। 15 किजोकि इस्राएली लोकां केरु शारू गानू दुनियारे लोकां केरे लेइ मेल मिलापेरी वजा बनी, ते तैन केरु यीशु कबूल केरनू कि तै मसीह आए, एन एरू भोलू जेन्चरे मुड़देरू ज़ींतू भोनू! 16 ते किजोकि पूर्वज अब्राहम ते दादे पड़दादे पवित्र थिये ते तैन केरि खानदानी भी पवित्र भोली, ज़ैखन चड़तलरो पेइलो पेइडो परमेशरेरे लेइ च़ाढ़नेरे वजाई सेइं पवित्र भोरुए, त पूरू सन्नोरू अटू भी पवित्र भोरुए, ते ज़ैखन ज़ील पवित्र भोवं, त डाल भी पवित्ररन। 17 इस्राएली लोक ज़ैतूनेरे बुटेरे डैलडी केरे ज़ेरे आन ते इश्शे दादे पड़दादे अब्राहम, इसहाक ते याकूब एस बुटेरे ज़ीलां केरे ज़ेरे आन, ते अगर किछ डैलडी ट़लोडी जेई, त तुस गैर कौमरे लोक जंगली ज़ैतूनेरे ज़ेरे आथ, ते तुस तैस असली ज़ैतूने मां कलम कियोरेथ ते ज़ीलां केरे खुराकारे हकदार भोरैथ। 18 त तीं तैन डैलडन पुड़ ज़ैना ट़लोडी जेई ते शैरी जेई तैन पुड़ घमण्ड न लोडे कियोरु, ते अगर तू घमण्ड केरस त याद रख कि तू ज़ीलन नई, पन ज़ील तीं सुमभालते। 19 फिरी तू ज़ोलो, “डैलडी एल्हेरेलेइ ट़लोडी, कि अवं कलम भोई।” 20 इन सच्छे, तैना त विश्वास न केरनेरे वजाई सेइं ट़लोडी

जेई, पन तू विश्वासे सेइं बनोरो रातस, एल्हेरेलेइ घमण्ड न केर, पन डर केर। 21 किजोकि परमेशरे असली डैलडन पुड़ दया न की, त तुसन पुड़ भी दया न केरेलो ज़ैना कलम कियोरेथ। 22 एल्हेरेलेइ परमेशरेरी दया ते सखती हेर! ज़ैना पाप केरनेरे वजाई सेइं झड़े तैन पुड़ सखती, पन तेरे लेइ दया, ते तू अपने आपे पुड़ तैसेरी दया बनोरी राने दे, नई त तू भी कटो गालो। 23 ते अगर यहूदी लोक फिरी विश्वास केरन, त कलम केरे गानेन किजोकि परमेशर एन केरनेरे लेइ शक्ति बालो आए। 24 किजोकि अगर तू तैस ज़ैतून, ज़ै सुभावे सेइं जंगलीए कटो जेव, ते ज़ै असलीए तैसेरे खलाफ रोडे ज़ैतूने मां लव जेव, ते इना असली डैलडी आन अपने ज़ैतून मां किजो न लेई गैली। 25 हे ढूलाव ते बेइनव, अवं न चेई कि तुस गैर कौमरे लोक अपने बारे मां घमण्ड केरेथ। इस्राएली लोकन सेइं कुन भोव, अवं एस भेदेरे बारे मां तुसन सेइं ज़ोताई, कि ज़ांतगर गैर कौमां केरे बड़े लोक मसीह कां न एजन, तांतगर किछ इस्राएली लोकां केरो दिल सखत रालो। 26 ते एन्चरे सैरी इस्राएली लोकन मुक्ति मैल्लीए; जेन्चरे पवित्रशास्त्रे मां लिखोरुए, “छुटानेबालो सिय्योनेरां (यरूशलेम) एज्जेलो, ते अभक्ति इस्राएली लोकन करां दूर केरेलो। 27 ते तैन सेइं मेरो ई करार भोलो, कि अवं तैन केरे पाप माफ़ केरेलो।” 28 खुशखेबारा वजाई त तैना तुश्शे लेइ परमेशरेरे बेरिन, पन परमेशरेरे चुनेरे वजाई सेइं ते तैन केरे बुजुर्गन दित्तोरे वचनेरे वजाई सेइं परमेशर तैन सेइं हेजू भी प्यार केरते। 29 किजोकि परमेशरे अपने वरदानन करां ते अपने कुजाने करां कधे अपनो मन न बदले। 30 किजोकि जेन्चरे पेइले तुसेई परमेशरेरो हुकम न थियो मनोरो, पन हुना इस्राएली लोकां केरे हुकमन मन्ने सेइं तुसन पुड़ दया भोइ। 31 तैना हेजू भी हुकम न मन्नेबालेन कि ज़ै दया तुसन पुड़ भोरीए तैन पुड़ भोली। 32 किजोकि सेब्भी लोकेई हुकम नई मन्नोरो एल्हेरेलेइ तैना कैदी केरे ज़ेरे बनोरेन। पन परमेशरे एन एल्हेरेलेइ कियूं ताके तैन सेब्भन पुड़ दया केरि बटे। (eLeEsE g1653) 33 वाह! परमेशर सेब्भी केरे लेइ भलो आए ते ज्ञानी ते अक्लमन्दे, कोई भी तैसेरे खियालन बियांन न केरि बटे ते कोई तैसेरी बत्तां न सेमझी बटे। 34 जेन्चरे पवित्रशास्त्रे मां लिखोरुए “कोई न ज्ञाने प्रभुएरे मने मां कुने या तैस सलाह देनेबालो कौने? 35 या केने पेइले तैस किछ दित्तू ज़ेसेरो बदलो तैस दित्तो गाए?” 36 किजोकि सब किछ परमेशरेरी तरफां आए। तैनी सब किछ बनाव, ते तैसेरे ज़िरिये, ते तैसेरेलेइ सब किछे। तैसेरी आदर सदा भोती राए। आमीन। (aiōn g165)

12 एल्हेरेलेइ हे ढूलाव ते बेइनव, अवं तुसन कां परमेशरेरी दया याद केरताई बिनती केरतां ज़ोताई, कि अपनि ज़िन्दगी पवित्र, ते ज़ेरू परमेशरे पसंद एइते, बलिदान केरतां च़ाढ़ा; ईए परमेशरेरी आराधना केरनेरो सही तरीको आए। 2 ते इस दुनियारे तरीके पुड़ न च़ला, पन परमेशर तुश्शी सोच बदलेरे ज़िरिये सेइं तुश्शो चालचलन भी बेदलोए, ताके तुस ज्ञानथ कि परमेशर तुसन करां कुन चाते, या ज़ै रोड़ी ते ज़ैन तैस पसंद एइते, ते सिद्ध आए। (aiōn g165) 3 किजोकि अवं तैस परमेशरेरे अनुग्रहेरे वजाई सेइं ज़ै मीं मैलो, तुसन मरां हर एक्की सेइं

जोताई, कि जेन्चरे समझोरू लोडे, तैस करां कोई भी अपनो आप जादे न समझे, यानी कि जेत्रो विश्वास परमेशरे तुसन दित्तोरौए तैसेरे मुताबिक अपने आपे समझा। 4 किजोकि जेन्चरे इशू एककी जिसमे मां बड़े अंगन, ते सेबभी अंगां केरू अक्कां जेरू कम नई। 5 तेन्चरे अस जैना मसीह पुड़ विश्वास केरतम, अस भी तैसेरे जिसमेरे जेरे बने, ते अस तैसेरे अंग आम ते अस एककी होरि सेइं जुड़ोरेम। 6 ते जैखन कि तैस अनुग्रहेरे मुताबिक जै परमेशरे असन दित्तोरूए, असन अलग-अलग वरदाना मैलोरन। ते जैस भविष्यिवैनरू वरदान मैलोरूए, तै विश्वासेरे मुताबिक भविष्यिवाणी केरे। 7 अगर सेवा केरनेरू वरदान मैलोरूए, त होरि केरि सेवाई मां लमगोरो राए, अगर कोई शिखालने बालो भोए, त शिखालने मां लमगोरो राए। 8 अगर तुशू वरदान हिम्मत देने बालू भोए त तुसेई हिम्मत देती लोडे रावरी, अगर कोन्ची दान देनेरू वरदान मैलोरू भोए तैने खुल्ले दिले सेइं लोडे दितोरू, अगर केन्ची अगवाई केरनेबालोए, तै जोशे सेइं अगवाई केरे, ते जै दया केरे तै खुशी सेइं दया केरे। 9 तुशू प्यार सच्चो भोए; बुरैई सेइं नफरत केरा; भलाई केरने मां लमगोरो राथ। 10 भाईचारेरे प्यारे सेइं एककी होरि सेइं प्यार केरा; आदरी सेइं होरन एप्पू करां रोड़ो समझा। 11 मेहनत केरने मां आलस न केरा; आत्मिक जोशे सेइं भेरोरे राथ; पूरे दिले सेइं प्रभुएरी सेवा केरते राथ। 12 जै उमीद तुसन आए तैस मां मघन राथ; मुसीबती मां मजबूत राथ; प्रार्थना केरने मां लगातार लमगोरो राथ। 13 परमेशरेरे लोकन जैन किछ ज़रूरी भोए, तैस मां तैन केरि मद्दत केरा; मेहमानां केरि आदर केरते राथ। 14 अपने सताने बालन बरकत देथ; बरकत देथ फिटकार न देथ। 15 आनन्द केरनेबालन सेइं साथी आनन्द केरा, ते लेरां देने बालन सेइं साथी लेरां देथ। 16 एप्पू मांमेइं मेल मलाप रखा; घमण्ड न केरा; गरीब लोकन सेइं साथी साथ रखा; इन न समझा कि तुस बड़े अक्लमन्द आथ। 17 बुरैइयरे बदले केन्ची सेइं बुराई न केरा; ध्यान देथ ते तैने केरा जैन गल्लां सेबभी केरि नज़री मां रोड़िन। 18 जेत्रू भोइ सकते, सेबभी मैनु सेइं साथी मेल मलाप रखा। 19 हे ट्लारव अपनो बदलो न नेथ; पन परमेशरे तुशू लेइ बदलो नेने देथ, किजोकि पवित्रशास्त्रे मां प्रभु जोते, “बदलो नेनो मेरू कम्मे, ते अक्वें बदलो देइलो।” 20 पन पवित्रशास्त्र जोते “अगर तेरो दुश्मन ढलुखोरो त तैस रोटी खूवा; अगर ट्लिशोरो भोए, त तैस पानी पीया; किजोकि एरू केरने सेइं तू तैस शरमिन्दो केरतस।” 21 बुरैई करां न हारा पन बुराई भलैई सेइं ज़ीतां।

13 हर कोई मैन्हु प्रधान अधिकैरी केरे अधीन राए; किजोकि कोई अधिकार एरो नई, जै परमेशरेरे तरफां न भोए; ते जैना अधिकारी आन, तैना परमेशरे ठहरावरेन। 2 एल्हेरेलेइ जै कोई अधिकैरी केरि खलाफत केरते, तै परमेशरेरे कानूनेरी खलाफत केरते, ते जैना लोक परमेशरेरे कानूनेरी खलाफत केरतन तैन सज़ा मैल्लनीए। 3 किजोकि हेरा हाकिम तैस मैन्हु जै भलाई केरते तैस न डराए, पन तैस मैन्हु डराते जै बुरू कम केरते। अगर तुस हाकिमे करां डरनू न चाथ त भलाई केरते राथ ते तुसन हाकिमे करां शाबाश मैलेली 4 हाकिम परमेशरेरो

सेवके ते तेरू भलू केरनेरे लेइ आए, पन अगर तू बुराई केरस, त तू डर, किजोकि तैस कां तलवार बेफैइदी नई, ते तै परमेशरेरो सेवके; जै बुरू कम केरनेबाले पुड़ कोप आनते। 5 एल्हेरेलेइ हाकिमेरे लेइ तुशू समर्पण ज़रूरी आए न सिर्फ परमेशरेरे सज़ारे वजाई सेइं बल्के तुशू अपने ज़मीरेरे वजाई सेइं। 6 एल्हेरेलेइ थड़त भी देतथ, किजोकि हकोमत केरनेबाले परमेशरेरे सेवकन, ते सदा एस्से कम्मे मां लमगोरो रातन। 7 एल्हेरेलेइ हर केन्चेरू हक देथ, जेसेरी थड़त बनतीए तैस थड़त देथ; जेसेरी चुंगी बनतीए तैस चुंगी देथ; जेसेरी इज़ज़त ते आदर केरी लोडे तैसेरी इज़ज़त ते आदर केरा। 8 एप्पू मांमेइं प्यारेरे अलावा ते केन्ची गल्ली मां कोन्ची चीज़रे कर्ज़दार न राथ; किजोकि जै होरन सेइं प्यार केरते, तैने परमेशरेरे दित्तोरे कानूनेरे हुक्म पूरे किये। 9 किजोकि मूसेरे कानूने मां बड़े हुक्म दित्तोरेन जेन्चरे कि “बदमाशी न केर, कत्ल न केर, ज़ोरी न केरा, लालच न केर,” ते एन केरे अलावा होरो कोई भी हुक्म भोए त तैन सैरी केरि बुनीयाद इस्से गल्ली मांए, “अपने पड़ोसी सेइं अपने बराबर प्यार केरा।” 10 प्यार पड़ोसेरी किछ भी बुराई न केरे, एल्हेरेलेइ जै प्यार केरते ते परमेशरेरो दित्तोरो कानून पूरे केरते। 11 एल्हेरेलेइ वक्त पिशैनतां इन केरा। तुशू लेइ निडली मरां बाँझनेरो वक्त ओरोए, किजोकि जैस वक्ते असेई विश्वास कियोरो थियो, तैस वक्तेरे खियाले सेइं हुनी इशू मुक्ति नेड़ीए। 12 इस बुरे दुनियाई मां रानेरो इशू वक्त लगभग खतम भोरोए, जेन्चरे रात ट्लेकड़ोने बालीए, ते लौ भोने बाली आए ते मसीहेरो वापस एजनेरो वक्त नेडे ओरोए, एल्हेरेलेइ असां तैना कम्मां शारम जैना लोक आंधेरे मां केरतन ते तैना हथियार बंधम जैना लोई मां इस्तेमाल भोतन। 13 एल्हेरेलेइ अस भी तैन लोकां केरो जेरो बर्तव केरम, जैना लोई मां जिन्दगी ज़ीतन न कि आंधेरे मां, न कि नचने, नशो केरने, न बदमाशी केरने मां, ते लुचपने, लडैई, ते जलनी मां मसत भोम 14 बल्के जेन्चरे प्रभु यीशु मसीहे जीवं तेन्चरे तुस भी जीथ, ते जिसमेरी खुवैइशां पूरी केरनेरी कोशिश न केरा।

14 जै विश्वासे मां कमजोरे, तैस तुस कबूल केरा, पन तैस कुन कियेरू लोडे ते कुन न लोडे कियेरू तैस पुड़ बेस केरनेरे लेइ नई। 2 किजोकि एककी विश्वासे, कि सब किछ खानू जेइजे, पन जै विश्वासे मां कमजोरे, तै सिर्फ शागां खाते। 3 सब किछ खाने बालो तैस पुड़ दोष न लाए जै सब किछ न खाए, किजोकि परमेशरे तैना दुइये कबूल कियोरेन। 4 तू कौन आस जै होरेरे नौकरे पुड़ दोष लातस? तैनी खरू कियूं या बुरू इसेरो फेसलो तैसेरो मालिके केरेलो, बल्के तै कामयाब भोलो; किजोकि प्रभु तै इस काबल बनोरोए। 5 एन्चरे किछ लोक एककी दिहाड़ी होरि करां बेधतां मन्तन, ते किछ सब दिहाड़े बराबर मन्तन, हर केन्ची इन याकीन कियेरू लोडे कि जैन तैना सोचतन तैन ठीके। 6 जै कोन्ची दिहाड़े मन्ते, तै प्रभुए इज़ज़त देनेरे लेइ मन्ते। जै सब किछ खाते, तै भी प्रभुए इज़ज़त देनेरे लेइ खाते, किजोकि तै परमेशरेरू शुक्र केरते, ते जै सब किछ न खाए, प्रभुएरे लेइ न खाए ते परमेशरेरू शुक्र केरते। 7 किजोकि असन मरां कोई न अपने लेइ ज़ीते, ते न कोई अपने लेइ मरते।

8 किजोकि अगर अस जीतिम त, प्रभुएरे लेइ जीतिम; ते अगर अस जीम या मरम, अस प्रभुएरेम। 9 किजोकि मसीह एल्हरेलेइ मरो ते जीतो भी भोव, ताके मरौरे ते जीतां दुइयां केरो प्रभु भोए। 10 तू अपने विश्वासी ढूलाए पुइ किजो दोष लातस? या तू फिरी किजो अपने विश्वासी ढूलाए घटिया समझतस? अस सब परमेशरेरे आदालतरे तखतरे सामने खडे भोनेम। 11 जेन्चरे पवित्रशास्त्रे मां लिखोरूए, कि प्रभु जोते, “अवं एण्णु तुसन सेइं वादो केरताई, हर कोई मीं कां जैधू टिकेलो, ते हर अक ज़िभ परमेशेरी इकरार केरेली।” 12 ते असन मरां हर केन्ची अपने-अपने कम्मां केरो लेखो परमेशेरे देलो पेनोए। 13 एल्हरेलेइ अग्रोंवं जो अस एक्की होरि पुइ दोष न लाम, पन तुस एने थापा, कि कोई भी तुशे वजाई सेइं तुशो विश्वासी ढूला या बेइन पाप न केरे। 14 अवं ज्ञानताई, ते प्रभु यीशुएरे तरफां मीं पक्कू याकीन भोवं, कि कोई खानेरी चीज़ अपने आपे सेइं अशुद्ध नईं, पन जै तैस अशुद्ध समझते, तैसेरेलेइ अशुद्ध आए। 15 अगर तेरो विश्वासी ढूलाए या बेइन तेरे खाने सेइं दुःख पुजे ते तै अग्रोंवं जो परमेशेरे पुइ विश्वास केरनो शारे, त फिरी तू प्याररे रीति पुइ न चलस, एरी चीज़ां न खा। जेसेरे लेइ मसीह मरो ते तू अपने खाने सेइं तैस नाश न केरे। 16 एल्हरेलेइ जैन कम तुशे लेइ रोडू आए ते जेइजे, तैसेरे बारे मां होरन तुहीन केरनेरो मौको न दे। 17 किजोकि परमेशेरे राजेजे मां खानू पीनू माईने न रखे; माईने रखते धार्मिकतारी जिन्दगी जीनी ते मेल मलाप, ते आनन्द तै आए जै पवित्र आत्मा देते। 18 जै कोई इस रीति सेइं मसीहेरी सेवा केरते, तैस सेइं परमेशेरे खुश भोते, ते मैन्हु भी तैसेरे बारे मां रोडू जोतन। 19 एल्हरेलेइ असेईं तैना कम्मां कियोरां लोइन जैन सेइं लोक मेल मिलापे सेइं रेइ बटन, ते एक्की होरि विश्वासे मां मज़बूत केरम। 20 तुस जेरू खानू चातथ तैसेरे वजाई सेइं परमेशेरेरू कम न बगाड़ा। सब किछ शुद्ध त आए, पन तुशे खाने सेइं अगर होरो कोई मैन्हु परमेशेरे पुइ विश्वास केरनो शारे त तैसेरेलेइ बुरू आए। 21 रोडू त इन्ने, कि तू न मास खास, ते न शराब पीस, जेसेरे वजाई सेइं तेरे ढूला या बेइन पाप केरे। 22 तेरो इन चीज़ां केरे बारे मां जै विश्वासे, तै तेरे ते परमेशेरे दरमियाने मां आए, धने तैए, जै तैस गल्ली मां, जै तै ठीक समझे, अपने आपे दोषी न ठहराए। 23 पन जै शक केरतां खाते, तै सज़ारे काबल भोइ जेव, किजोकि तै विश्वासे सेइं न खाए, ते जैन किछ केरस ते विश्वास केरस कि एन ठीक नईं त तू पाप केरतस।

15 एन्चरे अस जैना विश्वासे मां मज़बूत आम, असेईं एन कियोरू लोड़े कि जैना विश्वासे मां कमजोर आन तैन केरि मद्दत केरम; न कि अपनो आप खुश केरम। 2 असन मरां हर कोई अपने विश्वासी ढूलान ते बेइन्नु खुश केरनेरे लेइ मद्दत केरे जैस सेइं तैन केरो विश्वास मज़बूत भोए। 3 किजोकि मसीहे भी अपनो आप खुश न कियो, पन जेन्चरे पवित्रशास्त्रे मां लिखोरूए, “तेरे तुहीन केरनेबालोई मेरी भी तुहीन की।” 4 जेत्री गल्लां पेइली पवित्रशास्त्रे मां लिखोरिन, तैना इशे शिक्षारे लेइ लिखोरिन, कि अस सबरी ते पवित्रशास्त्रे करां हिम्मत हासिल केरम ताके असन उमीद भोए (परमेशर तैने केरेलो जेसेरे बारे मां तैनी वादो

कियोरोए)। 5 अवं प्रार्थना केरताई कि परमेशर तुसन सबर ते हिम्मत दे, ताके तुस यीशु मसीह पत्ती चलते-चलते अक भोइतां जीथ। 6 ते तुस सारे अकोट्टे भोइतां अक भोइतां एक्की आवाज़ी मां परमेशर, इशे प्रभु यीशु मसीहेरे बाजेरी बड़याई केरा। 7 एल्हरेलेइ, एक्की होरि कबूल केरा, जेन्चरे मसीहे तुस कबूल कियोरेथ; एल्हरेलेइ एन केरा ताके लोक परमेशेरी बड़याई केरन। 8 अवं जोताई, कि जैना वादे दादन पड़दादन दित्तोरे थिये, तैना वादे पूरे केरनेरे लेइ ते इन बांदू केरनेरे लेइ कि परमेशर सज़ोरो, मसीह खतनो कियोरे लोकां केरो (यानी यहूदी केरो) सेवक बनो। 9 ते गैर कौमां भी परमेशेरे दयारे वजाई सेइं परमेशेरी बड़याई केरन, जेन्चरे पवित्रशास्त्रे मां लिखोरूए, “गैर कौमन मां अवं तेरू शुक्र केरेलो, ते तेरे नर्वेरू भजन केरेलो।” 10 फिरी होरि ठैरी लिखोरूए, “हे गैर कौमां केरे लोकव, परमेशेरे लोकन सेइं साथी आनन्द केरा।” 11 ते फिरी पवित्रशास्त्रे जोते, “हे गैर कौमां केरे लोकव, प्रभुएरी बड़याई केरा; ते हे मुलखां-मुलखां केरे सब लोकव; तैसेरी बड़याई केरा।” 12 ते फिरी यशायाह नबी पवित्रशास्त्रे मां लिखोरूए; “यिशैरू अक वंश निसेलू ते तै गैर कौमन पुइ हकोमत केरेलो। तैस पुइ गैर कौमां उमीद रेखेली।” 13 अवं प्रार्थना केरताई परमेशर जै उमीदरो देनेबालोए तुसन तैस पुइ विश्वास केरनेरे वजाई सेइं सब किसमेरे आनन्द ते शैनति सेइं भरे, कि पवित्र आत्मा री शक्ति सेइं तुशेरी उमीद बढ़ती गाए। 14 हे मेरे ढूलाव ते बेइनव, अवं एण्णु भी तुशे बारे मां ज्ञानताई, कि तुस भी भलैई सेइं भरतथ, ते तुसेईं कुन कियोरू लोड़े तुस रोड़े चारे ज्ञानतथ ते एक्की होरि शिखेली बटतथ। 15 फिरी भी मीं जैखन कैखन याद करानेरे लेइ तुसन बड़े दिलेरी सेइं लिखू, इन तैस अनुग्रहेरे वजाई सेइं भोवं, जै परमेशेरे मीं दित्तोरोए। 16 कि अवं गैर कौमां केरे लेइ यीशु मसीहेरो सेवक भोइतां परमेशेरे खुशखेबारी सेवा याजकेरी जेरि केरि; जैस सेइं गैर कौमां केरे लोक परमेशेरे दानेरे रूपे मां दित्ते गाले, जैस सेइं तै खुश भोलो, जैना पवित्र आत्मा पवित्र बनोरेन। 17 अवं यीशु मसीहेरे वजाई सेइं परमेशेरी सेवाई पुइ घमण्ड केरि बटताई। 18 किजोकि तैन गल्लां केरे अलावा मीं होरि कोन्ची गल्लां केरे बारे मां जोनेरी दिलेरी नईं, जैना मसीहे गैर कौमन केरे लेइ वचन, ते कर्म, 19 ते निशान ते बड़े-बड़े कम्मां केरे शक्ति सेइं, ते पवित्र आत्मा शक्तेरे ज़िरिये कियो, इड़ी तगर कि मीं यरूशलम नगरे मरां देइतां चेत्रे पासन इल्लुरिकुम इलाके तगर मसीहेरो खुशखेबारां पूरो-पूरो प्रचार कियो। 20 पन मेरे मनरी उमगे, कि जैड़ी-जैड़ी यीशु मसीहेरी खुशखेबारी प्रचार नईं भोरो, तैड़ी खुशखेबारी शुनेईं; एरू न भोए होरेरे मुनीयादी पुइ घर बनेइं। 21 पन जेन्चरे पवित्रशास्त्रे मां लिखोरूए, तेन्चरे भोए, “जैन तैसेरे बारे मां कधी नईं ज़ोरू, तैना लालहे, ते जैनेईं तैसेरे बारे मां नईं शुनोरू तैना समझेले।” 22 एल्हरेलेइ अवं तुसन कां एजनेरे लेइ बार-बार रुकोरो राव। 23 पन हुनी मीं इन इलाकन मां तैन लोकन खुशखेबारी शुनेइतां अपनू कम पूरू कियूं, जैनेईं मसीहेरे बारे मां न थियूं शुनोरू, ते मीं बड़े सालां केरि तुसन कां एजनेरी इच्छाए। 24 एल्हरेलेइ जैखन अवं इसपानिया मुलखे मां गेइ त तुसन मेईं एइते

गेडलो, किजोकि मीं उमीदे, कि तैस सफरे मां तुसन सेईं मिली, ते जैखन तुसन सेईं मिली त अवं खुश भोईं, ते अवं चाताईं तुस मेरे इसपानिया गानेरे सफरेरे लेइ मेरी मद्दत केरा। 25 पन हुनी त परमेशेरे लोकां केरि सेवा केरनेरे लेइ यरूशलेम नगरे गाताईं। 26 किजोकि मकिदुनिया ते अखाया इलाकेरे केरे विश्वासी लोकन इन रोडू लगू, कि यरूशलेम नगरेरे परमेशेरे लोकां केरे लेइ जैना गरीब आन, किछ चन्दो केरन। 27 तैनेईं एन खुशी सेईं कियूं, तैना यरूशलेम नगरेरे लोकां केरे कर्जदारन, यहूदी लोकेईं गैर कौमेरे लोकन परमेशेरे तरफां रोड़ी चीजां दिती, ते इन रोड़ी कि गैर कौमां केरे लोक इस दुनियारी रोड़ी चीजां यहूदन देन। 28 अवं पेडलो यरूशलेम नगरे जो चलोरोईं ताके जै चन्दो अकोट्टो कियोरोए तैन देईं, तैहां पत्ती अवं तुसन कां रोम नगरे मां एदतां इसपानिया मुलखे जो गेडलो। 29 ते अवं ज्ञानताईं, कि जैखन तुसन कां एज्जेलो, त मेरे एजनेरे वजाईं सेईं मसीह तुसन पूरे तरीके सेईं बरकत देलो। 30 ते हे ढूलाव ते बेडनव, प्रभु यीशु मसीह पुइ इश्शे विश्वासेरे वजाईं सेईं ते पवित्र आत्मा रे दित्तोरे प्यारेरे वजाईं सेईं अवं तुसन कां बिनती केरताईं, कि मीं सेईं साथी मेरे लेइ परमेशेरे कां लागतार प्रार्थना केरा। 31 कि अवं यहूदिया इलाकेरे गैर विश्वासी लोकन करां बचोरो रेईं, परमेशेरे तैना लोक जैना यरूशलेम नगरे मां आन खुशी सेईं तै मद्दत कबूल केरन जै अवं तैन कां नेडलो। 32 ते अवं परमेशेरी मेर्जी सेईं आनन्दे कां एज्जी ते मीं तुसन साथी आराम मैल्ले। 33 अवं प्रार्थना केरताईं, कि शान्ति देनेबालो परमेशर तुसन सेड्भन सेईं साथी भोए। आमीन।

16 अवं तुसन सेईं फीबेरे बारे मां, जै इश्शी विश्वासी बेडने ते किखिया नगरेरे कलीसियारी सेवकाए, अवं चाताईं तुस तैसेरी इज्जत केरा। 2 कि तुस जेन्बेरे पवित्र लोकन सेईं कियेरू लोडे, तैस प्रभु मां कबूल केरा; ते जैस गल्ली मां तैस तुसन करां केन्चेरी मद्दतरी ज़रूरत भोए, तैसेरी मद्दत केरा; किजोकि तै भी बड़ां केरि मद्दत केरनेबाली बल्के मेरी भी मद्दत केरनेबाली भोरीए। 3 प्रिस्किल्ला ते अक्विला जैना प्रभु यीशु मसीह मां मेरे मद्दगारन, नमस्कार। 4 तैनेईं मेरे जान बचानेरे लेइ अपनि जान खतरे मां रखोरि थी। सिर्फ अवं ए नईं, बल्के गैर कौमां केरि सैरी कलीसियां भी तैन केरू शुक्र केरतिन। 5 ते तैस कलीसिया भी नमस्कार जैना तैन केरे घरे मां अकोट्टी भोतीए। मेरे ट्लारे इपैनिनुसे भी जै आसिया इलाकेरो मसीह पुइ विश्वास केरनेबालो पेडलो विश्वासी ए, नमस्कार। 6 मरियम जैसां तुश्शे लेइ बड़ी मेहनत केरि, नमस्कार। 7 अन्दुनीकुस ते यूनियासे जै मेरो कुटमेरोए, ते मीं सेईं साथी कैद भोरो थियो, ते प्रेरितन मां मुशूर, ते मीं करां पेडले मसीह मां थी, नमस्कार। 8 अम्पलियातुसे, जै प्रभु मां मेरो ट्लारोए, नमस्कार। 9 उरबानुसे, जै मसीह मां इश्शो मद्दतगार, ते मेरे ट्लारो इस्तखुसे नमस्कार। 10 अपिल्लेसे जै मसीह मां ईमानदार निस्सो, नमस्कार। अरिस्तुबुलुस ते तैसेरे टब्बेरे जो नमस्कार। 11 मेरे कुटमेरे हेरोदियोने नमस्कार। नरकिस्सुसेरे टब्बेरे जैना लोक प्रभु मां आन, तैन नमस्कार। 12 त्रूफैना ते त्रूफोसा जैन कुआन्शेईं प्रभु मां बड़ी मेहनत

की, नमस्कार। ट्लारी मसीही बेडन पिरसिस जैसां प्रभु मां बड़ी मेहनत की नमस्कार। 13 रूफुसे जै प्रभु मां चुनोरोए, ते तैसेरी अम्मा जै मेरी अम्मारी जेरि ए, दुइयन नमस्कार। 14 असुंक्रितुस ते फिलगोन ते हिर्मास ते पत्रुबास ते हर्मास ते तैन केरे सैथी विश्वासी लोकन नमस्कार। 15 फिलुलुगुस ते यूलिया ते नेर्युस ते तैसेरी बेडन, ते उलुम्पास ते तैन केरे साथी सब परमेशेरे लोकन नमस्कार। 16 मसीहेरे प्यारे सेईं एक्की होरि जो नमस्कार केरा। तुसन भी मसीहेरे सैरी कलीसियारे तरफां नमस्कार। 17 हुनी हे ढूलाव ते बेडनव, अवं तुसन कां बिनती केरताईं, कि जैना लोक तैस शिक्षारे खलाफ जै तुसन मांए, खलबली बनातन, ते ठोकर खानेरी वजा भोतन, तैन करां खबरदार राथ; ते तैन करां दूर राथ। 18 किजोकि एरे लोक इश्शे प्रभु यीशु मसीहेरी नईं, पन अपने फैइदेरे लेइ सेवा केरतन; ते तैना रोड़ी-रोड़ी गल्लां केरतन ते चापलूसी सेईं सिधे सादे लोकन धोखो देतन। 19 तुश्शे हुकम मन्नेरे बारे मां सेड्भी लोकन पतो चलोरोए; एल्हेरेलेइ अवं तुश्शे बारे मां आनन्द केरताईं; पन अवं इन चाताईं, कि तुस भलाई केरनेरे लेइ अक्लमन्द बना, पन बुराई केरनेरे लेइ सादे बना। 20 शान्ति देनेबालो परमेशर शैताने जल्दी तुश्शे पवन सेईं इलेन्चालो। इश्शे प्रभु यीशु मसीहेरो अनुग्रह तुसन पुइ भोतो राए। 21 तीमुथियुस जै मीं सेईं साथी कम केरते, ते लूकियुस ते यासोन ते सोसिपत्रुस मेरे कुटुमबी केरे तरफां तुसन नमस्कार। 22 मेरे चिट्टी लिखने बाले तिरतियुसेरू प्रभु मां तुसन नमस्कार। 23 गयुस भी तुसन नमस्कार ज़ोते जेसेरे घरे मां अवं राताईं, तैड़ी कलीसियारे लोक अकोट्टे भोतन। इरास्तुस जै नगरेरो भण्डारीए, ते ढूला क्वारतुसेरू तुसन नमस्कार। 24 अवं प्रार्थना केरताईं, इश्शे प्रभु यीशु मसीहेरो अनुग्रह तुसन पुइ भोतो राए। आमीन। 25 हुनी तुसन जै खुशखबरी मीं प्रचार की, मतलब यीशु मसीहेरे प्रचारेरे मुताबिक विश्वासे मां मज़बूत केरि बटते, तैस भेदेरे प्रकाशेरे मुताबिक जै बडे पेडलो देंतो छप्पोरो राव। (aiōnios g166) 26 पन हुनी बांदो भोइतां सनातन परमेशेरे हुकमे सेईं नेबी केरे किताबां केरे ज़िरिये सेड्भी कौमन ज़ोवरोए, कि तैना विश्वासेरे ज़िरिये सेईं हुकम मन्नेबाले भोइ गान। (aiōnios g166) 27 तैस्से एक्की बडे अक्लमन्द परमेशेरी यीशु मसीहेरे ज़िरिये सदा महिमा भोती राए। आमीन। (aiōn g165)

1 कुरिन्थियों

1 अवं पौलुस ई चिट्ठी लिखने लोरोई। अवं, यीशु मसीहो प्रेरित भोनेरे लेइ परमेशरे मेर्जी सेइं कुजावरोई। मेरो विश्वासी साथी सोस्थिनेस भी मीं सेइं साथी आए (जै मेरी मदत करने लोरोए)। 2 तुस जैना कुरिन्थुस नगरे कलीसियारे विश्वासी आथ, परमेशरे तुस यीशु मसीह मां अपने लोकां केरे रूपे मां अलग कियोरेथ, ते कने पवित्र भोनेरे लेइ कुजोरेथ। तैन सेबभी केरां नंवे जैना हर ठैरी इश्शे त कने अपने प्रभु यीशुएरे नंवे सेइं प्रार्थना केरतन। 3 इश्शे बाजी परमेशर, ते प्रभु यीशु मसीहरे तरफां तुसन अनुग्रह ते शान्ति मैलती राए। 4 अवं तुश्शे बारे मां अपने परमेशरेरु हर वक्त शुक्र केरताई, एल्हेरेलेइ कि परमेशरेरो ई अनुग्रह तुसन पुड़ यीशु मसीह मां भोव। 5 किजोकि तुसेईं हर लिहाजे सेइं बेडि बरकतां हासिल कियोरिन, किजोकि तुस मसीह सेइं साथी अक आथ। एल्हेरेलेइ तैने तुसन अपनू वचन ज़ोनेरी ते समझनेरी खास काबलीत दितोरीए। 6 एन्चरे परमेशरे तुश्शे लेइ पक्कू कियूं, कि मसीहरे बारे मां सन्देश सच्चे। 7 हुनी तुसन कां सारां आत्मिक वरदानां आन, किजोकि तुस इश्शो प्रभु यीशु मसीह बांदो भोनेरे बड़े इंतज़ारे मां आथ। 8 परमेशर तुसन आखरी तगर विश्वासे मां मज़बूत भी केरेलो, कि तुस इश्शे प्रभु यीशु मसीहरे वापस एजनेरे दिहाड़े बेइलज़ाम भोथ। 9 परमेशर एन्चरे केरेलो, किजोकि ज़ैन किछ तै ज़ोते, तैस केरनेरे मां ते वफादारे। ते तैने तुस अपने मटे इश्शे प्रभु यीशु मसीहरे संगती मां कुजावरेथ। 10 हे ढूलाव ते बेइनव, अवं इश्शो प्रभु यीशु मसीहरे अधिकारे सेइं इन केरनेरी बिनती केरताई, कि सब एककी होरि सेइं राज़ामंद भोथ; ते तुसन मां फिरके न भोन, पन अक मन भोथ, ते अक्के खियाल रखवा। 11 किजोकि हे मेरे ढूलाव ते बेइनव, खलोएरे टब्बरे लोकेईं मीं तुश्शे बारे मां ज़ोवरूप, कि तुसन मां लड़ाई लोरिन भोने। 12 मेरू ज़ोनेरो मतलब ई आए, कि तुसन मरां कोई त अपनो आप, “पौलुसेरे ज़ोते,” कोई “अपुल्लोसेरो,” कोई “कैफारो,” कोई “मसीहो ज़ोते।” 13 ज़ैन तुस केरतथ तैन ठीक नई, कुन मसीह बेनटोव? कुन पौलुस कूसे पुड़ चाढ़ो जेव? या तुसन पौलुसेरे नंवे पुड़ बपतिस्मो मैलो? 14 अवं परमेशरेरु शुक्र केरताई, कि क्रिस्पुस ते गयुसेरू अलावा, मीं तुसन मरां केन्ची बपतिस्मो नई दित्तोरो। 15 कि एरू न भोए, कोई ज़ोए, कि तुसन मेरे चले बन्नेरे लेइ बपतिस्मो मैलो। 16 हॉ मीं याद आऊं, मीं स्तिफनासेरे टब्बरे भी बपतिस्मो दित्तो; एन केरे अलावा, अवं न ज़ैनी कि मीं होरि केन्ची बपतिस्मो दित्तो। 17 किजोकि मसीहे अवं बपतिस्मो देनेरे लेइ नई, बल्के खुशखबरी शुनानेरे लेइ भेजोरोई, ज़ैखन अवं लोकन परमेशरेरो सन्देश शुनाताई त अवं मैन्हु केरे चलाक खियालां केरो इस्तेमाल न केरि, एरू न भोए कि मसीहेरू कूस बेफैइदू भोए। 18 किजोकि कूसेरी कथा नाश भोने भालां केरे लेइ बेवकूफीए, पन असन मुक्ति मैलने बालां केरे लेइ परमेशरेरी शक्ति आए। 19 किजोकि पवित्रशास्त्रे मां परमेशर ज़ोते, “अवं इन हिरेइलो दुनियारे लोकां केरे खियालन कि तैना

सोचतन कि तैना ज़ानी आन, हकीकति मां तैना बेकार खियाल आन। अवं साबत केरेलो कि तैना अक्लमन्द नई।” 20 त फिरी, अक्लमन्द मैन्हु केरे बारे मां अस कुन ज़ोम? यहूदी केरे कानूनेरे महिर मैन्हु केरे बारे मां अस कुन ज़ोम? इस दुनियारी लोकां केरे बारे मां कुन ज़ोम ज़ैना ज़ोने मां चलाकन? परमेशरे तैना सारे बेवकूफ बनाए ते तैन केरि अक्ल बेफैइदी बकवास साबत की (aiōn g165) 21 किजोकि ज़ैखन परमेशरेरे ज़ानेरे मुताबिक दुनियां ज़ान सेइं परमेशर न ज़ानो, त परमेशरे इन रोडू लग्गू इस प्रचारेरे बेवकूफेरे मुताबिक विश्वास केरनेबालन मुक्ति दे। 22 यहूदी त निशान चातन, ते गैर कौमां ज़ानेरे तोपी मां आन। 23 पन अस त तैस कूसे पुड़ चाढ़ेरे मसीहोरे प्रचार केरतम ज़ै यहूदी केरे लेइ ठोकरारी वजाए, ते गैर कौमां केरे लेइ बेवकूफीए। 24 पन ज़ैना परमेशरे (अपने लोक भोनेरे लेइ) कुजोरेन, कुन यहूदी, कुन गैर कौमां, तैन केरे लेइ मसीह परमेशरेरी शक्ति, ते परमेशरेरू ज़ाने। 25 किजोकि परमेशरेरी बेवकूफी मैन्हु केरे ज़ाने करां जादे ज़ान बालीए; ते परमेशरेरी कमज़ोरी मैन्हु केरे शक्ति करां जादे ज़ोरे बालीए। 26 हे ढूलाव ते बेइनव, इस बारे मां सोचा ज़ेइस परमेशरे तुस कुजाए तुस केरे थिये, कि न जिसमेरे मुताबिक बड़े ज़ानी, ते न बेडि शक्तिबाले, ते न इज़्जतदार घरेरे कुजाए। 27 ज़ाने बालन शरमिन्दा केरनेरे लेइ परमेशरे तैना चुने ज़ैना दुनियारे नज़री मां बेवकूफन। ते ताकतबरन शरमिन्दा केरनेरे लेइ परमेशरे तैना चुने ज़ैना दुनियारे नज़री मां कमज़ोरन। 28 परमेशरे तैना चुने ज़ैना दुनियारी नज़री मां नीन्न ते घटिया आन, बल्के ज़ैना अथ्थी भी नई तैना भी चुने, कि तैन ज़ैना आन, बेकार केरन। 29 परमेशरे एन केरू ताके कोई प्राणी परमेशरेरे सामने घमण्ड न केरि सके। 30 पन परमेशरे तुस यीशु मसीह सेइं अक कियोरेथ, ते मसीहरे ज़िरिये तैने अपनू ज़ान दित्तोरूपे। परमेशर अपने नज़री मां असन धर्मी भी बनाते। मसीहरे ज़िरिये अस पवित्र किये जे, ते तै असन इश्शे पापन करां आज़ाद केरते। 31 ताके ज़ेन्चरे पवित्रशास्त्रे मां लिखोरए, तेन्चरे भोए, “कि जै घमण्ड केरे तै तैस पुड़ घमण्ड केरे ज़ैन प्रभुए कियोरूपे।”

2 हे ढूलाव ते बेइनव, ज़ैखन मीं तुसन परमेशरेरे बारे मां सन्देश शुनव, त मीं बेडि गल्लां इस्तेमाल न की, कि अवं अपने आपे ज़ानी हिरेईं। 2 किजोकि मीं इन थापेरू थियूं, कि तुसन मां यीशु मसीह, बल्के कूसे पुड़ चाढ़ेरे मसीहरे अलावा होरि कोई गल न केरि। 3 ते कमज़ोरी ते डरे सेइं तुसन सेइं साथी, ते बड़ो थरकतो तुसन सेइं साथी राव। 4 ते मेरे शिक्षाई, ते मेरे प्रचारे मां ज़ानेरी लालचानेरी बेली गल्लां न थी; पन पवित्र आत्मा शक्ति सेइं इन हिरावं कि ज़ै सन्देश मीं शुनव तै सच थियो। 5 एल्हेरेलेइ की तुश्शो विश्वास मैन्हु केरे ज़ाने सेइं नई, पन परमेशरेरे शक्ति पुड़ निर्भर भोए। 6 फिरी भी अवं आत्मिक सिद्ध लोकन ज़ानेरो सन्देश शुनाताई, पन इस दुनियारे लोकां केरो नई, ते इस दुनियारे हाकिमां केरू नई ज़ैना नाश भोनेन। (aiōn g165) 7 पन अस परमेशरेरू तैन छपोरू ज़ान भेदेरे रीति पुड़ ज़ोतम, ज़ैन परमेशरे दुनिया बनाने करां पेड़लू इश्शे महिमारे लेइ ठहराव। (aiōn g165) 8 परमेशरेरो ई मकसद इस दुनियारे हाकिमन

मरां केन्चे भी न समझो, किजोकि अगर समझते भोथे, त महिमा बालो प्रभु कूसे पुड़ न चाढेथे। (aiōn g165) 9 पन जेन्चरे पवित्रशास्त्रे मां लिखोरूप, “कि जैन न एछ्छेई लाव, न कन्नेई शुनु, ते जैना गल्लां मैनु केरे दिले मां न एई, तैना सब परमेशरे तैन केरे लेइ तियार की, जैना तैस सेई प्यार केरतन।” 10 पन परमेशरे पवित्र आत्मारि जिरिये सेई असन पुड़ बांदू कियूं; किजोकि पवित्र आत्मा सब गल्लां, बल्के परमेशरेरी दुगी गल्लां ज्ञानते। 11 मैनु मरां कौन केसेरी गल्लां ज्ञानते, सिर्फ मैनेरी आत्मा जै तैस मांए, तेन्चरे परमेशरेरी गल्लां भी कोई न ज्ञाने, सिरिफ परमेशरोरो आत्मा। 12 पन असन दुनियारी आत्मा नई, पन तै आत्मा मैलोरोए, जै परमेशरे तरफांए, कि आस तैन गल्लन समझम, जैना परमेशरे असन दितोरिन। 13 एल्हेरेलेइ अस मैनु केरे ज्ञानेरी शिखैलोरी गल्लन मरां नई, पन पवित्र आत्मारि शिखैलोरी गल्लन मरां आत्मिक गल्लां आत्मिक ज्ञाने सेई समझातम। 14 पन जिसमानी मैनु परमेशरे आत्मारि सच्च्यई कबूल न केरे, किजोकि तैसेरेलेइ तै बेवकूफीए, ते न तै तैन सेमझी सके, किजोकि तैना सिर्फ पवित्र आत्मारि जिरिये सेमझी गैतिन। 15 पन जैन लोकन पवित्र आत्मा मैलोरो तैना, तैन सैरी गल्लन परखतन जैना पवित्र आत्मा शिखालते। पन जैन लोकन पवित्र आत्मा नई मैलोरो तैना, तैन न सेझी बटन जैन पवित्र आत्मा मैलोरोए। 16 इन सच्र आए, किजोकि पवित्रशास्त्र जोते, “कोई न ज्ञाने प्रभुएरे मने मां कुने।” पन पवित्र आत्मा असन विश्वासी लोकन मसीहेरो मने दितोरि।

3 हे ढूलाव ते बेइनव, जैखन अवं तुसन कां थियो त तुसन सेई एन्चरे सब गल्लां न केरि बटो, जेन्चरे आत्मिक लोकन सेई; पन जेन्चरे तैन सेई जैना मसीह मां बचने। 2 मीं तुसन परमेशरे वचने मरां सिर्फ बुनियादी गल्लां केरि शिक्षा दित्ती ते दुग्धी सच्च्यई नई। किजोकि तैस वक्ते तुस तै शिक्षा हासिल केरनेरे ते समझनेरे काबल न थिये, बल्के हेजू भी हासिल केरनेरे काबल नई। 3 किजोकि हेजू तगर भी गैर विश्वासी केरे जेरे आथ। एल्हेरेलेइ कि जैखन तुसन मां बैर, ते लडाइयन, त कुन तुस गैर विश्वासी केरे जेरे न भोए? तुस एरे लोकां केरि जेरि जिन्दगी जीने लोरेथ, जैन केरो रिश्तो प्रभु सेई न भोए। 4 एल्हेरेलेइ अक जोते, “अवं पौलुसेरोई,” ते होरो जोते, “अवं अपुल्लोसेरो आई,” त कुन तुस एरे लोकां केरि जेरि जिन्दगी जीने बाले न भोए, जैन केरो रिश्तो प्रभु सेई न भोए! 5 अपुल्लोस कौने? ते पौलुस कौने? सिर्फ सेवक, जैन केरे जिरिये तुसेई प्रभु पुड़ विश्वास कियो, असन मरां हर केन्चे कम कियूं जेन्चरे परमेशरे केरनेरे लेइ दित्तू। 6 अगर अवं तुशशी तुलना ऊडारे सेई केरि त मीं बीज बेवं, अपुल्लोसे समगू, पन परमेशरे बडावं। 7 एल्हेरेलेइ न त लानेबालो किछे, ते न सगने बालो किछे, पन परमेशर जै बडाने बालोए। 8 लानेबालो ते सगने बालो दुइये अक्कन; पन हर मैनु अपने-अपने मजदूराओ फल मैलनोए। 9 किजोकि अस परमेशरे सेई साथी कम केरनेबाले आम, तुस एरे ऊडारां केरे जेरे आथ जैन केरो तलक परमेशरे सेई आए, ते इसेरे आलाव तुशशी तुलना एरे घरे सेई केरताई जैन परमेशरे बनावरूप। 10 परमेशरे जैन कम मीं केरनेरे लेइ दित्तोरु

थियूं, मीं तैन अक्लमन्दी सेई कियूं; अवं माहिर मिसेरो जेरो आई, मीं तुशशे नगरे मां खुशखबरी प्रचार की ते शुरू मां तुसन यीशु पुड़ विश्वास केरनेरे लेइ मदत की, तैद्वां बाद जैस कम्मैरी शुरूआत मीं कियोरी थी, होरे मसीही सेवा केरनेबाले तैस बुनियादी पुड़ लगातार कम केरते राए। पन असन मरां हर एककी कम केरनेबाले ध्याने सेई सोचोरु लोडे, कि असेई परमेशरेरु कम केन्चरे लोडे कियोरु। 11 किजोकि यीशु मसीह सच्च्यी बुनियाद आए, ते होरो कोई होरि बुनियाद न बनेइ सके, तैन इन आए, कोई तुसन मुक्ति हासिल केरनेरे लेइ नर्वी शिक्षा न शिखैली बटे, मीं तुसन सेई पेइलू जोवरु कि परमेशर असन यीशु मसीहेरे जिरिये मुक्ति देते। 12 ते अगर कोई इस मुनीयादी पुड़ सोन्नू चाँदी या कीमती घोड़ या कैडु या घास फूसेरो रद्दो रखते। 13 जैखन मसीह फिरी वापस एजेलो, त अग हर एककेरे कम्मे परखेली, ते अग हर मैनेरे कम्मैरी कीमत हिराली। 14 जेसेरु कम तैस अगगी सेई न फुकोलू, तैस मजदूरी मैलनीए। 15 ते अगर केन्चेरु कम फुकोलू, त तैस नुकसान भोलो; पन तै एप्पू बचनोए पन फुकोते-फुकोते। 16 कुन तुस न ज्ञानथ, कि तुस परमेशरेरु मन्दरथ, ते परमेशरोरो आत्मा तुसन मां रहते? 17 अगर कोई तुसन नुकसान पुजाए, त परमेशर तैस नाश केरेलो; किजोकि परमेशरेरु मन्दर पवित्रे, ते तैन तुस आथ। 18 कोई अपने आपे धोखो न दे, अगर तुसन मरां कोई इस दुनियारे लोकन मां अपनो आप अक्लमन्द समझे, त तैस दुनियारी नजरी मां बेवकूफ बनोरु लोडे; ताके परमेशरेरे नजरी मां सच्च्ये ज्ञानी बने। (aiōn g165) 19 किजोकि इस दुनियारी अक्ल परमेशरे कां बेवकूफीए, जेन्चरे पवित्रशास्त्रे मां लिखोरूप; “परमेशर जैन्न तैन केरे चलेकी मां फसाते।” 20 ते फिरी पवित्रशास्त्र इन भी जोते, “प्रभु जैनी केरे खियालन ज्ञानते कि बेफैइदेन।” 21 एल्हेरेलेइ कोई मैनु पुड़ घमण्ड न केरे, किजोकि किछ परमेशरे तुशशू भलेरे लेइ दित्तोरुए। 22 तैन इन आए कुन अवं पौलुस, कुन अपुल्लोस, कुन कैफा, कुन दुनिया, कुन जीनू, कुन मरनू, कुन ई वक्त, कुन एजनेबालो वक्त, सब किछ तुशशूए। 23 ते तुस मसीहेरेथ, ते मसीह परमेशरोरोए।

4 मैनु असन मसीहेरे सेवक, ते परमेशरेरे भेदां केरे भण्डारी समझन। 2 जेन्चरे कि जैस मैनु तैसेरे मालिके जैन कम दित्तोरि भोए, तैने तैन कम केरने मां वाफदार लोडे रावरु, जेसेरो तैस हुकम दित्तो जेवरोए। 3 पन मेरे खियाले मां ई गल निकडीए, कि तुस या मैनु मरां कोई फैसलो केरनेबालो मीं परखे, बल्के अवं अपने आपे न परखी। 4 किजोकि मेरो ज़मीर मीं कोन्ची गल्ली मां दोषी न ठहराए, पन इस सेई अवं बेइलजाम न ठहरी, किजोकि मेरो परखने बालो प्रभुए। 5 ते ज्ञांतगर प्रभु वापस न एज्जे, पेइली केन्चेरो इन्साफ न केरा, तैए लोकां केरे सारे खियाल साफ तरीके ज़ोलो, जैन केरे बारे मां होरो कोई तैन न ज्ञाने, ते तैन केरे दिलां केरे इरादे बांटे केरेलो। तैखन परमेशरेरी तरफां हर केन्चेरी तारीफ़ भोनीए। 6 हे ढूलाव ते बेइनव, मीं इन गल्लन मां तुशशे लेइ अपनि ते अपुल्लोसेरी बंस, मिसालारे रीति पुड़ कियोरीए, एल्हेरेलेइ कि तुस इशशे जिरिये सेई शिखा, कि जैन पवित्रशास्त्रे मां लिखोरे करां अग्रोवं न बधा,

ते एककेरे पासे ते होरेरे खलाफ घमण्ड न केरथ। 7 केन्चे तू होरन करां रोड़ो नई बनोरो। सब किछ तीं परमेशरें तरफां दित्तू जोरूप, अगर तीं सब किछ परमेशरें दितोरू त तुसन घमण्ड केरनेरो अधिकार नई। 8 तुस त रजोरैथ; तुस दौलतमन्द भोजेइ, तुसेई इश्शे बगैर राज़ कियू; पन रोड़ू भोथू कि तुस राज़ केरथे ते अस भी तुसन सेई साथी भोथे। 9 मेरी समझी मां परमेशरे अस प्रेरित लोक सेबभना पती तैन लोकां केरे ज़ेरे ठहरावरेम, ज़ैन केरे मौतरो हुकम भोजे जेवरोए; किजोकि अस दुनियारे ते स्वर्गदूतां, ते मैन्हु केरे लेइ अक तमाशो बनोरैम! 10 लोक असन बेवकूफ समझतन किजोकि अस मसीहरे बारे मां प्रचार केरतम, पन तुस गेतली सेई सोचतथ कि तुस अक्लमन्द मसीही आथ! बड़े लोक समझतन कि असन कां कोई अधिकार नई। पन तुस घमण्डे सेई ज़ोतथ कि तुसन कां परमेशरें तरफां शक्ति आए, तैना इश्शी आदर न केरन पन तुश्शी आदर केरतन। 11 अस इस वक्ते तगर नियन्ने-दुलिशोरै, ते छिनदोरे लिगडन मां आम, ते धक्के खातम, ते असन कां घर नई; 12 ते अपने हथेई सेई कम केरतां मेहनत केरतम। लोक बुरू ज़ोतन, अस तैन बरकत देतम; तैना सतातन, अस झैल्लतम। 13 तैना बदनाम केरतन, अस नेरमी सेई गल केरतम, इड़ी तगर कि, अज़ तगर लोक हेजू भी इश्शी इज़्ज़त न केरन, तैना ज़ोतन कि इश्शी कोई कीमत नई। 14 मेरी इना गल्लां लिखनेरो मकसद ई नई कि तुसन छिथेई, पन अवं तुसन सुधारने चाताई, किजोकि तुस मेरे बच्चां केरे ज़ेरे आथ ज़ैन सेई अवं प्यार केरताई। 15 किजोकि अगर मसीह मां तुश्शे शिखालनेबाले दश हज़ार भी भोथे, फिरी भी तुश्शे बड़े बाजी नई, एल्हेरेलेइ कि मसीह यीशु मां खुशाखेबरी सेई अवं तुश्शो बाजी केरो ज़ेरो भोव। 16 एल्हेरेलेइ अवं तुसन कां मिनत केरताई, कि मेरी ज़ेरि चाल चला। 17 एल्हेरेलेइ मीं तीमुथियुसे ज़ैन प्रभु मां मेरू ट्लारू, ते वफादार मट्रूप, तुसन कां भेजोरूप, ते तै तुसन यीशु मसीह मां मेरू चालचलन याद करालो, ज़ेन्चरे कि अवं हर एककी ठैरी हर कलीसिया मां शिक्षा देताई। 18 तुसन मरां बड़े लोक सोचतन कि अवं तुसन कां नई एजोनो, एल्हेरेलेइ तैना घमण्ड केरतन। 19 पन प्रभु चाए त मीं तुसन कां जल्दी एजनुए, ते न सिर्फ तैन घमण्ड केरनेबालां केरि गल्लां नई, पन तैन केरि शक्ति भी ज़ैनेलो। 20 किजोकि परमेशेरू राज़ गल्लां केरू नई, पन शक्ति मांए। 21 अगर हेजू भी तुसेई बुरी बत नई शारोरी, अवं तुस सेखती सेई झिडक देइलो। पन अगर तुसेई बुरी बत शारी त अवं तुसन सेई नेरमी त कने प्यारे सेई बर्ताव केरेलो।

5 इड़ी तगर शुन्ने मां ओरूप, कि तुसन मां बदमाशी भोचे, मतलब एरी बदमाशी ज़ेरि गैर विश्वासी लोकन मां भी न भोए, कि अक मैन्हु अपने बेबानी-अम्मा रखते। 2 तुसेई त दुःख कियोरो लोड़तो थियो ते उदास भोरू लोड़तू थियू, ते ज़ैनी मैने एरू कियू तै कढोरो लोड़तो थियो, पन इसेरे बदले तुस घमण्ड केरतथ। 3 चाए अवं तुस सेई साथी नई, पन मेरे विचार तुसन सेई साथी आन, चाए अवं तैड़ी नई, फिरी भी मने मां इन आए, कि एरू कम केरनेबालेरे बारे मां फैसलो केरने

लोरोई। 4 इन तैन आए ज़ैन केरनेरी ज़रूरत आए। हकीकति मां इश्शे प्रभु यीशु मसीहोरो अधिकार तुसन कां आए, इन पिशैतना विश्वासी केरे रूपां अकोट्टे भोथ। इन एरू आए कि अवं भी अपने मने मां तैड़ी आई। ते फिरी प्रभु यीशु मसीहोरे ज़िरिये। 5 तैस मैन्हु ज़ैने पापी बर्ताव कियोरो, तैस अपने टोली मरां कढा ते तैस मैन्हु शैतानेरे अधिकारे मां वापस देथ, इस उमीदी सेई कि ते अपने पापन करां मन फिरालो। किजोकि अगर तै पापन करां मन फिरालो त तैस प्रभु यीशु मसीहोरे इन्साफेरे दिहाइ मुक्ति मैलेली। 6 घमण्ड केरनू बंद केरा, कि तुस न ज़ानथ, कि थोड़ू ज़ेरू खमीर पूरे सन्नोरे अट्टे खमीर केरते। 7 परानू खमीर केढतां, अपनो आप साफ केरा, कि नंक्वू सनोरू अट्टे बना; ताके तुस अखमीरै राथ, किजोकि इश्शो भी फ़सह ज़ै मसीहे, तै बलिदान भोरोए। 8 ते एज्जा अस तिहारे मां आनन्द मनाम, न पुराने खमीरै सेई न बुरेई, ते दुष्टेरे खमीरै सेई, पन सिधीयैई, ते सन्नैयरे बगैर खमीरैरे रोटी सेई। 9 मीं अपने पेइले चिठी मां लिखोरूप, कि बदमाशी केरनेबालां केरि संगती न केरथ। 10 इन नई, कि तुस बिलकुल इस दुनियारे बदमाशी केरनेबाले, या लालच केरनेबाले, या धोखो केरनेबालन, या मूरती पुजने बालां केरि संगती न केरा; किजोकि एन्चरे तुसेई इस दुनियाई मरां निसनू पेथू। 11 मेरू ज़ोनू त इन्ने, कि अगर कोई अपने आपे विश्वासी ज़ोते, ते बदमाशी केरनेबालो, या लालची, या मूरती पुजने बालो, या गैई देनेबालो, या पीने बालो, या धोखो केरनेबालो भोए, त तैस सेई साथ न रेखतथ, बल्के एरे मैन्हु सेई साथी रोटी भी न खेइयथ। 12 ई मेरी ज़िमेबारी नई, कि ज़ैना लोक विश्वासी नई तैन केरि निन्दा केरि। पन हकीकति मां तुसेई तैन लोकन सज़ा दित्तोरी लोड़े ज़ैना तुश्शे कलीसियारे हिस्सो आन। 13 पन ज़ैना विश्वासी नई तैन केरो इन्साफ परमेशर केरते पन पवित्रशास्त्र ज़ोते, बुरू कम केरनेबाले मैन्हु अपने टोली मां एजने न देथ।

6 अगर तुसन मरां केन्चरी होरि विश्वासी सेई लड़ाई भोए, त तुसेई फैसलेरे लेइ अधर्मी हाकिमन कां न लोड़े ज़ोवरू; तुसेई अपने कलीसियारे विश्वासी लोकन ज़ोवरू लोड़े कि तैना तुश्शे मुकदमेरो फैसलो केरन कि कौन सही ते कौन गलते। 2 कुन तुस न ज़ानथ, कि परमेशरें लोकेई दुनियारे लोकां केरो इन्साफ केरनेओ? ते अगर तुसेई दुनियारे लोकां केरो इन्साफ केरनेओ, ते कुन तुस निकड़े करां निकड़े लड़ेइयोरो फैसलो केरनेरी काबल नई? 3 तुस ज़ानतथ कि एजनेबाले वक्ते मां असेई तैन स्वर्गदूतां केरो इन्साफ केरनेओ ज़ैना स्वर्ग मरां शारोरे थिये, त पक्को तुस रोज़ेरी आम गल्लां केरो फैसलो केरि बटतथ। 4 अगर एरी गल्लां भोन, त तुसेई तैन केरो फैसलो केरनेरे लेइ तैन कां न लोड़े जेवरी ज़ैन केरि आदर कलीसियारे लोकन मां न की गाए। 5 अवं तुसन छिथानेरे लेइ इन ज़ोताई, कि सन्नै तुसन मां अक भी अक्लमन्द न मैल्लो, ज़ै विश्वासी लोकां केरो फैसलो केरे। 6 बल्के विश्वासी लोकन एप्यू मांमेई मुकदमे भोतन, ते तैना भी गैर विश्वासी लोकां केरे सामने। 7 पन सन्नै तुसन मां बड़ो दोष त ईए, एप्यू मांमेई मुकदमे केरतथ, बल्के बेइन्साफ किजो न झैल्लथ? अपनो नुकसान किजो न झैल्लथ? 8 बल्के

बेइन्साफ केरतथ, ते नुकसान पुजातथ, ते तै भी विश्वासी लोकन। 9 कुन तुस न ज्ञानथ, कि बेइन्साफ लोक, परमेशरें राज्जें बारिस नई भोने? थोखो न खाथ, न वेश्यागामी, न मूरती केरि पूजा केरनेबाले, न आयाश, न लुच्चे, न तैना जैना मडद मडदन सेइं जिसमानी रिशतो रखतन। 10 न चौर, न लालची, न पीने बाले, न गैई देनेबाले, न अंधेर केरनेबाले परमेशरें राज्जें बारिस भोनेन। 11 तुसन मरां पेड़ले किछ एरे थिये, पन प्रभु यीशु मसीहें नन्वे ते इश्शे परमेशरें आत्माई सेइं तुशे पाप धोए जे, ते तुस पवित्र भोए ते धर्मी ठहराए। 12 तुसन मरां किछ जोई बटतन, कि सब चीजां मेरे लेइ जेइज त आन, पन सब चीजां फेइदेरी नई, सब चीजां मेरे लेइ जेइज त आन, पन अवं कोन्ची भी चीजरो गुलाम बेनेलो। 13 तुसन मरां किछ जोई बटतन, खानू पेटेरे लेइए, ते पेट खानेरे लेइ, एन सच्चे, पन परमेशर रोटी भी ते पेटे भी नाश केरेलो, पन जिसम बदमाशी केरनेरे लेइ नई, बल्के प्रभुएरे लेइए; ते प्रभु जिसमेरे लेइए। 14 ते परमेशरे, प्रभु यीशु अपने शक्ति सेइं जीतो केरो, ते तै असन भी जीतो केरेलो। 15 कुन तुस न ज्ञानथ, कि तुशु जी जाना मसीहें अंगन? ते कुन अवं मसीहें अंगन वेश्यारे अंगन सेइं शामिल केरि? नई, कधी नई। 16 कुन तुस न ज्ञानथ, कि जै कोई वेश्याए सेइं न जेइज रिशतो रखते, तै तैस सेइं अक जान भोते? किजोकि पवित्रशास्त्र ज़ोते, “कि तैना दुइये अक जान भोलां।” 17 ते जै प्रभुएरी संगती मां रहते, तै तैस सेइं साथी अक आत्मा भोते। 18 बदमाशी केरने करां दूर राथ, जेते हारे पाप मैनु केरते, तैना जानरे बेइरन, पन बदमाशी केरनेबालो अपने जानरे खलाफ पाप केरते। 19 कुन तुस न ज्ञानथ, कि तुशु जी जान पवित्र आत्मारु मन्देरे; जै तुसन मां आए, ते तुसन परमेशरें तरफां मैलोरोए? ते तुस अपने नई पन तुस परमेशरें आथ; 20 किजोकि प्रभुए अपनि जानरी कीमत देइतां तुस घिनोरेथ, एल्हेरेलेइ अपने जानरे जिरिये सेइं परमेशरें आदर केरा।

7 हुनी अवं तुशे तैन सवालां केरो जुवाब देताई, जैना तुसेई अपने चिट्ठी मां पुच्छे, तुसेई पुच्छे, इन रोडू आए कि लोक इला न बनान? 2 हॉ इन ज़रूरी आए कि बदमाशी केरनेरे डरे सेइं हर मडदेरी कुआन्श, ते हर कुआन्शरो मुन्श भोए। 3 मुन्श अपने कुआन्शरु हक पूरू केरे; ते तेन्चरे कुआन्श भी अपने मुन्शेरु। 4 कुआन्शी अपने जिसमे पुड़ अधिकार नई, पन तैसेरे मनशेरो अधिकारे; तेन्चरे मुन्शे भी अपने जिसमे पुड़ अधिकार नई, पन कुआन्शी। 5 तुस एककी होरि करां अलग न भोथ; पन सिर्फ थोडे चिरेरे लेइ बिस्तारे सेइं कि प्रार्थनारे लेइ फुर्सत मैल्ले, ते फिरी अकोटे भोथ, कि एरु न भोए, शैतान तुसन परखे। 6 पन जैन अवं इन ज़ोने लोरोई ई सुझावे, न कि हुक्म। 7 अवं इन चाताई, कि जेरो अवं अइलाव आई, तेरहे सब मैनु भोन; पन परमेशरे किछन इला केरनू वरदान दितोरुए, ते किछन अकैल्लू रानेरु वरदान दितोरु। 8 मेरी सल्लाह अइलां ते विधवां केरे ई आए, कि तैना अइलाए रान, जेन्चरे अवं आई। 9 पन अगर तैना अपनो आप कैबू न केरि बटन, त इला बनान, किजोकि इला बनानो इच्छान मां मसत राने करां रोडोए। 10 जैन केरो इला भोरोए, तैन केरे लेइ अवं नई, बल्के प्रभु हुक्म देते, कि

कुआन्श अपने मुन्शे करां अलग न भोए। 11 (अगर अलग भोइ गाए, त होरो इला न बनाए; या अपने मुन्शे सेइं फिरी मेल मिलाप केरे) ते मुन्श अपने कुआन्शी न शारे। 12 होरन सेइं प्रभु नई, पन अवं ज़ोताई, अगर केन्ची विश्वासी इलाएरी कुआन्श विश्वासी न भोए, ते तै कुआन्श तैस साथी राने सेइं खुश भोए, त तै तैस न शारे। 13 ते जैस कुआन्शरो मुन्श विश्वासी न भोए, ते तै मैनु तैस साथी राने सेइं खुश भोए; तै मुन्शे न शारे। 14 किजोकि एरो मुन्श जै विश्वासी न भोए, परमेशर तैस सेइं एरो बताव केरते जेन्चरे अपने लोकन सेइं, किजोकि तैसेरी कुआन्श मसीही आए, ते एरी कुआन्श जै विश्वासी न भोए, परमेशर तैस सेइं एरो बताव केरते जेन्चरे अपने लोकन सेइं, किजोकि तैसेरो मुन्श मसीही आए। अगर एरु न भोथू कि विश्वास न केरनेबालो मुन्श या कुआन्श परमेशरें लोक न भोथे, तैखन तुशे बच्चे भी परमेशरें न भोथे। पन हुनी तुशे बच्चे भी परमेशरें भोइ जे। 15 पन जै मडद ते कुआन्श विश्वासी न भोए, अगर तैना अलग भोन, त अलग भोने देथ, एस हालती मां कोई विश्वासी इलाए या बेइन बन्धने मां नई। पन परमेशरे अस कुजोरेम कि सुखे सेइं जींम। 16 हे कुआन्शव तुस इस गल्ली याद रखा कि तुशे मुन्श तुशे वजाई सेइं मुक्ति हासिल केरि बटतन, ते हे मुन्शव तुस याद रखा कि तुशे वजाई सेइं तुशु कुआन्शां मुक्ति हासिल केरि बेटतन। 17 जैन किछ अवं ज़ोने लोरोई तैसेरो नचोइ ई आए; हर मैनु तैस हालती मां रावरो लोडे जै प्रभुए तैस दितोरीए जेइस तैनी परमेशरेंरु कुजानू शनू। अवं इन सेबभी कलीसियान मां एन्चरे ठहराताई। 18 अगर कोई मैनु जै खतनो कियोरे कुजोरो; त तै प्रभु यीशु पुड़ विश्वास केरते, तैस अपनो आप बगैर खतने बालो हिरानेरी ज़रूरत नई; ते अगर कोई मैनु जेसेरो खतनो नई भोरो, ते तै प्रभु यीशु पुड़ विश्वास केरते, तैस खतनो कराने ज़रूरत नई। 19 न खतनो किछ चीजे, ते न खतनो न करानो, बल्के परमेशरें हुक्म मन्ने बडे ज़रूरिन। 20 हर अक जैस हालती मां कुजावरोए, तेन्चरे राए। 21 तू गुलाम थियो जेइस परमेशरे कुजावरो थियो, फिरी भी परेशान न भोथ; पन अगर तू आज़ाद भोइ सकतस, त भो। 22 किजोकि जैना गुलामेरे हालती मां कुजोरेन, तैना प्रभु मां आज़ादन, तेन्चरे जैना प्रभु मां आज़ाद कुजोरेन, तैना मसीहें गुलामन। 23 परमेशरे तुस बड़ी कीमत देइतां घिनोरेथ, मैनु केरे गुलाम न बना, पन परमेशरें गुलाम बना। 24 हे इलाव ते बेइनव, जै जैस हालती मां परमेशरे कुजावरोए, तै तैस्से हालती मां परमेशरे सेइं साथी राए। 25 कुवैरी केरे लेइ मां प्रभु करां कोई हुक्म नई मैल्लेरो, पन प्रभुए दयाई सेइं मां अक्ल दितोरीए, जैस पुड़ भरोसो कियो गाते, ते अवं ई सलाह देताई। 26 किजोकि इन दिहाइन मां विश्वासी लोकां केरे लेइ बरु गल्लां भोने लोरिन, एल्हेरेलेइ मां लगते कि इन तुशे लेइ रोडूए, अवं ई सलाह देताई कि जैना जेरे आन तैना एन्चरे रान। 27 अगर तेरी कुआन्शे, त तू तैस करां अलग भोनेरी कोशिश न केर, ते अगर तेरी कुआन्श नई त तू कुआन्शी न तोप। 28 पन अगर तू इला भी केरस, त पाप नई; ते अगर कुवारी इलाई गाए त कोई पाप नई; पन एरे लोकन इस दुनियाई मां बड़ी

परेशनी भोली, ते अवं बचाने चाताई। 29 हे ढूलाव ते बेइनव, अवं इन जोताई, इश्शो इस दुनियाई मां जादे वक्त नई रावरो, एल्हेरेलेइ जादे फिक्र न केरा कि तुश्शी कुआन्शां आन या नई, पन प्रभुएरी सेवारे बारे मां सोचते राथ। 30 ते तैना जैना लेरां देतन या जैना खुश आन, या जैना अपनि बनानेरे लेइ चीज़न घिन्तन, इन सेबभी गल्लां केरे बारे मां जादे लोडे सोचोरू (किजोकि इना सब गल्लां प्रभुएरी सेवा केरनि बिसरैली)। 31 तैना जैना दुनियाारी चीजां इस्तेमाल केरतन, तैनेई तैन सेइं लगाव न लोडे रखोरू, किजोकि जेन्चरे अस ज्ञानतम ई दुनिया जल्दी खतम भोनेबालीए। 32 मेरी इच्छा ई आए कि तुस दुनियारे जिन्दगरी खुवाइशन करां आजाद राथ, अडूलाव मैन्हु प्रभुएरी सेवा केन्चरे केरनि ई फिक्र केरते कि प्रभुए खुश केरे। 33 पन इलावरो मैन्हु दुनियाारी गल्लां केरि फिक्री मां रहते, कि केन्चरे अपने कुआन्शी खुश रखे। 34 तैने दूई चीजां केरे बारे मां सोचोरू लोडे, अपनि कुआन्शा खुश केरनेरे बारे मां ते प्रभु खुश केरनेरे बारे मां। इलावरी ते अडूलाई मां भी फकें, अडूलाई प्रभुएरी फिक्री मां रहतीए, कि केन्चरे अपनि आत्मा, ते जिसम दुइये पवित्र रखे, पन इलावरी दुनियारे फिक्री मां रहतीए, कि अपने मुन्शे खुश रखे। 35 ई गल तुश्शे फेइदरे लेइ जोताई, न कि तुसन फसानेरे लेइ, बल्के एल्हेरेलेइ जेन्चरे लोडे तेन्चरे कियू गाए, ताके तुस अक मन भोइतां प्रभुएरी सेवाई मां लोगोरें राथ। 36 ते अगर कोई इन समझे कि, अवं एपनी तैस कुवैरारू हक लोरोई मारने जेसेरी जवानी लोरी ढलने, त जेन्चरे चाए तै केरे, इस मां पाप नई, तै तैसेरो इला भोने दे। 37 पन अगर जैने बाजी अपने मने मां पक्को फैसलो कियोरौए, कोन्ची होरेरे दबावेंरे अलावा तै केरते, त तैस कां तै अधिकारे जैन ते केरनू चाते। ते अगर तै फैसलो केरते कि तैसेरी कुई जेरि आए तेरही रखे, तै परमेशेरी नजरी मां रोडू कम केरेलो। 38 जै अपनि कुवैरारो इला कराते, तै रोडू केरते, ते जै न कराए तै भी रोडू केरते। 39 ज्ञांतगर कोन्ची कुआन्शरो मुन्शा जींते रहते, तांतगर तैस सेइं साथी रावरू लोडे, पन जेइस तैसेरो मुन्शा मेरि गाए, जैस सेइं चाए इला केरि बटतीए, सिर्फ विश्वासी लोकन मां। 40 पन अगर तै फिरी दुबारां इला न केरे, त मेरे खियाले मां बडी धने ते अवं समझताई, कि परमेशेरो आत्मा मीं चलाने लोरीए।

8 तुसेई अपने चिट्ठी मां मूरतन कां चाढोरी चीजां केरे बारे मां पुछोरू थियू, इस बारे मां अस ज्ञानतम, पन ज्ञान असन अपने बारे मां घमण्डी बनाते, पन प्यार सेइं होरि केरि तरक्की भोतीए। 2 अगर कोई समझे, कि अवं किछ ज्ञानताई, ते जेरू ज्ञानेरू लोडे तेरू हेजू तगर न ज्ञाने। 3 पन अगर कोई परमेशेरे सेइं प्यार केरते, ते तैस परमेश पशानते। 4 एल्हेरेलेइ अवं खानेरे बारे मां जुवाब देनो चाताई, अस मूरती केरे सामने बलिदान कियोरी चीजां केरे खानेरे बारे मां ज्ञानतम, कि अस ज्ञानतम कि मूरती सज़्जो परमेशर नई, सिर्फ एक्के सज़्जो परमेशेरे। 5 पन फिरी भी अम्बरे ते थेरतली पुड़ लोक बडे देबते ते प्रभु ज़ोतन, पन इश्शे लेइ अक्के परमेशर, तै इश्शो बाजी आए। तैने सैरी चीजां बनेइ, अस तैसेरे ज़िरिये जींते रातम। एन्चरे असन कां अक्के प्रभुए ते तै प्रभु

यीशु मसीहे। तैसेरे ज़िरिये सब किछ बनवं जेवं, अस तैसेरेलेइ जींतेम। 7 पन सेबभी विश्वासी लोकन इसेरू ज्ञान नई; पन किछ लोक हेजू तगर मूरतन असली भोनेरी सोचनेरी आदते, एल्हेरेलेइ जैखन लोक मूरतन कां चाढतन, त तैना असली देबतन पूजा केरे रूपे मां सोचतन ते तैन केरो ज़मीर कमज़ोर भोइतां अशुद्ध भोइ गाते। 8 पन खानू असन परमेशेरे कां न पुजाए, अगर अस न खाम, त असन किछ नुकसान नई, ते अगर खाम त कोई फेइदो भी नई। 9 पन हुशार राथ, एरू न भोए, कि तुश्शी ई आजादी कमज़ोर विश्वासे बालां केरे लेइ पाप केरनेरे लेइ वजा बने। 10 किजोकि अगर तीं जैनी मन्दरे मां मूरतन कां चाढोरू खातो लाए, ते तै विश्वासे मां कमज़ोर मैन्हु भोए, ते कुन तैसेरे ज़मीरे मां मूरती केरे सामने त्रैढोरी चीजां केरे खानेरी दिलेरी न भोली। 11 एस रीति सेइं तेरे ज्ञानेरे वजाई सेइं तै विश्वासे मां कमज़ोर ढूला जेसेरे लेइ मसीह मरो तै मसीह पुड़ विश्वास केरनो न शारे। 12 एन्चरे तुस अपने विश्वासी लोकन ठोकर पुजेइतां न सिर्फ तैन केरे पापी भोए, बल्के मसीहेरे भी पापी भोले। 13 इस वजाई सेइं अगर खानू कोन्ची विश्वास केरनेबालेरे लेइ ठोकर भोए, ते अवं कोन्ची तरीके सेइं कधी मास न खेइलो, एरू न भोए कि मेरू खानू कोन्ची विश्वास केरनेबालेरे लेइ ठोकरारी वजा बने। (aiōn g165)

9 अवं जैन केरनू चाताई तैन केरनेरे लेइ आजाद आई। अवं अक प्रेरित आई, मीं प्रभु यीशु लावरोए जै इश्शो प्रभुए, जैन कम मीं प्रभुएरे लेइ कियू तुस तैसेरो नतीजोथ। 2 अगर होरे लोक इस गल्ली न मननू कि अवं प्रभु यीशुएरो प्रेरित आई, त ढूलाव तुसेई त लोडे मन्ोरू। किजोकि मीं ए तुसन कां खुशखबरी आनोरी थी। तुश्शो प्रभु विश्वास इस गल्ली साफ केरते कि अवं हकीकति मां तैसेरो प्रेरित आई। 3 जैना लोक मेरे प्रेरित भोनेरे अधिकारे पुड़ सवाल पुच्छतन, तैन केरे लेइ मेरो ईए फैसलो आए। 4 कुन असन खाने पीनेरू हक नई? 5 कुन असन अधिकार नई, कि कोन्ची मसीही कुआन्शी सेइं इला बनाम, जेन्चरे होरे प्रेरित, ते प्रभुएरे ढूला ते कैफा (यानी पतरस) केरतन? 6 या सिर्फ मीं ते बरनबासे जिन्दगी जींनेरे लेइ कम कियोरू लोडे? 7 को जेरो फौजी अपनू खेइतां जंग केरते? या कौन बाग लेइतां तैसेरो फल न खाए? कौन भैडुं रेखतां तैन केरू दुद्ध न पीए? 8 अवं इना गल्लां मैन्हु केरि रीति पुड़ नई लोरो जोने, मूसेरो कानून भी इन्ने जोते। 9 एल्हेरेलेइ मूसेरो कानून जोते, तैस मां इन लिखोरूए, “तुस खल्ले मां चलते बार दांतेरू आशी न बेंदथ।” कुन परमेशर दांतां केरि फिक्र केरते? नई। 10 या खास केरतां इश्शे बारे मां लिखोरू, हाँ इश्शे लेइ लिखोरूए, किजोकि ठीके कि जोटलने बालो उमीदी सेइं जोटले, उपाने बालो उमीदी सेइं उपाए। 11 असेई तुसन परमेशेरो सन्देश शुनोवरोए। जेन्चरे लोक बीज बतन तेन्चरे असेई तुसन मां परमेशेरे वचनेरू बीज बेव। एल्हेरेलेइ तुश्शो फरजे कि इश्शे रोजेरो खर्चो असन देथ। 12 ज़ां कि तुसेई होरि लोकां केरि मद्दत की, जैनेई तुसन प्रचार कियो, त मेरू त कने बरनबासेरू जादे हके। किजोकि अस तुश्शे पेइले प्रेरित आम, फिर भी असेई अपने ज़रूरते चीजां केरे लेइ ज़बरदस्ती न की, तैसेरे बदले अपने मेर्जी सेइं सब किछ झैल्लू

कि मसीहेरे खुशखेबरी पुड़ विश्वास केरनेरे लेइ केन्चरे लेइ रुकावट बनम। 13 कुन तुस न ज्ञानथ कि जै पवित्र चीजां केरि सेवा केरते; तै मन्दरे मरां खाते; ते जै बलिदान केरनेरे ठारारी सेवा केरते; तै बलिदान केरनेरे ठारी सेइं शामिल भोते। 14 एन्चरे प्रभुए ठहराव, कि जैना लोक खुशखबरी श्रुतान, तैन केरि ज़िन्दगारो गुजारो भी तैन लोकन करां लोड़े भोरो जैना लोक खुशखबरी श्रुतन। 15 पन मीं इन अधिकारन मरां कोई भी इस्तेमाल न कियो। ते मीं एना गल्लां एल्हेरेलेइ नई लिखारी, कि मेरे लेइ एरू कियूं गाए। बिलकुल नई! किजोकि इस करां त मेरू मरनु रोडूए; कि कोई मेरू घमण्ड बैफैइदू ठहराए। 16 ते अगर अवं खुशखबरी श्रुनेई, त मेरू किछ घमण्ड नई, किजोकि इन त मेरे लेइ ज़रूरीए, ते अगर अवं खुशखबरी न श्रुनेई, त मीं पुड़ अफ़सोस। 17 किजोकि अगर अवं इन कम अपने मेर्ज़ी सेइं केरताई, त मीं इनाम मैलेलू। पन अगर इन मेरी मेर्ज़ी सेइं नई, पन अगर परमेशेरे ई ज़िमेदारी दित्तोरीए, त अवं कोन्ची इनामेरी उमीद न रेख्खी बेटि। 18 ते फिरी मेरू कुन इनामे? कि खुशखबरी श्रुताने मां मसीहेरी खुशखबरी मुफ्त बेंटी; इड़ी तगर कि जैन खुशखेबरी मां मेरू हक्के, तैसेरो पूरो इस्तेमाल केरि। 19 किजोकि सेबन करां आज़ाद भोने पुड़ भी मीं अपनी आप सेबनी केरो गुलाम बनाव; कि जादे करां जादे लोकन खिचतां ऐनीं। 20 अवं यहूदी केरे लेइ यहूदी बनो ताके यहूदन खिचतां मसीह मां ऐनीं, जैना लोक यहूदी केरे कानूनेरे अधीन्न तैन केरे लेइ कानूनेरे अधीन न भोने पुड़ भी अधीन भोव, कि तैन जैना कानूनेरे अधीन्न तैन खिचतां मसीह मां ऐनीं। 21 जैना कानूनेरे अधीन नई तैन केरे लेइ अवं (पन अवं ज्ञानताई कि अवं परमेशेरे कानूने करां हीन नई, किजोकि अवं मसीहेरे कानूनेरे अधीन आई) तेरो बनो, कि तैन खिचतां मसीह कां ऐनीं। 22 अवं विश्वासे मां कमजोरां केरे लेइ कमजोर बनो, ताके कमजोरन खिचतां मसीह मां ऐनीं, अवं सेबनी मैन्हु केरे लेइ सब किछ बनो, कि कोन्ची न कोन्ची तरीके सेइं लोकन मुक्ति मैल्ली। 23 ते अवं सब किछ मसीहेरे खुशखेबरारे लेइ केरताई, कि अवं होरन सेइं साथी तैन बरकतां केरो हिस्सेदार भोई। 24 कुन तुस न ज्ञानथ, कि दौड़ी मां त सब दौड़तन, पन इनाम अक्के नेते, तुस तेरहु दौड़ा, कि ज़ींतथ। 25 ते हर अक पलवान हर किसमेरो परेज़ रखते, तै त अक शुकने बाले ताजेरे लेइ इन सब किछ केरते, पन अस त तैस ताजेरे लेइ केरतम जैन कधी नई शुकनू। 26 एल्हेरेलेइ अवं एन्चरे दौड़ताई, पन बगैर मकसदे नई, अवं भी एन्चरे मुकन सेइं लड़ताई, पन तैसेरो जेरो नई जै हवाई मां लड़ते। 27 पन अवं अपने जानरी खुवैइशन मारताई, ते कैबू मां केरताई; एरू न भोए कि होरन प्रचार केरि, ते मीं इनाम न मैलेले।

10 हे ह्लाव ते बेइनव, अवं तुसन याद करानू चाताई, इश्शे दादे-पड़दादन सेइं बड़े पेइले सुनसान ठैरी मां कुन भोवं, परमेशेरे तैन केरे अग्री-अग्री बिदलार भेजतां तैन सेबन बत हिराई, ते तैना सब लाल समुन्दरेरे पैनी मांमेइं एन्चरे पार किये जेन्चरे शुककोरी ज़मीनी मांमेइं। 2 ते तैन सेबभेई बिदलारी मां, ते समुन्द्रे मां मूसरो बपतिस्मो

नेव। 3 ते तैन सेबभेई तै रोटी खाइ, जै परमेशेरे तैन स्वर्गोर् दित्ती। 4 तैन सेबभेई अक्के पानी पिव जैन परमेशर तैन दित्तू, किजोकि तैना आत्मिक चट्टानी मरां पीते थिये, जै तैन सेइं साथी-साथी चलती थी; ते तै चट्टान मसीह थियो। 5 पन परमेशर तैन मरां बड़न सेइं खुश न भोव, एल्हेरेलेइ तैना रेगिस्ताने मां मेरि जे। 6 इना गल्लां इश्शे लेइ खबरदारी भोइ, कि जेन्चरे तैनेई लालच कियूं, तेन्चरे अस बुरी चीजां केरू लालच न केरम। 7 ते न मूरती केरि पूजा केरनेबाले बनम; जेन्चरे तैना किछ बनोरे थिये, जेन्चरे पवित्रशास्त्रे मां लिखोरूए, “लोक तिहारे मां खाने पीने बिश्शे, ते फिरी बुरू केरनेरे लेइ उठे।” 8 ते न असां बदमाशी केरम; जेन्चरे तैन मरां किछेई की, कि एक्की दिहाड़ी मां 23000 मरे। 9 ते न अस प्रभु यीशु मसीह अज़माम; जेन्चरे तैन मरां किछेई अज़माव, ते तैना सपन सेइं मेरि जे। 10 ते न तुस कुड़कड़थ, जेन्चरे तैन मरां किछेई कुड़कड़व, ते परमेशेरे तरफां भेजोरे स्वर्गदूते तैना मारे। 11 पन इना सब गल्लां, जैना तैन पुड़ बीती, तैना खबरदारी जेरि थी, ते तैना इश्शी लेइ हदैइयत भी आन, जैना अस दुनियारे आखरी वक्ते मां रातम लिखी जेई। (aiōn g165) 12 एल्हेरेलेइ जै विश्वासी समझते, “कि अवं विश्वासे मां मज़बूताई,” तै खबरदार राए; कि तैस्से पापे मां फिरी न बिछड़े। 13 तुसन पुड़ एरी अज़मैइश नई ओरी, जै मैन्हु केरे झल्लनेरे बेइरे, परमेशर वाफदार, तै तुसन शक्ति करां जादे अज़मैइशी मां गाने न देलो, बल्के अज़मैइशी सेइं साथी तैस मरां कढेलो भी; कि तुस झेल्ली भी बटथ। 14 एल्हेरेलेइ, हे मेरे दलाराव, मूरती पूजने करां बेंचते राथ। 15 अवं समझदार बुझतां, तुसन सेइं ज़ोताई, जैन अवं ज़ोताई, तुस तैसेरे बारे मां सोचा कि सही आए या नई। 16 जैखन अस यीशु मसीहेरे मौती याद केरनेरे लेइ अकोट्टे भोतम, त अस दाछारो रस कटोरे सेइं पीतम, जेसेरे बारे मां असेई परमेशेरेरू शुक्र कियोरूए, ते अस दलोडोरी रोटी भी खातम, ई तैन बरकतन मां शामिल भोनेरो निशाने, जैना मसीहेरे जानी ते खूने करां एइतिन? 17 एल्हेरेलेइ, कि अक्के रोटीए जै मसीहे, चाए अस बड़ेम, अस अक जान भोतम किजोकि अस तैए अक्के रोटी खातम। 18 इस्राएलेरे लोकां केरे बारे मां सोचा, जैखन सारे लोक परमेशेरे लेइ चाढोरी रोटी खातन, तैना परमेशेरे आराधनारे हिस्सेदार भोतन, तेन्चरे जैना लोक मूरतन कां बलिदान कियोरी चीज़न खातन तैना मूरती केरि पूजाई मां हिस्सेदार भोतन। 19 फिरी अवं कुन ज़ोताई? कि मूरती बलिदान किछे, या मूरती किछे? 20 नई, बल्के इन, कि तैना जैन बलिदान केरतन, तैना परमेशेरे लेइ नई, पन भूतां केरे लेइ केरतन, ते अवं न चैई कि तुस भूतन सेइं साथी शामिल भोथ। 21 तुस प्रभुएरे कटोरे, ते भूतां केरे कटोरे दुइयन मरां न पी बटथ! तुस प्रभुएरे मेजे ते भूतां केरे मेजे मां शामिल न भोइ बटतथ। 22 कुन अस प्रभु सरकातम? कुन अस तैस करां जादे शक्ति बालेम? 23 तुस ज़ोतथ, अस किछ भी केरनेरे लेइ आज़ाद आम, हाँ, पन सब किछ इश्शे लेइ रोडू नई। अस किछ भी केरनेरे लेइ आज़ाद आम, पन सब किछ इश्शे विश्वासे जै परमेशेरे पुड़े मज़बूत न केरे। 24 कोई अपने भलेरे बारे मां न सोचे बल्के

होरि केरे भलेरे लेइ सोचे। 25 जैन किछ किसैई केरे दुकान्न पुड़ बिकते, तैन खाथ, ते इन न पुच्छा कि मास कोट्टां आनोरू ते अपनो ज़मीरे शुद्ध रखा। 26 तुस तैन खाथ किजोकि पवित्रशास्त्र ज़ोते, “धरती ते सैरी चीज़ां प्रभुएरी आन।” 27 ते अगर गैर विश्वासी लोकन मरां तुसन कोई धाम ज़ोए, त तुस गानू चातथ, त ज़ैन किछ तुशशे सामने रखू गाए तैन खाथ, ते किछ न पुछा, कि कोट्टां आनोरू। 28 पन अगर कोई तुसन सेइं ज़ोए, “इना त मूरतन कां बलिदान कियोरू,” त तुस तैस न खाथ, तुशशे ज़मीरेरे वजाई सेइं नईं बल्के ज़ैने तुसन सेइं ज़ोवं तैसेरे ज़मीरेरे वजाई सेइं। 29 मेरो मतलब, तेरो ज़मीर नईं, बल्के तैस होरेरो। भला, मेरी आज़ादी होरि मैनेरे ज़िरिये किजो परखी गाए? 30 अगर अवं शुक्र केरतां खाताई, त ज़ैस पुड़ अवं शुक्र केरताई, तैसेरे वजाई सेइं मेरी बदनामी किजो भोतीए? 31 आखरी मां अवं इन ज़ोताई, तुस चाए खाथ, चाए पीथ, या चाए ज़ैन किछ केरा परमेशेरी महिमारे लेइ केरा। 32 अवं ज़ैन किछ केरताई, हर केन्ची खुश केरनेरी कोशिश केरताई, अपने भलेरे बारे मां न सोची बल्के होरि केरे भलेरे बारे मां सोचताई, ताके सेबन मुक्ति मैल्ले। एन्चरे तुस भी ज़ीथ ताके तुशशे वजाई सेइं न यहूदन, न गैर यहूदन न परमेशेरेरे कलीसियाई परेशानी भोए।

11 जेन्चरे अवं मसीहेरी ज़ेरि चाल चलताई तुस भी मेरी ज़ेरि चाल चला। 2 हे ढूलाव ते बेइनव, अवं तुशशी तारीफ़ केरताई, किजोकि तुस मीं हर वक्त याद केरते रातथ; ते ज़ै शिक्षां मीं तुसन दित्ती तैन केरे मुताबिक चलतथ। 3 ते अवं चाताई, कि तुस इन ज़ानथ, हर एक्के मड़देरी क्रोड़ी मसीहे, ते कुआन्शरी क्रोड़ी मड़दे, ते मसीहेरी क्रोड़ी परमेशे। 4 ज़ै मड़दे क्रोड़ी ढेकतां प्रार्थना या भविष्यवाणी केरते, तै अपने क्रोड़ारी अनादर केरते, किजोकि तैन घमण्डेरे बराबरे। 5 पन ज़ै कुआन्श बगैर दोग ढेकतां प्रार्थना या भविष्यवाणी केरतीए, तै अपने क्रोड़ारी अनादर केरती, किजोकि तैन टिनडी भोनेरे बराबरे। 6 अगर कुआन्श ओड़नी न ओड़े, त दोग भी कटे; अगर कुआन्शरे लेइ दोग कट्टानो शरमरी गल्ले, त ओड़नी ओड़े। 7 हाँ मड़दे अपनो दोग ढकनो जेइज़ नईं, किजोकि तै परमेशेरेरू रूप ते शोभाए; पन कुआन्श मड़देरी शोभाए! 8 किजोकि मड़दे कुआन्शी मरां नईं, बल्के कुआन्श मड़दे मरां निसोरिए। 9 ते मड़दे कुआन्शरे लेइ नईं पन कुआन्श मड़देरे लेइ बनेवरीए। 10 एल्हेरेलेइ स्वर्गदूतां केरे वजाई सेइं कुआन्शरे लेइ इन ठीके कि अपने दोग ढक्के, ताके इस सेइं बांदू भोए कि ते मड़देरे अधीने। 11 फिरी भी प्रभु पुड़ विश्वास केरनेबालन मां कुआन्श मड़दे करां अलग नईं, ते न मड़दे कुआन्शरी करां अलगे। 12 किजोकि जेन्चरे पेइली कुआन्श मड़दे मरांए, पन हुनी मड़दन कुआन्श ज़र्म देतीए। सब चीज़ां परमेशेरे करां आन। 13 तुस एप्पू फैसलो केरा, कुन कुआन्शी खुले आम आराधनाई मां बगैर दोग ढेकतां परमेशेरे कां प्रार्थना केरनि शोभतीए? 14 कुन तुस भी न ज़ानथ, कि अगर मड़दे लमो दोग रखे त तैसेरेलेइ शरमे। 15 पन अगर कुआन्श लमो दोग रखे; ते तैसेरेलेइ शोभाए किजोकि बाल तैसेरे ढकनेरे लेइ दित्तोरैन। 16 पन अगर कोई मीं सेइं राजी न

भोए, त इन समझे न इशशी न इशशे परमेशेरी कलीसियां केरि एरी रीतए। 17 इस बारे मां अवं तुसन इन ज़ोताई, अवं तुशशी तारीफ़ न केरि, एल्हेरेलेइ कि तुशशे अकोट्टे भोने सेइं भलाई नईं, बल्के नुकसान भोते। 18 किजोकि पेइलू त अवं इन शुनताई, कि ज़ैखन तुस कलीसिया मां आराधनारे लेइ अकोट्टे भोतथ, त तुसन मां अन-बन भोतीए ते अवं किछ हदी तगर याकीन केरताई। 19 पन, बिलकुल तुसन मां बटवारो भोरो लोड़े, ताके तुसन ज़ैन कां परमेशेरी मन्जूरीए पिशाने गाथ। 20 ते ज़ैखन तुस इशशे प्रभु यीशुएरी मौती याद केरनेरे लेइ एककी ठैरी अकोट्टे भोतथ, त तुशशे बतवि सेइं इन न लगगे कि प्रभु भोज खानेरे लेइ अकोट्टे भोरेथ। 21 किजोकि खानेरे वक्ते हर कोई अपनो डूलाछड़ो होरन करां पेइलो खाते, ते किछ न नियन्नो रहतन, ते किछ मतवालो भोइ गाते। 22 कुन खाने पीनेरे लेइ तुसन घर नईं या परमेशेरी कलीसियाई घटिया समझतथ, कि ज़ैन कां नईं तैन छितातथ अवं तुसन कुन ज़ोई? कुन इस गल्ली मां तुशशी तारीफ़ केरि? अवं तारीफ़ न केरि। 23 ज़ै शिक्षा मीं प्रभु करां पुज़ी तै शिक्षा मीं तुसन दित्ती, कि प्रभु यीशुए ज़ैस राती तै ट्लुवाव जेव तैने रोटी नी। 24 ते शुक्र केरतां ट्लोडी, ते ज़ोवं; “कि ई रोटी मेरे जानी हिराती, ज़ै तुशशे मुक्करे लेइ बलिदान की गातीए, मेरी यादी मां इन्ने केरा।” 25 ते एन्चरे ज़ैखन तैनेई रोटी खाइ, यीशुए दाछारो कटोरों भी नेव, ते ज़ोवं; “ई कटोरों मेरे खूने मां नव्वो करारे, ज़ैखन भी पीथ, मेरे यादी मां इन्ने केरा।” 26 किजोकि ज़ैखन ई रोटी खाथ, ते इस कटोरें मरां पीथ, त प्रभुएरे मौती ज़ांतगर तैन एज्जे, इस बारे मां ज़ोते राथ। 27 एल्हेरेलेइ ज़ै कोई प्रभुएरे रोटी नाजाइज तरीके सेइं खाए, या प्रभुएरे कटोरें मरां पीये, तै प्रभुएरे जानरो ते खूनेरे खलाफ पापी भोलो। 28 एल्हेरेलेइ मैन्हु अपने बतवि परखे ते एन्चरे इस रोटी मरां खाए, ते इस कटोरें मरां पीये। 29 किजोकि ज़ै इस रोटी खाते ते कटोरें मरां पीते बार इन न पिशाने कि तैसेरो रिश्तो प्रभुएरी जानी सेइं केरोए, तै इस खाने पीने सेइं एप्पू पुड़ आफत आनते। 30 एल्हेरेलेइ तुसन मरां बड़े कमज़ोर ते रोगी आन, ते बड़े मेरि भी जे। 31 एल्हेरेलेइ अगर अस पेइले अपनो आप परखम त परमेशर असन सज़ा न देलो। 32 पन प्रभु असन सज़ा देइतां शिखालते एल्हेरेलेइ कि अस दुनियाई सेइं साथी दोषी न भोम। 33 ते हे मेरे ढूलाव ते बेइनव, ज़ैखन तुस प्रभुएरी रोटी खानेरे लेइ अकोट्टे भोतथ, एककी होरि बलगा। 34 अगर कोई नियन्नो भोए त अपने घरे मां खाए, ज़ैस सेइं तुस अकोट्टे भोथ, रोड़े चारे बर्ताव केरा, ज़ैस सेइं प्रभु तुसन सज़ा न दे, ते होरि गल्लां अवं एइतां ठीक केरेलो।

12 हे मेरे ढूलाव ते बेइनव, हुनी तुशशे तैस सवालेंरे बारे मां ज़ै तुसेईं पवित्र आत्मारें वरदानां केरे बारे मां पुच्छो, अवं चाताई तुस रोड़े चारे समझा। 2 तुस ज़ानतथ, कि तुस विश्वास केरने करां पेइले तुसन जेन्चरे ज़ीते थिये तुसन पुड़ भूतां केरो अस्सर भोतो थियो, कि तुस मूरती केरि पूजा केरथ, ज़ैना ज़ीती न भोन। 3 एल्हेरेलेइ अवं चाताई तुस ज़ानथ, कि ज़ै कोई परमेशेरेरे आत्मारें जुवाने सेइं ज़ोते, तैन ज़ोए, कि यीशु लानतीए, सिर्फ़ एक्कैलो पवित्र आत्मा आए, ज़ै इस काबल

बनाते, कि कोई भी इन जोई सकते कि “यीशु प्रभुए।” 4 वरदाना त बड़े किसमां केरन, पन इना सब परमेशरेरो आत्मा देते। 5 अस बड़े किसमां केरू कम परमेशरेरे लेइ केरतम, पन अस तैस्से एक्की प्रभुएरी सेवा केरतम। 6 परमेशर इश्शे ज़िन्दगी मां अलग-अलग किसमे सेइं कम केरते, पन तैए परमेशर ज़ै असन सेबन तैसेरेलेइ कम केरनेरी काबलीत देते। 7 असन सेबन अक एरी काबलीत दित्तोरीए, ज़ैस सेइं पवित्र आत्माारी हज़ूरी साबत भोती, ताके अस अपने सैथी विश्वासी लोकां केरि मद्दत केरम। 8 किजोकि परमेशरेरे आत्माे ज़िरिये एक्की मैन्हु समझदैरारो सन्देश शुनानेरी काबलीत दित्तोरीए, ते होरि मैन्हु तैस्से आत्माे ज़िरिये सेइं ज़ानेरो सन्देश शुनानेरी काबलीत दित्तोरीए। 9 तैए आत्मा एक्की मैन्हु मसीह पुड़ मज़बूती सेइं विश्वास केरनेरी काबलीत देते, ते तैए होरि मैन्हु, बिमार लोकन बझानेरी काबलीत देते। 10 आत्मा एक्की मैन्हु चमत्कारेरां कम्मां केरनेरी शक्ति देते, ते होरि परमेशरेरो सन्देश शुनानेरू वरदान, ते कोन्ची आत्मां केरि परख, ते कोन्ची मैन्हु बड़े किसमां केरि भाषां ज़ोनेरी काबलीत दित्ती, ज़ैना तैने नई पेढ़ोरी, ते होरि मैन्हु तैन भाषां केरो मतलब समझानेरी काबलीत दित्ती, ज़ैना तैनेई नई पेढ़ोरी। 11 सब वरदानां तैस्से एक्की पवित्र आत्मारू कम्मे। तैए ज़ेन्चरे चाते सेबनी विश्वासी लोकन वरदान देते। 12 किजोकि ज़ेन्चरे इश्शे जिसम त अक्के ते तैसेरे अंग बडेन, ते तैस एक्की जिसमेरे अंग हछछे भोने सेइं भी सब मिलतां अक्के जिसमे, तेन्चरे मसीह भी आए, ते तैना भी ज़ैना तैस पुड़ विश्वास केरतन। 13 किजोकि असेईं सेबभेईं कुन यहूदी, कुन गैर कौमां, कुन गुलाम, कुन आज़ाद अक्के आत्माे ज़िरिये अक जिसम भोनेरे लेइ बपतिस्मो नेवरोए, ते असन सेबन अक्के आत्मा मैल्ली। 14 इश्शे जिसमे मां अक्के अंग नई, बल्के बडेन। 15 अगर पव जोए अवं हथ नई, एल्हेरेलेइ अवं जिसमेरो अंग नई। त कुन तैसेरे ज़ोने सेइं तै जिसमेरो अंग न राए? 16 ते अगर कन्न जोए; “अवं अछ नई, एल्हेरेलेइ अवं जिसमेरो अंग नई,” त कुन तैसेरू एरू ज़ोने सेइं तै जिसमेरो न राए? 17 अगर सारो जिसम अछछे भोथी त शुन्नु कोट्टां भोथू? ते अगर सारो जिसम कन्न भोथो त शीघनू कोट्टां भोथू? 18 पन सच्चे परमेशरे इश्शे जिसमे मां अंग अपने मेर्जी सेइं अक-अक केरतां इश्शे जिसमे मां अपने-अपने ठैरी रखेरेन। 19 अगर तैना सभे अक्के अंग भोथे, त फिरी जिसम न भोथो। 20 एल्हेरेलेइ, जिसमेरे बड़े अंग भोने सेइं अक जिसम बनते। 21 अछ हथ्ये सेइं न जोई सके, “मीं तेरी ज़रूरत नई,” ते न क्रोड़ी पवन सेइं जोई बटतीए, “मीं तेरी ज़रूरत नई।” 22 पन जिसमेरे अंग ज़ैना होरन करां कमज़ोर लेइहोतन, बड़े ज़रूरिन। 23 ते जिसमेरे ज़ैन अंगन अस आदरारे काबल न समझम तैन केरि अस जादे आदर देतम; ते इश्शे अशोबते अंग होरे भी रोड़े भोतन। 24 फिरी इश्शे शोबते अंगन एसेरी ज़रूरत नई, पन परमेशरे जिसम बनोवरोए, कि ज़ैस अंगे घटी थी तैस होरि भी जादे आदर भोए। 25 परमेशरे एन कियू ताके जिसमेरे अंगन मां अन-बन न भोए, पन तैना एक्की होरेरी देख-भाल केरन। 26 एल्हेरेलेइ अगर जिसमेरे एक्की अंगे दुःख मैलते, त

सारी जान ते सब अंग तैस सेइं साथी दुखी भोतन; ते अगर एक्की अंगेरी बड़याई भोतीए; त तैस साथी सब अंग आनन्द केरतन। 27 एन्चरे तुस सब मिलतां मसीहेरो जिसमथ, ते तैसेरे जिसमेरे अंगथ। 28 मसीहेरी जानी मां यानी कलीसियाई मां, परमेशरे असन अलग-अलग कम केरने जो दित्तोरूए, पेइले प्रेरित, दुइयोवं नबी, ट्लेइयोवं शिक्षा देनेबाले, फिरी तैना, ज़ैन चमत्कार केरनेरो अधिकार दित्तोरोए। फिरी तैनी तैना ज़ैन बझानेरो अधिकार दित्तोरोए, ते तैना ज़ैन होरि केरि मद्दत केरनेरी काबलीत दित्तोरोए, ज़ैना प्रधान, तैना ज़ैन पवित्र आत्माे तरफां अलग-अलग किसमां केरि भाषां ज़ोनेरी काबलीत मैली। 29 हर कोई प्रेरित नई। हर कोई नबी नई। हर कोई शिक्षा देनेबालो नई। हर कोई चमत्कार केरनेबालो नई। 30 कुन सेबन बझानेरू वरदान मैलेरू। हर कोई अलग-अलग भाषां केरनेबालो नई। हर कोई भाषां केरो मतलब समझानेबालो नई। 31 सेबन कां तरजमो केरनेरी काबलीत नई, रोडू त इन आए पवित्र आत्मां करां वरदानां हासिल केरनेरी बेड़ि इच्छाई मां राथ। पन सच्चे रोडू कुने, तैन अवं हुनी जोताई।

13 अगर अवं मैन्हु, ते स्वर्गदूतां केरि भाषां केरि, ते प्यार न रेख्खी, त अवं ठन-ठन केरनेबाली पितल, ते झन-झन केरनेबाली झाझाई। 2 ते अगर अवं भविष्यवाणी केरि सेखी, ते सब भेद ज़ैनी ते, मीं इड़ी तगर पूरो विश्वास भोए, कि पहाड़न घासेईं, पन प्यार न रेख्खी, त अवं किछ भी नई। 3 ते अगर अवं अपनि सारी जेइदाद कंगालन देई, या अपनो जिसम फुकनेरे लेइ देई, ते प्यार न रेख्खी, त इन मेरे कोन्ची कम्मेरू नई। 4 ज़ैना लोक होरन सेइं प्यार केरतन तैना सबर ते दयाई सेइं कम केरतन, तैना जलन न केरन, तैना अपनि बडीयाई न केरन, ते न घमण्ड केरन। 5 तैना होरन बेइज़्जत न केरन, तैना खुदगरज़ न भोन, जल्दी क्रोध न केरन ते ज़ैना बुरी गल्लां तैन केरे खलाफ भोइ, तैन तैना याद न केरन। ते तैन केरे खलाफ ज़ैना पाप केरतन तैना, तैन बड़े आसान तरीके सेइं माफ़ केरतन। 6 तैना खुश न भोन ज़ैखन लोक बुरू केरतन, पन तैना तैखन खुश भोतन ज़ैखन लोक तैन केरतन ज़ैन ठीक ते सच्चू। 7 तैना सब गल्लां झैल्लतन, प्यार विश्वास कधी न गुवाए, ते असन परमेशरे पुड़ भरोसो केरनेरे काबल बनाते, मुशकलन ते तकलीफन मां सबर रखते। 8 भविष्यवेनी ते गैर भाषां ते खास ज्ञान बेकार भोलू। पन प्यार हमेशारे लेइ रालो! 9 किजोकि इश्शू ज्ञान ते इश्शी भविष्यवाणी केरनेरी काबलीत अध्धीए, पन ज़ैखन सिद्ध एज्जेलो, त ज़ैन अधूरूए तैसेरी ज़रूरत नई। 11 इन मैनेरे बेडोनेरू जेरू आए। ज़ैखन अवं बच्चो थियो, त बच्चां केरो ज़ेरो ज़ोतो ते सोचतो ते समझतो थियो। पन ज़ैखन अस बड़े भोतम, त बच्चां केरि गल्लां शारतम। 12 एन्चरे असन सेइं भी आए ज़ैना अस विश्वास केरतम, किजोकि अस तैस मैनेरे ज़ेरे आम ज़ै खराब शीशे मां शकल हेरते, (किजोकि अस सब किछ रोड़े ज़ारे न जानम) सिर्फ एजनेबाले वक्ते मां, अस सब किछ समझामेले, एल्हेरेलेइ असेईं परमेशर आमने सामने हेरनोए। हुना मेरू ज्ञान पूरू नई। पन तैस एजनेबाले वक्ते मां (ज़ैखन तै दिहाड़ी एज्जेली) रोड़ेचारे ज़ैनेरो, परमेशर

भी मीं ज्ञानेलो। 13 लिहाजा, हुनी, ट्लाई किसमां केरि चीजन जैना असेई ज़रूरी केरनिन, परमेशरे पुड़ विश्वास, परमेशरेरे वादन पुड़ उमीद, ते परमेशरे ते होरन सेईं प्यार। पन इन ट्लाई गल्लन मां जै महाने, तै ईं आए: परमेशरे ते होरन सेईं प्यार केरन।

14 एक्की होरि सेईं प्यार केरनेरी कोशिश केरा। ते आत्मिक वरदानां केरि बड़ी इच्छा रखा, खास केरतां इन, कि भविष्यवाणी केरा। 2 किजोकि, जै गैर भाषाईं मां गल्लां केरते; तै मैनन् सेईं नईं, बल्के परमेशरे सेईं गल्लां केरते; एल्हेरेलेइ कि तैसेरी कोईं न समझे; किजोकि तै भेदेरी गल्लां पवित्र आत्मारै शक्ति सेईं जोते। 3 पन जै परमेशरेरे तरफां सन्देश शुनाते, तै विश्वासी लोकन, विश्वासे मां मज़बूत भोनेरे लेइ मद्दत केरते, ते होरि विश्वासी लोकां केरि हिम्मत बढ़ाते ते तस्सली देते। 4 जै गैर भाषाईं मां जोते, तै अपने विश्वासे मज़बूत केरते। पन जै भविष्यवाणी केरते, तै कलीसियारे विश्वासी लोकां केरे विश्वासे मज़बूत केरते। 5 अवं चाताईं, कि तुस गैर भाषाईं मां गल्लां केरा, पन जादे इन चाताईं कि भविष्यवाणी केरा: किजोकि अगर गैर भाषा जोनेबालो कलीसियारे विश्वासी लोकां केरे विश्वासे मां मज़बूत भोनेरे लेइ तरजमो न केरे त भविष्यवाणी केरनेबालो तैस करां जादे खास कम केरि रावरोए। 6 एल्हेरेलेइ हे ढूलाव ते बेइनव, अगर अवं तुसन कां एइतां गैर भाषाईं मां गल्लां केरि त तुसन मीं करां कुन फैइदो भोलो। पन अगर अवं प्रकाश या खास ज्ञान, या परमेशरेरो सन्देश शुनेईं या शिक्षा देईं त इस सेईं तुशुी मद्दत भोली। 7 एन्चरे, अगर तुस बाज़ो बज़ाथ जेन्चरे बेइशोईं या सारंगी, अगर तैन रोडे च़ारे न बज़ाव गाए त ज़ैन बज़ाव लावरू गाने त तैन केन्चरे पिशानेले बेइशोईं या सारंगी मां कुन लावरू बज़ने। 8 जंगी मां अगर नइशिन्नेरी आवाज़ साफ न भोए, त फौजी जंगरे लेइ तियार न भोइ सकन। 9 एन्चरे, ज़ैखन तुस तैना गल्लां केरथ ज़ैना होरि लोकन समझ न एजन, त ज़ैन किछ ज़ोवं गाते तैसेरी कोईं कीमत नईं। 10 दुनियाईं मां बेड़ि भाषा आन, त हर भाषारो मतलबे। 11 पन अगर अस तैस भाषाईं न समझम ज़ै होरे जोने लोरेन, त एन एरू भोलू, कि जेन्चरे तैना इशुशे लेइ परदेशी भोले ते अस तैन केरे लेइ परदेशी भोले। 12 एन्चरे तुस भी ज़ैखन पवित्र आत्मारै वरदानां केरे लेइ बड़ी इच्छा रखतथ, त तैन वरदानां केरि इच्छा रखा ज़ैन सेईं कलीसियारे विश्वासी लोक विश्वासे मां मज़बूत भोन। 13 एल्हेरेलेइ ज़ै गैर भाषा केरते, तै प्रार्थना केरे, कि ज़ैन किछ तैन ज़ोवं, तैसेरो मतलब समझेनेरे काबल भी भोइ सके। 14 किजोकि अगर अवं गैर भाषाईं मां प्रार्थना केरने लोरोईं, त मेरी आत्मा प्रार्थना केरतीए, पन मेरी सोचरे लेइ फैइदो नईं, किजोकि इन मीं समझ न एज्जे। 15 त फिरी मीं कुन कियोरू लोड़े? एरो भी वक्त भोते ज़ैखन मीं अपने आत्माईं सेईं प्रार्थना कियोरी लोड़े, एरो वक्त भी भोते ज़ैखन मीं अपने अक्ली सेईं भी प्रार्थना कियोरी लोड़े। किछ वक्ते मीं अपने आत्माईं सेईं गीतां ज़ोवरां लोड़े, ते होरि वक्ते मीं अक्ली सेईं भी गीत ज़ोवरां लोइन। 16 मन्ना कि ज़ैखन किछ आम मैन्हु तुशुशे आराधनाईं मां एजन, ज़ैखन तुस अपने आत्माईं सेईं परमेशरेरी

बडयाईं केरथ। अगर तैना तुशुशी न समझे, त तुशुशे परमेशरेरू शुक्र केरनेरे बाद तैना केन्चरे बुझले कि किताली, “आमीन” ज़ोनू, किजोकि तैना न समझे तुस कुन लोरेथ जोने। 17 तुशुशू परमेशरेरू शुक्र केरनू रोडूए, पन इन होरि केरे विश्वासे मज़बूत केरनेरे लेइ मद्दत न केरेलू। 18 अवं अपने परमेशरेरू शुक्र केरताईं, कि अवं तुसन सेव्भन करां जादे गैर भाषां केरताईं। 19 पन कलीसियाईं मां गैर भाषा केरने मां दश हज़ार गल्लां केरे जोनेरे केरतां इन मीं होरू भी रोडू लगते, कि होरन शिखालनेरे लेइ अक्ली सेईं पंजे गल्लां जोईं। 20 हे ढूलाव ते बेइनव, तुस इना गल्लां समझने मां बच्चे न बना, पन बुरैईं केरनेरे लेइ बच्चां केरे बना, पन इस किसमेरी गल्लां समझनेरे लेइ समझदार बना। 21 कानूने मां प्रभु जोते; “अवं बखलां केरे ज़िरिये जोइलो, जैना गैर भाषां केरेले, पन फिरी भी तैना मेरी न शुनेले।” 22 एल्हेरेलेइ असन मरां किछ गैर भाषा केरन ज़ै पवित्र आत्मारै तरफां आए, इशुशे शब्द तैन लोकां केरे लेइ प्रभुएरे शक्तिरो निशाने, ज़ैना प्रभु पुड़ विश्वास न केरन। 23 ते अगर कलीसिया एक्की ठेरी अकोट्टी भोए, ते सब गैर भाषा केरन, त आम लोक ज़ैना ई भाषा न समझन या गैर विश्वासी लोक अन्तर एजन त कुन तैना इन न सोचले कि तुस पागल आथ। 24 ते अगर सब भविष्यवाणी केरन, ते आम लोक या गैर विश्वासी लोक अन्तर एजन, त तैन एसास भोलो कि तैना पापिन, ते ज़ैन तैनेईं ज़ोवं तैसेरे वजाईं सेईं अपनि बत बदलेले। 25 ते परमेशरेरे सन्देशे सेईं तैन एसास भोलो कि तैनेईं बुरू कियोरू तैन केरे मनरे भेद बांदो भोइ गाले, ते तैन एसास भोलो कि तैना पापी आन त कने पापन करां मन फिराले। ते तैना मथ्यो टेकतां परमेशरेरी आराधना केरेले, ते मनेले कि परमेशर तुसन मां आए। 26 हे ढूलाव ते बेइनव कुन कियोरू लोडूए? ज़ैखन तुस आराधना केरने लेइ अकोट्टे भोतथ, त किछ भजन जोन, किछ उपदेश देन, ते किछ ज़ैन प्रकाशन परमेशरेरे तरफां आए तैस देन, ते किछ गैर भाषाईं मां गल्लां केरन ते किछ तैसेरो तरजमो केरन, तुस इन सब एल्हेरेलेइ केरा कि कलीसियारे लोकन विश्वासे मां मज़बूत भोनेरे लेइ मद्दत भोए। 27 अगर कोईं गैर भाषाईं मां जोने लोरोए, त दूईं या ट्लाई ज़ने बैरी-बैरी सेईं जोन, ते इन ज़रूरी कि अक मैन्हु तैस भाषारो मतलब जोए। 28 पन अगर तरजमो केरनेबालो न भोए, ते गैर भाषा जोने बालो कलीसियाईं मां चुप राए, ते चुपचारे अपने मने सेईं परमेशरे सेईं गल्लां केरे। 29 नेबन मरां दूईं या ट्लाई जोन, इन ज़रूरी आए कि हर कोईं शुने, ते सोचन ते परखन कि ज़ैन किछ ज़ोवं लोरू गाने सही आए या नईं। 30 पन अगर कोईं ज़ै तैडी सभाईं मां बिशरोए, तैस परमेशरेरे तरफां सन्देश मैल्ले, त ज़ै जोने लोरोए तै चुप भोए, ते तैस जोने दे। 31 किजोकि तुस सब अक-अक भविष्यवाणी केरि बटतथ, पन अक-अक भोइतां ताके सब शिखन, ते हिम्मत बद्धे। 32 ज़ै नबी परमेशरेरो सन्देश शुनाते, तै अपने आपे वशे मां रखते। ते इस काबले कि अपने मेर्ज़ी सेईं जोईं बटते ते चुप रेइ बटते। 33 किजोकि परमेशर गडबड केरनेबालो नईं, पन शान्ति देनेबालोए; ईं तै कानूने ज़ैस परमेशरेरे सैरी कलीसियारे लोक मन्तन। 34 कुआन्शां

कलीसियारे सभाई मां चुप रान, किजोकि तैन गल्लां केरनेरो हुक्म नई, जेन्चरे कानूने मां लिखोरू भी आए। 35 ते अगर तैना किछ सवाल पुच्छने चान, त सभाई मां न पुच्छन पन घरे अपने-अपने मुशन पुच्छन, किजोकि कलीसिया मां कुआन्शां केरि जादे गल्लां केरनि ठीक नई। 36 एरू किजो आए तुसन मरां किछ लोक पेइले ज़ोरे नियमन किजो न मन्नु चान? कुन तुस सोचतथ कि तुस पेइले लोक आथ जैनेई परमेशेरू वचन दित्तू? या सिर्फ तुसन दित्तू? 37 अगर कोई मैन्हु अपनो आप नबी समझे, या इन समझे कि मीं पवित्र आत्मा रे तरफां वरदान मैलोरूए, त इन समझे, कि जैना गल्लां अवं तुसन लिखताई, तैना प्रभुएरे हुक्मन। 38 पन अगर कोई इन गल्लन न मन्ने, त तैन पुड़ विश्वास न केर। 39 एल्हेरेलेइ हे ढूलाव ते बेइनव, भविष्यवाणी केरनेरी बड़ी इच्छा रखा, ते गैर भाषाई केरनेरे लेइ न ठाका। 40 पन तैन सब किछ जैन तुस कलीसियाई मां केरतथ तरीके सेइं कियूं गाए।

15 हे ढूलाव ते बेइनव, अवं तुसन तैए खुशखबरी याद कराताई जै मीं तुसन शुनावरी थी, ते जैस सन्देशे पुड़ तुसेई विश्वास कियोरो थियो, ते जैस पुड़ तुस तुसेई लगातार भरोसो रखोरोरुए। 2 अगर तुस तैस खुशखबरी पुड़ लगातार विश्वास केरते राले, जै मीं प्रचार की, त परमेशर तुसन बचालो। नई त तुश्शो विश्वास केरनो बेफैइदो भोव। 3 एल्हेरेलेइ मीं तुसन खास सन्देश दित्तो, जै मीं प्रभु यीशु मसीह करां मैल्लो। ते सन्देश ई आए, कि पवित्रशास्त्रेरे मुताबिक यीशु मसीह इश्शे पापां केरे लेइ मरो 4 ते दबो जेव, ते पवित्रशास्त्रेरे मुताबिक टलेइयोंव दिहाडे मुड़न मरां ज़ीतो भोव। 5 ते केफा (यानी पतरस) ते 12 चलन लेइहोव। 6 फिरी 500 करां जादे चलन एक्की साथी लेइहोव, जैन मरां हेजू बडे ज़ीतन ते किछ मेरि ज़ोरेन। 7 फिरी याकूबे लेइहोव फिरी सेभी प्रेरितन लेइहोव। 8 ते आखरी मां तैनी अपनो आप मीं पुड़ भी पुड़ बांदो कियो, अवं जै तैस बच्चेरे ज़ेरो आई जै ठीक वक्ते पुड़ नई ज़मोरू। 9 किजोकि अवं प्रेरितन मरां सेभना निकोडोई, बल्के प्रेरित जूवानेरे काबल भी नई, किजोकि अवं परमेशेररे कलीसियारे विश्वासी लोकन सतातो थियो। 10 पन परमेशेररे अनुग्रहे सेइं अवं प्रेरित आई। ते तैसेरो अनुग्रहरो अस्सर ई भोव कि, मीं तैन होरि प्रेरितन करां बेद्वतां मेहनत भी की, ते ई मेहनत मीं अपने तरफां न की, बल्के परमेशेर मेरी मदत की, कि अवं इन केरि। 11 ते चाए अवं भोइ, चाए होरे प्रेरित भोन, अस तैस मसीहरे बारे मां सन्देश प्रचार केरतम, ते इस्से पुड़ तुसेई भी विश्वास कियो। 12 एल्हेरेलेइ हुनी अवं पुछताई, जैखन मसीहरो ई प्रचार कियो गाते, कि तै मुड़न मरां ज़ीतो भोव, ते तुसन मरां किछ किजो ज़ोतन, कि मुड़दां केरू ज़ीतू भोनू अथ्थी नई? 13 अगर मुड़दां केरू ज़ीतू भोनू अथ्थी नई, ते फिरी मसीह भी नई ज़ीतो भोरु। 14 ते अगर मसीह भी मुड़न मरां ज़ीतो नई भोरु, त फिरी इश्शो सन्देश प्रचार केरनो भी बे फैइदोए; ते तुश्शो मसीह पुड़ विश्वास केरनो भी बे फैइदोए। 15 अगर मुड़दे ज़ीते न भोन, त असेई इन ज़ोइतां परमेशेररे बारे मां झूठ ज़ोव, कि परमेशेर मसीह ज़ीतो कियो जैन तैनी हकीकति मां नई कियोरू। 16 अवं

दुबारां फिरी ज़ोताई, अगर कोई मुड़न मरां ज़ीतो न भोए, ते फिरी मसीह भी मुड़न मरां ज़ीतो नई भोरु। 17 ते अगर मसीह मुड़न मरां ज़ीतो नई भोरु, त तुश्शो मसीह पुड़ विश्वास भी बे फैइदोए, ते तुस हेजू तगर अपने पापन मां ज़ीने लोरेथ। 18 बल्के जैना मसीह पुड़ विश्वास केरनेबाले मरें, तैना भी नाश भोए। 19 अगर अस सिर्फ इस ज़िन्दगी मां मसीह करां उमीद रखतम ते फिरी अस सेभी मैन्न करां नुभागम। 20 पन सच त इन आए कि परमेशेर मसीह मुड़न मरां इन साबत केरनेरे लेइ ज़ीतो कियोरो, ते जैना मरें, तैन मां पेइलो फल भोए। 21 किजोकि जैन पेइले मैने यानी आदमे कियूं, तैसेरे वजाई सेइं सब मैन्हु मरे, एन्चरे जैना विश्वासी लोक एजनेबाले वक्ते मां मुड़न मरां ज़ीते किये गाले, तैन भी एक्की मैनेरे केरनेरे वजाई सेइं आए, ते तै मैन्हु मसीह आए। 22 एल्हेरेलेइ एक्की मैनेरे पापेरे यानी आदमेरे वजाई सेइं सब मैन्हु मरतन, तेन्चरे एक्की मैनेरे केरनेरे सेइं यानी यीशु मसीहे वजाई सेइं सारे फिरी मुड़दे ज़ीते किये गाले। 23 पन हर कोई ठीक तरीके सेइं ज़िन्दगरे लेइ वापस एज्जेलो, पन मसीह मुड़न मरां ज़ीतो भोनेबालो पेइलोए, फिरी जैन लोकां केरो रिश्तो तैस सेइं साथी आए, तैना भी ज़ीते भोले। 24 एसेरां पत्ती, मसीह सैरी दुष्ट शक्ति नाश केरेलो जैना परमेशेररी खलाफत केरतिन। ते दुनियारो खातमो भोलो। तैखन मसीह, अपने बाजी परमेशर अपनू राज, राज केरनेरे लेइ पूरे तरीके सेइं देलो। 25 मसीहे तेइस तगर राजेरू जेरू राज केरनू ज़रूरीए, ज़ांतगर परमेशर तैसेरे सारे दुश्मन तैसेरे अधीन न केरे। 26 सेभना आखरी जै दुश्मन खतम कियो गालो तै मौते। 27 जैखन पवित्रशास्त्र ज़ोते परमेशेर सब किछ तैसेरे अधीन मां केरेलो त इस मां परमेशर नई, किजोकि सब किछ मसीहरे अधीन केरनेबालो परमेशेर। 28 ते सब किछ परमेशेररे मट्टेरे अधिकारे मां केरनेरे बाद, तैखन तै अपनो आप रोड़े चारे परमेशेररे अधिकारे मां केरेलो, जैने तैस अधिकार दित्तो। सिर्फ परमेशर अकैल्लो प्रभुए तैए हर एक्की मां, ते हर गल्ली मां कम केरते। 29 हुनी तुस इस बारे मां सोचा, तुसन मां किछ एरे आन जैना मरें लोकां केरे लेइ बपतिस्मो नेतन, ते कोई तैन बपतिस्मो देते, अगर जेन्चरे किछ लोक ज़ोतन, विश्वासी लोक मुड़न मरां ज़ीते नई भोने, त फिरी एन केरनेरी कोई कीमत नई ते फिरी एन केरनेरी वजा नई। 30 ते इश्शे लेइ, अगर मुड़दे ज़ीते किये गान त अपनो आप खतरे मां रखनो बेवकूफी आए। 31 हे ढूलाव ते बेइनव, इन पक्कू आए कि तुश्शे बारे मां घमण्ड केरताई, किजोकि तुस इश्शे प्रभु यीशु मसीह मां आथ, इन भी पक्कू आए कि अवं रोज़ मौतेरे खतरे मां राताई। 32 मीं इफिसुस नगरे मां बेड़ि तैन केरे वजाई सेइं मुशकलां झैल्ली जैना मेरी खलाफत केरते थिये, तैना जंगली जानवरं केरे ज़ेरे थिये। लोकां केरे खियाले सेइं मीं तैन मुशकलन सेइं कुन हासिल कियूं? किछ भी नई। एल्हेरेलेइ इन साफे कि मुड़दे दुबारां ज़ीते न किये गान, त इन रोडूए जैन लोक ज़ोने लोरेन, “एज्जा, खाम पीम, किजोकि असेई कालां मरनू आए ते इन सब खतम भोनू।” 33 जैना एरी गल्लां ज़ोतन तैन केरे वजाई सेइं बेवकूफ न बना, “बुरी संगती रोड़े चाल-चलने बगाइतीए।” 34 तुस

अपने सोचरे रोड़ी बत्तां वापस एज्जा ते पाप केरनो शारा। किजोकि तुसन मां किछ एरे आन ज़ैन केरो रिशतो परमेशरे सेइं साथी नई। अवं तुसन छिथानेरे लेइ इन ज़ोताई। 35 पन किछ पुछतन, “कि मुडदे केन्चरे ज़ींते भोतन, ते केरहे जिसमे मां एइतन?” 36 हे बे समझाव, बीजे पुड ध्यान देथ, ज़ैखन बीज बेवं गाते, त पोदो बन्ने करां पेइलू तैस मरनू पेते। 37 ते ज़ैन तू बेतस, चाए इन गेहुं भोन या होरू किछ। इन ज़ै भोनेबालो पोदोए एन तैसेरू जेरू नई। 38 तैस बेनेरे पत्ती परमेशर तैस एपनी मेरजरे मुताबिक बडाते ज़ांतगर गेहुं केरि या होरि आन्नेरे डाल बांदे न भोन। 39 इस दुनियाई मां हर ज़ींती चीजां अलग-अलग आन इन सेबभी केरो जिसम अक्कां ज़ेरे नई। मैन्हु केरो जिसम केरो जिसम जानवरां केरो ज़ेरो नई। चलोडू केरो जिसम, मेछली केरो जिसम करां अलगे। 40 जेन्चरे इस धेरतली पुड बड़े किसमां केरे जिसम भोतन तेन्चरे अम्बरे मां भी दिहाडो चाँदनी, ते तारे आन, पन अम्बरेरी चीजां केरि शोभा होरि ज़ेरीए ते धेरतरे चीजां केरि शोभा होरि ज़ेरी आए। 41 ते दिहाडरी शोभा होरीए, चँदनी शोभा होरीए, ते तारां केरि शोभा होरीए, किजोकि तारे-तारेरी शोभाई मां फर्के। 42 मुडदां केरू ज़ींतू भोनू भी एरू आए। ज़ै जिसम नाश भोनेरे हालती मां दबो गाते, पन ज़ैखन ज़ींतो कियो गालो त कधी नाश न भोलो। 43 ज़ैखन अस मरतम (इश्शो जिसम) बदसूरत ते कमजोर भोतन। पन ज़ैखन ते दुबारां ज़ींतो भोतो त तै बड़े खूबसूरत ते मज़बूत भोते। 44 जेन्चरे इश्शे जिसमे मास ते खूने सेइं आन, एरे जिसम आन ज़ैन परमेशरेरो आत्मा ज़िन्दगी देते। ते इश्शे जिसम ज़ै मासे त कने खूनेरोए तैस जिसमे मां बेदलोलो, ज़ै परमेशरेरो आत्माए तरफां दित्तो गाते। 45 पवित्रशास्त्रे मां इन भी लिखोरूए, “कि पेइलो मैन्हु, मतलब आदम, ज़ींतो प्राणी बनो,” त आखरी आदम, यानी मसीह, हमेशारी ज़िन्दगी देनेबालो बनो। 46 मासे ते खूने सेइं साथी पेइले जिसम वजूदे मां आए फिरी तैना जिसम ज़ैना परमेशरेरो आत्मा देते। 47 पेइलो मैन्हु ज़मीनरो मतलब मित्ती सेइं बनोरो थियो, तेन्चरे दुइयोवं मैन्हु यानी मसीह, स्वर्गां ओरो थियो। 48 लोक ज़ैना इस धेरतरेन तैना धेरतरे पेइले मैन्हु आदमेरे ज़ेरेन। पन ज़ैना लोक स्वर्गेन तैना स्वर्गे मैन्हु यानी मसीहेरे ज़ेरे आन। 49 ते जेन्चरे असेई तैसेरू रूप ज़ै मितारो थियू धारण कियू, तेन्चरे तैस ज़ै स्वर्गाएरोए तैसेरू रूप धारण केरेमेले। 50 हे ढूलाव ते बेइनव, इश्शे जिसम इस धेरती पुड मास ते खूने सेइं बनोरो भोते, अस एरे ज़ेरे जिसमे सेइं साथी स्वर्ग मां परमेशरेरे राज़जे मां रानेरे काबल न भोले। अस स्वर्ग मां अपने मरने बाले जिसमे सेइं साथी न रेइ बटमेले, ज़ै मरते, किजोकि तैड़ी कोई मौत नई। 51 शुना, अवं तुसन सेइं भेदेरी गल ज़ोताई, अस सब नई मरने, पन ज़ैखन आखरी नइशिगेरी आवाज़ भोली, त अस सब एक्की पले मां बेदलोनेम, 52 ते इन एक्की पले मां, जेन्चरे कोई चिप केरते, ज़ैखन आखरी नइशिगो बज़ाव गालो त ज़ैना मरे थिये तैना ज़ींते भोनेन ताके हमेशारे लेइ ज़ींते रान, ते अस ज़ैना ज़ींतेम, इश्शे जिसम बेदलोनेन। 53 किजोकि इश्शो जिसम ऐसैनी सेइं मरते ते शड़ते, ते ई तैस जिसमे मां बेदलोई गालो ज़ै कथे न मरे ते न शड़े। 54

ज़ैखन इन भोलू, तैखन पवित्रशास्त्रे मां लिखोरू परमेशरेरू तैन वचन पूरू भोलू, ज़ैन ज़ोते, “मौत रोडे च़ारे हाराई गाली ते तैसेरू कोई वजूद न रालू।” 55 एन्चरे ज़ैन पवित्रशास्त्रे मां लिखोरू तैन पूरू भोलू, “हे मौत तेरी ज़ींतो कोडि राई? हे मौत तेरो डस कोडि राव?” (Hades g86) 56 मौती तकलीफ़ देनेरी शक्ति पापे करां मैलतीए, ते पापे कानूने करां शक्ति मैलतीए। 57 पन परमेशेरू शुक्रू भोए, ज़ै इश्शे प्रभु यीशु मसीहेरे ज़िरिये पापे ते मौत पुड ज़ींत देते। 58 हे मेरे ट़्लारे ढूलाव ते बेइनव, विश्वासे मां मज़बूत राथ ते गलत शिक्षाई सेइं न टेपलोथ, ते हमेशा प्रभुएरू कम जोशे सेइं केरा, किजोकि तुस इन ज़ानतथ, कि ज़ैन किछ तुसेईं प्रभुएरे लेइ कियू तैन बेफैडू नई।

16 हुनी तुश्शे तैस चन्देरे सवालारे बारे मां ज़ै यरूशलेम नगरेरे परमेशरेरे लोकां केरे लेइ कियो गाते, तुसेईं भी तेन्चरे कियोरू लोडे ज़ेन्चरे मीं गलातियारे कलीसियान हुक्म दित्तो। 2 हफतेरे पेइले दिहाडे तुसन मरां हर कोई अपने आमदनेरे मुताबिक किछ एप्पू कां रखा, कि मेरे एजने पुड चन्दो अकोट्टो न केरनो पे। 3 ज़ैखन अवं तैड़ी भोई, अवं किछ लोकन भेजेलो ज़ैन तुस चुनेले कि एना भरोसेरे काबलन, चन्दो घिन्तां यरूशलेम नगरे जो गान। अवं तैन कां चिट्टी भी भेजेलो ताके विश्वासी लोक तैन केरे बारे मां ज़ाननू। 4 ते अगर मेरू भी गानू ज़रूरीए, त तैना मीं सेइं साथी गाले। 5 ते मकिदुनिया गानेरे बाद अवं तुसन कां एज्जी रावरोई, किजोकि मीं मकिदुनिया मेइं गानेरो बिस्तार बनोरोए। 6 भोइ सकते, अवं तुसन सेइं साथी किछ च़िरे रुकेलो, शैड पूरे हिवतडो, फिरी तुस ज़ेरां मीं गानू भोलू, तेरहां मीं भेजां। 7 अगर ई परमेशेरी मर्जी भोली, ते मीं उमीदे अवं बादे मां जादे च़िरेरे लेइ तुसन कां एज्जेलो, न कि इस वक्ते थोडे च़िरेरे लेइ। 8 पन अवं पेन्तिकुसत तिहारे तगर इफिसुस नगरे मां रानोई। 9 किजोकि मीं बडो रोडो मौको मैलोरे ज़ैस सेइं अवं तैन कम केरि सकताई ज़ेसेरो अरसर बडोए, चाए बडे लोक मेरी खलाफत केरनेबाले आन। 10 अगर तीमुथियुस एज्जे, त तैस कबूल केरा, तैसेरी रोडे च़ारे आदर केरा, किजोकि ते मैरो ज़ेरो प्रभुएरू कम केरते। 11 एल्हेरेलेइ कोई तैस घटिया न समझे, पन तैन केरे सफरेरे लेइ ज़ै ज़रूरे तैन खुशी सेइं देथ। ताके मीं कां एज्जन, किजोकि अवं तैस लोरोई बलगने, कि ते विश्वासी ढूलान सेइं साथी एज्जे। 12 ते विश्वासी साथी अपुल्लोसे सेइं मीं बडी बिनती की, कि तुसन कां होरि विश्वासी मैनू सेइं साथी गाए ज़ैना तुसन सेइं मिलने ओरेन। पन तैनी इस वक्ते गानू न चाव, पन ज़ैखन ठीक वक्त भोलो, तैखन एज्जेलो। 13 खबरदार राथ, विश्वासे मां मज़बूत भोथ, हिम्मत रखा, मज़बूत भोथ। 14 ज़ैन किछ केरतथ तैन प्यारे सेइं केरा। 15 हे ढूलाव ते बेइनव, तुस स्तिफनासरेरे टब्बरे ज़ानतथ, कि तैना अखाया इलाकेरे, पेइले मसीह पुड विश्वास केरनेबालेन, ते परमेशरेरे लोकां केरि मद्दत केरनेरे लेइ ज़ैन किछ केरि बटते थिये तैनेई तैन कियू। 16 अवं तुसन कां बिनती केरताई कि एरे लोकां केरे अधीन राथ, बल्के तैन केरे भी ज़ैना इस कम्मे मां मेहनत केरतन ते मद्दत केरनेबालन। 17 ते अस स्तिफनास ते फूरतूनातुस ते

अखडकुसेरे एजने सेइं खुश आई, किजोकि जेइस तुस इड़ी न थिये, तैनेई मेरी ज़रूरतां पूरी केरनेरे लेइ मेरी मदत की। 18 जेन्चरे तुसेई अवं खुश कियो, तेन्चरे तैनेई भी अवं खुश कियो, एल्हेरेलेइ एरे लोकां केरि तारीफ़ केरा। 19 आसिया इलाकेरे कलीसियां केरे सारे विश्वासी लोकां केरे तरफां तुसन नमस्कार; अक्विला ते तैसेरी कुआन्श प्रिस्कारे तरफां ते तैन केरे घरे कलीसियाई भी तुसन प्रभु मां हलु-हलु नमस्कार। 20 इट्टेरे विश्वासी लोक तुसन नमस्कार ज़ोतन, मसीहेरे प्यारे सेइं एक्की होरि जो नमस्कार केरा। 21 अवं पौलुस अपने हथे सेइं नमस्कार लिखताई। 22 अगर कोई प्रभु सेइं प्यार न रखे तै लानती भोए, हे इश्शे प्रभु एई! 23 प्रभु यीशुएरो अनुग्रह तुसन पुड़ भोतो राए। 24 अवं तुसन सेबन सेइं प्यार केरताई जैन केरो रिश्तो यीशु मसीह सेइं साथीए। आमीन।

2 कुरिन्थियों

1 अवं पौलुस परमेशरे मेर्जी सेई यीशु मसीहेरो प्रेरितार्द, मेरे त कने दूला तीमुथियुसे तरफां ई चिट्ठी परमेशरेरी तैस कलीसियारे नंवे, जै कुरिन्थुस मांए, ते सारे अखाया इलाकेरे सब पवित्र लोकां केरे नंवे, 2 इश्शे बाजी परमेशर ते प्रभु यीशु मसीहेरे तरफां तुसन अनुग्रह ते शान्ति मैलती राए। 3 परमेशरेरु शुक्र भोए जै इश्शे प्रभु यीशु मसीहेरो बाजी, जै दया केरनेबालो बाजीए, ते जै असन हमेशा तसल्ली देनेबालो परमेशरे। 4 ते इश्शे सेब्भी मुसीबतन मां असन तसल्ली देते; ताके अस तैस तसेल्लेरे वजाई सेइं जै परमेशर असन देते, तैन भी तसल्ली देइ बटम, जैना कोन्ची वजाई सेइं मुसीबतन मां आन। 5 किजोकि जेन्चरे मसीहे दुःख झैल्लोरेन तेन्चरे अस भी दुःख झैल्लतम, एल्हेरेलेइ असन तसल्ली भी मसीहेरे जिरिये जादे भोतीए। 6 अगर अस दुःख झैल्लतम, ते ई तुश्शे तसल्लेरे ते तुश्शे मुक्करे लेइए ते अगर असन तसल्ली मैलतीए, ते ई तुश्शे तसल्लेरे लेइ आए; जेसेरे अस्सरे सेइं तुस सबरी सेइं तैना दुखन झल्लतथ, जैना अस भी झल्लतम। 7 ते इश्शी उमीद तुश्शे बारे मां पक्कीए; किजोकि अस ज्ञानतम, कि जेरे दुःखन तुसेईं असन सेइं साथी झैल्ले, तेरी तसल्ली तुसन भी असन सेइं साथी मैलेली, जै असन परमेशर देलो। 8 हे दूलाव ते बेडनव, अस न चाम कि तुस इश्शे तैस दुखे करां अनजान राथ, जै आसिया इलाके मां असन पुइ अव, कि एरो भारी बोझ असन पुइ ओरोए थियो, जै इश्शे लेइ छूनो मुशकिल थियो, इडी तगर कि असन अग्रोवं जो ज़ीनेरी कोई उमीद न थी। 9 बल्के असेईं अपने मने मां समझोरु थियूं, कि अस मारे गानेम ते अस अपनो भरोसो न रखम, बल्के परमेशरे पुइ भरोसो रखम जै मुइदन ज़ीते केरते। 10 तेने अस एत्रे बडे मोतरे खतरे करां बचाए, ते बचालो; ते तैस करां इश्शी ई उमीदे, कि ते अग्रोवं भी बचातो रालो। 11 तुस भी मिलतां प्रार्थनाई सेइं इश्शी मद्दत केरेले, कि जैना बरकतां असन बडां लोकां केरे जिरिये मैली, किजोकि परमेशरे अनुग्रहे सेइं इश्शी हाफजतरे लेइ बेडि प्रार्थनां शुन्नी, तैल्हेरेलेइ बडे लोक इश्शू भोतु परमेशरेरु शुक्र केरन। 12 किजोकि अस अपने इस ज़मीरेरे गुवैही पुइ घमण्डे केरतम, कि दुनियाई मां, खास केरतां तुसन मां इश्शो चालचलन परमेशरे लायिक ते पवित्रतैई ते सचैई सेइं थियो। जै दुनियारे ज्ञाने सेइं नई, बल्के परमेशरेरे अनुग्रह सेइं साथी थियो। 13 अस हमेशा तुसन इन लिखतम ताके तुस पढ्थ ते समझ्थ, ते मीं उमीदे, कि आखरी तगर समझते भी राले। 14 जेन्चरे तुसन मरां केत्रेई मनोरु भी आए, कि अस तुश्शे धुमण्डेरी वजाम; तेन्चरे तुस भी प्रभु यीशुएरे वापस एजनेरे दिहाइ इश्शे लेइ घमण्डेरी वजा भोले। 15 ते इस भरोसे सेइं, अवं चातो थियो कि पेइलो तुसन कां एज्जी; कि तुसन दुगानी बरकत मैल्ले। 16 ते तुसन मेइं निस्तां मकिदुनिया इलाके जो गेईं ते फिरी मकिदुनयारां तुसन कां एज्जी, ते तुस मेरी सफरेरी ज़रूरतरे मुताबिक मद्दत केरतां यहूदिया इलाकेरे पासे किछ दूर पुजाथ। 17 एल्हेरेलेइ मीं जैने ई इच्छा कियोरी थी कुन मीं चंचलता हिराई? या जैन

केरनू चाताई कुन दुनियारे लोकां केरे जेरु केरनू चाताई, कि अवं गल्ली मां हाँ, हाँ भी केरि; नई, नई भी केरि? 18 जेन्चरे परमेशर वफादारे, तेन्चरे कि इश्शे तैस वचने मां जै तुसन सेइं ज़ोवं, “हाँ” ते “नई” दुइये न मैल्ले। 19 किजोकि परमेशरेरु मद्दू यीशु मसीह जेसेरो इश्शे जिरिये मतलब मेरे ते सिलवानुस ते तीमुथियुसेरे जिरिये तुसन मां प्रचार भोव; तैस मां “हाँ” ते “नई” दुइये न थी; पन तैस मां “हाँ” ए “हाँ” भोइ। 20 किजोकि परमेशरेरे जेत्रे वादेन, मसीह मां हांए सेइं आन, एल्हेरेलेइ मसीहेरे जिरिये आमीन भी भोइ, कि इश्शे जिरिये परमेशरेरी महिमा भोए। 21 ते जै असन तुसन सेइं साथी मसीह मां मज़बूत केरते, ते जैने इश्शू अभिषेक कियोरुए, तैए परमेशरे। 22 जैने असन पुइ छाप भी की, ते जेन्चरे कोन्ची चीजरे लेइ साईं देतन तेन्चरे तैनी पेइली आत्मा इश्शे मने मां दिती। 23 परमेशर मेरे इस सचैइयरो गवाहे कि अवं कुरिन्थुस नगरे मां दुबारां एल्हेरेलेइ नई ओरोए कि अवं तुसन दुःख देनो चातो थियो। 24 इन नई, कि अस विश्वासेरे बारे मां तुसन पुइ राज़ केरनू चातम; पन तुश्शे आनन्दे मां तुश्शी मद्दत केरनेबाले आम, किजोकि तुस विश्वासे सेइं मज़बूत रातथ।

2 मीं अपने मने मां इन थापेरु थियूं, कि फिरी तुसन कां एइतां तुसन दुख न देई। 2 किजोकि अगर अवं तुसन दुखी केरि, त मीं आनन्द देनेबालो कौन भोलो, सिर्फ तेए जै मीं दुखी कियोरुए? 3 ते मीं ई गल तुसन एल्हेरेलेइ लिखी, कि एरु न भोए, कि मेरे एजने पुइ जैन सेइं आनन्द मैल्लेरो लोइतो थियो, अवं तैन करां दुखी भोई; किजोकि मीं तुसन सेब्भन पुइ इस गल्लरो भरोसोए, कि जै मेरो आनन्दे, तैए तुश्शो सैरी केरो भी आए। 4 मीं बडे दुःख, ते मनरे कष्टे सेइं, बडे ऐंखरन सेइं तुसन चिट्ठी लिखोरी थी, एल्हेरेलेइ नई, कि तुस दुखी भोथ, पन एल्हेरेलेइ कि तुस तैस बडे प्यारे ज्ञानथ, जै मीं तुसन सेइं आए। 5 ते अगर केन्चे दुखी कियोरुई, त अवं नई बल्के (तैस सेइं बडी सखती न केरि) किछ-किछ तुस सब दुखी कियोरुथ। 6 एरे मैनेरे लेइ ई सज़ा जै विश्वासी दूलान मरां बडेईं दिती, सुद्वी आए। 7 एल्हेरेलेइ इस करां इन रोइए कि तैसेरो पाप माफ़ केरा; ते तैस तसल्ली देथ, एरु न भोए कि एरो मैन्हु उदैसी मां डुबे। 8 एल्हेरेलेइ अवं तुसन कां बिनती केरताई, कि तैस अपने प्यारेरु सबूत देथ। 9 किजोकि मीं एल्हेरेलेइ भी लिखोरु थियूं, कि तुसन पेरखी, कि तुस मेरे सब गल्लां मनरे लेइ तियार आथ या नई। 10 ज़ैस तुस माफ़ केरतथ तैस अवं भी माफ़ केरताई, किजोकि मीं भी जैन किछ माफ़ कियोरुए, अगर कियेरु भोए, त तुश्शे वजाई सेइं मसीहेरे ठैरी भोइतां कियोरुए। 11 कि शैतानेरो असन पुइ दावो न चले, किजोकि अस तैसेरी चालन करां अनजान नई। 12 ते जैखन अवं मसीहेरी खुशखबरी शुनाने त्रोआस नगरे मां अव, ते प्रभुए मेरे लेइ अक बत खोल्ली। 13 त मेरे मने मां चैन न भोइ, एल्हेरेलेइ कि मेरे विश्वासी दूला तीतुसे तुश्शे एट्टां कोई खबर घिन्तां न अव; ते अवं त्रोआसेरे विश्वासी लोकन करां अलग भोइतां अवं वापस मकिदुनिया इलाके मां अव। 14 परमेशरेरु शुक्र भोए, जै मसीह मां सदा असन ज़ीतारे जशने

मां चलाते, ते अपने ज्ञानेरे खुशबू इशो जिरिये हर ठैरी फैलाते। 15 किजोकि अस परमेशरे कां मुक्ति मैलने बालां, ते नाश भोने बालन कां, दुइयां केरे लेइ मसीहेरी खुशबू आम। 16 केत्रा केरे लेइ त मरनेरे मुशक, ते केत्रन जो जिनंदगरे लेइ जिनंदगरी खुशबू, ते इन गल्लां केरे काबल कौने? 17 किजोकि अस तैन केरे जेरे नई, जैना परमेशरेरू वचन पेईसां केरे लेइ प्रचार केरतन, पन अस मनेरी सचैई सेइं, ते परमेशरेरे तरफां परमेशर हाज़र सेमझतां मसीह मां ज़ोतम।

3 कुन अस दुबारा फिरी अपनि बड़याई केरने लगम? या असेई केत्रा केरि जेरि सुपारशारी चिट्ठी तुसन कां ऐनिन या तुसन करां नेनिन? 2 तुस एप्पू इशशी लेइ चिट्ठी केरे जेरथ, जैना इशशे लेइ सुपारशर केरतिन, जैना इशशे दिले पुड़ लिखोरिथ, तैन हर कोई पेढ़ी सकते ते जैना रोड़ां कम्मां असेई कियोरन, तैन लोक पिशैनी सकतन। 3 इन बांदूए, कि तुस मसीहेरे चिट्ठी केरे जेरथ, जैना असेई सेवकां केरि जेरि लिखी; ते जैना शैही सेइं नई, पन ज़ीते परमेशरेरी आत्माई सेइं घोड़ां केरे तेख्ती पुड़ नई, बल्के दिलेरे मासेरे तेख्ती पुड़ लिखोरिन। 4 अस मसीहेरे जिरिये परमेशरे पुड़ एरू याकीन रखतम। 5 इन नई, कि अस अपने आपे सेइं इस काबलम, कि एप्पू कोन्ची गल्लरे बरे मां सोची बटम; पन इशशी काबलीत परमेशरे तरफां आए। 6 जैनी अस नंवे करारेरे सेवक भोनेरे काबल भी कियो, मूसेरे कानूनेरे सेवक नई बल्के पवित्र आत्मा सेइं; किजोकि मूसेरो कानून न मन्नेरो नितीजो मौत भोते, पन पवित्र आत्मा हमेशारी जिनंदगी देते। 7 जैखन मूसेरो कानून जेसेरे जिरिये मौत एइती जेसेरे लफस घोड़ां केरे तेख्तिन पुड़ घेइतां लिखेरे थियो, इड़ी तगर महिमा बाले भोए, कि इसाएली लोक मूसेरे तुतेरं तेकि न थी बटते, पन तै जादे वक्ते तगर न राव, 8 ते आत्मारो करार होरो भी महिमा बालो किना भोलो? 9 किजोकि दोषी ठहराने बालो करार महिमा बालो थियो, ते धर्मी बाने बालो करार होरो भी महिमा बालो किना भोए! 10 ते जै पुरानो महिमा बालो करार थियो, तै नव्वे करारे करां महिमा बालो न भोव। 11 किजोकि मूसेरू कानूने जेसेरी महिमा थोड़े वक्तेरे लेइ थी, महिमा बालो थियो, त तै नव्वे करार जै कायम रालो, होरू भी महिमा बालू किजो न भोलो! 12 एल्हेरेलेइ एरी उमीद रेखतां अस दिलेरी सेइं ज़ोतम। 13 अस मूसेरे जेरे नई, जैने अपने तुतेरे पुड़ पड़दो रखेरो थियो ताके इसाएली लोक तैस घटने बैली महिमारो अन्त न लहन। 14 पन तैन केरे मन सखत भोए, किजोकि अज़ तगर पुरानो नियम पढ़ते बार तैन केरे मन्न पुड़ तैए पड़दो रहते; पन पड़दो सिर्फ तै मसीह पुड़ विश्वास केरने सेइं उठते। 15 ते अज़ तगर ज़ैखन भी मूसेरो कानून पढ़ो गाते, ते तैन केरे मन्न पुड़ सदा पड़दो रहते ते तैन रोड़े चारे समझ न एज्जे। 16 पन ज़ैखन भी तैना प्रभु यीशु पुड़ विश्वास केरेले, तैखन तै पड़दो दूर भोलो। 17 प्रभु त आत्मा आए, ते ज़ैडी भी प्रभुएरो आत्माए तैडी कानूने करां आज़ादी आए। 18 पन ज़ैखन इशशे सेबभी केरे बगैर पड़दे तुतरन

सेइं प्रभुएरू प्रकाश बांदू भोते, जेन्चरे शीशे मां, ते प्रभुएरे जिरिये जै आत्माए, अस प्रभुएरे महिमा बाले रूपे मां थोड़े-थोड़े बदलते रातम।

4 एल्हेरेलेइ अगर असन पुड़ एरी दया भोइ, कि असन ई खुशखबरी शुनानेरी सेवा मैल्ली, त अस दिलेरी न शारम। 2 पन असेई शरमारों छपोरां कम्मां शारोन, ते न च़लैकी सेइं च़लते, ते न परमेशरेरे वचन मां मलावट केरम। पन परमेशर इशशो गवाहे कि अस सच ज़ोतम, ते हर कोई गवाही देते कि इन सच़े। 3 पन अगर इशशे खुशखबरी पुड़ पड़दोए, त ई नाश भोने बालां केरे लेइए। 4 ते तैन विश्वास न केरनेबालां केरे लेइ, जैन केरे अक्ल इस दुनियारे ईश्वर शैताने कानी कियोरीए, ताके मसीह ज़ै परमेशरेरू रूपे, तैसेरी महिमा खुशखबरी लौ तैन पुड़ न चमके। (aiōn g165) 5 किजोकि अस अपनो नई, बल्के यीशु मसीहेरो प्रचार केरतम, कि तै प्रभुए; अस यीशु मसीहेरे वजाई सेइं तुशशे सेवकम। 6 एल्हेरेलेइ कि परमेशर तै आए ज़ैनी ज़ोव, “कि आंधरे मरां लौ चमके,” ते परमेशरे इशशे दिलन मां लोअरी जेरि समझ दिती, कि अस परमेशरेरी महिमा पिशानम जै यीशु मसीह मां लेइहोई। 7 पन अस मितारे भांडां केरे जेरेम जैन मां धन रखेए, कि ई हछ्छी शक्ति इशशे तरफां नई, बल्के परमेशरेरे तरफां भोए। 8 अस च़ेरे पासना दुःख त झललतम, पन मुशकली मां न पेम; घबरातम, पन न उमीद न भोम। 9 सताए त गातम, पन शारे न गाम, बछोड़े त गातम पन नाश न भोम। 10 अस यीशु मसीहेरी मौत अपनि जानी मां हर वक्त च़लातम; कि जैन किछ अस केरतम तैसेरे जिरिये लोक यीशुएरी जिनंदगी हेरेले। 11 किजोकि इशशे ज़ीते सांसेइं, सदा यीशुएरे वजाई सेइं असन मौतेरे खतरो भोतो थियो, कि यीशुएरी जिनंदगी भी इशशे नाश भोनेबाले जानी मां बांदी भोए। 12 अस त मौतेरे खतरे मां ज़ीतम पन इसेरो नितीजो तुशशे लेइ हमेशारी जिनंदगीए। 13 ते एल्हेरेलेइ कि असन मां तैए विश्वासेरी आत्माए, “जेसेरे बारे मां पवित्रशास्त्रे मां लिखोरूए, कि मी विश्वास कियो, एल्हेरेलेइ मी ज़ोव” एल्हेरेलेइ अस भी विश्वास केरतम ते ज़ोतम। 14 किजोकि अस ज़ानतम, ज़ैने प्रभु यीशु मुड़दन मरां ज़ीतो कियो, तैए असन भी यीशु मसीह मां हिसेदार सेमझतां ज़ीते केरेलो, ते तुसन सेइं साथी अपने सामने हाज़र केरेलो। 15 किजोकि सारे दुःख जैना असन पुड़ आन, तुशशे लेइ आन, ताके परमेशरेरो अनुग्रह जादे करां जादे लोकन मसीह कां आने, ते बड़े लोक परमेशरेरू शुक्र केरेले। 16 एल्हेरेलेइ अस दिलेरी न शारम; अगर इशशी बेइरीं इन्सानयत नाश भी भोए, त फिरी भी इशशी एनत्रीं इन्सानयत रोज़ नर्वीं भोती रहतीए। 17 किजोकि इशशो एक्की पलेरो थोड़ो जेरो दुःख बड़ी ते हमेशारी महिमा पैदा केरते, जेसेरी तुलना केन्ची सेइं न केरोए। (aiōnios g166) 18 ते अस त लेवरी चीज़न नई पन अलैई चीज़न लाते रातम, किजोकि लेवरी चीज़ां थोड़े दिहाड़ां केरे लेइ आन, पन अलैई चीज़ां हमेशारे लेई आन। (aiōnios g166)

5 किजोकि अस ज़ानतम, कि ज़ैखन इशशो जिसम ज़ै धेरतली पुड़े ते तेम्बेरो जेरो आए मेरतां नाश भोलो, त असन परमेशरेरी तरफां स्वर्ग

मां अक भवन मैलनोए, जै हथ्यां केरो बनावरो नई बल्के हमेशारोए। (aiōnios g166) 2 इस मां अस बडू कर लातम, ते बड़ी इच्छा केरतम; कि असन एरो जिसम मैले जै स्वर्गेर घरेरो जेरो भोए। 3 कि जैखन असन स्वर्गेरो जिसम मैल्ले त अस नगो न लेइहोम। 4 ते अस इस तेम्बेरे जेरे घरे मां रेइतां बोझे सेइ देबोइतां कर लाते रातम; किजोकि अस दुनियारो जिसम शारनो न चाम, बल्के इन चातम कि परमेशर असन स्वर्गेरो जिसम दे, ताके जै मरने बालो जिसमे तै न मरे बल्के हमेशारे जिनदगी मां बेदलोए। 5 ते जैनी अस इस नव्वे जिसमेरे लेइ तियार कियोरेम जै असन मैलनोए, तै परमेशरे, जैने असन जेन्चरे साई देतन तेन्चरे पवित्र आत्मा भी दित्तोरोए। 6 असन सदा पूरू याकीने ते इन ज्ञानतम; कि ज्ञांतगर अस जिसमे मां रातम, तांतगर अस प्रभु करां अलग आम जै स्वर्ग मां आए। 7 किजोकि अस शकल हेरतां नई, पन विश्वासे सेइ जीतम। 8 एल्हेरेलेइ अस हिम्मत केरते रातम, ते जिसमे करां अलग भोइतां जैखन अस मरमेले त प्रभु सेइ साथी रानू जादे रोडू समझतम। 9 एल्हेरेलेइ इश्शे मनरी उमंग ईए, कि चाए अस स्वर्ग मां तैस सेइ साथी रहम, चाए अलग इडी धेरीती पुड़ रहम पन अस तैस पसंद एइते रहम। 10 किजोकि ज़रूरीए, कि इश्शो सेबभी केरो हाल मसीहरे आदालतरे तखतरे सामने खुल्ले, कि हर कोन्ची मैन्हु अपने रोड़ां बुरां कम्मां केरो बदलो मैल्ले जैना तैने जिसमे सेइ कियोरन। 11 अस प्रभुएरो डर मेन्तां लोकन कां बिनती केरतम कि सच्चे पुड़ विश्वास केरन, ते परमेशर रोड़े चारे ज्ञानते; ते मेरी उमीद ईए, कि तुस भी अपने दिले मां असन रोड़े चारे ज्ञानथ। 12 अस फिरी भी अपनि बडयाई तुश्शे सामने न केरम, बल्के अस अपने बारे मां तुसन घमण्ड केरनेरो मौको देतम, कि तुस तैन जुवाब देइ बटतथ, जैना मने पुड़ नई, बल्के दिखवटी गल्लन पुड़ घमण्ड केरतन। 13 अगर कोई ज़ोते कि अस पागलम, त परमेशरेरे लेइ अहम; ते अगर कोई ज़ोते कि अस रोड़े अहम त तुश्शे लेइ आम। 14 किजोकि मसीहरो प्यार असन मजबूर केरते; एल्हेरेलेइ कि असन याकीने कि जैखन अक मैन्हु सेबभी केरे लेइ मरो जेव त सब मेरि जे। 15 ते मसीह एन्चरे सेबभी केरे लेइ मरो, कि जैना जीते आन, तैना अग्रोवं जो अपने लेइ न ज़ीन पन तैसेरेलेइ जै तैन केरे लेइ मरो ते फिरी जीतो भोव। 16 एल्हेरेलेइ अजेरां पत्ती अस कोन्ची दुनियारे मुताबिक न समझाम, ते अगर असेई भी मसीह दुनियारे मुताबिक ज्ञानोरो थियो त फिरी भी अज़ेरे पत्ती फिरी एरू न ज्ञानम। 17 ते अगर कोई मसीह मां आए त तै नव्वीं स्रष्टि आए, पुरेनी गल्लां बीती जेई; हेरा, तैना सब नेव्वीं भोइजेइ। 18 ते सब गल्लां परमेशरेरी तरफन, जैने मसीह भेजतां फिरी इश्शो मेल मलाप एप्पू सेइ कराव, ते लोक तैस सेइ मेल मिलाप केरन ई सेवा परमेशरे असन सौफोरीए। 19 मतलब परमेशरे मसीह मां भोइतां एप्पू सेइ साथी दुनियारो मेल मिलाप कियोरोए, ते लोकां केरे पापां केरो दोष तैन पुड़ नई लोरो, ते परमेशरे मेल मलापेरो बिस्तार असन सौफोरोए। 20 अस मसीहरे राजदूत अहम; मन्ना कि परमेशर इश्शे ज़िरिये बिनती केरते कि तुस तैसेरो सन्देश कबूल केरथ, अस मसीहरे तरफां बिनती

केरतम, कि परमेशरे सेइ साथी मेल मिलाप केरा। 21 मसीह पापे करां अनज्ञान थियो, तैए परमेशरे इश्शे लेइ पापी ठहराव, कि अस परमेशरेरी नज़री मां धर्मी बनम किजोकि मसीहे इश्शी पापां केरि सज़ा भुगतोरीए।

6 अस जैना परमेशरे सेइ साथी कम केरनेबाले आम ई भी बिनती केरतम, कि परमेशरेरो अनुग्रह जै तुसन पुड़ भोरोए, जैया न भोने देथ। 2 किजोकि परमेशर पवित्रशास्त्रे मां ज़ोते, “कबूल केरनेरे वक्ते मीं तेरी शुनी, ते मुक्करे दिहाड़े मीं तेरी मदत की,” हेरा, हुना तै कबूल केरनेरो वक्ते, हरा, हुना तै मुक्करी दिहाड़ीए। 3 अस परमेशरे सेइ साथी कम केरनेबाले केन्ची भी गल्ली मां कोई भी मौको न देम, कि इश्शी सेवाई पुड़ कोई दोष लाए। 4 पन हर गल्ली सेइ परमेशरेरे सेवकां केरे ज़ेरे अपने रोड़े गुन्न बांदे केरतम, बडे सबरी सेइ, दुःख सेइ, शारे गाने मां, मुशकलन सेइ। 5 कोड़े खाने सेइ, कैद भोने सेइ, हैल्लन सेइ मेहनती सेइ, बींझे बिशने सेइ, बरत रखने सेइ। 6 पवित्रतैई सेइ, ज्ञाने सेइ, सबरी सेइ, दयाई सेइ, पवित्र आत्मा सेइ। 7 सच्चे प्यारे सेइ, सच्चे वचने सेइ, परमेशरेरे शक्ति सेइ; अस धार्मिकतारे हथियारन इस्तेमाल केरतम, देइने हथ्ये सेइ हमलो केरनेरे लेइ ते खिशडे हथ्ये सेइ अपनो आप बचानेरे लेइ। 8 ते जैखन लोक इश्शी इज़्जत केरतन या असन बेइज़त केरतन, जैखन लोक ज़ोतन अस रोड़ेम या बुरे मैन्म, अस ईमानदारम फिरी भी लोक झूठ ज़ोतम। 9 अनज्ञाना केरे ज़ेरेम; फिरी भी मुशूरम, मरने बालां केरे ज़ेरेम पन हेरा जीतम, मार खाने बालां केरे ज़ेरेम, पन जानी सेइ न मैरोम। 10 दुःख केरनेबालां केरे ज़ेरेम, पन सदा आनन्द केरतम, कंगालम, पन बडे लोकन आत्मिक धनी केरतम; एरेम कि असन कां किछ भी नई फिरी भी सब किछ रखतम। 11 हे कुरिन्थिस नगरेरे विश्वास लोकव, असेई तुसन सेइ खुलतां गल्लां कमेई, अस तुसन सेइ पूरे दिले सेइ प्यार केरतम। 12 इश्शे मने मां तुश्शे लेइ बड़ी ठारे, पन तुश्शे मन्न मां नई। 13 पन अवं बच्चे सेमझतां तुसन सेइ ज़ोताई, कि तुस भी तैसेरे बदले असन सेइ प्यार केरा। 14 गैर विश्वासी लोकां केरे सेंगती मां न गाथ, किजोकि धार्मिकता ते अधर्मोरो कुन मेल जोल? या लौ ते आंधरेरो कुन साथ? 15 ते मसीहे शैताने सेइ कुन लगाव? या विश्वास केरनेबालेरो विश्वास न केरनेबाले सेइ कुन तालमेल? 16 ते परमेशरे मन्दरेरे मां मूरती केरे लेइ कोई ठार नई, किजोकि अस त ज़ीते परमेशरेरां मन्दर अहम; जेन्चरे परमेशरे पवित्रशास्त्रे ज़ोवं, “अवं तैन लोकन साथी रेइलो ते तैन मां च़लेलो फिरेलो; ते अवं तैन केरो परमेशर भोनोई, ते तैना मेरे लोक भोले।” 17 एल्हेरेलेइ प्रभु पवित्रशास्त्रेरे ज़िरिये ज़ोते, “विश्वास न केरनेबालन मरां निस्सा ते अलग राथ; ते अशुद्ध चीज़न करां दूर राथ; ते अवं तुसन कबूल केरेलो। 18 ते तुश्शो बाजी भोइलो, ते तुस मेरां मट्टां ते कुइयां भोलां, इन सर्वशक्तिमान प्रभु परमेशरेरू वचने।”

7 किजोकि हे ट्लाराव परमेशरे वादो कियोरो कि तै असन अपने बच्चां केरे रूपे मां कबूल केरेलो, त एज्जा, अस अपने आपे ते जिसमेरी ते आत्मारी सब गंदगी शुद्ध केरम, ते परमेशरेरो डर मेन्तां ते इज़्जत

केरतां, ते परमेश्वरेरी बत्तां च़लनेरे लेइ पूरे तरीके सेइं पवित्र ज़िन्दगी जींम। 2 असन अपने दिल मां ठार देथ, असेई केन्ची सेइं बेइन्साफी नईं कियोरीए, न केन्चेरू किछ बिगाड़ेरूए, ते न कोई ठगगोरोए। 3 अवं तुसन दोषी बनानेरे लेइ इन नईं लगगोरो जोने, किजोकि मीं इन पेइलू जोरूए, कि तुस इश्शे मने मां बसोरेथ कि अस तुसन साथी मरने जीनेरे लेइ तियारम। 4 अवं तुसन सेइं बड़े दिलेरी सेइं जोने लोरोईं, मीं तुसन पुइ बडू घमण्डे, अवं तसल्ली सेइं भरोईं जोरोईं; अपने सारे दुखन मां अवं आनन्दे सेइं भरपूर राताईं। 5 किजोकि ज़ैखन अस त्रअस शैरतां मकिदुनिया इलाके मां आए, तैखन भी इश्शे जानी चैन न भोइ, पन अस चेव्रे पासना दुःख झल्लते राए, बेइर लडैईं थी, अन्तर बेडि-बेडि गल्लां थी। 6 फिरी भी उदासन तसल्ली देनेबाले परमेश्वरे तीतुसेरे एजने सेइं असन तसल्ली दिती। 7 ते न सिर्फ तैसेरे एजने सेइं पन तैसेरी तैस तसल्ली सेइं, ज़ै तैस तुसन करां मैलती थी; ते तैनी तुश्शी इच्छा ते तुश्शे दुःख ते मीं सेइं मिलनेरे जोशेरी खबर असन शुनाईं, ज़ैस सेइं होरो भी आनन्द भोव। 8 किजोकि अगर मीं अपनी चिट्ठी सेइं तुस दुखी किये, पन तैस करां पसतेईं न, ज़ेन्चरे पेइलो पसतातो थियो, किजोकि अवं हेरताईं तैस चिट्ठी सेइं तुसन दुःख त भोव पन तै थोड़े चिरेरे लेइ थियो। 9 हुनी अवं खुशी आईं पन एल्हेरेलेइ नईं कि तुसन दुःख पुजो, बल्के एल्हेरेलेइ कि तैसेरे दुखेरे वजाईं तुसेईं पापन करां मन फिराव। किजोकि तुश्शो दुःख परमेश्वरे मेर्जी सेइं थियो, कि इश्शे पासेरां तुसन कोई नुकसान न पुजे। 10 किजोकि परमेश्वरेरे भेक्करो दुःख एरी पसतावो पैदा केरते ज़ैस सेइं मुक्ति मैलतीए, फिरी तैस सेइं पसतानू न पे, पन दुनियारो दुःख हमेशारी मौत पैदा केरते। 11 ते हेरा, इस्से गल्ली सेइं तुसन परमेश्वरेरे भेक्करो दुःख भोव, कि तुसन केत्रो जोश, उज़र, सरक, डर, इच्छा, मघन भोनू, ते सज़ा देनेरो खियाल पैदा भोव? तुसेईं सेबभी तरीके सेइं इन सिद्ध कियूं, कि तुस इस गल्ली मां बेकसूर आथ। 12 फिरी मीं ज़ैन तुसन जो सेखती सेइं लिखोरू थियूं, तैन न तैसेरे वजाईं सेइं लिखू, ज़ैने बेइन्साफी की, ते न तैसेरे वजाईं सेइं ज़ैस सेइं बेइन्साफी भोइ, पन एल्हेरेलेइ कि तुश्शी सरगरमी ज़ै इश्शे लेइए, तै परमेश्वरेरे सामने तुसन पुइ बांदी भोए। 13 एल्हेरेलेइ असन हिम्मत मैल्ली; ते इश्शी इस हिम्मती सेइं साथी तीतुसेरे आनन्द सेइं होरो भी आनन्द भोव किजोकि तैसेरो मन तुश्शे वजाईं सेइं हरो भरोए। 14 किजोकि अगर मीं तैसेरे सामने तुश्शे बारे मां किछ घमण्ड हिराव, त छिथोव न, पन ज़ेन्चरे असेईं तुसन सेइं सब गल्लां सच-सच जोरी थी, तेन्चरे इश्शे घमण्ड हिरानू तीतुसेरे सामने भी सच निरसू। 15 ते ज़ैखन तैस तुश्शो सेबभी केरू हुक्मन मन्नेबाले भोनू याद एइते; किजोकि तुसेईं थरकते-थरकते तैस सेइं मुलाकात की; तैसेरो प्यार तुश्शे पासेरां होरो भी बड्डतो गाते। 16 अवं खुश भोताईं, किजोकि तुसन करां मीं हर गल्ली मां भरोसो भोते।

8 हुनी मेरे ढ़लाव बेइनव, अस तुसन परमेश्वरेरे अनुग्रहेरी खबर देतम, ज़ैन मकिदुनिया इलाकेरे कलीसियारे लोकन पुइ भोरोए। 2 कि ज़ैखन बेडि मुसीबतां केरे ज़िरिये परखे जे, त तैना बड़े खुशी भोए, चाए

तैना बड़े गरीब थिये फिरी भी होरि विश्वासी लोकां केरि मद्दत केरनेरे लेइ खुल्ले दिले सेइं पेइंसो दित्तो। 3 ते तैन केरे बारे मां मेरी ई गवाहीए, कि तैनेईं अपने काबलीतरे मुताबिक बल्के अपने काबलीती करां भी जादे मने सेइं दित्तू। 4 ते इस दाने मां ते पवित्र लोकां ज़ैना यहूदिया इलाके मां आन तैन केरे सेवाईं मां मद्दत केरनेरे बारे मां असन सेइं बार-बार बडी बिनती की। 5 ते ज़ेन्चरे असेईं उमीद न थी कियोरी, कि तैनेईं पेइलो अपनो आप प्रभुएरी सेवा केरनेरे लेइ समर्पण कियो, फिरी परमेश्वरेरी मेर्जी सेइं असन पती च़लनेरे लेइ अपनो आप समर्पण कियो। 6 एल्हेरेलेइ असेईं तीतुस समझव, कि ज़ेन्चरे तैने पेइलू शुरू कियोरू थियूं, तेन्चरे इस दानेरे कम्मे पूरू भी केरे। 7 ज़ेन्चरे हर गल्ली मां मतलब विश्वासे, वचन प्रचार केरनेरे काबलीत, ज़ाने ते सेबभी किसमेरे कोशिश मां, ते तैस प्यारे मां, ज़ै तुस असन सेइं केरतथ, बड्डते गातथ, तेन्चरे विश्वासी लोकन दान देनेरे कम्मे मां बड्डते राथ। 8 अवं हुक्मेरे तरीके पुइ नईं, पन होरि केरे हिम्मतरे लेइ ते तुश्शे प्यार ते सचैईं परखनेरे लेइ जोताईं। 9 तुस इश्शे प्रभु यीशु मसीहेरे अनुग्रह ज़ानतथ, कि तै धनी भोइतां भी तुश्शे लेइ गरीब बनो ताके तैसेरे गरीब भोने सेइं तुस धनी भोथ। 10 ते इस गल्ली मां मेरो खियाल ईए, किजोकि तुश्शे लेइ रोडूए; ज़ै एक्की साले करां न सिर्फ इस कम्मे केरने मां, बल्के इस गल्लेरे चाने मां भी पेइले भोरे थी। 11 एल्हेरेलेइ हुनी इन कम पूरू केरा; ज़ेन्चरे तुस इच्छा केरने तियार थिये, तेन्चरे अपने-अपने हैसियतरे मुताबिक पूरू भी केरा। 12 किजोकि अगर मनेरी तियारी भोए त दान तैसेरे मुताबिक कबूल भी भोते ज़ैन तैस कां आए न कि तैसेरे मुताबिक ज़ैन तैस कां अथ्थी नईं। 13 अवं इन न चैईं होरि केरि ज़िन्दगी आसान बनानेरे लेइ तुस अपने ज़िन्दगी मुशकिल बनाथ। 14 पन बराबर भोनेरे खियालन सेइं इस वक्ते तुश्शू जादे तैन केरि घाटे मां कम्मे एज्जे, ताके तैन केरू जादे तुश्शे घाटे मां कम्मे एज्जे, कि बराबरी भोए। 15 ज़ेन्चरे पवित्रशास्त्रे मां लिखोरूए, “ज़ैनी बडू अकोटू कियूं तैसेरू जादे न निससू, ते ज़ैने थोडू अकोटू कियूं तैसेरू घट न निरसू।” 16 परमेश्वरेरू शुक्र भोए, ज़ैने तुश्शे लेइ ज़ै सोच मेरे मने मां आए तैए जोश तीतुसेरे मने मां छुड़ोरोए। 17 कि ज़ैखन असेईं तैस तुसन कां एजनेरे लेइ मिनत की त तैनी इश्शी गल मन्नी बल्के अपने मेर्जी सेइं ते बड़े जोशे सेइं तुसन कां अवं। 18 ते अस तैस सेइं साथी अक होरो विश्वासी ढ़ला भेजने लोरेम, ज़ेसेरू नवं खुशखबरी शुनानेरे बारे मां कलीसियारे लोकन मां फैलोरोए। 19 ते एत्रू नईं, पन तै कलीसियां केरे लोकेईं ठहरावरो भी आए, कि इस दानेरे कम्मेरे लेइ असन सेइं साथी गाए ते अस ई सेवा एल्हेरेलेइ केरतम, कि प्रभुएरी महिमा भोए, ते इन हिरानेरे लेइ कि अस यरूशलेमेरे विश्वासी लोकां केरि मद्दत चातम। 20 अस इस गल्ली मां हुशार रातम, ते तीतुसे सेइं साथी विश्वासी लोक भेजने सेइं इस दान देनेबाले कम्मेरे बारे मां ज़ै सेवा अस केरतम, ताके कोई असन पुइ दोष न लेइ सखे। 21 किजोकि ज़ैना गल्लां सिर्फ प्रभुएरे नज़र मां रोडी नईं बल्के मैन्हु केरे नज़री मां रोडी आन, अस तैन केरि फिक्र केरतम। 22 ते अस तैन सेइं साथी अक

होरो विश्वासी ढूला भी भेज्जी राओरम, जै असेई बार-बार परखो ते बेडि गल्लन मां जोशे बालो निस्सो; पन हुनी तुसन पुड़ तैस बडो भरोसोए एल्हेरेलेइ तै दिले सेइं जोशे बालोए। 23 अगर कोई तीतुसेरे बारे मां पुछे, त ते मेरो साथीए, ते तुशुशे लेइ मेरो मदतगार, ते अगर इशुशे विश्वासी ढूलां केरे बारे मां कोई पुछे, त तैना कलीसियां केरो भेज्जोरोए ते तैन केरि जिन्दगी सेइं मसीहेरी महिमा भोतीए। 24 एल्हेरेलेइ अपनो प्यार तैन हिराथ, सारे कलीसियां केरे विश्वासी लोकन सबूत देथ कि इशुशू तैन घमण्ड जैन तुशुशे बारे मांए सच्चरे।

9 हुनी तैस सेवारे बारे मां जै यरुशलमेरे विश्वासी लोकन जो दान देनेरे बारे मां की गातीए, मीं तुसन जो लिखनू जरूरीए नई। 2 किजोकि अवं तुशुशे मनेरे तियारे बारे मां जानताई, जेसेरे वजाई सेइं अवं तुशुशे बारे मां मकिदुनिया इलाकेरे विश्वासी लोकां केरे सामने घमण्ड हिराताई, कि तुस अखाया इलाकेरे लोक एक्की साले करां तियार भोरेथ, ते तुशुशे जोशे होरन भी जोश बनेवरोए। 3 पन मीं तीतुस ते दूई होरे ढूला तुसन कां एल्हेरेलेइ भेजे, कि असेई जैन घमण्ड तुशुशे बारे मां हिराव, तैन इस गल्ली मां बेफेइदे न भोए; पन जेन्चरे मीं ज़ोवं; तेन्चरे तुस यरुशलम नगरेरे विश्वासी लोकां केरे लेइ दान देने जो तियार राथ। 4 एरू न भोए, कि अगर किछ मकिदुनया इलाकेरे विश्वासी लोक मीं सेइं साथी एज्जन, ते तुशुशू दान तियार न भोए, त अस तुसन पुड़ भरोसेरे केरनेरे वजाई छिथोम, पन तुस असन करां भी जादे छिथोले। 5 एल्हेरेलेइ मीं विश्वासी ढूलान सेइं ई बिनती केरनि जरूरी समझी, कि तैना पेइले तुसन कां गान, ते तुशुशे खुल्ले दिले सेइं दान देनेरे बारे मां, जेसेरे बारे मां पेइलो वादो कियोरो थियो, तियार केरतां रखा, कि इन दबावे सेइं नई बल्के इच्छाई सेइं भोए। 6 पन गल त ईए, कि जै थोडू बेते तै कटेलो भी थोडू; ते जै हछु बेते तै हछु कटेलो। 7 हर अक मैन्हु जेन्चरे मने मां थापेरू भोते तेन्चरे दान दे, न कुड़-कुड़ केरतां, ते न दबावे सेइं, किजोकि परमेशर खुशी सेइं देने बालन पुड़ खुश भोते। 8 परमेशर जैन किछ तुसन जरूरते तैसेरो अनुग्रह देइ बटते, जैस सेइं हर गल्ली मां ते हर वक्त, सब किछ, जेसेरी तुसन जरूरत भोए, तुसन कां राए, ते हर एक्की रोडे कम्मरे लेइ तुसन कां बडू किछ भोए। 9 जेन्चरे पवित्रशास्त्रे मां लिखोरूए, “परमेशर जैन जरूरते तैन हच्छु देते, जैन तै केरते तैन ठीके ते तैन हमेशा रालू।” (aiōn g165) 10 आखरी, जै बेनेबालो बीज, ते खानेरे लेइ रोटी देते, तै तुसन बीज देलो, ते तैस सेइं फलवन्त केरेलो, ते तुशुशे धार्मिकतारो फल बथालो। 11 तुसन हर गल्ली मां बरकत मैलेली जैस सेइं तुस जादे दान देनेरे काबल बनेले, ते जैखन अस तुशुशे हछे दाने तैन कां नेमले जैन जरूरते त तैना लोक परमेशरेरू शुक्र केरेले। 12 किजोकि सेवारे पूरे केरने सेइं, न सिर्फ परमेशरेरे लोकां केरो घाटो पूरो भोते, पन लोकां केरे तरफां परमेशरेरू बडू शुक्र भोते। 13 किजोकि होरि लोकन दान देनेरी मदतरी सेवारू सबूत कबूल केरतां तैना परमेशरेरी महिमा बांदी केरतन, कि तुस मसीहेरी खुशखबरी मेन्तां तैसेरे अधीन रातथ, ते गरीब विश्वासी लोकां केरि, ते सेबभी केरि मदत केरने मां हच्छु देनू बांदू केरतथ। 14 ते

तैना तुशुशे लेइ परमेशरे कां प्रार्थना केरेले; तैना तुसन सेइं प्यार केरतन, किजोकि परमेशरे तुसन पुड़ अनुग्रह कियोरोए। 15 परमेशरे तैसेरे तैस दानेरे लेइ जैन समझी करां बेइर शुक्र भोए।

10 अवं तैए पौलुस जै तुशुशे सामने दीन आई, पन तुसन करां दूर भोताई सेखती सेइं ज़ोताई। अवं तुसन मसीहेरी नम्रता ते नरमी याद करेइतां तुसन कां मिनत केरताई। 2 अवं ई बिनती केरताई, कि तुशुशे सामने नझक भोइतां दिलेर न भोनू पे; जेन्चरे अवं केत्रन पुड़ जैना असन दुनियारे लोकां केरे ज़ेरे चलने बाले समझतन, बहदरी हिरानेरी खियाल केरताई। 3 किजोकि अगर अस दुनियाई मां ज़ीतम, पन फिरी भी अपने दुश्मन सेइं दुनियारे मुताबिक न लडम। 4 किजोकि इशुशी लडइरे हथियार मैन्हु केरे नई, पन गड बछोइनेरे लेइ परमेशरेरी शक्ति। 5 ते अस खियालन, ते हर एक्की उच्ची गल्ली, जैना परमेशरेरी पिशानेरे खलाफ उदुतन, खतम केरतम; ते हर एक्की खियाले कब्जे मां केरतम, ते मसीहेरो हुकम मन्ने बालो बनातम। 6 ते तियार रातम कि जैखन तुस पूरे तरीके सेइं अपनो आप मसीहेरो हुकम मन्नेबाले बनातथ, त अस मसीहेरे हुकम न मन्ने बालन सज़ा देनेरे लेइ तियार रामेले। 7 तुस बेइरयूं रूप हेरतथ, अगर केन्ची एप्पू पुड़ ई भरोसे, कि अवं मसीहेरोई, तै इन भी ज़ाने, कि ज़ेरो तै मसीहेरोए, तेन्चरे अस भी मसीहेरे आम। 8 किजोकि अगर अवं तैस अधिकारेरे बारे मां होरू भी घमण्ड हिरैई, जै प्रभुए तुशुशे विश्वास नाश केरनेरे लेइ नई बल्के विश्वासे बद्धानेरे लेइ असन दित्तोरोए, त शरमिन्दे न भोलो। 9 इन अवं एल्हेरेलेइ ज़ोताई, कि चिट्ठी केरे ज़िरिये तुसन डराने बालो न भोई। 10 किजोकि किछ लोक ज़ोतन, “कि तैसेरी चिट्ठी त ज़रूरिन ते अस्सर केरने बैलिन; पन जैखन हेरतन, त तै कमजोर मैन्हु आए, ते तैसेरां भाषाना बेकारन।” 11 ते जै एरू ज़ोते, तै ई समझ रखते, जेन्चरे ठीक इशुशे चिट्ठन मां इशुशो वचन आए, तेन्चरे तुशुशे सामने इशुशां कम्मां भी भोलां। 12 किजोकि असन ई दिलेरी नई कि अपनो आप तैन सेइं साथी गनम, या तैन सेइं अपनो आप मिलाम, जैना अपनि तारीफ़ केरतन, ते अपनो आप एक्की होरि सेइं तुलोइतां बेवकूफ बन्तन। 13 अस परमेशरेरे दित्तोरे कम्मे करां बेइर घमण्ड कधी न केरमेले, पन तैसेरे हदी तगर जै परमेशरे इशुशे लेइ बनोरीए, ते तैस मां तुस भी ओरेथ ते तैसेरे मुताबिक घमण्ड भी केरेले। 14 किजोकि अस एपनी हदी करां बेइर अपनो आप बधानो न चाम, जेन्चरे कि तुसन तगर न पुजनोरी हालती मां भोते, बल्के अस पेइले थिये जैना कुरिन्थुस नगरे मां मसीहेरी खुशखबरी शुनाते तुसन तगर पुजी जोरेम। 15 ते अस हदी करां जादे होरि केरे मेहनती पुड़ घमण्ड न केरम; बल्के असन उमीदे, जेन्चरे-जेन्चरे तुशुशो विश्वास बथेलो तेन्चरे-तेन्चरे अस एपनी हदारे मुताबिक तुशुशे वजाई सेइं होरां भी बडां जादे कम्मां केरनेरे काबल भोलो। 16 कि अस तुशुशे हदन करां सारे दूर-दूर इलाकन मां भी खुशखबरी शुनाम, इन नई कि अस होरि केरे हदां केरे अन्तर बनोरे कम्मन पुड़ घमण्ड केरम। 17 पन जेन्चरे पवित्रशास्त्र ज़ोते, जै

घमण्ड केरे तै प्रभु पुड़ केरे। 18 किजोकि जै अपनि बड़याई केरते, तै नई, पन जेसेरी बड़याई प्रभु केरते, तैए परमेशेरी नजरी मां रोड़ो।

11 तुस होरन कबूल केरतथ जैना अपनि बड़याई केरतन, ते एल्हेरेलेइ अवं उमीद केरतां, अगर अवं थोड़ी जेरि बेवकूफी केरि त तुस झैल्ले। 2 किजोकि अवं तुसन सेइं प्यार केरताई ते तुशुओ खियाल रखताई ठीक तेन्चरे, जेन्चरे परमेशर केरते, मीं वादो कियोरोए तुसन मसीह जो देनेरे लेइ, जेन्चरे लोक पूरे तरीके सेइं समर्पितन। 3 पन अवं डरताई कि जेन्चरे शैताने सपेरे रूपे मां एइतां अपनि चलेकी सेइं पेइली कुआन्श, हव्वा भटकवरी थी, तेन्चरे तुशुओ मन तैसेरे सिधथैई ते पवित्रतैई सेइं जै मसीहे कबूल केरते भोरी लोड़े भ्रष्ट न की गाए। 4 जैखन भी कोई तुसन कां एइते ते तुसन तैस यीशुएरी जैस यीशुएरो असेईं नई कियोरो एइतां, कोन्ची होरि यीशुएरो प्रचार केरते, जेसेरो प्रचार असेईं नई कियोरो: या जै आत्मा तुसन मैल्लोरी तैस करां अलग किसमेरी आत्मा तुसन मैल्ले; या जैस खुशखबरी पुड़ तुसेईं विश्वास कियूं तैस करां अलग किसमेरे खुशखबरी तुसन शुनाए, त तुस तैन शिक्षान कबूल केरने मां गलतथ। 5 अवं समझताई, कि अवं कोन्ची गल्ली मां, जैना इस तरीके सेइं बतावं केरतन, कि तैना होरि सब प्रेरितन करां महान आन अवं भी तैन केरो जेरो रोड़ो प्रेरित आई। 6 अगर अवं भाषण देने मां माहिर नई, पन मसीह ते खुशखबरे बारे मां मीं कां ज्ञाने; बल्के मीं हर गल शिखालने मां अपनू ज्ञान हिरावरूपे। 7 कि मीं तुसन परमेशेरी खुशखबरी मुख्त शुनाई; ते अपनो आप निकड़ो कियो, कि तुस उच्चे भोथ, कुन इस मां मीं किछ पाप कियो? 8 मीं होरि कलीसियान करां दान कबूल कियूं ताके तुशुओ सेवा मुफते मां केरि बेटि, तैस जो लूट न जोथ। 9 ते जैखन तुसन सेइं साथी थियो, ते मीं पेइंसेरो घाटो भोव, ते मीं केन्ची पुड़ भार न छुड़ो, किजोकि विश्वासी ढलाएई, मकिदुनिया इलाकेरां एइतां मेरो घाटो पूरो कियो: ते मीं हर गल्ली मां अपनो आप तुसन पुड़ भार भोने करां रोको, ते अग्रोवं जो भी रोकेलो। 10 मसीहेरी सञ्चाई मीं मां आए, मीं अखाया इलाके मां कोन्ची करां दान नई नेवरू, एल्हेरेलेइ अखाया इलाके मां इस घमण्डे केरने करां कोई मीं न रोकी बटे। 11 किजो मीं तुशुओ पेइंसो नई नेवरो? कुन मीं एन कियूं, कि अवं तुसन सेइं प्यार न केरि? परमेशर ज्ञानते कि अवं तुसन सेइं प्यार केरताई। 12 पन जैन अवं केरताई, तैने अग्रोवं भी केरतो रेइलो; अवं तुसन करां मद्दत न नेइलो जैस सेइं अवं तैन जैना घमण्ड केरनेरो मौको चातन, कि जेरू कम अस परमेशेरे लेइ केरतम तेरहु कम तैना भी केरतन। 13 किजोकि एरे लोक झूठे प्रेरित आन, ते दगो केरतां कम केरनेबालन, ते मसीहेरे प्रेरितां केरू जेरू रूप बनाने बालेन। 14 ते ई हैरान राने बाली गल नई किजोकि शैतान एप्पू भी महिमा बाले स्वर्गदूतां केरू रूप बनाते। 15 ते अगर तैसेरे सेवक भी धर्मी सेवकां केरू जेरू रूप बनान, त कोई बड़ी गल नई पन तैन केरो अन्त तैन केरे कम्मां केरे मुताबिक भोनाए। 16 अवं फिरी ज़ोताई, कोई मीं बेवकूफ न समझे; नई बेवकूफ समझतां मीं कबूल केरे, ताके अवं थोड़ू जेरू

घमण्ड केरि। 17 जैन किछ अवं जोताई जेरू यीशु चाते तेरहु नई बल्के बेवकूफी सेइं ज़ोताई। 18 जैखन कि बड़े लोक इस दुनियारे लोकां केरू जेरू घमण्ड केरतन, त अवं भी घमण्ड केरेलो। 19 तुस त समझदार भोइतां आनन्दे सेइं बेकूफां केरि झैलतथ। 20 किजोकि जैखन तुसन कोई गुलाम बनातन, या जैन किछ तुसन कां आए नेते, या तुसन सेइं धोखो केरते, या सोचतन कि तैना तुसन करां बड़ुन, या तुशुओ तुतेरे पुड़ थप्पड़ बातन, त तुस झल्लतथ। 21 एल्हेरेलेइ कुन तुस सोचतथ कि मीं छिथोरू लोइते किजोकि मीं तैन नई कियोरू; पन जै कोई कोन्ची गल्ली मां घमण्ड केरते, अवं बेवकूफी सेइं ज़ोताई, फिरी भी घमण्ड केरताई। 22 कुन तैन्ना इब्रानी आन? अवं भी आई। कुन तैन्ना इस्राएली आन? अवं भी आई, कुन तैना अब्राहमेरे खानदाने मरां आन? अवं भी आई? 23 कुन तैना मसीहेरे सेवक आन? (अवं पागलेरो जेरो ज़ोताई) अवं तैन करां बेद्वतां आई! मीं तैन करां जादे मेहनत कियोरीए, तैन करां जादे बार अवं कैद कियोरोई, बड़े बार मीं मार बजोरीए, हमेशा मेरी जान मुश्किली मां पेवरीए। 24 मीं यहूदन लीडरेई करां पंच बार 39 कोड़े खाए। 25 दलेइ बार मीं बेंतेईं खेइ; एक्की बार मीं पुड़ घोड़े कियो जेव; दलेइ बार जिहाजे मां जैन पुड़ अवं चढ़ोरो थियो, दल्टुडी जेआं, अक रात ते दिहाड़ी मीं समुन्द्रे मां कट्टी। 26 अवं बार-बार सफरे मां; दरियारे खतरन मां; डैकू केरे खतरन मां; अपने ज़ातेरे खतरन मां; गैर कौमां केरे खतरन मां; नगरां केरे खतरन मां; जंगल्लेरे खतरन मां; झूठे विश्वासी लोकां केरे खतरन मां; 27 बड़े मेहनती मां ते तकलीफी मां; बार-बार बीड़ो बिशने मां; बार-बार बरत रखने मां; ढलुख दल्लिशी मां; हिवतड़े मां; ते नगमे रानेरी हालती मां राहोरोई। 28 ते होरि इना गल्लां केरे अलावा जैन गल्लां केरे बारे मां अवं न ज़ोई सेब्भी कलीसिया केरे फिक्र मीं रोज दुबातीए। 29 जैखन कोई कमजोर भोते अवं भी कमजोर भोताई। जैखन कोई पापेरे पासे गाते त मेरो दिल बड़ी दुखी भोते? 30 अगर घमण्ड केरनू जरूरीए, त अवं एपनी कमजोरारी गल्लन पुड़ केरेलो। 31 परमेशर इश्शे प्रभु यीशुएरो बाजी जै सदा धने, तै ज्ञानते, कि अवं झूठ नई लोरो ज़ोने। (aiōn g165) 32 जैखन अवं दमिश्क नगरे मां थियो त अरितास राजेरे हाकिमे अवं कैद केरनेरे मकसदे सेइं सारे नगरे मां पेरहो रखोरो थियो। 33 ते अवं टोकरे मां शहरपनाहेरे देरारे बत्तां दुवारी उन्दो औसालोरो थियो, ते अवं हाकिमेरे हथ्ये करां बचां।

12 अगर घमण्ड केरनू मेरे लेइ ठीक नई, फिरी भी केरनू पेते; अवं प्रभुएरे दित्तोरे दर्शन ते प्रकाशेरे बारे मां जोइएलो। 2 अवं मसीह मां च़ेवथे साल पेइले दलेइयोवं स्वर्गें पुड़ नीयो जेव, चाए अवं जिसमे मां थियो या जिसमे मरां बेइर, अवं न जैनी सिर्फ परमेशर ज्ञानते। 3 अवं फिरी ज़ोताई, कि ई मैन्हु स्वर्गें तगर अकदम नेव जेव (फिरि, अवं न जैनी कि इन जिसमे मां भोवं या अक दर्शन थियूं, सिर्फ परमेशरे ज्ञानते), तैड़ी तैनी तैना गल्लां शुनी जैना लफसन मां न जोइयोन, एरी गल्लां जैना मैन्हु ओठन सेइं न ज़ोई बटन। 5 एरे मैन्हु पुड़ त अवं घमण्ड केरेलो, पन अपने कमजोरी केरे अलावा, अपने बारे मां घमण्ड न केरि। 6 किजोकि

अगर अवं घमण्ड केरनू चैई भी त बेवकूफ न बेई, किजोकि अवं सच ज़ोइलो; पन अपने आपे एस किसमेरे घमण्डे करां रोकताई, एरु न भोए, कि जेन्चरे कोई मीं लाते, या मीं श्नुते, मीं तैस करां भी बेद्धतां न समझे। 7 पन ज़ैना अद्धबूद गल्लां परमेशरे मीं हेरेवरिन तैन केरे वजाई सेई अवं बडो जादे घमण्डी न भोइ गेइ। एल्हेरेलेइ तैनी मीं अक बडो मुशकिल मसलो तुसन सेई बताव केरनेरे लेइ दित्तोरोए (मेरी जानी मां अक कंटो)। शैतानेरे एक्की दूते मीं मडुनेरो इरादो कियोरोए ते अवं घमण्ड केरने करां रोकरोई। 8 इसेरे बारे मां मीं प्रभु कां दलाई बार बिनती की, कि मीं करां दूर भोइ गाए। 9 ते तैने मीं सेई ज़ोवं, “मेरो अनुग्रह तेरे लेइ सुधोए; किजोकि मेरी शक्ति कमज़ोरी मां सिद्ध भोतीए।” एल्हेरेलेइ अवं एपनी कमज़ोरी पुड़ घमण्ड केरेलो, कि मसीहेरी सामर्थ्य मीं पुड़ एंडती राए। 10 इस वजाई सेई अवं मसीहेरे लेइ कमज़ोरन मां, ते बेइजतन मां, गरीबी मां, सताए गाने मां, ते मुशकलन मां खुश आई; किजोकि ज़ैखन अवं कमज़ोर भोताई, तैखन अवं मसीहेरी शक्ति सेई ज़ोरे बालो भोताई। 11 अवं बेवकूफ त बनो, पन अवं एरु केरनेरे लेइ तुसेई अवं मजबूर कियो, तुसेई त मेरी बडयाई कियोरी लोइती थी, किजोकि अगर अवं किछ भी नई, फिरी भी होरे प्रेरित ज़ैना महान आन अवं तैन केरो ज़ेरो रोड़ो आई। 12 मीं रोड़े प्रेरितेरी पिशान भी तुशुशे दरमयान हर किसमेरे सबर साथी ते निशान ते बडां-बडां कम्मां, ते सामर्थ्यपरां कम्मां हिरां। 13 अक गल थी ज़ै मीं तुसन सेई न की, ज़ै मीं होरि कलीसियान सेई की, यानी अवं पेईसां केरे बारे मां तुशुशे लेइ बोझ न बनो। कुन इन तुसन घटिया बनाते, एरु केरने सेई मीं तुशुशे खलाफ गलत कियोरु ई तुशुशी सोच गलते। 14 हेरा, अवं ट्लेइयोवं बार एजनेरे लेइ तियाराई, ते अवं तुसन करां कोई पेईसां केरि मांग न रेखेलो। किजोकि अवं तुशुशी जेइदाद नई, बल्के तुसन चाताई, किजोकि बच्चेई अम्मा बाजी केरे लेइ धन अकोट्टू न लोड़े कियोरु, पन अम्मा बाजेई बच्चां केरे लेइ कियोरु लोड़े। 15 अवं तुशुशी लेइ बडी खुशी सेई खर्च केरेलो, बल्के अवं अपनू सब किछ तुसन देइलो, अवं तुसन सेई बडो प्यार केरताई पन एरु लगते कि तुस मीं सेई घट प्यार केरतथ। 16 तुसन मरां किछ मन्तन कि मीं तुसन पुड़ भार नई छडोरो, पन किछ होरे सोचतन कि अवं चलाक आई ते मीं तुसन पूरे तरीके सेई धोखो दित्तोरोए, जैन कि झूठ आए। 17 मीं अपने लेइ तुसन करां पेईसे नेनेरे लेइ तीतुस या होरो कोई इस्तेमाल नई कियोरो। 18 मीं तीतुस समझैइतां तैस साथी तै द्वाला भेजो, त कुन तीतुसे धोखे सेई किछ नेव? कुन अस एक्की मकसदे सेई न चले? कुन इश्शां कम्मां अक्कां ज़ेरां नई। 19 हे ट्लाराव, तुस हेजू तगर इन समझतथ कि अस तुशुशे सामने अपनो बचाव लोरेम केरने, अस त परमेशरे हाज़र सेमझतां मसीह मां ज़ोतम, ते सब गल्लां एल्हेरेलेइ ज़ोतम कि तुसन विश्वासे मां मज़बूत केरने लोरेम। 20 किजोकि मीं डरे, कि एरु न भोए, कि अवं एज्जी ते ज़ेन्चरे अवं चाताई, तेन्चरे तुस न भोथ; ते मीं भी ज़ेन्चरे तुस मीं चातथ तेरे लाथ, कि तुसन मां लडैई, गर्म सुभाव, सरक, खलाफत, जलन, चोगली, अभिमान ते फसाद भोन। 21 कि एरु न भोए कि ज़ैखन

अवं तुसन कां दुबारां एज्जी, त मेरो परमेशर मीं छिथाए। ते मीं दुःख केरनो पे, किजोकि तुसन मरां बडेई अपने पुराने पाप नई शारोरे। ते तैस गंदे कम्मे, ते बदमाशी, ते लुचपने सेई, ज़ै तैनेई कियो, मन न फिराव।

13 पवित्रशास्त्रे मां इन लिखोरुए कि, “हर अक गल दूई या ट्लेइ गवाहां केरे गवाही केरे ज़िरिये सेई पक्की की गाली।” मीं तैन लोकन हदैइयत दित्तोरोए ज़ैना पाप केरते थियो, ज़ैखन अवं दुइयोवं बार ओरो थियो। हुनी अवं फिरी तैन ते होरि सेब्भी लोकन हदैइयत देताई कि ठीक तेन्चरे ज़ेन्चरे मीं पेइलू भी कियोरुए इस चिट्ठी मां खबरदार केरताई। हुनी अवं ट्लेइयोवं बार एजनेबालो आई, ते अगर तैना हेजू भी पाप केरनो बंद नई कियोरो, तैन मरां कोई भी सज़ाई करां न बचेलो। 3 अवं ज़ोताई कि तुस इना गल्लां केरु सबूत चातथ, कि मसीह मेरे ज़िरिये गल्लां केरते, पन ज़ैखन मसीह तुसन सेई बताव केरते त तै कमज़ोर नई; पन तुसन मां सामर्थ्य आए। 4 तै कमज़ोरारे वजाई सेई कूसे पुड़ ज़ादो त जेव, फिरी भी परमेशरे शक्ति सेई ज़ीतोए। अस भी कमज़ोरम, ठीक तेन्चरां, ज़ेन्चरे मसीह थियो; पन ज़ैखन अस तुसन सेई बताव केरमेले अस भी तैस सेई साथी ज़ीते भोमेले ते असन सेई साथी परमेशरेरी शक्ति भोली। 5 अपनो आप परखा, कि तुशुशो विश्वास सच्छो आए कि नई; एप्पू परखा, कुन तुसन अपने बारे मां ई पतो नई, कि यीशु मसीह तुसन मां आए, नई त तुस निकम्मे भोए। 6 पन मेरी उमीदे, कि तुस बुझेले, कि अस निकम्मे नई निसोरे। 7 चाए अगर तुसन इन लेइहोते कि अस सच्छे प्रेरित नई, अस तुशुशे लेइ परमेशरे कां प्रार्थना केरने लोरेम, कि गलती केरनेरे बगैर सिर्फ रोड़ू केरा। 8 किजोकि अस सच्छेरे खलाफ किछ न केरि बटम, पन सच्छेरे लेइ केरि बटतम। 9 ज़ैखन अस कमज़ोरम, ते तुस ताकतबरथ, अस खुशी रातम, ते ई प्रार्थना भी केरतम, कि तुस विश्वासे मां सिद्ध भोते राथ। 10 एल्हेरेलेइ अवं तुशुशे पिठी पतर इना गल्लां लिखताई, कि मौजूद भोइतां मीं तैस अधिकारेरे मुताबिक ज़ै प्रभुए बिगाइनेरे लेइ नई पन बनानेरी लेइ मीं दित्तोरोए, सेखती सेई किछ न केरनू पे। 11 हे द्वालाव ते बेइनव, खुश राथ, सिद्ध बनते राथ; एक्की होरि हिम्मत देथ; ते मेल मिलापे सेई राथ, ते प्यार केरनेबालो ते शान्ति देनेबालो परमेशर तुसन साथी भोलो। 12 मसीहेरे प्यारे सेई एक्की होरि जो नमस्कार केरा। 13 सब पवित्र लोक तुसन जो नमस्कार ज़ोतन। 14 प्रभु यीशु मसीहेरो अनुग्रह ते परमेशरेरो प्यार ते पवित्र आत्माारी सन्गती तुसन सेब्भन साथी भोए।

गलातियों

1 अवं पौलुस ई चिट्ठी तुसन लिखताई, अवं अक प्रेरिताई, अवं न मँहु केर तरफां, ते न केन्ची मैने ज़िरिये प्रेरित भोनेरे लेइ चुनोरोई, बल्के यीशु मसीह ते बाजी परमेशरे ज़िरिये, ज़ैनी यीशु मुड़द न मरां ज़ीतो कियो। 2 ते सारे ढलां केर तरफां, ज़ैना मीं सेइं साथिन; गलातिया इलाकेर कलीसियां केर लेइ ई चिट्ठी लिखताई। 3 बाजी परमेशर, ते इश्शे प्रभु यीशु मसीहरे तरफां तुसन अनुग्रह ते शान्ति मैलती राए। 4 इश्शे परमेशर ते बाजी केरि मेर्जी सेइं यीशु मसीहे अपनो आप इश्शे पापां केर लेइ बलिदान कियो, ताके असन इस मौजूद बुरे दुनियाई करां छुटकारो दे। (aiōn g165) 5 तैसेरी महिमा हमेशा भोती राए। आमीन। (aiōn g165) 6 अवं हैरान भोताई, कि परमेशरे तुस मसीहरे अनुग्रहे मां जीनेरे लेइ कुजाए; ते तुस तैस करां एत्रे जल्दी फिरतां होरि किसमेरी खुशखबरी मन्ने लाए। 7 पन सिर्फ एक्के सज़्जी खुशखबरी आए, गल ईए, कि किछ लोक एरेन, ज़ैना तुसन धोखो देतन, ते मसीहरी खुशखबरी बगाड़ने चातन। 8 पन अगर असन मरां कोई या कोई स्वर्गदूत भी तुसन कोई तैस खुशखबराे अलावा ज़ै असेईं तुसन शुनोरी, शुनाए त लानती भोए। 9 जेन्चरे असेईं पेइलू ज़ोवरूप, तेन्चरे अवं हुना फिरि ज़ोताई, कि तैस खुशखबराे अलावा ज़ै तुसेईं कबूल कियोरोए, अगर कोई होरो खुशखबरी शुनाए, त लानती भोए। 10 हुनी कुन अवं मँहु केरि मन्ज़ूरी हासिल केरनेरी कोशिश केरताई या परमेशरेरी? कुन अवं लोकन खुश केरनेरी कोशिश केरने लोरोई? बिलकुल भी नई, अगर हेजू तगर लोकन खुश केरतो राताई, त मसीहरो दास न भोथो। 11 हे ढलाव ते बेइनव, अवं तुसन ज़ोताई, कि ज़ै खुशखबरी मीं तुसन शुनाई, ई मँहु केरि बनोरी नई। 12 किजोकि तै मीं न केन्ची मँहु करां मैलोरी, ते न मीं कोन्ची उस्तादे करां शिखोरी, बल्के यीशु मसीहे मीं पुड़ बांदी की। 13 तुसेईं शुनोरूप यहुदी धर्म मां पेइलो ज़ै मेरो चालचलन थियो तै केरो थियो, कि अवं परमेशरेरी कलीसियाई बड़ी सतातो थियो, ते नाश केरनेरी कोशिश केरतो थियो। 14 ते अवं अपने धर्म मां तैस वक्ते बड़े मेरे उमरारे यहुदन करां अग्रोवं थियो। ते अपने बुजुर्गां केर रीतन मां जोशे मां थियो। 15 पन परमेशरेरी ज़ैखन इच्छा भोइ, तैनी अवं मेरे ज़रमने करां पेइलो चुनो ते अपने अनुग्रह सेइं कुजाव, 16 कि मीं मां अपने मट्टू बांदू केरि कि अवं गैर कौमन मां तैसेरी खुशखबरी शुनेई; ते मीं समझनेरे लेइ होरि कोन्ची करां सलाह नी। 17 ते न यरूशलेम नगरे मां तैन कां जेव ज़ैना मीं करां पेइले प्रेरितन, पन अरब मुल्खे जो चलो जेव, ते फिरि किछ चिरेरां बाद तैदुं दामिश्क नगरे जो वापस अव। 18 फिरि ट्लाई सालना पत्ती अवं कैफा (यानी पतरस प्रेरिते) सेइं मिलने यरूशलेम नगरे जो जेव, ते 15 दिहाड़े तैड़ी राव। 19 पन प्रेरितन मरां प्रभुएरे ढला याकूबेरे अलावा होरि कोन्ची सेइं न मिलो। 20 ज़ैना गल्लां अवं तुसन लिखताई, हेरा परमेशरे हाज़र सेमझतां ज़ोताई, कि तैना झूठी नई। 21 यरूशलेम नगर शारनेरां पत्ती, अवं सीरिया ते किलिकियारे मुल्खे मां जेव। 22 पन

यहुदिया इलाकेरे कलीसियां केर लोक ज़ैना मसीह मां थिये, ज़ैना मीं सेइं कथे न थिये मिलोरे। 23 पन इन्ने शुन्ते रहते थिये, कि ज़ै असन पेइलो सतातो थियो, तैए तैस्से विश्वासेरी खुशखबरी शुनाते, ज़ैस पेइलो नाश केरतो थियो। 24 ते ज़ैन परमेशरे मेरे ज़िन्दगी मां कियू तैल्हेरेलेइ तैना परमेशरेरी बडीयाई केरते रहते थिये।

2 चेवथे सालना पत्ती अवं बरनबासे सेइं साथी यरूशलेम नगरे जो जेव, ते तीतुस भी मीं एप्पू सेइं साथी नीयो। 2 अवं एल्हेरेलेइ तैड़ी जेव किजोकि परमेशरे मीं गानेरे लेइ ज़ोरु थियू, ज़ैखन अवं तैड़ी थियो, अवं अकैल्ले मां कलीसियारे खास बुजुर्गन सेइं मिलो ते तैन खुशखबरी समझाई, ज़ै अवं गैर कौमन मां प्रचार केरतो ओरो थियो, ताके एरू न भोए, कि ज़ैन किछ अवं केरतो ओरोई ते ज़ैन केरने लोरोई बेफैडू भोए। 3 मेरो साथी तीतुस, ज़ै यूनानीए, जेसेरो खतनो कथी न भोरो। पन ज़ैना यरूशलेम नगर कलीसियारे खास बुजुर्ग थिये तैनेई तै खतनो करानेरे लेइ मजबूर न कियो, बल्के तैनेई तै कबूल कियो। 4 ते ई गल तैन केर लेइ परेशानी बनी, ई इन तैन झूठे ढलां केर वजाई सेइं भोवं, ज़ैना छेपतां इश्शे टोली मां ओरे थी, कि तैस ऐज़ेदरी ज़ै मसीह यीशु मां असन मैलोरीए, भेद नेइतां फिरि असन यहुदी केर कानूनेरे गुलाम बनान। 5 पन असेईं एक्की पलेरे भी तैन केरि शुने करां इन्कार कियो, ताके ज़ै सन्देश असेईं तुश्शे लेइ आनो तै सज़्जी खुशखबरी बनोरी राए। 6 तैन यरूशलेम नगरेरे कलीसियारे खास लीडरेई मेरी शिक्षाई मां किछ न ज़ोइ, इस सेइं मीं किछ फर्क न पे, कि तैना केरहे बुजुर्ग आन, किजोकि परमेशर बेइरोवं रूप हेरतां फैसलो न केरे। 7 पन इसेरे उलट ज़ैखन तैन बुजुर्गेई हेरू, कि जेन्चरे परमेशरे यहुदी लोकां केर लेइ खुशखबरारू कम पतरसे सोंफू, तेन्चरे परमेशरे गैर कौमां केर लोकन खुशखबरी शुनानेरू कम मीं सोंफू। 8 ज़ैने परमेशरे पतरस यहुदी केरो प्रेरित भोनेरे लेइ चुनो, तैन्ने अवं भी गैर कौमां केरो प्रेरित भोनेरे लेइ चुनो। 9 ज़ैना मँहु कलीसियारे खम्मबे समझे गाते थिये (यानी खास लीडर) मतलब याकूब, कैफा (यानी पतरस) ते यूहन्ना तैनेई अनुग्रहेरू तैन वरदान पिशानू ज़ैन मीं मैलोेरू थियू। तैनेई अवं ते बरनबास साथी सेमझतां ते असन सेइं हथ मिलेइतां राज़ी भोए। कि अस गैर कौमन मां खुशखबरी प्रचार केरम, ते तैना यहुदीन मां। 10 तैनेई असन कां बिनती की, कि अस यरूशलेमेरे गरीब विश्वासी लोकां केरि मद्दत केरम, ज़ैन केरनेरी अवं बड़ी इच्छा केरतो थियो। 11 पन ज़ैखन कैफा (पतरस) अन्ताकिया नगरे मां अव, त मीं सेब्भी विश्वासी लोकां केर सामने तैसेरी खलाफ की ते झाड़ दिती, किजोकि ज़ैन तैनी कियोरू थियू तैन गलत थियू। 12 एल्हेरेलेइ कि याकूबेरे पासरां किछ मँहु केरे एजनेरे पेइले तै गैर कौमां केर लोकन साथी खातो थियो, पन ज़ैखन तैना आए, त खतनो कियोरे लोकां केर उरे सेइं तैन करां हटो ते अलग भोने लव। 13 ते तैस साथी बाकी यहुदी विश्वासी लोकेई भी पाखंड कियू, इड़ी तगर कि बरनबास भी तैन केर संगती मां शामिल भोव। 14 पन ज़ैखन मीं तैन केरो बर्तव हेरू, कि तैना खुशखबराे सज़्जेरे खलाफ चलतन, त मीं सेब्भी केर सामने कैफा

(पतरस) सेइं ज़ोवं, “कि ज़ैखन तू यहूदी भोइतां गैर कौमन केरि ज़ेरि चाल च़लतस, न कि यहूदी केरि ज़ेरि, त तू गैर कौमन यहूदी केरे रसमन पुड़ च़लनेरे लेइ किजो ज़ोतस?” 15 अस ज़ैना ज़र्मनेरे यहूदिम, ते पैपी गैर कौमां केरे ज़ेरे नई। 16 फिरी भी इन सेमझतां कि मैन्हु मूसेरे कानूनेरे कम्मन सेइं नई, पन सिर्फ यीशु मसीह पुड़ विश्वास केरने सेइं धर्मी भोते, असेई एप्पू भी मसीह यीशु पुड़ विश्वास कियो, कि अस मूसेरे कानूनेरे कम्मन सेइं नई पन यीशु मसीह पुड़ विश्वास केरने सेइं धर्मी भोए, किजोकि मूसेरे कानूनेरे कम्मन सेइं कोई धर्मी न भोलो। 17 किछ यहूदी सोचतन कि असेई पाप कियो, किजोकि असेई धर्मी भोनेरे लेइ कानून मन्नेरे बदले सिर्फ मसीह पुड़ विश्वास कियोरो, त कुन मसीहे अस पापी बनाए, नई, कधी नई। 18 किजोकि ज़ैन किछ मीं बछोडू, अगर तैस फिरी बनेइं, त अपनो आप पापी बनाताई। 19 अवं त कानूने सेइं कानूनेरे लेइ मेरि जेव, कि परमेशरेरे लेइ ज़ीई। 20 अवं मसीह सेइं साथी कूसे पुड़ च़दोरोई, ते हुनी ज़ीतो न राव, पन मसीह मीं मां ज़ीतोए, ते अवं जिसमे मां हुनी ज़ीतोई, त सिर्फ तैस विश्वासे सेइं ज़ीतोई, ज़ै परमेशरेरे मट्टे पुड़े, ज़ैने मीं सेइं प्यार कियो, ते मेरे लेइ अपनि जान दिती। 21 अवं इस गल्लरो इन्कार न केरि कि परमेशर अपने अनुग्रहे सेइं बच्चाते, किजोकि अगर कानून मन्ने सेइं लोक धर्मी भोथे, त मसीहे मरनेरी कोई ज़रूरत न थी।

3 हे बेसमझ गलातियारे लोकव, केने तुस टरे लाए? तुश्शे त मना तुश्शे सामने यीशु मसीह कूसे पुड़ च़ाढो! 2 अवं तुसन सिर्फ ई सवाल पुछनो चाताई, कि तुसेई पवित्र आत्मा कुन कानून मन्ने सेइं हासिल कियो? बिलकुल भी नई, तुसेई खुशखबरी शुनी ते तैस पुड़ विश्वास कियूं ते पवित्र आत्मा हासिल की। 3 कुन तुस एरे बेसमझथ, कि पवित्र आत्मा रेति पुड़ शुरू केरतथ ते जिसमेरे रीति पुड़ खतम केरेले? 4 कुन तुसेई सब दुःख बेफैइदो ड़ैल्ले? अवं उमीद केरताई बेफैइदो नई। 5 एल्हेरेलेइ ज़ै तुसन पवित्र आत्मा दान बडू जादे देते ते चमत्कार केरते, कुन तै कानून मन्नेरे वजाई सेइं एन केरते या तुसेई खुशखबरी शुनी ते तैस पुड़ विश्वास कियो? 6 हुनी अब्राहमेरे बारे मां सोचा “अब्राहमे परमेशरे पुड़ विश्वास कियो ते ते तैसेरेलेइ धार्मिकता गनो जेवा।” 7 एल्हेरेलेइ तुसन एन ज़ान्नेरी ज़रूरते कि ज़ैना अब्राहमेरो ज़ेरो परमेशरे पुड़ विश्वास केरनेबालेन तैना हकीकति मां तैसेरी बच्चेन। 8 पवित्रशास्त्रे मां बडू पेइलू इन लिखोरूप, कि परमेशर गैर कौमन विश्वासे सेइं धर्मी बनालो, पेइले अब्राहमे ई खुशखबरी शुनाई, “कि तेरे ज़िरिये सेबभी कौमन बरकत मैलेली।” 9 ते ज़ैना अब्राहमेरो ज़ेरो परमेशरे पुड़ विश्वास केरतन, परमेशर तैन सेबन बरकत देते ज़ैना मसीह पुड़ विश्वास केरतन जेन्चरे तैनी अब्राहमे बरकत दिती। 10 एल्हेरेलेइ ज़ैना लोक सोचतन कि तैना मूसेरो कानून मेन्तां धर्मी बनाए गाले, तैन पुड़ परमेशरेरी लानते, किजोकि मूसेरे कानूने मां लिखोरूप, “कि ज़ै कोई कानूने मां लिखेरे सब कानूनेरे मुताबिक न चले, तैस पुड़ परमेशरेरी लानते।” 11 ई गल साफे, कि मूसेरे कानून सेइं परमेशरे कां कोई मैन्हु

धर्मी न भोए, “किजोकि ज़ै मैन्हु परमेशरे पुड़ विश्वास केरते, परमेशर तैस धर्मी ठहराते ते तैस हमेशारी ज़िन्दगी मैलतीए।” 12 पन मूसेरे कानूनेरो विश्वासे सेइं कोई वासतो नई; पन “ज़ै तैन मन्नेलो, तै तैन मन्ने सेइं ज़ीतो रालो।” 13 मसीहे ज़ै इश्शे लेइ लानती बनो, तैन अस कीमत देइतां कानूनेरे लानती करां छुटाए किजोकि पवित्रशास्त्रे मां लिखोरूप, “ज़ै कोई कूसे पुड़ टंगो गालो तै लानतीए।” 14 मसीहे एन एल्हेरेलेइ कियूं, कि गैर कौमां तैसेरे ज़िरिये तैना सैरी बरकतां हासिल केरन, ज़ैन केरो वादो परमेशरे अब्राहम सेइं कियोरो थियो, ते मसीह पुड़ विश्वास केरने सेइं अस पवित्र आत्मा हासिल केरम, ज़ेसेरो वादो तैन कियोरोए। 15 हे ड़लाव ते बेइनव, अवं आम ज़िन्दगी मिसाल देने लोरोई, ज़ैखन दूई मैन्हु केरो करार ज़ै पक्को भोते, त न कोई तैस टालते ते न तैस मां किछ बढाते। 16 ते सारे वादे परमेशरे अब्राहमे ते तैसेरे खानदाने दिते; पवित्रशास्त्र इन न जोए, “कि वंशां,” कि बडां केरे बारे मां ज़ोवं, पन एक्की मैनेरे बारे मां ज़ोवं “कि तेरु वंश इने, ते तै मसीहे।” 17 मेरे ज़ोनेरो मतलब ई आए, परमेशरे अब्राहमे सेइं करार केरनेरां बाद 430 सालन पती मूसे कानून दितो (ताके तैस करारे पक्को केरे), पन अस न जोई बटन कि परमेशरेरो करार टलुदो, तैए करार पक्कोए, तैए तैस पूरो केरेलो। 18 किजोकि परमेशर असन अपनि बरकत एल्हेरेलेइ न दे कि अस मूसेरे कानूनेरे मुताबिक च़लतम, पन तै एल्हेरेलेइ देते कि तैनी वादो कियोरोए, परमेशरे अपने अनुग्रहे सेइं अब्राहमे बरकत दिती, किजोकि तैनी पेइलो वादो कियोरो थियो। 19 तैखन, फिरी कानूनेरो कुन मकसद थियो? तैन त पापां केरे वजाई सेइं बादे मां दितू, ताके तैसेरे वंश मसीहेरे एजने तगर राए, ज़ैस सेइं वादो कियोरो थियो, परमेशरे स्वर्गदूतां केरे ज़िरिये मूसे कानून दितो, ज़ै परमेशर ते लोकां केरि बिचवाई केरनेबालो थियो। 20 परमेशरे एप्पू अब्राहमे सेइं वादो कियो। एल्हेरेलेइ हुनी बिचवाई केरनेबालेरी कोई ज़रूरत नई। 21 कुन कानून परमेशरेरे वादां केरे खलाफे? नई, कधी नई! किजोकि अगर एरो कानून दितो गाथो ज़ै हमेशारी ज़िन्दगी देइ बटेथो, त सच्चे धार्मिकता कानून मन्ने सेइं भोथी। 22 पन पवित्रशास्त्रे ज़ोते दुनियारे सब लोक पापेरे अधीन आन, ताके तै वादो ज़ेसेरी बुनीयाद यीशु मसीह पुड़ विश्वास केरनोए, तैस पुड़ विश्वास केरनेबालां केरे लेइ पूरो भोए। 23 पन इस करां पेइले कि लोक मसीह पुड़ विश्वास केरन, मसीहेरे एजने करां पेइले अस यहूदी कैदे मां थिये कानून इश्शी रखवाली केरतो थियो। ते तैस विश्वासे एजने तगर ज़ै बांदो भोनेबालो थियो, अस तैसेरे बन्धने मां रहम। 24 एल्हेरेलेइ कानून मसीह तगर पुजांनेरे लेइ असन बत हिरानेबालो ते स्मभालने बालो भोव, कि अस यीशु मसीह पुड़ विश्वासे केरने सेइं परमेशरेरे सामने धर्मी भोम। 25 पन ज़ैखन मसीह अव ते असेई विश्वास कियूं, त असन ज़रूरत न पेई, कि कानून बत हिराए ते मद्दत केरे। 26 किजोकि तुस सब विश्वास केरने सेइं ज़ै मसीह यीशु पुड़े, परमेशरेरे बच्चेथ। 27 ते तुसन मरां ज़ेत्रेई मसीह मां अक भोनेरे लेइ बपतिस्मो नीयो, तुसेई मसीहेरी नर्वी ज़िन्दगी तेन्चरे लाई जेन्चरे लिगडां लातन। 28 हुनी मसीह मां कोई फर्क नई, चाए कोई

यहूदीए या गैर यहूदीए, गुलामे या आज़ाद। कोई फर्क नई मड़दे या कुआन्शे, अस यीशु मसीह मां सब बराबर आम। 29 किजोकि तुस मसीह सेइं साथी अक आथ, त अब्राहमेरे बच्चेथ, ते परमेशेरे वादेरे मुताबिक बरकतां केरे वारस भी आथ।

4 अवं मिसाल देइतां जोताई, कि वारस ज़ांतगर बच्चोए, अगर तै सेरुभी चीज़ां केरो मालिके, फिरी भी तैस त कने गुलामे मां कोई फर्क नई। 2 पन बाजी केरे ठहरावरे वक्ते तगर सुमालने बालां ते भैन्डैरी केरे हेरगेशी मां रहते। 3 तेन्चरे अस भी ज़ैखन बच्चां केरे जेरे थिये, त दुनियारे रीति रूवाजां ते कानूनेरे गुलाम थिये। 4 पन ज़ैखन ठीक वक्त अव, त परमेशेरे अपनू मट्टू दुनिया मां भेज़ू, ज़ैस एककी कुआन्शां ज़र्म दित्तू, तैन यहूदन मां ज़र्म ते तैनी कानून मन्नो। 5 ताके तैन छुटाए ज़ैना मूसेरे कानूनेरे अधीन थिये, ते असन तैसेरे बच्चे भोनेरो अधिकार मैल्ले। 6 ते तुस ज़ैना बच्चेथ, एल्हेरेलेइ परमेशेरे मट्टेरी आत्मा इश्शे दिले मां भेजोरीए, ज़ै आत्मा, “हे बैपू, हे बाजी,” ज़ोती। 7 एल्हेरेलेइ हुनी तू गुलाम नई, पन परमेशेरो बच्चोस, ते ज़ैखन परमेशेरो बच्चोस, त तीं तैन सब मैलेलू ज़ेसेरो वादो परमेशेरे अपने बच्चन देनेरो वादो कियोरोए। 8 ज़ैखन तुस परमेशर न थिये ज़ानते, त तुसन तैन केरे गुलाम थिये, ज़ैना हकीकति मां ईश्वर अथ्थी नई। 9 पन हुनी तुश्शो रिश्तो परमेशर सेइं आए, ते तुसेईं तै ज़ानो बल्के परमेशेरे अस कबूल किये, ते तैन कमज़ोर ते निक्केमी पेइली गल्लां केरे पासे किजो गातथ, कुन तुस तैन केरे दुबारा गुलाम भोने चातथ? 10 मीं शुनेरूए कि तुस गैर कौमां केरे विश्वासी, यहूदी केरे दिहाइन ते महीन्न ते खास वक्ते ते सालां केरे तिहारन मन्तथ, इन सोचतां कि परमेशर खुश भोते। 11 अवं तुश्शू एन केरनेरे वजाई सेइं परेशान आई, कि एरू न भोए, कि ज़ै मेहनत मीं तुश्शे लेइ कियोरीए ते बैफेइदी भोए। 12 हे ढलाव ते बेइनव, अवं तुसन कां बिनती केरताई, तुस अपने आपे यहूदी केरे कानूने करां आज़ाद केरा, किजोकि मीं अपनो आप आज़ाद कियोरोए ज़ेन्चरे तुस गैर कौमेरे लोक पेइले आज़ाद थिये, तुस पेइले मेरे सामने बडे रोडे थी। 13 तुसन याद भोलू, ज़ैखन अवं पेइली बार खुशखबरी शुनाने तुसन कां अव त अवं बिमार थियो। 14 ते मेरी जिसमानी हालत ज़ै तुश्शे आजमैइशरी वजा थी, तुसेईं अवं घटिया न समझो ते तुसेईं दूर न कढो बल्के एन्चरे कबूल कियो ज़ेन्चरे परमेशेरो दूत या यीशु मसीह एप्पू। 15 ते तुश्शी तै खुशी मनानी कोरां जेई? अवं सच्चे जोई बटताई, तुस मेरे लेइ सब किछ बलिदान केरनेरे लेइ तियार थिये, इडी तगर कि अपनि एछ्छी भी। 16 ते कुन तुसन सेइं सच्र ज़ोनेरे वजाई सेइं अवं तुश्शो बैरी भोरोई। 17 तैना झूठे उस्ताद तुसन दोस्त बनानो त चातन, पन रोडी नीती सेइं नई; बल्के तुसन अलग केरने चातन, कि तुस तैन केरे चले बना। 18 जोशे मां भोनू रोडूए, कि रोडी गल्लन मां हर वक्त दोस्त बनानेरी कोशिश की गाए, सिर्फ तैस वक्ते नई ज़ैखन अवं तुसन सेइं साथी राताई। 19 हे मेरे बच्चव, ज़ांतगर तुसन मां मसीहेरू रूप न बने, तांतगर अवं तुश्शे लेइ ज़र्म देने बैली कुआन्शे ज़ेरे तकलीफी मां राताई। 20 अवं त चाताई कि

हुनी तुसन कां एइतां मिट्टी ज़बाना गल केरि, किजोकि मेरी समझी मां न एज्जे कि अवं तुसन सेइं कुन केरि। 21 तुस ज़ैना मूसेरे कानूनेरे अधीन भोने चातथ, मीं ज़ोतथ, कुन कानूनेरी गल्लां शुन्नेरे लेइ तियार नई? 22 तैस मां इन लिखोरूए, कि अब्राहमेरां दूई मट्टां थियां; अक गुलाम कुआन्शरू, ते अक ज़ै आज़ाद थी तैसेरू। 23 पन ज़ैन गुलाम कुआन्शरू भोव, तैन आम बच्चां केरू ज़ेरू ज़र्मू, ते ज़ैन आज़ाद कुआन्शरू भोव, तैन परमेशेरे वादेरे मुताबिक ज़र्मू। 24 इना दूई कुआन्शां परमेशेरे दूई करारां केरे रूपे मां कम केरतिन। पेइली कुआन्शा हाजिरा सीनै पहाडे हिराती ज़ैडी लोकन कानून मैल्लो, ज़ैन तैन गुलाम बनातू थियू। 25 हाजिरा मना अरबेरू सीनै पहाडेरी ज़ेरि आए, ज़ेसेरी तुलना मौजूद यरूशलेम सेइं केरोतीए, किजोकि तैन अज़ अपने बच्चन यानी अपने लोकन समेत गुलैमी मांए। 26 पन बेयू यरूशलेम अब्राहमेरे कुआन्शा सारारू ज़ेरूए, ते तैसेरे बच्चे गुलाम नई। इन यरूशलेम इश्शे लेइ इश्शे अम्मारू ज़ेरू आए ज़ैसां विश्वास कियो। 27 किजोकि पवित्रशास्त्र ज़ोते, “हे बाँझ, तीं ज़ैसां कधे बच्चे नई जावरे, खुश भो, तीं ज़ैस बच्चो ज़ानेरी तकलीफ नई भोरी; आवाज़ उच्चि केर ते जयजयकार केर, किजोकि शैरोरारी औलाद सुहागनी करां भी जादे।” 28 हे ढलाव ते बेइनव, तुस अब्राहमेरे मट्टे इसहाकेरे ज़ेरे आथ, ज़ैन परमेशेरे वादेरे मुताबिक ज़र्मू, अस भी परमेशेरे वादेरे मुताबिक तैसेरे बच्चे बने। 29 ते ज़ेन्चरे तैस वक्ते ज़ै बच्चो आम बच्चां केरो ज़ेरो ज़र्मोरो थियो, तैस सतातो थियो ज़ै परमेशेरे आत्मारे मुताबिक ज़र्मोरो थियो, तेन्चरे अज़ भी अस तैन करां सताव झैल्लतम ज़ैना कानून मेन्तां परमेशेरे सामने धर्मी भोनू चातन। 30 पन पवित्रशास्त्र कुन ज़ोते? “गुलाम कुआन्शी ते तैसेरे मट्टे कढ, किजोकि गुलाम कुआन्शरू मट्टू आज़ादेरे मट्टे साथी वारस न भोलू।” 31 एल्हेरेलेइ हे ढलाव ते बेइनव, अस गुलाम कुआन्शेरे बच्चे नई, ज़ै कानूने, बल्के आज़ाद कुआन्शां बच्चेम, ज़ै विश्वासे।

5 मसीहे अस आज़ाद कियोरेम हुनी असन गुलामेरू ज़ेरू यहूदी केरू कानून मन्नेरी ज़रूरत नई, अपने एस ऐजेदी मां बनोरे राथ, ते दुबारा अपने आपे कानून मन्नेरे गुलाम भोनेरे लेइ न देथ। 2 हेरा, अवं पौलुस तुसन सेइं ज़ोताई, अगर परमेशेरे सामने धर्मी भोनेरे लेइ खतनो कराले, फिरी ज़ैन मसीहे कियोरू तैसेरो तुसन कोई फेइदो न भोलो। 3 फिरी भी अवं हर एककी सेइं ज़ोताई ज़ै इस उमीदी सेइं खतनो कराते कि परमेशेरे सामने धर्मी भोए, तैस कानूनेरो हर हुकम मन्नो पेनोए। 4 तुस ज़ैना कानून मेन्तां धर्मी भोने चातथ, तुसेईं अपनो आप मसीह करां अलग कियो ते परमेशेरो अनुग्रह कबूल केरने करां इन्कार कियो। 5 अवं इन ज़ोई बटताई, किजोकि असन पवित्र आत्मारे तरफां पूरो भरोसो कि परमेशर असन धर्मी कबूल केरेलो किजोकि अस मसीह पुइ विश्वास केरतम। 6 ते मसीह यीशु मां न खतनो, न बगैर खतनो किछ कम्मरोए, पन सिर्फ विश्वास ज़ै प्यारे सेइं अस्सर केरते। 7 तुस त रोडी दौड लोरे थिये दौइने, तुस केनि रोके, कि सच्चे न मन्थ। 8 एरी शिखर तुसन परमेशेरे नई दित्तोरी ज़ैने तुस अपने बच्चे भोनेरे लेइ कुजोरेथ। 9 झूठी

शिक्षा थोड़े ज़ेरे खमीरिरी ज़ेरि ज़ैन सारे सोन्नोरे अट्टे खमीर केरते। 10 अवं प्रभु पुड़ भरोसो रखताई, कि तुसन झूठी शिक्षा पुड़ विश्वास केरने करां दूर रखे; पन ज़ै तुसन परेशान केरते, तै कोई कि न भोए परमेशर तैस सज़ा देलो। 11 पन हे ढ़लाव ते बेइनव, अगर अवं लोकन प्रचार केरतो भोथो कि खतनो केरनो ज़रूरीए, त स्ताव न गाथो। अगर अवं ई प्रचार न केरतो राथो कि मुक्ति सिर्फ मसीहेरे क्रूसे सेइं, त फिरी केन्ची ठोकर न लगैथी। 12 रोडू भोथू कि ज़ैना तुसन टपलातन, तैना अपनो अंग कटैथे! 13 हे ढ़लाव ते बेइनव, तुस आज़ाद भोनेरे लेइ कुजोरेथ पन एरू न भोए, कि ई आज़ादी जिसमानी कम्मां केरे लेइ मौको बने, बल्के प्यारे सेइं एक्की होरेरे सेवक बना। 14 किजोकि सारो कानून इस्से एक्की गल्ली मां पूरो भोइ गाते, “कि तू अपने पड़ोसी सेइं अपनो ज़ेरो प्यार केर।” 15 पन अगर तुस एक्की होरि सेइं लटते ते तंग केरते राथ, त खबरदार राथ, एक्की होरेरी बरबादी केरेले। 16 पन अवं जोताई, पवित्र आत्मा रे चलाने सेइं चलेले, त तुस जिसमेरी खुवैइशां कधी पूरी न केरेले। 17 किजोकि जिसम पवित्र आत्मा रे खलाफे, ते पवित्र आत्मा जिसमेरे खलाफ खुवैइश केरते, ते इना एक्की होरेरे दुश्मन आन; एल्हेरेलेइ ज़ैन तुस केरनू चातथ तैन न केरि बटथ। 18 ते अगर तुस पवित्र आत्मा रे चलाने सेइं चलतथ त कानूनरे अधीन न राए। 19 जिसमेरां कम्मां बांदन, मतलब बदमाशी, गंदा कम्मां, चपलूसी। 20 मूरती केरि पूजा, टूनो, बैर, लड़ाई, जलन, सरक, खलाफत, फसाद, विधर्म। 21 नफरत, नशो केरनो, नाघ, ते इन केरे ज़ेरां होरां भी कम्मां आन, ज़ैन केरे बारे मां अवं तुसन पेइलू जोताई, जेन्चरे पेइलू भी ज़ोवरूप, कि एरां कम्मां केरनेबाले परमेशरेरे राज़ेरे वारस नईं भोने। 22 पन पवित्र आत्मारो फल प्यार, आनन्द, शान्ति, सबर, ते दया, भलाई, विश्वास, 23 नम्रता, ते बरदाश केरनू; एरां कम्मां केरे खलाफ कोई कानून नईं। 24 ते ज़ैना मसीह यीशु मां आन, तैनेईं जिसम तैसेरे खुवैइशन सेइं साथी क्रूसे पुड़ चाढ़ोरोए। 25 अगर पवित्र आत्मां असन नर्वीं ज़िन्दगी दित्तोरीए, त पवित्र आत्मा रे मुताबिक चलम भी। 26 अस घमण्ड न केरम, अस एक्की होरि न सरकाम, ते एक्की होरि सेइं न जलन केरम।

6 हे ढ़लाव ते बेइनव, अगर तुसन पतो चले कि केन्चे कोई पाप कियोरोए, त तुस ज़ैना पवित्र आत्मा रे चलाने सेइं चलतथ, तैस बडे नेरमी सेइं वापस धार्मिकतारे बत्तां वापस एजनेरी लेइ मदत केरा, ते अपनो भी खियाल रखा, कि तुस भी तैस्से अज़मैइशी मां न पेथ। 2 तुस एक्की होरेरी मुशकलन मां मदत केरा, ते एन्चरे मसीहेरो कानून पूरो केरा। 3 अगर कोई अपने आपे खास मैन्हु समझे ते तै सच्चे न भोए, त तै अपने आपे धोखो देते। 4 पन हर कोई अपने कम्मे परखे, ते तैखन तैस होरि केरे बारे मां नईं पन अपने बारे मां घमण्ड केरनेरो मौको भोलो। 5 किजोकि हर कोई मैन्हु अपनो भार छूलो। 6 ज़ैन वचनेरी शिक्षा मैलतीए, तैना सब रोड़ी चीज़न मां शिखालनेबाले शामिल रखन। 7 धोखो न खाथ, परमेशर ठाठन मां न उड़ाव गाए, किजोकि मैन्हु ज़ैन

किछ बेते, तैन्ने कटेलो। 8 किजोकि ज़ै अपने जिसमेरे लेइ बेते, तै जिसमे सेइं विनाशेरी फसल कटेलो; ते ज़ै आत्मा रे लेइ बेते, तै आत्मा सेइं हमेशारी ज़िन्दगरी फसल कटेलो। (aiōnios g166) 9 अस रोड़ां कम्मां केरने मां हिम्मत न हारम, किजोकि अगर अस हार न मनमेले त परमेशर अपने वक्ते पुड़ असन इनाम देलो। 10 एल्हेरेलेइ ज़ैडी तगर मौको मल्ले सेबन सेइं भलाई केरा; खास केरतां मसीही लोकन सेइं। 11 हेरा, मीं केत्रे बडे-बडे लफसन मां तुसन अपने हथ्थे सेइं लिखोरूपे। 12 जेत्रे लोक यहूदन खुश केरने चातन तैना तुसन खतनो कराने लेइ ज़ोतन। तैना एन केरतन कि लोक प्रचार केरनेरे लेइ तैन न स्तान कि परमेशर लोकन सिर्फ एल्हेरेलेइ बचाते कि तैना विश्वास केरतन कि मसीह क्रूसे पुड़ मरौए। 13 किजोकि खतनो करानेबाले एप्पू भी सेबनी कानूने पुड़ न चलन, पन तैना चातन तुस खतनो कराथ, ताके तैना होरि यहूदी केरे सामने घमण्ड केरनेरे काबल भोन, कि तुसेईं तैन केरे वजाई सेइं खतनो कियोरोए। 14 पन मेरे लेइ इने, अगर अवं घमण्ड केरि त सिर्फ इश्शे प्रभु यीशु मसीह पुड़ ज़ै इश्शे लेइ क्रूसे पुड़ मरो। किजोकि तैसेरे मरने सेइं अवं हुनी दुनियारे चीज़ां केरि इच्छां केरो गुलाम न राव, ते तैन मीं पुड़ राज़ केरनेरी कोई शक्ति नईं। 15 किजोकि न खतनो, ते न खतनो न भोनो ज़रूरीए, पन ज़रूरी इने, कि परमेशरे तुस पवित्र आत्मा रे कम्मेरे ज़िरिये अक नर्वीं इन्सान बनोरेथ। 16 परमेशर तैन सेबन अपनि शान्ति देलो ते तैन बरकत देलो ज़ैना इस नियमं मन्तन, तैना परमेशरेरे लोक आन। 17 अग्रोवं जो कोई मीं दुख न दे, किजोकि मेरे जानी पुड़ ज़ैना दाग आन तैना हिरातन कि अवं यीशु मसीहेरो दास आईं। 18 हे ढ़लाव ते बेइनव, इश्शे प्रभु यीशु मसीहेरो अनुग्रह तुसन पुड़ भोए। आमीन।

इफिसियों

1 अवं पौलुस परमेशरेरी मेर्जी सेई यीशु मसीहेरो प्रेरित आई। अवं तुसन जैना परमेशरेरे लोक आथ ते इफिसुस नगरे मां रातथ ई चिट्ठी लिखने लोरोई। 2 इश्शो बाजी परमेशर ते प्रभु यीशु मसीह करां तुसन अनुग्रह ते शान्ति मैलती राए। 3 इश्शो प्रभु यीशु मसीहेरे परमेशर ते कने बाजी केरि बडयाई भोए, इश्शो रिश्तो मसीह सेई भोनेरे वजाई सेई तैने असन हर लिहाजे सेई तैना आत्मिक बरकतां दितोरिन, जैना बरकतां स्वर्गां एइतिन। 4 जेन्चरे तैने अस दुनिया बनानेरे पेइली मसीह मां चुने, कि अस तैसेरी नजरी मां प्यारे मां पवित्र ते बेइलजाम भोम। 5 किजोकि परमेशरे असन सेई प्यार कियो, तैनी बडे पेइले ई फैसलो कियोरो थियो कि तै असन यीशु मसीहेरे जिरिये अपने बच्चां केरे रूपे मां गोद ने, किजोकि तै इन केरनु चातो थियो। 6 अस परमेशरेरे अनुग्रहेरे लेइ तैसेरी बडयाई केरतम, जै तैने असन मुफते मां दितो, किजोकि इश्शो रिश्तो तैसेरे द्लारे मट्टे सेई आए। 7 परमेशरेरे बडे अनुग्रहेरे मुताबिक मसीहेरे खूने बगाने सेई असन छुटकारो मैल्लो, मतलब इश्शो पाप माफ़ भोए। 8 जै तैनी सारे ज्ञान ते समझ सेई साथी असन पुइ बडो जादे कियो। 9 कि तैने अपनि मेरजरो भेद, अपने रोडे इरादेरे मुताबिक असन पुइ बांदो कियो, जै तैने पूरो केरनो थापोरो थियो। 10 परमेशरेरे ठहरावरे वक्ते पुइ तै स्वर्ग ते धेरतरी चीजन साथी आनेलो ते मसीह तैस पुइ राज़ करालो। 11 मसीह सेई इश्शो रिश्तो भोनेरे वजाई सेई परमेशरे अस चुने, तैन हासिल केरनेरे लेइ जेसेरो वादे तैने असन देनेरे लेइ कियोरो थियो। इन बिलकुल तेन्चरे भोव जेन्चरे तैनी बडे पेइलू पूरू केरनु थापेरू थियूं ते इच्छा कियोरी थी। 12 अस यहूदी पेइले लोक आम जेनेई मसीह पुइ उमीद रखोरि थी, ते अस चुने जे, ताके परमेशरेरे महिमारी स्तुति केरि बटम। 13 ते तुस भी मसीह सेई शामिल भोए जैखन तुसेई सच्चू वचन शुनु, जै खुशखेबरां तुश्शे लेइ मुक्ति आनी, जैखन तुसेई विश्वास कियो परमेशरे तुसन पुइ अपनि छाप लाई, ई छाप पवित्र आत्मा आए, जै तैनी असन दितो, जेसेरो वादो तैनी कियोरो थियो। 14 पवित्र आत्मा भी छुटकारेरे सैयरो जेरो आए, जै पक्कू केरते कि परमेशरे असन तै विरासत देलो जेसेरो तैनी वादो कियोरोए, ते तैनी अस अपने लोकां केरे रूपे मां घिनोरिम, ताके तैसेरे महिमारी बडयाई भोए। 15 एल्हेरेलेइ, जेइसेरू मीं शुनेरूए कि तुस प्रभु यीशु पुइ विश्वास केरतथ ते परमेशरेरे सेबभी लोकन सेई प्यार केरतथ, 16 तुश्शे लेइ परमेशरेरू शुक्र केरनु न शैरी, ते अपने प्रार्थनान मां तुसन याद केरताई। 17 अवं प्रार्थना केरताई कि परमेशर, इश्शो प्रभु यीशु मसीहेरे महिमा बाले बाजी, तुसन पवित्र आत्मा दे, ते तुसन अक्लमन्द बनालो ते परमेशरे तुसन पुइ बांदो केरेलो, ताके तुस तैस पिशैनी बटथ। 18 अवं ई भी प्रार्थना केरताई कि तै तुश्शे मने खोलेलो, कि तुस बुझथ कि इश्शे कुजानेरी कुन उमीद आए, ते केत्री महान ते महिमा बैली बरकतां केरे लेइ परमेशरे अपने लोकन जो वादो कियोरोए। 19 ते तैसेरी शक्ति इश्शे लेइ जैना अस विश्वास केरतम,

केत्री महाने, तैसेरी शेक्तेर कम्मरे मुताबिक, 20 जैन तैनी मसीहेरे बारे मां कियूं कि तैस मुइदन मरां जींते केरतां स्वर्ग मां अपने देइने पासे बिशालो। 21 तैडी ते हर किसमेरी हकौमत, ते अधिकार, ते शक्ति, ते प्रभुता, ते तैसेरी पदवी हर एक्के अधिकैरी करां ते महान आए, जैना न सिर्फ़ इस जहानी मां, पन एजनेबाले जहानी मां भी आए। (aiōn g165) 22 ते परमेशरे सब किछ मसीहेरे अधिकारे मां कियूं, तैनी सेबभी चीजन पुइ अधिकारी बनेइतां कलीसिया दितो। 23 कलीसिया मसीहेरी जान आए, ते तैसेरी भरपूरी जै सेबभन मां सब किछ पूरू केरतीए।

2 बीतोरे वक्ते मां परमेशरेरे तरफां तुसन कां नर्वीं जिनदगी न थी; तुस अपने पाप ते बुरे कम्मां केरे वजाई मरोरे लोकां केरे जेरे थिये। 2 तैस वक्ते तुस दुनियारे रीति पुइ चलते थिये, ते तुस अम्बरेरे दुष्ट आत्मा केरे अधिकैरी मुताबिक चलते थी, जेसेरी आत्मा हेजू भी परमेशरेरे हुकम न मन्नेबाले लोकां केरे मन्न मां कम केरती। (aiōn g165) 3 एन मां अस भी सब पेइले अपने जिसमेरे खुवैइशन मां दिहाइ केटते थी, ते जिसम, ते मनरी मर्जी पूरी केरते थी, ते होरि लोकां केरे जेरे र्भाव सेई बुरे थिये ते परमेशरेरे सज़ारे अधीन थिये। 4 पन परमेशर जै बडो दया केरनेबालोए; अपने तैस बडे प्यारे सेई, जैस सेई तैने असन सेई प्यार कियो। 5 जैखन अस पापां केरे वजाई सेई मरे लोकां केरे जेरे थिये, तैनी असन जिनदगी दिती जैखन तैनी मसीह मुइदन मरां जींते कियो, परमेशरेरे अनुग्रहे सेई तुसन मुक्ति मैलोरीए। 6 किजोकि तैनी अस मसीह सेई साथी मुइदन मरां जींते किये, ते स्वर्गेरे ठैरन मां तैस सेई साथी बिशाले। 7 परमेशरे एन कियूं कि एजनेबाले वक्ते मां दुनियारे लोकन हिराए कि तैसेरो अनुग्रह केत्रो महान आए। ई अनुग्रह इश्शे लेइ हिराव, तैने इश्शे लेइ एन कियूं जैना अस यीशु मसीह मां आम। (aiōn g165) 8 किजोकि विश्वासेरे जिरिये परमेशरेरे अनुग्रहे सेई तुसन मुक्ति मैलोरीए, ते तुसेई अपनो आपे एप्पू नई बघावरो बल्के परमेशरेरे दाने सेई तुस बघोरथ। 9 ते भले कम्मन सेई नई, एरू न भोए कि कोई घमण्ड केरे। 10 किजोकि अस परमेशरेरे बनोरिम; ते मसीह यीशु मां तैन भले कम्मां केरे लेइ पैदा कियोरिम, जैना परमेशरे पेइले इश्शे केरनेरे लेइ तियार करां। 11 एल्हेरेलेइ याद केरा, कि तुस जैना ज़रमनेरे गैर कौमरेथ, ते खतनो कियो लोक तुसन जो बगैर खतने बाले ज़ोतन। 12 तुस लोक तैस वक्ते मसीह न थिये ज्ञानते, ते तुस परमेशरेरे चुनोरे इस्राएली लोक न थिये, ते तुस तैन रोडी चीजन मां हिस्सेदार न थिये जैन केरो वादो परमेशरे यहूदी लोकन सेई कियोरो थियो, ते न उमीद ते दुनियाई मां परमेशरे करां दूर थिये। 13 पन अक वक्त थियो कि तुस परमेशरे करां दूर थिये, पन हुनी यीशु मसीह मां तैसेरे खून सेई नेडे आनोरथ। 14 किजोकि मसीहे इश्शो मेले कराव, तैने यहूदी ते गैर यहूदी दुइये अक केरे, ते अलग केरनेबाली दिवार जै मझाटे थी, डोली। 15 मसीहेरे क्रूसेरे मौतरी वजाई सेई, तैनी कानूनेरे सारे नियम पूरे तरीके सेई खतम किये। मसीहेरो एरो केरनेरो मकसद ई थियो कि दूई टोली केरि अक नर्वीं टोली बनाए, जै तैस सेई जुड़ोरी भोए। 16 मसीहेरे क्रूसेरी मौतरे जिरिये, तैनी दूई टोली अक की, ते

परमेशरे सेइं तैन केरो मेल कराव, एन्चरे यहूदी ते गैर यहूदी केरि दुश्मनी खतम की। 17 ते मसीहे एइतां तुस गैर कौमरे लोक जैना परमेशरे करां दूर थिये, ते यहूदी जैना तैसेरे नेडे थिये, दुइयन मेल मिलापेरी खुशखबरी शुनाई। 18 किजोकि मसीहेरे बदीलम अस सारे एक्की पवित्र आत्मा रे जिरिये बाजी परमेशरे कां एज्जी बटतम। 19 एल्हेरेलेइ तुस गैर कौमां केरे लोक परदेशी ते मुसाफर न राए, पन परमेशरेरे लोकां केरु झुण्ड, ते परमेशरेरे घरानेरे भोए। 20 तुस इमारतरे जेरेथ जेसेरी बुनीयाद प्रेरित ते नेबी आन ते यीशु मसीह एप्पू तैसेरे कूनेरो घोडे। 21 जैस मां सारी इमारत साथी मिलतां प्रभु मां अक मन्दर बनती गातीए। 22 तुस गैर कौमरे विश्वासी लोक भी परमेशरेरे होरि लोकन सेइं साथी शामिल किये जे, किजोकि तुस मसीह सेइं साथी अक भोरेथ। ताके तुस अक घर बनथ जैडी परमेशरेरो आत्मा रहते।

3 किजोकि परमेशरे तुशे गैर कौमां केरे लेइ इन कियोरु, अवं पौलुस तुशे लेइ प्रार्थना केरताई, अवं कैदे मां आई, किजोकि अवं तुशे लेइ यीशु मसीहेरी सेवा केरताई। 2 पक्कू तुसेईं शुनेरुए, परमेशरे अपने अनुग्रहेरे जिरिये तुसन खुशखबरी शुनेरी लेइ मीं जिमेवारी दितोरीए। 3 परमेशरेरो छप्पोरो मकसद बडो पेइलो छपोतो थियो, हालांकी तैनी मीं पुड़ बांदो कियो, किछ गल्लां आन जैना अवं तुसन चिट्टेरे जिरिये समझानो चाताई। 4 जैस सेइं तुस पेढतां बुझी बटतथ, कि अवं मसीहेरो तै भेद कोड़ि तगर समझताई। 5 बीतोरे वक्ते मां परमेशरे ई भेद लोकन पुड़ बांदो नई कियोरो, पन हुनी पवित्र आत्मा रे जिरिये अपने पवित्र प्रेरितन ते नेबन पुड़ बांदो कियो। 6 परमेशरेरो मकसद ई आए, खुशखबरेरे जिरिये यीशु मसीहे सेइं तैन केरो रिशतो भोनेरे वजाई सेइं गैर कौमां केरे लोक तैसेरे विरासती मां हिसेदार भोले, ते तैना तैसेरे जानरे अंग आन, जेसेरो वादो परमेशरे यहूदन सेइं कियोरो। 7 परमेशरे अनुग्रह ते बेड़ि शक्ति सेइं मीं तै खुशखबरेरी प्रचार केनेरो लेइ सेवा केनेरो खास अधिकार दितोरोए। 8 चाए अवं परमेशरेरे सेबभी लोकन मरां निकडे करां निकोडोई। परमेशरे मीं पुड़ अनुग्रह कियो, कि अवं गैर कौमन खुशखबरी शुनेई बेटि कि मसीह हमेशारी बरकतां केरो देनेबालोए। 9 अवं इस भेदेरे मकसदेरे बारे ज़ोनेरे लेई चुनोरोई, जै परमेशर हर चीज बनानेबालोए तैनी शुरू करां छप्पोरो रखोरो थियो। (aiōn g165) 10 ताके हुनी कलीसियारे जिरिये सेइं, परमेशरेरु बडू ज्ञान, अम्बरेरे तैन प्रधान ते अधिकैरन पुड़ बांदू कियू गाए। 11 परमेशरे दुनिया बनानेरे पेइलो इन्ने थापेरु थियू, जैन तैने इशे प्रभु यीशु मसीह मां पूरू कियू। (aiōn g165) 12 किजोकि मसीह पुड़ इशो विश्वासे, तैसेरे वजाई सेइं अस परमेशरेरी मौजूदगी मां हिम्मत ते भरोसे सेइं साथी एज्जी बटतम। 13 एल्हेरेलेइ अवं बिनती केरताई कि जैना दुःख तुशे लेइ मीं पुड़ लोरेन एजने, तैन केरे वजाई सेइं दिलेरी न शैरी, किजोकि इन सब तुशे फेइदेरे लेइ आए। 14 एल्हेरेलेइ अवं तैस बाजी परमेशरेरे कां जैथू केरे भारे प्रार्थना केरताई, 15 तैए आए जै स्वर्ग ते धरती पुड़

रानेबाले विश्वासी लोकां केरो बाजी। 16 कि तै अपने महिमारे धनेरे मुताबिक तुसन इन दान दे, कि तुस तैसेरी आत्माई सेइं अपनो एनत्रीयो मैन्हु मां शक्ति हासिल केरतां मजबूत भोते गाथ। 17 ते विश्वासे सेइं मसीह तुशे दिले मां राए, कि तुस प्यारे मां ज़ील छेडतां ते मुनीयाद छेडतां, 18 सब पवित्र लोकन सेइं रोडेचारे समझनेरी शक्ति हासिल केरा; कि तैसेरी चौड़ाई, ते लमबाई, ते ऊँचाई, ते डुघार केरोए। 19 ते अवं प्रार्थना केरताई कि तुस मसीहेरे तैस प्यारे सेमझी बटतथ जै समझी करां बेदेरे, कि तुस परमेशरेरी भरपूरी सेइं भेरोते गाथ। 20 हुनी जै एरो शक्ति बालोए, जै इशशी बिनती ते समझी करां बडू जादे कम केरि बटते, ते तैस शेक्तेरे मुताबिक असन मां कम केरते, 21 कलीसिया मां, ते मसीह यीशु मां, तैसेरी महिमा पीडी करां पीडी तगर हमेशा भोती राए। आमीन। (aiōn g165)

4 अवं जै प्रभुएरी सेवा केनेरे वजाई सेइं कैदे मां आई, तुसन कां बिनती केरताई, कि जेन्चरे परमेशरे तुस अपने लोक भोनेरे लेइ कुजेवरेथ, तैसेरे मुताबिक जिन्दगी भी ज़ीथ। 2 मतलब सैरी दीनतां ते नग्रता सेइं साथी, ते सबर केरतां प्यारे सेइं एक्की होरीरे झल्लां। 3 इस कम्मे मां अपनि पूरी कोशिश केरा ताके तुस मेल मिलापे सेइं राथ, किजोकि पवित्र आत्मा रे जिरिये तुस अक कियोरेथ। 4 अस सारे विश्वासी एक्की जानरे अंगां केरे जेरे आम, ते असन सेबभन अक्के पवित्र आत्माए मैलोरोए; ते तुसन अक्के उमीद दिती, जैखन तुस परमेशरेरे लोक भोनेरे लेइ चुने जे। 5 अक्के प्रभुए जै यीशु मसीहे, जैस पुड़ अस सब विश्वास केरतम, ते असेई सेबभन अक्के बपतिस्मो मैल्लो। 6 ते अक्के परमेशरे, जै सेबभी केरो बाजीए, तैए सेबभन पुड़ राज केरते ते इशे दरमियान कम केरते, ते असन सेबभन मांए रहते। 7 पन मसीहे असन मरां हर एक्की तैसेरु कम केनेरे लेइ अलग-अलग किसमेरी काबलीत दितोरीए। 8 एल्हेरेलेइ पवित्रशास्त्र ज़ोते, “जैखन तै उच्चे पुड़ च़ाढो, ते तैने बडे कैदी एप्पू सेइं साथी ने, ते तैने लोकन बेड़ि बरकतां दिती।” 9 (तैसेरे उच्चे च़ढनेरो साफ मतलब ई आए, कि मसीह धरतेर बुनीयें ठारन मां ओरो थियो। 10 एल्हेरेलेइ मसीह बुन ओरो थियो, तैए आए जै सैरी अम्बरे करां भी उबरो जेव, मसीहे एन एल्हेरेलेइ कियू ताके सब किछ तैसेरे हजूरी सेइं भरपूर भोए) 11 ते तै मसीहे जैने (कलीसियाई) जिमेवारी दिती, तैने किछ प्रेरित किछ नबी, किछ खुशखबरी शुनाने बाले, किछ रखवाले ते किछ उस्ताद चुने। 12 मसीहे अपने लोकन इना जिमेवारी एल्हेरेलेइ दितोरिन, कि कलीसिया जै मसीहेरी जाने तरक्की केरे। 13 जैखन कि अस सब विश्वास, ते परमेशरेरे मट्टेरी पिशानी मां अक भोम, ते ज़ांतगर अक सिद्ध मैन्हु न भोम ते मसीहेरे कदेरे अनदाजे तगर न पुज़ाम। 14 ताके अस अग्रोवं जो बच्चां केरे जेरे न रहम, जैना मैन्हु केरि ठगनेरी गल्लां ते च़लैकी सेइं तैन केरे कोशिश सेइं खियालां केरि ते शिक्षारी हर एक्की बयाने सेइं उछड़ाए, ते इरां उरां घुमाए गाते भोन। 15 बल्के प्यारे सेइं सच ज़ोइतां, सेबभी

गल्लन मां मसीहेरे ज़ेरे सिद्ध भोथ ज़ै कलीसियारी क्रोड़ी। 16 ज़ैस सेइं सारी जान सेबभी जोड़ां केरि मदी सेइं साथी मिलतां, ते साथी जुड़तां तैस अस्सरेरे मुताबिक ज़ै सेबभी हिसन सेइं भोइतां, अपने आपे बढ़ाते, कि तै प्यारे मां तरक्की केरतो राए। 17 एल्हेरेलेइ अवं इन ज़ोताई, ते प्रभु मां खबरदार केरताई कि ज़ेन्चरे गैर विश्वासी लोकां केरे लोक अपने मनरेरे बेकार खियालन पुड़ च़लतन, तुस अज़ेरे बाद तैन केरे ज़ेरे न च़ला। 18 किजोकि तैना बेसमझ भोरिन, ते तै अज्ञानतारी वजाई सेइं ते सखत मनरेरे वजाई सेइं तैना तैस ज़िन्दगी करां दूर आन ज़ै परमेशर देते। 19 ते तैना बेशर्म भोइतां, एशे मां लेगि जे, कि सेबभी किसमेरां गन्दां कम्मां शोके सेइं केरन। 20 पन तुसन मसीहेरी एरी शिक्षा नई मैल्लोरी। 21 बल्के मीं पूरू याकीने कि ज़ैखन तुसेईं यीशुएरे बारे मां अपने उस्तादन करां शुनू, त तुसेईं तैन करां सच्ची शिक्षा शिख्खी। 22 कि तुस पेड़ले चाल चलनेरे पुरानी इन्सानयती ज़ै टपलाने बैली इच्छां केरे मुताबिक भ्रष्ट भोइ गातीए, खोल्ला। 23 इसेरे बदले पवित्र आत्मा तुशे खियालन ते नज़िरियो बदले। 24 परमेशरे तुसन नव्वों स्वभाव दित्तोराए, ज़ै तैसेरे स्वभावेरे ज़ेरो आए। त तुस नव्वें स्वभावेरे ज़ेरे ज़ीथ। सच्चे तुस धर्मी ते पवित्र भोथ। 25 एल्हेरेलेइ झूठ ज़ोंनू शैरतां हर कोई अपने पड़ोसी सेइं सच ज़ोए, किजोकि अस एप्पू मामेइं एक्की जानेरे अंग आम। 26 अगर तुस क्रोधे मां भोथ खबरदार राथ, कि पाप न केरथ, दिहाड़ो डुबने तगर तुशुशो क्रोध मुक्की गाए। 27 ते शैताने मौको न देथ कि तै तुशुशी अज़मैइश केरे। 28 च़ोरी केरनेबालो फिरि च़ोरी न केरे; बल्के इमानदेरी सेइं अपने हथ्थन सेइं मेहनत केरे; एल्हेरेलेइ ज़ैस ज़रूरत भोए तैस देनेरे लेइ तैस कां किछ भोए। 29 कोई गन्दी गल तुशुशे ज़बाना न निस्से, पन ज़रूरतेरे मुताबिक तैन्ने ज़ोथ, ज़ैन होरि केरे लेइ विश्वासे मां मज़बूती सेइं बदनेरी वजा भोए। तैखन ज़ैन तुसेईं ज़ोव तैन लोकां केरे लेइ रोड़ भोलू ज़ैना तुशुशी शुन्तन। 30 ते ज़ैन किछ तुस केरथ तैसेरे वजाई सेइं परमेशरेरे पवित्र आत्मा दुखी न केरा, ज़ैस सेइं तुसन पुड़ छुटकारेरे दिहाड़े लेइ छाप दित्तोरीए। 31 सेबभी किसमेरी टूलइठार ते प्रकोप, ते क्रोध, सखत गल, ते तूहीन ते सारो बैर-भाव सेइं तुस दूर कियोरेथ। 32 ते एक्की होरि पुड़ दया केरा, ते माफ़ केरनेबाले भोथ, ते ज़ेन्चरे परमेशरे मसीह मां तुशुशे पाप माफ़ किये, तेन्चरे तुस भी एक्की होरेरे पाप माफ़ केरा।

5 एल्हेरेलेइ तुस परमेशरेरे बच्चेथ ज़ैन सेइं तै प्यार केरते, तैसेरे ज़ेरे बन्नेरी कोशिश केरा। 2 होरि केरे लेइ प्यारे सेइं भेरतां ज़िन्दगी ज़ीथ, ज़ेन्चरे मसीहे भी तुसन सेइं प्यार कियो; ते इशुशे लेइ अपनो आप रोड़ी मुशकरे लेइ परमेशरे कां च़ेदतां बलिदान केरो। 3 ते ज़ेरू परमेशरेरे लोकां केरे लेइ ज़रूरीए, तेन्चरे तुसन मां भी बदमाशी, ते कोन्ची किसमेरू बुरू कम न भोए, या लालच़ेरे बारे मां गल भी न भोए। 4 ते न बे शरमी, न बेंसरी गल्लां, न मेवजेरी गल्लां, किजोकि इना गल्लां शोभन्न न, बल्के तुसेईं परमेशरेरू शुक्र कियोरू लोड़े। 5 किजोकि तुस इन ज़ानतथ, कि कोन्ची बदमाश, या भिट्टो मैन्हु, या लालच़ी मैनेरो ज़ै मूरती पूजा

केरनेबालोए, मसीह ते परमेशरेरे राज़े मां तैसेरो कोई हिस्सो नई। 6 कोई तुसन ई सल्लाह देइतां धोखो न दे, कि परमेशरे हकीकति मां तैन सज़ा न देलो ज़ैना एरे पाप केरतन। 7 एल्हेरेलेइ तैन केरू साथ न रखा। 8 किजोकि तुस त पेड़ले आंधरू थी, पन हुनी प्रभु यीशु मां लोआथ, ते लोअरे बच्चां केरे ज़ेरे च़ला। 9 (किजोकि लोअरो फल सेबभी किसमेरी भलाई, ते धार्मिकता, ते सच्चे)। 10 ते इन तोप्यां कि प्रभु कुन रोड़ लगते। 11 ते आंधेरां ते बेकार कम्मन मां शामिल न भोथ, बल्के लोकन इन हिराथ कि इना कम्मां बुरन। 12 किजोकि गैर विश्वासी लोकां केरां छुपोरां कम्मां केरि गल केरनि भी शमारी गल आए। 13 ज़ैखन लौ कोन्ची चीज़ी पुड़ चमकती त हर कोई लेइ बटते कि इन केरू, किजोकि ज़ैखन लौ किछ हिराती, त तै चीज़ एप्पू लौ भोइ गातीए। 14 एल्हेरेलेइ एन्चरे ज़ोव गाते, “हे झुलने बाला उठ ते मुड़दन मरां ज़ींतो भो, ते मसीहेरी लौ तीं पुड़ चमकेली।” 15 एल्हेरेलेइ रोड़े च़ारे हेरा, कि केरि ज़िन्दगी ज़ीने लोरेथ। बेअक्लां केरि ज़ेरे नई पन अक्लमन्दा केरि ज़ेरे ज़िन्दगी ज़ीथ। 16 ते मौको कीमती समझा, किजोकि दिहाड़े बुरेन। 17 एल्हेरेलेइ बेअक्ल न बना, पन ध्याने सेइं समझा, कि प्रभुएरी तुशुशे लेइ कुन मर्जी? 18 ते शराब पीने मां मतवाले न भोथ, किजोकि एस सेइं बदचलनी भोतीए, पन पवित्र आत्मा सेइं भेरोते राथ। 19 ते एप्पू मामेइं परमेशरेरां भजन ते स्तुति केरते ते आत्मिक गीत ज़ोथ, ते अपने-अपने मने मां प्रभुएरे लेइ गीत ज़ोथ ते किरतन केरते राथ। 20 ते सदा सेबभी गल्लां केरे लेइ प्रभु यीशु मसीहेरे नव्वे सेइं बाजी परमेशरेरू शुक्र केरते राथ। 21 ते मसीहेरे डरे सेइं एक्की होरेरे अधीन राथ। 22 हे कुआन्शव, अपने-अपने मुन्शां केरे अधीन राथ, ज़ेन्चरे प्रभुएरे। 23 किजोकि मुन्श त कुआन्शरी क्रोड़ी ज़ेन्चरे मसीह कलीसियारी क्रोड़ी, ते मसीह कलीसियारो मुक्ति देनेबालोए ज़ै तैसेरी जाने। 24 ज़ेन्चरे कलीसिया मसीहेरे अधीने, तेन्चरे कुआन्शां भी हर गल्ली मां अपने-अपने मुन्शेरे अधीन रान। 25 हे मुन्शव, अपने-अपने कुआन्शन सेइं प्यार केरा, ज़ेन्चरे मसीहे भी कलीसिया सेइं प्यार केरतां अपनो आप तैसेरेलेइ दित्तो। 26 ताके तैस वचनेरे ज़िरिये पेनेरे निहाने सेइं शुद्ध केरतां पवित्र बनाए। 27 ते तैस अक एरी महिमा बाली कलीसिया बनेइतां एप्पू कां खड़ी केरे, ज़ैस मां न कोई दाग, न धबो, न कोई एरी चीज़ भोए, बल्के पवित्र ते बेइलज़ाम भोए। 28 एन्चरे मुन्श अपने कुआन्शी सेइं अपने जानी बराबर प्यार केरे। ज़ै अपने कुआन्शी सेइं प्यार केरते, तै एप्पू सेइं प्यार केरते। 29 किजोकि कोन्चे कथी अपने जानी सेइं बैर नई रखोरो, बल्के तैसेरी हेरगेश कियोरीए, ज़ेन्चरे मसीहे भी कलीसियाई सेइं केरते। 30 एल्हेरेलेइ अस मसीहेरे जानरे अंगां केरे ज़ेरे आम। 31 ज़ेन्चरे पवित्रशास्त्र ज़ोते “एल्हेरेलेइ मड़द अम्मा बाजी शैरतां अपने कुआन्शी सेइं मिलोरो रालो।” 32 ई भेद त बड़ोए; पन अवं मसीह ते कलीसियारे बारे मां ज़ोताई। 33 पन तुसन मरां हर कोई अपने कुआन्शी सेइं एप्पू बराबर प्यार केरे, ते कुआन्श भी अपने मुन्शेरो इज़्जत केरे।

6 पवित्रशास्त्र ज्ञोते, “अपने अम्मा ते बाजी केरि आदर केरा, तैखन तुशू भलू भोलू ते दुनियाई मां तुशशी लम्मी उमर भोली।” ई पेइलो हुकमे जैस सेइं परमेशरे वादो कियोरोए, त बच्चव इन तुशशे लेइ रोडू आए, तुस जैना प्रभु यीशु पुड़ विश्वास केरतथ, अपने अम्मा बाजी केरू ज़ोनू मन्ना। 4 ते हे बच्चन बालव, अपने बच्चन न सरकाथ, पन प्रभुएरी शिक्षा ते खबरदारी देइतां, तैन केरि हेरगेश केरा। 5 हे गुलामाव, जैने लोक दुनियारे मुताबिक तुशशे मालिकन, अपने मनरे सचैई सेइं डरते, ते थरकते, ते ज़ेन्चरे मसीहेरो तेन्चरे तैन केरो भी हुकम मन्ना। 6 ते मैन्हु खुश केरेने बालां केरि ज़ेरे हिरानेरे लेइ सेवा न केरा, पन मसीहेरे दासां केरे ज़ेरे मने सेइं परमेशरेरी मेर्जी पुड़ चला। 7 ते तै सेवा मैन्हु केरि नई, पन प्रभुएरी ज़ैनतां केरा। 8 किजोकि तुस ज़ानतथ, कि ज़ै कोई ज़ेरू रोडू कम केरेलो, चाए गुलाम भोए, चाए आज़ाद; तैस प्रभु करां तेरहु इनाम मैलेलू। 9 एन्चरे हे मालिकव, तुस भी धेमकी शैरतां अपने नौकरन सेइं रोडो बर्ताव केरा, किजोकि तुस ज़ानतथ, कि तैन केरो ते तुशशो दुइयां केरो मालिक स्वर्गे मांए, ते तै केन्चेरी तरफदारी न केरे। 10 आखरी मां तुस प्रभुएरी शक्ति बाले शक्ति मां मज़बूत बना। 11 परमेशरेरे सारे हथियार बन्धा; ताके तुस शैतानेरे सारे मन्सूबां केरो मुकाबलो केरि बटतथ। 12 किजोकि इशशी ई लड़ाई, खूने या मांसे सेइं यानी मैन्हु केरे खलाफ नई, बल्के प्रथान्न सेइं, ते अधिकैरन सेइं, ते इस दुनियारे आंधरेरे हाकिमन सेइं ए, ते तैस दुष्टेरे आत्मिक फौजन सेइं ए ज़ैना आसमाने मां आन। (aiōn g165) 13 एल्हेरेलेइ परमेशरेरे सारे हथियार बन्धा, ताके तुस ज़ेइस बुरे दिहाइन एजन त तुस सामनो केरि बटतथ, ते सब किछ पूरू केरतां मज़बूत राथ। 14 परमेशरेरे सच्च्चाई पटकेरी ज़ेरे अपने कमरी सेइं बन्धा, ते धार्मिकतारी झिलम लेइतां, 15 ते पवन्न मां मेलेरे खुशखबरी शुनानेरे तियैरारे बूट लाथ। 16 ते तैन सेब्भन सेइं साथी विश्वासेरी ढाल घिन्तां मज़बूत भोथ जैस सेइं तुस तैस शैतानेरे सब ज़लते तीर हिशेई बटथ। 17 ते मुक्तरो टोप, ते आत्मारो तलवार ज़ैन परमेशरेरू वचने, नेथ। 18 ते हर वक्त ते हर किसमे सेइं ज़ै पवित्र आत्मा च़लाने सेइं प्रार्थना ते बिनती केरते राथ, ते बींझे राथ, कि सब परमेशरेरे लोकां केरे लेइ लगातार बिनती केरा। 19 ते मेरे लेइ भी, कि मीं वचन शुनानेरे वक्त हिम्मत भोए, कि अवं दिलेरी सेइं खुशखबरांरो भेद ज़ोई बेटि। 20 एल्हेरेलेइ अवं शंगलन सेइं बन्धोरो राजदूतेरो ज़ेरो सेवा केरनेबालोई। प्रार्थना केरा कि ज़ेन्चरे मीं शुनावरू लोड़े, तेन्चरे अवं दिलेरी सेइं खुशखबरी शुनेई बेटि। 21 तुस भी, अवं ज़ोई बटताई ते कुन केरने लोरोई, इस सेइं बुझा। तुखिकुस ज़ै तुसन सब किछ ज़ोलो। तै इशशो ट़लारो साथीए, ते प्रभु मां वफादार सेवके। 22 तै मीं तुसन कां एल्हेरेलेइ भेजोरोए, कि तुस इशशी हालती ज़ानतथ, ते तै तुशशे मन्न मां हिम्मत दे। 23 अवं प्रार्थना केरताई कि इशशो बाजी परमेशरे ते प्रभु यीशु मसीह तुसन विश्वासी लोकन शान्ति दे, ते तैना तुसन एक्की होरि सेइं प्यारे मां ते मसीह पुड़ विश्वासे मां बनोरे रानेरे वजा भोन। 24 ज़ैना इशशे

प्रभु यीशु मसीह सेइं सच्च्चो प्यार केरतन, तैन सेब्भन पुड़ अनुग्रह भोतो राए।

फिलिपियों

1 अवं पौलुस, त कने तीमुथियुस, यीशु मसीहेरे दास आम। इश्शे तरफां सेबभी पवित्र लोकां केरां नंवां, जैना मसीह यीशु मां भोइतां फिलिप्पी नगरे मां रातन, रखवालन ते सेवकन समेत, 2 इश्शे बाजी परमेशर ते प्रभु यीशु मसीहे करां तुसन अनुग्रह ते शान्ति मैलती राए। 3 अवं जैखन-जैखन तुसन याद केरताई, तैखन-तैखन अपने परमेशेरू शुक्र केरताई। 4 ते जैखन भी तुश्शे सेबभी केरे लेइ बिनती केरताई, ते हमेशा आनन्दे सेइं प्रार्थना केरताई। 5 किजोकि तुस पेइले दिहैडे करां अज तगर यीशु मसीहेरी खुशखबरी फैलाने मां मीं सेइं साथी शामिल रावरेथ। 6 ते मीं इस गल्लरो भरोसोए, कि परमेशरे तुसन मां रोडे कम्मरी शुरुआत कियोरीए, तैए तैस कम्मरे यीशु मसीहेरे वापस एजनेरे दिहाडे तगर पूरू केरेलो। 7 इन जेइजे, कि अवं तुसन सेबभी केरे लेइ एरू सोची, किजोकि तुस मेरे मने मां बस्सोरेथ, ते मेरे कैदे मां खुशखबरे लेइ जुवाब ते सबूत देने मां तुस सब मीं सेइं साथी अनुग्रहे मां मीं साथिथ, 8 इस मां परमेशर मेरो गवाहे, कि अवं यीशु मसीहेरो जेरो प्यार केरतां तुश्शे सेबभी केरू लालच केरताई। 9 ते अवं ईं प्रार्थना केरताई, कि तुश्शो प्यार ज्ञान ते सेबभी किसमेरो जमीर सेइं होरे भी बद्धते गाथ। 10 इडी तगर तुस रोडी करां रोडी गल्लां ट्लाएरी बुझा, ते मसीहेरे दिहाडे तगर सच्चे बनोरे राथ; ते ठोकर न खाथ। 11 ते तैस धार्मिकतारे फले सेइं जै यीशु मसीहेरे जिरिये भोते, भरोते गाथ जैस सेइं परमेशेरु महिमा ते बड्याई भोती राए। 12 हे ढूलाव ते बेइनव, अवं सच ज़ोताई, कि तुस इन ज्ञाना, कि मीं पुइ जै बीतोरीए, तैस सेइं खुशखबरी बडोती भी भोइ। 13 इडी तगर कि महाराजेरी सारी फौज ते बाकी सारे लोकन मां इन बांद् भोव कि अवं मसीहेरे लेइ कैद मां आई। 14 ते प्रभु यीशु मां जैना ढूला आन, तैन मरां बडे मेरे कैद भोनेरे वजाई सेइं आन, तैना हिम्मत केरतां परमेशेरु वचन बेधइक भोइतां ते दिलेरी सेइं शुनानेरी कोशिश केरतन। 15 किछ लोक त जलन ते लडेई सेइं मसीहेरो प्रचार केरतन ते किछ लोक सच्चे दिले सेइं। 16 किछ त इन सेमझतां कि अवं खुशखबरे लेइ जुवाब देनेरे लेइ ठेरावरोई प्यारे सेइं प्रचार केरताई। 17 पन तैना होरे लोक साफ दिले सेइं नई पन जलनी सेइं मसीहेरो प्रचार केरतन, इन सेमझतां कि मेरे कैद मां मेरे लेइ मुसीबत बधान। 18 त कुन भोव? सिर्फ इन, कि हर बत्तां चाए बुरे खियाले सेइं, चाए सचैई सेइं, मसीहेरे बारे मां खुशखबरी प्रचार भोतीए, ते अवं इस सेइं खुश आई, ते खुश भी रेइलो। 19 किजोकि अवं ज्ञानताई, कि तुश्शी प्रार्थनाई सेइं, ते यीशु मसीहेरी आत्मार दाने सेइं इसेरो नितीजो मेरी मुक्ति भोली। 20 अवं त दिले सेइं इन चाताई, ते ई उमीद रखताई, कि अवं कोन्ची गल्ली मां न छिथोई, बल्के जेन्चरे मेरी बडी दिलेरी सेइं मसीहेरी बड्याई मेरे जिसमे सेइं भोती राई, तेन्चरे हुना भी भोए चाए अवं ज़ीतो रेइ या मेरी। 21 किजोकि मेरे लेइ ज़ीतू रानू मसीहे, ते मरनू फैइदोए। 22 पन अगर जिसमे मां ज़ीतू रानू मेरे कम्मरे लेइ फैइदेमदे त अवं न जैनी, कि केस

चुनी। 23 किजोकि मीं दुइयां केरे मझाटे चुने मां मुशकिल भोने लोरीए। अवं मरनू चाताई ताके स्वर्गे मां मसीह साथी रेइ बेदि, किजोकि इन बडू ज़रूरीए। 24 पन तुश्शी मद्दत केरनेरे लेइ मेरू ज़ीतू रानू बडू ज़रूरीए। 25 एल्हेरेलेइ कि मीं इलहेरो भरोसोए ते अवं ज्ञानताई कि अवं ज़ीतो रानोई, बल्के तुसन सेबभन सेइं साथी रानोई जैस सेइं अवं तुश्शी मद्दत केरि, कि विश्वासे मां मजबूत भोथ, ते इस मां खुश राथ। 26 जैखन अवं तुसन कां दुबारां एज्जी, तुसन कां जादे वजा भोली यीशु मसीह पुइ घणण्ड केरनेरी एल्हेरेलेइ जैन किछ तै मेरे जिरिये केरने लोरोए। 27 सिरिफ एनू केरा कि तुश्शो चालचलन मसीहेरे खुशखबरे काल भोए। चाए अवं तुसन एइतां हेरी, चाए न एज्जी, तुश्शे बारे मां इन शुनी, कि तुस अक मन भोइतां बनोरे रातथ, ते अकोट्टे भोइतां खुशखबरे विश्वासेरे लेइ मेहनत केरते रातथ। 28 ते कोन्ची गल्ली मां खलाफत केरनेबालन करां न डराथ। ई तैन केरे लेइ बरबाद भोनेरो साफ निशाने, पन तुश्शे लेइ मुक्तरो, ते इन परमेशेरु तरफां आए। 29 किजोकि मसीहेरे वजाई सेइं तुसन पुइ ई अनुग्रह भोव कि न सिर्फ तैस पुइ विश्वास केरा पन तेसेरेलेइ दुःख भी झैल्लां। 30 ते तुसन तेन्चरे मुसीबत केरनीए, जेन्चरे तुसेईं मीं करां केरते लोरीए, ते हुना भी शुन्तन, कि अवं तेन्चरे केरताई।

2 अगर मसीह मां किछ तसल्ली ते प्यारे सेइं हिम्मत ते आत्मारी मौजूदगी, ते किछ दर्द ते दयाए। 2 ते मेरो ई आनन्द पूरो केरा कि अक्के मन राथ ते अक्के प्यार, ते अक्के खियाल, ते अक्के सोच रखा। 3 खुदगरज या झूठी बड्येयरे लेइ किछ न केरा पन नर्म भोइतां एक्की होरि एणू करां रोडो समझा। 4 तुसन मरां हर कोई सिर्फ अपने भलैइयरे लेइ न सोचे, बल्के होरि केरि भलैइयरे लेइ भी सोचे। 5 जेन्चरे यीशु मसीहेरो सुभाव थियो तेन्चरे तुश्शो भी भोए। 6 जेने परमेशेरु बराबर भोइतां भी परमेशेरु बराबर भोने अपने कब्जे मां रखनेरी चीज न समझू। 7 बल्के अपनो आप खाली केरो, ते गुलामेरू रूप धारण केरू, ते मैन्दू केरे जेरो बनो। 8 ते मैनेरे रूपे मां बांदो केरतां दीन केरो, ते इडी तगर हुक्म मन्ने बालो राव, कि मौत, हाँ, क्रूसेरे मौत भी झैल्ली। 9 एल्हेरेलेइ परमेशरे तै बडो महान भी केरो, ते तैस तैन नव दिंतू जैन सेबभी नंवन करां बडूए। 10 कि स्वर्गे मां ते धरती पुइ ते धरतलरे बुने; तैना सब यीशुएरे नंवे पुइ जैधूए टेकन। 11 ते बाजी परमेशेरु महिमारे लेइ हर अक ज़िभ मन्ने कि यीशु मसीह प्रभुए। 12 ते हे मेरे ट्लारव, जेन्चरे तुस सदा हुक्म मन्ने ओरेथ, तेन्चरे हुना भी न सिर्फ मीं सेइं साथी रेइतां पन खास केरतां जैखन अवं दूर भोताई फिरी भी डरते राथ ते थरकते अपने मुक्तकू कम पूरू केरते गाथ। 13 किजोकि परमेशर जै तुसन मां काम केरते, ते तुसन इच्छा ते शक्ति तैन केरनेरे लेइ देते, जैस सेइं तै खुश भोते। 14 त सब कम्मां बगैर शकैइतां ते बगैर बेसी सेइं केरा। 15 ताके तुस बेइलजाम ते शरीफ भोइतां टारे ते ढीठ लोकन मां परमेशेरु बेइलजाम बच्चे बना, जैन मां तुस ज़िन्दगरो वचन घिन्तां दुनियाई मां बलते दीयां केरे जेरे लेइहोते रातथ, 16 कि मसीहेरे वापस एजनेरे दिहाडे घणण्ड केरनेरी वजा भोए, कि न मेरी दौड-धूप ते न मेरी

मेहनत बेकार भोए। 17 अगर मीं तुशे विश्वासेरे बलिदाने या सेवारे लेइ अपनो खून भी बगानो पे, त फिरी भी अवं खुश आई, ते तुसन सेबभी साथी खुश आई। 18 तेन्चरे तुस भी खुश भोथ, ते मीं साथी आनन्द केरा। 19 मीं प्रभु यीशु मां उमीदे, कि अवं तीमुथियुसे तुसन कां जल्दी भेजेलो, ताके तुशो हाल शुन्तां मीं शान्ति मैल्ले। 20 किजोकि मीं कां एरे जेरे सुभावेरो कोई नई, जै साफ दिले सेइं तुशशी फिक्र केरे। 21 किजोकि सब अपने फैइदो तोपतन, न कि यीशु मसीहे। 22 पन तुसेईं तै परखो ते पिशानो भी, कि जेन्चरे मटू बाजी साथी केरते, तेन्चरे तैनी मीं सेइं साथी खुशखबरी फैलाने मां मीं सेइं साथी मेहनत केरि। 23 ते मीं उमीदे, कि जेखन मीं पतो चल्लो कि मेरी कुन हालत भोली, तैखन अवं तैस लूशी भेजेलो। 24 ते मीं प्रभु मां भरोसोए, कि अवं एण्णू भी जल्दी एज्जेलो। 25 पन मीं इपफ्रुदीतुस जै मेरो द्वाए, ते मद्दतगार, ते साथी योधो ते तुशो दूते, ते ज़रूरी गल्लन मां मेरी सेवा टेल केरनेबालोए, तुसन कां भेजना ज़रूरी समझो। 26 किजोकि तैसेरो मन तुसन सेबभन मां लमगोरो थियो। एल्हेरेलेइ बे चैन रातो थियो किजोकि तुसेईं तैसेरे बिमैरारो हाल शुनोरो थियो। 27 ते तै सच्चे बिमार त भोरो थियो, इडी तगर कि मरने पुइ थियो, परमेशरे तैस पुइ दया की; ते सिर्फ तैस्से पुइ नई, पन मीं पुइ भी, कि मीं दुःख पुइ दुख न भोए। 28 एल्हेरेलेइ अवं तैस भेजनेरी होरि भी कोशिश केरि, तुस फिरी तैस सेइं मिलतां खुश भोइयथ ते मेरो भी दुःख घटे। 29 एल्हेरेलेइ तुस प्रभु मां बडे आनन्दे सेइं तैस सेइं मुलाकात केरा, ते एरे जेरे लोकां केरि आदर केरा। 30 किजोकि तैए मसीहेरे कम्मरे लेइ अपनि जान खतरे मां छेड़तां मौतरे नेडो पुजोरो थियो, ताके जै घाटो तुशे तरफां मेरी सेवा मां भोव, तैस तै पूरो केरे।

3 हे मेरे द्वाए ते बेइनव, प्रभु मां आनन्दित राथ, तैना गल्लां तुसन बार-बार लिखने मां मीं त कोई कष्ट न भोए, ते इस मां तुशशी सलामतीए। 2 तैन बुरां कम्मां केरनेबाले लोकन करां हुशार राथ, जैना खुवार कुतरां केरे जेरे खाने बालां आन। 3 किजोकि खतने बाले त असां आम जैना परमेशरेरे आत्मारो चलावे सेइं चलतम ते आराधना केरतम ते मसीह यीशु पुइ घमण्ड केरतम ते जिसमे पुइ भरोसो न रखम। 4 पन अवं त जिसमे पुइ भरोसो रेख्खी बटताई अगर कोन्ची होरि जिसमे पुइ भरोसो रखनेरो वचार भोए, त अवं तैस करां भी जादे रेख्खी बटताई। 5 अठोवं दिहाड़े मेरो खतनो भोव, इस्राएल केरे कुटमे ते बिन्यामीनेरे गोत्रे मरां आई; इब्रैनी केरो इब्रानी; कानूनेरे बारे मां अगर कोई ज़ोए त फरीसी। 6 जोशेरे बारे मां अगर कोई ज़ोए त कलीसियाई सताने बालो; ते अगर कानूनेरे धार्मिकतारे बारे मां कोई ज़ोए त बेइलजाम। 7 पन जैना-जैना गल्लां मेरे फैइदेरी थी तैना मीं मसीहेरे खातर नुकसान सैमझोरिन। 8 बल्के मीं अपने प्रभु यीशु मसीहेरे पिशानारी बड़यैयरे वजाई सेइं अवं सब गल्लां नुकसान समझताई, जेसेरे वजाई सेइं मीं बेड़ि चीजां केरो नुकसान उठाव, ते तैन कूडो समझताई, जैस सेइं अवं मसीह हासिल केरि। 9 ते तैस मां भोइ, न कि एपनी तैस धार्मिता सेइं, जै मूसेरे कानूने सेइं ए, बल्के तैस धार्मिकता सेइं जै परमेशरेरे तरफां मसीह

पुइ विश्वास केरने सेइं भोतीए। 10 ते अवं तैस ते तैसेरे जींती भोनेरी शक्ति, ते तैस साथी दुखन मां शामिल भोई, ते तैसेरी मौतरी बराबरी हासिल केरि। 11 ताके अवं कोन्ची रीति सेइं मुडदन मरां जींते भोनेरे पदे तगर पुजी। 12 ई मतलब नई, कि मीं हासिल केरू, या अवं सिद्ध भोइ जेव, पन तैस चीजी हासिल केरनेरे लेइ दौड़ने लोरोई, जेसेरे लेइ मसीह यीशुए अवं द्वाएवरो थियो। 13 हे द्वाएव ते बेइनव, मेरू इन गुमान नई कि मीं द्वाएव, पन सिर्फ अक कम केरताई, कि जैना गल्लां पत्रोवं रेइ तैन बिसरतां, अग्री गल्लां केरे पासे गाताई। 14 निशानेरे पासे दौड़तो चलताई, ताके मीं तैन इनाम मैल्ले, जेसेरे लेइ परमेशरे अवं मसीह यीशु मां बा कुजेवरोई। 15 असन मरां जेरे सिद्धन, ईए विचार रखा, ते अगर कोन्ची गल्ली मां तुशो होरो खियाल भोए त परमेशर तैस भी तुसन पुइ बांदो केरेलो। 16 एल्हेरेलेइ जैडी तगर पुजोरिम, तैसेरे मुताबिक चलम। 17 हे द्वाएव ते बेइनव, तुस सब मिलतां मेरी जेरि चाल चला, ते तैन केरि पिशान रखा, जैना इस रीति पुइ चलतन जेसेरी मिसाल तुस असन मां हेरतथ। 18 किजोकि बडे एरी चाल चलतन, जैन केरि चर्चा मीं तुसन सेइं बार-बार की ते अज़ भी लेरां देइ-देइ ज़ोताई, कि तैना अपने चालचलन सेइं मसीहेरे क्रूसेरे बैरिन। 19 तैन केरो अन्त विनाशे, तैन केरो ईश्वर पेटे, तैना एपनी शरमरी गल्लन पुइ घमण्ड केरतन, ज़मीनारी गल्लन पुइ मन लातन। 20 पन इशो मुख स्वर्गो, ते अस एककी मुक्ति देनेबाले प्रभु यीशु मसीह स्वर्गरां बलगेन लोरेम। 21 तैए एपनी शक्ति सेइं तैस अस्सेरे मुताबिक तैना सब चीजन अपने वशे मां केरि बटते, इशो कमज़ोर जिसमेरू रूप बेदलतां, अपने महिमारो जिसमेरे मुताबिक बनालो।

4 एल्हेरेलेइ हे मेरे द्वाए द्वाएव ते बेइनव अवं तुसन सेइं प्यार केरताई, जैन मां मेरो दिल लमगोरो रहते जै मेरो आनन्द ते ताज भोए, हे द्वाए द्वाएव ते बेइनव, प्रभु मां एन्चरे मज़बूत राथ। 2 अवं यूओदियारे छंदे केरताई, ते सुन्तुखेरे भी, कि तैना प्रभु मां अक मन रान। 3 ते हे सच्चे मद्दतगार अवं तीं कां भी बिनती केरताई, कि तू तैन कुआन्शां केरि मद्दत केर, किजोकि तैनेई मीं सेइं साथी खुशखबरी फैलाने मां, क्लेमेंस ते मेरे तैन मद्दत केरनेबालन समेत मेहनत की, जैन करां नंवां ज़िन्दगारे किताबी मां लिखोरन। 4 प्रभु मां सदा आनन्दित राथ; अवं फिरी ज़ोताई, आनन्दित राथ। 5 तुशशी नरमी सेबभी मैन्नू पुइ बांदी भोए, प्रभु नेडोए। 6 कोन्ची भी गल्लारी फिक्र न केरा, पन हर एककी गल्ली मां तुशशी दरखुवास, प्रार्थना बिनती सेइं शुक्रे साथी परमेशरे कां हाज़र भोन। 7 तैखन परमेशरेरी शान्ति, जै समझी करां बिलकुल बेइरे, तुशसे दिलन ते तुशसे खियालन मसीह यीशु मां बिलकुल मैफूज़ रखेली। 8 आखरी मां, हे मेरे द्वाएव ते बेइनव, जैना-जैना गल्लां सच्चरीन, ते जैना-जैना आदरारे काबलन, ते जैना-जैना गल्लां पवित्रन, ते जैना-जैना गल्लां रोड़िन, ते जैना-जैना गल्लां मने रोड़ी लेगतिन, ते जैना-जैना गुण ते जैना-जैना गल्लां तरीफेरी, तैन पुइ धयान केरा। 9 जैना गल्लां तुसेईं मीं करां शिखी, ते कबूल की, ते शुनी ते मीं हेरी, तैन केरो हुक्म मन्ना तैखन परमेशर जै शान्ति देनेबालोए तुसन साथी भोलो। 10 अवं प्रभु मां बडो

खुश आई कि हुनी एत्रे दिहाड़न पत्ती तुसन मेरे बारे मां फिरी खियाल भोव; याकीन्न तुशशे शुरुआती मां इस एरो खियाल थियो, पन तुसन मौको न मैल्लो। 11 इन नई कि अवं अपनि कम्मरे वजाई सेइं ज़ोताई; किजोकि मीं इन्ने शिखोरूप कि ज़ैस हालती मां आई, तैस्से मां राज़ी भोई। 12 अवं निकडू भोनू भी ज़ानताई ते बडू भोनू भी ज़ानताई, ते मीं हर एक्की गल्ली ते सेळभी हालतन मां रज़नू, ढलुखुनू ते बधनू घटनू शिखोरूप। 13 ज़ै मीं ताकत देते तैस मां अवं सब किछ केरि बटताई। 14 फिरी भी तुसेईं रोडू कियूं, कि मेरे दुखे मां मीं साथी भोए। 15 ते हे फिलिपियो, तुस एप्पू भी ज़ानतथ, कि खुशखबरी प्रचाररे शुरुआती मां ज़ैखन अवं मकिदुनिया अग्रोवं जेव, तैखन मीं तुस शारे ते कोन्वी होरि मेनडलारे लोकेईं लेने देनेरे बारे मां मद्दत न की। 16 एन्चरे ज़ैखन अवं थिस्सलुनीके नगरे मां थियो; तैखन भी तुसेईं मेरी घटी पूरी केरनेरे लेइ एक्की बार नईं बल्के काई बार किछ भेज़ेरू थियूं। 17 इन नईं कि अवं दान चाताई पन अवं एरो फल चाताई, ज़ै तुशशे फैइदेरे लेइ बडतो गाए। 18 मीं कां सब किछे, बल्के बडू जादे, ज़ैन तुसेईं इपफ़ुदीतुसेरे हथ्थे भेज़ेरू थियूं, तैन मेलतां रज़ोरोई, तैन त खुशबू ते कबूल केरनेरे काबल बलिदाने, ज़ैन परमेशरे पसंदे। 19 ते मेरो परमेशर भी अपने तैस धनेरे मुताबिक ज़ैन महिमा सेइं यीशु मसीह मांए, तुशशी हर अक ज़रूरत पूरी केरेलो। 20 इश्शो परमेशर ते बाजी एरी महिमा हमेशा भोती राए। आमीन। (aiōn g165) 21 हर अक पवित्र मैन्हु ज़ै यीशु मसीह मांए तैस जो नमस्कार ज़ोथ। ज़ै ढला मीं साथीए तुसन नमस्कार ज़ोते। 22 सब पवित्र लोकन, खास केरतां ज़ैना महाराज़ेरे घरानेरेन तुसन नमस्कार ज़ोतन। 23 इश्शे प्रभु यीशु मसीहेरो अनुग्रह तुशशी आत्माई सेइं साथी राए।

कुलुस्सियों

1 अवं पौलुस ई चिट्ठी लिखने लोरोई, अवं परमेशरेरी मेर्जां सेई मसीह यीशुएरो प्रेरित आई, ते विश्वासी द्वाला तीमुथियुस भी मीं साथी आए। 2 मसीह मां तैन पवित्र ते विश्वासी द्वालां केरे नंवे जैना कुल्लुसे नगरे मां रातन। इशे बाजी परमेशरे तुसन अनुग्रह ते शान्ति देतो राए। 3 अस ज़ैखन तुशे लेइ प्रार्थना केरतम त अपने प्रभु यीशु मसीहरे बाजी, परमेशरेरु शुक केरतम। 4 किजोकि असेई शुनोरूप, कि मसीह यीशु पुइ तुशे विश्वासे, ते तुस सेबभी पवित्र लोकन सेई तुस प्यार केरतथ। 5 तैस उमीद कियोरी चीजां वजाई सेई जै तुशे लेइ स्वर्ग मां रखोरीए, जेसेरे बारे मां तुसेई तैस खुशखेबारे सच्चे वचने सेई शुनोरूप, जै तुसन कां पुजोरोए। 6 ते जेन्चरे दुनियाई मां भी फल आनते, ते बद्धतो गाते; मतलब जैस दिहैडी करां देंतु तुसेई तै शुनु, ते सचैई सेई परमेशरेरो अनुग्रह पिशानो, तुसन मां भी एरू केरि बटते। 7 तैसेरी शिक्षा तुसेई इशे द्लारे मद्दतगार इपक्रास करां हासिल की, जै इशे लेइ मसीहरो वफादार सेवके। 8 तैन तुशे प्यारेरे बारे ज़ोवं जै होरि लोकां केरे लेइ आए, जै पवित्र आत्मा मांए तुसन दित्तोरोए। 9 एल्हेरेलेइ जैस दिहैडी करां इन शुनु, त असेई हमेशा तुशे लेइ प्रार्थना की, कि परमेशरेरी आत्मा तुसन अक्ल ते मसझ दे जैस सेई तुस तैसेरी मर्जां पूरे तरीके सेई सेमझी बटले। 10 ताके तुस तेरही जिन्दगी जीथ जेरि प्रभुएरे लोकन जीयोरी लोडे, ते तुस प्रभुए हर बत्तां खुश केरथ, ताके तुस लगातार हर किसमेरी भलाई केरते राथ, ते परमेशरेरी पिशानी मां बद्धते गाथ। 11 अवं प्रार्थना केरताई कि परमेशर अपनि महिमारे शेक्ते इस्तेमाल केरनेरे ज़िरिये तुसन मज़बूत केरे, ताके तुस आनन्दे ते सबरी सेई दुख झैल्ली बटतथ। 12 बाजी परमेशरेरु शुक केरते राथ, जैन अस इस काबल बनाए कि स्वर्गे राज़्जे मां तैसेरे अपने लोकन सेई साथी विरासती मां हिसेदार भोम। 13 किजोकि तैन अस शैतानेरे राज़्जे मरां छुट्टेतां अपने द्लारे मट्टेरे राज़्जे मां आने 14 परमेशरेरे अपने मट्टेरे बलिदाने सेई असन पापां केरि माफ़ी दित्ती (यानी शैतानेरे राज़्जे करां आज़ाद कियो)। 15 परमेशरे त कोई न लेई बटे, पन ज़ैखन तैसेरु मट्टू मैन्हु बनू त तैनी परमेशर लोकन पुइ बांदो कियो, जैन किछ परमेशरे बनाव तैस पुइ तैस कां सेबभना जादे अधिकार आए। 16 किजोकि ई तै (मसीह) थियो जैन सब किछ बनानेरे वक्ते परमेशरे सेई कम कियूं, चाए अम्बरे पुइ भोन या धेरती पुइ भोन, लेवरी भोन या आलेई, कुन तखत भोन, या रियासतां, कुन हकौमतां भोन या अधिकार, सैरी चीजां तैस्से सेई ते तैसेरेलेइ बनेइ। 17 ते मसीह सेबभी चीजां बनाने करां पेइलो थियो, ते सब चीजां तैस मां बनोरी रैतिन। 18 तैए कलीसियारो प्रधाने जै तैसेरी जाने; तैए पेइलोए ते मुइदन मरां जींतो भोने बालन मरां पेइलोए कि सेबभी गल्लन मां तैए प्रधान भोए। 19 किजोकि बाजी परमेशर इस्से मां खुश भोते कि मसीह मां तैसेरे सारे सुभाव वास केरतन। 20 परमेशरे फैसलो कियो कि अपने मट्टे भेजे, जैन अपनो खून बगाव ते क्रूसे पुइ अपनि जान दित्ती। परमेशरे सेबभी चीज़न

सेई मेल मलाप केरनेरे लेइ एन कियूं। एन्चरे तैनी मसीहरे ज़िरिये सेई सेबभी चीजां केरो मेल मिलाप एप्पू साथी कियो, चाए तैना धेरतरी भोन, चाए स्वर्गेरी भोन। 21 ते तुस जैना पेइले परमेशरे करां दूर थिये, ते बुरे कम्मां सेई मने सेई बैरी थी। 22 फिरी भी परमेशर अपने मट्टे यीशुएरे मैन्हु बन्ने सेई ते क्रूसे पुइ मौतरे ज़ियरीए तुशे मेल कराव, ताके तुसन एप्पू कां पवित्र ते बे दाग ते बेइलज़ाम हज़ार केरे। 23 पन तुस मसीह पुइ विश्वास केरनेरे मां बुनीयादरे जेरे मज़बूत राथ, ते तैस खुशखेबारे उमीद पुइ जै तुसेई शुनोरी एन शाथ, जेसेरो प्रचार अम्बरे करां बुन सैरी स्रष्टि मां कियो जेव; ते जैस मां अवं पौलुस सेवक बनो। 24 हुनी अवं तैन दुखन सेई खुश आई, जैना तुशे लेइ झैल्लताई, ते मसीहरी दुखां केरि घटी तैसेरे जानारे लेइ, मतलब कलीसियारे लेइ, अपने जिसमे मां पूरी केरताई। 25 जेसेरो अवं परमेशरेरे इंतज़ामेरे मुताबिक सेवक बनो, जै तुशे लेइ मीं सॉफो, ताके अवं परमेशरेरु वचन पूरो-पूरो प्रचार केरि। 26 मतलब तैस भेदे जै ज़माना ते पीड़न करां छप्पोरो थियो, पन हुनी तैसेरे तैन पवित्र लोकन पुइ बांदो भोरोए। (aiōn g165) 27 जैन पुइ परमेशरे बांदो केरनो चाव, कि तैन ज्ञान भोए होरि कौमन मां तैस भेदेरी महिमारी कीमत कुने ते तै ईए, कि मसीह जै महिमारी उमीदे तुसन मां रहते। 28 जेसेरो प्रचार केरतां अस हर एक्की मैन्हु ज़ोतम ते सारे ज्ञाने सेई हर एक्की मैन्हु शिखालतम, कि अस हर एक्की मैन्हु मसीह कां सिद्ध केरतां पेश केरम। 29 ते एल्हेरेलेइ अवं तैसेरी शेक्ते मुताबिक जै मीं मां शेक्ति सेई साथी अस्सर केरतीए तन मन लेइतां मेहनत भी केरतम।

2 अवं चाताई कि तुस ज्ञानथ, कि तुशे ते तैन केरे जैना लौदीकिया नगरे मां आन, ते तैन सेबभी केरे लेइ ज़ैनेई अवं नई लोरोई कि अवं केन्चरे मेहनत केरताई। 2 ताके तैन केरे मन्न मां शान्ति भोए ते तैना प्यारे सेई एप्पू मांमेई बनोरे रान, ते तैस पूरी समझरु थन हासिल केरन, बाजी परमेशरेरे भेदे मतलब मसीह पिशानन्। 3 जैस मां समझरे ते ज्ञानेरे सारे भण्डार छपोरेन। 4 इन अवं एल्हेरेलेइ ज़ोताई, कि कोई मैन्हु तुसन लालच देने बैली चीज़ी सेई धोखो न दे। 5 किजोकि अवं अगर जिसमेरे लिहाजे सेई दूराई, फिरी भी आत्मिक लिहाजे सेई नेडो आई, ते तुशे रीति सेई तुशेरी हालती ते तुशे विश्वासे जै मसीह यीशु मां मज़बूती हेरतां खुश भोव। 6 ते जेन्चरे तुसेई मसीह यीशु अपनो प्रभु कबूल कियोरोए, तेन्चरे तैस मां च़लते भी राथ। 7 ते तैस मां जील छडते राथ ते बद्धते राथ; ते जेन्चरे तुस शिखालोरेथ तेन्चरे विश्वासे मां मज़बूत भोते गाथ, ते खूब शुक केरते राथ। 8 खबरदार राथ कि तुसन कोई तैसेरे ज्ञाने ते धोखे सेई शिकार न केरे, जैन मैन्हु केरु रुवाज़ेरु ते दुनियारी पेइली शिक्षारे मुताबिके पन मसीहरे नई। 9 किजोकि तैस मां ईश्वरत्वरी सारी भरपूरी जानी मां एइतां वास केरती। 10 ते तुस तैस मां भेरोरेथ जै सैरी हकोमती ते अधिकारेरी क्रोडी। 11 तैस्से मां तुशे एरो खतनो भोरोए, जै हाथेरो नई, मतलब मसीहरोए खतनो, जैस सेई तुशेरी पुरानी इन्सानयत अलग की गातीए। 12 ते तैस्से सेई साथी बपतिस्मे मां दबे जे, ते तैस्से मां परमेशरेरी शेक्ति पुइ विश्वास केरतां, जैन ते मुइदन मरां जींतो कियो, तुस

भी तैस सेइं साथी ज़ींते किये। 13 ते तैने तुस भी, ज़ैना अपने पापन, ते अपने जिसमेरे खतनेरे हालती मां फटरे थी, तैस सेइं साथी ज़ींते भी केरे, ते इश्शे सब पाप माफ़ केरे। 14 ते विधि केरो तै लेख ज़ै इश्शे नंवे पुड़ ते इश्शे खलाफ थियो मटाव; ते तैस क्रूसे पुड़ कील देइतां दूर केरो। 15 ते तैने प्रधान ते अधिकाँरन हारेइतां तैन केरो खुल्लो मुखूल्लो तमाशो बनावं ते क्रूसे सेइं जयजयकार भी केरू। 16 एल्हेरेलेइ खानू पीनू या तिहार या नर्वी चाँदनी, या आरामेरे दिहाड़ां केरे बारे मां तुश्शो कोई फैसलो न केरो। 17 किजोकि सब एजने बैली गल्लां केरि छावे, पन असली चीज़ां मसीहेरिन। 18 कोई मैन्हु दीनता ते स्वर्गदूतां केरि पूजा पसंद केरतां तुश्शी दौड़े इनामे करां दूर न रखे। एरो मैन्हु लेवहरी गल्लां मां लगगोरो रहते ते एपनी जिसमानी समझी पुड़ बेफैइदो फुलते। 19 ते तैस क्रोड़ी ट्लेइतां न रखन ज़ै मसीह आए ते ज़ैस सेइं सारो जिसम जोइन ते पठां केरे हफाज़ती सेइं ते एक्की सेइं साथी जुइतां, परमेशरेरे तरफां बढ़तो गाते। 20 ज़ैखन कि तुस मसीह सेइं साथी दुनियारे पेइली शिक्षाई सेइं मरोरेथ, त फिरी तैन केरे ज़ेरे ज़ैना दुनियाई मां जिन्दगी बीतातन मैन्हु केरे हुकम ते शिक्षा सेइं, 21 ते एरी शिक्षा मां किजो रातथ कि इस सेइं नई हुरनु, एन नई खानू, ते तैस सेइं हथ नई लानो? 22 (किजोकि इना सब चीज़ां कम्मे मां आनते-आनते नाश भोइ गैली)। 23 इन गल्लन मां एपनी मेज़री मुताबिक अपनि बनेवरी भेक्ति सेइं, ते दीनता, ते जिसमानी कोशिश सेइं ज्ञानेरू कम त आए, पन जिसमानी खुवैइशन रोकने मां इन सेइं किछ भी फैइदो न भोए।

3 ते ज़ैखन तुस मसीह सेइं साथी ज़ींते किये, त स्वर्गेरे चीज़ां केरे तोपी मां राथ, ज़ैडी मसीह मौजूदे ते परमेशरेरे देइने पासे बिशोरोए। 2 धेरतेरे नई पन स्वर्गेरे चीज़न पुड़ ध्यान लाथ। 3 किजोकि तुस त मरे, ते तुश्शी जिन्दगी मसीह सेइं साथी परमेशरे मां छपोरूए। 4 ज़ैखन मसीह ज़ै इश्शी जिन्दगीए, बांदो भोलो, तैखन तुस भी तैस सेइं साथी महिमा साथी बांदे किये गाले। 5 एल्हेरेलेइ अपने तैन अंगन मैरी देथ, ज़ैना धेरती पुड़ आन, मतलब बदमाशी, गन्दगी, बुरे खियाल, बुरी खुवैइश ते लालचे ज़ैन मूरती पूजने बराबरे। 6 इन केरे वजाई सेइं परमेशरेरो क्रोध हुकम न मन्ने बालन पुड़ एइते। 7 ते तुस भी, ज़ैखन इन बुरैइन मां जिन्दगी बीताते थी, त इन केरे मुताबिक च़लते भी थी। 8 पन हुनी तुस भी इन सेब्भन मतलब क्रोध, सरक, बैर, तुहीन, गैई देनी इना सब गल्लां शारा। 9 एक्की होरि सेइं झूठ न ज़ोथ किजोकि तुसेईं पुरानी इन्सानयत तैसेरे कम्मन समेत खोलोरीए। 10 ते नर्वी इन्सानयत लोरीए ज़ै अपने बनाने बालेरे रूपेरे मुताबिक ज्ञान हासिल केरनेरे लेइ नंवी बनातीए। 11 तैस मां न कोई यूनानी राव, न यहूदी, न बगैर खतने बालो, न जंगली, न स्कूती, न गुलाम न आज़ाद, सिर्फ मसीह सब किछ ते सेब्भन मांए। 12 एल्हेरेलेइ परमेशरेरे चुनोरां केरे ज़ेरे ज़ैना पवित्र ते ट्लारेन, बडी, ते ढ़ला, ते दीनता, ते नग्रता, ते बरदाशत धारण केरा। 13 ते अगर् केन्ची, केन्ची पुड़ दोष लानेरी वजा भोए, त एक्की होरेरी झैल्ला, ते एक्की होरेरे पाप माफ़ केरा, ज़ेन्चरे प्रभुए तुश्शे पाप माफ़ केरे, तेन्चरे तुस भी केरा।

14 इन सेब्भन करां बा प्यारे ज़ै सेब्भन सिद्धतारो पटकोए बंधा। 15 ते मसीहेरी शान्ति जेसेरे लेइ तुस अक जान भोनेरे लेइ कुजेवरे भी आथ, तुश्शे दिलन मां राज़ केरे, ते तुस शुक्र केरते राथ। 16 मसीहेरे वचन अपने दिलन मां रोड़ेचारे बसने देथ; ते सारे ज्ञाने सेइं एक्की होरि शिखाला, ते नसीहत देथ, ते अपने-अपने मन्न मां अनुग्रहे साथी परमेशरेरे लेइ भजन ते स्तुति ते आत्मिक गीत ज़ोते राथ। 17 ते वचन या कम ज़ैन किछ भी केरा सब प्रभु यीशुएरे नंवे सेइं, ते तैसेरे ज़िरिये बाजी परमेशेरू शुक्र केरा। 18 हे कुआन्शव, ज़ेन्चरे प्रभु मां जेइजे, तेन्चरे अपने-अपने मुन्शां केरे अधीन राथ। 19 हे मुन्शाव, एपनी-एपनी कुआन्शन सेइं प्यार रखा, ते तैन सेइं सखत बर्ताव न केरा। 20 हे बघाव, सेब्भी गल्लन मां अपने-अपने अम्मा बाजी केरो हुकम मन्ना, किजोकि प्रभु इस सेइं खुश भोते। 21 हे बच्चन बालव, अपने बच्चन तंग न केरा, एरू न भोए कि तैन केरि हिम्मत न ट्लुटे। 22 हे सेवकाव, ज़ैना जिसमेरे मुताबिक तुश्शे मालिकन, सेब्भी गल्लन मां अपने मालिकां केरो हुकम मन्ना, मैन्न् खुश केरनेरे बालां केरे ज़ेरे हिरानेरे लेइ नई, पन सञ्चे मने सेइं ते परमेशरेरे डरे सेइं। 23 ते ज़ैन किछ तुस केरतथ, तैन मने सेइं केरा, इन समझतां कि मैन्हु केरे लेइ नई पन प्रभुएरे लेइ केरतथ। 24 किजोकि तुस ज्ञानतथ कि तुसन एसेरे बदले प्रभु करां बदले मां मीरास मैल्लनीए, तुस प्रभु यीशु मसीहेरी सेवा केरतथ। 25 किजोकि ज़ै बुराई केरते, तैस एपनी बुरैइयरो फल मैलनोए; तैड़ी केन्चरी तरफदारी नई।

4 हे मालिकव, अपने-अपने गुलामन सेइं साथी इन्साफ ते ठीक-ठीक बर्ताव केरा, इन समझतां कि स्वर्ग मां तुश्शो भी अक मालिके। 2 प्रार्थना मां लगगोरो राथ, ते शुक्र सेइं साथी हुशार राथ। 3 साथी इश्शे लेइ भी प्रार्थना केरते राथ, कि परमेशर इश्शे लेइ शुनानेरे लेइ एरी बत खोल्ले, कि अस मसीहेरे तैस भेदेरे बारे मां ज़ोई बटम जेसेरे लेइ अवं कैदे मां आई। 4 ते तैस बांदो केरि, ज़ेन्चरे मीं कियो लोड़े। 5 वक्त कीमती सेमझतां बेइरन साथी सेमझदैरी सेइं बर्ताव केरा। 6 तुश्शो वचन सदा अनुग्रहे सेइं ते एरो लूनो भोए, कि तुसन हर एक्की मैन्हु रोड़ेचारे जुवाब देनो एज्जे। 7 ट्लारे ढ़ला ते वफादार सेवक, तुखिकुसे ज़ै प्रभु मां मेरो मदतगार, तै मेरी सेब्भी गल्लन मां तुसन ज़ोलो। 8 तै मीं एल्हेरेलेइ तुसन कां भेजो, कि तुसन इश्शी हालतरो पतो भोए ते तै तुश्शे दिलन शान्ति दे। 9 ते तैस सेइं साथी उनेसिमूस भी भेजो ज़ै वफादार ते ट्लारो ढ़लाए ते तुसन मरांए, ते तुसन इडी तगर सैरी गल्लां ज़ोले। 10 अरिस्तर्खुस ज़ै मीं सेइं साथी कैदीए, ते मरकुस ज़ै बरनबासेरो ढ़लाए लगते। (जेसेरे बारे मां तुसन हुकम मैल्लोरो थियो कि अगर तै तुसन कां एज्जे, त तैस सेइं रोड़ेचारे बर्ताव केरथ) 11 ते यीशु ज़ै जो यूस्तुस ज़ोतन, तै तुसन नमस्कार ज़ोते। खतनो केरें लोकन मां सिर्फ ईए परमेशरेरे राज़े लेइ मदतगार ते मेरे शैनतरी वजा राए। 12 इपफ्रास ज़ै तुसन मरांए, ते मसीह यीशुएरो दासे, तुसन जो नमस्कार ज़ोते ते सदा तुश्शे लेइ प्रार्थना केरते, ताके तुस सिद्ध भोइतां पूरे विश्वासे सेइं साथी परमेशरेरे मेज़ी पुड़ मज़बूत राथ। 13 अवं तैसेरो गवाह आई, कि तै

तुशशे लेइ ते लौदीकिया ते हियरापुलिस बालां केरे लेइ बड़ी कोशिश केरतो रहते। 14 टलारे तबीब लूका ते देमासेरू तुसन नमस्कार। 15 लौदीकिया नगरेरे ढलान ते नुमफास ते तैन केरे घरेरे कलीसियान जो नमस्कार ज़ोथ। 16 ते ज़ैखन ई चिट्टी तुशशे इड़ी पढ़ी गाए, त एरू केरनू कि लौदीकियारे कलीसिया मां भी पढ़ी गाए, ते तै चिट्टी ज़ै लौदीकियारां एज्जे तैस तुस भी पेइथ। 17 फिरी अरखिप्पुसे सेइं ज़ोइयथ कि ज़ै सेवा प्रभु मां तीं सॉफ़ी, तैस बड़े हुशैरी सेइं पूरी केरथ। 18 अवं पौलुस अपने हथ्थन सेइं नमस्कार लिखताईं। मेरी शंगलन याद रखा; तुसन पुड अनुग्रह भोतो राए। आमीन।

1 थिस्सलुनीकियों

1 अवं पौलुस ई चिट्ठी लिखताई। सिलवानुस ते तीमुथियुस भी मीं सेई साथी आन, थिस्सलुनीक नगरे कलीसियारे विश्वासी लोकन, जैना बाजी परमेशर ते प्रभु यीशु मसीह मां आन, तैन अनुग्रह ते शान्ति मैलती राए। 2 अस अपने प्रार्थनान मां तुसन याद केरतम, ते सदा तुशशी सेबभी केरे लेइ परमेशेरू शुक्र केरतम। 3 ते अपने बाजी परमेशेरें सामने तुशशां कम्मां, जैना तुस विश्वासेरे वजाई सेइं केरतथ, ते बड़ी मेहनतरां कम्मां जैन सेइं पतो चलते तुस होरन सेइं प्यार केरतथ, ते इशशे प्रभु यीशु मसीहेंरे वापस एजनेरे उमीदरे लेइ मुसीबतन मां सबर केरतथ, अस लगातार याद केरतम। 4 ते हे ढूलाव, ते परमेशेरें दलारे लोकव, अस ज्ञानतम, कि तुस परमेशेरे अपने लोक भोनेरे लेइ चुनोरेथ। 5 किजोकि यीशु मसीहेंरे बारे मां खुशखबरी तुसन कां न सिर्फ लफसन मां पुजी बल्के पवित्र आत्मारें शक्ति सेइं, ते बड़े याकीने सेइं साथी पुजी, जेन्चरे तुस ज्ञानतथ, कि अस तुशशे लेइ तुसन मां केरहे बनोरे थिये। 6 ते तुस बड़े दुखे मां पवित्र आत्मारें आनन्दे सेइं साथी वचने मेन्तां इशशे ते प्रभुएरी चाल चलने लाए। 7 इड़ी तगर कि मकिदुनिया ते अखाया इलाकां केरे सेबभी विश्वासी लोकां केरे लेइ तुस अक नमूनो बने। 8 किजोकि तुशशे इट्टां न सिर्फ मकिदुनिया ते अखाया इलाकन मां प्रभुएरू वचन शुनावं, पन तुशशे विश्वासेरी जै परमेशेरे पुड़, हर ठैरी जैड़ी अस जे चर्चा फेलोरीए, कि असन तुशशे बारे मां ज़ोनेरी ज़रूरत नई। 9 किजोकि तैना एप्पू होरन ज़ोतन कि ज़ैखन अस तुसन कां आए त कुन भोवं। तुस मूरतन करां दूर भोइतां परमेशेरें पासे फिरे, ताके ज़ींते ते सच्चे परमेशेरी सेवा केरथ, 10 ते तैसेरू मट्टू स्वर्गरां वापस एजने बलागते राथ, जैन तैने मुडदन मरां ज़ींतो कियूं, मतलब यीशुए, जै असन एजनेबाले परमेशेरें प्रकोपे करां बचाते।

2 हे ढूलाव, तुस एप्पू ज्ञानतथ कि इशशू तुसन कां एजनू बैफैइदू न भोवं। 2 बल्के तुस एप्पू ज्ञानतथ, कि असेई पेइले फिलिप्पी नगरे मां दुख झल्लने ते मुसीबत झल्लने पुड़ भी इशशे परमेशेरे असन दिलेरी दिती, कि अस परमेशेरेंरे खुशखबरी बड़ी खलाफत भोंते भी तुसन शुनाम। 3 किजोकि इशशी शिक्षा न टपलाने सेइं ते न धोखे सेइं, ते न बुरे मकरसदे सेइं आए। 4 पन जेन्चरे परमेशेरे अस इस काबल बनेइतां असन खुशखबरी सौफी, अस तेन्चरे बियांन केरतम, ते मैनन् नई, बल्के परमेशेरे खुश केरनेरे लेइ शिक्षा देतम, जै इशशे मन्न परखते। 5 तुस ज्ञानतथ, कि असेई कधी चपलूसारी गल्लां नई कियोरी, ते न लालचेंरे लेइ बहानो केरते थी, परमेशर इस गल्लरो गवाहे। 6 ते असन मसीहेंरे प्रेरित भोनेरे वजाई सेइं तुसन करां मदत नेनेरो अधिकार थियो। फिर भी अस मैनन् करां आदर न थिये चाते, ते न तुसन करां, न होरि कोन्ची करां। 7 पन जेन्चरे अम्मा अपने मट्टां केरि हेरगेश केरतीए, तेन्चरे असेई भी तुसन मां रेइतां नरमी हिराई। 8 ते तेन्चरे अस तुशशू लालच केरते, न सिर्फ परमेशेरी खुशखबरी, पन अपने-अपने प्राण भी तुसन देनेरे लेइ

तियार थिये, एल्हेरेलेइ तुस इशशे बड़े दलारे भोइ जोरे थिये। 9 किजोकि, हे ढूलाव, तुस इशशी मेहनत ते कष्टे याद रखतथ, कि असेई एल्हेरेलेइ रात दिहैड़ी कारोबार केरतां तुसन मां परमेशेरी खुशखबरी प्रचार की, कि तुसन मरां कोन्ची पुड़ भार न भोए। 10 तुस एप्पू गवाह आथ, ते परमेशर भी गवाहे, कि तुसन जैना विश्वास केरतथ, अस केरी पवित्रता, ते धार्मिकता ते बेइलजामे सेइं राए। 11 तुसन पतोए, कि जेन्चरे बाजी अपने बच्चन सेइं बर्ताव केरते, तेन्चरे अस भी तुसन मरां हर केन्ची शिक्षा देते, ते दिलासो देते, ते समझते थिये। 12 कि तुस एरी जिन्दगी जीथ जैस सेइं परमेशर खुश भोए, जै तुसन अपने राज्जे ते महिमा मां कुजाते। 13 अस भी परमेशेरू शुक्र लगातार केरतम, कि जैखन इशशे जिरिये परमेशेरी खुशखबरी तुसन कां पुजी जै असेई प्रचार की, त तुसेई तै मैन्हु केरि नई, बल्के परमेशेरू वचन सेमझतां (ते सच्चे इन परमेशेरू वचन आए) कबूल की, ते तै वचन तुसन मां जैना मसीह पुड़ विश्वास केरतथ कम केरते। 14 एल्हेरेलेइ तुस, हे ढूलाव, परमेशेरी तैन कलीसियां केरि जेरि चाल चलने लाए, जैना यहूदिया मां यीशु मसीह मां आन, किजोकि तुसन भी अपने लोकन करां एरो दुःख मैल्लो, जेन्चरे तैन यहूदन करां मैल्लोरो थियो। 15 जैनेई प्रभु यीशु ते नबी भी मारे, ते अस सताए, ते परमेशर तैन सेइं खुश नई, ते तैना सेबभी मैन्हु केरि खलाफत केरतन। 16 ते तैना गैर कौमन सेइं तैन केरे मुक्तेरे लेइ गल्लां केरने लेइ असन रोकतन। तैना पापे पुड़ पाप केरतन ज़ांतगर परमेशर तैन सजा न दे, ते हुनी परमेशेरे तैन पक्को सजा देनेबालोए। 17 हे ढूलाव, जैखन अस थोड़े चिरेरे लेइ मने मां नई बल्के बांटे मां तुसन करां अलग भोरे थी, ते असेई बड़े लालचें सेइं तुसन हेरेरी बड़ी जादे कोशिश की। 18 एल्हेरेलेइ (मतलब मीं पौलुसे) एककी बार नई बल्के बार-बार तुसन कां एजनू चाव, पन शैतान अस तुसन कां एजनेरे लेइ रोके। 19 भला इशशी उमीद, या आनन्द, या बड़ीवैयरू ताज कौन आए? इन तुस भोले जैखन प्रभु यीशु वापस एज्जेलो 20 इशशी बडयाई ते आनन्द तुस आथ।

3 एल्हेरेलेइ जैखन असेई जादे न बेलगी बटु त असेई इन ठहराव कि अस एथेंस नगरे मां अकेल्ले रेइ गाम। 2 ते असेई तीमुथियुस जै मसीहेंरे खुशखबरी मां इशशो ढूलाए, ते परमेशेरेंरे सेवके, एल्हेरेलेइ तुसन कां भेजो, कि तै तुसन विश्वासे मां मज़बूत केरे ते तुशशी हिम्मत बधाए। 3 कि कोई इन दुखां केरे वजाई सेइं न घबराए, किजोकि तुस एप्पू रोड़े चारे ज्ञानतथ परमेशेरे फैसलो कियोरोए, कि अस सताए गानेम। 4 किजोकि पेइले भी, जैखन अस तुसन कां थिये, त तुसन सेइं जोते थी, कि अस सताए गानेम, ते तुस ज्ञानतथ एरू भोवं भी। 5 एल्हेरेलेइ जैखन मीं करां होरू न बेलगोव, त तुशशे विश्वासेरो हाल ज्ञानेरे लेइ तीमुथियुस भेजो, किजोकि अवं डरों थियो कि एरू न भोए, कि अज़माने बाले (शैताने) तुस अज़माए त न, कि इशशी मेहनत बेकार त न भोइ। 6 पन तीमुथियुसे जै तुसन करां इशशे इड़ी अव, ते तुशशे विश्वासेरे ते प्यारेरे बारे मां खुशखबरी शुनाई। ते ई गल भी शुनाई, कि तुस सदा

प्यारे सेइं असन याद केरतथ, ते असन हेरनेरी इच्छा रखतथ, जेन्चरे अस भी तुसन हेरनेरी इच्छा रखतम। 7 एल्हेरेलेइ हे ढूलाव, अपनि सारी तंगी, ते मुसीबतन मां तुशु विश्वासे सेइं असन शान्ति मैलली। 8 तुशुशो प्रभु पुड़ मजबूत विश्वासे इशुशे लेइ अक नव्वे ज़िन्दगरे साँसेरो ज़ेरोए। 9 ते ज़ेरो आनन्द असन तुशुशे वजाई सेइं अपने परमेशरेरे सामने, तैसेरे बदले मां अस कोस तरीके सेइं परमेशरेरु शुक्र केरम! 10 अस रात दिहाड़ी बड़ी प्रार्थना केरते रातम, कि तुसन सेइं दुबारां मिलम, ते तुशुशी मदत केरम कि तुस होरि जादे मजबूती सेइं प्रभु यीशु पुड़ विश्वास केरथ। 11 ते अस प्रार्थना केरतम कि इशुशो बाजी परमेशर ते इशुशे प्रभु यीशु, बत खोल्ले कि अस तुसन कां एज्जी बटम। 12 ते प्रभु एरू केरे, कि जेन्चरे अस तुसन सेइं प्यार केरतम; तेन्चरे तुशुशो प्यार एपू मांमेइं, ते सेब्भी मैन्नू सेइं बधे, ते तरक्की केरतो राए। 13 ताके तै तुशुशे मन्न मजबूत केरे, कि ज़ैखन इशुशो प्रभु यीशु अपने सब पवित्र लोकन सेइं साथी एज्जे, त तै इशुशे बाजी परमेशरेरे सामने तुशुशे मन्न पवित्रता मां बेइलजाम ठहरालो।

4 आखर, हे ढूलाव अस तुसन कां बिनती केरतम, ते तुसन प्रभु यीशु मां समझातम, कि जेन्चरे तुसेईं इशुशो ज़ेरो चाल चलन रखवो, ते परमेशर खुश केरनो शिखोरोए, ते जेन्चरे तुस चलतथ भी, तेन्चरे तुस अग्रोवं बढ़ते राथ। 2 किजोकि तुस ज्ञानतथ, कि इना हदायतां असन प्रभु यीशु करां मैलोरिन। 3 परमेशर चाते, कि तुस पवित्र बना, मतलब बदमाशी केरने करां बचोरे राथ। 4 ते तुसन मरां हर केन्चे ज्ञानेरू लोड़े कि केन्चरां अपने कुआन्शी सेइं पवित्रता ते आदरी सेइं ज़िन्दगी जीयोरी लोड़े। 5 ते इन कम खुवेइशी सेइं नई, ते न गैर कोमां केरे ज़ेरे, ज़ैना परमेशरे न पिशानन। 6 कि इस गल्ली मां कोई अपने विश्वासी ढूलाए न ठगे, ते न तैस पुड़ हकोमत चलाए; किजोकि प्रभु इन सब गल्लां केरि सज़ा देलो, जेन्चरे कि असेईं पेइलू तुसन सेइं ज़ोरु थियू, ते खबरदारी भी दितोरी थी। 7 किजोकि परमेशरे अस अशुद्ध ज़िन्दगी जीनिरे लेइ नई, पन पवित्र ज़िन्दगी जीनिरे लेइ कुजवरेम। 8 एल्हेरेलेइ ज़ै कोई इना हदायतां केरो इन्कार केरते, तै मैन्हु केरो नई, पन परमेशरेरो इन्कार केरते, ज़ै अपनो पवित्र आत्मा तुसन देते। 9 पन विश्वासी भाईचारेरे प्यारेरे बारे मां तुसन किछ लिखनेरी ज़रूरत नई, एपू मांमेइं प्यार रखनो तुसेईं परमेशरे करां एपू शिखोरोए। 10 ते सारे मकिदुनिया इलाकेरे सेब्भी ढूलान सेइं साथी एरू केरतथ भी, पन हे ढूलाव, अस तुसन कां छन्दे केरतम कि होरे भी बढ़ते गाथ। 11 ते जेन्चरे असेईं तुसन हुक्म दित्तो, तेन्चरे तुस होरन सेइं लड़ाई न केरा, ते अपनू कम केरा त कने अपने लेइ कमाई केरा। 12 ते एन्चरां तैना भी तुशुशी आदर केरेले ज़ैना विश्वासी नई, ते तुसन कोन्वी चीज़ारो घाटो न भोलो। 13 हे ढूलाव, अस न चातम, कि तुस तैन केरे बारे मां अनज़ान राथ ज़ैना विश्वासी मरैन अनज़ान राथ, एरू न भोए, कि तुस होरि केरे ज़ेरे शोग केरथ, ज़ैन मरैनरां पत्ती उमीद नई। 14 किजोकि अगर अस विश्वास केरतम, कि यीशु मरो, ते ज़ींतो भोव, त तेन्चरे परमेशर तैन भी ज़ैना यीशु पुड़

विश्वास केरतां मरे, परमेशर तैन भी यीशु सेइं साथी वापस आनेलो। 15 किजोकि अस प्रभु यीशुएरे वचनेरे मुताबिक तुसन सेइं इन ज़ोतम, कि अस ज़ैना ज़ींतेम, ते प्रभुएरे वापस एजने तगर बंचोरे रामेले, त ज़ैना विश्वासी मरैनरे पेइले तैस सेइं मिलमेले, फिरी अस मिलमेले। 16 किजोकि प्रभु यीशु एपू स्वर्गोरां एज्जेलो; ते ज़ोरे सेइं हुक्म देलो, तैस वक्ते प्रधान दूतेरी आवाज़ शुनोली, ते परमेशरेरी महिमारो नइशिनगो बजो गालो, ते ज़ैना मसीह पुड़ विश्वास केरनेबाले मां मरन, तैना पेइले ज़ींते भोनेन। 17 तेखन अस ज़ैना ज़ींते बचोरे रहमेले, ते तैन सेइं साथी बिदलारी पुड़ नियो गानेम, कि अम्बरे मां प्रभु सेइं मिलमेले, ते तेइसेरां बाद अस सदा प्रभु सेइं साथी रानेम। 18 एल्हेरेलेइ इन्ने गल्लन सेइं एक्की होरि तस्सली देते राथ।

5 हे ढूलाव ते बेइनव, इसेरी ज़रूरत नई, कि वक्तन ते कालां केरे बारे ज़ेइस प्रभु यीशु वापस एज्जेलो तुसन किछ लिखू गाए। 2 किजोकि तुस एपू रोड़े चारे ज्ञानतथ, ते जेन्चरे चोर राती एइते, तेन्चरे प्रभुएरू दुबारां एजनु भोलू। 3 ज़ैखन लोक ज़ोलो, “कि शान्तिए, ते कोई डर नई,” त तैन पुड़ अकदम विनाश एजनोए, जेन्चरे दोर्जींती पुड़ तकलीफ; ते तैना तैस मुसीबती करां न बचेले। 4 पन हे ढूलाव ते बेइनव, तुस त (आत्मिक) आंधरे मां नई, कि तै दिहाड़ी पुसन पुड़ चोरेरी ज़ेरे एज्जे। 5 किजोकि तुस सब लोअरे बच्चे आथ, ते दीसारे बच्चे आथ, अस न रातेरम, न आंधारेरेम। 6 एल्हेरेलेइ अस होरि केरे ज़ेरे झुलोरे न रहम, पन बींझे रहम ते हुशार रहम। 7 किजोकि ज़ैना झुलोरे रातन, तैना राती झूलतन, ते ज़ैना नशे मां रातन, तैना राती नशे मां भोतन। 8 पन अस त दीसेरेम, विश्वास ते प्यार लेइतां कि इशुशी हिफाज़त भोए जेन्चरे झिलम सिपाहेरी हिफाज़त केरतीए, ते मुक्तेरे उमीद लेइतां जेन्चरे सिपाही टोप लाते, खबरदार रहम। 9 किजोकि परमेशरे अस सज़ारे ते क्रोधेरे लेइ नई, पन एल्हेरेलेइ चुनोरेम कि अस अपने प्रभु यीशु मसीहेरे ज़िरिये सेइं मुक्ति हासिल केरम। 10 यीशु मसीह इशुशे लेइ एल्हेरेलेइ मरो, कि अस चाए बींझे भोम, या झुलोरे भोम, सब मिलतां तैस सेइं साथी ज़ींम। 11 एल्हेरेलेइ एक्की होरि हिम्मत देथ, ते एक्की होरेरी तरक्की भोनेरी ज़िरियो बना, लगातार, तुस एरू केरतथ भी। 12 ते ढूलाव, अस तुसन सेइं बिनती केरतम, कि ज़ैना तुशुशे लेइ बड़ी मेहनत केरतन, ते प्रभु मां तुशुशी अगवाई केरनेबाले आम, ते ज़ैना तुसन सलाह देतन, तैन केरि आदर केरा। 13 ते ज़ैना कम्मां तैनेईं तुशुशे लेइ कियां तैन केरे वजाई सेइं तैन केरि आदर ते तैन सेइं बड़ो प्यार केरा, ते एपू मांमेइं मेल मालपे सेइं राथ। 14 हे ढूलाव ते बेइनव, अस तुसन कां मिनत केरतम, कि ज़ैना आलसी आन, तैन खबरदार केरा, ज़ैन केरि हिम्मत घटे तैन हिम्मत देथ, तैन केरि मदत केरा ज़ैना (आत्मिकता) मां कमजोरन, सेब्भी केरे लेइ बरदाशत केरनू हिराथ। 15 इस गल्लाक ध्यान रख्खा, कि कोई कोन्वी सेइं बुरीपीयैरे बदले बुराई न केरे, पन सदा भलाई केरनेरे लेइ तियार राथ, एपू मांमेइं ते सेबभन सेइं भी भलाई केरनेरी कोशिश केरा। 16 सदा खुश राथ। 17 लगातार प्रार्थना केरते राथ। 18 हर हाले मां शुक्र

केरा, किजोकि तुश्शे लेइ मसीह यीशु मां परमेशेरेरी ईए मर्जीए। 19 पवित्र आत्मारे कम्मन ज़ैना लोकां केरे ज़िन्दगी मां भोतन तैन न रोका। 20 भविष्यवैनी केरो इन्कार न केरा। 21 सब गल्लां परखा, ज़ैना रोड़ी भोन तैन अपनाथ। 22 सेब्भी किसमेरी बुरैई करां बच्चोरे राथ। 23 शान्ति देनेबालो परमेशेरे एप्पू तुसन पूरे तरीके सेइं पवित्र केरे; ते तुश्शी आत्मा ते प्राण ते जिसम इश्शे प्रभु यीशु मसीहेरे दुबारां एजने तगर पूरे, ते बेइलज़ाम ते सुरक्षित रान। 24 तुश्शो कुजाने बालो वफादारे, तै एरू केरेलो। 25 हे ढलाव, इश्शे लेइ प्रार्थना केरा। 26 सेब्भी विश्वासी ढलान मसीहेरे प्यारे सेइं नमस्कार केरा। 27 अवं तुसन प्रभुएरी कसम देताई, कि ई चिट्ठी सेब्भी विश्वासी ढलान पेढतां शुनाई गाए। 28 इश्शे प्रभु यीशु मसीहेरो अनुग्रह तुसन पुड भोतो राए।

2 थिस्सलुनीकियों

1 अवं पौलुस ई चिट्ठी लिखने लोरोई। सिलवानुस ते तीमुथियुस भी मीं सेईं साथी आन। थिस्सलुनीकि नगरेरे कलीसियारे विश्वासी लोकन, जैना बाजी परमेशर ते प्रभु यीशु मसीह मां आन, 2 अस प्रार्थना केरतम कि इश्शे बाजी परमेशर ते प्रभु यीशु मसीह तुसन अनुग्रह ते शान्ति दे। 3 हे ढूलाव ते बेइनव, तुश्शे बारे मां असेईं हर वक्त परमेशरें शुक्र कियेरू लोड़े, ते इन इश्शे लेइ ठीक भी आए। एल्हेरेलेइ कि तुश्शो यीशु मसीह पुड़ विश्वास बड़ो बढ़तो गाते, त कने तुश्शो एककी होरि सेईं प्यार केरनो भी बड़ो बढ़ने लोरोए। 4 ई वजा आए, कि अस एप्पू परमेशरें कलीसियान मां, तुश्शे बारे मां घमण्ड केरतम, चाए तुसन पुड़ मुसीबत या दुःख भी एज्जन, फिरी भी तुस सबरी सेईं झैलतथ, ते तुस यीशु मसीह पुड़ विश्वास केरते रातथ। 5 परमेशर अपनो इन्साफ हिरानेरे लेइ ई स्ताव इस्तेमाल केरेलो, कि तुस परमेशरें राज्जेरे काबल भोथ, जेसेरे लेइ तुस दुःख भी झैलतथ। 6 परमेशरे हमेशा ठीक तरीके सेईं इन्साफे केरते, कि जैना तुसन दुःख देतन, तैन बदले मां दुःख दे। 7 तुस जैना दुःख झैलतथ, परमेशर तुसन आराम देलो ते असन भी। इन तेइस भोलू जेइस प्रभु यीशु अपने शक्तिबाले स्वर्गदूतन सेईं साथी बेलति अगारे लप्पी सेईं साथी स्वर्गंरां एज्जेलो। 8 ते जैना लोक परमेशरे न पिशानन् त कने इश्शे प्रभु यीशुएरे खुशखबरी न मन्न, तैन तै सज़ा देलो। 9 तैना प्रभुए करां हमेशारे लेइ अलग भोले, ते तैसेरे महान शक्तेर हिस्सेदार न भोले। तै तैन हमेशारी सज़ा देइतां नाश केरेलो। (aiōnios g166) 10 इना गल्लां तेइस भोली जेइस यीशु अपने लोकन करां आदर हासिल केरनेरे लेइ वापस एज्जेलो, ते जैना लोक तैस पुड़ विश्वास केरतन तैना हैरान भोले। तुस भी तैन्ने लोकन मरां भोले, किजोकि जै सन्देशे असेईं तैसेरे बारे मां तुसन शुनव तुसेईं तैस पुड़ विश्वास कियो। 11 एल्हेरेलेइ अस लगातार तुश्शे लेइ प्रार्थना भी केरतम, कि परमेशर तुसन इस काबल बनाए, जेरि जिन्दगी जीनेरे लेइ तुस कुजवरे तेन्चरे तुस जीथ। ते तै तुसन अपने शक्ति सेईं इस काबल बनालो कि तुस जैना रोडू केरथ ते जैन तुस केरनू चाथ, ते जैन कम तुस अपने विश्वासे सेईं केरतथ पूरू केरथ। 12 एन्चरे इश्शे प्रभु यीशु मसीहरे नंवेरी तुश्शे जिरिये बडीयाईं भोली। ते तैसेरे जिरिये तुसन आदर मैलेली। इन सब किछ इश्शे परमेशर त कने प्रभु यीशु मसीहरे अनुग्रहे सेईं भोलू।

2 हे ढूलाव ते बेइनव, असन कां प्रभु यीशु मसीहरे वापस एजनेरे बारे मां जोनेरे लेइ किछ आए। तै वक्त एज्जेलो जेइस अस तैस सेईं साथी मिलमेले। 2 इन सोचतां तुस परेशान न भोथ या तुश्शो दिल न घबराए कि प्रभुएरी दिहाड़ी पेइली ओरिए। किछ जोईं बटतन कि इन भविष्यवाणी मां या सन्देशे मां या चिट्ठी मां तैन कां ओरू थियूं। 3 लोक जैना इस बारे मां झूठी गल्लां जोतन तैन पुड़ विश्वास न केरा। किजोकि यीशु मसीहरे वापस एजनेरे पेइले, तै वक्त एज्जेलो जेइस बड़े लोक परमेशरें खलाफ भोले, ते फिरी अधर्मी मैन्हु बांदो भोलो। तै, तै आए

जै नाश भोनेरे लेइ ठहरावरोए। 4 तै अधर्मी मैन्हु परमेशरें खलाफत केरेलो, ते तैन सब किछ जैन लोक देबते सेमझतां आराधना केरतन, तै इन जोलो ई अवं इन सेबभन करां महान आईं। इड़ी तगर कि तै परमेशरें मन्दरे मां बिश्तां अपनो आपे जो परमेशर जोलो। 5 इन न बिसरा, कि मीं बड़े बार इन गल्लां केरे बारे मां जोरूए, जैखन अवं तुसन सेईं साथी थियो। 6 हुन्ना तै अधर्मी मैन्हु बांदो नईं भोरो किजोकि कोई आए जैने तै रोकोरोए, कि तै अपने वक्ते पुड़ बांदो भोए। 7 किजोकि अधर्मी चीजां केरि शक्ति इस दुनियाईं मां पेइली छेपतां कम केरने लोरीए, पन अक आए जै तैस रोकते। ते तै तैस रोकतो रालो जां तगर तै दूर न कियो गाए। 8 तेइं बाद तै दुष्ट मैन्हु एज्जेलो, पन बादे मां जैखन प्रभु यीशु एज्जेलो, त तैस दुष्ट मैन्हु अपने ऐशेरे फुकी सेईं ते एजनेरी महिमाईं सेईं मारेलो। 9 ते दुष्ट मैन्हु, शैतानेरे शक्ति सेईं एज्जेलो। तै हर किसमेरे झूठे चमत्कार ते निशान, ते बडां-बडां कम्मां केरेलो, ताके लोक सोचन कि तै परमेशरे जै एन केरते। 10 ते तै हर किसमेरां बुरां कम्मां केरेलो, ते तैन धोखो देलो जैना परमेशरे नाश केरनेन। किजोकि तैनेईं तैस सञ्चे पुड़ विश्वास केरने करां इन्कार कियो, जैस सेईं तैन मुक्ति मैल्लेथी। 11 एल्हेरेलेइ परमेशर तैन मां अक धोखो देनेबाली आत्मा भेजेलो जै तैन सञ्चे करां दूर केरेली, ताके तैना झूठे पुड़ विश्वास केरन जैन तै दुष्ट मैन्हु तैन सेईं जोलो। 12 परमेशर तैन सेबभी लोकन सज़ा देलो जैनेईं यीशु मसीहरे सञ्चे सन्देशे पुड़ विश्वास न कियो, पन पाप केरने सेईं खुश भोए। 13 हे ढूलाव ते बेइनव, असेईं तुश्शे लेइ परमेशरें शुक्र कियेरू लोड़े। किजोकि परमेशर तुसन सेईं प्यार केरते, तैने तुस दुनिया बनाने करां पेइले चुने, कि पवित्र आत्माेरे पवित्र बनाते, ते यीशु मसीहरे बारे मां जै सञ्चो सन्देशे तैस पुड़ विश्वास केरतां परमेशर तुसन मुक्ति दे। 14 जै खुशखबरी असेईं प्रचार की परमेशरे तै इस्तेमाल की, कि तुसन बचानेरे लेइ कुजाए, तुस इश्शे प्रभु यीशु मसीहरी महिमाईं मां शामिल भोथ। 15 एल्हेरेलेइ, ढूलाव ते बेइनव, जै शिक्षा असेईं तुसन दिती, जैखन असेईं तुसन सेईं गल्लां की त कने चिट्ठी केरे जिरिये, तैस पुड़ तुस लगातार विश्वास केरते राथ। 16 अस प्रार्थना केरतम इश्शो प्रभु यीशु मसीह एप्पू, ते इश्शे बाजी परमेशर जैने असन सेईं प्यार कियो, ते जैने अपने अनुग्रहे सेईं असन हमेशारो होसलो ते पक्की उमीद दिती, (aiōnios g166) 17 तैना तुसन होसलो देन, ते तुसन मजबूत केरन ताके तुस लगातार भलाई केरथ ते जैन जोथ तैन रोडू भोए।

3 आखरी मां हे ढूलाव ते बेइनव, इश्शे लेइ प्रार्थना केरते राथ, कि अस प्रभु यीशुएरू वचन होरि भी बड़े ठैरन शुनेईं बटम, ते जैना शुन्न त तैना तेन्चरे मनन जेन्चरे तुसेईं मन्नू। 2 ते ई भी प्रार्थना केरा कि परमेशर असन बुरे ते दुष्ट लोकां केरे जिरिये नुकसान पुजाने करां बचेइतां रखवे, किजोकि बड़े लोक जैनेईं प्रभु यीशुएरी खुशखबरी शुनी, ते तैनेईं इस पुड़ विश्वास न कियो। 3 पन तुस प्रभु पुड़ पूरो भरोसो केरि बटतथ, तैए तुसन मजबूत केरेलो, ते दुष्टे करां यानी शैताने करां बचालो, ताके तै तुसन कोई नुकसान न पुजेईं बटे। 4 ते असन प्रभु मां तुसन पुड़

भरोसोए, कि जैन किछ असेई तुसन केरनेरे लेइ जोरुए, तुस तेन्चरे केरते ओरेथ ते एजनेबाले वक्ते मां केरते राले। 5 अस प्रार्थना केरतम, कि प्रभु यीशु मसीह तुसन इन समझनेरे काबल बनाए कि परमेशर तुस सेइं केत्रो प्यार केरते, ते बरदाश केरा जेन्चरे मसीहे बरदाश कियूं। 6 हे ढूलाव ते बेइनव, अस प्रभु यीशु मसीहेरे दित्तोरे अधिकार सेइं तुसन ई हुक्म देतम, कि तुसन मरां हर कोई एरे ढूलान ते बेइनन सेइं साथ न रखवे, जैना आलसी आन त कने जै शिक्षा असेई तुसन दिती तैस न मन्न। 7 किजोकि तुस एप्पू रोड़े चारे ज्ञानतथ, कि तुसेई तेन्चरे ज़िन्दगी जीयोरी लोड़े जेन्चरे असेई जी, जैखन अस तुसन सेइं साथी थिये, अस आलसी न थिये पन कम केरते थिये। 8 असेई कोन्चेरी रोटी मुफ्त न खाइ, पन अस मेहनत ते कष्टे सेइं रात दिहैडी कारोबार केरते थिये, कि अस अपने ज़रूरतां केरे लेइ तुसन पुड़ निर्भर न भोम। 9 असेई बड़ी मेहनत की, एल्हेरेलेइ नई कि असन अधिकार नई, कि तुसन हुक्म देम कि तुस इश्शी ज़रूरतां पूरी केरा। पन एल्हेरेलेइ कि असेई अपनो आप तुशे लेइ मिसाल बनाई ताके तुस इश्शे जेरि ज़िन्दगी जीथ। 10 जैखन अस तुसन सेइं साथी थिये तैखन असेई तुसन हुक्म दित्तोरो थियो, कि अगर कोई कम केरने करां इन्कार केरे त तैस रोटी भी न देथ। 11 इश्शे शुन्ने मां ओरू आए कि तुसन मां बड़े लोक एरे आन जैना आलसी ज़िन्दगी जीतन। तैना एप्पू कम न केरन, पन होरि केरे कम्मन मां दखल देतन। 12 एरे लोकन अस प्रभु यीशु मसीहेरे दित्तोरे अधिकारे सेइं हुक्म देतम ते समझातम, कि चुपचाप कम केरतां अपनि ज़िन्दगी जीनेरे लेइ कमाई केरन। 13 ते तुस, ढूलाव ते बेइनव, भलाई केरने मां हिम्मत न हारा। 14 अगर कोई इश्शी इस चिट्टेरे सन्देशे न मन्ने, त सेब्भी केरे सामने तैसेरी पिशान केरा, ते तैस सेइं साथ न रखखा, ताके तै छिथोए; 15 फिरी भी तैस सेइं दुश्मनेरो जेरो बर्ताव न केरा, पन तैस सेइं विश्वासी सैथेरो जेरो बर्ताव केरतां तैस खबरदार केरा, कि जेरू तैने कियूं तैन न केरे। 16 हुनी अवं प्रार्थना केरताई प्रभु जै शान्ति देनेबालोए, तुसन हर वक्त हर किसमे सेइं शान्ति देतो राए, ते प्रभु लगातार तुसन सेब्भन सेइं साथी भोए। 17 अवं पौलुस अपने हथ्ये सेइं नमस्कार लिखताई, इन मेरू सबूते, अवं चिट्ठी केरे आखरी मां एन्चरे लिखताई, ताके हर एक्की पतो चले कि ई चिट्ठी मेरे तरफां आए। 18 इश्शे प्रभु यीशु मसीहेरो अनुग्रह तुसन सेब्भन पुड़ भोतो राए।

1 तीमुथियुस

1 अवं पौलुस ई चिट्ठी लिखने लोरोई। अवं इश्शे मुक्ति देनेबाले परमेशरे ते यीशु मसीहेरे अधिकारे सेइं प्रेरित आई, जैस पुड़ इश्शी उमीदे। 2 अवं ई चिट्ठी तीमुथियुसे जो लिखने लोरोई। हे तीमुथियुस तू मेरे मट्टे जेरू आस, किजोकि जेन्चरे अवं विश्वास केरताई तेन्चरे तू भी विश्वास केरतस। अवं प्रार्थना केरताई इश्शो बाजी परमेशर ते प्रभु यीशु मसीह तीं अनुग्रह, दया त कने शान्ति देतो राए। 3 हे तीमुथियुस जेन्चरे तू ज्ञानतस, इफिसुस नगरे मां किछ एरे लोक आन जैना गलत शिक्षा देतन। तैना लगातार झूठी कहैनी शिखालतन ते पूर्वजां केरे नव्वां केरे बारे मां शिखालतन। ज़ैखन अवं इफिसुस नगरेमां मकिदुनिया इलाके जो गानेरे लेइ तियार थियो, त मीं तीं ज़ोरू थियू कि इफिसुस नगरे मां रा ते तैन ज़ो, कि एरी ज़ेरि शिक्षा न देतन, ज़ैखन तैना एरी ज़ेरि शिक्षा देतन त लोक तैन केरे बारे मां बेंस केरतन। नितीजो ई आए, ज़ैन कम परमेशरे दित्तोरूए, शिखालनेबाले तैन नई लौ केरने ज़ैन सिर्फ परमेशरे पुड़ रेखतां भोइ सकते। 5 मेरो हुकम देनेरो मकसद ई आए, कि तुस एक्की होरि सेइं साफ दिले ते रोड़े ज़मीरे, ते सच्चे विश्वासे सेइं प्यार केरा। 6 झूठी शिक्षा देनेबालेई इन सैरी गल्लां केरनि बंद की ते सिर्फ बेकार बेंस केरतन। 7 ते शास्त्री बन्नु चातन, पन ज़ैना गल्लां तैना होरन शिखालतन ते ज़ैन केरो दावो केरतन तैन एप्पू भी न समझन। 8 अस ज्ञानतम, कि अगर लोक मूसरे कानूने सही तरीके सेइं शिखालन त तैन रोड़ू आए। 9 तुस ज्ञानतथ मूसरो कानून धर्मी मैनेरे लेइ नई। पन तैन केरे लेइ आए, ज़ैना परमेशरे कानूनरो इन्कार केरन ते तैस न मनन, ते ज़ैना परमेशरेरी आराधना न केरन ते ज़ैना लगातार पाप केरतन, ते ज़ैना अशुद्ध आन, ते परमेशरेरी आदर न केरन, ते ज़ैना अपने अम्मा बाजी ते होरि केरे कातलिन। 10 ते कने बदमाशी केरनेबालां, मड़द मड़दन सेइं जिसमानी रिश्तो रखनेबालां, नौकर बेचबालां, झूठ जोने बालां, ते झूठी कसम खाने बालां, ते इन केरे अलावा रोड़ी शिक्षारी खलाफ कम केरनेबालां केरे लेइ आए। 11 ई शिक्षा महान परमेशरेरी महिमारे खुशखेबारे मुताबिके, ई परमेशरे मीं होरन शुनानेरे लेइ दित्तोरीए। 12 अवं अपने प्रभु मसीह यीशुएरू शुक्र केरताई ज़ैने मीं शक्ति दित्ती, तैने अवं वफादार समझतां मीं अपनि सेवा दित्ती। 13 विश्वासी बन्ने करां पेइलो अवं यीशुएरे बारे मां तुहीन केरनेबालो ते विश्वासी लोकन सताने बालो, ते तैन नुकसान पुज़ाने बालो थियो। पन परमेशरे मीं पुड़ अपनि दया हिराई, किजोकि मीं हेजू यीशु पुड़ विश्वास न थियो कियोरो ते अवं न थियो ज्ञानतो कि कुन लोरोई केरने। 14 ते इश्शे प्रभुए अपनो बड़ो अनुग्रह लगातार हिराव। ते तैनी विश्वास ते प्यार दित्तो, किजोकि अवं तैस सेइं साथी अक भोरो थियो। 15 ई गल सच्चे, ते हर किसमे सेइं मन्ने काबल, कि मसीह यीशु असन पापी लोकन मुक्ति देने इस दुनियाई मां अवं, ज़ैन मरां सेबन्ना जादे पापी अवं आई। 16 पन परमेशरे मीं पुड़ दया की, एन तैने एल्हेरेलेइ कियू, कि मेरे ज़िरिये, ज़ैने मैने होरन करां

जादे बुराई की, यीशु मसीह तैस पुड़ अपनि पूरी बरदाशत हिरेई बटे, चाए मीं ज़ैन भी कियोरू थियू। तैने एन कियू ताके बादे मां होरे लोक विश्वास केरन ते हमेशारी ज़िन्दगी हासिल केरन। (aiōnios g166) 17 हुनी हमेशारो राज़ो, ज़ै सदा ज़ींतोए ते आलाए महान परमेशरेरी आदर, ते महिमा सदा भोती राए। आमीन। (aiōn g165) 18 हे मट्टां तीमुथियुस, अवं इन्ना हदायतां देने लोरोई: अवं तीं तैना गल्लां याद केरताई ज़ैना बीतोरे वक्ते मां नेबेई तीं ज़ोरी थी। तू तैन गल्लां केरो इस्तेमाल हथियारां केरो ज़ेरो तैन केरे खलाफ लड़नेरे लेइ केर, ज़ैना झूठी शिक्षा देतन। 19 तू मसीह पुड़ लगातार विश्वास केर ते अपनो ज़मीर भी साफ रख। किछ लोकेई अपने साफ ज़मीरो इन्कार कियोरोए तैसेरो नितीजो ई भोव कि तेनेई यीशु पुड़ विश्वास केरनो शारो। 20 तैन्ने मां हुमिनयुस ते सिकन्दरे, ज़ैना मीं शैतानेरी शक्ति मां देइतां तैन सज़ा दित्तोरीए, एस सेइं तैना इन शिखेले कि परमेशरेरी तुहीन केरनि बंद केरन।

2 हुनी अवं सेबन्न करां बेइतां इन ज़ोताई, कि बिनती, ते प्रार्थनां, ते दरखुवासां, सेबन्नी मैन्हु केरे लेइ की गान। 2 राज़ां ते सेबन्नी उच्चे पदे बालां केरा लेइ प्रार्थना केरा, ताके तैना असन सुखे ते बगैर खतरे सेइं ज़ीने देन ते अस परमेशरेरी आराधना केरि बटतम ते होरि लोकन सेइं रोड़ो बताव केरि बटम। 3 इन इश्शे मुक्ति देनेबाले परमेशरे रोड़ू लगते ते पसंद एइते। 4 ते इन चाते, कि सेबन्नी मैन्नु मुक्ति मैल्ले; ते तैना सच्चेरे ज्ञाने ज्ञानन। 5 किजोकि सिर्फ अक्के परमेशरे, ते अक मैन्हु आए ज़ै परमेशर ते लोकां केरो बिचवाई कराने बालो, ते तै मैन्हु यीशु मसीह आए। 6 सेबन्नी लोकन पाप ते मौतरी शक्ति करां छुटकारो देनेरे लेइ मसीहे अपनो आप बलिदान कियो। तैसेरे मौतरे ज़िरिये परमेशरे ठीक वक्ते पुड़ सबूत दित्तू कि ते सेबन्नी लोकन बचानो चाते। 7 ई वजा आए, परमेशरे अवं खुशखेबरी प्रचार केरनेबालो ते प्रेरित भोनेरे लेइ चुनो। तैने अवं गैर कौमन विश्वासेरो सच्चे सन्देशे शिखालनेरे लेइ चुनो। अवं झूठ नई लोरो ज़ोने बलके सच्चे ज़ोने लोरोई। 8 अवं चाताई, कि हर ठैरी सभान मां मड़द परमेशरेरे लेइ समर्पित हथ खड़े केरतां बगैर सरकां ते बगैर बेंसी सेइं प्रार्थना केरन। 9 तेन्चरे मसीही कुआन्शां भी इज़्जतदार लिगड़ां लेइतां, ते अपनो आप रोड़ेचारे सज़ेइतां, न कि अलग-अलग किसमे सेइं दोग बनाने, ते सोन्ने, ते मोती, ते कीमती लिगड़न सेइं। 10 बलके इसेरे बदले तैनेई होरि केरे लेइ रोड़ां कम्मां केरतां अपनो आप खूबसूत लोड़े बनावरो, किजोकि परमेशरेरी भक्ति केरनेबैली कुआन्शन इन शोभा देते। 11 ज़ैखन होरे लोक विश्वासी लोकन शिखालन त सेबन्नी कुआन्शेई चुपचाप ते आदरी सेइं शुन्तां शिखोरू लोड़े। 12 अवं अज़ाज़त न देई कि कुआन्शां मड़दन शिखालन ते तैन पुड़ अधिकार रखन। ज़ैखन तुस आराधना केरनेरे लेइ अकोट्टे भोथ त कुआन्शेई चुप लोड़े रावरू। 13 अवं इन एल्हेरेलेइ ज़ोताई किजोकि परमेशरेरे पेइलो आदम बनाव, तैसेरे पत्ती हव्वा बनाई। 14 होरि वजा ई आए कि कुआन्शां सप्ये करां धोखो खव न कि आदमे, एन्चरां हव्वा परमेशरेरो हुकम टलोड़ो। 15 फिरी भी कुआन्शा बच्चे ज़रमने सेइं परमेशरेरे करां मुक्ति हासिल केरेली, अगर

मसीह पुड़ लगातार विश्वास केरती राए, ते होरि लोकन सेइं प्यार केरती राए, ते शुद्ध त कने रोड़े तरीके सेइं बर्ताव केरे।

3 ई गल सच्च, कि जै कलीसियाई मां अगवो भनो चाते, त तै आदर पदेरी इच्छा रखते। 2 ते इन ज़रूरीए कि अगवो बेइलज़ाम भोए, ते तैसेरी अक कुआन्शा लोड़े, ते तै अपने आपे पुड़ कैबू केरनेबालो, समझदैरी सेइं जीनेबालो भोए, इज़्जतदार भोए, ते ट्लाहना केरि आदर केरनेरे लेइ तियार रानेबालो भोए, ते होरि लोकन परमेशेरो सन्देश रोड़े चारे शिखालनेरे काबल भोए। 3 तै शराबी या मार-पीट केरनेबालो न लोड़े, बल्के दया केरनेबालो लोड़े, ते लड़ाई न केरनेबालो लोड़े ते पेइंसां केरे लालची न भोए। 4 तै अपने घरेरो रोड़े चारे चलानेबालो ते बन्दो बसत केरनेबालो लोड़े, ते तैनी अपने बच्चन शिखालोरू लोड़े कि तैना हर गल्ली मां इज़्जती सेइं तैसेरी मनन। 5 ज़ैखन अगर कोई अपने घरेरो बन्दो बसत केरनो न ज्ञानतो भोए, त तै परमेशेरी कलीसियारी हेरगेश केन्चरे केरेलो? 6 तै नंबो विश्वासी न लोड़े, एरू न भोए अभिमान केरे ते तैस शैतानेरी ज़ेरि तैस सज़ा मैल्ले। 7 ते ज़ैना लोक विश्वासी नईं तैनेईं भी तैसेरे बारे मां इन ज़ोरू लोड़े कि ए रोड़ो मैन्हु आए। ताके एरू न भोए कि तै घटिया भोए ते शैतानेरे ज़ाले मां फंसे। 8 तेन्चरे सेवक भी तेरहे लोड़न ज़ैन केरि लोक आदर केरन। ईमानदार लोड़न, ते पीने बाले न भोन, ते एरे मैन्हु न भोन ज़ैना पेइंसां केरे लेइ किछ भी केरि बटतन। 9 पन तैन केरे ज़मीर साफ लोड़न ते ज़ै शिक्षा परमेशेरे बांदी कियोरीए, तैस पुड़ लगातार विश्वास केरनेबाले लोड़न। 10 ज़ैखन कलीसियारे सेवक चुने गान त पेइलू तैन केरू चालचलन परखू गाए, कि तैन मां रोड़े गुण आन, ते केन्ची तैन मां कोई गलती न लेइहोए, त फिरि सेवकेरू कम केरन। 11 एन्चरे कलीसियाई मां सेवा केरनेबालां केरि कुआन्शां भी आदरारे काबल भोन, होरन बदनाम केरनेबैली न लोड़न, पन शांत सुभावे बैली, ते सेबभी गल्लन मां ईमानदार भोन। 12 कलीसियारो सेवक अपने कुआन्शारे लेइ वफादार लोड़े, ते बच्चां ते अपने घरेरे सारे लोकां केरो रोड़ो चारे हेरगेश केरनेबालो लोड़े। 13 किजोकि ज़ैना सेवकेरू कम रोड़े चारे केरतन, तैना लोकां केरि नज़री मां इज़्जतदार भोतन। ते तैना अपने तैस विश्वासेरे बारे मां ज़ै यीशु मसीहे पुड़े बड़े दिलेरी सेइं ज़ोतन। 14 अवं तीं कां जल्दी एजनेरी उमीद रखने पुड़ भी इना गल्लां एल्हेरेलेइ लिखताईं। 15 अगर मीं एजने मां चिर लगे, त तू ज्ञानस, कि लोकेईं परमेशेरे टब्बरेरे होरि लोकन सेइं केन्चरे बर्ताव कियोरो लोड़े। इन टब्बर तैना लोकन सेइं बनोरू, ज़ैना यीशु पुड़ विश्वास केरतन ते ज़ीते परमेशेरे कलीसियारेन। इना विश्वासी सच्च्वी शिक्षाई मज़बूती सेइं मन्तन ते सम्भालतन जेन्चरे बुनीयाद ते खम्मबे इमारती सम्भालतन ते मज़बूत केरते। 16 ते इस मां शक नईं, अस पूरे याकीन सेइं जोई बटतम, ज़ैना शिक्षां परमेशेरे बैदी की एना बिलकुल सच्च्वी आन, मतलब, मसीह मैनेरे रूपे मां बांदो भोव, पवित्र आत्मा तै हर कम्मे मां धर्मी ठहराव, स्वगदूतेईं तै लाव, लोकेईं तैसेरे बारे मां कौमन मां प्रचार कियो, सारे दुनियाईं मरां लोकेईं तैस पुड़ विश्वास कियो, परमेशेरे तै उबरे स्वर्गं जो नीयो।

4 पन पवित्र आत्मा साफ ज़ोते, कि आखरी वक्ते मां किछ लोक मसीही शिक्षाई पुड़ विश्वास केरनो बन्द केरेले। तैना दुष्ट आत्मान कबूल केरेले, तैना तैन बुरी बत्ती च़लैली, त कने तैना लोक दुष्ट आत्मां केरि झूठी शिक्षाई पुड़ विश्वास केरेले। 2 इन तैना झूठे पाखंडी लोक आन, ज़ैना इन झूठी शिक्षान शिखालतन, तैन केरो ज़मीर ज़ै रोड़े ते बुरे मां फैसलो केरते मर्रो आए ते जेन्चरे तात्ते लोहे सेइं तै फुकोरोए। 3 एरे लोक इन शिखालतन कि ड़ला नईं बनानो ते खानेरी किछ चीज़ां न लोड़न खेवरी, पन परमेशेरे इन खानेरी चीज़ां विश्वासी लोकां केरे खानेरे लेइ बनोरिन ज़ैना सच्च्वी शिक्षा ज्ञानतन कि प्रार्थना केरतां खावरू लोड़े। 4 किजोकि परमेशेरी बनेवरी हर चीज़ रोड़ीए। अस परमेशेरेरू शुक्र केरतां सब किछ खेइ बटतम। 5 किजोकि परमेशेरे वचने, ते प्रार्थनाई सेइं शुद्ध भोते। 6 अगर तू ढ़लान ते बेइनन लगातार इन्ना गल्लां याद करातो रालो, ज़ैन केरि हदायत मीं तीं दित्तोरीए त कने विश्वासेरे सन्देशे ते तैस रोड़ी शिक्षाई सेइं ज़ैस मां तू मज़बूत बनावरोस ज़ै तू मन्तो ओरोस। त तू यीशु मसीहेरो रोड़ो सेवक भोलो। 7 पन बनेवरी कहैनी ते बेकार कहैनी केरे वजाई सेइं वक्त बरबाद न केर ज़ैन सेइं परमेशेरी आदर न भोए। पन तू लगातार परमेशेरी आदर केरनेबाली ज़िन्दगी ज़ीनी शिखाल। 8 किजोकि जिसमानी वर्जिशी सेइं जानी फैइदो भोते, पन भेक्तेरे लेइ तियारी बड़ी रोड़ीए किजोकि इस वक्तेरी ते एजनेबाले वक्तेरी ज़िन्दगरो फैइदो इस्से मां आए जेसेरो वादो परमेशेरे कियोरोए। 9 ते ई गल सच्च, ते हर तरीके सेइं मन्नेरे काबल। 10 किजोकि अस मेहनत ते कोशिश एल्हेरेलेइ केरतम, किजोकि इश्शी उमीद तैस ज़ीते परमेशेरे पुड़े। ज़ै सेबभी लोकां केरो, ते खास केरतां विश्वास केरनेबालन मुक्ति देनेबालोए। 11 विश्वासी लोकन इना गल्लां शिखाल ते तैन ई हुक्म दे कि तैना इन मनन। 12 तू एन्चरे बर्ताव केर कि कोई भी तेरी अनादर न केरे किजोकि तू जवान आस। पन तू विश्वासी लोकां केरे लेइ इन सैरी गल्लन मां अक मिसाल बन, गलबाती मां, होरन सेइं बर्ताव केरने मां, ते होरन सेइं प्यार केरने मां, ते यीशु मसीह पुड़ विश्वास केरने मां, ते बेइलज़ाम ज़िन्दगी ज़ीने मां ताके लोक भी एन्चरां केरन। 13 ज़ांतगर अवं न एज्जी, तांतगर ज़ैखन विश्वासी लोक अकोट्टे भोतन ज़ोरे सेइं पढ़ने मां, ते तैन केरो होसलो बद्धा ते पवित्रशास्त्रेरो मतलब शिखाल। 14 इस गल्ली याद रख ज़ैखन बुजुर्गां केरे एककी टोलां तीं पुड़ हथ रखोरे थिये, परमेशेरे तैन अक सन्देश दित्तो कि तैस वरदानेरे बारे मां ज़ोन ज़ै तेने तीं दित्तोरी। तैस वरदानेरे नज़र अनदाज़ न केर। 15 तैन गल्लन सोचतो रा, ते तैन मां अपनू ध्यान लेइतां रख, एन्चरे हर कोई हेरी बटेलो कि तू विश्वासे मां बद्धने लोरोस। 16 इस गल्लरू ध्यान रख कि तू केन्चरे ज़ीतस ते केन्चरे शिखालतस। इसेरो नितीजो ई भोलो कि परमेशेरे इन्साफे मां तेरे ज़िरिये तीं ते तेरे शुन्नेबालन बच्चालो।

5 बुढे मैन्हु न झिड़क पन तैस एन्चरे आदरी सेइं सल्लाह दे जेन्चरे अपने बाजी, एप्पू करां निकड़े मैन्हु एन्चरे सल्लाह दे जेन्चरे अपने निकड़े ढ़लाए। 2 बुढी कुआन्शन सेइं एन्चरे बर्ताव केर जेन्चरे अम्मा

सेइं, ते जवान कुआन्शन सेइं एन्चरे बताव केर जेन्चरे अपने बेइनी सेइं। इन साफ दिले सेइं केर। 3 तैन विधवां केरि आदर केरा, जैन केरो कोई हेरेश करेनेबालो नई तैन केरु ध्यान रख्खा। 4 ते अगर कोन्ची विधवां मट्टां या पोट्लडां या थियोडां भोन, ते तैन पेइलू अपने घरेरे लोकां केरु ध्यान रेखतां परमेशेरी भक्ति केरनि शिखोरी लोडे। ते तैना एन केरतां अपने अम्मा-बाजी ते दादा देदी केरु हक देन, किजोकि इन परमेशेरे पसंद एइते। 5 जै विधवा आए ते तैसेरो ध्यान रखनेबालो कोई नई, तै परमेशेरे पुइ उमीद रखतीए, ते रात दिहैदी बिनती ते प्रार्थनाई मां परमेशेरे करां मद्दत मगतीए। 6 पन जैना विधवां अपने सारो वक्त एशे मां बितैतिन तैना जिसमानी रूपे सेइं त ज़ीतिन पन आत्मिक रूपे सेइं मेरीन। 7 इन गल्लां केरो भी हुक्म दे कि तैना बेइलजाम रान। 8 पन अगर कोई अपने रिशतेदारां केरि ते खास केरतां अपने घरानेरु ध्यान न रख्खे, ते तै विश्वासे करां मुकरोरोए, ते जै विश्वास न केरे तैस करां बुरो बनोरोए। 9 तैस्से विधवारु नव लिखू गाए, जै शठ सालन करां घट न भोए, ते अपने मुन्शे सेइं वफादार रावरी भोए। 10 ते होरे लोक तैसेरे बारे मां ज्ञानते भोन कि तैसां हमेशा रोड़ां कम्मां कियोरन। जेन्चरे कि, तैसां बच्चे रोडे चारे पाले, ते तैना विश्वासी लोक अपने घरे मां आने, जैना सफरे मां थिये, जेन्चरे होरि लोकां केरि सेवा कियोरी भोए, ते तैन लोकां केरि मद्दत कियोरी भोए जैना मुसीबती मां थिये, ते जैसां हर किसमेरां रोड़ां कम्मां कियोरां भोन। 11 पन जवान विधवां केरां नव्वां न लिख, किजोकि जैखन तैन केरि जिसमानी इच्छा तैस वादे करां शक्ति बाली भोती, जै तैनेई विधवा रेइतां मसीहेरी सेवा केरनेरे लेइ कियोरोए, त तैना इला बनानो चैतिन। 12 दुबारां इला केरतां तैना दोषी भोतिन, किजोकि तैनेई अपने पेइलो वादो बरकरार नई रखोरो। 13 एन्चरे तैना घरे-घरे फिरतां आलसी भोनू शिखतिन, ते सिर्फ आलसी नई, पन होरि केरे खलाफ गल्लां केरतिन, ते होरि केरे कम्मन मां दखल देतिन, ते तैना गल्लां ज़ोतिन जैना न लोइन ज़ोरी। 14 एल्लेरेलेइ अवं इन चाताई, कि जवान विधवां इला बनान; ते तैन बच्चे भोन ते घरबार सुमालन, ते दुश्मन बदनाम केरनेरो मौको न देन। 15 किजोकि किछ जवान विधवां कुआन्शेई परमेशेरे करां दूर भोइतां शैताने पत्ती च़लनू शुरू कियोरु। 16 अगर कोन्ची विश्वास केरनेबालेरी टब्बरे मां विधवां भोन, त तैए तैन केरि मद्दत केरे न तैन केरि जिमेवारी कलीसियाई पुइ भोए। तैखन कलीसिया तैस विधवारी मद्दत केरि बटते ज़ेसेरो कोई न भोए। 17 जै बुजुर्ग रोडे चारे कम केरते तै आदर हासिल केरनेरे ते बराबर तनखाएरे काबले, खास केरतां तैना जैना परमेशेरेरु वचन शुनाने, ते शिखालने मां बड़ी मेहनत केरतन। 18 किजोकि पवित्रशास्त्र मां इन लिखोरुए, “कि तू जोट्लोरे दांतेरु आशी न बेन्थाँ,” किजोकि, “मज़दूर अपने मज़दूरो हकदारे।” 19 कोई दोष कोन्ची बुजुर्ग लव गाए, त ज़ांतगर दूई या जादे लोक न ज़ोन कि असेई ए पाप केरतो लावरोए, तांतगर न शुन। 20 जैना लोक पाप केरतन तैन सेब्भी विश्वासी लोकां केरे सामने झिडक, ताके होरे विश्वासी लोक भी डरन। 21 परमेशर ते मसीह यीशु, ते चुनोरे स्वर्गदूत

हाज़र सेमझतां अवं तीं हादयत देताई, ध्यान राए कि तू केन्चरे इन्साफ जल्दी न केरस, ते कोन्चरी तरफदारी न केर। 22 कलीसियारो बुजुर्ग चुनोरे बारे मां जल्दी कथे नई केरनि। ते होरि केरे पापन मां शामिल न भो, अपने आप पवित्र बनोरो रख। 23 अग्रोवं जो पानी न पी, पन अपने पेटेरे ते अपने बार-बार बिमार भोनेरे लेइ थोड़ी-थोड़ी दाछारो रस भी कम्मे मां आन। 24 अवं ज़ोताई कि जल्दी बुजुर्ग नई चुन्ने, किजोकि किछ लोक खुले आम पाप केरतन, इन्साफे करां पेइले भी तैना विश्वासी लोकां केरे सामने दोषी आन। हांलाकि होरि लोकां केरे पाप बांदे न भोन पन बादे मां पिशाने गातन। 25 एन्चरे जैखन लोक रोड़ां कम्मां केरतन, त तैन होरि विश्वासी केरे ज़िरिये हेरु गाते। अगर तैना तैन एककी बारे साफ चारे लेई बटन, आखर तैना तैन पिशानेले।

6 जैना विश्वासी लोक गुलाम आन, तैनेई हर तरीके सेइं अपने मालिकां केरि आदर कियोरी लोडे ताके होरे लोक परमेशेरी ते इश्शे शिक्षारी तुहीन न केरन। 2 ते जैना मालिक विश्वासी भोन, त तैन केरु मसीह पुइ विश्वास केरनेरे वजाई सेइं तैन केरि बराबर इज़्ज़त की गाए, बल्के तैन केरे लेइ होरु भी जादे कम कियोरु लोडे। किजोकि इस सेइं फैइदो नेनेबाले विश्वासी आन ते तैना गुलाम तैन सेइं प्यार केरतन, इन गल्लां केरि शिक्षा दे ते इन होसलो दे कि तैना इन सब केरन। 3 किछ लोक इश्शे शिक्षारी खलाफत केरि बटतन, पन इना यीशु मसीहेरी रोड़ी शिक्षां आन। इना शिक्षां भेक्करी ज़िन्दगी बढेतिन। 4 जै कोई अलग शिक्षालते तै अभिमानी ते तै किछ न समझे। एरे ज़ेरे मैन्हु गैर ज़रूरी मुदां ते लफसां केरो मतलब ज़ान्नेरे लेइ होरन सेइं बेंस ते तर्क केरतन। जैन केरो नितीजो जलन, ते लड़ाई ते तुहीनरी गल्लां, ते बुरी-बुरी शक, 5 ते मैनन् मां बैफैइदी लडैई पैदा भोतिन, ते जैन केरे मन बुरे शक्की सेइं भरोरेन, ते तैना लगातार होरन सेइं बेंस केरतन, ते तैना सेइनी न बटथ कि सच कुने, तैना समझतन परमेशेरे बारे मां शिक्षा देनी कमाई केरनेरो ज़िरियोए। 6 पन इश्शे इन लेइ इन रोडू कि अस तैन केरम ज़ैस सेइं परमेशर खुश भोए ते जैन परमेशर असन देते तैस सेइं अस राजी भोम। 7 ते न असेई दुनियाई मां किछ आनोरु, ते न किछ नेही बटम। 8 ते अगर असन कां किछ खाने पीने ते लाने जो भोए, ते इस्से मां खुश रहम। 9 पन जै धनी भोनो चाए, तैना इन सब पाप केरतां बडे आसान तरीके सेइं थोखो खातन, जेन्चरे जानवर ज़ाले मां फसतन तेन्चरे तैना फसतन। तैना इन केरनू चातन जैन तैन केरे लेइ बेवकूफी ते खतरोए, ते एरी इच्छां तैन बरबाद ते नाश केरनेरे पासे नेतिन। 10 किजोकि पेइसां केरु लालच सेब्भी किसमेरे बुरैइअरु वजाए, किछ लोकेई बले-बले मसीह पुइ विश्वास केरनेरो शारो किजोकि तैना धनी भोनू चाते थिये, ते तैनेई तैस मेनेरो ज़ेरो बडे तरीकन सेइं दुःख झैल्लो जै अपने आपे कोन्ची हथियारे सेइं ज़खमी केरते। 11 पन हे तीमुथियुस, तू परमेशेरो मैनुस, तीं इन गल्लां न लोइन कियोरी, सिर्फ जैन ठीके तैन केरनेरे लेइ हर किसमे सेइं कोशिश केर। एरी ज़िन्दगी जी ज़ैस सेइं परमेशेरी आदर भोती, मसीह पुइ भरोसो केर, होरि लोकन सेइं प्यार केर, मुश्किल वक्ते मां हिम्मत

रख, ते होरि लोकन सेइं नेरमी सेइं बर्ताव केर। 12 जेन्चरे अक रोड़ो सिपाई जंगी मां लडैई मां हार न मन्ने, तेन्चरे तू भी परमेशरे पुड़ भरोसो रखने मां ते तैसेरी गल मन्ने मां हार न मन्ने। ते तैस हमेशारी ज़िन्दगी मज़बूती सेइं ठेमतां रख, जेसेरे लेइ तू परमेशरे कुजावरोस, ते जेसेरे बारे मां तीं बड़े लोकां केरे सामने दिलेरी सेइं ज़ोरू थियूं कि तू मसीह पुड़ विश्वास केरतस। (aiōnios g166) 13 अवं तीं परमेशरे सामने जै सेबन ज़िन्दगी देते, ते मसीह यीशुपरे सामने ज़ोताई, जैने पुन्तियुस पिलातुसेरे सामने रोड़ी गवाही दित्ती, ई हुक्म देताई। 14 जैन किछ परमेशरे तीं केरनेरे लेइ हुक्म दित्तोरो तैन सब किछ पूरू केर, ताके यीशु मसीह जांतगर वापस न एज्जे तीं पुड़ कोई दोष न लेई बटे तू कुन गलत केरने लोरोस। 15 सिर्फ परमेशर तै राज़ोए ज़ै बड़वैयरे काबले, तै महान राज़ो ते महान प्रभुए, तैए मसीहे सही वक्ते पुड़ बांदो केरेलो। 16 सिर्फ तैए हमेशा ज़ींतो रहते, ते तै तैस महिमा बैली लोई मां रहते जैस कां कोई न एज्जी बटे। तैसेरी आदर ते शक्ति हमेशा राली। आमीन। (aiōnios g166) 17 इस दुनियारे दौलतमंदन हुक्म दे, कि तैना घमण्डी न भोन ते चंचल धने पुड़ उमीद न रखन, पन परमेशरे पुड़ ज़ै इश्शे सुखेरे लेइ बड़ू हछ्छू देते। (aiōn g165) 18 ते तैन ज़ो कि तैना अपने पेइंसे रोड़े कम्मां केरे लेइ इस्तेमाल केरन ते भलाई केरने मां दौलतमंद बनन ते हमेशा तियार रान होरन खुल्ले दिले सेइं देनेरे लेइ ज़ो। 19 एन्चरे केरने सेइं तैना अपना रोड़ां कम्मां खज़ानेरे ज़ेरे जमा केरेले, जैना तैन केरे लेइ एजनेबाले वक्ते स्वर्गें मां मज़बूत मुनीयादरां ज़ेरां भोलां। ते तैना तै सच्च्ची ज़िन्दगी हासिल केरेले ज़ै हमेशारे लेइ आए। 20 हे तीमुथियुस इस गल्ली पुड़ ध्यान दे कि जैन परमेशरे तीं केरनेरे लेइ दित्तोरूप तैन्ने केर। दुष्ट ते बेकार गल्लन करां ते तैन शिक्षान करां बेंचता रा, जैना परमेशरेरी सच्च्ची शिक्षां केरि खलाफत केरतन, तैस तैना ज्ञान ज़ोतन पन तैन गलते। 21 किछ लोकेईं इन झूठू ज्ञान कबूल कियोरूप, एन्चरे केरनेरे सेइं तैनेई मसीहेरे सच्च्ची शिक्षान पुड़ विश्वास केरनो शारो। परमेशरेरो अनुग्रह तुसन सेबन पुड़ भोतो राए।

2 तीमुथियुस

1 अवं पौलुस ई चिट्ठी लिखने लोरोई। परमेशरे अवं यीशु मसीहेरो प्रेरित भोनेरे लेइ चुनो, ताके अवं इस सन्देशेरो प्रचार केरि कि परमेशरे यीशु मसीह पुड़ विश्वास केरनेरे जिरिये वादो कियो कि हमेशारी जिन्दगी देलो। 2 अवं ई चिट्ठी तीमुथियुसे लिखने लोरोई, जैन मेरे मठेरू जेरूए, हे तीमुथियुस अवं प्रार्थना केरताई बाजी परमेशर ते इश्शे प्रभु यीशु मसीह तीं अनुग्रह ते दया ते शान्ति देतो राए। 3 जैस परमेशरेंरी सेवा अवं अपने दादे पडदादां केरे रीति पुड़ शुद्ध ज़मीरे सेइं केरताई, तैसेरू शुक्र भोए, कि अवं अपनी प्रार्थनाना मां तीं रात दिहेड़ी याद रखताई। 4 मीं यादे ज़ैखन अस अलग भोने लोरे थिये तैखन तू केन्चरे लेरां देने लोरो थियो, ते तीं सेइं मिलनेरी बड़ी इच्छा रखताई कि ज़ैखन मिली त अवं आनन्दे सेइं भरी गेइ। 5 ते अवं तेरे अम्मा यूनीके ते तेरी नानी लोइसेरो ते सच्चे विश्वास याद केरताई। तेरो विश्वास भी तेरहो आए, ते मीं याकीने तीं मां भी आए। 6 एल्हेरेलेइ अवं तीं याद कराताई, कि तू परमेशरेंरे तैस वरदाने जैन मेरे हथ रखने सेइं तीं मैल्लोरू थियूं चमका। 7 किजोकि परमेशर अस डरपोक नई बनावरे बल्के तैसेरो आत्मा इश्शे दिलन मज़बूत केरते, ते मद्दत केरते कि अस होरि लोकन सेइं प्यार केरम ते ताके आपे कैबू मां रखम। 8 एल्हेरेलेइ होरि लोकन प्रभु यीशुएरे बारे मां ज़ोने करां शरमा ते एल्हेरेलेइ शरमा कि अवं प्रभुएरी सेवा केरनेरे लेइ कैदे मां आई। बल्के तू परमेशरेंरे तैस शक्ति इस्तेमाल केर ते मीं सेइं साथी खुशखबरारे लेइ दुःख झलने मां शामिल भो। 9 परमेशरे असन मुक्ति दिती, ते अस पवित्र जिन्दगी जीनेरे लेइ कुजाए, तैने अस एल्हेरेलेइ नई कुजवरे कि असेईं रोड़ां कम्मां कियां, किजोकि दुनिया बनाने करां पेड़लो परमेशरेंरो ई मकसद थियो कि तै यीशु मसीह इश्शे लेइ इस दुनिया मां भेज़तां असन पुड़ अनुग्रह हिराए। (aiōnios g166) 10 पन हुनी इश्शे मुक्ति देनेबाले यीशु मसीह ओरोए ते तैनी अपनो अनुग्रह हिरावरोए। तैने मौतरी शक्ति नाश की, तैने असन खुशखबरारे जिरिये हमेशारे जिन्दगरी बत हिराई। 11 इस खुशखबरारे लेइ परमेशरे अवं प्रचारक ते प्रेरित ते शिक्षा देनेबालो चुनो। 12 एल्हेरेलेइ अवं कैदखाने मां दुःख भी झैल्लने लोरोई, पन शरमेईं न, किजोकि अवं मसीहे ज़ानताई जैस पुड़ मीं विश्वास कियोरोए, ते मीं याकीने, कि जैन मसीहे दितोरू ज़ांतगर तै वापस न एज्जे तांतगर तै तैसेरी रखवाली केरि बटते। 13 जैना रोड़ी शिक्षां तीं मीं करां शुनोरिन तैन तू मिसालरे रूपे मां रख, इन तू विश्वासे ते प्यारे सेइं साथी केर, किजोकि तू मसीह यीशु सेइं साथी अक भोरस। 14 ते तैस सच्चेरी रखवाली केर, जैन पवित्र आत्मारें जिरिये सेइं तीं सोंफेरू, जै असन मां रहते। 15 तू ज़ानतस, कि आसिया इलाकेरे बड़े विश्वासी लोक ज़ैनेई अवं शारोरोई, जैन मां फूगिलुस ते हिरमुगिनेसे भी अवं शारो। 16 उनेसिफूरुसेरे घराने पुड़ प्रभु दया केरे, किजोकि तै बड़े बार मीं कां अव ते मीं होसलो दितो, ते मीं सेइं कैदखाने मां एजनेरे लेइ न शरमाव। 17 पन ज़ैखन तै रोम नगरे मां अव, त बड़े कोशिश सेइं तोप्तां मीं सेइं मुलाकात केरि। 18 प्रभु

2 तीमुथियुस

इन्साफेरे दिहाड़े अपनि महान दया उनेसिफूरुसे पुड़ हिराए। तू एप्पू रोड़े चारे ज़ानतस कि इफिस्सुस नगरे मां तैनी मेरी केत्री मद्दत की।

2 एल्हेरेलेइ हे मेरे मट्टां तीमुथियुस, तू अपने आपे मज़बूत केर इन ज़ैनतां कि परमेशरे तीं अनुग्रह दितोरू, जै सिर्फ यीशु मसीह सेइं अक भोइतां मैलते। 2 तीं बड़े लोकां केरे सामने जै मसीहेरे सन्देशी शिक्षा मीं करां शुनोरिन। एल्हेरेलेइ अवं चाताई कि तैए सन्देश तू होरि विश्वासी लोकन शिखाल, जैना वफादार भोन ते होरन शिखालनेरे काबल भोन। 3 बिलकुल तेन्चरे जेन्चरे अक सिपाही जंगरे मैदाने मुशिकल हालातन मां सबरी सेइं झैल्लते, तेन्चरे तू भी मुशिकल हालातन मां सबरी सेइं दुःख झैल्ल जेन्चरे अस यीशु मसीहेरे लेइ झैल्लतम। 4 अक सिपाही ज़ैखन फौजी मां नौकी केरते त तै होरि किसमेरू कम न केरे, किजोकि तै अपने भरती केरनेबाले खुश केरनू चाते। 5 फिरी आखाड़े मां घुल्लने बालो अगर कानूनेरे मुताबिक न घुल्ले त तैस ताज न मैल्ले। 6 जै ज़मीनदार मेहनत केरते, फसलरे पेड़ले हिस्सेरो हकदार तैए भोते। 7 जैन अवं ज़ोताई, तैस पुड़ ध्यान दे, ते प्रभु तीं सेबभी गल्लां केरि समझ देलो। 8 लगातार याद रख कि यीशु मसीह कौने, तै दाऊदरे खानदेनी मरां आए, ते परमेशरे तै मुडदन मरां ज़ीतो कियो ते ईए खुशखबरी अवं लोकन शुनाताई। 9 अवं खुशखबरी शुनाताई एल्हेरेलेइ अवं मुजारामेरो ज़ेरो दुःख झैल्लताई, इडी तगर कि कैदे मां आई, पन कोई भी लोकन परमेशरेंरू वचन प्रचार केरने करां न रोकी बटे। 10 एल्हेरेलेइ अवं तैन लोकां केरे फैइदरे लेइ दुःख झल्लताई जैना परमेशरे चुनोरिन, ताके तैना भी यीशु मसीह पुड़ विश्वास केरतां मुक्ति हासिल केरन ते हमेशारी महिमा हासिल केरन। (aiōnios g166) 11 ई गल सच्चे, कि अगर अस तैस सेइं साथी मरे त तैस साथी जीते भी भोमेले। 12 अगर अस तैसेरे वजाई सेइं दुःख झैल्लते रहले, त तैस सेइं साथी राजां केरू जेरू अस भी राज केरमेले, अगर अस तैसेरो इन्कार केरमेले कि अस तैस न ज़ानम, त तै भी इश्शो इन्कार केरेलो। 13 अगर अस मसीह सेइं साथी वफादार न भोम, त तै फिरी भी वफादार बनोरो रालो, किजोकि तै अपने रूभावेरे खलाफ न गेइ बटे। 14 जैना गल्लां मीं तीं सेइं ज़ोरिन तैन तू अपने लोकन बिसरने न दे, ते प्रभुए गवाह रेखतां तैन खबरदार केर, कि लफसन पुड़ बेंस न केरन, जैस सेइं किछ फैइदो न भोए, बल्के शुन्ने बालां केरो बड़ी नुकसान भोते। 15 बड़ी मेहनत केर ताके तू परमेशरेंरे सामने कबूल भोनेरे काबल भोस, तू एरे मैनेरो ज़ेरो भोनेरी कोशिश केर जै अपने कम्मे सेइं वजाई सेइं शरमिनदान न भोए, ते जै सच्चा सन्देश ठीक तरीके सेइं शिखालतो भोए। 16 पन बेकार ते बेवकूफ गल्लन करां दूर राए, किजोकि एरी गल्लां परमेशरे करां दूर केरतिन। 17 ते तैन केरि गल्लां मैनेरे शड़ोरे ज़खेमेरी ज़ेरि फैलतां लोकां केरे विश्वासे नाश केरतिन। ते हुमिनयुस ते फिलेतुस तैन केरे ज़ेरे आन। 18 तैनेई सत्र पुड़ विश्वास केरनो बंद कियो। तैना ज़ोतन परमेशरे पेड़ले मरें विश्वासी लोक हमेशारे जिन्दगरे लेइ जीते कियोरेन। एसेरो नितीजो ई भोते कि किछ लोक मसीहेरी शिक्षाई पुड़ विश्वास केरनो बंद

केरतन। 19 परमेशरेंरे लोक पक्की मुनीयादारे जेरे आन जै हिल्ले न। इस मुनीयादी पुड़ एरे लफस लिखोरन: “प्रभु ज्ञानते तैसेरे लोक कौन आन, ते इन भी कि जैना प्रभुएरी आराधना केरतन तैनेई बुरां कम्मां केरनां बंद कियोरां लोइन।” 20 एककी अमीर घरे मां किछ सोन्नेरे ते चैदरां भांडां भोतन ते लेकडारां ते मितरां भोतन। माघां भांडां खास मौके पुड़ इस्तेमाल केरनेरे लेइ भोतन ते सस्तां रोज इस्तेमाल केरनेरे लेइ भोतन। 21 तेन्चरे विश्वासी लोक जैना अपनो आप एन सैरी बुरी चीजन करां अलग केरे त तै कीमती भांडेरो जेरो भोलो जैन खास मौके पुड़ इस्तेमाल कियू गाते, जेसेरी जिन्दगी पवित्र भोली त तै अपने मालिकेरे इस्तेमाल भोनेरे काबल भोलो। 22 जवैनरी खुवैइशन करां दूर रा, ते जैना मैनु शुद्ध मने सेइं प्रभुएरू नवं घिन्तन, तैन सेइं साथी धार्मिकता, प्यार, ते मेल मलापेरो पीछो केर। 23 अवं फिरी ज़ोताई तू अपनो आप बेवकूफी, ते बेफैइदी गल्लन करां दूर रा, किजोकि तू ज्ञानतस, कि तैन सेइं लड़ाई भोतिन। 24 ते परमेशरेंरो दास लड़ाको न लोड़े, पन सेबन दया केरनेबालो ते परमेशरेंरे वचनेरी रोड़े चारे शिक्षा देनेबालो, ते जैना लोक तैसेरे खलाफ भोन तैन सेइं सबर केरनेबालो लोड़े। 25 ते जैना लोक तैसेरी खलाफत केरन तैन बड़े नेरमी सेइं शिखालेनेबालो लोड़े, भोइ सकते परमेशर तैन लोकां केरि मद्दत केरे कि तैना मन फिरान, ते मसीहेरी सच्च्वाई पिशानन 26 ते एरे लोक दुबारां फिरी साफ तरीके सेइं सोचनेरे काबल भोले ते शैतानेरे धोखे करां जै ज़ालेरे जेरोए बचेले। शैताने तैना फासवरे थिये कि जैन तै चाते तैना तैन करां कराए।

3 ध्यान दे अवं हुन्ना कुन जोने लोरोई, कि दुनियारे आखरी दिहाइन मां बुरो वक्त एजनोंए। 2 किजोकि लोक सिर्फ अपने आपे सेइं प्यार केरेले, दौलतरे लालची, बडकां मारनेबाले, अभिमानी, होरन बेइज्जत केरनेबाले, अम्मा-बैपू केरू ज़ॉन न शुन्ने बाले, होरि केरू शुक्र न केरनेबाले, अपवित्र, 3 होरन सेइं प्यार न केरनेबाले, माफ़ न केरनेबाले, दोष लाने बाले, अपनि इच्छान पुड़ कैबू न केरनेबाले, सखत, सच्च्चे सेइं नफरत केरनेबाले। 4 धोखो देनेबाले, ठीठ, ते अभिमानी ते परमेशरेंरे नई बल्के एशेरे चानेबाले भोले 5 तैना भक्तकू रूप त बनाले पन तैस शक्ति न मन्नेले जै तैन भक्त बनाथी, एरे जेरे लोकन सेइं संगती न रेखां। 6 एन्ने मां तैना लोकन, जैना लोकां केरे घरन मां गेइतां बेवकूफ कुआन्शन अपने वशे मां केरतन, जैन केरे मन पापे सेइं देबोइतां हर किसमेरी खुवैइशन मां आन। 7 ते हमेशा नर्वीं-नर्वीं गल्लां त शिखती रैतिन, पन तैना मसीहेरी सच्च्ची शिक्षाई कथे न सेमझी बटन। 8 इना झूठे उस्ताद मसीहेरे सच्च्चे सन्देशेरे खलाफत केरतन जेन्चरे यन्नेस ते यन्नेसे मूसेरी खलाफत कियोरी थी। तैन केरे मन बुरेन ते तैन केरो मसीह पुड़ विश्वास सच्च्चो नई। 9 तैन केरि कामयाबी सिर्फ थोड़े वक्तेरीए, किजोकि जेन्चरे लोकेई यन्नेस ते यन्नेस पिशानोरे थिये कि तैना बेवकूफन। तेन्चरे हर कोई इन भी पिशानेलो कि इना भी बेवकूफन। 10 पन हे तीमुथियुस तू एप्पू रोड़े चारे ज्ञान कि अवं शिखालताई, ते अवं केन्चरे जीताई, ते मेरो कुन मकसदे, ते अवं कुन विश्वास केरताई। तू ज्ञानतस अवं सबर केरतो

ओरोई ते सेबमी किसमेरे लोकन सेइं प्यार केरतो ओरोई, मीं मुसीबतां झैल्ली ते लोकेई अवं स्तव कि मीं बड़ी दुःख भोए, 11 तू तैन भयानक गल्लां केरे बारे मां ज्ञानतस जैना लोकेई मीं सेइं अन्ताकिया ते इकुनियुम ते लुस्त्रा नगरन मां की, ते मीं तैडी केरो स्तव झैल्लो। पन प्रभुए अवं तैन सेबन मरां छुटव। 12 जै कोई तैन केरनू चाते जैस सेइं परमेशरे खुश भोते ते यीशु मसीह पुड़ विश्वास केरते ते स्तव गानोए। 13 पन दुष्ट लोक ते तैना धोखो देनेबाले होरि भी बुरी चीजां केरेले। तैना लोकन धोखो देले ते एप्पू भी होरन करां धोखो खाले। 14 पन जैन तीं असन करां शिखोरूए तैस पुड़ लगगार विश्वास केर, ते तीं पूरू याकीन किजोकि तू असन ज्ञानतस ते असन पुड़ भरोसो केरि बटतस जैनेई तीं इना सैरी गल्लां शिखैली। 15 ते बचपनेरो तू पवित्रशास्त्रेरो ज्ञाने बालोस, जैन तेरी इन समझनेरे लेइ मद्दत केरते, कि जैखन तू यीशु मसीह पुड़ विश्वास केरतस परमेशर तीं मुक्ति देते। 16 सारू पवित्रशास्त्र परमेशरेंरे अगवैई सेइं लिखोरू, ते इन लोकन शिखालने लेइ मद्दतगारे, तैन जोनेरे लेइ कि जैन तैनेई कियू तैन गलते, तैन केरि गेलती सुधारनेरे लेइ, ते तैन केरनेरे लेइ शिखालनेरे लेइ जैन सही आए। 17 ताके परमेशरेंरो मैनु हर किसमेरां रोड़ां कम्मां केरनेरे लेइ तियार भोए।

4 जैखन मसीह यीशु राजेरो जेरो राज केरने एज्जेलो त तै जीते ते जैना मरेंन, लोकां केरो इन्साफ केरेलो, अवं तीं परमेशरे ते मसीहे गवाह रेखतां हुकम देताई। 2 कि तू परमेशेरू वचन प्रचार केर, वक्त बे वक्ते तियार रा, तू लोकन जैना बुरां कम्मां तैनेई कियां हिरा, तैन केरे पापां केरे लेइ तैन झिड़क पन तैन होसलो भी दे ते तैन सबरी सेइं शिखाल। 3 किजोकि एरो वक्त एजनोंए, कि लोक रोड़ी शिक्षा न शुन्नी चाले, पन तैना अपने मेज्जीं पुड़ चलनू चाले ते तैना अपने लेइ बड़े उस्ताद तोपेले जैना तैन सेइं तैन जोन जैन तैना शुन्नु चातन। 4 तैना तैन करां शुन्नु न चाले जैना परमेशेरू सच्च्चू वचन शुनातन पन तैना झूठी कहैनी शुन्नी चाले (जैना मैनु केरि बनेवरिन)। 5 पन तू अपनो आप कैबू मां रख चाए किछ भी की न भोए, इस मां तीं जैना भी दुःख भी झैल्लने पेन त झल, खुशखबरी शुनानेरे लेइ बड़ी प्रचार केर, ते जैन कम परमेशरे तीं केरनेरे लेइ दितोरू तैन पूरे केर। 6 अवं इना हुकम तीं देताई किजोकि मेरी जिन्दगी ते परमेशरेंरे लेइ कम खतम भोवरूए किजोकि अवं ज्ञानताई अवं जल्दी मरेलो। 7 मीं जंगी मां रोड़ो सिपेहेरे जेरे जै लड़ाई केरने मां कथी हार न मन्ने, तू भी मसीहेरे लेइ बड़ी मेहनत केरनि कथे हिम्मत न हार, मीं तैन कम पूरू कियू जैन मसीह यीशुए मीं केरनेरे लेइ दितोरू थियू, मीं वफादैरी सेइं खुशखबरी प्रचार की। 8 हुनी, प्रभुएरे मेरे लेइ स्वर्ग मां इनाम रखेरू किजोकि मीं तैस खुश केरनेबाली जिन्दगी जीयोरीए। प्रभु जै धर्मी इन्साफ केरनेबालोए मीं इन इनाम तेइस देलो जेइस ते वापस इन्साफ केरनेरे लेइ एज्जेलो। पन इन इनाम सिर्फ मेरे लेइ नई, पन तैन सेबमी केरे लेइ भी आए, जैना तैसेरे एजनेरी बड़ी इच्छा रखतन। 9 मीं कां जल्दी एजनेरी कोशिश केर। 10 किजोकि देमासे इस दुनियारी चीजन सेइं प्यार केरतां अवं शारो, ते ते थिस्सलुनीके नगरे जो

चलो जेव, ते क्रेसकेंस गलातिया इलाके जो जेव ते तीतुस दलमतिया
 इलाके जो चलो जेव। (aiōn g165) 11 सिर्फ लूका मीं सेइं साथीए, ज़ैखन
 तू एजस त मरकुसे भी एप्पू सेइं साथी एना, किजोकि तै इडी मेरे मद्दत
 केरनेरे काबले। 12 तुखिकुस मीं इफिसुस नगरे जो भेजोरोए। 13 ज़ैखन
 तू एजस त तै चोगो एना ज़ै मीं त्रोआस नगरे मां मरकुसेरे घरे रख्खोरोए।
 ते मेरे चर्मपत्र भी एना, खास केरतां तै ज़ै छेल्ली केरे खेडू सेइं बनोरोए।
 14 सिकन्दर ताम्बेरू कम केरनेबाले मीं बड़े बारे दुःख दित्तोरोए, प्रभु तैस
 तैसेरे बुरे कम्मां केरे मुताबिक बदलो देलो। 15 तू भी तैस करां खबरदार
 रा, किजोकि तैने इश्शे शिक्षारी बड़ी खलाफत की ज़ै मसीहेरे बारे मां
 आए। 16 ज़ैखन पेइले बार अवं आदालती मां अपनो आप बचाव केरनेरे
 लेइ जोरो थियो त कोई भी मीं सेइं साथी न थियो। पन तैना सारे मीं
 शैरतां चले जे, परमेशर इन तैन केरे खलाफ न गने। अवं प्रार्थना केरताईं
 परमेशर तैन हछु माफ़ केरे। 17 पन प्रभु मेरो मद्दतगार राव, तैने मीं
 हिम्मत दिती, ते अवं यीशु मसीहेरी खुशखबरी शुनानेरे काबल भोव कि
 सारे गैर कौमां केरे लोक शुन्न, ते तैने अवं मौती करां एन्घरे बचाव
 जेन्घरे शेरे करां। 18 ते प्रभु मीं हर एक्की बुरे हमले करां बघालो ते
 अपने स्वर्गे राज़े मां हफाज़ती सेइं पुजालो, सारे महिमा हमेशा-हमेशा
 परमेशरेरी भोती राए। आमीन। (aiōn g165) 19 मेरू नमस्कार प्रिस्का ते
 तैसेरे घरे बाले अक्विला ते कने उनेसिफुरूसेरे घराने दे। 20 इरास्तुस
 कुरिन्थुस नगरे मां रावरोए, ते त्रुफिमस मीं मीलेतुस नगरे मां बिमार
 शारोरोए। 21 हीवतड़ेरे पेइले एजनेरी कोशिश केर, ते यूबूलुस ते पूदेस ते
 लीनुस ते क्लौदिया, ते इठेरे सारे विश्वासी लोकेईं नमस्कार भेजेरू आए।
 22 अवं प्रार्थना केरताईं प्रभु तीं सेइं साथी भोए, ते तैसेरो अनुग्रह तुसन
 सेब्भन पुड भोतो राए।

तीतुस

1 अवं पौलुस ई चिट्ठी लिखने लोरोई। अवं परमेशरेरो दास ते यीशु मसीहेरो प्रेरित आई। अवं परमेशरेरे चुनोरे लोकां केरे विश्वासे मज़बूत केरनेरे लेइ ते तैन केरि मद्दत केरनेरे लेइ चुनोरोई, कि तैना यीशु मसीहेरी सच्ची शिक्षा ज्ञानन ताके तैना एरी ज़िन्दगी जीन ज़ैस सेइं परमेशर खुश भोए। 2 तैसेरो नितीजो ई भोए कि तैना परमेशरेरे सेइं हमेशा रानेरी उमीद रखन, परमेशर ज़ै कद्वे झूठ न ज़ोए, तैने दुनिया बनाने करां पेइलो वादो कियोरो थियो, कि तैसेरे लोक हमेशारे लेइ जीयेले। (aiōnios g166)

3 ते हुनी परमेशरे ठीक वक्ते पुइ ई खुशखबरी असन पुइ बांदी की ज़ै अस सेबन प्रचार केरतम। इश्शे मुक्ति देनेबाले परमेशरे ई ज़िमेवारी मीं दितोरीए ते तैसेरेलेइ इन कम केरनेरे लेइ मीं हुक्म दितोरोए। 4 अवं ई चिट्ठी तीतुसे जो लिखने लोरोई। तू मेरे मट्टे ज़ेरू आस, किजोकि ज़ेन्चरे अवं विश्वास केरताई तेन्चरे तू भी विश्वास केरतस। अवं प्रार्थना केरताई इश्शो बाजी परमेशर ते इश्शो मुक्ति देनेबालो प्रभु यीशु मसीह तीं अनुग्रह त कने शान्ति देतो राए। 5 मीं तू एल्हेरेलेइ क्रेते टैपू मां शारोरो थियो, ताके तू तैडी इश्शु कम पूरू केरस, ते होरि नगरन मां बुजुर्ग चुन ज़ेन्चरे तीं केरनेरो हुक्म दितोरो थियो। 6 लीडर बेइलज़ाम लोड़े ते अपने कुआन्शी सेइं वफादार लोड़े, ज़ैन केरे बच्चे विश्वासी भोन ते बुरो बर्ताव केरनेबाले न भोन ते तैना अपने अम्मा बाजी केरो हुक्म मन्नेबाले भोन। 7 किजोकि रखवालो परमेशरेरो भण्डारी भोने वजाई सेइं बेइलज़ाम लोड़े, न अपनि च़लानेबालो, न सेरकलो, न शाराबी, न लडाको, ते न पेइंसां केरो लालची लोड़े। 8 पन मेहमानां केरि आदर केरनेबालो, होरि केरि भलाई केरनेबालो, अपने आपे पुइ कैबू केरनेबालो, धरमात्मा, पवित्र ते अपने इच्छान कैबू केरनेबालो लोड़े। 9 ते तै यीशु मसीहेरे तैस सन्देशे पुइ ज़ै भरोसेरे काबले मज़बूती सेइं विश्वास केरनेबालो लोड़े, ज़ै असेई तैस शिखालोरोए। ताके तै होरन सही शिक्षाई मन्नेरे लेइ होसलो देइ बटे ते ज़ैना गलत भोन तैन सुधेरी बटे। 10 अवं इन एल्हेरेलेइ ज़ोताई, किजोकि बड़े लोक सही शिक्षारी खलाफ केरेले, ज़ैना बेकार गल्लां शिखालतन ते होरन थोखो देतन। इन खास केरतां किछ यहूदी केरे लेइ सन्न आए ज़ैना विश्वासी बनोरेन (इना तैना लोकन ज़ैना चातन कि सारे मसीही लोक यहूदी केरे कानूने मनन, खास केरतां खतनेरे कानूने)। 11 एन लोकन शिखालनेरी अज़ाज़त न दे, किजोकि ज़ैखन तैना इन गल्लन शिखालतन, ज़ैना तैनेई शिखैलोरी लोइन, त तै सारे टबरां केरे विश्वासे बरबाद केरतन। तैना इन एल्हेरेलेइ केरतन कि पेइंसो कमेई बटन। 12 अक मैन्हु क्रेत टैपेरो आए ज़ैस जो तैना अक्लमन्द ज़ोतन तैने ज़ोरूए, “क्रेतेरे लोक हमेशा झूठे, जंगली जानवरां केरो ज़ेरो बर्ताव केरनेबाले, तैना आलसी ते हमेशा अढंगू खानेबाले भोतन।” 13 इन गल्लां क्रेतेरे लोकां केरे बारे मां सच्ची आन। एल्हेरेलेइ तैन खबरदार केर, कि तैना यीशु मसीहेरी शिक्षाई पुइ विश्वास केरन। 14 ते यहूदी केरि बनोवरी कहैनी ते ज़ैना लोक सच्चे करां दूर भोरेन तैन केरे हुक्म शुन्ने

बंद केरा। 15 ज़ैन लोकां केरे मने मां पापी खियाल नई तैन केरे लेइ रीतेरे मुताबिक सब किछ शुद्धे। पन तैन लोकां केरे लेइ ज़ैना बुरेन ते यीशु मसीह पुइ विश्वास न केरन तैन केरे लेइ किछ भी शुद्ध नई ज़ैन तैना केरतन। 16 तैना झूठे उस्ताद ज़ोतन कि अस परमेशरे ज़ानतम, पन तैन केरां कम्मां साफ तरीके सेइं हिरातन कि तैना तैस न ज़ानन, किजोकि परमेशर तैन सेइं नफरत केरते ते तैना हुक्म न मन्नेबालेन, ते किछ भी रोड़ केरनेरे काबल नई।

2 पन हे तीतुस तू विश्वासी लोकन तैन शिखाल ज़ैन यीशु मसीहेरे बारे मां सही शिक्षारे मुताबिक ठीके। 2 बुड़े मड़दन शिखाल कि अपने आपे पुइ कैबू केरनेबाले बनन, ते तैनेई एरो बर्ताव केरन कि लोक तैन केरि आदर केरन, ते समझदारी सेइं बर्ताव केरनेबाले भोन। ते तैना परमेशरेरे पुइ मज़बूती सेइं विश्वास केरनेबाले बनन, होरन सेइं प्यार केरनेबाले ते सबर केरनेबाले बनन। 3 एन्चरे बुड्डी कुआन्शन शिखाल कि एरी ज़िन्दगी जीन ज़ैस सेइं परमेशरेरी आदर भोए। तैना होरन पुइ दोष लाने बैली, ते पीने बैली नई, पन ते तैन ज़ो कि तैन होरन तैन शिखालन ज़ैन रोड़ूए। 4 ताके तैना जवान कुआन्शां केरे लेइ मिसाल भोन ते तैन शिखालनेरे काबल भोन कि अपने मुन्शन ते बच्चन सेइं केन्चरे प्यार केरन। 5 ते तैना अपने आपे कैबू केरनेबैली, अपने मुन्शां केरे लेइ वफादार, ते घरेरो कारोबार केरनेबैली, भलाई केरनेबैली ते अपने-अपने मुन्शां केरे अधीन राने बैली भोन, ताके परमेशरेरे वचनेरी तुहीन न भोए। 6 एन्चरे जवान मड़दन भी अक्लमन्द भोइतां जीनेरे लेइ समझा। 7 हर गल्ली मां तू हमेशा अपनो आप अक मिसाल बना, ताके तैन भी एन्चरे केरन। ज़ैखन तू परमेशरेरे बारे मां शिखालस त रोड़े मकसदे सेइं शिखाल। एन्चरे लोक तेरी आदर केरेले। 8 ते ज़ैन सच्चे तैन शिखाल ते ज़ेसेरी आलोचना न भोए, ताके तेरे दुश्मन छिथोन, किजोकि फिरी कोई बुराई नई भोनी ज़ेसेरी तैना खलाफ केरि बटन। 9 ज़ैना विश्वासी गुलाम आन तैन शिखाल कि हमेशा अपने मालिकां केरि गल मनन। तैन ज़ो कि तैन केरन ज़ैस सेइं तैन केरे मालिक खुश भोन ते कम्मेरे बारे मां शिकायत न केरन। 10 चोरी न केरन, पन इन साबत केरन कि तैना हमेशा ईमानदारन, ताके लोक तैन केरे रोड़े बर्ताव हेरन ते ज़ैन तैना केरतन तैन लोकां केरे लेइ, इश्शे मुक्ति देनेबाले परमेशरेरो सन्देश शुन्नेरी वजा भोली। 11 किजोकि परमेशरे सेबमी लोकन मुक्ति देनेरे लेइ अक बत देइतां अपनो अनुग्रह हिराव। 12 परमेशर अपने अनुग्रहेरे ज़िरिये असन शिखालते, परमेशर असन शिखालते कि अस तेरहो बर्ताव न केरम ज़ैस सेइं तै खुश भोए। ज़ेन्चरे गैर विश्वासी चीज़ां केरू लालच केरतन तुस एरू न केरा, तुस ज़ांतगर इस दुनियाई मां आथ, अक्लमन्द ते धर्मी लोकां केरो ज़ेरो ते एरो ज़ेरो बर्ताव केरा ज़ैस सेइं परमेशर खुश भोते। (aiōn g165) 13 अस तैस अनोखी दिहेइरी उमीदी मां रातम, कि ज़ेइस इश्शो महान परमेशर ते मुक्ति देनेबाले यीशु मसीह महिमाई सेइं साथी वापस एज्जेलो। 14 एने यीशु मसीहे अपनो आप इश्शे लेइ

बलिदान कियो ताके असन पापेरे शेक्ति करां छुटकारो दे, ताके अस शुद्ध भोम ते तैसेरे अपने लोक बनम जैना रोड़ां केरतन। 15 इना गल्लां शिखाल ते अपनो पूरो अधिकार इस्तेमाल केर, ते अपने शुन्नेबालन होसलो दे ते झिड़क दे। कोई तीं घटया न समझे।

3 विश्वासी लोकन याद करा, कि हाकिमां ते अधिकेरी केरे अधीन रान, ते तैन केरो हुक्म मन्न, ते हमेशा रोड़ो केरनेरे लेइ तियार रान। 2 कोन्ची बदनाम न केरन, लड़ाके न भोन, पन नर्म सुभावेरे भोन, ते सेबभी मैनु सेइं साथी बेड़ि नेरमी सेइं रान। 3 किजोकि अस भी पेइले बेअक्ल ते हुक्म न मन्नेबाले थिये ते लोकेईं असन धोखो दित्तोरो थियो। बडे खुवैइशां ते एशेरे केरनेरे गुलाम थिये, इशशी ज़िन्दगी दुष्टे ते जलनी सेइं भेरोरी थी ते एक्की होरि सेइं नफरत केरते थिये। 4 पन फिर भी इशशे मुक्ति देनेबाले परमेशेरे असन लोकन पुड़ दया ते प्यार हिराव। 5 तैन अस इशशे पापां केरि सज़ाई करां बचाए एल्हेरेलेइ नई कि असेईं रोड़ां कम्मां कियोरां थियां, पन तैसेरे दयारे वजाई सेइं। तैन इशशे पाप धोइतां असन नव्वू ज़म दित्तू ते पवित्र आत्मा देनेरे ज़िरिये असन नव्वीं ज़िन्दगी दित्ती। 6 परमेशर पवित्र असन मुफते मां दित्तो कि इशशे ज़िन्दगी मां शेक्ति सेइं कम केरे, किजोकि यीशु मसीह इशशो मुक्ति देनेबालो बन्नेरे लेइ इशशे पापां केरे लेइ मरो। 7 परमेशरे इन कियू ताके तै अपने अनुग्रहे सेइं अपने नज़री मां धर्मी बनाए, ताके अस तैसेरे बच्चे बनम ते पूरे तरीके सेइं हमेशा तैस सेइं साथी रानेरे उमीदी सेइं केरम। (aiōnios g166)

8 ई गल सज़े, अवं चाताई कि तू इन शिक्षान पुड़ ज़ोर दे ताके सब ज़ैना परमेशरे पुड़ भरोसो रखतन तै अपनो आप रोड़ू केरनेरे लेइ सोंफेले, इना शिक्षां सेबभी केरे लेइ रोड़ी ते फैइदामंद आन। 9 पन बेवकूफी बेस ते पूर्वजां केरे नव्वां केरे बारे मां, ते लड़ाई ते तैन ते मूसेरे कानूनेरे बारे मां लड़ाई करां दूर रा, किजोकि तैन सब बेकार ते बैफैइदू आए। 10 ज़ैना लोक कलीसियाई मां फिरके बनानेरी वजा बनतन, कम से कम टूईं बार तैन खबरदार केर कि तैना एन न केरन, तैट्टां बाद अपनो वक्त तैन पत्ती बर्बाद न केर। 11 तुस ज़रूर ज़ैनी बटतथ एरो ज़ेरो मैन्हु ज़ैनी बुज़झतां गलत बत्तां च़लते, ते तैन अपना बुरां कम्मां इन साबत केरतन कि तैना पापिन। 12 अवं अरतिमास या तुखिकुसे तुसन कां भेज़नेरे लेइ बिस्तार बनाने लोरोईं, ज़ैखन तैन मरां अक तीं कां पुज़ते त निकुपुलिस नगरे मां मीं सेइं मिलनेरी पूरी कोशिश केर, किजोकि मीं तैड़ीए हिवतड़ो कटनो थापोरोए। 13 ज़ैखन जेनास शास्त्री ते अपुल्लोस तैट्टां गानेरे लेइ तियार भोन त ज़ेन्नू भोइ बटे तैन केरि मद्दत केर, ताके तैन कोन्ची भी चीज़री घटी न भोए। 14 सिर्फ इन नई, बल्के तू विश्वासी लोकन शिक्षा देतो रा, कि तैना रोड़ां कम्मां केरन ताके तैन लोकां केरि मद्दत केरन ज़ैन ज़रूरत आए। इस सेइं तैन केरि मद्दत भोली कि तैना एक्की मकसदे सेइं ज़िन्दगी ज़ींन। 15 सारे विश्वासी लोक ज़ैना मीं सेइं साथी आन तींजो नमस्कार ज़ोतन। इशशे विश्वासी सैथी लोकन ज़ैना असन सेइं प्यार केरतन तैन नमस्कार। अवं प्रार्थना केरताई प्रभु तुसन सेबभन पुड़ अनुग्रह केरतो राए।

फिलेमोन

1 अवं पौलुस ई चिट्ठी लिखने लोरोई। अवं कैदे मां आई किजोकि अवं यीशु मसीहे बारे मां प्रचार केरताई। हे फिलेमोन तीं इशशे ढूला तीमुथियुस ते मेरे तरफां नमस्कार। तू इशशो ढूलारो दोस्तस आस ते जेन्चरे अस मसीहेरे लेइ कम केरतम तेन्चरे तू भी केरतस। 2 अवं इशशी विश्वासी बेइन अफकिया ते इशशे सैथी अरखिप्पुस जै सिपेहेरे जेरो प्रभुएरी सेवा केरते, ते तैन कलीसियारे लोक जैना तेरे घरे मां अकोठे भोतन, तैन भी लिखने लोरोई, 3 अवं प्रार्थना केरताई, इशशे बाजी परमेशर ते प्रभु यीशु मसीह तुसन पुड़ अनुग्रह केरे ते तुसन शान्ति दे। 4 अवं जैखन भी तेरे लेइ प्रार्थना केरताई, तेरे लेइ अवं परमेशेरू शुक्र केरताई। 5 किजोकि मीं प्रभु यीशु मां तेरे विश्वासेरे बारे मां ते परमेशेरे लोकां केरे लेइ तेरे प्यारे बारे मां शूनु। 6 अवं प्रार्थना केरताई तेरी संगती जै विश्वासी लोकन सेइं साथीए, तुशशे तैन रोड़ि चीजां केरे ज्ञानेरे जिरिये जैना परमेशेरे दित्तोरिन बढ्ती गिए। इन मसीहेरे महिमारे लेइ भोतू राए। 7 किजोकि हे ढूला, अवं तेरे प्यारे सेइं जै तू मीं केरतस बड़ो खुश आई, ते मीं बड़ो होसलो भोव, एल्हेरेलेइ कि तेरे प्यारेरे जिरिये होरि परमेशेरे लोकन भी होसलो मैल्लो। 8 अवं तीं किछ केरनेरे लेइ पुछताई जैन तीं कियोरू लोड़े। अवं मसीहेरो दित्तोरे अधिकारे इस्तेमाल केरतां इन केरनेरे लेइ हुकम देइ बटतो थियो, पन अवं न केरेलो। इसेरे बदले मां, अवं बल्ले चारे ज़ोताई कि तू इन केर, किजोकि अस एक्की होरि सेइं ते परमेशेरे लोकन सेइं प्यार केरतम। अवं पौलुस हुनी सियाने मैनेरे रूपे मां तीं पुछतई, अवं लोकेई कैदे मां बंद कियोरोई किजोकि अवं यीशु मसीहेरी सेवा केरताई। 10 अवं उनेसिमुसेरे लेइ मिनत केरताई जैन मेरे लेइ मट्टेरू जेरूए। तैन मसीह मां मेरू मट्टू इडी कैदखाने मां बनू। 11 तै बीतोरे वक्ते मां तेरे लेइ केन्ची कम्मरो न थियो, पन हुनी तेरे त कने मेरे दुइयां केरे बड़े कम्मरोए। 12 अवं उनेसिमुसे तीं कां वापस भेजने लोरोई, तैस सेइं अवं पूरे दिले सेइं प्यार केरताई। 13 अवं जांतगर खुशखबरी प्रचार केरनेरे वजाई कैदखाने मां आई तांतगर तैस अपनि मद्दत केरनेरे लेइ इडी एप्पू सेइं साथी रखनो चातो थियो। ताके तै तेरे ठैरी मेरी मद्दत केरे, किजोकि अवं ज्ञानताई तू मेरी मद्दत केरनि चातस। 14 पन मीं तेरी मेज्जीं बगैर किछ भी केरनू न चाव, अवं चाताई तू ई मेरी मद्दत केर, किजोकि तू इन केरनेरे लेइ खुश आस ते एल्हेरेलेइ नई कि अवं इन केरनेरे लेइ दबाव बनाने लोरोई। 15 शैइद परमेशेरे उनेसिमुस एल्हेरेलेइ तीं करां नशशने दित्तो, ताके तै मसीह पुड़ विश्वास केरे, ते तैसेरो नितीजो ई भोए कि तै हमेशा तीं सेइं साथी राए। (aiōnios g166) 16 पन हुनी तै तेरो गुलाम नई, बल्के गुलामे करां भी बेद्धतां आए। तै हुनी तेरो ढूलारो विश्वासी ढूला आए। अवं तैस सेइं बड़ो प्यार केरताई, पन तीं तैस अपने गुलामेरे रूपे मां होरो भी प्यार कियोरो लोड़े किजोकि तै मसीह मां अक ढूलाए। 17 अगर तू मीं शामिल समझतस, त जैखन उनेसिमुस वापस तीं कां एज्जे त तैस एन्चरे कबूल केर जेन्चरे मीं। 18 ते अगर तैने किछ

तेरो नुकसान कियोरोए, या तेरे किछ पेइंसां केरो कर्जो भोए त अवं तैसेरे बदले देइलो। 19 अवं पौलुस अपने हथ्यन सेइं लिखताई, कि अवं तीं एप्पू वापस देइलो, तू इन पेइलू ज्ञानतस, अगर मीं तेरी मद्दत न भोथी कियोरी त तीं अपने आपे सेइं न भोथू मैल्लेरू, मेरो कर्जो जै तीं पुड़े तै तेरी अपनि ज़िन्दगी आए। 20 हे मेरे ढूलारे दोस्त, साथी विश्वासी भोनेरे वजाई सेइं इन मेरे लेइ केर ते मसीह मां मीं खुश केर। 21 मीं ई चिट्ठी लिखोरीए, किजोकि मीं याकीन कि जैन केरनेरे लेइ ज़ोरू तैन तू केरेलो। हकीकति मां अवं ज्ञानताई तू तैस करां भी बडू जादे केरेलो, जैन केरनेरे लेइ मीं ज़ोरूए। 22 ते अक होरि गल, तू अपने घरे मां मेरे लेइ अक कमरो तियार केर। किजोकि मीं उमीदे परमेशर तुशशे प्रार्थनां केरो जुवाब देलो ते तीं कां फिरी एजने देलो। 23 इपफ्रास, जै यीशु मसीहेरी खुशखबरी प्रचार केरनेरे वजाई सेइं मीं साथी कैदीए ते तीं नमस्कार ज़ोते। 24 ते मरकुस ते अरिस्तर्खुस ते देमास ते लूका जैना प्रभुएरू कम मीं सेइं साथी केरतन तींजो नमस्कार ज़ोतन। 25 इशशे प्रभु यीशु मसीहेरो अनुग्रह तुसन पुड़ भोतो राए। आमीन।

इब्रानियों

1 परमेश्वरे बड़े पेड़ले इश्शे दादे पड़दादन सेइं बड़े बारे ते अलग-अलग किसमे सेइं नेबी केरे ज़िरिये गल्लां की। **2** पन इन आखरी दिहाइन मां परमेश्वरे असन सेइं अपने मट्टेरे ज़िरिये गल्लां की, जैन तैनी सैरी चीजां केरु बारस ठहराव ते तैसेरे ज़िरिये परमेश्वरे सारी स्रष्टि बनाई। (aiōn g165) **3** मट्टू परमेश्वरेरी महिमारू प्रकाश आए, ते तैन हर किसमे सेइं परमेश्वरेरू जेरू आए, तैन्ने सैरी चीजन अपने शक्तेरे वचनेरे ज़िरिये सेइं संभालते, तैन्ने लोकन पापन करां शुद्ध केरतां स्वर्गें मां परमेश्वरेरे महिमा मां देइने पासे बिश्शू। **4** एन केरने सेइं परमेश्वरे मट्टू, स्वर्गदूतन करां महान कियूं, ते जैन नवं तैस दित्तू जेवं तैन स्वर्गदूतन करां महान आए। **5** किजोकि परमेश्वरे स्वर्गदूतन मरां कोन्वी सेइं कथे नईं ज़ोरू, “तू मेरू मट्टू आस; अज़ अवं इन बांदू केरताई तू मेरू मट्टू आस” ते फिरी परमेश्वरे केन्वी स्वर्गदूते सेइं इन नईं ज़ोरू, “अवं तैसेरो बाजी भोइलो, ते तैन मेरू मट्टू भोलू” **6** ते फिरी परमेश्वरे अपने पेड़ले मट्टे दुनियाई मां भेजने करां पेड़लू, इन ज़ोवं, “परमेश्वरेरे सब स्वर्गदूत तैस कां मथ्यो टेकन।” **7** परमेश्वर स्वर्गदूतां केरे बारे मां इन ज़ोते, “तै अपने स्वर्गदूतन हवारे ज़ेरे बनाते, ते अपने सेवकन अगारे लपारे ज़ेरे बनाते।” **8** पन परमेश्वरे अपने मट्टेरे बारे मां ज़ोते, ‘हे परमेश्वर तेरू राज़ सदा रालू, ते तू इन्साफे सेइं राज़ केरेलो। (aiōn g165) **9** जैन रोडूए तैस केरने सेइं तू प्यार केरतस ते जैन गलते तैन केरने सेइं नफरत केरतस; एल्हेरेलेइ तेरे परमेश्वरे तू चुनोरोस ते तेरे सैथन करां जादे तीं आदर ते आनन्द दित्तोरोए।’ **10** ते पवित्रशास्त्र इन भी ज़ोते, ‘हे प्रभु, तीं शुरू मां दुनियारी रचना की,’ ते जैन किछ अम्बरे मां आए तैन तीं बनावं। **11** तैन सब किछ खतम भोइ गानूए; पन तू हमेशा रालो; ते तैन सब किछ लिगडां केरू जेरू पुरानू भोइ गालू। **12** ते तू तैन चादरारू ज़ेरो बनालो, ते तैन लिगडां केरू जेरू बेदलोई गालू; पन तू कथे न बेदलोस; ते तेरी ज़िन्दगी कधी खतम न भोली। **13** ते परमेश्वरे स्वर्गदूतन मरां केस सेइं किताली ज़ोवं, ‘तू मेरे देइने पासे आदरारे ठैरी बिश,’ ते अवं तेरे दुश्मन तेरे अधीन केरेलो।’ **14** तैना सब स्वर्गदूत सिर्फ परमेश्वरेरे सेवक आन; परमेश्वरे तैना तैन लोकां केरि हिफाज़त केरनेरे लेइ भेजोरेन जैन मुक्ति मैलोरीए।

2 एल्हेरेलेइ, जैना गल्लां असेईं शुनोरिन, तैन पुड़ असेईं होरो भी मन लेइतां ध्यान कियेरू लोडे, कोस्कोई एरू न भोए, कि असां टेपलोइतां तैन करां दूर चले गाम। **2** किजोकि जैन वचन परमेश्वरे स्वर्गदूतां केरे ज़िरिये ज़ोरू थियूं, तैन सच्चू साबत भोवं, ते हर एककी पाप केरनेबाले ते हुक्म न मन्नेबाले सज़ा मैलली। **3** त असन भी सज़ा मैलेली, अगर अस एत्री महान मुक्ति करां बे खबर राए त। जेसेरे बारे मां पेड़ले प्रभुए एप्पू ज़ोरूए, ते जैन चलेईं एन प्रभु करां शुनोरू थियूं तैन केरे ज़िरिये असन याकीन भोवं कि एन सच्र आए। **4** परमेश्वरे भी निशान ते चमत्कार ते बड्डां-बड्डां कम्मां केरे ज़िरिये ते अपने मेरज़रे मुताबिक लोकन पवित्र आत्मा रे ज़िरिये वरदान देइतां इन साबत कियूं। **5** परमेश्वरे एजने बैली

दुनिया जेसेरे बारे मां अस ज़ोने लोरेम, स्वर्गदूत केरे अधीन मां न की पन प्रभु यीशुएरे अधीन की। **6** बल्के पवित्रशास्त्रे मां कोस्कोई केन्चे परमेश्वरे सेइं एन ज़ोरूए, “मैन्हु कुन चीजे, जेसेरे बारे मां तू सोचतस? या इन्सान कौने, कि तू तैसेरी फिक्र केरतस? **7** तीं तै शक्ति मां किछ वक्तेरे लेइ स्वर्गदूतन करां थोड़ो ज़ेरो घट कियो, ते तीं तैस राज़ेरी जेरि महिमा ते आदर दित्तोरीए, ते तैस अपने हथ्यां केरे कम्पन पुड़ अधिकार दित्तो। **8** तीं तैस सेबमी चीजन पुड़ अधिकार दित्तोरोए,” ज़ैखन सब किछ तैसेरे अधिकारे मां कियूं, ते किछ भी बाकी न रखवू, जैन तैसेरे अधीन न भोए। पन असां हुन्ना तगर सैरी चीजां तैसेरे अधिकारे मां न लहम। **9** पन असां यीशु लहतम, ज़ै स्वर्गदूतन करां किछ वक्तेरे लेइ निकडो कियोरो थियो, ताके तै परमेश्वरेरे अनुग्रहे सेइं सेबमी केरे लेइ अपनि जान दे। किजोकि यीशुए दुख बरदाश कियो ते मरो, ते हुनी अस ज़ानतम कि तैस महिमा ते आदर दित्तोरीए। **10** परमेश्वरे सब किछ बनाव, ते तै सब किछ अपने लेइ सुमैलतां रखते। परमेश्वरे ठीक कियूं जैन तैनी दुखेरे ज़िरिये यीशु सिद्ध कियो, ताके तै बड़े लोकन महिमा मां पुज़ाए। किजोकि यीशु ही आए ज़ै असन मुक्तेरे पासे नेते। **11** किजोकि पवित्र केरनेबालेरो ते पवित्र भोने बालां केरो बाजी अक्के, एल्हेरेलेइ यीशु तैन जो दूला बेइन ज़ोने करां न शरमाए। **12** पन मसीह परमेश्वरे सेइं ज़ोते, “अवं अपने लोकन इन ज़ोएलो कि तीं मेरे लेइ इन कियोरूए ते तैन केरे सभाई मां तेरे नव्वेरू गीत ज़ोइलो।” **13** ते फिरी तै ज़ोते, “अवं तैस पुड़ भरोसो रखेलो।” ते फिरी तै ज़ोते, “अवं तैन लोकन सेइं साथी भोनेई, जैना परमेश्वरे मीं दित्तोरेन।” **14** किजोकि जेन्चरे परमेश्वरेरे बच्चे, मैन्हु आन, तेन्चरे यीशु भी तैन केरो ज़ेरो मैन्हु बनो। परमेश्वरे एन एल्हेरेलेइ कियूं ताके तैसेरे मौतरे ज़िरिये शैताने बरबाद केरे ज़ैस कां मौतरो अधिकार थियो। **15** ते एन्चरे तैनी तैना आज़ाद किये जैना मौतरे डरे सेइं सैरी उमरी गुलामेरे ज़ेरे जीते थियो। **16** किजोकि प्रभु यीशु स्वर्गदूतां केरि नईं बल्के अब्राहमेरे वंशेरी मद्दत केरते। **17** एल्हेरेलेइ यीशु मसीहे हर गल्ली मां मैन्हु केरो ज़ेरो बन्नू ज़रूरी थियूं, ताके सेबमी केरे पापां केरे बलिदानेरे लेइ परमेश्वरेरे सामने दया केरनेबालो ते ईमानदार महायाजक बने। **18** किजोकि यीशुएरी अज़मैइश कीजेई ते तैनी एप्पू दुःख झैल्लोरोए, एल्हेरेलेइ तै तैन लोकां केरि मद्दत केरि बटते, जैना आज़मैइशरो सामनो केरतन।

3 एल्हेरेलेइ हे विश्वासी दूलाव ते बेइनव, तुस परमेश्वरे स्वर्गें मां तैस सेइं शामिल भोनेरे लेइ कुजोरेथ। एल्हेरेलेइ प्रभु यीशुएरे बारे मां ध्यान देथ ज़ै इश्शे लेइ परमेश्वरेरो बिस्तार आन्ने बालो दूत ते महायाजक आए जेसेरो अस इकरार केरतम। **2** यीशु परमेश्वरेरे लेइ वफादार थियो, जैनी तै ठहरावरो थियो, जेन्चरे मूसा भी परमेश्वरेरे लोकां केरि सेवाई मां वफादार थियो। **3** किजोकि घर बनानेबालो घरे करां जादे इज़्जतेरे काबल समझो गाते, तेन्चरे यीशु भी मूसा करां जादे इज़्जतेरे काबल समझो जेव। **4** किजोकि हर घरेरो कोई न कोई बनानेबालो ज़रूर भोते, पन जैनी सब किछ बनावं तै परमेश्वरे। **5** मूसा त परमेश्वरेरो सेवक भोने

सेइं परमेशरे घरेरे लोकन मां वफादार राव। ताके तैना गल्लां केरि बटे, जैना परमेशर एजनेबाले वक्ते मां जोनेबालो थियो। 6 पन मसीह मट्टू भोनेरे वजाई सेइं परमेशरेरे लोकां केरू मुखतियारे, ते असां तैसेरे लोकम, शर्त एने कि असां तैस दिलेरी ते उमीदी मजबूत रखम, जैस पुड़ असां भरोसो केरतम। 7 बस्सा पवित्र आत्मा जोते, “अगर अज तुस परमेशरेरी आवाज़ शुनथ। 8 त अपने दादे पड़दादां केरे जेरे तैसेरो हुकम मन्ने करां इन्कार न केरथ, जैखन तैनेई परमेशरेरे खलाफ खलाफत की, ते जेन्चरे तैस दिहाड़े तुशो दादे पड़दादेई जेइस तैना सुनसान ठैरी मां थिये, तैनेई परमेशरेरी अजमैइश की। 9 तैदी तुशो दादे-पड़दादे 40 सालन तगर मेरां महान कम्मां हेरनेरे बाद भी, अवं चनोती देइतां अजमाव। 10 एल्हेरेलेइ अवं तैस वक्तेरे लोकन पुड़ क्रोधे भोव, ते मीं जोवं, तैना हमेशा मेरो इन्कार केरतन, ते जैन केरनेरो मीं हुकम दित्तोरोए तैन केरने करां इन्कार केरतन। 11 एल्हेरेलेइ मीं अपनी सरकी मां कसम खाइ, कि तैना तैस ठैरी कधे दाखल न भोले जैडी अवं तैन आराम देथो।” 12 हे ढ्लाव ते बेइनव खबरदार राथ, तुसन मरां केन्चरो दिल एत्रो बुरो ते बेईमान न भोए, कि जै तैस जीते परमेशरे करां दूर केरे। 13 पन ज्ञांतगर तै दिहाडी जैस जो अज जोतन, रोज एककी होरि हिम्मत देते राथ, एरू न भोए कि तुसन मरां कोई पापेरे धोखे मां एइतां परमेशरेरे लेइ सखत दिल न भोइ गाए। 14 किजोकि अगर असां अपने पेइले विश्वासे पुड़ अपने मौती तगर लगातार मजबूत रातम, त अस अकोट्टू कम केरने मां मसीह सेइं साथी जुड़तम। 15 जेन्चरे पवित्रशास्त्रे मां लिखोरूए, “अगर अज तुस तैसेरी आवाज़ शुनथ त तुस अपने दिले सखत न केरा, त अपने दादे पड़दादां केरे जेरे तैसेरो हुकम मन्ने करां इन्कार न केरथ, जैखन तैनेई परमेशरेरे खलाफ खलाफत की।” 16 तैना लोक कौन थिये, जैनेई परमेशरेरी आवाज़ शुन्तां भी तैसेरे खलाफ खलाफत की? तैना सब लोक तैना थिये जैना मूसेरे जिरिये मिस्र मुलखे मरां निसोरे थिये। 17 तैना कौन लोक थिये, जैन सेइं परमेशर 40 सालन तगर क्रोधे राव? तैना लोक तैना थिये, जैनेई पाप कियो ते मेरतां तैन केरि लाशां सुनसान ठैरी मां रेइ जेई। 18 जैखन परमेशरे क्रोधे मां कसम खाइ, कि तैना तैस ठैरी कधे दाखल न भोले जैडी अवं तैन आराम देथो, हकीकति मां तै तैन केरे बारे मां जोतो थियो जैनेई हुकम न थियो मन्नेरो। 19 बस्सा, असन हुनी पतो लगे, कि तैना विश्वास न केरनेरी वजाई सेइं तैदी दाखल न भोइ सके।

4 एल्हेरेलेइ जैखन परमेशरेरो ए वादोए कि असां तैस आरामे मां दाखल भोइ सकतम, ते असेई खबरदार राहेरू लोड़ते, ताके कोस्कोई एरू न भोए, कि तुसन मरां कोई तैस मां दाखल भोने करां एरो रेइ गाए। 2 किजोकि जेन्चरे असेई यीशु मसीहेरी खुशखबरी शुनी, तेन्चरे इस्राएली लोकेई भी आरामेरे ठैरी दाखल भोनेरी खुशखबरी शुनोरी थी। पन तैनेई तैस पुड़ विश्वास न कियो, एल्हेरेलेइ तै सन्देश तैन केरे लेइ बेफेइदो भोव। 3 पन असेई जैनेई विश्वास कियो, परमेशरेरे तैस वादो कियोरे आरामे मां दाखल भोतम, जेन्चरे परमेशरे ज़ोरू थियू, “मीं अपने क्रोधे

मां कसम खाइ, कि तैना तैस ठैरी कधे दाखल न भोले जैडी अवं तैन आराम देथो।” परमेशरे एन एल्हेरेलेइ नई ज़ोरू, किजोकि हेजू तगर आरामेरी ठार तियार न थी, पन तै ठार दुनिया बनानेरे वक्ते करां तै तियार आए। 4 किजोकि परमेशरे सत्तोवं दिहैडारे बारे मां पवित्रशास्त्रे मां एन्चरे ज़ोरू आए, “परमेशरे अपना सब कम्मां खतम केरतां सत्तोवं दिहाड़े आराम कियो।” 5 ते अस भी इन पढतम कि तैनी बादे मां जोवं, “एना मेरे आरामेरे ठैरी कधे दाखल न भोले।” 6 तैना इस्राएलेरे लोक जैनेई पेइली ई खुशखबरी त शुनी, पन आरामेरे ठैरी दाखल भोने मां कामयाब न भोए, किजोकि तैनेई परमेशरेरे हुकम न मन्ने। पन हुन्ना भी किछ लोकां केरे लेइ आरामेरे ठैरी दाखल भोनेरे लेइ मौको आए। 7 एल्हेरेलेइ परमेशरे कोई होरो वक्ते अपने आरामेरे ठैरी मां दाखल भोनेरे लेइ ठहरावरो, तै वक्त अज आए, इश्शे दादे पड़दादेई खलाफ केरनेरे बड़े सालना बाद परमेशरे दाऊदरे जिरिये जोवं, जेन्चरे तैने जोवं “अगर अज तुस तैसेरी आवाज़ शुनथ, त अपनो दिल सखत न केरा।” 8 अगर यहोशूए तैना लोक आरामे मां दाखल करावरे भोथे त बादे मां परमेशरे होरि दिहैडारे बारे मां गल न थी केरनि। 9 एल्हेरेलेइ परमेशरे लोकां केरे लेइ एरी ठार तियार आए जैडी तैना पूरे तरीके सेइं आराम केरि बटतन। तैना तेन्चरे आराम केरेले जेन्चरे परमेशरे सत्तोवं दिहाड़े आराम कियोरो थियो। 10 किजोकि जै कोई परमेशरेरे आरामे मां दाखल भोते त तै परमेशरेरो जेरो अपने कम्मन पूरे केरतां आराम केरते। 11 एल्हेरेलेइ एज्जा अस भी तैस आरामेरी ठैरी मां दाखल भोनेरी कोशिश केरम, ताके कोई भी मैनु इस्राएली लोकां केरे जेरो हुकम न मेन्तां तैस आरामेरी ठैरी दाखल भोने करां रेइ न गाए। 12 किजोकि परमेशरेरू वचन जीतू ते शक्ति बालू आए, ते हर दूई धारण बैली तलवारी करां भी जादे तिखवू आए। ते तैन प्राण ते आत्माई गहराई तगर चीरते, जेन्चरे तिखवी तलवार जोड़न ते हेडी केरे अन्त्रीयो मासे वारां पार चिरतां निसतीए ते दिलेरे खियाल ते मैनेरो इरादो भी जानते। 13 दुनियारी कोई भी चीज परमेशरेरी नज़री करां छप्पोरी नई, बल्के तैसेरे सामने सब चीजां खुल्ली ते बेदिन, ते असेई तैस, जैन किछ भी अपने पूरे जिन्दगी मां कियोरू तैसेरो हिसाब देनो पेनोए। 14 बस्सा, एज्जा अस अपने विश्वासे पुड़ मजबूत रहम। किजोकि इश्शो अक महान महायाजके, जै स्वर्ग मां जोरोए, यानी परमेशेरू मट्टू यीशु। 15 किजोकि इश्शो महायाजक इश्शी सैरी कमजोरी समझते। किजोकि शैताने तै सेबभी गल्लन मां इश्शो जेरो अजमाव, पन तैनी कोई पाप न कियो। 16 एल्हेरेलेइ एज्जा असां दिलेरी सेइं, अनुग्रह देनेबाले परमेशरेरे तखतेरे सामने चलम, ताके तै असन पुड़ अनुग्रह ते दया केरे ते ज़रूरतेरे मौके तै इश्शे मदत केरे।

5 परमेशरे हर महायाजक इस्राएली लोकन मरां चुनो, ते परमेशरे महायाजक, लोकां केरि तरफां अपनि सेवा केराने लेइ ठहराए, ताके तैना लोकां केरे मैफरे लेइ चढतल ते पापां केरू बलिदान चाढ़न। 2 किजोकि अक याजक एप्पू बेडि गल्लन मां कमजोरे, एल्हेरेलेइ तै बेसमझ, ते टेपलोरे लोकन नेरमी सेइं बताव केरि बटते। 3 किजोकि

तै एप्पू कमजोरे, एल्हेरेलेइ तैस न सिर्फ लोकां केरे पापां केरे लेइ, बल्के अपने पापां केरे लेइ भी बलिदान चाढ़नेरि ज़रूरत भोतीए। 4 कोई मैन्हु अपने लेइ महायाजकेरी पदवी अपने आपे सेइं हासिल न केरि सखे, ज्ञांतगर ते हाऱुनेरो ज़ेरो परमेशेरी तरफां कुजाव न गाए। 5 तेन्चरे मसीहे भी महायाजक बेनतां अपनि आदर न की, बल्के परमेशेरे तैस आदर दित्ती ज़ैखन तैने ज़ोवं, “तू मेरू मट्टू आस, अज़ अवं इन बांदू केरताई तू मेरू मट्टू आस।” 6 एल्हेरेलेइ परमेशर फिरी एक्की होरि ठैरी ज़ोते, “तू मेलिकिसिदकेरो ज़ेरो हमेशारे लेइ याजक आसा।” (aiōn g165) 7 यीशुए एक्की मैनेरी ज़ेरि जिन्दगी गुज़ारनेरे दिहाइन मां फुकैरी-फुकैरी ते लेरां देइ-देइ परमेशेरे कां प्रार्थना ते बिनती की, ज़ै तैस मौती करां बचेइ सकतो थियो, ते परमेशेरे लेइ तैसेरे भेक्तेरे वजाई सेइं परमेशेरे तैसेरी फरयाद शुनी। 8 ते परमेशेरेरू मट्टू भोइतां भी तैनी दुख झैल्लतां हुक्म मन्तो शिखो। 9 ज़ैखन तैनी तैन सब कियूं ज़ैन तैनी कियेरू लोडतू थियूं, त ते तैन केरे लेइ हमेशारे लेइ मुक्तेरो ज़िरयो बनो, ज़ैना तैसेरे हुक्म मन्तन। (aiōnios g166) 10 ते तैस परमेशेरी तरफां मेलिकिसिदकेरी ज़ेरि महायाजकेरी पदवी मैल्ली। 11 असन कां इस बारे मां ज़ोनेरे लेइ बडू किछ आए, पन तुसन समझानू मुश्किले, किजोकि तुस समझाने मां सुसतथ। 12 दासले मां अज़ तगर तुस गुरु बनोरे लोइते थिये, किजोकि तुसन विश्वास कियोरे बडू चिर भोरूए। पन हुन्ना त ज़रूरत इस गल्लरीए कि कोई मैन्हु तुसन परमेशेरे वचनेरी शुरुआतरी गल्लां दुबारां शिखाले। तुस तैन बच्चां केरे ज़ेरेथ ज़ैन हेजू दुइ पीतन ते शुरी रोटी न खेइ बटन। 13 ज़ै दुइ पीते, तै हेजू बच्चो भोते, किजोकि तैस नई पतो सही कुने ते गलत कुने। 14 पन शुरी रोटी तैन केरे लेइ भोचे ज़ैना विश्वासे मां बडुन, ते अपने तजरबे सेइं इस काबल भोरेन, कि रोडे ते बुरे मां फ्रक सेमझी सखन।

6 एल्हेरेलेइ एज्जा अस मसीहेरे बारे मां शुरुआतरी शिक्षारी गल्लां बार-बार दोरहानेरे बगैर अस सिधतारे पासे चलते रहम। ते मौतरे पासे नेनेबाले कम्मन करां मन फिराम ते परमेशेरे पुइ विश्वास केरनो, 2 बपतिस्मे ते हथ रखनेरी शिक्षारे बारे मां, ते मुइदां केरे ज़ीते भोनेरे बारे, ते हमेशारे इन्साफेरे बारे मां दुबारा गल न केरम। (aiōnios g166) 3 एज्जा अस परिपक्व विश्वासी बनम! अगर परमेशर अज़ाज़त दे त असां इन केरमेले। 4 ज़ैना लोक अपने विश्वास शारतन तैन फिरी मनफिरानेरे पासे केन्चरे आने गान? तैनी एक्की बारे परमेशेरी सच्च्वाई पिशानोरी थी, ते तैन स्वर्गरां वरदाना मैलोरां थियां ते तैनेई होरन सेइं साथी पवित्र आत्मा हासिल कियोरो थियो। 5 तैनेई मैसूस कियेरू थियूं कि परमेशेरेरू वचन रोडू आए, ते तैनेई एजनेबाले ज़मानेरी शक्ति मैसूस कियोरी थी। (aiōn g165) 6 ते हुनी तैनेई अपनो विश्वासे शारोरो! एल्हेरेलेइ तैन मनफिरानेरे पासे आनू मुशकिले, किजोकि तैना एप्पू परमेशेरेरे मट्टे फिरी कूसे पुइ चाढ़ने लोरेन! ते लोकां केरे सामने तैसेरी बेइज़ी केरने लोरेन। 7 ज़ैन लोकन रोडी शिक्षा मैलोरीए तैना तैस ज़मीनेरे ज़ेरे आन ज़ैस पुइ झैडी लगती रातीए। अगर ज़मीन रोडीए त ज़िमदारेरे लेइ रोडी फसल देचे, ते

तैस परमेशेरी तरफां बरकत मैलचे। 8 होरे लोक तैस ज़मीनेरे ज़ेरे आन ज़ैस मां कंटे ते झैल्लां लगतन ते ते कोन्ची कम्मरी नई। ते परमेशर तैस ज़मीनी फिटकार देनेबालोए ते आखरी मां तैस अग्गी मां बरबाद केरेलो। 9 हे मेरे टूलारे ढलाव ते बेइन्व, हालांकी असां एरी गल्लां ज़ोतम फिर भी अस विश्वास केरतम कि एन तुशे लेइ नई। इश्शो भरोसोए कि तुस रोडी गल्लां केरे लेइ आथ ज़ैना मुक्तेरे ज़िरिये एइतन। 10 किजोकि परमेशर बेइन्साफ नई कि ज़ै तुशू कम ते प्यार बिसरी गाए, ज़ै तुसेई तैसेरे लोकां केरि सेवा केरनेरे ज़िरिये तैसेरेलेइ हिरावरोए। ते परमेशर याद केरेलो कि तुस हेजू भी तैन केरि मद्दत केरने लोरेथ। 11 इश्शी इच्छा ई आए कि तुस ज्ञांतगर ज़ीतेथ रोडी बर्ताव केरते राथ, इन पक्कू केरनेरे लेइ कि तुशुशी उमीद सच भोली। 12 तैखन तुस आलसी न बनेले। पन तुस तैन केरे ज़ेरे चलले ज़ैना अपने विश्वास ते सबरारे वजाई सेइं परमेशेरेरे वादां केरे बारस भोले। 13 ज़ैखन परमेशेरे अब्राहमे सेइं वादो कियोरो थियो त कसम केरनेरे लेइ तैस करां बड्डो कोई न थियो, एल्हेरेलेइ तैनी अपनि ही कसम कमाइतां ज़ोवं, 14 “अवं तीं सच्च्चे बरकत देइलो, ते तेरू वंश बेशुमार बेधेइलो।” 15 एल्हेरेलेइ अब्राहम तैन वादन हासिल केरनेरे लेइ सबरी सेइं इंतज़ार केरतो राव। 16 मैन्हु त एप्पू करां बडां केरे नव्वेरी कसम केरतन ते एन्चरे तैन हर मसलेरो हल कसम केरतां खतम भोते। 17 एल्हेरेलेइ परमेशेरे भी कसम खाइ, एन केरने सेइं तैनी तैन लोकन ज़ैन सेइं वादो कियोरो थियो, इन हिरानू चाऊ कि ज़ै वादो तैनी कियोरोए तै पूरो केरेलो। 18 त इडी दूई गल्लां आन तैसेरो वादो ते तैसेरी कसम, ज़ैना कथे न बेदलोने ते तैन केरे बारे मां परमेशर कथे झूठ न ज़ोए। एल्हेरेलेइ अस ज़ैना तैसेरे सहारे मां ओरेम त ज़ै उमीद असन दित्तोरीए, तैस मां अस बनोरे रहम, ते अस बड़े जादे जोशे मां आम। 19 इश्शी उमीद प्राणा केरे लेइ पक्की आए तै टेली न बटे ते ई असन परमेशेरे करां भटकने न दे, बल्के ई असन परमेशेरेरे मन्देरे मां महा पवित्र ठैरी पुजातीए। 20 ज़ैडी यीशु इश्शे लेइ मेलिकिसिदक महायाजकेरो ज़ेरो हमेशारो महायाजक बेनतां इश्शे लेइ बत हिराने बालेरो ज़ेरो दाखल भोव। (aiōn g165)

7 ई मेलिकिसिदक शालेमेरो राज़ो ते परमप्रधान परमेशेरोरे याजक थियो, ज़ैखन अब्राहम राज़न मैरतां वापस ओरो थियो, त मेलिकिसिदके तैस सेइं मिलतां तैसेरी बडी आदर की ते तैस बरकत दित्ती। 2 अब्राहमे तैस तैन सेळ्भी चीजां केरो दशोवं हिस्सो दित्तो ज़ैना तैनी कब्जो केरतां एनोरी थी। मेलिकिसिदकेरो नव्वेरो मतलब धार्मिकतारो राज़ो आए, ते शालेमेरो मतलब शैन्तरो राज़ो। 3 तैसेरो न कोई बाजी, न अम्मा, न तैसेरू कोई वंशे, न तैसेरी ज़रमनेरे बारे मां न तैसेरे मरनेरे बारे मां लिखोरूए। ते परमेशेरेरे मट्टेरो ज़ेरोए तै हमेशारे लेइ याजक बनोरो रहते। 4 पन हुनी इस पुइ ध्यान देथ मेलिकिसिदक केत्रो महान थियो। ज़ैस पूर्वज अब्राहमे कब्जो कियोरी चीजां केरो दशोवं हिस्सो दित्तो। 5 मूसेरे कानूनेरे मुताबिक ज़ैना लेवेरे खानदाने मरां थिये यानी ज़ैना याजक ठहराए गातन,

तैन हुक्म दितो जोरोए कि तैना इस्राएली लोकन यानी अपने लोकन करां दशोवं हिस्सो नेन, हालांकी तैना भी अब्राहमेरी वंशे मरां आन। 6 पन मेलिकिसिदके ज़ै लेवी केरे वंशे मरां न थियो फिरी भी अब्राहमे करां दशोवं हिस्सो नीयो, ते तैस बरकत दित्ती ज़ैस सेइं परमेशरे वादो कियो थियो। 7 अस पक्कू ज्ञानतम कि ज़ै बरकत देते ते बरकत मैलने बाले करां महान आए। 8 ते याजक ज़ैना दशोवं हिस्सो नेतन तैना तैन मैन्हु आन ज़ैना मरतन, पन मेलिकिसिदक एन करां भी महान आए, किजोकि पवित्रशास्त्र ज़ोते कि ते ज़ीतो आए। 9 बल्के अस ज़ोई सकतम कि लेवी भी ज़ै दशोवं हिस्सो नेते, अब्राहमेरे ज़िरिये मेलिकिसिदक जो दशोवं हिस्सो दितो। 10 एल्हेरेलेइ कि ज़ैस मौके मेलिकिसिदके लेवेरे पूर्वज अब्राहमे सेइं मुलाकत की, तैस मौके लेवी ज़रमोरो भी न थियो। 11 इना लेवी याजकेरे आधारे पुइ कानून इस्राएली लोकन दित्तोरो थियो, अगर लेवी ते याजकेरू कम ठीक थियूं, त अलग किसमेरे याजकेरू बांदू भोनु ज़रूरी न थियूं, ज़ै मेलिकिसिदकेरो ज़ेरो आए। पन हारूनेरो ज़ेरो नई। 12 किजोकि ज़ैखन याजकेरी पदवी बेदलोतीए त कानूनेरू बेदलोनु भी ज़रूरीए। 13 असां इना सैरी गल्लां मसीहेरे बारे मां ज़ोने लोरेम ज़ै होरि गोत्रे मरां आए, ते तैस गोत्रे मरां केन्चे बलिदान केरनेरे ठैरी याजकेरी सेवा नई कियोरी। 14 किजोकि इन अस ज्ञानतम, कि इश्शो प्रभु यहूदारे गोत्रे मरां थियो। ते मूसा एस गोत्रे मरां याजकेरे पेदवरे बारे मां कोई गल नई कियोरी। 15 मेलिकिसिदकेरो ज़ेरो अक होरो भी याजक एजने सेइं इन होरू भी साफ भोते। 16 किजोकि यीशु कानूनेरे हुक्मेरे मुताबिक याजक लोइतो थियो, पन तै नाश न भोनेबैली ज़िन्दगारे शेक्तेरे ज़िरिये महायाजक बनो। 17 किजोकि तैसेरे बारे मां परमेशर पवित्रशास्त्रे मां ई गवाही देते, “कि तू मेलिकिसिदकेरे ज़ेरो हमेशारे लेइ याजक आस।” (aiōn g165) 18 एन्चरे मूसैरो कानून कमजोर ते बेफल भोनेरे वजाई सेइं हुनी कम न केरि बटे। 19 (किजोकि मूसैरे कानूने कोई गल्ली सिद्ध न केरि बटी) पन हुनी असन कां अक रोडी उमीदे ज़ेसेरे ज़िरिये सेइं असां परमेशरेरे सामने एज्जी बटतम। 20 ते परमेशरे भी तैस वक्ते कसम खाइ ज़ैखन तैनी यीशु महायाजक बनाव। 21 किजोकि होरे याजक त बगैर कसमा याजक बनाव, पन ज़ैखन यीशु, परमेशरेरी तरफां याजक बनाव त तैनी ज़ोवं, “अवं, प्रभु कसम खाताई, कि तू हमेशा याजक रालो ते अवं अपने मने कधी न बेदलेलो।” (aiōn g165) 22 एल्हेरेलेइ यीशु ज़मानत देते कि पुरानो करार नव्वे करारे करां रोइो भोलो। 23 ते अक फक्के, किजोकि पेइले बड़े याजक बेनतां आए, पन तैना सब मरे ते तैनेई लगातार याजकेरू कम न केरि बटु। 24 पन यीशु आखरी तगर रानेबालो याजके ते एल्हेरेलेइ तैसेरी ठैरी होरो कोई याजक न रखवो गाए। (aiōn g165) 25 एल्हेरेलेइ ज़ैना लोक यीशुएरे ज़िरिये सेइं परमेशरे कां एइतन, यीशु तैन पूरी-पूरी मुक्ति देइ बटते, किजोकि तै तैन केरे लेइ बिनती केरनेरे लेइ हमेशा ज़ीतोए। 26 एल्हेरेलेइ असन एरे ज़ेरो महायाजक ज़रूरी थी, ज़ै इश्शे ज़रूरतन पूरी केरे, ज़ै पवित्र, निष्कपट ते शुद्ध, ते पैपन करां अलग भोए ते ज़ै परमेशरे स्वर्गे जो नेवरो भोए। 27

ते होरि महायाजक केरू ज़ेरू यीशु ज़रूरी नई, कि पेइले अपने पापां केरे लेइ ते फिरी अपने लोकां केरे पापां केरे लेइ रोज बलिदानां चाढ़े, किजोकि यीशुए सेबभी लोकां केरे पापां केरे लेइ एककी बार अपनो आप बलिदान केरतां एरू बलिदान चाढ़ू ज़ैन हमेशारे लेइ आए। 28 किजोकि मूसैरो कानून त तैन मैन्नु महायाजक भोनेरे लेइ ठहराते ज़ैना सिद्ध नई, पन मूसैरे कानूनेरे बाद परमेशरे कसम खेइतां अपनु मट्टू ठहराव ते तैसेरू मट्टू हमेशारे लेइ सिद्ध महायाजक बनोरोए। (aiōn g165)

8 ज़ैना गल्लां हुना अस ज़ोने लोरेम तैन मरां सेभना बट्टी गल ई आए कि इश्शे एरो महायाजक, ज़ै स्वर्गे मां परमेशरेरे महिमा बाले तखतेरे देइने पासे बिशोरोए। 2 ते ज़ै तैस महा पवित्र ठैरी ते तैस सत्त्रे तेम्बु मां सेवा केरते, ज़ै केन्चे मैने नई बल्के परमेशरे खइो कियोरोए। 3 किजोकि हर महायाजक पापां केरे मैफरे लेइ चढतल ते बलिदान चाढ़नेरे लेइ ठहराव गाते, एल्हेरेलेइ ज़रूरी आए, कि इश्शे महायाजके (यीशु) कां भी किछ चाढ़नेरे लेइ भोए। 4 ते अगर यीशु दुनियाई मां भोथो त कधे कोई याजक न थियो भोनु, किजोकि इडी मूसैरे कानूनेरे मुताबिक चढतल चाढ़नेरे लेइ याजक आन। 5 इना याजक ज़ैना कम केरतन, तैना सिर्फ स्वर्गेरे चीज़ां केरि नकल ते सैयोए, पन ज़ैना चीज़ां स्वर्गे मां आन। एल्हेरेलेइ ज़ैखन मूसा तेम्बु बनानेरी तियेरी मां थियो, त परमेशरे तैस हदैइयत दित्ती, “हेर ज़ै नमनूने मीं तीं पहाड़े पुइ हिरावरो थियो तैसेरे हिसाबे सेइं तू सैरी चीज़ां बना।” 6 पन हुनी ज़ै महायाजकेरी सेवा यीशु दित्तोरी तै पुराने याजकेरे सेवाई करां बडी बट्टीए, किजोकि तै ज़ैना गल्लां केरि बिचवाई केरते तैना पुराने करारे करां भी उच्ची आन, ते वादन पुइ तैसेरी बुनियादे। 7 किजोकि अगर पेइले करारे मां कोई खामी न भोथी त होरो करार केरनेरी कोई ज़रूरत न थी भोनी। 8 पन परमेशर लोकन पुइ दोष लेइतां ज़ोते, “तक्का प्रभु ज़ोते कि ते दिहाड़ी एज्जी राहोरीए, इस्राएलेरे लोक ते यहूदारे लोकन सेइं साथी नव्वो करार केरेलो। 9 ए तैस करारो ज़ेरो न भोलो ज़ै मीं तैन केरे दादे पइदान सेइं तैस दिहाड़े कियोरो थियो। ज़ैखन मीं मिस्रे मरां तैन कढनेरे लेइ तैन केरो हथ ठमोरो थियो, किजोकि प्रभु ज़ोते कि तैना मेरे तैस करारेरे मुताबिक वफादार न राए, एल्हेरेलेइ मीं भी तैन केरे पासे कोई ध्यान न दित्तू। 10 प्रभु ज़ोते कि ज़ै करार अवं इस्राएलेरे लोकन सेइं तैस मौके केरेलो तै ईए, कि अवं अपने कानून तैन केरे मन्ना मां छडेलो, ते तैन केरे दिलन मां लिखेलो, ते अवं तैन केरो परमेशर भोलो ते तैना मेरे लोक भोलो। 11 ते केन्ची ए ज़रूरत न भोली कि अपने पुइोसन, या अपने रिशतेदारन ए शिक्षा दे कि प्रभु पिशाना, किजोकि निकड़े करां बट्टे तगर सब मीं पिशानेले। 12 एल्हेरेलेइ अवं तैन केरे अधर्म माफ़ केरेलो, ते तैन केरे पापन फिरी कधे याद न केरेलो।” 13 ज़ैखन परमेशरे नव्वो करारे कमाव त पेइलो करारे पुरानो बनाव, ते ज़ै चीज पुरानी ते कमजोर भोती ते जल्दी खतम भोतीए।

9 पेड़ले करारेरे मुताबिक भी परमेशेरी आराधना केरनेरे नियम थिये; ते आराधना केरनेरे लेइ मैन्हु केरि बनोरी अक ठार थी। 2 यानी अक तेम्बु बनोरो थियो, ते तैसेरे दूई हिस्से थिये, पेड़ले हिस्से मां अक दीवट (दीयो), मेज ते चैद्वोरी रोटी रेखोरी भोती थी, तैस हिस्से जो पवित्र ठार ज़ोते थिये। 3 ते होरि हिस्से मां पड़दे पतोरं तै ठार थी, तैस हिस्से जो परमपवित्र ठार ज़ोते थिये। 4 एसमां सोन्नेरी तै बलिदान केरनेरी ठार थी जैस पुड़ खुशबूदार चीज़ां बालते थिये, ते चेब्रे पासन सोन्ने सेइं पलेटोरो करारेरो सुंदुख थियो। ते तैस सुंदुखे मां मन्ने सेइं भेरतां अक सोन्नेरू भांड थियूं, ते कने हारूनेरी तै सोटी थी जैस पुड़ पटलां लगगोरां थियां ते दूई घोड़ां केरि सलेटां थी, जैस पुड़ दश हुक्म लिखोरे थिये। 5 एस सुंदुखेरे बेइंयां पासे महिमा बाले करूब बनोरे थिये, जैना परमेशेरी मौजूदगी हिराते थिये। तैना अपने-अपने फंगन सेइं तैस ठैरी सैयो केरि रावरे थिये, जैड़ी पाप माफ़ कियोरे थिये। पन हुनी इन गल्लन रोड़े चारे ज़ोनेरो वक्त नई। 6 एना सब चीज़ां एस तरीके सेइं तियार केरनेरे बाद, याजक तेम्बेरे तैस पेड़ले हिस्से मां रोज़ गाते, ताके सेवारू कम पूरू केरन। 7 पन परमपवित्र ठैरी मां सिर्फ़ महायाजक साले मां सिर्फ़ एककी बार गाते। ते तै भी खून घिन्तां ताके अपनि ते अपने लोकां केरे पापां केरे लेइ बलिदान च़ाढ़े, जैना तैनेई अनजाने मां किये। 8 एस नियमें सेइं पवित्र आत्मा इन हिराते, कि ज़ांतगर पेड़लो तेम्बु आए, तांतगर परमपवित्र ठैरी गानेरी बत बंदे। 9 ते इन सब किछ इस वक्तेरे लेइ अक मसाले, एस सेइं एन बांदू भोते कि जै च़दतल ते बलिदान याजक परमेशेरे जो च़ाढ़ते थिये, तैस सेइं आराधना केरनेबालां केरो ज़मीर रोड़ेचारे शुद्ध न भोए। 10 तैन केरो तलक सिर्फ़ खाने पीनेरे चीज़ ते अलग-अलग शुद्ध भोनेरे रसमन सेइं भोते थियो। इन सिर्फ़ जिसमानी रसमां आन, इन तैखन तगर लागू भोतन ज़ांतगर परमेशेरे नव्वों नियाम न बनाए। 11 पन ज़ैखन मसीह इश्शो महायाजक बेनतां अव, त तै रोड़ी चीज़ां घिन्तां अव जैना हुन्ना मौजूद आन। तै स्वर्गें मांजो परमेशेरे हज़ूरी मां जेव। ते तै हज़ूरी एककी महान ते सिद्ध तेम्बेरो ज़ेरि आए, जै मैन्हु केरे हथ्यां केरे ज़िरिये सेइं नई बनोरो ते न दुनियारो। 12 ज़ैखन मसीह तैस तेम्बु मांमेइं भोइतां पवित्र ठैरी दाखल भोव, त तैनी थावां ते बछड़ां केरो खून नई, बल्के अपनो खूनेरे ज़िरिये एककी फेरे पवित्र ठैरी दाखल भोव ते असन इश्शो पापन करां हमेशारे लेइ छुटकारो दित्तो। (aiōnios g166) 13 किजोकि ज़ैखन थावां ते दांतां केरो खून ते बछड़ी केरि मांजन अपवित्र लोकन पुड़ छक्के गाने सेइं तैना लोक जिसमानी तरीके पवित्र मन्ने गाते थिये, 14 त मसीहे सनातन आत्माेरे ज़िरिये सेइं अपनो आप परमेशेरे कां बगैर पापेरू बलिदान केरतां च़ाढ़ू, ते तैसेरो खून असन इश्शो ज़मीरिरे तैन कम्मन करां होरो भी जादे पवित्र केरेलो, जैन केरो तलक मौती सेइं ए, ताके अस ज़ीते परमेशेरी आराधना केरम। (aiōnios g166) 15 एहे वजा आए कि परमेशेरे अपने ते दुनिया मज़ाटे मसीह बिचवाई बनेइतां तैसेरे ज़िरिये सेइं अक नव्वो करार बनावरोए, ताके जैना परमेशेरे कुजोरेन तैना हमेशारी बरकत हासिल केरन जेसेरे लेइ परमेशेरे

तैना कुजोरेन। किजोकि पेड़ले दित्तोरे करारेरे अधीन कियोरे पापन करां तैन आज़ाद केरनेरे बदले मां मसीह मरोए। (aiōnios g166) 16 किजोकि वसीयतरे सिल्लसले मां वसीयत देनेबालेरी मौत साबत भोनी ज़रूरीए। 17 एल्हेरेलेइ वसीयत देनेबालेरे ज़ीते दम्में तगर वसीयत कम्मरी न भोए, पन तैसेरे मरनेरे बाद तै वसीयत पक्की भोतीए। 18 एहे वजा आए कि पेड़लो करार भी खूनेरे बगैर नई कियोरो। 19 एन्चरां ज़ैखन मूसा सैरी लोकन कानूनोरे अक-अक हुक्म शुनाव, त तैनी थावां ते बछड़ां केरो खून पैनी मां मिलाव, ते फिरि लाल उन्ना ते जूफा सेइं एन्तां कानूनेरी किताबी ते सैरी लोकन पुड़ छिड़को। 20 ते ज़ोवं कि, “ए तैस करारेरो खूने जेसेरो हुक्म परमेशेरे तुश्शे लेइ दित्तोरोए।” 21 एन्चरे तैनी तेम्बु पुड़ ते आराधना केरनेरी सैरी चीज़न पुड़ खून छिड़को। 22 किजोकि मूसे कानूनोरे मुताबिक लगभग सैरी चीज़ां खूने सेइं पवित्र की गेइचन, ते ज़ांतगर खून न बगाव गाए, तांतगर पाप भी माफ़ न भोन। 23 त फिरि ए ज़रूरते कि तैना चीज़ां जैना स्वर्गेरी नकल आन, तैना जानवरां केरे बलिदाने सेइं शुद्ध की गान। पन स्वर्गेरी चीज़न इन करां भी जादे रोड़े बलिदाने सेइं शुद्ध भोनेरी ज़रूरते। 24 किजोकि मसीह मैन्हु केरे बनेवरे घरे मां जैन सच्चे पवित्र ठारारी नकले, दाखल नई भोरो, बल्के स्वर्गे मां दाखल भोव जैड़ी ते इश्शे लेइ परमेशेरे कां हाज़रे। 25 यहूदी केरो महायाजक पवित्र घरे मां हर साल होरि केरो यानी जानवरां केरो खून नेइतां गाते, पन मसीह अपने आपे बार-बार बलिदान केरनेरे लेइ न गाए। 26 वरना दुनियारे शुरू करां लेइतां हुन्ना तगर तैस बार-बार दुख झूलनो पेथो; पन हुनी जुगेरे आखरी मां तै बांदो भोवं, ताके अपने बलिदाने सेइं पाप दूर केरे। (aiōn g165) 27 ते जेन्चरे सेइं मैनेरू मरनू ते एककी बार इन्साफेरू भोनु पक्कुए। 28 तेन्चरे सेइं मसीहे भी बड़े लोकां केरे पाप सैलतां गानेरे लेइ एककी बार बलिदान भोव, ते दुबारां पापां केरू बलिदान देनेरे लेइ नई, बल्के तैन मुक्ति देनेरे लेइ एज्जेलो, जैना तैसेरे इंतज़ारे मां आन।

10 मूसरो कानून एजने बैली रोड़ी चीज़ां केरो सिर्फ़ अक सैयोए, न कि असली रूपे। एल्हेरेलेइ एककी किसमेरां बलिदानां जैना हर साल च़ाढ़ां गातन, तैना परमेशेरे कां एजने बालन कधे भी सिद्ध न केरि सखन। 2 अगर केरि सखेथां, त कुन तैन केरू च़ाढ़नू बंद न भोथू? एल्हेरेलेइ अगर आराधना केरनेबाले एककी बारे हमेशारे लेइ पवित्र भोइ गाथे, त तैन केरो ज़मीर तैन पापी न बनाथो। 3 पन तैना बलिदानां तैन लोकन हर साल याद करातन कि तैना पापिन। 4 किजोकि मुमकिन नई, कि दांतां केरो ते थावां केरो खून पापे दूर केरि सके। 5 एल्हेरेलेइ ज़ैखन मसीह दुनियाई मां ओरो थियो, त तैनी परमेशर सेइं ज़ोरू थियूं, “तीं बलिदान ते च़दतल न चाई, बल्के तीं मेरे लेइ अक जान तियार की। 6 तू न भस्म भोनेबाले बलिदाने सेइं, ते न पापेरे बलिदाने सेइं खुश भोव।” 7 तैखन मसीहे ज़ोवं, “हे परमेशर, हेर, अव तेरी इच्छा पूरी केरनेरे लेइ ओरोई, जेन्चरे मेरे बारे मां पवित्रशास्त्रे मां लिखोरूए।” 8 पेड़ले त तै ज़ोते, न तीं कोई बलिदान ते न कोई च़दतल चाई, ते न भस्म भोनेबालू

बलिदान ते न पापेरु बलिदान चाव, ते न तैन सेइं तू खुशी भोव, हालांकी एना बलिदानां मूसरे कानूनरे मुताबिक दित्तां गातन। 9 फिरी तै एन जोते, “हेर, अवं तेरी मर्जी पूरी केरनेरे लेइ ओरोई,” एन्चरे तै पेइले सारे बलिदानन हटाते ताके तैन केरे ठैरी मसीहेरे बलिदाने रख्खे। 10 परमेशेरी मर्जी ई थी, कि यीशु मसीहेरे जिसम एक्की बार बलिदान भोने सेइं अस हमेशारे लेइ पवित्र भोम। 11 पेइले करारेरे मुताबिक हर याजक बलिदान केरनेरे ठैरी खड़े भोइतां रोज सेवा केरतन, ते एक्की किसमेरां बलिदानां बार-बार च़ाढ़तन, ज़ैना पापे कधी भी दूर न केरि सखन। 12 पन मसीह ज़ै इश्शो महायाजके, इश्शे पापां केरे लेइ एक्की बार बलिदान भोइतां परमेशेरे देइने पासे गेइतां बिश्शी जेव। 13 तैडी तै तैस वक्तेरो इंतज़ार केरने लोरोए, कि परमेशर तैसेरे दुश्मन पूरे तरीके सेइं हाराए। 14 तैनी एक्की बलिदाने सेइं ज़ैना लोक पवित्र कियोरिन, तैना हमेशारे लेइ सिद्ध कियोरिन। 15 पवित्र आत्मा भी एस गल्लरी गवाही देते। पेइलू त एन जोते कि 16 “प्रभु जोते, कि ज़ै करार अवं तैन दिहैइना बाद अपने लोकन सेइं केरेलो तै ईए, अवं अपने कानून तैन केरे मन्न मां छुडेलो ते तैन केरे दिलन मां लिखेलो।” 17 ते फिरी एन भी जोते कि, “अवं तैन केरे पाप ते बुरां कम्मां माफ़ केरेलो, ते फिरी कधी याद न केरेलो।” 18 बस्सा, ज़ैखन तैन केरे पापां केरि माफ़ी भोइजेइ, त फिरी पापां केरे लेइ बलिदानेरी ज़रूरत नई। 19 एल्हेरेलेइ ढूलाव ते बेइनव, असन यीशुएरे खूनेरे ज़िरिये सेइं मन्दरेरे परमपवित्र ठारी मां दाखल भोनेरी दिलेरी भोरीए। 20 यीशुए इश्शे लेइ अक नव्वीं ते ज़िन्दगी देनेबाली बत खोलोरीए, ज़ै तैनी पड़दे मां यानी अपने जिसमे मां मौतरे ज़िरिये इश्शे लेइ बनाई। 21 ते एल्हेरेलेइ इश्शो एत्रो महान याजक ज़ै परमेशेरे घरेरो मुखतियारे। 22 त एज्जा अस सच्चे दिले सेइं ते पूरे विश्वासे सेइं, ते एरो ज़मीर ज़ै खूनेरे तेप्पेइं सेइं पापेरे एसासे करां पवित्र कियोरि, ते एरो जिसम नेइतां ज़ै साफ पैनी सेइं धोवरोए, परमेशरे कां नेम। 23 ते अस एपनी उमीदरो इकरार रोडेचारे टलेइतां रखम, किजोकि ज़ैनी असन सेइं वादो कियोरिओ ते सच्चोए। 24 ते असेईं इस गल्लारू ध्यान लोडे रखोरू कि अस केन्चरे प्यार ते रोइं कम्मां केरे लेइ एक्की होरेरी हिम्मत बधाम। 25 ते एक्की ठैरी अकोट्टू भोनू न शारम, जेन्चरे होरे लोक केरतन बल्के अस एक्की होरि हिम्मत देथ, तुस ज़ैस हिसाबे सेइं परमेशरे दुबारे एजनेरी दिहैडी नेइंते लातथ तैस्से हिसाबे सेइं जादे एन गल्लन पुइ च़लते भी राथ। 26 किजोकि अगर अस सच्च पिशानेरां बाद, ज़ैनी बुइतां पाप केरम त पापां केरे लेइ कोई बलिदान बाकी नई रावरू। 27 हाँ, परमेशेरेरे इन्साफ ते भयानक अग ज़ै परमेशेरे दुश्मन भस्म केरेली तै बाकी आए। 28 ज़ैखन मूसरे कानून न मन्नेबाले, दूई या ट्लाई मैन्हु केरे गवाही देने सेइं तैस मैन्हु बगैर दया केरतां मौतरी सज़ा दिती गातीए। 29 त तै मैन्हु केत्री सज़ारो लैईक भोलो, ज़ैनी परमेशेरे मट्टू पावन हेठ ढलेन्चू, ते करारेरो खून ज़ैस सेइं तै पवित्र ठहरावरो थियो, तै अपवित्र समझो। ते पवित्र आत्मारी बेइजती की, ज़ेसेरे ज़िरिये असन अनुग्रह मैलते। 30 किजोकि अस ज़ानतम, तैनी ज़ोरू थियू, “बदलो

घिन्नो मेरू कम्मे, अवं एप्पू बदलो देइलो।” ते फिरी तैनी एन भी ज़ोवं, “प्रभु अपने लोकां केरि इन्साफ केरेलो।” 31 जीते परमेशेरेरे हथ्थन मां गानू बडी खतरनाक गल्ले। 32 पन तैना पेइले दिहाड़े याद केरा, ज़ैखन तुसन मसीह पिशानेरी लौ मैल्ली, ते तैसेरे बाद तुसेईं बेइ मुशकलातां केरो दैटतां मुकाबलोइ कियो। 33 यानी कथे त तुस लोकां केरे तुहीन केरने सेइं ते मुसीबती सेइं तुस तमाशो बने, ते कधी तुसेईं होरे मुसीबत बरदाशत केरते लाए ते तुसेईं तैन केरू साथ दित्तू। 34 किजोकि तुसेईं कैदन सेइं हमदरदी की, ते अपनो माल भी लुट्टानो खुशी सेइं कबूल कियो। किजोकि तुस ज़ानते थिये कि अक बडी बड्डी खास मलकियत तुसन कां आए ज़ै हमेशारे लेई आए। 35 एल्हेरेलेइ तुस हिम्मत न हरा, किजोकि तैसेरो फल बड़ो बड्ढोए। 36 तुसेईं बेइ सत्री सेइं कम कियेरू लोइते, ताके तुस परमेशेरी मर्जी पूरी केरतां तै चीज हासिल केरि सखथ ज़ेसेरो तैनी वादो कियोरिओए। 37 किजोकि जेन्चरे पवित्रशास्त्रे मां लिखोरू आए, “हुनी थोडु च़िर बाकी आए, कि एजनेबालो एज्जेलो ते च़िर न लाएलो। 38 पन मेरे धर्मा लोक मीं पुइ विश्वासे रखने सेइं जीते राले, अगर तैना मीं पुइ विश्वास केरने करां पत्रोवं हटन त मेरो दिल तैन पुइ खुश न भोलो।” 39 पन अस हटने बाले नई, कि परमेशरे पुइ विश्वास केरने करां पत्रोवं हटम ते नाश भोम, बल्के अस विश्वास केरनेबाले आम, ताके इश्शे प्राण बचाए गान।

11 हुनी विश्वास उमीद कियोरी चीज़ां केरू याकीन, ते अलैई चीज़ां केरू सबूते। 2 इश्शे दादे पड़दादन भी एरो विश्वास थियो। एल्हेरेलेइ परमेशर तैन पुइ खुश भोव। 3 विश्वासे सेइं असन पतो लगते कि दुनियारी हर चीज़ परमेशेरे वचने सेइं बनोरीए। एल्हेरेलेइ ज़ैन किछ अस लहतम, तैन लेइहोने बैली चीज़न सेइं नई बनोरोए। (aiōn g165) 4 विश्वासे सेइं आदमेरे मट्टे हाबिले अपने बडे ढूला केने केरां रोडू बलिदान परमेशेरे लेइ च़ाडू। ज़ेसेरी वजाई सेइं परमेशरे तैसेरू बलिदान कबूल कियू, ते तैसेरे बारे मां गवाही दिती, कि हाबिल धर्मा मैन्हु आए। हालांकी हाबिल मेरि जोरोए, फिरी भी अस तैसेरे विश्वासेरे ज़िरिये परमेशरे पुइ भरोसो केरनो शिखतम। 5 विश्वासे सेइं हनोक नव्वेरो मैन्हु मौती करां पेइलो जीतां स्वर्ग जो नीयो, ते तैसेरो पतो न च़लो, किजोकि परमेशरे तै स्वर्ग जो नीयोरो थियो, तैसेरे उबरे गाने करां पेइले तैसेरे हके मां गवाही दित्तोरी थी, कि तैनी परमेशर खुश कियो। 6 किजोकि विश्वासेरे बगैर परमेशर खुश केरनो नामुमकिने, बस्सा रोडू एने कि परमेशरे कां एजने बालन विश्वास कियोरि लोडे कि परमेशर आए, परमेशर तैन ज़ैना तैस सच्चैई सेइं तोपतन फल देते। 7 विश्वासे सेइं नूहे तैन गल्लां केरे बारे मां ज़ैना एजनेबाले वक्ते मां भोनी बैली थी, परमेशेरे तरफां हुक्म मैलतां परमेशेरे प्यारे सेइं तैस पुइ अमल कियू, ते अक किशती बनाई ज़ैस मां तैसेरू सारू टब्बर बचू, एन केरने सेइं तैनी सारी दुनिया मुज्रम बनाई ते एप्पू तैस धार्मिकतारो बारस बनो ज़ै विश्वासे सेइं हासिल भोचे। 8 विश्वासे सेइं ज़ैखन परमेशरे अब्राहम, ज़ैस जगाई गाने जो परमेशरे तै कुजोरि थियो, त तै हुक्म मेन्तां तैस जगाई च़लो जेव, ज़ै जगाई बादे मां

परमेश्वर तैस विरासतरो ज़ेरो देनेबालो थियो। हालांकी तै एन भी न थियो ज्ञानतो कि अवं कोरां चलोरोई, फिरी भी चलो जेव। 9 विश्वासेरे ज़िरिये सेइं तै परमेश्वरे कियोरे वादरे मुताबिक तैस मुलखे मां परदेशी केरो ज़ेरो तेम्बन मां गोइतां बस्सो। ते तैस सेइं साथी तैसेरू मट्टू इसहाक ते तैसेरू पोद्लडू याकूब भी राए, तैन भी परमेश्वरे करां तैए वादो मैलो ते तैना भी तेम्बन राए। 10 किजोकि अब्राहम तैस नगरेरे इंतज़ारे मां थियो (जैन स्वर्ग मांए) ज़ेसेरी मुनीयाद सदारे लेइ आए, ज़ेसेरो तियार केरनेबालो ते बनानेबालो परमेश्वरे। 11 विश्वासे सेइं सारा दोज़ीती भोनेरी ताकत हासिल की, हालांकी तै उमरारे हिसाबे सेइं बच्चो ज्ञानेरे काबल न थी राहोरी, सारा एन याकीन थियूं कि वादो केरनेबालो परमेश्वर अपने वादो पूरो केरेलो। 12 जेइस अब्राहम बडो बुड्डो थियो ते बच्चे पैदा केरनेरे काबल न थियो, अम्बरेरे तारां केरे ते समुदरेरी रेतारे बराबर एतू हछु वंश पैदा भोव। 13 एन सेबभी लोकेई परमेश्वरे पुइ भरोसो कियो ते मेरि जे, ते तैन तै कोई चीज न मैल्ली ज़ेसेरो वादो परमेश्वरे कियोरो थियो, तैनेई समझू कि परमेश्वर एन एजनेबाले वक्ते मां केरेलो, ते तैना इन भी समझते थिये, कि तैना ज़मीनी पुइ परदेशी ते मुसाफर आन। 14 ज़ैना एरी गल्लां ज़ोतन तैन सेइं एन साबत भोते, कि तैना अज़ तगर अपने मुलखेरी तलाशी मां आन। 15 अगर तैना तैस मुलखेरो खियाल रखते भोथे ज़ैस मरां तैना ओरे थिये, त तैना वापस गेइ बटते थिये। 16 पन असलीती मां तैना एककी रोडे स्वर्गेरे मुलखेरे उमीदी मां थिये, एल्हेरेलेइ तैनी तैन केरे लेइ अक नगर तियार कियोरोए। 17 विश्वासे सेइं अब्राहमे अपने इम्तिहानेरे मौके अपने मट्टे इसहाकेरू बलिदान देने करां न टलो, ज़ैन तैस परमेश्वरे वादे कबूल केरने बद् मैलोरो थियूं, तैस्से अकैल्ले मट्टे बलिदान केरने जो तियार भोइ जेव। 18 हालांकी परमेश्वरे तैस सेइं जोरू थियूं, “कि इसहाकेरे वंशे सेइं तेरे वंशेरू नवं रालू।” 19 किजोकि अब्राहमे याकीन थियूं, कि परमेश्वरे कां मुडदन ज़ीते केरनेरी शक्ति आए, एल्हेरेलेइ लेइ ज़ेन्चरे परमेश्वरे इसहाक मुडदन मरां फिरी वापस आनो। 20 विश्वासे सेइं इसहाके अपने दुइये मट्टन याकूबे ते एसावे आशिवादि दित्तो, कि एजनेबाले वक्ते मां तैना वादे पूरे भोले। 21 विश्वासे सेइं याकूबे मरते वक्ते यूसुफेरे दुइये मट्टन बरकत दित्ती ते अपने सोटरे सहारे सेइं परमेश्वरेरी आराधना की। 22 विश्वासे सेइं यूसुफे मरते बार पूरे याकीन सेइं जोरू थियूं, इस्राएली लोक मिस्र मुलखे शारेले। ते तैन हुक्म दित्तोरो थियो कि जेइस तैना मिस्र मुलखे मरां निसले त तैना तैसेरी हेड्डी साथी नेन। 23 विश्वासे सेइं मूसेरे हाज बव्वेई तैसेरे जरमनेरां पत्ती द्लाई महीन्न तगर छपेइतां रख्खो, किजोकि तैनेई हेरू कि तै बच्चो खासे, ते तैना राजेरो हुक्म टलोइने करां न डरे। 24 विश्वासे सेइं मूसा बड्डे भोइतां फिरीनेरे कुइयरू मट्टू बन्ने करां इन्कार कमाव। 25 पापेरे थोडे दिहाडे आनन्देरी ज़िन्दगी गुज़ारनेरे बजाहे तैनी परमेश्वरेरे लोकन सेइं साथी मिलतां दुख झैलनो चुनो। 26 तैनी मसीहरे लेइ दुख झैलनो मिस्रेरे खज़ानन् करां जादे दौलत समझी, किजोकि तै ज्ञानतो थियो कि तैस

स्वर्गे मां इनाम मैलनूए। 27 विश्वासे सेइं तैनी राजेरे सरकरो डर न कियो, बल्के मिस्र मुलख छेडी दित्तो, एल्हेरेलेइ तैनी समझोरू थियूं जेन्चरे तैनी न लेइहोने बाले परमेश्वरे लाहू। 28 विश्वासे सेइं मूसे इस्राएली लोकन हुक्म दित्तो कि तैना फ्रसह तिहारेरी दिहाडी बनानी ते गबडेरो खून दारन छिड़कन, ताके मौतरो स्वर्गदूत ज़ै परमेश्वरेरी तरफां भेजोरोए इस्राएलेरे पेइले मट्टन न मैरी बटे। 29 विश्वासे सेइं इस्राएली लोक लाल समुन्द्रे मांमेइ एन्चरे लंघे जेन्चरे शुक्कोरी ज़मीनी पुइमेइ पार निस्से, पन ज़ैखन मिस्रेइं तैट्टां पार लंघनेरी कोशिश की त तैना डुबतां मेरि जे। 30 किजोकि इस्राएली लोकेई परमेश्वरे पुइ विश्वास कियो, ते सत दिहैइन तगर यरीहो नगरेरे चक्कर लाए (जेन्चरे परमेश्वरे जोरू थियूं) ते दिवार डुल्ली। 31 विश्वासे सेइं राहाब वेश्या परमेश्वरेरे हुक्म न मन्ने बालन साथी नाश न भोइ; एल्हेरेलेइ कि तैसां इस्राएली जासूस शैन्ति सेइं अपने घरे मां आने ज़ैना छेपतां यरूहो नगरे हेरने ओरे थिये। 32 हुनी होरू किछ ज़ोनेरी ज़रूरत नई। हुनी मीं कां वक्त नई कि एरे ज़ेरे लोकां केरे बारे मां ज़ोई, जेन्चरे गिदोन, बाराक, शिमशोन, यिफतह, दाऊद, ते शमूएल ते हारे नबी। 33 तैनेई विश्वासे सेइं राज़ां ज़ीतां, ते धार्मिकतारां कम्मां कियां ते वादो कियोरी चीज़ां हासिल की, ते शेरेई तैना न खाए। 34 अग्गां तैना न फुके, ते तलवारी सेइं तैना न मारे जे, ज़ैखन तैना कमज़ोर थिये तैखन तैन ताकतबर बनाए, ते जंगी मां भी बहादर निस्से, ते तैनेई दुश्मना केरि फौज निशानी। 35 विश्वासे सेइं किछ कुआन्शन अपने मुओरे लोक ज़ीतो मैल्ले, किछ मार खांते-खांते मेरि जे। ते तैनेई अपने विश्वास शारनो न चाव, तैसेरे बदले मां तैनेई कैद रानू मन्ज़ूर कियूं, एल्हेरेलेइ तैना मरनेरां बाद फिरी ज़ीते भोन, ते तैन रोडी ज़िन्दगी मैल्ले। 36 किछ लोकां केरो मज़ाक बनाव जेव, किछ लोकन कोडे बाए, ते किछ शंगलन सेइं बंधे ते कैदखाने मां छडे। 37 ते किछन घोडेई बेई; ते आरे सेइं चिरे, ते तलवारी सेइं मारे जे। तैना गरीब थिये, तैन दुःख दित्तो जेव ते तैन सेइं बुरो बताव कियो जेव। तैना भैड्डां छैल्ली केरि खाडी लेइतां इरां उरां नशशते थिये। 38 तैना जंगलन ते पहाइन ते कुडन मां ते धेरतरे खडन मांमेइ हंठते थिये। 39 इन बुरू संसार तैन विश्वासी लोकां केरे काबल न थियूं, तैन सेबभी केरे विश्वासेरे वजाई सेइं परमेश्वर तैन पुइ खुश भोव, पन तैन, तैन मैल्लू जेसेरो वादो परमेश्वरे कियोरो थियो। 40 किजोकि परमेश्वरे कां न सिर्फ तैन केरे लेइ बल्के इश्शे लेइ रोडी योजनाए। परमेश्वरे तैन शुद्ध बनानो चाते, पन सिर्फ असन सेइं साथी।

12 एल्हेरेलेइ ज़ैखन गवाहां केरे एत्रो बड्डो घाने असां घेरोरेंम, त अस भी सैरी रकावतां ते तैस पापे दूर केरम ज़ै असन उलझाते, ते तैस दौडी ज़ै असेई दौवडनीए बल्हे सेइं दौवडम। 2 एज्जा अस विश्वासे मां पवित्र केरनेबाले यीशु पुइ नज़र रखम, ज़ैनी तैस खुशारे लेइ ज़ै तैसेरी नज़री मां थियो, बेइजतरी परवाह न की, बल्के क्रूसेरो दुख झैल्लो ते परमेश्वरेरे तखतेरे देइने पासे गेइतां बिश्शो। 3 तुस एस गल्ली पुइ खियाल केरा, कि अपने खलाफत केरनेबाले ज़ैनी पैपी केरि तरफां केत्रो दुख झैल्लो, ताके बेदिल भोइतां हिम्मत न हैरी। 4 तुसेई पापे सेइं लइते-

लड़ते हेजू तगर एत्रो मुकाबलो नई कियोरो कि तुसेई अपनो खून बगावरो भोए। 5 ते तुसेई तैन समझान बिसरी छडू, कि जैस मां तुसन जो मट्टां जोवं, “कि हे मेरे बच्चव परमेशररे हुकमे एरे न समझा। ते जैखन प्रभु तीं झिड़के त शारनेरे जेरे मैसूस न केर। 6 किजोकि जैस सेइं परमेशर प्यार केरते तैस झिड़के भी, ते जैस तै अपनू मट्टू बनाते तैस सोटेई भी बाते।” 7 ए हदैइत तुशे समझनेरे लेइए, एस बल्हे सेइं बरदाशत केरा, परमेशर तुसन अपना मट्टां सेमझतां बर्ताव केरते, किजोकि तैन कौन जेरू मट्टूए जैस तैसेरो बाजी समझाए नन्ना? 8 पन अगर तुसन सुधारे न गाथ जैस शामिल त तुस न गैर औलाद भोनेथ न की अपना मट्टां। 9 एसेरे अलावा जैखन इशशे जिसमानी बाजी सुधारते रहते थिये ते अस तैन केरि इज्जत केरते राए, त कुन आत्मां केरो बाजी यानी परमेशररी जादे इज्जत न केरम ताके ज़ींते राम। 10 इशशे जिसमानी बाजी त थोड़े दिहाड़ां केरे लेइ एपनी समझरे मुताबिक असन सुधारते रहते थिये, पन परमेशर इशशे फैइदेरे लेइ असन सुधारते ताके असां तैसेरी पवित्रतेई मां शामिल भौंम। 11 एसमां शक नई कि जैखन केन्वी हदैइत की गाचे त तै खुशी नई, बल्के बडू बुरू बुझते, पन जैखन तै बले-बले पक्की भोइ गाते त तैस बादे मां धर्मी बेनतां चैनरो फल मैलते। 12 बरसा एपनी कमजोर पैखड़न ते कमजोर जैन्थु मज़बूत केरा। 13 ते अपने पावन सिधी बत्तां चलाथ ताके टोंटे टेपलोए न ते तैना बेझोन। 14 सेभन सेइं मेल मिलापे सेइं राथ, ते तै पवित्रताई हासिल केरनेरी हर वक्त कोशिश केरा जेसेरे बौर कोई प्रभु न लेई सके। 15 खबरदार एरू न भोए कि कोई मैन्हु परमेशररे अनुग्रह करां रेइ गाए, एरू न भोए कि कोई ट्लिटू ज़ील लागे ते तुसन परेशान केरे ते होरे लोक भी भिटे भोइ गान। 16 ते न कोई मैन्हु तुसन मां बदमाशी केरनेबालो भोए, या एसावेरो जेरो अधर्मी न बने, जैनी एक्की बार रोटी खानेरे लेइ अपने बड़े भोनेरू हक बेचतां छडू। 17 किजोकि तुस ज्ञानतथ कि बादे मां जैखन तैनी तै बरकत हासिल केरनेरी कोशिश की, त तैस न मैल्ली, तैस अपनि नियत बदलनेरो मौको न मैलो हालांकी तै लेरां देइ-देइ तैस तोपनेरी कोशिश केरतो राव। 18 तुस तैस पहाड़े कां नेड़े नई ओरे, जैस सेइं तुस हरी सकते थिए, तैन पहाड़ अग्गी सेइं फुकोतू थियूं ते अंधगुबारी ते बड़ो तूफान थियो। 19 तैड़ी नइशिगेरी शोर ते ज़ोने शुनाने बालेरी एरी आवाज़ शुनोती थी, कि जैखन लोकेई तै आवाज़ शुनी त मिनत केरने लगे, कि असन सेइं होरि गल्लां न केर। 20 एल्हेरेलेइ कि तैनेई तै हुकम बरदाशत न केरि बटो, “अगर कोई जानवर भी एस पहाड़े सेइं हुरैलो त तै घोड़ेई बैइतां मारो गालो।” 21 तै नज़ारो एत्रो खतरनाक थियो कि मूसे जोवं, “अवं डरने ते थरकने लोरोई।” 22 बल्के तुस सिय्योनेरे पहाड़े ते ज़ींते परमेशररे नगर यानी स्वर्गेर यरूशलेमे मां लखेई स्वर्गदूतन कां खुशी मनाने ओरेथ। 23 ते तुस परमेशररी पेइले बच्चां केरि सभाई मां ते कलीसियाई मां ओरेथ, एना तैना लोकन जैन केरां नच्चां स्वर्ग मां लिखोरेन, तुस इन्साफ केरनेबाले परमेशरे कां ओरेथ, ते धेरमी केरि आत्मन कां ओरेथ, यानी तैन कां जैना सिद्ध कियोरेन। 24 तुस नंवे करारे बिचवाई केरनेबाले यीशु ते तैसेरे

छिड़कोरे खूने कां ओरेथ, जै हाबिलेरे खूने करां रोडी गल्लां ज़ोते। 25 खबरदार राथ, तुस परमेशर जै तुसन सेइं गल्लां केरते तैसेरो इन्कार न केरथ, किजोकि जैनेई ज़मीनी पुड़ हदैइत केरनेबालेरो इन्कार कियो त तैना न बंचे, त अगर अस स्वर्ग हदैइत केरनेबालेरो इन्कार केरमेले त केन्चरे बंचमेले? 26 तैखन तैसेरी आवाज़ी सेइं धरती हिली जेई पन तैनी ई वादो कियोरोए कि, “एक्की फेरे फिरी अवं सिर्फ ज़मीन नई बल्के अम्बरे भी हिलेइलो।” 27 तैसेरू “एक्की फेरे फिरी” ज़ोने सेइं साफ पतो लगते की पैदा कियोरी चीज़ां जैना हिलचन तैना खतम भोनिन ताके जैना हिलन नन्ना तैना रैनिन। 28 जैडी असन तैन राज़ मैलने लोरूए जैन हिलनेरू नई त एज्जा अस तैसेरू शुक्र केरम ते हिम्मत केरम कि, अस परमेशररी आराधना परमेशररे डरे सेइं केरि बटम जैस सेइं तै खुश भोए। 29 किजोकि इशशो परमेशर भस्म केरनेबैली अगारो ज़ेरोए।

13 एक्की होरि सेइं ढूला ते बेइनां केरो ज़ेरो प्यार केरते राथ। 2 बखले लोकां केरि खातरदारी केरा, किजोकि एरू केरने सेइं किछेई अनजाने मां स्वर्गदूतां केरि खातरदारी कियोरीए। 3 कैदन याद रखा, मन्ना कि जेन्चरे तुस एप्पू भी तैन सेइं साथी कैद आथ, ते जैन सेइं बुरो बर्ताव भोते तैन भी याद रखा, इन सेमझतां मन्ना कि जेन्चरे तुसन सेइं बुरो बर्ताव भोव। 4 इला बनानो सेभभी लोकन मां इज्जतरी गल समझी गाए, ते कुआन्थ ते मड़द एक्की होरेरे लेइ वफादार रान, किजोकि परमेशर बदमाशी केरने ते नाजाइज़ रिशते रखनेबालां केरो इन्साफ केरेलो। 5 अपने आपे दौलतरे लालचे करां दूर रखा, ते जेजू तुसन कां आए तेस्से मां राज़ी राथ, किजोकि परमेशरे एप्पू एन ज़ोरूए, “अवं तीं करां कथे भी दूर न भोइलो, ते न कथे तीं शैरेलो।” 6 एल्हेरेलेइ अस दिलेरी सेइं ज़ोई सकतम कि, “प्रभु मेरो मद्दत केरनेबालोए, अवं डेरि नन्ना इन्सान मेरू कुन बगैडी सकते?” 7 जैना तुशे अगुवे थिये, तैन याद रखा, जैनेई तुसन परमेशररू बच्चन शुनावरू थियूं, इस गल्ली पुड़ ध्यान देथ, कि तैना केरी जिन्दगी गुज़ैरतां चले जे, ते ज़ेरो विश्वास तैन थियो तुस भी तैन केरो ज़ेरो विश्वास केरा। 8 यीशु मसीह हीज ते अज़ बल्के हमेशारे लेइ अक्कां ज़ेरोए। (aiōn g165) 9 अलग-अलग किसमां केरि शिक्षाई सेइं न टेपलोथ, रूडू एन्ने कि तुशो दिल परमेशररे अनुग्रहे सेइं मज़बूत राए, न कि एरो परहेजेरे खाने सेइं, जेसेरे खाने बालन कोई फैइदो न मैलो। 10 इशशी अक एरी बलिदान केरनेरी ठारे, तैस मरां तैन खानेरी कोई अज़ाज़त नई जैना तेम्बु मां सेवा केरतन। 11 किजोकि महायाजक जैन जानवरां केरो खून मन्दरे मां परमपवित्र ठैरी मां पापेरे बलिदानेरे लेइ नेतो थियो, तैन केरो बाकी जिसम जैडी इस्राएली लोक रहते थिये तैट्टां बेइर फुकते थिये। 12 एल्हेरेलेइ, यीशुए भी लोक एप्पू अपने खूने सेइं पवित्र केरनेरे लेइ यरूशलेम नगरे करां बेइर दुःख झैल्लो ते मरो। 13 एल्हेरेलेइ, एज्जा अस भी यहूदी केरि रसमन शैरतां यीशु पुड़ विश्वास केरम ते तैसेरो ज़ेरो दुःख ते निन्दा झैल्लम। 14 किजोकि ई दुनिया इशशू हमेशारू घर नई, पन अस एजनेबाले घरेरे इतज़ारे मां आम

जैन एजनेबाले वक्ते मां इशशू भोलू। 15 एल्हेरेलेइ असां यीशुएरे ज़िरिये परमेशरेरे लेइ तारीफरू बलिदान चाढम, यानी ज़ैखन अस अपने शब्दन सेइं इकरार केरतम कि यीशु इशशो प्रभु आए। 16 पन भलाई केरनि ते जैन ज़रुरते तैन केरि मद्दत केरा, किजोकि परमेशर एरे ज़ेरे बलिदान्न सेइं खुश भोते। 17 अपने अगुवां केरो हुक्म मन्ना, ते तैन केरे अधीन राथ, किजोकि तैन केरे ज़िमेदारी कि तैना प्राणा केरि रखवाली केरन, ते एस कम्मरो तैनेई परमेशरे हिसाब भी देने पेनोए। अगर तुस तैन केरो हुक्म मन्नेले त तैना अपनू कम खुशी सेइं केरेले त तुसन फैइदो भोलो, पन अगर तैस कम तकलीफ बुझेले त तुसन कोई फैइदो न भोलो। 18 इशशे लेइ प्रार्थना केरते राथ, असन याकीने इशशो ज़मीर साफे, ते अस हर हिसाबे सेइं नेक नीती सेइं ज़िन्दगी गुज़ारनी चातम। 19 अवं तुसन कां बिनती केरताई कि मेरे लेइ प्रार्थना केरा, कि अवं फिरी लूशी तुसन कां एज्जी सेखी। 20 हुनी शान्ति देनेबालो परमेशर, ज़ैनी भेड्डां केरो महान रखवालो मतलब प्रभु यीशु मसीहे, इशशे प्रभु हमेशारे करारेरे खूने सेइं मुइदन मरां ज़ींतो कियो, (aiōnios g166) 21 तुसन हर रोडे कम्मे मां सिद्ध केरे, ज़ैस सेइं तुस तैसेरी मर्जी पूरी केरथ, ते ज़ैन किछ परमेशरे पसंद एइते तैस यीशु मसीहेरे ज़िरिये असन मां केरे, ते मसीहेरी बड़याई हमेशा-हमेशा भोती राए, आमीन। (aiōn g165) 22 हे ढूलाव ते बेइनव, अवं तुसन कां बिनती केरताई कि मेरी तुस तैना गल्लां सबरी सेइं शुना, ज़ैना मीं तुशशे हिम्मत बढानेरे लेइ लिखोरिन, किजोकि ई चिट्ठी ज़ै मीं तुसन लिखी बड़ी नई। 23 ताके तुसन पतो लग्गे कि इशशो विश्वासी ढूला तीमुथियुस कैदेरां छुटोरोए, ते अगर तै जल्दी अव, त अस दुइये तुसन सेइं मिलमेले। 24 अपने सेबभी विश्वासी लोकन ते सेबभी पवित्र लोकन जो इशशू नमस्कार ज़ोथ। इतालिया मुलखेरे विश्वासी लोकेई तुसन जो नमस्कार ज़ोरूए। 25 तुसन सेबभन पुइ परमेशरेरो अनुग्रह भोतो राए, आमीन।

याकूब

1 अवं याकूब, जै परमेशर ते प्रभु यीशु मसीहेरे दास आई। अवं तैन 12 यहूदी गोत्रां केरे विश्वासी लोकन जैना तितर बितर भोइतां सारे दुनियाई मां रातन, तैन जो नमस्कार लिखताई। 2 हे मेरे ढ्वालाव ते बेइनव, जैखन तुसन पुड़ अलग-अलग किसमां केरि अजमैइशां एज्जन, त एस खुशारी गल समझा, 3 किजोकि तुस ज्ञानतथ, तुशे विश्वासेरे परखे गाने सेइं इन साबत भोते, कि तुस हेजू तगर भी परमेशरे पुड़ भरोसो रखतथ, ते तुस मुशकलन सबरी सेइं झल्लेले। 4 पन मुशकलन मां सबर केरनि शिख्खा, कि तुस आत्मिकता मां मजबूत ते सिद्ध भोते गाथ, ते तुसन मां कोन्वी रोड़ी गल्लरी घटी न भोए। 5 पन अगर तुसन मरां कोन्वी अक्लारी घटी भोए, त तै परमेशरे करां मगगे, जै बगैर दोष लेइतां सेबनन खुशी सेइं देते, त मगने बाले दित्ती गाली। 6 पन विश्वासे सेइं मगगे, ते शक न केरे। किजोकि शक केरनेबालो समुन्द्रेरी छेल्ली केरो जेरोए, जैना हवाई सेइं चेलतितन ते उछड़तितन। 7 एरो मैन्हु इन न समझे, कि मीं प्रभु करां किछ मैलेलू। 8 ई मैन्हु दूमनोए ते एपनी सैरी गल्लन मां चंचल आए। 9 गरीब विश्वासी ढ्वाला खुश भोए, किजोकि परमेशरे तैसेरी आदर कियोरोए। 10 ते धनी विश्वासी अपने घटिया हालती पुड़ खुश भोए, किजोकि घासेरे फूडोवेंरो जेरो मिटी गातो। 11 दिहाड़ो निसते बडी धुप पेतीए, ते घासे शुकाते, ते तैसेरू फूडोंव झैडी गाते, ते तैसेरी शोभा गाती रहतीए; तेन्चरे दौलतमन्द ढ्वाला भी अपने कम्मन मां मैरी गानेन। 12 धने तै मैन्हु, जै अजमैइशी मां मजबूत रहते; किजोकि तै अपनो विश्वास साबत केरतां जिन्दगरू तैन इनाम हासिल केरेलो, जेसेरो वादो प्रभुए तैन सेइं कियोरोए, जैना तैस सेइं प्यार केरतन। 13 जैखन कोन्चेरी अजमैइश भोए, त तै इन न जोए, कि मेरी अजमैइश परमेशरेरी तरफां भोतीए। न बुरी गल्लन सेइं परमेशरेरी अजमैइश भोइ बटतीए, ते न तै बुरी गल्लन सेइं केन्चेरी अजमैइश केरते। 14 पन हर कोई अपने खुवैइशन मां खिचोइतां, ते फेसतां अजमैइशी मां गाते। 15 ते फिरी बुरू केरनेरी खुवैइशरो नितीजो ई भोते, कि मैन्हु बुरी चीजां केरतन, ते आखरी मां तैन हमेशारी सजा मैलतीए। 16 हे मेरे ढ्वालाव ते बेइनव, धोखो न खाथ। 17 किजोकि हर रोजू वरदान, ते हर रोजू दान इशे बाजी परमेशरेरे तरफां आए, जैनी सैरी लोआं (यानी दिहाड़ी चाँदनी, तारे) बनेइं। परमेशर हमेशा अक्कां जेरो आए, तै छावरो जेरो न बेदलो। 18 तैन अपने मेर्जा सेइं असन सच्चरे वचने जिरिये सेइं नव्वीं जिन्दगी दित्ती, ताके अस तैसेरी सचनार्ई मरां फसलारे जेरे पेइले फल भोम। 19 मेरे ढ्वालाव ते बेइनव, ई गल तुस ज्ञानतथ, एल्हेरेलेइ हर कोई मैन्हु शुन्नेरे लेइ हुशार ते जोने मां पत्रोंव भोए, ते सरकी मां ढिल्लो भोए। 20 किजोकि जैखन मैन्हु सरकी मां भोए त तै धार्मिकतारू कम न केरि बटे जैस सेइं परमेशर खुश भोए। 21 एल्हेरेलेइ सारी गंदगी ते दुष्ट दूर केरतां, तैन परमेशरेरू वचन नेरमी सेइं कबूल केरे, जैन दिले मां छड्डू जेव, जैन तुशे प्राणन मुक्ति देइ बटते। 22 पन परमेशरेरे वचने पुड़

चलनेबाला बना, ते सिर्फ शुन्ने बाले नई, जैना अपने आपे धोखो देतन। 23 किजोकि जै परमेशरेरू वचन शुन्ने बालो भोए, ते तैस पुड़ चलने बालो न भोए, त तै तैस मैनेरो जेरोए, जै अपनू तुतर शीशे मां हेरते। 24 ते तै अपनो आप हेरतां चलो गाते, ते तैखने बिसरते कि अवं केरो थियो। 25 पन जै मैन्हु कानूने ध्यान सेइं पढ़ते, जै पूरे तरीके सेइं असन आजादी देते, सिर्फ शुने न पन तेन्चरे कम केरते, तै अपने कम्मे मां बरकत हासिल केरेलो। 26 अगर कोई अपनो आप भक्त समझे, ते अपनि जिभी कैबू मां न रख्खे, तै अपने आपे धोखो देते, ते तैसेरी भक्ति बेफैदवी आए। 27 इशे बाजी परमेशरेरे नेडे शुद्ध ते रोड़ी भक्ति ई आए, कि बे सहारां ते विधवां केरे मुसीबती मां खबर नी गाए, ते अपनो आप दुनियारे बुरे सुभावेरे अस्सरे करां दूर रखम।

2 हे मेरे ढ्वालाव ते बेइनव, इशे मोहिमा बालो प्रभु यीशु मसीहेरो विश्वास तुसन मां तरफदेरी सेइं न भोए। 2 अगर अक मैन्हु सोन्नेरे छल्ले ते रोड़ां लिगड़ां लेइतां तुशे झुण्डे मां एज्जे ते अक गरीब भी मेलां लिगड़ां लेइतां एज्जे। 3 ते तुस तैस रोडे लिगड़न बालेरू तुतर हेरतां जोथ, “तू इडी रोडी ठैरी बिश,” ते तैस गरीबे सेइं जोथ, “कि तू इडी खडो रा, या इडी तल्ले बिश।” 4 त कुन तुसेईं भेद भाव न कियो, ते बुरे खियाले सेइं इन्साफ केरनेबाले न भोए? 5 हे मेरे ढ्वालाव ते बेइनव शुना, कुन परमेशरे दुनियारे गरीब न चुने, कि विश्वासे मां धनी भोन, ते तैस राज्जरे बारस भोन, जेसेरो वादो तैन तैन सेइं कियोरोए जैना तैस सेइं प्यार केरतन। 6 पन तुसेईं तैस गरीबेरी बेइजती की, कुन धनी लोक तुसन पुड़ जुलम न केरन? ते कुन तैना तुसन आदालतन मां घसीटी-घसीटी न नेन? 7 कुन तैना तैस रोडे नव्वेरी तुहीन न केरन जेसेरे तुसन जो ज़ोतन? 8 फिरी भी तुस पवित्रशास्त्रेरे इस वचनेरे मुताबिक, कि “तू अपने पड़ोसी सेइं अपनो जेरो प्यार केर,” सच्चे तैस राज-कानून पूरो केरतथ, त रोजू केरतथ। 9 पन अगर तुस तरफदारी केरतथ, त पाप केरतथ; ते मूसोरो कानून तुसन पापी ठहराते। 10 किजोकि अगर कोई मूसोरे सारे कानूने पुड़ चलते, ते एक्की गल्ली पुड़ न चेलि बटो त तै सेबभी गल्लन मां दोषी भोते। 11 एल्हेरेलेइ कि जैन इन जोवं, कि “तू बदमाशी न केरां,” तैन इन भी जोवं, “तू खून न केरां” एल्हेरेलेइ अगर तीं बदमाशी न की, पन खून कियो फिरी भी तू मूसोरे कानूने पुड़ चलने बालो न भोव। 12 तुशेरी गल्लां ते बर्ताव तैन लोकां केरे जेरो भोए, जैन केरो इन्साफ आजादी देनेबाले कानूनेरे मुताबिक भोलो। 13 किजोकि जैन दया न की तैसेरो इन्साफ बगैर दयाई सेइं भोलो। दया इन्साफे करां भारी भोतीए। 14 हे मेरे ढ्वालाव ते बेइनव, अगर कोई जोए कि मीं यीशु मसीह पुड़ विश्वासे, पन होरि केरे लेइ रोड़ां कम्मां न केरतो भोए, त तैस सेइं कुन फैइदो? कुन एरो विश्वास तैस मुक्ति देइ बटते? 15 अगर कोई विश्वासी ढ्वाला या बेइन भोए जैन लिगड़ा केरि जरूरत भोए, ते तैन रोज़ खाने जो न भोए। 16 ते तुसन मरां कोई तैन सेइं जोए, “खुशी सेइं गाथ परमेशर तुसन बरकत दे,” तुस गर्म राथ, ते रज्जा; पन जैना चीजां जानरे लेइ जरूरिन तैना तैन न दे, त कुन फैइदो? 17 तेन्चरे विश्वास भी,

अगर रोड़े कम्मन सेइं न भोए, त अपने सुभावे मां मर्रांए। 18 बल्के कोई जोई बटते कि, “तीं विश्वासे, ते अवं रोड़ां कम्मां केरताई।” पन अवं जोताई तू अपनो विश्वास मीं रोड़ां कम्मां केरे बगैर हिरा, ते अवं अपनो विश्वास रोड़े कम्मन सेइं तीं हिरालो। 19 तीं विश्वासे कि अक्के परमेशरे, तू रोड़ू केरतस, भूतां भी विश्वास केरतन, ते थरकतन। 20 पन हे निकम्मे मैन्हु तू इन न ज्ञानस, कि रोड़े कम्मन बगैर विश्वास मर्रांए। 21 ज़ैखन इशे पूर्वज अब्राहमे अपनू मडू इसहाक बलिदान केरनेरे ठैरी पुड़ च्हाडू, त कुन तै कम्मन सेइं धर्मी न भोव? 22 तीं हेरू कि विश्वासे तैसेरे कम्मन सेइं साथी अस्सर कियोरोए, ते कम्मन सेइं विश्वास सिद्ध भोव। 23 ते पवित्रशास्त्रेरो ई वचन पूरो भोव, “कि अब्राहमे परमेशरे पुड़ विश्वास कियो, ते तै तैसेरेलेइ धार्मिकता गनो जेव,” ते तै परमेशरेरो दोस्त भोव। 24 ते तुसेई हेरू कि मैन्हु सिर्फ विश्वासे सेइं नई, बल्के कम्मन सेइं भी धर्मी भोते। 25 तेन्चरे राहाव वेश्यां भी ज़ैखन तैसां बिस्तार देनेबाले लोक अपने घरे मां रखे, ते होरि बत्तां वापस भेजे, त कुन कम्मन सेइं धर्मी न भोइ? 26 ते जेन्चरे जान आत्मा बगैर मर्रां आए, तेन्चरे विश्वास भी रोड़े कम्मन बगैर मर्रांए।

3 हे मेरे ढूलाव ते बेइनव, तुसन मरां बड़े परमेशरेरे वचनेरे उस्ताद न भोन, किजोकि तुसन पतोए, कि इशो उस्तादां केरो इन्साफ जादे सेखती सेइं भोलो। 2 अस बड़े बार गेलती केरतम, ज़ै जोने मां गलती न केरे, तैए सिद्ध मैनुए, ते सारे जानी कैबू केरते। 3 ज़ैखन अस अपने कैबू मां केरनेरे लेइ घोड़ां केरे ऐशी मां लगाम लातम, त अस तैन केरि सारी जानी भी फेरी सखम। 4 हेरा, पैनरां जिहाज़ां भी, अगर बडां भोतन, ते तेज हवाई सेइं चलां गातन, फिरी भी एक्की निकड़ी पतवारी सेइं चलानेबालो अपने मेज़ीं सेइं फिराते। 5 तेन्चरे जिभ भी, अगर अक निकड़ो अंगे, ते बेड़ि-बेड़ि घमण्डेरी गल्लां केरती, तक्का, थोड़ी ज़ेरि अग्गी सेइं केरे बड़े-बड़े जंगले मां अग लाई गातीए। 6 जिभ भी अक अगारी ज़ेरीए, जिभ इशो जानी मां अक बुरो हिस्सो आए, ते सैरी जानी पुड़ कलंक लातीए, ते जिन्दगरी दुनियाई मां अग लातीए, ते नरकेरी अग्गी सेइं बलती रहतीए। (Geenna g1067) 7 हर किसमां केरे जंगली जानवर, चुड़ोलू, ते पेटेरे भारे बाले जीप जन्तू ते दरियारे जानवर त इन्सानेरे हथ्ये एज्जी बटतन ते ओरे भी आन। 8 पन जिभो मैनु मरां कोई भी कैबू मां न केरि सके, तै अक एरी बलाए ज़ै कथे रुके न, तै सप्पेरे जेहेरे ज़ेरीए नुकसान देने बालीए। 9 इस्से जिभो सेइं अस प्रभु ते बाजी परमेशरेरी तारीफ़ केरतम, ते इस्से सेइं मैन्हु, ज़ै परमेशरेरे रूपे मां बनोरोए श्राप देतम। 10 एक्की ऐशी सेइं शुक़ ते श्राप निसतन। हे मेरे ढूलाव ते बेइनव एरू न लोड़े भोरू। 11 कुन एक्की नागे मरां मिट्टू ते लूनू पानी निस्सी बटते? 12 हे मेरे ढूलाव ते बेइनव, कुन फेगेरो बुटे पुड़ ज़ैतून, या दाछी पुड़ फेगू लेगि बटतन? तेन्चरे लूनो नाग भी मिट्टू पानी न निस्सी बटे। 13 तुसन मरां ज्ञानी ते समझदार कौने? ज़ै एरो भोए तै अपने कम्मन रोड़े चाल चलने सेइं तैस नम्रता सेइं साथी बांदो केरे ज़ै ज्ञाने सेइं पैदा भोतीए। 14 पन अगर तुस अपने-अपने मने मां सखत

जलन, ते खुदगरज़ी रखतथ, त बेड़ि-बेड़ि गल्लां न केरथ ते सच्छेरे खलाफ झूठ न जोइयथ। 15 इन ज्ञान तैन नई, ज़ैन स्वर्गां ओरूए बल्के दुनियारू, ते जिसमानी, ते शैतानीए। 16 एल्हेरेलेइ कि ज़ैड़ी जलन, ते खुदगरज़ी भोतीए, तैड़ी फसाद ते हर बुरू कम भोते। 17 पन ज़ैन ज्ञान स्वर्गां एइते तैन पेड़लू त पवित्र भोते, फिरी मिलनसार, हलीम ते शिखालने बालू, ते दया ते रोड़े कम्मन सेइं ते बगैर तरफदारी ते पाखंडे बगैर भोते। 18 ते मिलाप केराने बालां केरे लेइ धार्मिकतरा फल मेल मलापे सेइं साथी बेव गाते।

4 तुसन मां लड़ाई ते झगड़े कोट्टां एइतन? कुन तैन खुवैइशन सेइं नई ज़ैना तुशे अंगन मां लेइतन? 2 तुस खुवैइश रखतथ, पन तुसन मैल्ले न, एल्हेरेलेइ तुस खून ते जलन केरतथ, ते किछ हासिल न केरि बटथ तुस झगड़तथ ते लड़तथ; तुसन एल्हेरेलेइ न मैल्ले, कि तुस मगथ न। 3 तुस मगतथ ते मैल्ले न, किजोकि बुरी इच्छा सेइं मगतथ, ताके अपने एशो मां खर्च केरथ। 4 हे बेईमान लोकव, कुन तुस न ज्ञानथ, कि दुनियारी चीज़न सेइं दोस्ती रखनी परमेशरे सेइं बैर केरनोए, ज़ै कोई दुनियारो दोस्त भोनो चाते, तै अपनो आप परमेशरेरो दुश्मन बनाते। 5 कुन तुस इन समझतथ, कि पवित्रशास्त्र बैफैइदू जोते कि, “ज़ै आत्मा तैने असन मां छडी, कुन तै एरी इच्छा केरती, ज़ेसेरो फल जलन भोए?” 6 पन ज़ै अनुग्रह परमेशर देते तै बडो मज़बूते, एल्हेरेलेइ पवित्रशास्त्रे मां इन लिखोरूए, “कि परमेशर अभिमान केरनेबालां केरो मुकाबलो केरते, पन दीनन पुड़ अनुग्रह केरते।” 7 एल्हेरेलेइ परमेशरेरे अधीन भोथ, ते ज़ैन शैतान तुसन करां करानू चाते तैन न केरा, त तै तुसन करां दूर नश्लो। 8 परमेशरेरे नेड़े एज्जा, त तै तुशे नेड़े एज्जेलो, हे पापी लोकव, अपने जिन्दगी करां पाप दूर केरा, ते हे दुम्ने बाले लोकव अपने मन्न पवित्र केरा। 9 अपने पापां केरे वजाई सेइं दुखी भोथ, ते शोग केरा, ते लेरां देथ, तुशशी हासी शोगे मां, ते तुशशी खुशी उदैसी मां बेदलोए। 10 प्रभुएरे सामने नम्र बना, त तै तुसन इज़्जत देइतां उच्चे केरेलो। 11 हे ढूलाव ते बेइनव, एक्की होरेरी तुहीन न केरा, ज़ै अपने ढूलाएरी तुहीन केरते, या अपने ढूलाए पुड़ दोष लाते, तै मूसरे कानूनेरी भी तुहीन केरते, ते मूसरे कानून पुड़ दोष लाते, ते अगर तू कानून पुड़ दोष लातस, त तू कानून पुड़ चलने बालो न भोव, पन तैसेरो हाकिम भोव। 12 मूसरो कानून देनेबालो ते हाकिम त अक्के, तै परमेशर आए, ज़ैस कां बचाने ते नाश केरनेरी शक्ति आए, तू कौन आस, ज़ै अपने पड़ोसी पुड़ दोष लातस? 13 तुस ज़ैना इन ज़ोतथ, “कि अज़ या कालां अस कोन्ची होरि नगर मां गेइतां अक साल बीतामेले, ते बुपार केरतां फेइदो उठामेले।” 14 ते इन न ज्ञानथ कि कालां कुन भोलू, शुना, तुशशी जिन्दगी आए कुन? तुस त भाखेरे ज़ेरेथ, ज़ै थोड़े चिरे लेइहोते, ते फिरी गेइब भोते। 15 एल्हेरेलेइ तुसेई इन जोरू लोड़े, “अगर प्रभु चाए, त अस जीते रहमेले, ते इन या तैन कम भी केरमेले।” 16 पन हुनी तुस अपने अभिमाने पुड़ घमण्ड केरतथ, एरू सब घमण्ड बुरू भोते। 17 एल्हेरेलेइ ज़ै कोई भलाई केरनि ज्ञानते ते न केरे, तैसेरेलेइ ई पापे।

5 हे दौलतमंदव विश्वासी लोकव, शुना, तुस अपने एजनेबाले दुखेरे लेइ ज़ोरे-ज़ोरे लेरां देथ। 2 तुशू धन नाश भोवं ते तुशशे लिंगडन खर लागे। 3 तुशशे सोन्ने चेंदी मोरचो लागे, ज़ेइस परमेशरे तुशशो इन्साफ केरेलो त ई मोरचो तुशशे खलाफ गवाहेरो ज़ेरो भोलो, ते अगगारो ज़ेरो तुशशू मास फुकेलो, तुसेई आखरी युगे मां धन अकोटू कियूं। 4 तक्का, ज़ैन मज़दूरेई तुशशां ऊडारां कट्टां, तैन केरि तै मज़दूरी ज़ै तुसेई तैन न दिती, चिन्डां मारने लोरीए, ते फसल कटने बालां केरि फरयाद फौजरे परमेशरे शुनोरीए। 5 तुस धरती पुड़ एश केरने मां लगगोरो राए, तुसेई सिर्फ अपने सुखेरे लेइ जिन्दगी ज़ी, एल्हेरेलेइ तुसेई अपनो आप तैस दिहाड़ेरे लेइ तियार कियोरोए ज़ेइस परमेशर तुशशो इन्साफ केरेलो। 6 तुसेई धर्मी दोषी बनेइतां मारो, तै तुशशे सामनो न केरे। 7 ते हे ढूलाव ते बेइनव, प्रभुएरे एजने तगर सबरी सेइं बलगा, हेरा, ज़मीनदार कीमती फसलरे कीमती फलेरे उमीदरो पेइली ते आखरी झैडी भोने तगर सबरी सेइं बलगते। 8 तुस भी तेन्चरे सबरी सेइं बलगा, ते अपने दिले मज़बूत केरा, किजोकि प्रभुएरू एजनू नेडूए। 9 हे ढूलाव ते बेइनव, एक्की होरि पुड़ दोष न लाथ ताके तुसन पुड़ भी दोष न लाव गाए, हेरा, हाकिम नेडे ते एजनेरे लेइ तियारे। 10 हे ढूलाव ते बेइनव, ज़ैन नेबेई प्रभुएरे नंवे सेइं गल्लां की, तैन सबर केरनेरो अक नमूनो समझा। 11 हेरा, अस बलगाने बालन जो धन ज़ोतम, तुसेई अय्युबेरे सबरारे बारे मां शुनोरूए, ते प्रभु करां तैसेरो ज़ै प्रतिफल भोव तैने भी बुझू, ज़ैस सेइं प्रभुएरी बडी महरबानी ते दया बांदी भोतीए 12 पन हे मेरे ढूलाव ते बेइनव, सेबन करां बड्डी गल ईए, कि कसम न खाथ, न स्वर्गोरी न धरतरी, न होरि कोन्ची चीज़री, पन तुशशी गल हांएरी हाँ, ते न एरी नां भोए, फिरी परमेशर तुसन सज़ा न देलो। 13 अगर तुसन मां कोई दुखी भोए त तै प्रार्थना केरे, अगर खुश भोए, त परमेशरेरां भजना ज़ोए। 14 अगर तुसन मां कोई रोगी भोए, त कलीसियारे बुजुर्गन कुजाए, ते तैना प्रभुएरे नंवे सेइं तैस पुड़ तेल मेलतां तैसेरेलेइ प्रार्थना केरन। 15 ते विश्वासेरी प्रार्थनाई सेइं रोगी बचेलो ते प्रभु तैस बज़्जालो, ते अगर तैने पाप कियोरे भोले त परमेशर तैस माफ़ केरेलो। 16 एल्हेरेलेइ तुस एक्की होरेरे सामने अपने-अपने पाप मन्ना, ते एक्की होरेरे लेइ प्रार्थना केरा, ज़ैस सेइं तुस बेज़्जोथ, धर्मी मैनेरे प्रार्थनारे अस्सरे सेइं बडू किछ भोइ बटते। 17 एलिय्याह भी इशशो ज़ेरो दुःख सुख झैल्लने बालो मैन्हु थियो, तैने दिले सेइं प्रार्थना की, कि झैडी न भोए, ते सडे ट्लाई साल झैडी न भोइ। 18 फिरी तैने प्रार्थना की, त अम्बरेरां झैडी भोइ, ते धरती पुड़ फसल भोइ। 19 हे मेरे ढूलाव ते बेइनव, अगर कोई विश्वासी परमेशरेरी सज़्जी शिक्षा मन्नी शारे, ते कोई तैस मनफिरानेरे लेइ मद्दत केरे, 20 त तै इन बुझे, कि ज़ै कोई कोन्ची भटकोरे पैपी मनफिरानेरे लेइ मद्दत केरे, त तै एक्की प्राणे (मैन्हु) मौती करां बचालो, ते परमेशर तैसेरे बडे पाप भी माफ़ केरेलो।

1 पतरस

1 अवं पतरस यीशु मसीहेरो प्रेरित आई, अवं ई चिट्ठी परमेशरेरे चुनोरे लोकां केरे लेइ लिखने लोरोई, जैना परदेशी केरे जेरे पुन्तुस, गलातिया, कप्टदूकिया, आसिया ते बितूनिया इलाकां केरे अलग-अलग नगरन मां तितर-बितर भोइतां रातन। 2 बाजी परमेशरे बडो पेइलो ई फैसलो कियोरो थियो कि तुस तैसेरे लोक भोथ त कने तै तुसन पवित्र आत्मा रे कम्मरे जिरिये पवित्र बनाए। तैने एन एल्हेरेलेइ कियूं ताके तुस यीशु मसीहेरी मन्न्थ ते तैसेरे खूनेरे जिरिये सेइं शुद्ध भोथ। अवं प्रार्थना केरताई कि परमेशर तुसन अनुग्रह ते शान्ति जादे करां जादे दे। 3 इश्शे प्रभु यीशु मसीहेरे बाजी ते परमेशरेरु शुक्र भोए, परमेशरे असन पुइ महान दया केरतां असन नर्वीं जिन्दगी दिती। किजोकि परमेशरे यीशु मसीह मुडदन मरां ज़ीतो कियो त कने तैने अस पूरी उमीदी सेइं जीनेरे काबल बनोरेम, मतलब असन तैन चीज़ां हासिल केरनेरी पूरी उमीदे, जैन केरो देनेरो वादो परमेशरे असन सेइं कियोरोए। 4 अस तैस विरासती हासिल केरनेरो इंतज़ार केरने लोरेम जै परमेशरे इश्शे लेइ तियार कियोरीए। कोई भी तैन चीज़न कधी बरबाद न केरि बटे। किछ भी तैस खराब केरि बटे। तैना चीज़ां कधी भी पुरैनी न भोली ते तैन केरि खूबसूरती कधे न घटेली। परमेशरे इना चीज़ां तुश्शे लेइ स्वर्गं मां रेखोरिन। 5 परमेशर तुसन अपने महान शेक्तेरे जिरिये सेइं सम्भाले, किजोकि तुस यीशु पुइ विश्वास केरतथ। तै तुसन यीशु मसीहेरे वापस एजने तगर सम्भैलतां रखेले। तेइस तुस ज़ानेले कि परमेशरे तुस पापे करां ते मौती करां पूरे तरीके सेइं बचावरेथ। 6 तुसेईं इन सेम्भी चीज़ां केरे बारे मां खुश भोरू लोड़े, चाए हुना किछ वक्तेरे लेइ अलग-अलग किसमेरी मुसीबतां तुसन दुखी केरतन। 7 इन मुसीबतां केरो मकसद ई आए कि इन बांदू भोए कि तुस सच्चे परमेशरे पुइ विश्वास केरतथ। तुश्शो यीशु मसीह पुइ विश्वास केरनो सोन्ने करां भी जादे कीमतीए। जेन्चरे नाश भोनेबालू सोन्नु अग्गी सेइं परखू ते शुद्ध कियूं गाते, तेन्चरे अगर तुश्शो विश्वास अगारे जेरे अज़मैइशन सेइं परखनेरे बाद भी मज़बूत रहते त जेइस यीशु मसीह फिरी एज्जेलो, परमेशर तुसन जो शाबाश ज़ोलो, महिमा ते आदर देलो। 8 तुसेईं यीशु मसीह कधे नई लवरो, पन फिरी भी तुस तैस सेइं प्यार केरतथ। तुस हुना तैस न लाथ पन तुस तैस पुइ विश्वास केरतथ। एसेरो नितीजो ई आए, कि तुस बडे खुश आथ। तुस एत्रे खुश आथ कि लफज़न मां बियांन न केरोए। 9 तुस एल्हेरेलेइ खुश आथ किजोकि परमेशर तुश्शे प्राण पापेरे सज़ाई करां बचाने लोरोए। इन यीशु मसीह मां तुश्शे विश्वासेरु इनामे। 10 ई मुक्ति किछ एरी थी जेसेरे बारे मां नबी बडू ज़ाननू चाते थिये। तैनेईं ज़ोवं केन्चरे परमेशर तुसन पुइ अनुग्रह केरतां बचालो जेसेरे काबल तुस न थिये, तैनेईं बडी जांच पड़ताल की, कि तैन जुवाब मैल्ले। 11 मसीहेरो आत्मा तैन मां थियो ते तैन सेइं ज़ोने लोरो थियो कि मसीहे केन्चरे दुःख झैल्लेलो ते तैट्वां बाद तैस महान आदर दिती गाली। एल्हेरेलेइ तैना इन

खोज केरतां तोपने लगे कि सच्चे मसीह कौन भोलो ते इन केइस भोलू। 12 पन परमेशरे इन अपने गल्लां ज़ोनेबालन सेइं ज़ोवं, कि तैन केरो सन्देश तैन केरे अपने आपेरे लेइ नई, पन तुश्शे लेइ आए। तै सन्देश यीशु मसीहेरे बारे मां खुशखबरी आए, जै तुसेईं इस वक्त शुनी। परमेशरे स्वर्गं पवित्र आत्मा भेजो कि लोकां केरि मद्दत केरे कि तैना तुसन खुशखबरी शुनान। इन सब एत्रे हैरान केरनेबालू ए कि स्वर्गदूत भी इन हेरनेरी बडी इच्छा रखतन। 13 एल्हेरेलेइ अपने मने तियार केरा ते अपने आपे कैबू मां रख्खा। तैस मुक्तीरी उमीद रख्खा जै तुसन अनुग्रहे सेइं तेइस मैलनी जेइस यीशु मसीह दुबारा इस दुनियाई मां एजने। 14 परमेशरे मन्ना किजोकि तुस तैसेरे बच्चेथ। बुरां कम्मां न केरा जैना तुस बुरी इच्छाई सेइं केरते थिये जेइस तुस परमेशरेरे सच्चाई न थिये ज़ानते। 15 पन हुनी तुस जैन किछ केरतथ तैस मां पवित्र भोथ, जेन्चरे परमेशर पवित्रे जैने तुस अपने बच्चे भोनेरे लेइ चुनोरेथ। 16 किजोकि पवित्रशास्त्रे मां परमेशरे ज़ोवरू ए “पवित्र बना, किजोकि अवं पवित्र आई।” 17 जैखन तुस प्रार्थना केरतथ तुस परमेशरे जो बाजी ज़ोतथ। पन याद रख्खा तै तरफदारी न केरे। एल्हेरेलेइ जैखन तुस इस दुनियाई मां परदेशी केरे जेरे रातथ त तुसेईं तैसेरी बडी इज़्ज़त कियोरी लोड़े। 18 किजोकि तुस ज़ानतथ, बीतोरें वक्ते मां तुस बेकार तरीके सेइं ज़ोते थिये जेन्चरे तुश्शे दादे-पड़दादे ज़ोते थिये। पन हुनी तुस बेकार जिन्दगी करां छुटावरेथ, तुस नाश भोनेबाले सोन्ने चैदी सेइं नई घिन्नोरे, 19 पन मसीहेरे कीमती खूने सेइं घिन्नोरेथ, मसीह जै शुद्ध ते सिद्ध गबडेरो जेरोए। 20 दुनिया बनाने करां पेइले परमेशरे इन ठहरावरू थियूं कि यीशु मसीह मुक्ति देनेबालो भोलो। पन तै इन आखरी दिहाइन मां इस दुनियाई मां अव ताके तुश्शी मद्दत केरे। 21 यीशु मसीहे जैन कियूं तैसेरे वजाई सेइं तुस हुनी परमेशरे पुइ विश्वास केरतथ, तैए आए जैने यीशु मसीह मुडदन मरां ज़ीतो कियो ते तैस आदर दिती ताके तुश्शो विश्वास ते उमीद परमेशरे पुइ भोए। 22 किजोकि तुस सच्च मननेरे जिरिये शुद्ध कियोरेथ, ते हुनी तुसेईं विश्वासी सैथन सेइं इमानदेरी सेइं प्यार कियोरो लोड़े। तुसेईं एक्की होरि सेइं गहराई ते पूरे दिले सेइं प्यार कियोरो लोड़े। 23 किजोकि तुसन परमेशरेरी तरफां नर्वीं जिन्दगी मैलोरी। तुसेईं ई जिन्दगी एरी चीज़ी सेइं नई हासिल कियोरी जै नाश भोली। पन तैस सेइं जैन हमेशा रालू। मतलब परमेशरेरे ज़ीते ते हमेशा रानेबाले वचने सेइं मैलोरीए। (aiōn g165) 24 किजोकि पवित्रशास्त्र ज़ोते “सारे लोक घासेरे जेरे आन ते तैन केरि शोभा जंगली फूडोवेरी जेरीए। घास शुक्की गालो ते फूडोवं झेड़ी गालू। 25 पन प्रभुएरू वचन सदा बनोरू रालू, ते वचन मसीहेरे बारे मां खुशखबरी जैन तुसन शुनव जेवं।” (aiōn g165)

2 एल्हेरेलेइ सब किसमेरो बुरो सलूख केरनो शारा। होरन धोखो न देथ, पाखंड न केरा। ते होरन सेइं जलन न केरा। होरि केरे बारे मां बुरी गल्लां न ज़ोथ। 2 जेन्चरे नंवे ज़मोरिे बच्चे अपने अम्मारे खालिस दुद्धेरी इच्छा रखतन, तेन्चरे तुस भी परमेशरेरू वचन शिखनेरे लेइ इच्छा रख्खा जैस सेइं तुस आत्मिक तरीके सेइं मज़बूत बनेले। फिरी आखरी मां

परमेश्वर तुसन दुनियायी बुरी चीजन करं पूरे तरीके सेईं बचालो। 3 जेन्चरे पवित्रशास्त्र जोते, “तुसेईं तजरबे सेईं ज्ञानेरूप कि प्रभु भलो आए।” 4 तुस प्रभु यीशु कां ओरथा। तै खास घोडेरे जेरोए जै घरेरे बुनियादी मां लोरोए, पन तै ज़ीतो घोड़े। बड़े लोकेईं तै रद कियो, पन परमेश्वरे तै चुनो ते बड़ो कीमती मन्नो। जेन्चरे लोक घोड़न सेईं घर बनातन, तेन्चरे परमेश्वर तुसन एककी एरे झुण्डे मां शामिल भोनेरी वजा बनाने लोरोए, जैस मां परमेश्वरेरो आत्मा रहते, ताके तुस जैन यीशु मसीहे इश्शे लेइ कियोरूप तैसेरे वजाईं सेईं याजक बना, जैना बलिदाना चाढतन, तुस भी तैन केरां जेरां रोडां कम्मां केरथ जैन सेईं परमेश्वर खुश भोते। 6 एल्हेरेलेइ जेन्चरे परमेश्वर पवित्रशास्त्रे मां जोते, “तक्का, अवं अक मैन्हु सिष्योन नगरे मां रखने लोरोईं। जै कूनरो खास ते चुनोरो घोड़े, तै अक कीमती घोडेरो जेरो जै मुनीयादी मां रखबोरोए। ते जै तैस पुइ विश्वास केरेलो तै कोन्ची भी तरीके सेईं शरमिनदो न भोलो।” 7 तुस जैना यीशु मसीह पुइ विश्वास केरतथ ईं घोड़ तुश्शे लेइ बड़ो कीमतीए। पन पवित्रशास्त्र तैन लोकां केरे बारे मां जोते जैना विश्वास न केरन, “जै घोड़ राज मिस्त्रेईं इस्तेमाल केरनो न चाव, तैए घरेरे मुनीयादरो खास घोड़ भोव,” 8 ते पवित्रशास्त्र फिरी जोते, “ईं घोड़ लोकां केरे बिछडेनेरी वजा भोलो। ईं अक चट्टाने जै तैन बिछोडेली।” तैना एन्चरे बिछडतन किजोकि तैना परमेश्वरेरे सन्देश मन्ने करां इन्कार केरतन। तैन सेईं इन भोनेरे लेइ परमेश्वर इन थापेरू थियूं। 9 पन तुस तैन केरे जेरे नईं किजोकि तुस परमेश्वरेरे चुनोरे लोक आथ, परमेश्वर जै राजोए, तुस तैसेरे याजक आथ, तुस एरे लोक आथ जैनेईं अपनो आप परमेश्वरे सॉफोरोए, ते परमेश्वरेरे अपने लोक आथ। तैन तुस आंधरे मरां बड़े लोईं मां कुजावरेथ, ताके तुस परमेश्वरेरे महान कम्मां केरे बारे मां एलान केरथ। 10 तुश्शे बारे मां होशे नेबे जैन जोरू तैन सच्चे, “तुस पेइले परमेश्वरेरे लोक न थिये पन हुनी तुस परमेश्वरेरे लोक आथ। तुस पुइ पेइले परमेश्वरेरी दयाईं न थिये ज्ञानते पन हुनी ज्ञानतथ, किजोकि तैन तुसन पुइ अपनि दया हिरावरीए।” 11 हे ट्लाराव, तुस इस दुनियाईं मां परदेशी ते मुसाफरां केरे जेरे ज़ीने लोरेथ, अवं तुसन खबरदार केरताईं, कि तुस जिसमेरी सैरी पापी खुवैइशन करां दूर राथ, किजोकि तैना हमेशा तुश्शे आत्मार खलाफ लेइतिन। 12 जैना लोक परमेश्वरे पुइ विश्वास न केरन तैना तुश्शे चेन्ने पासन रहतन, तैना जोले तुस गलत केरने लोरेथ। तुस एरी रोडी ज़िन्दगी ज़ीथ कि लोक तुश्शां रोडां कम्मां हेरतां तैस दिहाड़े ज़ेइस यीशु मसीह दुबारा एजोनो परमेश्वरेरी बडयाईं केरेले। 13 प्रभुएरे इज़्जतरे खातर, मैन्हु केरे ठहरावरे हर एककी अधिकारेरे अधीन राथ, किजोकि ईं प्रभुएरी इच्छा आए, हकोमत केरनेबालेरे अधीन एल्हेरेलेइ राथ किजोकि तै बड़ो खास अधिकारी आए। 14 ते हाकिमेरे भी अधीन भोथ, किजोकि राजो तैस बुरां कम्मां केरनेबालन सज़ा देने लेइ ते रोडां कम्मां केरनेबालां केरि तारीफ़ केरनेरे लेइ इस्तेमाल केरते। 15 किजोकि परमेश्वरेरी मज़ी ईए, कि तुस रोडां कम्मां केरतां तैना बेवकूफ़ लोकन जैना परमेश्वरे न ज्ञानन, तुश्शे खलाफ़ दोष लाने करां रोकथ। 16 हुनी तुस पापेरे गुलाम

नईं किजोकि तुस इश्शे प्रभु यीशु मसीहेरे ज़िरिये आज़ाद कियोरेथ। पन अपनि ईं आज़ादी बुरे कम्मां केरे लेइ इस्तेमाल न केरा, पन तुस भला कम्मां केरे ज़िरिये इन हिराथ कि तुस सच्चे परमेश्वरेरे दास आथ। 17 सेन्भी केरि आदर केरा, अपने विश्वासी साथी लोकन सेईं प्यार केरा, परमेश्वरे करां डरा, हकोमत केरनेबालेरी इज़्जत केरा। 18 हे घरन मां कम केरनेबाले सेवकव, तुस जैना विश्वासी आथ अपने मालिकां केरे हुकम मन्ना ते हमेशा तैन केरि आदर केरा। इन न सिर्फ़ दया केरनेबालन सेईं केरा, बल्के जैना दया न केरन तैन सेईं भी। 19 किजोकि अगर अस बगैर गलती केरतां दुःख झैल्लतम त अस ज्ञानतम कि परमेश्वरे सब किछ ज्ञानते ते परमेश्वर असन सेईं खुश भोते। 20 किजोकि अगर तुसेईं पाप केरतां मार खाइ त तुश्शी कोई बडयाईं नईं कि तुसेईं सज़ाईं मां सबर की। पन अगर भलाई केरतां दुःख झैलतथ ते सबर केरतथ त इस सेईं परमेश्वर खुश भोते। 21 परमेश्वरे तुसन कुजानेरी अक वजा ईं भी आए कि तुस तैसेरेलेइ दुःख झैल्ला, मसीह भी तुश्शे लेइ दुःख झैल्लतां तुसन अक मिसाल दिती। तुसेईं भी तेन्चरे कियोरू लोडे जेन्चरे मसीहे कियूं। 22 पवित्रशास्त्र जोते, तैन कधी पाप नईं कियोरो। तैन कधी झूठ नईं ज़ोवरू। 23 जैखन लोकेईं यीशु बेइज़्जत कियो, त तैन तैसेरे बदले मां तैना बेइज़्जत न किये। जैखन लोकेईं तैस दुःख दितो त तैन बदले मां तैन दुख न दितो, बल्के तैन परमेश्वरे पुइ भरोसो कियो कि तै तैसेरी मद्दत केरे। तै ज्ञानतो थियो कि परमेश्वर हमेशा धार्मिकताईं सेईं लोकां केरो इन्साफ़ केरते। 24 जैखन मसीह मरो, त तैसेरे जानी पुइ इश्शे पापां केरे लेइ तैस क्रूसे पुइ सज़ा दिती। तैन एन कियूं कि अस पाप केरनो बंद केरम ते धार्मिकतारी ज़िन्दगी ज़ीनी शुरू केरम। तैसेरे ज़खम जैना तैनी झैल्ले तैन केरे वजाईं सेईं अस बेइज़्जोए। 25 तुस पेइले टेपलोरी भैङ्गां केरे जेरे थिये, पन हुनी तुस मसीह कां वापस ओरथ जै तुश्शे प्राणा केरो पुहाल ते रखवालोए।

3 हे कुआन्शव, तुस भी अपने मुन्शां केरे अधीन राथ। एल्हेरेलेइ अगर इन मां कोई एरो भोए जै परमेश्वरेरे वचने न मनतो भोए, तुश्शे ज़ीनेरे तरीके सेईं तुश्शे बगैर ज़ोने तैन केरे विश्वास केरनेरी वजा भोली। तैना तुश्शे रोडे ते पवित्र बर्ताव हेरतां मसीह पुइ विश्वास केरेले। 3 ते तुश्शी सजावट दिखावेरी न भोए, मतलब अलग-अलग किसमे दोग बनानो, ते सोन्नेरे गेहने, या किसमां-किसमां केरां लिगडां लाना। 4 बल्के तुस अपने गुना केरे ज़िरिये अपनो आप खूबसूरत बनाथ जै तुसन करां दूर न गाए, मतलब नेरमी ते शांत रूभाव सेईं जै परमेश्वरेरे लेइ बड़ो कीमती आए। 5 ते पेइले जुमाने मां पवित्र कुआन्शां भी, जैना परमेश्वरे पुइ उमीद रेखती थी, तैना अपनो आप इस तरीके सेईं सज़ैती ते अपने-अपने मुन्शां केरे अधीन रेती थी। 6 जेन्चरे सारा अब्राहमेरे अधीन रहती थी ते तैस ज़ो मालिक ज़ोती थी, ते तुस भी अगर भलाई केरथ, ते केन्ची किसमेरे फिक्रन सेईं न डरथ त सारारे कुइयां केरि ज़ेरि भोली। 7 तेन्चरे हे मुन्शव, तुस भी समझदैरी सेईं कुआन्शन सेईं ज़िन्दगी बीताथ ते इन याद रखवा कि तैना तुसन करां कमज़ोरन, एल्हेरे तुसेईं तैन केरि

आदर कियोरी लोड़े, किजोकि तुस दुइये तैस वरदानेरे हिसेदार आथ जैन परमेशर तुसन अनुग्रहे सेई दितोरु आप, तै हमेशारी ज़िन्दगी आप। एरू केरा ताके ज़ैखन तुस प्रार्थना केरथ त परमेशर तुशशी प्रार्थना शुने। 8 आखरी मां अवं तुसन इन जोताई, तुसेई सैभेई अक मन भोवरू लोड़े ते एक्की होरि सेई हमदेरदी केरा ते एक्की होरि सेई ढूला बेइनां केरो ज़ेरो प्यार केरा, ते एक्की होरि पुड़ दया केरा, एक्की होरेरे लेइ नर्म बना। 9 बुरैइरे बदले बुराई न केरा, गैई केरे बदले गैई न देथ, पन इसेरे बदले बरकत देथ, किजोकि परमेशरे तुस होरन बरकतां देनेरे लेइ कुजावरेथ। अगर तुस इन केरतथ, त परमेशर तुसन भी बरकतां देलो 10 किजोकि पवित्रशास्त्र जोते, “अगर कोई मैन्हु ज़िन्दगरो आनन्द नेनो चाते, ते रोड़े दिहाड़े हेरने चाते त तैनी ध्यान लोड़े दितोरु कि बुरी गल्लां न जोए। ते तैनी होरन धोखो न लोड़े दितोरु। 11 ते बुरू केरनु बंद कियोरी लोड़े बल्के तैनी रोडू कियोरू लोड़े। होरन सेई मेल मिलापे सेई ज़िंनरे लेइ मेहनत कियोरी लोड़े। 12 किजोकि प्रभु तैन लोकां केरू ध्यान रखते जैना तैन्ने केरतन जैन सही आप, ते तै हमेशा तैन केरि प्रार्थना शुन्नेरे लेइ तियार रहते। पन परमेशर तैन केरे खलाफ कम केरते जैना बुरू केरतन।” 13 अगर तुस हमेशा भलू केरनेरी कोशिश केरथ, त फिरि कोई भी तुसन हकीकति मां नुकसान न पुजेई बटे। 14 अगर अस धार्मिकतारे स्थावरे वजाई सेई दुःख झैल्लम, त अस सच्चे धन भोले, पन अगर कोई असन डराते त तैस करां डरू न लोड़े ते न घबरावरू लोड़े। 15 पन इसेरे बदले, तुसेई मसीहेरी आराधना अपने ज़िन्दगरे प्रभुएरे रूपे मां कियोरी लोड़े। ते ज़ै कोई तुसन तुशशे उमीदरे बारे मां किछ पुच्छे जैस मां सारे विश्वासी शामिल आन, त तैस जुवाब देनेरे लेइ हमेशा तियार राथ, पन नेरमी ते आदरी सेई। 16 हमेशा तैन्ने केरा जैन सही भोए। तैखन अगर लोक तुशशे लेइ बुरू जोले त तैना मसीह सेई तुशशो रिशतो भोनेरे वजाई सेई तुशशो रोडो बर्ताव हेरेले त तैना छिथोले। 17 किजोकि इन रोडू आप अगर इशशां रोडां कम्मां केरे वजाई सेई अस दुःख झैल्लम, अगर इशशे लेइ परमेशरेरी इच्छा ई आप। इन इशशे बुरां कम्मां केरे वजाई सेई दुःख झैल्लने करां बडू रोडूए। 18 अवं इन जोताई, मसीहे भी इशशे पापां केरे लेइ दुःख झैल्लो ते मरो। तै एक्की बारे मरो ते तैस दुबारा मरनेरी ज़रूरत नई। तै अक धर्मी मैन्हु थियो ज़ै पापी लोकां केरे लेइ मरो ताके तै असन परमेशरे कां आने। तैनेई तैसेरो जिसम मारो पन तै पवित्र आत्मा रे शेक्ते ज़िरिये ज़िंती कियो 19 तैदां बाद तैसेरी आत्मा तैन आत्मान खुशखबरी शुनाने जेई, जैना परमेशरे तैस ठैरी कैद कियोरिन ज़ेड़ी मरें लोकां केरि आत्मा रैती थी। 20 इन तैन मैन्हु केरि आत्मा आन जैनेई बडे पेड़ले परमेशरेरो हुक्म न थियो मन्नोरो। ज़ैखन नूह किशती बनाने लोरो थियो, त परमेशरे बडे सबरी सेई बलमू कि तैना पापन करां मन फिरान। पन सिर्फ अठ तैस भयानक तूफाने करां बचे। 21 पुराने वक्ते मां तैन केरि मुक्ति हुना इशशे लेइ ज़ैखन अस बपतिस्मो नेतम मिसाले। जैस पैनी मां अस बपतिस्मो नेतम तैन इशशे जानरो मैल दूर न केरे, पन ई अक निशान आप कि असेई परमेशरे करां माफ़ी मगोरीए ताके इशशां मन

असन परेशान न केरे। असन माफ़ी मैल्ली बटतीए किजोकि यीशु मसीह मेरतां ज़िंती भोवरोए, 22 ते तै स्वर्गें जो जोवरो। तैड़ी हुनी ते परमेशरेरे देइने पासे खास ठैरी, तैड़ी तै सारे स्वर्गदूतन ते अधिकैरन ते शेक्तन पुड़ राज़ केरने लोरोए।

4 एल्हेरेलेइ ज़ैखन मसीहे जिसमे मां भोइतां दुःख झैल्लो, त जेन्चरे तैसेरो स्भाव थियो तेन्चरे तुस भी दुःख झैल्लनेरे लेइ तियार भोथ। किजोकि अगर तुस मसीहेरे लेइ दुःख झैल्लनो चातथ त तुसेई पाप न केरनेरो फैसलो कियो। 2 नितीजो ई भोलो, कि तै मैन्हु बाकी अपनि ज़िन्दगी मैन्हु केरे पापी खुवैइशां केरे मुताबिक इस दुनियाई मां न ज़ीयोले पन ते तैन्ने केरेलो जैन परमेशर तैस करां करानो चाते। 3 किजोकि बीतोरे वक्ते मां तुस गैर विश्वासी लोकां केरे ज़ेरे आनन्द केरने मां वक्त बर्बाद केरते थियो, ते तुस अपनि ज़िन्दगी एश केरने मां, बुरी खुवैइशन मां, ते तैन केरे तिहारन मां, शराब पीने मां ते नाच्रे मां, ते तैन केरि मूरती केरि पूजाई मां जैन सेई परमेशर नफरत केरते बीताते थियो। 4 एल्हेरेलेइ तुशशे पुराने दोस्त हैरान भोतन, ज़ैखन तुस तैन केरे बुरी गल्लन मां जैना तैन केरतन शामिल न भोथ, तांए तैना तुशशे बारे बुरू-भलू जोतन। 5 पन एक्की दिहाड़े तैनेई ज़रूर परमेशरेरे सामने इन्साफेरे लेइ खडू भोनु पेनुए। ते परमेशर तैन मरां हर एक्की जैन तैनेई इस धेतली पुड़ कियोरू तैसेरे बारे मां पुछेलो। परमेशर ज़िंते ते मुडदां केरो इन्साफ केरेलो। 6 ईए वजा आप कि मुडदन भी मसीहेरे बारे मां खुशखबरी शुनाई। तैन केरे जिसम भी एन्चरे मरे जेन्चरे सारे मैन्हु मरतन। पन हुनी तैना आत्माई मां परमेशरेरे सेई साथी हमेशा ज़ीइले। 7 सेबभी गल्लां केरो अन्त जल्दी भोने बालोए, एल्हेरेलेइ साफ तरीके सेई सोचा ते अपने आपे पुड़ कैबू केरा ताके तुस प्रार्थना केरी सकतथ। 8 सेबभन करां रोड़ी गल ईए, कि एक्की होरि सेई ईमादैरी सेई प्यार केरा, किजोकि अगर तुस लोकन सेई प्यार केरेले त तुस तैन केरि गेलती भी माफ़ केरनेरे लेइ तियार भोले। 9 ज़ैखन लोक तुशशे घरन मां एजन त बगैर कोन्ची शिकायतां तैन केरू स्वागत केरा। 10 हर एक्की परमेशरे करां वरदान मैलोरूपे ते तैनी तैन वरदान होरि केरि मदत केरनेरे लेइ इस्तेमाल कियोरू लोड़े। तैनेई तैना काई किसमां केरां वरदानां इस्तेमाल कियोरां लोड़न जैना परमेशरेरे अपने अनुग्रहे सेई दितोरन। 11 अगर तुसन कां प्रचार केरनेरू वरदाने त तुसेई परमेशरेरू वचन प्रचार कियोरू लोड़े। अगर तुसन कां होरि लोकां केरि मदत केरनेरू वरदाने त तैस शक्ति सेई केरा ज़ै परमेशरे तुसन दितोरीए। फिरि सब किछ जैन तुस केरेले तैस सेई यीशु मसीहेरे ज़िरिये परमेशरेरी महिमा भोली। सारी महिमा ते शक्ति हमेशा-हमेशा तैसेरीए। आमीन। (aiōn g165) 12 ट्लारव, जैना दुःख तुस झैल्लने लोरेथ तैन केरे बारे मां हैरान न भोथ किजोकि तुस मसीहेरे आथ। पन इना चीजां इन हिरानेरे लेइ भोनेरे लोरिन कि तुस सच्चे परमेशरे पुड़ विश्वास केरतथ की नई। एल्हेरेलेइ इन न सोचा कि तुसन सेई नर्वीं गल भोने लोरीए। 13 पन इसेरे बारे मां खुश भोथ, कि जैना दुःख मसीहे मैल्ले तुस भी तैन मां शामिल भोए। एल्हेरेलेइ ज़ैखन मसीह दुबारा एज्जेलो त सेबभी लोकन

पुड अपनि महिमा बांदी केरेलो, त तुस बडे खुश भोले। 14 फिरी अगर मसीहेरे नंब्बेरे लेड तुशशी तुहीन भोतीए, त तुस धन आथ। किजोकि परमेशरेरे महिमा बालो आत्मा तुसन मां रहते। 15 तुसन मरां कोई मैन्हु खूनी ते चोर, या कुकर्मी भोने, या होरि केरे कम्मन मां दखल देनेरे वजाई सेईं दुख न झैल्ले। 16 पन अगर मसीही भोने सेईं दुःख झैल्लथ त शरमाए न, पन इस गल्लेरे लेड परमेशरेरी बडीयाई केरे किजोकि तुस विश्वासी आथ। 17 किजोकि इन्साफेरो वक्त ओरोए, ते तै इश्शो विश्वासी लोकां केरो इन्साफ पेडलो केरेलो, तेन डरानेबैली गल्लां केरे बारे मां सोचा जैना तेन सेईं भोनिन, जैना खुशखेबरी पुड विश्वास न केरन जै परमेशरेरे तरफां एइतीए। 18 जेन्चरे पवित्रशास्त्र जोते, “अगर धर्मी मैनेरे लेड मुक्ति हासिल केरनि बडी मुशकलीए, त बुरे ते पापी मैन्हु पक्के नाश भोनेन।” 19 एल्हेरेलेड जैना परमेशरेरी मेरजरे मुताबिक दुःख झैल्लतन, तेनेईं तैस पुड लगातार भरोसो कियोरो लोडे जैने तेना बनाए। परमेशर हमेशा तेन केरते जैन केरनेरो वादो तेनी कियोरोए ते तै लगातार तेन केरेलो जैन रोडूए।

5 अवं साथी बुजुर्गन सेईं इन ज़ोनू चाताईं किजोकि अवं तुशशो ज़ेरो आईं। मीं एप्पू तेना दुःख हेरोरेन जैना मसीहे बडे पेडले झैल्ले। ज़ैखन ते दुबारां एज्जेलो, त अवं तैसेरे महिमा मां शामिल भोनोईं। अवं तुशशो साथी बुजुर्ग भोने सेईं तुसन कां ई बिनती केरताईं, 2 जेन्चरे पुहाल अपनि भैड्डां हेरतन, तुस भी तेन्चरे हर एक्केरी हेरगेश केरा, जैना परमेशरे तुशशे रखवैली मां रखोरेन। इन अपने मेज्जां सेईं केरा किजोकि परमेशर इन चाते। तुस इन एल्हेरेलेड न केरा कि तुसन पुड दबाव बनाव गाते। ते इन कम एल्हेरेलेड न केरा कि तुस कमाई केरनि चाथ, पन इस इच्छाई सेईं केरा कि तुस परमेशरेरी ते लोकां केरि सेवा केरनि चातथ। 3 ते जैना लोक तुसन सॉफे तेन पुड हकोमत न केरा, बल्के तेन केरे लेड रोडी मिसालां बना। 4 ते ज़ैखन यीशु मसीह ज़ै इश्शो प्रधान पुहालेरो ज़ेरोए, वापस एज्जेलो त तै तुसन तेन इनाम देलो ज़ेसेरी शोभा कधे खतम न भोली। 5 तेन्चरे हे जवान लोकव, तुस भी बुजुर्गां केरे अधीन राथ, तुस सारे एक्की होरेरी महद बडे नर्म रूभावे सेईं केरा। किजोकि कोई पवित्रशास्त्रे मां पेढी बटते “परमेशर घमण्ड केरनेबालां केरि खलाफ केरते, पन ते तेन केरे लेड रोडो आए जैना दीन आन।” 6 एल्हेरेलेड अपनो आप परमेशरे कां दीन बनाथ ते तुशशी हफाज़त केरनेरे लेड शेक्ति बालोए, जैस सेईं तै तुसन ठीक वक्ते पुड आदर दे। 7 परमेशरे अपने परेशैनी ते फिकरां केरे बारे मां ज़ोथ, किजोकि तैस तुशशू ध्यान आए। 8 खबरदार राथ, ते बींझे राथ, किजोकि तुशशो दुश्मन शैतान तुसन पुड हमलो केरनेरे लेड तियारे, कि तुस परमेशरे मन्नु शारा। ते गज़्निबाले शेर ज़ेरो तोपने लोरो कि केस मारे ते खाए। 9 तुस विश्वासे मां मज़बूत भोइतां तैसेरो मुकाबलो केरा, तेन विश्वासी लोकन याद रख्खा जैना दुनियारे अलग-अलग ठैरन मां आन, तेना भी तुशशो ज़ेरो दुःख झैल्लने लोरेन। 10 हुनी परमेशर ज़ै सारे अनुग्रहे सेईं भेरतां, तेने अस हमेशारी महिमा मां शामिल भोनेरे लेड चुनोरेम किजोकि इश्शो

रिशतो यीशु मसीह सेईं आए। थोडे वक्तेरे दुःख झैल्लनेरे बाद परमेशर तुसन सही बनालो ताके तुसन मां कोई गलती न राए, ते तुशशे दिलन मज़बूत केरेलो ताके तुस मज़बूती सेईं तैस पुड विश्वास केरथ। (aiōnios g166) 11 ते शेक्ति सेईं हमेशा राज़ केरेलो। आमीन। (aiōn g165) 12 मीं सिलवानुसेरे महदती सेईं ई निकडी ज़ेरे चिटी लिखी ते तुसन जो भेज़ी, अवं तैस ज़ानताईं तै मसीह मां वफादार ढूला आए, मेरे लिखनेरो मकसद ई आए कि तुशशो होसलो बधेईं ते याकीन दूवेईं कि ज़ै तजरबो तुस केरने लोरोरेथ ते सच्चे परमेशरेरे अनुग्रहेरो अक हिस्सो ए, इस अनुग्रहे मां मज़बूती सेईं बनोरे राथ। 13 बाबेल नगरेरे विश्वासी जैना परमेशरे चुनोरेन ठीक तेन्चरे ज़ेन्चरे तुस चुनोरेथ, तेना तुसन जो नमस्कार ज़ोतन। मरकुस ज़ै मेरे मट्टेरो ज़ेरोए तुसन जो नमस्कार ज़ोते। 14 मसीहेरे प्यारे सेईं एक्की होरि जो नमस्कार केरा। अवं प्रार्थना केरताईं परमेशर तुसन सेबन ज़ैन केरो रिशतो मसीह सेईं साथी शान्ति दे।

2 पतरस

1 अवं शमौन पतरस, यीशु मसीहेरो दास ते प्रेरित आई, अवं तुशशे सेबभी केरे लेइ लिखने लोरोई, तुस भी तैस कीमती विश्वासे मां शामलथ जै अस केरतम, ई विश्वास असन यीशु मसीह, इशशे परमेशर ते मुक्ति देनेबाले जिरिये दित्तो जेव, जै असन धर्मी बनाते। 2 अवं प्रार्थना केरताई जेन्चरे तुस परमेशरेरे ते प्रभु यीशुएरे ज्ञाने मां बढते गाथ, परमेशरे तुसन अनुग्रह ते शान्ति जादे करां जादे दे। 3 परमेशर अपने शक्ति सेइं असन तैन सब दितोरू जैन असन परमेशरे खुश केरनेरी ज़िन्दगी जींनरे लेइ लोइते। इन भोइ बटते किजोकि अस परमेशरे ज्ञानतम कि तैने अस अपने महिमा ते अपने रोडे गुना केरे मुताबिक तैसेरे लोक भोनेरे लेइ कुजोरेम। 4 इन सेबभी केरे जिरिये परमेशरे असन महान ते कीमती वरदानां दितोरन जैन केरो तैनी वादो कियोरो थियो, इन वरदानां इस्तेमाल केरतां अस दुनियारी बुरी इच्छान करां बेची बटतम, जैना लोकन नाश केरतन, ते अस परमेशरेरे रूभावे मां शामिल भोइ बटतम। 5 एल्हेरेलेइ तुसेईं न सिर्फ यीशु पुइ विश्वास कियोरो लोडे, बल्के होरि केरे लेइ भलाई केरनेरे लेइ सखत मेहनत भी कियोरी लोडे, तुसेईं न सिर्फ तैन कियोरू लोडे जैन रोडू भोए, बल्के तुसेईं एरे लोक बनोरू लोडे जैना ज्ञातन समझदारी सेइं केन्चरे बताव केरतन, 6 तुसेईं सिर्फ इन न लोडे ज्ञानोरू कि समझदारी सेइं केन्चरे बताव केरतन, पन तुसेईं अपनो आप कैबू भी कियोरो लोडे, तुसेईं न सिर्फ अपनो आप कैबू मां लोडे कियोरो, बल्के मुसीबत मां सबर भी कियोरी लोडे, तुसेईं न सिर्फ मुसीबत मां सबर कियोरी लोडे बल्के तुसेईं एरी ज़िन्दगी भी जीयोरी लोडे जैस सेइं परमेशर खुश भोए। 7 तुसेईं न सिर्फ एरी ज़िन्दगी जीयोरी लोडे जैस सेइं परमेशर खुश भोए, बल्के तुसेईं एक्की होरि विश्वासी लोकन सेइं अपने टब्बरेरे लोकां केरो जेरो प्यार भी कियोरो लोडे, तुसेईं एक्की होरि सेइं न सिर्फ अपने टब्बरेरे लोकां केरो जेरो प्यार कियोरो लोडे बलके तुसेईं सैरी लोकन सेइं प्यार कियोरो लोडे। 8 अगर तुस एन्चरे ज़ीले त तुस इशशे प्रभु यीशु मसीह ज्ञानेले ते तुस इस्तेमाल भोनेबाले ते फलदार भोले। 9 पन अगर कोन्ची मां इना गुण न भोन त तै एरे मैनेरो जेरोए जै कानोए, ते तैने बिसरोरूए कि परमेशरे तै तैसेरे पुराने पापन करां साफ कियोरोए। 10 एल्हेरेलेइ हे ढूलाव ते बेइनव, एन्चरे कम केरनेरे लेइ होरि जादे मेहनत केरा, जैस सेइं तुस अपनो आप साबत केरा कि परमेशरे तुस हकीकत मां तैस पत्ती च़लनेरे लेइ चुनोरेथ ते तैसेरे लोक भोनेरे लेइ चुनोरेथ। अगर तुस इना गुणा केरे मुताबिक केरेले त तुस कधी मसीह पुइ भरोसो केरनो न शारेले। 11 ते परमेशर भी तुसन तैस राज़े मां बडे जोशे सेइं कबूल केरेलो जैडी यीशु मसीहे, जै इशशो प्रभु ते इशशो मुक्ति देनेबालोए, तै राज़ेरो जेरो हमेशा राज़ केरेलो। (aiōnios g166) 12 चाए तुस इना सैरी गल्लां ज्ञानतथ, ते सच्च़ी शिक्षा तैस मां तुस मज़बूती सेइं बनोरे रातथ, जै लोकेई तुसन शिखालोरी, अवं तैन केरे बारे मां लगातार याद किरैइलो। 13 अवं ज्ञानताई ज्ञातगर अवं

जींतोई, तैन केरे बारे मां लगातार तुसन ज़ोनू सही आए, ताके तुस तैन न बिसरथ। 14 किजोकि अवं ज्ञानताई, अवं जल्दी मरनोई, किजोकि इशशे प्रभु यीशु मसीहे मीं एल्हेरे बारे मां साफ ज़ोवरूए। 15 एल्हेरेलेइ अवं इना गल्लां केरे बारे मां ज़ोनेरी बडी कोशिश केरताई, ताके तुस मेरे मरनेरां पत्ती इना सैरी गल्लां याद केरि बटथ। 16 ज़ैखन असेईं प्रेरितेई तुसन अपने प्रभु यीशु मसीहेरी शक्ति ते एजनेरी खबर शुनावरी थी, त असेईं च़लैकी सेइं बनेवरी कहैनी न ज़ोई बल्के असेईं मसीहेरी तैस महिमारे बारे मां ज़ोवं जै असेईं अपने एछ़ेईं सेइं लाई। 17 ज़ैखन अस तैस सेइं साथी पवित्र पहाडे पुइ थिये ज़ैखन बाजी परमेशरे तैस आदर ते महिमा दित्ती। तैस वक्ते परमेशरे करां तैस महान महिमाई मरां आवाज़ आई, “इन मेरू ट़लारू मट्टूए जैस सेइं अवं खुश आई।” असेईं एप्पू ई आवाज़ स्वर्गां शुनी। 18 अस नेबी केरू वचन भी ज्ञानतम, जैन तैनेई मसीहेरे बारे मां ज़ोवं तैन बिलकुल सच्च़े, तैना इस बारे मां पक्कू केरतन जैन असेईं तुसन तैसेरे वापस एजनेरे बारे मां शिखालू। तुसेईं तैना गल्लां ध्यान सेइं शुनोरी लोइन, जेन्चरे दीयो आंधरे मां बलते ते लोकन सही बत्तां गानेरे लेइ मद्दत केरते, इन वचन तुशशी इन ज़ान्नेरे लेइ मद्दत केरेलू कि सच्च कुने। 19 तुसेईं तैन वचन रोडे च़ारे शुनोरे लोइन ज्ञातगर इशशो प्रभु यीशु मसीह वापस न एज्जे। तैसेरू एजनु एरू भोलू जेन्चरे नंवे दिहैइरी लौ भोली, ते तै झेइंरे तारेरो जेरो भोलो। तैस वक्त तैसेरी लौ तुशशे दिलन मां चमकेली त कने तुसन पुइ परमेशरे बांदा केरेली। 20 पन इन ज़रूरी कि तुस नेबी केरू वचन जैन तुस पवित्रशास्त्रे मां पढतथ, तैन वचन तैन केरे अपने खियाल नई। 21 किजोकि कोई भी भविष्यवाणी मैन्डू केरे मेज़ीं सेइं न भोइ, पन भक्त लोक पवित्र आत्मा अगवैई सेइं परमेशरेरे तरफां सन्देश ज़ोते थिये।

2 ते जेन्चरे बडे पेइले इस्राएली लोकन मां झूठे नबी थिये, तेन्चरे तुसन मां भी झूठे उस्ताद भोले। तैना बल्हे च़ारे तुसन मां एज्जेले ते परमेशरेरे बारे मां नाश केरनेबालू झूठ ज़ोले। इडी तगर तैना मसीहेरो इन्कार केरेले कि तै प्रभु नई ज़ैने तैना पापन करां आज़ाद किये। एन्चरे केरने सेइं तैना एप्पू पुइ विनाश आनेले। 2 परमेशरेरे बडे लोक तैन इन झूठे उस्तादां केरे बुरे कम्मां केरि नकल केरेले, ते तैन बुरां कम्मां केरे वजाई सेइं सच्च़े बतारे खलाफ बुरी गल्लां ज़ोले। 3 इना उस्ताद बडे लालची भोले ते तैना तुसन बनेवरी कहैनी शुनेइतां तुसन थोखो देले, ताके तुसन करां पेइंसो हासिल केरन। परमेशरे बडे पेइले ई फैसलो कियोरो कि तैन सज़ा दे ते तै इन केरनेरे लेइ तियार भी आए, तैसेरे एजने मां किछ भी च़िर नई, ते तैन केरो विनाश बलगतोए। तै पक्को तैन नाश केरेलो। 4 तुस ज्ञानतथ बडे पेइले किछ स्वर्गदूतेई परमेशरेरो हुक्म न मन्नो, जैन तैनेई कियू तैसेरेलेइ परमेशरे तैन सज़ा दित्ती। तैन तैना नरके मां छ़ट्टे, ते तैस दिहैडी तगर आंधरे मां केद किये ज्ञातगर तै तैन केरो इन्साफ न केरे ते तैन सज़ा न दे। (Tartaroō g5020) 5 तुस इन भी ज्ञानतथ जैना लोक बडे पेइले इस दुनियाई मां ज़ोते थिये तैनेई

परमेशरेरो डर न मन्नो, परमेशरे तैन केरां बुरां कम्मां नजरानदाज न कियां। बल्के तैनी पानी भेजतां तैन सजा दित्ती जैस मां सारी धरती छुप्पी ते तैना सारे नाश भोए। पन तैने तैन मरां नूहे समेत अठ लोक बचाए, जैने धार्मिकतारो प्रचार कियो। 6 परमेशरे सदोम ते अमोरा नगरन सजा दित्ती, तैना भस्म भोइतां मांजन बना, एन केरतां परमेशरे लोक खबरदार किये, कि जैना तैसेरे हुकम न मनन तैन सेइं भी एरू भोलू। 7 पन सदोम ते अमोरा नगरन नाश केरने करां पेइले तैने धर्मी लूत नगरे करां बेइर कढे ते बचाव। लूत तैन लोकन सेइं खुश न थियो किजोकि तैना कोई भी कानून न थियो मन्ते ते बेशर्मा कम्मां केरते थियो। 8 (लूत धर्मी मैन्हु थियो, पन तै रोज तैन बुरे लोकन मां रातो थियो, एल्हेरेलेइ जैन बुरी गल्लां तै शुनतो थियो ते हेरतो थियो तैन सेइं तैसेरो रोडो दिल बडो दुखी भोतो थियो)। 9 इन सैरी गल्लां जैना परमेशरे कियोरिन इन हिरितिन कि प्रभु परमेशर अपने धर्मी लोकन तैन केरे मुसीबतरे वक्त तैन सम्भालेलो, ते इन्साफेरे दिहाड़े तगर बुरे लोकन सजा देतो रालो। 10 परमेशर तैन झूठे उस्तादन पक्की सजा देलो, जैना इना गल्लां अपने गलत ते बुरी खवैइशन सेइं केरतन, ते तैना परमेशरेरे अधिकारे जै तैन पुड़े घटया समझतन, ते तैना ढीठ ते घमण्डी आन। तैना स्वर्गे प्राणेरी केरे बारे मां बुरू जौने करां न डरन। 11 स्वर्गदूतां केरे बारे मां सोचा, तैना तैन झूठे उस्तादन करां बडे शक्ति बालेन। तैना जैखन इन झूठे उस्तादन पुड़ परमेशरेरी हज्जरी मां दोष लातन, त गलत ज़बान इस्तेमाल न केरतन। 12 पन इना झूठे उस्ताद जंगली जानवरां केरे ज़ेन, इना जानवर न ज्ञानन केन्चरे सोचोरू लोड़े तैन केरो मकसद सिर्फ ट्लानू ते मारनू भोते। इन लोक भी जैन तैन केरे मने मां एइते तैन केरतन, ते जैन गल्लन न समझन तैन केरे बारे मां बुरू ज़ोतन, तैना पक्के नाश भोनेन। 13 तैन नाश भोनू तैन केरे कियोरे नुकसानेरो इनामे। तैन भर दूपार्न एश केरनो रोडो लगते, तैना तुसन मां कलंक ते दाग आन। इडी तगर कि तैना तुसन सेइं धामन मां खातन-पीतन फिरी भी धोखे देने मां खुश भोतन। 14 तैना जैस कुआन्शी भी लातन तैस सेइं बदमाशी केरनि चातन। तैना पाप केरने लेइ मौके तोपने कधी न शारन। तैना तैन लोकन धोखो देतन जैना मसीह पुड़ मज़बूती सेइं विश्वास न केरन ते तैन पापे मां नेतन। तैन केरि जादे करां जादे बुरी इच्छां केरे वजाई सेइं परमेशर तैन सजा देलो। 15 तैनेई सही केरनू बंद कियोरूप, ते तैनेई तेन्चरे बुरां कम्मां केरनां शुरू कियां जेन्चरे बडे पेइले बओरेरे मट्टे बिलामे कियोरां थियां। तैनेई बुरी चीजां केरतां पेइसे कमाने पसंद कियो। 16 परमेशरे तै तैसेरे बुरेइरे लेइ डांटो जै तैनी कियोरी थी, तैसेरे गेधां मैन्हु केरि भाषाई मां गल की ते नबी गलत केरने करां रोको। 17 इन झूठे उस्ताद शुक्कोरे खूआं केरे जेरे बेकार आन, ते तैना बेफैइदी बिदलारे जेरे आन, जैस झइडी भोने करां पेइले हवा दूर उडारती। परमेशरे तैन केरे लेइ एरी ठार तियार कियोरी जै बिलकुल आंधरीए। 18 जैखन तैना लोकन शिखालतन त तैना बेकार ते घमण्डी लफज़ इस्तेमाल केरतन, तैना लोकन ज़ोतन कि तैना बेइज़्जत चीजां केरि बटतन जैना तैन केरे जिसम केरने चातन, तैना

लोकन धोखो देइतां पाप करतन जैना इस किसमेरी बुरी ज़िन्दगी करां बचोरेन। 19 तैना तैन लोकन सेइं ई वादो केरतन अगर तैना तैन केरि मनन, त तैना जैन चातन तैन केरि बटतन, किजोकि तैन केरो कोई मालिक नई। पन इन सच्चे, तैन एप्पू भी अपने बुरे रूवाजां केरे गुलामन, किजोकि जै कोई चीज़ केरनेरो आदी त तै तैस केरनेरो गुलाम बनते। 20 जैखन लोकेई यीशु मसीह तैन केरो प्रभु ते मुक्ति देनेबालोए पिशानो, त तैना दुनियारे बुरेई करां छुटोरे थियो। पन तैना फिरी तैन बुरी चीजां केरने मां शामिल भोए ते तैना बुरी चीजां तैन केबू केरतिन, ते तैन केरि आखरी हालत पेइली हालती करां भी बुरी भोइ। 21 जौनेरो मतलब ई आए, किजोकि जैन लोकेई मसीहे पुड़ विश्वास केरनो शारो, परमेशर तैन, तैन लोकन करां जादे सजा देलो, जैनेई कथे विश्वास नई कियोरो, तैन लोकां केरे लेइ रोडू भोथू कि तैना कधी न ज्ञानेथे कि धार्मिकतारी ज़िन्दगी केन्चरे ज़ीतन। हुनी तैना ज्ञानतन कि सही कुन आए, पन तैना परमेशरेरे हुकमन न मनन जैना असेई प्रेरितेई शिखालोरेन। 22 जैन तैनेई कियू तैन केरे लेइ इना दूई कहावत ठीक आन, “तैना कुत्रां केरे जेरे आन जैना उलटी केरतां फिरी खातन, ते तैना निहावरे सूर्रां केरे जेरे आन जैना फिरी चिकरी मां गातन।”

3 हे ट्लारव, अवं दुइयोवं चिट्टी लिखने लोरोई, अवं दुइये चिट्टन मां तुसन किछ गल्लां याद करेइतां होसलो देनेरी कोशिश केरने लोरोई। जैना तुसेई पेइली शिखोरिन ताके तुस सही तरीके सेइं सोचथ। 2 अवं इन एल्हेरेलेइ लोरोई केरने, कि अवं तुसन तैना गल्लां याद करेनी चाताई जैना बडे पेइले नेबेई ज़ोरिन ते इश्शे प्रभु ते मुक्ति देनेबाले यीशु मसीहेरी शिक्षा आन। जैना प्रेरित तुसन कां आए तैनेई तुसन शिखैलोरिन। 3 सेबन करां खास गल ई आए, कि तुस ज्ञानथ, कि आखरी दिहाड़न मां मसीहेरे वापस एजने करां पेइले, लोक तुश्शो मज़ाक बनाने कि तुस विश्वास केरतथ कि मसीह दुबारा वापस एजनोए, तैना आदी भोनेरे वजाई सेइं एना बुरी चीजां केरेले जैन सेइं तैना खुश भोतन। 4 तैना ज़ोले, “तैसेरो एजनेरो वादो सच नई, तै बिलकुल भी नई एजनो! किजोकि जैना शुरुआती मां इश्शे मसीही बुजुर्ग थियो तैना सब मरे, पन किछ भी बेदलोवं। सब किछ तेरहु आए, जेन्चरे दुनिया बनानेरे वक्ते करां थियू।” 5 तैना एन एल्हेरेलेइ ज़ोतन किजोकि तैना इन बिस्सरनू चातन, कि बडे पेइले अम्बर ते धरती परमेशरेरे हुकमे सेइं बनाव जेव। तैने धरती पैनी मरां कढी ते पैनी करां अलग की। 6 फिरी तैनी पैनेरो इस्तेमाल कियो कि पुरानी दुनिया बडे तूफाने सेइं नाश केरे। 7 पन परमेशरे अम्बर ते धरती तैसे हुकमेरे ज़िरिये रखोरेन, ताके तैन अग्गी सेइं नाश केरे। तै तैन तैस दिहैडी तगर रखेलो जेइस तै तैन लोकां केरो इन्साफ केरेलो ते नाश केरेलो जैना तैसेरी आदर न केरन। 8 हे ट्लारव, जैना गल्लां अवं हुन्ना जौने लोरोई तैन नजरानदाज न केरा, कि प्रभुएरी नज़री मां अक दिहाड़ी हज़ार सालन बराबरे ते हज़ार साल एक्की दिहैडे बराबर आन (तैना तैसेरेलेइ अक्कां जेरे आन)। 9 किछ लोक सोचतन कि प्रभु अपनी वापस एजनेरो वादे पूरे केरने मां चिर लोरो लाने। पन परमेशर एन्चरे चिर

नई लाने लोरो, बल्के इसेरे बदले तै तुसन सेइं सन्न लोरो केरने। किजोकि तै न चाए कोई भी नाश भोए। पन तै चाते कि हर कोई अपनो मन बदले त कने गलत केरनू शारे ते तैस कां एज्जे। 10 पन मसीह पक्को वापस एज्जेलो, तै अचानक एज्जेलो जेन्चरे चोर अचानक एइते। तैस वक्त अम्बर मां गज्जिनीरी जेरि शोर भोली, ते अम्बर गायब भोइ गालू। सब किछ जैन अम्बरे मां आए, दिहाड़ो, चाँदनी, तारे सब अग्गी सेइं बिलकुल नाश भोलू, तैस दिहाड़े परमेशर इन्साफ केरनेरे लेइ तैन सब किछ बांदू केरेलो जैन लोकेई इस दुनियाई मां कियोरूए। 11 एल्हेरेलेइ कि परमेशर इना सैरी चीजां पेक्की नाश केरेलो जेन्चरे मीं जोंवं, एल्हेरेलेइ तुसेईं पवित्र जिन्दगी ज़ीयोरी लोड़े ते अपनो आप परमेशरे साँफोरो लोड़े। 12 जेन्चरे तुस तैस दिहैड़ी बलगने लोरेथ जेइस परमेशर दुनियारो इन्साफ केरने एज्जेलो, ते बड़ी कोशिश केरा कि तै दिहाड़ी जल्दी एजनेरे लेइ। तैस दिहाड़े परमेशर अम्बरे अग्गी सेइं फुकेलो ते नाश केरेलो त कने अम्बरेरी सैरी चीजां अगारे गेरमी सेइं गेलेली। 13 पन अस विश्वासी नंवे अम्बरे ते नंवे धेरती बलगने लोरेम जेसेरो वादो परमेशरे कियोरो, जैड़ी लोक परमेशरेरे इच्छाई सेइं ज़ीयेले। 14 एल्हेरेलेइ, हे ट्लारव, जेन्चरे तुस तैस दिहैड़ी बलगने लोरेथ जेइस परमेशर इस दुनियारो इन्साफ केरेलो, त तुस पूरी कोशिश केरा कि तुस शैन्ति सेइं परमेशरेरे नज़री मां शुद्ध ते बेइलज़ाम भोथ। 15 ते इश्शे प्रभुएरे सबरारे बारे मां सोचा तैने तुसन मौको दित्तो, कि तुस एजनेबाले इन्साफे करां बघथ। इन इश्शे ट्लारे विश्वासी सैथे पोलुसे भी तुश्शे लेइ तैस समझारे मुताबिक अपने चिट्ठी मां लिखोरू ज़ै परमेशरे तैस दित्तोरीए। 16 तैने अपने सैरी चिट्ठन मां जैना तैने विश्वासी लोकन जो लिखी, इना सैरी गल्लां तुसन लिखी। पन किछ तैसेरी लिखोरी गल्लां समझानी मुश्किल आन। तैन लोकां केरे लेइ जैनेई रोड़े चारे नई पढोरू जैन इस बारे मां पक्को पतो नई कि तैना कुन विश्वास केरतन, तैना गलत तरीके सेइं इन मुश्किल गल्लां केरे मतलब कढतन, जेन्चरे तैना पवित्रशास्त्रेरी किछ गल्लां केरो गलत तरीके मतलब समझातन। एन्चरे केरने सेइं तैना अपनो आप इस काबल बनातन कि परमेशर तैन नाश केरे। 17 एल्हेरेलेइ, हे ट्लारव तुस पेइले ज्ञानतथ कि इना गल्लां भोनिन, एल्हेरेलेइ तुस हुशार राथ ताके जैना लोक कानूने न मनन तैना तुसन झूठ ज़ोइतां धोखो न देन, ते तुस सेइं गल्लन विश्वास केरनो शारथ। 18 पन तुस इश्शे प्रभु ते मुक्ति देनेबाले यीशु मसीहेरे अनुग्रह ते ज्ञाने मां बद्धते गाथ। तैसेरी महिमा हुन्ना भी भोए, ते हमेशा भीती राए। आमीन। (aiōn g165)

1 यूहन्ना

1 अस तैस एककी वचनेरे (मैनेरे) बारे मां लिखने लोरेम जै जिन्दगारो वचन आए, जै शुरू करां थियो, जै असेई शुनो, ते जै अपनि एछ्छेई सेइं लाव, बल्के जै असेई ध्याने सेइं लाव, ते तैस सेइं अपने हथ लाए। 2 (ई जिन्दगी बांदी भोइ, ते असेई लाई, ते अस तैसेरी गवाही देतम, ते तुसन तैस हमेशारी जिन्दगरी खबर शुनातम, जै बाजी सेइं साथी थी, ते असन पुड़ बांदी भोइ)। (aiōnios g166) 3 जैन किछ असेई यीशुएरे बारे हेरू ते शुनू तैसेरी खबर तुसन भी देतम, एल्हेरेलेइ कि तुस भी असन सेइं साथी शामलथ, ते इश्शी ई शामलीत बाजी सेइं साथी, ते तैसेरे मट्टे यीशु मसीह सेइं साथीए। 4 ते इना गल्लां अस एल्हेरेलेइ लिखतम, कि इश्शी खुशी पूरी भोए। 5 जै खबर असेई प्रभु यीशु करां शुनी, ते तुसन शुनातम, ते ईए; कि परमेशर लोओर जेरो शुद्ध, ते तैस मां किछ भी आंधरू (बुराई) नई। 6 अगर अस ज़ोम, कि तैस सेइं साथी इश्शी शामलीते, ते फिरी आंधरे मां चलतम, त अस झूठे, ते सच्चे पुड़ न चलम। 7 पन अगर जेन्चरे परमेशर लोई मां, तेन्चरे अस भी लोई मां जींम, त एककी होरि सेइं शामिल रातम ते तैसेरे मट्टे यीशु मसीहोरे खून असन सेबभी पापन करां शुद्ध केरते। 8 अगर अस ज़ोम, कि असन मां कोई पाप नई, त अपने आपे धोखो देतम, ते असन मां सच्चे नई। 9 अगर अस अपने पाप मन्तम, त तै इश्शे पाप माफ़ केरने, ते असन सेबभी अधर्म करां शुद्ध केरने मां वफादार ते धर्मीए। 10 अगर अस ज़ोम कि असेई पाप नई कियोरो, त परमेशरे झूठो ठहरातम, ते तैसेरू वचन असेई कधी कबूल नई कियोरू।

2 हे मेरे ट्लारे बचव, अवं इना गल्लां तुसन एल्हेरेलेइ लिखताई, कि तुस पाप न केरा, ते अगर कोई पाप केरे, त बाजी परमेशरे कां इश्शो अक मद्दतगारे, मतलब धर्मी यीशु मसीह। 2 तै इश्शे पापां केरो छुटकारे लेइ बलिदान भोव, ते सिर्फ इश्शे लेइ नई, बल्के सैरी दुनियारे पापां केरे लेइ भी। 3 अगर अस तैसेरे हुकमन मन्म, त इस सेइं अस समझे गाले कि अस तैस ज्ञानतम। 4 जै कोई इन ज़ोते, “कि अवं तैस ज्ञानताई,” ते तैसेरे हुकमन न मन्ने, तै झूठोए, ते तैस मां सच नई। 5 पन जै कोई तैसेरे वचने पुड़ चलते, त तैस मां सच्चे परमेशरो प्यार सिद्ध भोरोए, असन इस सेइं पतो चलते, कि अस तैस मां आम। 6 जै कोई इन ज़ोते, कि अवं तैस मां बनोरो राताई, त तैनी तेन्चरे जीयोरो लोइ जेन्चरे यीशु मसीहे जीयोरोए। 7 ट्लारव, अवं तुसन कोई नंवो हुकम न लिखी, पन तैए पुरानो हुकम जै पेइलो तुसन मैल्लो; ई पुरानो हुकम तैन वचने, जैखन तुसेई मसीह पुड़ विश्वास कियूं। 8 फिरी भी अवं तुशे लेइ नंवो हुकम लिखताई, किजोकि एन सच आए, जैन मसीह मां ते तुसन मां भी लेइहोवं, किजोकि अन्धकार मिटतो गाते ते सच्चेरी लौ हुनी चमकने लोरीए। 9 जै इन ज़ोते, कि अवं लोई मां आई ते विश्वासी ट्लाप सेइं बैर रखते, तै हेजू तगर आंधरे मां आए। 10 जै कोई अपने ट्लाप सेइं प्यार केरते, तै लोई मां, तैसेरेलेइ पाप केरनेरे लेइ कोई वजा नई। 11 पन

जै कोई अपने ट्लाप सेइं बैर रखते, तै आंधरे मां, ते तै आंधरे मां चलते; ते न ज्ञाने, कि कोरां गाते, किजोकि आंधरे तैसेरी एछ्छी कैनी केरिन। 12 हे बचवा अवं तुसन एल्हेरेलेइ लिखताई, कि यीशु मसीहोरे नंवे सेइं तुशे पाप माफ़ भोए। 13 हे बुजुर्गव अवं तुसन एल्हेरेलेइ लिखताई, कि जै शुरू करां आए तुस तैस ज्ञानथ, हे जवानव, अवं तुसन एल्हेरेलेइ लिखताई कि तुसेई तैस शैताने पुड़ जींति हासिल केरीए, हे बचवा अवं तुसन एल्हेरेलेइ लिखताई कि तुसेई बाजी परमेशर पिशानो। 14 हे बाजव, अवं तुसन एल्हेरेलेइ लिखताई, कि जै पेइलोए तुसेई पिशानो, हे जवानव, अवं तुसन एल्हेरेलेइ लिखताई, कि तुस मज़बूतथ, ते परमेशेरू वचन तुसन मां बनोरू रहते, ते तुस शैताने करां जींतिरेथ। 15 तुस न दुनियाई सेइं ते न दुनियारी चीजन सेइं प्यार केरा, अगर कोई दुनियाई सेइं प्यार केरते, त तैस मां बाजी परमेशरो प्यार नई। 16 किजोकि जैन किछ दुनियाई मां आए, मतलब जिसमेरी खुवैइश, ते एछ्छी केरि खुवैइश ते जिन्दगरू घमण्ड, तैन बाजी परमेशरे तरफां नई पन दुनियारे तरफां। 17 दुनिया ते तैसेरी खुवैइश दुइये मिटती गैतिन, पन जै परमेशरे मेर्जी पुड़ चलते, तै सदा बनोरो रालो। (aiōn g165) 18 हे बचव, ई आखरी वक्ते कि मसीह वापस एजनीए, ते जेन्चरे तुसेई शुनोरूए, कि मसीहोरी खलाफत केरनेबालो एजनेबालोए, तैसेरे मुताबिक हुना भी बडे मसीहोरी खलाफत केरनेबाले उठोरेन, इस सेइं अस ज्ञानतम, कि ई आखरी वक्ते कि मसीह वापस एजनीए। 19 तैना मसीहोरी खलाफत केरनेबाले लोक निस्से त असने मरां, पन तैना असन मरां न थिये, किजोकि अगर असन मरां भोथे, त असन सेइं साथी राथे, पन निस्से एल्हेरेलेइ कि इन बांदू भोए कि तैना सब असन मरां नई। 20 पन मसीहोरे जिरिये तुसन पवित्र आत्मा दितोरोए, तैसेरे वजाई सेइं तुस सब सच ज्ञानतथ। 21 मीं तुसन एल्हेरेलेइ नई लिखोरू, कि तुस सच्चे न ज्ञानथ, पन एल्हेरेलेइ, कि तैस ज्ञानतथ, ते एल्हेरेलेइ कोई झूठ, सच्चेरे पासेरां नई। 22 झूठो कौने? सिर्फ तै, जै यीशुएरू मसीह भोनेरो इन्कार केरते, ते मसीहोरी खलाफत केरनेबालो तैए आए, जै बाजी परमेशरोरी ते कने मट्टेरो यानी यीशुएरो इन्कार केरते। 23 जै मट्टेरो इन्कार केरते तैस कां बाजी परमेशर भी नई, जै मट्टे मन्ते, तैस कां बाजी परमेशर भी आए। 24 जैखन तुसेई यीशु मसीह पुड़ विश्वास कियूं, तुसेई जै सच्ची शिक्षा शुरू करां शुनोरोए, तैए तुसन मां बनोरी राए, त तुस भी मट्टे मां, ते बाजी परमेशरे मां बनोरे राले। 25 ते जेसेरो वादो परमेशरे कियोरोए, ते हमेशारी जिन्दगीए। (aiōnios g166) 26 मीं इना गल्लां तुसन तैन करां खबरदार रानेरे लेइ लिखी, जैना लोक तुसन झूठी शिक्षारे जिरिये टपलातन। 27 ते तुशू तैन अभिषेक, जैन तैसेरे तरफां केरूए, तुसन मां बनोरू रहते; ते तुसन एल्हेरी ज़रूरत नई, कि कोई तुसन शिखाले। बल्के जेन्चरे तैन अभिषेक जैन तैसेरे तरफां कियोरोए, तुसन सब गल्लां शिखालते, ते इन सच्चे, ते झूठ नई, ते जेन्चरे तैने तुसन शिखालोरूए, तेन्चरे तुस तैस मां बनोरे रातथ। 28 हे बचव, तैस मां बनोरे राथ, कि जैखन इन बांदू भोए, त असन दिलेरी भोए ते अस तैसेरे एजने पुड़ तैसेरे सामने शरमिनदे न

भोम। 29 अगर तुस ज्ञानतथ, कि मसीह धर्मीए, त इन भी ज्ञानतथ, कि जैना धार्मिकतारां कम्मां केरतन, तैना परमेशररे बच्चेन।

3 हेरा बाजे परमेशरे असन सेइं केरो प्यार कियो, कि असन जो परमेशररे बच्चे जौन, ते अस अहम भी, एल्हेरेलेइ दुनियारे लोकेई अस न पिशाने कि अस परमेशररे बच्चेम, किजोकि तैनेई बाजी परमेशर भी न पिशानो। 2 हे ट्लारव, हुनी अस परमेशररे बच्चेम, ते हेजू तगर इन बांदू नई भोरू, कि अस केरे भोनेम! इन ज्ञानतम, कि जैखन यीशु मसीह बांदो भोलो त अस भी तैसेरे जेरे भोमेले, किजोकि तैस तेरहे लहमेले जेरो तै आए। 3 ते जै कोई भी मसीह पुइ ई उमीद रखते, तै अपनो आप तेरहो पवित्र करते, जेरो मसीह पवित्र आए। 4 जै लगातार पाप केरतो रहते, तै मूसेरे कानूनरो इन्कार करते, ते पाप त कानूनरो इन्कार केरनो। 5 ते तुस ज्ञानतथ, कि यीशु मसीह एल्हेरेलेइ अव, कि पापन दूर केरे, ते तैस मां पाप नई। 6 जै तैस मां बनोरो रहते, तै लगातार पाप न केरे, जै लगातार पाप केरते, तै न समझे कि मसीह कौन आए, ते न तैसेरो तैस सेइं रिशतोए। 7 ट्लारे बच्चव, केन्चेरे धोखे मां न एजाथ, जै धार्मिकारां कम्मां केरते, तैए मसीहरो जेरो धर्मीए। 8 जै कोई लगातार पाप केरते, तै शैतानेरे तरफांए, किजोकि शैतान शुरुआती करां पाप केरतो ओरोए, परमेशरेरू मट्टू एल्हेरेलेइ अव, कि शैतानेरे कम्मन खतम केरे। 9 जैना परमेशररे बच्चेन तैना लगातार पाप न केरन, किजोकि परमेशररो सुभाव तैन मां बनोरू रहते, ते तैना पाप केरि न सकन, किजोकि तैना परमेशररे बच्चेन। 10 इस्से सेइं परमेशररे बच्चे, ते शैतानेरे बच्चे पिशैनोतन, जैना धार्मिकता कम्मां न केरन, तैना परमेशरे सेइं नई, ते न तै जै अपने ढूलाए सेइं प्यार न केरे। 11 जै खबर तुसेईं पेइली शुनी, तै ईए, कि अस एक्की होरि सेइं प्यार रखम। 12 ते आदमेरे मट्टेरे कैनेरे जेरे न बनम, जै तैस शैताने सेइं थियो, ते जैने अपनो ढूला मारो, ते तै कोस वजाई सेइं मारो! एल्हेरेलेइ कि तैसेरां कम्मां बुरां थियां, ते तैसेरे ढूलाएरां कम्मां रोडां थियां। 13 हे ढूलाव, अगर दुनियारे लोक तुसन सेइं बैर केरते ते हैरान न भोथ। 14 अस ज्ञानतम, कि अस मौती करां पार भोइतां जिन्दगी मां पुजोरेम, किजोकि अस ढूलान सेइं प्यार रखतम। जै प्यार न रखे, तै मौतरे हालती मांए। 15 जै अपने ढूलाए सेइं बैर केरते, तै खूनी आए, ते तुस ज्ञानतथ, कि कोन्ची खूनी मां हमेशारी जिन्दगी न राए। (aiōnios 9166) 16 असेईं प्यार इस्से सेइं जांनो, कि यीशु मसीहे इश्शे लेइ अपने प्राण दिन्ते, एल्हेरेलेइ इश्शो भी ढूलां केरे लेइ प्राण देने फर्जे। 17 पन जैस कां दुनियारी जेइदाद भोए, त तै अपने ढूलाए जैस ज़रूरत भोए, तैस हेरतां तैस पुइ तरस खानो न चाए, त तैस मां परमेशररो प्यार केन्चेरे बनोरो रेइ बटते? 18 हे ट्लारे बच्चव, अस सिर्फ वचन ते जुबानी सेइं नई, पन कम्मन ते सच्चे सेइं भी प्यार केरम। 19 जैखन अस होरन सेइं प्यार केरमेले एस्से सेइं अस ज्ञानमेले, कि अस सच्चेरेम, ते जैस गल्ली मां इश्शो ज़मीर असन दोष लाए, तैसेरे बारे मां अस तैसेरे सामने अपने-अपने मने याकीन देइ बटमेले। 20 किजोकि परमेशर इश्शे मने करां बट्टोए, ते सब किछ ज्ञानते। 21 हे ट्लारव, अगर इश्शो मन असन दोष

न दे, त असन परमेशररे सामने दिलेरी भोतीए। 22 ते जैन किछ अस मगतम, तैन असन तैस करां मैलते, किजोकि अस तैसेरे हुक्म मन्तम, ते जैन तैस पसंदे तैन केरतम। 23 ते तैसेरो हुक्म ईए कि अस तैसेरे मट्टे यीशु मसीहेरे नंवे पुइ विश्वास केरम ते जेन्चेरे तैने असन हुक्म दितो तैसेरे मुताबिक एक्की होरि सेइं प्यार केरम। 24 ते जैना परमेशररो हुक्म मन्तन, तैना परमेशर मां, ते परमेशर तैन मां बनोरो रहते, ते इस्से सेइं, मतलब तैस पवित्र आत्मा सेइं जै तैने असन दितोरोए, अस ज्ञानतम, कि तै असन मां बनोरो रहते।

4 हे ट्लारव, हर एक्की मैनेरू याकीन न केरा जै दावो केरते कि परमेशररी आत्मा तैस मां आए, बल्के आत्मां अज़माथ कि तै परमेशररी तरफांए कि नई; किजोकि बडे झूठे नबी दुनियाई मां निसोरेन। 2 परमेशररी आत्मा तुस इस रीति सेइं पिशैनी बटथ, कि जै आत्मा इन मन्ते, कि यीशु मसीह जिसमे मां ओरोए तै परमेशररे तरफांए। 3 ते जै आत्मा यीशु न मन्ते, तै परमेशररे तरफां नई, ते तैए मसीहेरी खलाफत केरनेबाली आत्माए, जेसेरे बारे मां तुसेईं शुनोरू, कि तै एजने बालीए, ते अज़ भी दुनियाई मां आए। 4 हे ट्लारे बच्चव, तुस परमेशररे लोक आथ, ते तुसेईं तैन झूठन पुइ जीत हासिल कियोरीए, किजोकि पवित्र आत्मारी शक्ति जै तुसन मांए तै शैतानेरे शक्ति करां बट्टी, जै दुनियाई पुइ राज केरते। 5 तैना झूठे नबी दुनियारेन, एल्हेरेलेइ तैना दुनियारी गल्लां जोतन, ते दुनियारे लोक तैन केरि शुन्तन। 6 अस परमेशररेम, जै परमेशरे ज्ञानते, तै इश्शी शुन्ते, जै परमेशरे न जांने तै इश्शी न शुने, एल्हेरेलेइ अस तैस आत्माई जै सत्र जोतीए ते जै आत्मा झूठ जोतीए पिशानतम। 7 हे ट्लारव, अस एक्की होरि सेइं प्यार केरम; किजोकि प्यार परमेशरे करां आए, जै कोई प्यार केरते, तै परमेशररो बच्चोए, ते परमेशरे ज्ञानते। 8 जै होरन सेइं प्यार न केरे, तै परमेशरे न जांने, किजोकि परमेशर प्यारे। 9 जै प्यार परमेशरे असन सेइं केरते, तै इस सेइं बांदो भोव, कि परमेशरे अपनू अकेल्लू मट्टू दुनियाई मां भेजू, कि तैस पुइ विश्वास केरने सेइं असन हमेशारी जिन्दगी मैल्ले। 10 प्यार इस सेइं नई कि असेईं परमेशरे सेइं प्यार कियो, पन इस मां आए, कि तैने असन सेइं प्यार केरो, ते इश्शे पापां केरे छुटकारे लेइ अपनू मट्टू भेजू। 11 हे ट्लारव, जैखन परमेशरे असन सेइं एरो प्यार कियो, त असेईं भी एक्की होरि सेइं प्यार कियोरो लोडे। 12 परमेशर कधी केन्चे नई लवरो; अगर अस एप्पू मांमेइं प्यार रखम, त परमेशर असन मां बनो रहते; ते तैसेरो प्यार असन मां सिद्ध भोरोए। 13 इस सेइं अस ज्ञानतम, कि अस परमेशरे मां बनो रातम, ते परमेशर असन मां, किजोकि तैने असन अपने आत्माई मरां दिन्ती। 14 ते असेईं हेरू भी, ते गवाही भी देतम, कि बाजी परमेशरे, मट्टू दुनियाई मां मुक्ति देनेबालो केरतां भेजोरोए। 15 जै इन मन्ते, कि यीशु परमेशरेरू मट्टूए, परमेशर तैस मां बनोरो रहते, ते तै परमेशरे मांए। 16 ते जै प्यार परमेशर असन सेइं केरते, तै असेईं ज्ञानो, ते असन तैस पुइ विश्वासे, परमेशर प्यारे, जै प्यारे मां बनोरो रहते, ते परमेशर तैस मां बनोरो रहते। 17 इस सेइं प्यार असन मां सिद्ध भोव, कि

असन इन्साफेरे दिहैड़ी दिलेरी भोए, किजोकि जेरो तै आए, तेरे अस भी दुनिया मां अहम। 18 प्यारे मां डर न भोए, बल्के सिद्ध प्यार डरे दूर केरते, किजोकि डरेरो रिश्तो सज़ाई सेइं भोते, ते ज़ै डरते, तै प्यार मां सिद्ध नई। 19 अस परमेशरे सेइं ते होरन सेइं एल्हेरेलेइ प्यार केरतम, कि पेइलो परमेशरे असन सेइं प्यार कियो। 20 अगर कोई ज़ोए कि, “अवं परमेशरे सेइं प्यार केरताई,” पन अपने ढूलाए सेइं बैर रखे, तै झूठोए, किजोकि ज़ै विश्वासी ढूलाए सेइं ज़ै तैने लोरोए प्यार न केरे, त परमेशरे सेइं भी ज़ै तैने लवरो नई, प्यार न केरि सके। 21 ते तैस करां असन ई हुक्म मैलते, कि ज़ै अपने परमेशरे सेइं प्यार केरते, तै विश्वासी ढूलाए सेइं भी प्यार केरते।

5 ज़ेसेरो ई विश्वासे कि यीशु ही मसीहे, तै परमेशरेरो बच्चोए, ते ज़ै परमेशरे सेइं प्यार केरते, तै तैस सेइं भी प्यार केरते, ज़ैना परमेशरेरे बच्चन। 2 ज़ैखन अस परमेशरे सेइं प्यार केरतम, ते तैसेरे हुक्मन मन्तम, त इस सेइं अस ज्ञानतम, कि अस परमेशरेरे बच्चन सेइं प्यार केरतम। 3 अस परमेशरेरे हुक्म मेन्तां तैस प्यार हिरातम, ते तैसेरे हुक्म मुशकलन नई। 4 किजोकि ज़ै परमेशरेरो बच्चोए, तै दुनियाई पुड़ ज़ीत हासिल केरते, ते तै ज़ीत ज़ैस सेइं दुनियाई पुड़ ज़ीत हासिल केरतम तै इश्शो विश्वासे। 5 दुनियाई पुड़ ज़ीत हासिल केरनेबालो कौने, सिर्फ तै ज़ेसेरो ई विश्वासे, कि यीशु, परमेशरेरू मट्टूए। 6 ईए तैए, ज़ै पैनी ते खूनेरे ज़िरिये ओरो थियो; मतलब यीशु मसीह, तै न सिर्फ पैनी सेइं, बल्के पैनी ते खूने दुइयां केरे ज़िरिये ओरो थियो। ते ई आत्मा ज़ै गवाही देतीए, किजोकि तै सच्छेरे। 7 ते गवाही देनेबाले ट्लाई आन 8 आत्मा, ते पानी, ते खून, ते ट्लेइयां केरि एक्की गल्ली पुड़े गवाही देतन। 9 ज़ैखन अस मैन्हु केरि गवाही मन्तम, त परमेशरेरी गवाही त तैस करां भी बड्डीए, कि तैने अपने मट्टेरे बारे मां गवाही दित्ती। 10 ज़ै परमेशरेरे मट्टे पुड़ विश्वास केरते, तै अपने आपे मां ई गवाही रखते, ज़ैने परमेशरे पुड़ विश्वास न कियूं, तैने तै झूठो ठहराव, किजोकि तैने तैस गवाही पुड़ विश्वास न कियो, ज़ै परमेशरे अपने मट्टेरे बारे मां दित्तोरीए। 11 ते तै गवाही ईए, कि परमेशरे असन हमेशारी ज़िन्दगी दित्ती, ते ई ज़िन्दगी तैसेरे मट्टे मांए। (aiōnios g166) 12 ज़ेसेरो रिश्तो मट्टे सेइं आए तैस कां ज़िन्दगीए, ते ज़ेसेरो रिश्तो परमेशरेरे मट्टे सेइं नई, तैस कां हमेशारी ज़िन्दगी भी नई। 13 मीं तुसन, ज़ै परमेशरेरे मट्टेरे नञ्वे पुड़ विश्वास केरतो भोए, एल्हेरेलेइ लिखताई, कि तुसन पतो लग्गे, कि हमेशारी ज़िन्दगी तुश्शीए। (aiōnios g166) 14 ते असन परमेशरेरे सामने ई दिलेरी भोतीए, तै ईए; कि अगर अस तैसेरे मेज़्जी सेइं किछ मगतम, त तै इश्शी शुनते। 15 ते अगर अस ज्ञानतम, कि ज़ैन किछ अस परमेशरे करां मगतम, तैन असन मैलते। 16 अगर कोई विश्वासी ढूलाए कोई एरो पाप केरतो लाए, ज़ेसेरो नितीजो मौत न भोए, त बिनती केरे, ते परमेशर तैसेरेलेइ, ज़ैने एरो पाप कियोरोए ज़ेसेरो नितीजो मौत नई, ज़िन्दगी देलो। पाप एरो भी भोतेए ज़ेसेरो नितीजो मौते, एसेरे बारे मां अवं प्रार्थना केरनेरे बारे मां न ज़ोई। 17 सेब्भी किसमेरी बुराई त पापे पन एरो भी पापे, ज़ैरेरो नितीजो मौत नई।

18 अस ज्ञानतम, कि ज़ैना परमेशरेरे बच्चन, तैना लगातार पाप न केरन, पन परमेशरेरू मट्टू यीशु तैस बच्चाते, ते शैतान तैसेरू किछ न केरि सके। 19 अस ज्ञानतम, कि अस परमेशरे सेइं अहम, ते सारी दुनिया तैस शैतानेरे कब्जे मां आए। 20 ते इन भी ज्ञानतम, कि परमेशरेरू मट्टू यीशु मसीह इस दुनियाई मां ओरूए, ते तैने असन समझ दित्तोरीए, कि अस सच्चे परमेशरे पिशानम, ते अस तैस मां ज़ै सच्चे मां आए, मतलब तैसेरे मट्टे यीशु मसीह मां बनोरे रातम, सच्छो परमेशर ते हमेशारी ज़िन्दगी ईए। (aiōnios g166) 21 हे बच्चव, हर अक तैस चीज़ी करां दूर राथ, ज़ै तुश्शे दिले मां परमेशरेरी ठार नेतीए।

2 यूहन्ना

1 अवं यूहन्ना कलीसियारो बुजुर्ग, तैस बेइन ते तैसेरे बच्चन जैना परमेशरे चुनोरेन ई चिट्ठी लिखने लोरोई। जैन सेइं अवं सच्चो प्यार केरताई। सिर्फ अवं नईं पन तैना सारे जैना सच्चे ज्ञानतन तुसन सेइं प्यार केरतन। 2 अस तुसन सेइं प्यार केरतम किजोकि अस सच्ची शिक्षाई पुड विश्वास केरतम, ते अस तैस शिक्षाई हमेशारे लेइ मन्ते राले। (aiōn g165) 3 बाजी परमेशर ते तैसेरे मट्टू यीशु मसीह असन अनुग्रह, दया, शान्ति देन। इना सब इशशे लेइ आए अस जैना सच्चे मन्तम ते एक्की होरि सेइं प्यारे केरतम। 4 अवं बड़ो खुश भोव, जैखन मीं तेरे किछ बच्चां केरे बारे मां शुनू कि तैना परमेशरेरे बत्तां चलने लोरेन, तैना तैन्ने केरने लोरेन जैन इशशे बाजी परमेशरे असन केरनेरे लेइ ज़ोरूए। 5 हुनी हे बेइन, अवं तीं कां मिनत केरताई, असेईं एक्की होरि सेइं प्यार कियोरो लोड़े, ई अक नंव्वो हुकम नईं पन अक आदेशे जै अस तैस वक्ते करां ज्ञानतम, जेइसेरू असेईं यीशु मसीह पत्ती चलनू शुरू कियोरूए। 6 सच्चो प्यार ई आए जैखन अस परमेशरेरे हुकम मन्तम। जेइसेरू तुसेईं यीशु मसीह पत्ती चलनू शुरू कियोरू तेइसेरू तुसेईं शुनेरू कि परमेशरे हुकम दित्तोरो, कि हमेशा एक्की होरि सेइं प्यार कियो लोड़े। 7 अवं इन एल्हेरेलेइ ज़ोताई, किजोकि बड़े लोक जैना होरि लोकन झूठी शिक्षारे ज़िरिये धोखो देतन। तैना दुनियारे अलग-अलग ठैरन मां जोरेन। तैना ज़ोतन यीशु मसीह मैनेरे रूपे मां नईं ओरो, अगर कोई मैन्हु एन्चरे ज़ोते, त तै मसीहेरो खलाफत केरनेबालोए जै हमेशा लोकन धोखो देते। 8 एल्हेरेलेइ तू अपने बारे मां खबरदार रा कि तैना लोक तीं धोखो न देन। जै मेहनत परमेशरेरे सेवारे लेइ तीं की तै बेफैइदी न भोए, पन तुस तैना सैरी बरकतां हासिल केरेलो जैना देनेरो वादो परमेशरे तुसन सेइं कियोरोए। 9 अगर कोई मैन्हु मसीहेरी शिक्षाई पुड लगातार न चले पन तैस मां होरू किछ ज़ोड़ते त तैसेरो रिशतो परमेशरे सेइं साथी नईं, तैस कां परमेशर नईं। पन अगर कोई मसीहेरी शिक्षाई मां बनोरो रहते, तैसेरो रिशतो बाजी परमेशर ते तैसेरे मट्टे यीशु मसीह सेइं भी आए। 10 अगर कोई तुशशे सभाईं कां एज्जे, ते मसीहेरे बारे मां ईए शिक्षा न दे, त तैस न अपने घरे मां एज्जे देथ, ते न तैस नमस्कार केरतां होसलो न देथ। 11 किजोकि जै कोई एरे मैन्हु जो नमस्कार केरते, तै तैसेरे बुरे कम्मन मां शामिल भोते। 12 बेडि गल्लां आन जैना अवं तुसन सेइं ज़ोनी चाताई, पन अवं तैना एन्चरे चिट्ठी मां लिखनी न चैईं। पन मीं उमीदे कि अवं तुसन कां एज्जेलो ते अस आमने-सामने भोइतां गल्लां केरमेले, तैखन अस पूरे तरीके सेइं खुश भोले। 13 तेरी चुनोरी बेइनारे बच्चे इड़ी जैना परमेशरेरे चुनोरेन नमस्कार ज़ोतन।

3 यूहन्ना

1 अवं यूहन्ना कलीसियारो बुजुर्ग आई, हे ट्लारे गयुसे अवं तींजो ई चिट्ठी लिखने लोरोई। अवं सच्चरे तीं सेइं प्यार केरताई। 2 मेरे ट्लारे दोस्त, मेरी प्रार्थना ई आए, कि जेन्चरे तू आत्मिक तरक्की केरि रवरोस, तेन्चरे तू सेबभी गल्लन मां तरक्की केरतो रास, ते तेरी जान भी राजी राए। 3 किजोकि किछ विश्वासी लोकेई मीं सेइं एइतां ज़ोवं, कि तू केन्चरे सच्चरे मुताबिक ज़ीने लोरोस त अवं बड़ो खुश भोव। 4 ज़ैखन भी अवं शुनताई कि तैना, ज़ैना मेरे बच्चं केरे ज़ेरे आन तैना सच्चरे मुताबिक ज़ीतन, तैखन अवं बड़ो खुश भोताई। 5 हे ट्लारा, तीं इशे विश्वासी सैथी केरि मद्दत केरनेरे लेइ वफादैरी सेइं बडू किछ कियोरुए, इडी तगर ज़ैन तू ज़ानस भी न तैन केरि भी मद्दत केरतस। 6 इन मरां किछ लोकेई इट्टेरी कलीसियारे विश्वासी लोकन सेइं ज़ोवं, कि तुस अपने मसीही लोकन सेइं केत्रो जादे प्यार केरतथ। हुनी अवं तीं ज़ोताई ज़ैना इना लोक तीं करां गान त तीं तैन केरि मद्दत केरती रावरी लोड़े किजोकि एस सेइं परमेशर खुश भोते। 7 किजोकि इना लोक मसीहेरू वचन प्रचार केरनेरे लेइ सफर केरतन, ते गैर विश्वासी लोकन करां किछ मद्दत न नेन। 8 एल्हेरेलेइ असेई तैन केरि आदर-खातर कियोरी लोड़े, ताके अस भी तैन सेइं साथी सच्च प्रचार केरनेरे कम्मे मां शामिल भोम। 9 मीं तुशे नगरेरे कलीसियारे लोकन पेइले चिट्ठी लिखोरी थी, पन दियुत्रिफेस मेरे हदायतन कबूल केरने करां इन्कार केरते, किजोकि ते हमेशा अपनो आप कलीसियारो लीडर बनानो चाते। 10 एल्हेरेलेइ अगर अवं एज्जेलो, त कलीसियारे लोकां केरे सामने ज़ैन तै केरि रावरोए ज़ोइलो। ते इशे खलाफ बुरी-बुरी गल्लां ज़ोइतां झूठे दोष लाते, ते एत्रू नई तै एप्पू प्रचार केरनेबालन कबूल न केरे, ते ज़ैना तैन कबूल केरने चातन, तैन भी ठाकते ते कलीसिया मरां कढतन। 11 हे ट्लारा, तैन लोकां केरि नकल न केरा ज़ैना बुरां कम्मां केरन, पन तैन लोकां केरू ज़ेरू बन्नेरी कोशिश केरा ज़ैना भला कम्मां केरतन। ज़ैखन कोई भला कम्मां केरते तैस सेइं साबत भोते कि ते परमेशरेरो बच्चोए, अगर कोई बुराई केरते तैस सेइं साबत भोते कि ते परमेशर न ज़ाने। 12 कलीसियारो सारे मैन्हु दिमेत्रियुसेरे बारे मां ज़ोतन कि ते रोड़ो मैन्हु आए, किजोकि ते सच्चरे मुताबिक ज़ीते ते अस भी ज़ोतम कि ते अक रोड़ो मैन्हु आए, ते तू ज़ानतस अस सच्च ज़ोतम। 13 बेड़ि गल्लां आन ज़ैना अवं तीं सेइं ज़ोनी चाताई, पन अवं तैना एन्चरे चिट्ठेरे ज़िरिये न लिखनी चैई। 14 पन मीं उमीदे कि अवं तीं सेइं जल्दी मुलाकत केरेलो, तैखन अस आमने-सामने गल्लां केरमेले। अवं प्रार्थना केरताई परमेशर तीं शान्ति दे, इट्टेरे मसीही दोस्त तींजो नमस्कार ज़ोतन, एट्टेरे दोस्तन अकैल्ले-अकैल्ले मां गेइतां मेरू नमस्कार ज़ोइयां।

यहूदा

1 अवं यहूदा यीशु मसीहेरो सेवक ते कने याकूबेरो निकडो ढूला आई। अवं यहूदा ई चिट्ठी तुसन लोकन लिखने लोरोई, जैना परमेशरे कुजवरेथ कि तैस पुड़ विश्वास केरथ। बाजी परमेशर तुसन सेइं प्यार केरते ते यीशु मसीहेरे जिरिये तुस सुरक्षित आथ। 2 अवं प्रार्थना केरताई कि परमेशर तुसन दया ते शान्ति ते प्यार जादे करां जादे दे। 3 हे द्लारव, अवं लिखनेरे लेइ हर मुमकिन कोशिश केरि रावरो थियो तैस (मुक्त्ते) नंवे जिन्दगरे बारे मां जै यीशु मसीहेरे जिरिये परमेशरे तरफां मैलतीए, जैस मां अस शामिल आम। पन हुना अवं इन ज़रूरी समझताई कि तुसन इस चिट्ठेरे जिरिये होलसो देई, ताके तुस मसीही विश्वास बनोरो रखनेरे लेइ बडी मेहनत केरि बटथ, परमेशरे ई विश्वास अपने सेबभी लोकां केरे लेइ एककी बार दित्तोरोए, ते ई न बेदलोए। 4 किछ लोक जैना यीशु मसीह पुड़ विश्वास केरनेरो दिखावो केरतन तैना तुशशे कलीसियान मां शामिल भोरेन। तैना परमेशरेरी आदर न केरन ते तैना ई गलत शिक्षा देतन, कि परमेशरे इशशे पाप माफ़ कियोरेन ते अस अधर्मी जिन्दगी जी बटतम। तैना यीशु मसीहेरो इन्कार केरतन, जै इशशो अक्के मालिक ते प्रभुए। बड़े पेइले पवित्रशास्त्र ज़ोते, परमेशरे एरे ज़ेरे लोकन सज़ा देलो। 5 पन अगर तुसेई सब गल्लां एककी बार जैनोरिन, फिरी भी अवं तुसन इना गल्लां याद करैनी चाताई, कि प्रभुए इस्राएली लोक गुलैमी मरां आज़ाद किये, ते मिस्र मुलखे मरां कढे पन बादे मां तेने तैना मारे जैनेई सुनसान ठारी मां तैस पुड़ विश्वास न कियो। 6 तुसेई तैन स्वर्गदूतां केरे बारे मां सोचोरू लोइ जैना अपने पदे पुड़ खुश न थिये, जै परमेशरे तैन दित्तोरो थियो, पन तेनेई स्वर्गूरू घर शाः; परमेशरे तैना कथी न टूलुटे बैली शंगलन सेइं बेंधतां बुन आंधरे मां तैस महान दिहैडी तगर रखोरिन, जेइस ते तैन दोषी बनालो। (aiōnios g126) 7 इना इस्राएली ते स्वर्गदूतां केरू जेरू इन भी याद रख्खा कि सदोम ते अमोरा नगरां ते कने आसेपासेरे नगरां केरे रानेबाले लोकन सेइं कुन भोवं। लोक अधर्मी भोए ते हर किसमरी बदमाशी केरनेबाले थियो। एल्हेरेलेइ परमेशरे तैना अगारे जिरिये भ्रम किये। जैन तैन सेइं भोवं ई तैन झूठे उस्तादां केरे लेइ खबरदारी आए कि तैन भी हमेशारे अगारे जिरिये सज़ा मैलनीए। (aiōnios g166) 8 तेन्चरे इना अधर्मी लोक ई दावो केरतन कि परमेशरे दर्शनि मां जोवरू अधर्मी जिन्दगी जीतां तैना अपनो जिसम अशुद्ध केरि बटतन, ते कोन्ची भी एप्पू पुड़ अधिकार रखनेरी अज़ाज़त न देन ते तैना महिमा बाले स्वर्गदूतां केरे बारे मां बुरी गल्लां ज़ोतन। 9 पन इडी तगर कि प्रधान स्वर्गदूत मीकाईले इन अधर्मी लोकां केरू जेरू न कियू। जैखन शैतान ते मीकाईल मूसा नेबेरी लाश दबनेरे अधिकारेरे बारे मां बेंस भोइ, त मीकाईल स्वर्गदूते कां इन लोकन करां जादे अधिकार भोनेरे बावजूद भी तेने शैताने बुरी गल्लां ज़ोइतां दोषी न ठहराव, इसेरे बदले तेने इन ज़ोवं, कि “प्रभु तीं डॉटे।” 10 पन इना लोक तैन चीज़ां केरे खलाफ गलत ज़बान इस्तेमाल केरतन जैन तैना न समझन। ते जैन

चीज़न तैना समझतन तैन लैट्टे जानवरां केरे ज़ेरे केरतन, एना चीज़ां केरतां तैना अपनो आप नाश केरतन। 11 तैन पुड़ अफ़सोस! किजोकि तैना आदमेरे मट्टे कैनेरो ज़ेरो बुरो सलूख केरतन, जैने अपनो ढूला मारो। तैना जल्दी ज़ेन्चरे बिलामे पेइंसो कमानेरे लेइ लोकन करां पाप कराव तेनेई भी तैए गलती की, ते ज़ेन्चरे करोह नाश कियो किजोकि तैने (मूसेरे खलाफ) खलाफत की, तेन्चरे तैना लोक भी नाश किये गाले किजोकि तैना भी प्रभुएरे खलाफ खलाफत केरने लोरेन। 12 जैखन इना लोक धामन मां खातन जैना तुस प्रभुएरो प्यार याद केरनेरे लेइ बनातथ, त तैना समुन्द्रेरी छेपोरी शफडां केरे ज़ेरे खतरनाक आन, जैना तुसन डोबनेरी वजा बेनि बटतन। तैना तैन बेशर्म पुहालां केरे ज़ेरे आन जैना सिर्फ अपनो खियाल रखतन। तैना बौर पैने बिदलारारे ज़ेरेन जैन हवा उडारतीए, तैना शोरेरे बेफल बुटां केरे ज़ेरे आन. जैना ज़ीलना उखड़ोरेन ते दुइये तरीकेई सेइं मरैन। 13 जेन्चरे समुन्द्रेरी मजबूत छेल्ली गंदी शैमफ एनतिन, तेन्चरे इना लोक बेशर्म कम्मां केरतन। तैना किछ तारां केरे ज़ेरे आन जैना सिद्धे बत्तां न चलन, तैना सही बत न हिरान। प्रभुए तैन केरे लेइ अक ठार रखोरि जै पूरे तरीके सेइं आंधरीए ज़ैडी तेनेई हमेशारे लेइ रानू पेनू। (aiōn g165) 14 ते हनोक जै आदमेरे सतोवं पीडी मरां थियो, तेने इन अधर्मी लोकां केरे बारे मां भविष्यद्वाणी की। तैने ज़ोवं “हेरा, प्रभु अपने बेशुमार पवित्र स्वर्गदूतन सेइं साथी एज्जेलो। 15 कि सेबभी लोकां केरो इन्साफ केरे, ते तैन केरे सेबभी बुरां कम्मां केरे बारे मां जैना तेनेई परमेशरेरे खलाफ कियोरेन ते सैरी बुरी गल्लां जैना तेनेई तेसेरे खलाफ कियोरेन तैन केरे बारे मां तैन दोषी बनालो।” 16 इना लोक हमेशा परमेशरेरे खलाफ ज़ोतन ते होरि केरि गेलती कढतन। तैना अपने मनेरे मेरजेरे मुताबिक लगातार बुरां कम्मां केरतन। तैना अपने बारे मां घमण्ड केरतन ते अपने फैइदेरे लेइ होरि केरि चापलूसी केरतन। 17 पन हे द्लारव, तुस तैन गल्लन याद रखा; जैना गल्लां इशशे प्रभु यीशु मसीहेरे प्रेरितेई पेइली ज़ोरिन। 18 तैना तुसन सेइं ज़ोते थिये, “कि आखरी दिहाइन मां एरे लोक भोले जैना प्रभु ते तेसेरे लोकां केरो मज़ाक बनाले। इना तैना लोक आन जैन केरि जिन्दगी तैन केरे बुरी इच्छा केरे कैबू मां आए।” 19 इना तैना लोक आन जैना तुसन अलग-अलग टोलन मां बंटतन, तैन केरि बुरी इच्छां तैन चलैतन ते तैन कां परमेशरेरो आत्मा नई। 20 पन हे द्लारव, तुस एककी होरीरी मद्दत केरते राथ कि बड़े पवित्र सच्चे मां बद्धत जैन तुस विश्वास केरतथ। तुसेई पवित्र आत्माेरे शेक्त्ते अगवैई सेइं प्रार्थना कियोरो लोइ। 21 तुसेई लगातार इन जैनतां जीयोरू लोइ कि परमेशर तुसन सेइं प्यार केरते, जेन्चरे तुस बलगने लोरेथ जेइस इशशो प्रभु यीशु मसीह अपने दयाई मां तुसन हमेशारी जिन्दगी देलो। (aiōnios g166) 22 तैन लोकन पुड़ दया केरा जैन नई पतो कि तैना कोस शिक्षाई पुड़ विश्वास केरन। 23 किछ होरे लोक जैन तुस ज़ानतथ कि नरके मां चलोरिन। तैन जल्दी खिचतां हमेशारी अग्गी मरां बचाथ। हेजू भी होरन पुड़ दया केरा। हांलाकि, ध्यान देथ तेस्से पापे दुबारा न केरा। तुस तैन केरे पापन सेइं अज़मैइशी मां न पेथ, ते तैना पाप केरनेरे जिरिये

अपनो आप दागदार न केरा। 24 परमेशर तुशशी हफाज़त केरनेरे बाले ताके तुस पापेरी ज़िन्दगी ज़ीतां धोखो न खाथ। तै महिमा बालो परमेशर तुसन एप्पू कां आन्नेरे ते तुसन बेकसूर ते खुशी सेइं भरनेरे काबले। 25 तैए अक परमेशरे ज़ैने यीशु मसीहेरे ज़िरिये असन मुक्ति दिती, इशशो प्रभु यीशु लोकन परमेशरेरी आदर केरने ते तैसेरी बडयाई केरनेरी वजा बनाते। ताके तैना इस गल्ली पिशानन कि तैस कां शुरू करां हुन्ना ते हमेशारे लेइ शक्ति ते अधिकार आए। आमीन। (aiōn g165)

प्रकाशित वाक्य

1 यीशु मसीहेरो प्रकाशितवाक्य, जै परमेशरे तैस एल्हेरेलेइ दित्तो कि तै अपने सेवकन तैना गल्लां हिराए, जैन केरू जल्दी भोनू ज़रूरीए। यीशु मसीहे अपनो स्वर्गदूत भेजतां तैसेरे जिरिये अपने दास यूहन्ना इना गल्लां जोई, 2 अवं यूहन्ना तैन सब लिखने लोरोई जैन मीं लवं, अवं इस मां परमेशेरू वचन ते यीशु मसीहेरी सख्खी शिक्षारी गल्लां लिखने लोरोई जैना तैनी मीं सेईं जोई। 3 परमेशर तैन सेबभी लोकन बरकत देलो जैना इस भविष्यवैनरे वचने पढतन, ते कने जैना श्रुतन ते इस मां लिखोरी गल्लन मन्तन, किजोकि इन गल्लां पूरी भोनेरो वक्त नेडो ओरोए। 4 अवं यूहन्ना आसिया इलाकेरे सत कलीसियान जो लिखने लोरोई। परमेशरे जै आए ते जै हमेशा थियो, ते जै एजनेबालो आए; ते तैन सत आत्मां केरे तरफां जैना तैसेरे तखतरे सामनेन तुसन अनुग्रह ते शान्ति मैलती राए। 5 ते यीशु मसीहेरे तरफां, जै वफादार गवाह ते मुडदन मरां जीतो भोने बालन मरां पेइलोए त कने धेरतरे राजां केरो प्रधाने तुसन अनुग्रह ते शान्ति मैलती राए। यीशु मसीहे असन सेईं प्यार कियो, त कने तैने अपने खूने सेईं अस पापन करां छुटाए। 6 तैने अस अक राज ते अपने बाजी परमेशरेरी सेवा केरनेरे लेइ याजक भी बनाए; तैसेरी महिमा ते हकोमत हमेशा भोती राए। आमीन। (aiōn g165) 7 हेरा, मसीह बिदलारी सेईं साथी एजनेबालोए, ते हर कोई तैस लाएलो, बल्के जैना लोक तैसेरे मौतरे लेइ जिमेवार थिये, तैना भी तैस लाएले, ते धेरतरे सारे लोक ज़ोरे-जोरे सेईं लेरां देले। हॉ इन भोलू। आमीन। 8 प्रभु-परमेशर जोते, “अव्वें अलफा ते ओमेगा आई, (मतलब पेइलो ते आखर) अवं तै आई, जै आए, जै हमेशा थियो, ते जै एजने बालोई, ते बड़ो शक्ति बालोई।” ते इन जोते, 9 अवं यूहन्ना तुशो विश्वासी दूला, ते कने यीशु मसीहेरे लेइ दुःखन मां, परमेशरेरे राज्जे मां, ते सबरी मां तुसन सेईं साथी शामलाई। अवं पतमुस नव्वेरे टैपु पुड़ परमेशेरू वचन शुनानेरे त कने यीशुएरी गवाही देनेरे वजाई सेईं कैद थियो। 10 हफतेरे पेइले दिहाइ पवित्र आत्मां अवं अपने कैबू मां कियो, मीं एण्पु पत्र अक आवाज़ इन जोते शुनी। तै आवाज़ नडशिगेरी उच्चो आवज़री ज़ेरि थी। 11 “जैन किछ तू लातस, तैस किताबी मां लिखतां सत नगरां केरे कलीसियान कां भेज, मतलब इफिसुस, स्मुरना, पिरगमुन, थुआतीरा, सरदीस, फिलदिलफिया ते लौदीकिया नगरन मां आन।” 12 तैखन जै मीं सेईं गल्लां केरने लोरो थियो तैस हेरनेरे लेइ तक्कू; ते पत्रोवं फिरतां मीं सोन्नेरे सत दीवट लाए। 13 ते तैन दीवटां केरे मझाटे मडदेरो ज़ेरो कोई लाव, तैने पवन तगर लम्मो चोगो लोरो थियो, ते तैसेरे छैती पुड़ सोन्नेरो पटको बंधोरो थियो। 14 तैसेरे दोग्गे पुड़ तैसेरे बाल छिती उन्नी या हिंवेरे ज़ेरे थियो। तैसेरी एछ्छी अगारे लपारी ज़ेरि बेलती थी। 15 ते तैसेरे पाव भेट्टी मां गर्म कियोरे पितलरे ज़ेरे चमकते थिये, ते ज़ैखन तैन गल की तैसेरी आवाज़ बड़े ज़ोरे सेईं थी, जेन्नेरे बड़े दरियां केरि ज़ेरि जैना बड़े ज़ोरे सेईं चलतन। 16 ते तै अपने देइने हथ्थे मां सत तारे घिन्तां थियो, ते तैसेरे मुखे सेईं दूई

धारण बाली तलवार निसती थी, तैसेरू तुतर एरू चमकतू थियू, जेन्नेरे दिहाइ भर-दुपारेई चमकते। 17 ज़ैखन मीं तै लव, त तैसेरे पावन पुड़ मुडदेरो ज़ेरो पेव, ते तैने मीं पुड़ अपनो देइने हथ्थे रखतां इन ज़ोवं, “उर न, अवं पेइलो त कने आखरी आई। 18 ते ज़ींतो भी अवं आई, अवं एककी बार मरों थियो, पन हुनी अवं ज़ींतोई ते अवं हमेशा ज़ींतो रानोई। मीं मौती पुड़ ते पाताले पुड़ जै मरें लोकां केरि ठारे अधिकारे। (aiōn g165, Hadēs g86) 19 एल्हेरेलेइ जैना गल्लां तीं हेरी ते जैना गल्लां भोइ रेवरिन, ते जैना इट्टां बाद भोने बैलिन, तैना सब लिख।” 20 मतलब तैन सत तारां केरो भेद जैना तीं मेरे देइने हथ्थे मां लोरे थिये, ते तैन सत सोन्नेरे दीवटां केरो भेद, ते सत तारे सत कलीसियां केरे स्वर्गदूतन, ते तैना सत दीवट सत कलीसियान।

2 तैने मीं सेईं इन भी ज़ोवं: “इफिसुस नगरेरे कलीसियारे स्वर्गदूते जो ई सन्देश लिख कि, ‘अवं तै आई जै सते तारे अपने देइने हथ्थे मां घिन्तां फिरताई, ते सोन्नेरे सत दीवटां केरे मझाटे फिरताई, अवं इन ज़ोताई: 2 अवं तेरां कम्मां, तेरी मेहनत, ते तेरू सबर ज्ञानताई। ते इन भी, कि तू बुरे लोकन बर्दाश न केरि बटस; त कने तैन जैना अपनो आप प्रेरित ज़ोतन पन आन नई, तैना तीं परखे ते तैना झूठे निरसे। 3 अवं इन भी ज्ञानताई मेरे नव्वेरे खातर तीं सबरी सेईं दुःख झैल्ले ते तीं मेरी सेवा केरनि न शारी। 4 पन मीं तेरे खलाफ इन ज़ोनूए कि ज़ेरो प्यार तीं मीं सेईं विश्वास केरनेरे वक्ते मां कियोरो थियो इस वक्ते मां न केरस। 5 याद रख तू बिछड़ने करां पेइलो कोडि थियो। तू पाप केरने करां मनफिरा ते तेरही ज़िन्दगी जी ज़ेरि पेइलो विश्वास केरनेरे वक्ते जीतो थियो। अगर तू मन न फिरालो त अवं तीं कां एइतां तेरू दीवट तैस ठारारां पुटेलो। 6 पन हॉ तीं मां ई गल त आए, कि तू नीकुलइयां केरे कम्मन सेईं नफरत केरतस, जैन सेईं अवं भी नफरत केरताई। 7 जै समझनू चाते तै ध्याने सेईं शुने कि परमेशरेरो आत्मा कलीसियान सेईं कुन जोते, जै ज़ींत हासिल केरे, अवं तैस, ज़िन्दगरे बुटे मरां फल खानेरे लेइ देइलो जै ज़िन्दगी देते, जै परमेशरेरे स्वर्ग लोके मांए।” 8 तैने मीं सेईं इन भी ज़ोवं, “स्मुरना नगरेरे कलीसियारे स्वर्गदूते जो ई सन्देश लिख, ‘जै पेइलो ते आखरीए; जै मरों थियो ते हुनी ज़ींतो भोरोए, तै इन ज़ोते: 9 अवं ज्ञानताई कि तू स्तव गातस ते तू गरीब आस, पन आत्मिक गल्लन मां तू धनी आस। अवं इन भी ज्ञानताई कि जैना लोक ज़ोतन कि तैना परमेशरेरे चुनोरे (यहूदी) लोकन, पन तैना असलीती मां नई। तैना तुशे बारे मां बुरी गल्लां ज़ोतन, पन हकीकति मां तैन केरो रिश्तो एरे टोली सेईं आए जै शैतानेरी। 10 जैना दुःख तीं झैल्लने पेनेन तैन करां न डर। शैतान तुसन मरां किछ लोकन दलुइतां कैद करालो ताके तैना परखे गान। ते तुसन दश दिहाइन तगर बड़ो दुःख झैल्लनो भोलो। पन मीं पुड़ विश्वास केरनो न शार, चाए जान भी देनी पे, किजोकि अवं तेरे ज़ींतेरे लेइ हमेशा ज़िन्दगरू इनाम देइलो। 11 जै समझनू चाते तै ध्याने सेईं शुने कि परमेशरेरो आत्मा कलीसियान सेईं कुन जोते, जै ज़ींते, तैस दुइयोवं मौती सेईं नुकसान न पुजेलो।” 12 तैने मीं सेईं इन भी ज़ोवं,

“पिरगमुन नगरे कलीसियारे स्वर्गदूते जो ई सन्देश लिख, ‘अवं तै आई जैस कां दूई धारण बाली तिख्खी तलवारे, अवं इन ज़ोताई: 13 अवं इन ज्ञानताई, कि तू तैडी रातस ज़ैडी शैतान राज़ केरते, तू मीं सेइं साथी ईमानदार राव, त कने तू मीं पुड़ विश्वास केरनो कथे न शारस। तीं इड़ी तगर विश्वास कियो ज़ेइस मेरो वफादार गवाह अन्तिपास तेनेई तैस ठैरी मारो, ज़ैडी शैतान राज़ केरते। 14 पन मीं तेरे खलाफ किछ गल्लां ज़ोनिन, किजोकि तू तैन केरि खलाफत न केरस ज़ैना तुशुशे कलीसियाई मां झूठी शिक्षा देतन तेन्चरे ज़ैन बिलामे बीतोरे वक्ते मां शिखालू। बिलामे बालाक राज़े शिखालू कि इस्राएली लोकां केरि अज़मैइश केरे ताके तैना पाप केरन। तेने शिखालू कि तैना मूरतन पुड़ बलिदान कियोरी चीज़ां खान ते बदमाशी केरन। 15 तेन्चरे तुसन मां किछ लोक एरे आन ज़ैना नीकुलइयां केरि शिक्षा मन्तन। 16 ते मनफिरा, नई त अवं तीं कां जल्दी एजतां तैन लोकन सेइं तैस तलवारी सेइं लेड़ेलो ज़ै मेरे ऐशारां निसतीए। 17 ज़ै समझनू चाते तै ध्याने सेइं शुने कि परमेशरेरो आत्मा कलीसियान सेइं कुन ज़ोते; ज़ैना लोक ज़ीत हासिल केरन, तैन अवं छप्पोरो मन्ने मरां देइलो, त कने अवं तैन अक छितो घोड़ भी देइलो; तैस घोड़े पुड़ अक नवं लिखोरू भोलू, ज़ैस तैसेरे हासिल केरनेबालेरी अलावा होरो कोई न ज़ानेलो।” 18 तैने मीं सेइं इन भी ज़ोवं, “थुआतीरा नगरे कलीसियारे स्वर्गदूते जो ई सन्देश लिख कि, ‘अवं परमेशरेरू मडू ज़ेसेरी एछछी अगारी ज़ेरिन, त कने ज़ेसेरे पाव कीमती पीतलारे ज़ेरन, अवं इन ज़ोताई: 19 अवं तेरे कम्मन, तेरे प्यारे, विश्वास, सेवा त कने सबरी ज्ञानताई, ते इन भी ज्ञानताई, कि तेरां आखरी कम्मां पेइले कम्मन करां बेइतन। 20 पन मीं तेरे खलाफ इन ज़ोनुए, कि तू तै कुआन्श इजेबेल राने देतस; ज़ै अपनो आप नबिन ज़ोतीए, ते मेरे दासन बदमाशी केरने त कने मूरतन कां च़ाढ़ोरू खानू शिखैलतां टपलातीए। 21 मीं तैस मनफिरानेरे लेइ मौको दित्तो, पन तैसा अपने बदमाशी केरने करां मन न फिरानो चाव। 22 हेरा, एल्हेरेलेइ अवं तैस बिमार केरेलो; ते ज़ै तैस सेइं बदमाशी केरेलो अगर तैना भी तैन कम्मन करां मन न फिराले, त तैन बड़े मुसीबती मां छेड़ेलो। 23 ते अवं तैसेरे बचन मैरेलो; ते तैखन सब कलीसियां बुझेली कि दिल त कने मनेरो परखने बालो अवं आई; ते अवं तुसन मां हर एककी तैसेरे कम्मां केरे मुताबिक बदलो देइलो। 24 पन तुस थुआतीरा नगरे बाकी लोकन सेइं, ज़ैना तैस शिक्षाई न मन्न, ज़ैन गल्लन जो तैना शैतानेरी डुगी गल्लां ज़ोतन न ज़ानन, इन ज़ोताई, कि अवं तुसन पुड़ होरो बोझ न रेख्खी। 25 पन हॉ, ज़ैन तींकाए तैस मेरे एजने तर ठेमतां रख। 26 ज़ैना लोक ज़ीत हासिल केरन, ते ज़ै मेरे इच्छारे मुताबिक आखरी तगर केरतो राए, अवं तैस सैरी कौमां केरे लोकन पुड़ अधिकार देइलो। 27 अवं तैस तेरहो अधिकार राज़ केरनेरे लेइ देइलो ज़ेरो मेरे बाजे मीं दित्तोरोए। तैन केरू राज़ लॉहेरू ज़ेरू मज़बूत भोलू ज़ैन ट्लुटे न, ते तैन केरे दुश्मन मित्तरे भाण्डां केरे ज़ेरे चूर-चूर भोले। 28 अवं तैन केरि ज़ीत हिरानेरे लेइ तैन झेइजेरो तारो भी देइलो। 29 ज़ै समझनू चाते तै ध्याने सेइं शुने कि परमेशरेरो आत्मा कलीसियान सेइं कुन ज़ोते।”

3 तैने मीं सेइं इन भी ज़ोवं, “सरदीस नगरे कलीसियारे स्वर्गदूते जो ई सन्देश लिख कि, ‘जैस कां परमेशरेरी सत आत्मान ते सत तारेन, तै इन ज़ोते कि अवं तेरे कम्मन ज्ञानताई, कि तींझो ज़ीतो ज़ोतन, पन तू आस मर्रो। 2 एल्हेरेलेइ बींझो रा, ते तैन चीज़ान ज़ैना रेवरिन, ते ज़ैना मिटने बैलिन, तैन मज़बूत केर; किजोकि मीं तू केन्ची चीज़ी मां अपने परमेशरे कां पूरो न लव। 3 याद केर, कि तीं केरि शिक्षा मैलोरी थी तीं ते शुनोरी थी, ते तैस मनतो रा ते कने मनफिरा, ते अगर तू बींझो न रालो, त अवं चोरेरो ज़ेरो एज्जेलो ते तू कथे न ज़ानेलो, कि अवं कोस घेड़ी तीं पुड़ एज्जेलो। 4 पन सरदीस नगरे मां तुसन मां किछ लोक एरे आन, ज़ैनेई अपनो आप पापे सेइं अशुद्ध नई कियोरो, तैना छित्तां लिगडां लेइतां मीं सेइं साथी च़लेले किजोकि तैना इस काबलन। 5 ज़ैना ज़ीत हासिल केरेले तैन इस्से तरीके सेइं तैन केरां ज़ेरां छित्तां लिगडां लुवां गालां। अवं तैन केरू नवं तैस किताबी मरां हेइइलो ज़ैस मां परमेशरे तैन केरां नंवां लिखोरन ज़ैना हमेशारी ज़िन्दगी हासिल केरेले। अवं तैन केरू नवं अपने बाजी ते अपने स्वर्गदूतां केरे सामने एलान केरेलो। 6 ज़ै समझनू चाते तै ध्याने सेइं शुने कि परमेशरेरो आत्मा कलीसियान सेइं कुन ज़ोते।” 7 तैने मीं सेइं इन भी ज़ोवं, “फिलदिलफिया नगरे कलीसियारे स्वर्गदूते जो इन लिख, ‘अवं तै आई ज़ै पवित्र ते सच्चे, ते ज़ैस कां दाऊदेरी चाबीए, ज़ेसेरे खोल्लेरे कोई बंद न केरि सके ते ज़ेसेरे बंद केरे कोई खोल्लेरे न सके, तै इन ज़ोते: 8 अवं तेरे कम्मन ज्ञानताई, हेर, मीं तेरे सामने अक बत खोलरोरीए, ज़ैस कोई बंद न केरि सके कि तेरी शक्ति थोड़ीए, ते तीं मेरू वचन मनोरूप, ते मेरे नंवेरो इन्कार नई कियोरो। 9 हेर, ज़ैन लोकां केरो रिशतो शैतानेरी टोली सेइं आए, तैना ज़ोतन कि तैना यहूदी आन, पन आन नई, बल्के झूठ ज़ोतन हेर, अवं एरू केरेलो, तैना तीं कां एइतां झुकेले, ते इन ज़ानेले, कि अवं तीं सेइं प्यार केरताई। 10 ज़ैखन तू दुःख झैल्लतो थियो तीं सबरी सेइं मेरो सन्देश मन्नो। एल्हेरेलेइ अवं भी तीं बड़े अज़मैइशरे वक्ते बचेइलो, ज़ै धेरतली पुड़ रानेबालन पुड़ परखनेरे लेइ सारे दुनियाई पुड़ एजने बालीए। 11 अवं जल्दी एजने बालोई; ज़ैन किछ तींकाए, तैस ठेमतां रख, कि कोई तेरू ताज न थसोड़े। 12 ज़ै ज़ीत हासिल केरे, तै ज़ेन्चरे अक खम्भो घरे मज़बूत रखते, तेन्चरे तै भी परमेशरेरे मन्दरे मां हमेशा रालो; ते अवं अपने परमेशरेरू नवं, ते अपने परमेशरेरे नगर, मतलब नंवे यरूशलेमेरू नवं, ज़ैन नगर स्वर्ग पुड़ा एजने बालूए ते अपनू नंवां नवं तैस पुड़ लिखेलो। 13 ज़ै समझनू चाते तै ध्याने सेइं शुने कि परमेशरेरो आत्मा कलीसियान सेइं कुन ज़ोते।” 14 तैने मीं सेइं इन भी ज़ोवं “लौदीकिया नगरे कलीसियारे स्वर्गदूते जो ई सन्देश लिख कि, ‘ज़ै आमीन, वफादारे, ते सच्चे गवाह आए, ते परमेशरेरी सष्टिरी वजाए, तै इन ज़ोते। 15 कि अवं तेरे कम्मन ज्ञानताई, कि तू तैस पैनेरो ज़ेरोस ज़ैन न ठंडू ए ते न गर्म, रोडू भोथू कि तू ठंडो भोथो या फिरी गर्म, यानी तू मीं पूरो विश्वास केरेथो या बिलकुल न केरेथो। 16 एल्हेरेलेइ तू निघोस, ते न ठंडोस ते न च़ओस, पन तू अद्धे मने सेइं मीं पुड़ विश्वास केरतस,

एल्हेरेलेइ अवं तीं रद केरनेबालो आई। 17 तू जैन ज़ोतस, कि अवं धनी, ते धनी भोरोई, ते मीं केन्ची चीज़री घटी नई, ते इन न ज्ञानस, कि तू बदकिसमत ते तुच्छ ते कंगाल ते कानो, ते नगोस। 18 एल्हेरेलेइ अवं तीं सलाह देताई, कि अग्गी मां तौरू सोन्नु मीं करां ने, कि धनी भोस; ते छितां लिगडां ने, कि तीं अपने नग्गे पनेरी शर्म न भोए; ते अपने एछ्छी केरे लानेरे लेइ कजल ने, कि तू लास। 19 अवं जैन-जैन सेइं प्यार केरताई, तैन शिखालताई ते सज़ा देताई ताके तैना रोडे बनन। एल्हेरेलेइ भलाई केरने मां लग्गोरो रा, ते पापन करां मनफिरा। 20 हेर, तेरे दिले मां एजनेरे लेइ अवं जेन्चरे कोई घरेरू दार गुडकाते अवं तेन्चरे आई; अगर तू मेरी आवाज़ शुन्तां अपनो दिल खोल्लस, त अवं अन्तर एज्जेलो ते अस एप्पू मांमेइं संगती केरमेले। 21 जै ज़ीते, अवं तैस एप्पू सेइं साथी अपने तखते पुड़ बिशिलेलो, जेन्चरे अवं भी ज़ीत हासिल केरतां अपने बाजी केरे तखते पुड़ बिशशोरोई। 22 जै समझनू चाते तै ध्याने सेइं शुने कि परमेशरेरो आत्मा कलीसियान सेइं कुन ज़ोते।”

4 इना गल्लां हेरनेरां पत्ती, मीं स्वर्गं मां अक दार खुल्लोरू लाव। ते मीं सेइं कोई गल्लां केरने लाव ई तैए थियो ज़ैने मीं सेइं पेइली गल्लां की, तैसेरी आवाज़ नइशिनगरे ज़ेरि थी। तैने मीं सेइं ज़ोवं, “इड़ी बा एई: अवं तीं तैना गल्लां हिरेइलो, जैन केरू इन गल्लां केरे पत्ती पूरू भोनु ज़रूरीए।” 2 अकदम पवित्र आत्मां अवं अपने कैबू मां कियो; ते मीं स्वर्गं मां अक तखत लाव ते तैस तखते पुड़ कोई बिशोरो लाव। 3 ते जै तैस तखते पुड़ बिशोरो थियो, तै यशब ते मानिक कीमती घोडां केरो ज़ेरो लेइहोतो थियो। ते तैस तखते च़ेब्रे पासन भुन्ज़ल्लैठ थी, जै मरकत घोड़ेरी ज़ेरि लेइहोती थी। 4 तैस तखतेरे च़ेब्रे पासन चोब्ही तखत थिये; ते तैन तखतन पुड़ चोब्ही बुजुर्ग छितां लिगडां लेइतां बिशशोरे थिये, ते तैन केरे दोगन पुड़ सोन्नेरां ताजां थियां। 5 ते तैस तखते मां बिजली ते गुडने ते तखतेरे सामने अगारे सत दीवट बलने लोरे थिये, इन परमेशरेरे सत आत्मा आन। 6 ते तैस तखतेरे सामने शीशेरो साफ समुन्द्र थियो जै बरफारो ज़ेरो थियो, ते तखतेरे मझाटे ते तखतेरे च़ेब्रे पासन प्राणी थिये, तैन केरे सैरे जानी पुड़ एछ्छी-एछ्छी थी। 7 पेइलो प्राणी शेररो ज़ेरो थियो, ते दुइयोवं प्राणी दाँतेरो ज़ेरो, ट्लेइयोवं प्राणी मैनेरो ज़ेरो थियो, ते च़ेवरोवं प्राणी उडरने बाले उकाबेरो ज़ेरो थियो। 8 ते च़ेब्रे परेणी केरां शा-शा फंगां थियां ते तैन पुड़ एछ्छी थी इड़ी तगर कि फंगन अन्तर भी एछ्छी थी, तैना रात दिहाड़ी बगैर आरामे इन ज़ोते रातन, “पवित्र, पवित्र, प्रभु-परमेशर, सर्वशक्तिमान, जै थियो, जै आए, ते जै एजनेबालोए।” 9 जै तखते पुड़ बिशोरो जै हमेशा-हमेशा ज़ीतोए, तैना प्राणी तैसेरी महिमा ते आदर ते शुक्र केरेले, (aiōn g165) 10 ज़ैखन चोब्ही बुजुर्ग तखतन पुड़ बिशने बाले कां मथ्यो टेकेले, ते तैसेरी आराधना केरेले। ते तैना अपना-अपना ताजां तखतेरे सामने इन ज़ोइतां रखेले: (aiōn g165) 11 “हे इश्शे प्रभु-परमेशर, तीए सैरी चीज़ां बनेइ। तेरे मेज़ी सेइं सब चीज़ां बनेइ जैई ते वजूदे मां एई। एल्हेरेलेइ तूए महिमा, आदर ते शेक्तेरे काबलस।”

5 जै तखते पुड़ बिशोरो थियो, मीं तैसेरे देइने हथ्ये मां अक किताब लाई, जै अन्त्रमेई त कने बेइरमेई लिखोरी थी, ते ते सत मोहरां लेइतां बन्द कियोरी थी। 2 फिरी मीं अक ताकतबर स्वर्गदूत लाव, जै ज़ोरे ज़ोरे सेइं ई प्रचार केरतो थियो। “इस किताबारो खोल्लने ते इसेरी मोहरां ट्लोइनेरे काबल कौने?” 3 पन न स्वर्गं मां, न धरती पुड़ न धरतारे बुन कोई तैस किताबी खोल्लने या तैस पुड़ नजर केरनेरे काबल मैलो। 4 ते अवं ज़ोरे-ज़ोरे सेइं लेरां देने लव, किजोकि तैस किताबरे खोल्लनेरे या तैस पुड़ नजर केरनेरे काबल कोई न मैलो। 5 तैखन तैन बुजुर्गन मरां एक्के मीं सेइं ज़ोवं, “लेरां न दे, तक, तै ज़ैस जो यहूदारे गोत्रेरो शेर ज़ोतन, जै दाऊद राज़ेरे खानदाने मरांए तैने तै किताबी खोल्लनेरे ते सत्ते मोहरां ट्लोइनेरे लेइ शैतान हारावरोए।” 6 तैखन मीं तखत ते च़ेब्रे प्राणी त कने तैन बुजुर्गां केरे मझाटे अक मारोरू गबडू लाव। तैसेरां सत शिनाँ ते सत एछ्छी थी; इना परमेशरेरी सते आत्मान, ज़ैना सैरी धरतली पुड़ भेजोरिन। 7 गबडे अगगर एइतां जै तखते पुड़ बिशोरो थियो तैसेरे देइने हथ्ये मरां तै किताब नेही। 8 ते ज़ैखन तैने किताब नेही, त तै च़ेब्रे प्राणी ते चोब्ही बुजुर्गां तैस गबडेरे सामने झुके; ते हर केन्चरे हथ्ये मां बर्बत ते धूपे सेइं भरोरे सोन्नेरे कटोरे थिये, इना पवित्र लोकां केरि प्रार्थनान। 9 त तैना इन नव्वू गीत ज़ोने लगे, “तीं कां अधिकारे कि तू मोहरन ट्लोइस ते इस किताबी खोल्लस, किजोकि तीं मेरतां अपने खूने सेइं परमेशरेरे लेइ हर एक्की कुले मरां, हर भाषाई मरां, हर लोकन मरां, ते कौमी मरां लोक घिन्नेरेन।” 10 “तीं तैना राज़े बनाए, तीं तैना याजक बनाए ज़ैना इश्शे प्रभु परमेशरेरे लेइ सेवारू कम केरन, ते तैना धरती पुड़ राजां केरू ज़ेरू राज़ केरतन।” 11 मीं दुबारा तक्कू, त मीं बेशुमार स्वर्गदूतां त च़ेब्रे प्राणी ते बुजुर्गां केरि आवाज़ शुनी ज़ैना तखतेरे च़ेब्रे पासन थिये। 12 तैना ज़ोरे सेइं ज़ोते थी, “मारोरू गबडू समर्थ, धन, ज्ञान, शक्ति, आदर, महिमा, ते कने शुक्तेरे काबले।” 13 फिरी मीं स्वर्गं मां ते धरतली पुड़ त कने धरतलरे बुन, ते समुन्दरेरी सब चीज़ां, ते सब किछ ज़ैन तैन मांए, इन ज़ोते शुनु कि, “जै तखते पुड़ बिशोरोए तैसेरू त कने गबडेरू शुक्र, आदर, महिमा ते राज़, हमेशा राए।” (aiōn g165) 14 ते च़ेब्रे प्रेणेई आमीन ज़ोवं, ते बुजुर्गेई मथ्यो टेको।

6 फिरी मीं लाव, कि गबडे तैन सत मोहरन मरां अक खोल्ली; ते तैन च़ेब्रे प्रैणेन मरां एक्केरी गुडनेरी ज़ेरि आवाज़ शुनी कि, “एई।” 2 ते मीं नज़र की, ते अक छितो घोड़ोए, ते तैसेरे सुवारे कां धनक थियूं ते तैस अक ताज दिन्तू, ते तै ज़ीतो निस्सो कि होरि भी ज़ीत हासिल केरे। 3 ज़ैखन गबडे दुइयोवं मोहर खोल्ली, त मीं होरो प्राणी इन ज़ोते शुनु कि, “एई।” 4 फिरी अक होरो घोड़ो निस्सो, जै लाल रंगेरो थियो; ते तैसेरे सुवारे ई अधिकार दितो, कि धरतली पुड़ां मेल-मिलाप सल्ले, ताके लोक एक्की होरि मारन; ते तैस अक बड्डी तलवार दित्ती। 5 ते ज़ैखन गबडे ट्लेइयोवं मोहर खोल्ली, त मीं ट्लेइयोवं प्राणी इन ज़ोते शुनु कि, “एई।” ज़ैखन मीं तक्कू त अक कालो घोड़ो निस्सो; 6 ते मीं तैन च़ेब्रे प्रैणन मरां मैनेरी ज़ेरि ई गल ज़ोते शुनी, कि दीनारो गेहूं, “ते

दीनारें टलाई सेर जौ, तेल, ते कने दाछोरो रसेरो नुकसान न केरथ।” 7 जैखन तैने च़ेवरोवं मोहर खोल्ली, त मीं च़ेवरोवं प्राणी इन ज़ोते शुनो कि, “एई!” 8 ते मीं नज़र की, ते हेरा, अक हेइढलो घोड़ोए; तैसेरे सूवारेरू नवं मौते, ते पाताल तैस पत्ती-पत्तीए, ते तैन ई अधिकार मैल्लो कि धेरती पुड़ रानेबाले लोकन मरां हर च़ेवरो मैन्हु मारन, कि तैना तैन तलवारी सेइं मारन, ते ढलुखी सेइं मारन, ते बुरी बिमैरी सेइं मारन, ते तैन जंगली जानवरन सेइं भी मारन। (Hadēs g86) 9 जैखन गबड़े पंचोंव मोहर खोल्ली, त मीं बलिदान केरनेरी ठारी करां बुन आत्मा लेई, जैना परमेशरें वचनरें वजाई सेइं, ते तैस गावहेरी वजाई सेइं जै तैनेईं दित्तोरी थी, कि यीशु मसीह तैन केरो प्रभुए मारोरो थियो। 10 ते तैनेईं बड़े ज़ोरे सेइं हक देइतां ज़ोवं, “हे पवित्र, ते सच्चे प्रभु; तू केइस तगर इश्शो इन्साफ न केरेलो? ते धेरतलरे रानेबालन सेइं इश्शो खूनरो बदलो केइस नेलो?” 11 ते तैन सेब्भन छित्तां लिगडां दित्तां, ते तैन सेइं ज़ोवं, कि थोड़े च़िरेरे लेइ आराम केरा, ज़ांतगर तुश्शे संगी दास, ते विश्वासी साथी, जैना तुश्शे ज़ेरे मारे गानेन, तैन केरि भी गिनती पूरी न भोए। 12 जैखन गबड़े शेइयोवं मोहर खोल्ली, त मीं हेरू, कि अक बड़ो भुंजल अव; ते दिहड़ो कमलेरो ज़ेरो भोव, ते चाँदनी पूरी खूनरी ज़ेरि भोइ। 13 ते अम्बरेरे तारे धेरतली पुडां झड़े ज़ेन्चरे बड़े तूफाने सेइं फ़ेगरे बुटे मरां कच्चे फल झड़तन। 14 ते अम्बर एरू घिशकू, ज़ेन्चरे बरको पलेटोते ते हर अक पहाइ, ते टैपू, अपने-अपने ठारारां घिशके। 15 ते धेरतलरे राज़े, प्रधान, सरदार, धनी ते समर्थि लोक, ते हर अक दास, ते हर अक आज़ाद पहाडां केरे कुडन मां, ते शफ़डन मां छप्ये। 16 ते पहाइन, ते शफ़डन सेइं ज़ोने लाए, “कि असन पुड़ झड़ा; ते असन तैसेरे ऐशी सेइं जै तखते पुड़ बिशोरोए ते गबड़े सरकी करां छुपा। 17 किजोकि तै खतरनाक दिहाड़ी एज्जेली ज़ेइस परमेशर ते गबडू हर एक्की सज़ा देले, ते कोई भी तैस झैल्लनेरे काबल नई।”

7 इसेरां पत्ती मीं दुनियारे च़ेब्रे कूनन पुड़ च़ेब्र स्वर्गदूत खड़े लाए। तैन स्वर्गदूतन दुनियाई मां आफत फैलेइतां नुकसान पुज़ानेरे लेइ परमेशरे करां अधिकार हासिल कियोरो थियो, चाए धेरती पुड़ या समुन्द्रे पुड़। तैनेईं दुनियारे च़ेब्रे कूनन करां हवान ठेमतां रख्खी ताके धेरतली, या समुद्र, या कोन्ची बुटे पुड़, हवां न च़ले। ते मीं अक होरो स्वर्गदूत पूर्वरां एइतो लाव। तैस कां अक महोर थी ज़ै हमेशा जीते परमेशरें तरफां थी। तैने च़ेब्रे स्वर्गदूतन सेइं ज़ोरे सेइं ज़ोवं: 3 “ज़ांतगर अस अपने परमेशरें दासां केरे कुपाए पुड़ मोहर न लाम तांतगर तैना आफतां तैन पुड़ न एजन, ते धेरतली, समुन्द्र ते कने बुटन नुकसान न पुज़ान।” 4 ते ज़ैन पुड़ मोहर कीजेई, मीं तैन केरि गिनती शुनी, कि इस्राएलेरी खानदानेरे गोट्लन मरां अक लख चुरतैली हज़ारन पुड़ महोर कीजेई। 5 यहूदारे गोट्लन मरां 12 हज़ारन पुड़ मोहर लाई, रूबेनेरे गोत्रे मरां 12 हज़ारन पुड़; गादेरे गोत्रे मरां 12 हज़ारन पुड़। 6 अशेरेंरे गोट्लेरे मरां 12 हज़ारन पुड़; नप्तालेरे गोत्रे मरां 12 हज़ारन पुड़; मनश्शेरे गोत्रे मरां 12 हज़ारन पुड़। 7 शमीनेरे गोत्रे मरां 12 हज़ारन पुड़; लेबेरे गोत्रे मरां 12 हज़ारन

पुड़; इस्साकारेंरे गोत्रे मरां 12 हज़ारन पुड़। 8 जबूलूनेरे गोत्रे मरां 12 हज़ारन पुड़; यूसुफेरे गोत्रे मरां 12 हज़ारन पुड़, बिन्यामीनेरे गोत्रे मरां 12 हज़ारन पुड़ मोहर लाई जेई। 9 इसेरां पत्ती मीं मैन्हु केरि भीड़ लाई ज़ैस कोई गेनि न थियो बटतो। तैना हर कुले मरां, हर कौमी मरां, ते हर भाषाई मरां ओरे थिये। तैना तखतेरे ते गबड़ेरे सामने खड़े थिये। तैनेईं छित्तां लिगडां लोरो थियां, ते सैभेईं अपने हथ्यन मां तैसेरे आदरारे निशानेरे रूपां मां खजूरी डैलड़ी घिन्तां थिये। 10 ते तैना लोक बड़े ज़ोरे सेइं ज़ोती थिये, “मुक्तेरे लेइ इश्शे परमेशरेरू ज़ै तखते पुड़ बिशोरोए, ते गबड़ेरू जयजयकार भोए।” 11 ते सारे स्वर्गदूत जैना तखतेरे च़ेब्रे पासन ते बुजुर्गां केरे च़ेब्रे पासन थिये ते च़ेब्रे प्रेणेईं तैनेईं मथ्यो टेको, ते परमेशरे कां मथ्यो टेकतां ज़ोवं, 12 “आमीन, इश्शे परमेशरी स्तुति, ते महिमा, ते ज्ञान, ते शुक्र ते आदर, ते समर्थ, ते शक्ति हमेशा बनोरी राए। आमीन।” (aiōn g165) 13 इन गल्लन पुड़ बुजुर्गन मरां एक्के मीं सेइं ज़ोवं; “इना छित्तां लिगडां लेइतां कौन? ते कोड्डां ओरेन?” 14 मीं तैस सेइं ज़ोवं; “हे मालिक, तूए ज्ञानतस।” तैने मीं सेइं ज़ोवं; “इना तैना आन, जैना तैस बड़े मुसीबती मरां निसोरेन; तैनेईं अपना लिगडां गबड़ेरे खून सेइं धोइतां छित्तां केरन, ज़ेसेरो मतलब तैन केरे पाप दूर किये।” 15 “एल्हेरेलेइ तैना परमेशरेंरे तखतेरे सामनेन, ते तैसेरे मन्दरे मां रात दिहाड़ी तैसेरी सेवा केरतन; ते ज़ै तखते पुड़ बिशोरोए, ते तैन मां रालो ते तैन केरि रक्षा केरेलो। 16 ते तैना फिरी ढलुखोरे ते ट्लिशोरे न भोले: ते तैना दिहाड़े सेइं ते कोन्ची भी गेरमी सेइं न फुकोले। 17 किजोकि गबडू ज़ैन तखतेरे मज़ाटे, तैन केरि रखवाली केरेलू; ते तैन लोकन ज़िन्दगरे पैनी कां नेलू, ते परमेशर तैन केरे एछछी केरां सब ऐंखरू पुछेलो।”

8 जैखन गबड़े सतोवं मोहर खोल्ली, त स्वर्ग मां अर्धे घंटे तगर खामोशी राई। 2 मीं तैन सत स्वर्गदूत जैना परमेशरेंरे सामने खड़े रहतन, लाए, ते तैन सत नइशिंगे दिते जे। 3 फिरी अक होरो स्वर्गदूत सोन्नेरू धूपदान घिन्तां अव, ते बलिदान केरनेरी ठारी कां जेव; ते तैस बड़ो धूप दित्तो, कि सेब्भी पवित्र लोकां केरि प्रार्थनान सेइं साथी तैस सोन्नेरे बलिदान केरनेरी ठारी पुड़ ज़ै तखतेरे सामने च़ाड़े। 4 ते तैस धूपेरो तू परमेशरेंरे लोकां केरि प्रार्थनान सेइं साथी स्वर्गदूतां केरे ज़िरिये परमेशरेंरे सामने पुजो। 5 तैखन स्वर्गदूत धूपदान नेइतां तैस मां बलिदान केरनेरी ठारारी अग भरी, ते धेतली पुड़ छड़ी, ते गुडनेरी आवाज ते बिजली ते भुंजल भोने लाए। 6 ते तैना सते स्वर्गदूत ज़ैन कां सत नइशिनगे थिये, बज़ानेरे लेइ तियार भोए। 7 पेइले स्वर्गदूत नइशिनगां बज़ाव, ते खून सेइं मिलोरी आण ते अग धेरतली पुड़ शारी; ते धेरतली ट्लेइन मरां अक हिस्सो फुकोई, ते बुट भी अक तीयाही फुकोए, ते सब नीलो घास भी फुकोव। 8 दुइयोवं स्वर्गदूते नइशिनगां बज़ाव, त किछ ज़ेन्चरे बड़े पहाड़ेरू ज़ेरू अग्गी सेइं फुकोतू समुन्द्रे मां शारू; ते समुन्द्र अक तीहाई खून भोव। 9 ते अक तीहाई जानवर जैना समुन्द्रे मां रहते थिये मेरि जे, ते समुन्दरेरां अक तीहाई ज़िहाज़ां तुबा भुआं। 10 ट्लेइयोवं स्वर्गदूते नइशिनगो बज़ाव, ते अक बड्डो तारो ज़ै दीयेरो ज़ेरो

बलतो थियो, स्वर्गंरां टुलुटो, ते दरियां केरे एककी तीहाई पुड, ते पैन्न पुड पेव। 11 ते तैस तारेरु नवं नागदौनाए, ते अक तीहाई पानी नागदौनारू जेरू टुलिटू भोवं, ते बडे मैन्दु तैस पैनेरे टुलिटू भोने सेइं मेरि जे। 12 चेत्रोवं स्वर्गदूते नइशिनगो बजाव, ते दिहाडो अक तीहाई, ते चेंदनी अक तीहाई ते तारां केरि एककी तीहाई पुड हलचल पेई, इडी तगर कि तैन केरो अक तीहाई हिस्सो आंधरो भोव ते दिहैडरी एककी तीहैई मां लौ न राई, ते तेन्चरे राती मां भी। 13 जैखन मीं हेरू, त अम्बरेरे मझामेई अक उकाब उडरते ते ज़ोरे सेइं इन ज़ोते शुनु, “कि तैन टुलाई स्वर्गदूतां केरे नइशिनगोरे आवाजारे वजाई सेइं जैना बजांने हेजू बाकिन, थेरतली रानेबालन पुड अफ्रसोस! अफ्रसोस! अफ्रसोस!”

9 जैखन पंचोंव स्वर्गदूते नइशिनगो बजाव, त मीं स्वर्गंरां थेरतली पुड अक तारो झड़तो लाव, ते तैस अथाह कुण्डेरी चाबी दित्ती। (Abyssos g12) 2 तैने अथाह कुण्ड खोल्लू, ते कुण्डे मरां एककी भेट्टारो ज़ेरो तू निस्सो, ते कुण्डेरे तूप सेइं दिहाडो ते अम्बर आंधरू भोइ जेव। (Abyssos g12) 3 ते तैस तूप मरां थेरतली पुड टिट्टां निस्सां, ते तैन थेरतलरे बिच्चू केरि ज़ेरि ताकत दित्ती जेई। 4 ते तैन सेइं ज़ोवं, कि न थेरतलरे घासे, न केन्ची नीलारे, न केन्ची बुटे नुकसान पुजांन, सिर्फ तैन मैनन् जैन केरे कुपाए पुड परमेशरेरी मोहर नई। 5 ते तैन मारनेरे लेइ नई, पन पंच महीन्न तगर लोकन दुःख देनेरो अधिकार दित्तो, ते तैन केरो दुःख एरो थियो, जेन्चरे बिच्चू केरे डस मारने सेइं मैनन् भोते। 6 तैन पंच महीन्न मां मैन्दु मरनु चाएले, पन तैना न मेरि बटेले। तैना मरनेरी इच्छा रखेले पन तैना कोन्ची भी तरीके सेइं मरनेरी बत न मैलेली। 7 तैना टिट्टां जंग केरनेरे लेइ तियार घोडां केरे ज़ेरां लेइहोतां थियां, तैन केरे दोगन पुड सोत्रां ताजां केरू जेरू किछ लेइहोतू थियूं; तैन केरां तुत्रां मैन्दु केरे तुत्रां केरां ज़ेरां थियां। 8 ते तैन केरे बाल कुआन्शां केरे ज़ेरे लम्मे थिये, ते तैन केरे दंत शेरां केरे ज़ेरे मजबूत थिये। 9 ते तैने लोहिरी ज़ेरि झिलम लोरी थी, ते तैन केरे फंगां केरि आवाज एरी थी जेन्चरे रथां केरि ते लडैई मां दौड़ते बडे घोडां केरि। 10 तैन केरां पूछडां बिच्चू केरां ज़ेरां थियां, ते तैन मां डस थियो, ते तैन पंच महीन्न तगर मैनन् दुःख पुजांनेरी ताकत थी, ते ताकत तैन केरे पूछडन मां थी। 11 अथाह कुण्डेरो दूत तैन पुड राज़ो थियो, तैसेरू नवं इब्रानी भाषाई मां अबदोन, ते यूनानी भाषाई मां अपुल्लहोने, जेसेरो मतलब नाश केरनेबालो। (Abyssos g12) 12 पंच महिन्ना बाद पेडली आफत बीती जेई, ते इट्टां पत्ती दूई बल्के दूई करां जादे आफतां एजने बैलिन। 13 जैखन शेइयोवं स्वर्गदूते नइशिनगो बजाव ते ज़ै सोन्नेरे बलिदान केरनेरी ठार परमेशरेरे सामने, तैसेरे चेत्रे कूनन मरां मीं एरी आवाज शुनी। 14 जेन्चरे कोई शेइयोवं स्वर्गदूत सेइं ज़ोने लोरोए ज़ैस कां नइशिनगो थियो, “कि तैन चेत्रे दूत जैना बडे दरियाए फराते कां बन्दोरोए, तैन खोल्ल।” 15 तैखन तैना चेत्रे दूत खोल्ले, तैना पेडले तियार भोरे थिये, त इस घेडी, ते दिहाडे, ते महीने, ते सालेरे लेइ तैन बलगनेरे लेइ ज़ोरू थियूं, ते हुनी ई वक्त अव, कि तैना दुनियारे लोकन मरां अक तीहाई लोक मारन। 16 ते तैन केरे फौजरी गिनती बी करोइ थी

जैना घोड़न पुड सुवार थिये, मीं तैन केरि गिनती शुनी। 17 ते मीं इस दर्शन मां घोडे ते तैन केरे एरे सुवार लेइहोए, जैन केरि झिल्लमां अगारे ज़ेरि लाल, ते नीले ते हेडले रंगेरे ज़ेरे थी, ते तैन घोडां केरि क्रोडी शेरां केरे क्रोडी केरि ज़ेरि थी, ते तैन केरे ऐशेरां अग ते तू ते गन्धक निसती थी। 18 इन टुलेइ आफतन सेइं जैना इना आन, अग, तू, ते कने गन्धक, ज़ै तैन घोडां केरे ऐशी मरां निसती थी; तैन सेइं अक तीहाई लोक मेरि जे। 19 तैन घोडां केरि ताकत तैन केरे ऐशी, ते कने तैन केरे पूछडन मां थी, किजोकि तैन केरां पूछडां सप्यां केरां ज़ेरां थियां, ते तैन केरे पूछडां केरि क्रोडी भी थी, ते तैने सेइं तैना दुःख भी पुजाते थिये। 20 ते होरे मैन्दु जैना तैन आफतन सेइं न थी मरे, ते तैनेई मूरती केरि पुजा केरनि न शारी, जैना तैनेई सोन्ने, पितल, ते कन्ने घोड, लेकडरे बनेइं। तैना मूरती न लहन, न शुन्न, न चेलि बटन, ते तैनेई भूतां केरि आराधना केरनि भी न शारी। 21 ते तैनेई, खून, टूनो, बदमाशी, ते कने घोरी केरने करां मन न फिराव।

10 फिरी मीं अक होरो ताकतबर स्वर्गदूत बिदलार पलेटतां स्वर्गंरां एडतो लाव, तैसेरे दोगे पुड भुन्नल्लैठ थी, ते तैसेरू आशी दिहाडेरू जेरू ते तैसेरे पाव अगारे खम्मबेरे ज़ेरे थिये। 2 तैने अपनो देइने पाव समुन्द्रे पुड रखबो, ते खिशडो थेरतली पुड रखबो, ते तैसेरे हथ्ये मां अक निकडी किताब खोलोरी थी। 3 तैनी स्वर्गदूते बडे ज़ोरे सेइं ज़ोवं, तैसेरी आवाज शेररे गज़नेरी ज़ेरि थी। ते जैखन तैने ज़ोरे सेइं चिन्ड मारी, त सत आवाजेई जुवाब दित्तो, जैन केरि आवाज गुडनेरी ज़ेरि थी। 4 ते जैखन मीं सत्ते गुडनेरी आवाज शुनी, त अवं लिखनेबालो थियो, त मीं स्वर्गंरां ई आवाज शुनी, “कि जैना गल्लां तीं गुडनेरी ज़ेरि शुनोरिन, तैन छेपोरी रख, ते तैन न लिख।” 5 ते ज़ै स्वर्गदूत मीं समुन्द्रे ते थेरतली पुड खडो लोरो थियो; तैने अपनो देइने हथ स्वर्गेरे पासे खडो कियो। 6 ते ज़ै हमेशा ज़ींतोए ते ज़ैने स्वर्ग, धरती त कने समुन्द्रे ते ज़ैन किछ तैन मांए बनोरूए, तैनी तैसेरी कसम खेइतां ज़ोवं, “हुनी होरि कोन्ची चीजरो इंतज़ार नई। हुनी सब पूरू कियूं गालू!” (aiōn g165) 7 बल्के जैखन सतोवं स्वर्गदूत नइशिनगो बजालो, त परमेशरेरो तै मकसद पूरो भोलो ज़ै तैसेरे नेबेई ज़ोरोए, ज़ैनेई तैसेरी सेवा की, पन तैने होरि लोकन तैसेरो पतो लगने न दित्तो। 8 मीं फिरी दुबारां स्वर्गंरां तैए आवाज शुनी। तैस आवाजां मीं सेइं ज़ोवं, तैए फिरी मीं सेइं गल्लां केरने लाव; “कि गा, ज़ै स्वर्गदूत समुन्द्रे ते थेरतली पुड खडोए, तैसेरे हथ्ये मरां खुलोरी किताब ने।” 9 ते मीं स्वर्गदूत कां गोइतां ज़ोवं, “ई निकडी किताब मीं दे।” तैने मीं सेइं ज़ोवं, “यां इस खा, ते ई तेरे पेटे टुलिट्टी त केरेली, पन तेरे ऐशी मैछी करां भी जादे मिट्टी लग्गेली।” 10 ते मीं ते निकडी किताब तैस स्वर्गदूत करां नेइतां खाइ, तै मेरे ऐशी मां मैछेरी ज़ेरि मिट्टी लग्गी, पन जैखन मीं ते खाइ, ते तैस सेइं मेरू पेट टुलिटू भोवं। 11 तैखन मीं सेइं इन ज़ोवं, “तीं बडे लोकन, कौमन, भाषान, ते कने राज़न पुड, फिरी दुबारां भविष्यियाणी केरनि भोली।”

11 फिरी मीं नापनेरे लेइ अक निराठी दित्ती, ते तैने मीं सेइं ज़ोवं, “उठ परमेशररे मन्दरे ते बलिदान केरनेरी ठार नाप, ते ज़ैना लोक तैडी मेरी आराधना केरने लोरेन तैन गन। 2 पन मन्दरेरे बेइर्यों अंगन न नाप, किजोकि एन तैन लोकां केरे लेइ आए ज़ैना मीं पुइ विश्वास न केरन, ते तैना तैस पवित्र नगर यरूशलेमे 42 महीन्न तगर तुबा केरेले। 3 तैस वक्ते अवं अपने दुइये गवाहन ई अधिकार देइलो, तैना टाट यानी मातमेरां लिगड़ां लेइतां 1260 दिहाइन तगर मेरे सन्देशेरू एलान केरन।” 4 तैना दूई गवाह, ज़ैन केरे बारे मां बड़े पेइले केन्ने ज़ैतूनेरे दूई बुट ते दूई दीवट केरि मिसाल दित्तोरी थी ज़ैना परमेशररे सामने रहतन ज़ै धेरतरे लोकां केरो प्रभुए। 5 ते अगर कोई तैन नुकसान पुज़ानो चाए, त तैन केरे ऐशी मरां अग निस्तां तैन केरे दुश्मन भस्म केरतीए, ते अगर कोई तैन नुकसान पुज़ानो चाए, त ज़रूर तै इस्से तरीके सेइं मारे गाले। 6 परमेशरे तैन अधिकार दित्तोरी, कि तैना सन्देश एलान केरनेरे दौरान अम्बर बंद केरन (यानी झड़ी रोकन)। तैन ई भी अधिकार मैल्लो पानी खूनेरू ज़ेरू लाल बनान, ते इन भी कि ज़ैखन तैना चान धेरतली पुइ हर किसमेरी आफत एनी बटतन। 7 ते ज़ैखन तैना दूई गवाह परमेशररे सन्देशेरू एलान केरतां झाड़ेले, त तैए हैवान ज़ै अथाह कुण्डे मरां निसेलो, तैन सेइं लेइतां तैन करां ज़ीतेलो ते तैन मारेलो। (Abysos g12) 8 ते तैन केरि लाशां तैस महान नगर यरूशलेमेरे सड़की मां राली ज़ैडी तैन केरो प्रभु क्रूस पुइ च़ाढ़ोरी थियो, ज़ेसेरी तुलना सदोम नगर ते कने मिस्रे मुल्खे सेइं कियोरीए। 9 ते सब लोकन, कुलन, भाषान ते कने कौमन मरां लोक तैन गवाहां केरि लाशां सड़े ट्लाई दिहाइन तगर हेरते राले। ते तैना लोक तैन केरि लाशन कोन्ची भी दबने न देले। 10 ते धेरतलरे रानेबाले, तैन केरे मारने सेइं खुश ते मघन भोले, ते तैन केरे हेरने बालन बड़े डरेले। 11 ते सड़े ट्लाई दिहाइना पत्ती परमेशररे तरफां ज़िन्दगरी सांस तैन मां आई, ते तैना खड़े भोए, ते ज़ैनेई तैना दुबारां ज़ीते लाए तैना बड़े डेरि जे। 12 एसेरां बाद, तैन दूई मैनेई स्वर्गें अक ज़ोनेबालो उच्ची आवाज़ी मां जोते शुनो, “कि इडी बा एज्जा!” ज़ैखन तैन केरे दुश्मन हेरनेरे लोरे थिये तैना तैने केरे सामने बिदलारी पलेटतां स्वर्गें मांजो च़ले जे। 13 फिरी तैस्से वक्ते यरूशलेम नगरे मां अक बड़ो भुंजल अव, ते नगरेरे इमारतां केरो दशोवं हिस्सो झड़ो; ते तैस भुंजले सेइं 7000 मरे, ते होरे ज़ैना बचोरे थिये तैना बड़े डरे, ते तैनेई स्वर्गेरे परमेशररी बडीयाई की। 14 दुइयोवं आफत बीती जेई, हेरा, ट्लेइयोवं आफत एजने बालीए। 15 ज़ैखन सतोवं स्वर्गदूते नइशिन्गो बजव, त मीं स्वर्गें मां बडी ज़ोरे सेइं आवाज़ शुनी, “हुनी इस दुनियाई मां कोई राज़ केरनेबालो नई सिर्फ इश्शो प्रभु-परमेशर ते तैसेरो चुनोरो मसीह, ते ते हमेशारे लेइ राज़ केरेलो।” (aiōn g165) 16 ते चोब्बी बुजुर्ग ज़ैना परमेशररे सामने अपने-अपने तखते पुइ बिश्शोरे थिये, परमेशरे कां मथ्यो टेकतां, 17 इन ज़ोने लाए: “हे सर्वशक्तिमान प्रभु-परमेशर, तू ज़ै आस, ते ज़ै थियो, अस तेरू शुक़ केरतम, कि तीं हुन्ना महान शक्ति हिराई, ते तीं धेरती पुइ राज़ केरनू शुरू कियोरूए। 18 होरि कौमां केरे लोकेई तीं पुइ क्रोध कियो, ते

तेरो प्रकोप अव, ते तै वक्त ओरोए कि मर्रां केरो इन्साफ कियो गाए, ते ई वक्त भी आए, कि तेरे दास नेबन ते सारे लोकन ज़ैना तेरे आदर केरतन ज़ैना कमज़ोरन ते ज़ैना ताकतबरन तैन तू इनाम देस, ते तैस्से वक्ते तैन नाश केरस ज़ैना धेरतरे नाश भोनेरी वजा थियो।” 19 परमेशररू ज़ैन मन्दर स्वर्गें मांए, तैन खोल्लू, ते तैसेरे मन्दरे मां करारोरो सन्दूख लेइहोव, ते बिजली ते आवाज़ ते गुडने ते भुंजल आए, ते बडी-बडी आण पेई।

12 ज़ैखन तैन बीती जेव, त फिरी अम्बरे मां अक बड़ो आजीब निशान लेइहोव। मतलब अक कुआन्श ज़ै चाँदनी पुइ खड़ी आए ते तैसां ज़ैना लिगड़ां लोरन तैना दिहाइरे ज़ेरां लेइहोतन। ते तैसेरे अपने दोगे पुइ ताज लोरू थियूं ज़ैस पुइ 12 तारे थियो। 2 तै दोर्ज़ीती भोइ, ते चिन्डां मारती थी; किजोकि तैस बच्चो ज़ानेरी तकलीफ थी। 3 ते अक होरो निशान अम्बरे मां लेइहोव, ते हेरा; अक बड़ो लाल अजगर (यानी शैतान) थियो, तैसेरी सत क्रोड़ी ते दश शिन्गां थियां, ते तैसेरे दोगन पुइ सत ताजां थियां। 4 ते तैसेरे पूछड़ां अम्बरेरे तारां केरि अक तीहाई ज़मीनी पुइ आनी, ते तै अजगर तैस कुआन्शरे सामने खड़ो भोव ज़ै दोर्ज़ीती थी, कि ज़ैखन ते बच्चो ज़ाए त ते बच्चे तैस खाए। 5 तैखन तैस कुआन्शां मट्टू ज़ाऊं, तैन अजगरे न खेइ बट्टू किजोकि तैन अकदम परमेशरे ते तैसेरे तखते कां आनू जेव। तैन मट्टू सारी कौमन पुइ लोहरे डण्डे सेइं राज़ केरेलू। 6 ते ई कुआन्श जंगले जो नश्शी, ज़ैडी परमेशररे तरफां तैसेरेलेइ अक ठार तियार कोयोरी थी, कि तैडी 1260 दिहाइन तगर तैसेरी हेरगेश की गाए। 7 फिरी स्वर्गें पुइ लड़ाई भोइ, मीकाईल ते तैसेरे स्वर्गदूत अजगरे सेइं लड़ने लेइ निस्से, ते अजगर ते तैसेरे दूतन सेइं लड़े। 8 अजगरे लड़ाई हारी, ते फिरी तैना स्वर्गें मां न रेइ बटे। 9 एल्हेरेलेइ तै त तैसेरे दूत धेरती पुइ शारे, तैए बड्डो अजगर, ई तैए ज़ै बड़े पेइले सपेरे रूपे मां बांदो भोरो थियो, ज़ेसेरू नवं शैतान या दोष लानेबालोए। तैए आए ज़ै दुनियारे लोकन धोखे देने लोरोए। 10 फिरी मीं स्वर्गें ई बडी आवाज़ एइती शुनी, “कि हुनी परमेशर अपने लोकन बचालो! हुनी तै अपनि शक्ति इस्तेमाल केरेलो ते राज़ेरू ज़ेरू राज़ केरेलो! हुनी तैसेरो मसीह दुनियाई पुइ अधिकार रखेलो! किजोकि हुनी शैतान इश्शे परमेशररे हज़ूरी मां खड़ो न रेइ बटेले कि इश्शे साथी सेवकन पुइ रात दिहाडी दोष लाए। ते स्वर्गें मरां शारो जोरोए। 11 ते तैनेई गबड़ेरे खूनेरे वजाई सेइं ते अपने गवाहरे वचनेरे वजाई सेइं, तैस पुइ ज़ीत हासिल की, ते तैनेई अपने प्राण ट्लारे न समझे, इडी तगर की मौतरी भी परवाह न की। 12 ‘एल्हेरेलेइ तुस सब ज़ैना इडी स्वर्गें मां रहने बालेथ खुश भोथ। पन हे धेरतली ते कने समुन्द्रे मां रानेबालव तुसन पुइ अफ़सोस! किजोकि शैतान बड़े क्रोधे सेइं तुसन कां एजनेबालोए, किजोकि तै ज़ानते कि तैसेरो आखरी वक्त एजनेबालो।” 13 ते ज़ैखन अजगरे समझू, कि अवं ज़मीनी पुइ जो शारोरो, त तैस कुआन्शी पत्ती दौडो ज़ैसां मट्टू ज़ावरू थियूं। 14 पन परमेशरे तैस कुआन्शी उकाबेरां दूई बड्डां फंगां दितां, कि अजगरे करां उडरतां जंगले मां तैस ठैरी पुजे, ज़ैडी सड़े ट्लाई सालन तगर तैसेरी हेरगेश भोरी थी, ताके तैडी अजगर न पुज़ी बटे। 15 फिरी

अजगरे तैस कुआन्शी पत्ती अपने ऐशी सेइं दरियारू जेरू पानी शारू, कि तैस इस दरियाए सेइं रुड़ए। 16 तैस कुआन्शरी मद्दत केरनेरे लेइ ज़मीना तैन पानी पियूं जैन तैस अजगरेरे ऐशी मरां निसोरू थियूं। 17 ते अजगर कुआन्शी जो सेरकोव। एल्हेरेलेइ तैने कुआन्शरे औलादी सेइं लड़ाई केरनेरू एलान कियूं। तैना लोक जैन परमेशरे हुक्मन मन्तन, ते यीशुएरी दित्तोरी शिक्षाई पुड़ चलतन।

13 तैखन अजगर जेव, ते समुन्दरेरे बन्ने पुड़ खडो भोव। मीं अक हैवान समुन्द्रे मरां निसतो लाव, तैसेरां दश शिनाँ ते सत क्रोडी थी; तैने शिनान पुड़ दश राजमुकट ते तैसेरे दोगन पुड़ परमेशरेरी तुहीनरां नंवां लिखोरां थियां। 2 जै मीं हैवान लाव, तै ड्लाधेरो जेरो थियो; ते तैसेरे पाव इङ्गेरे पावां केरे जेरे थिये; ते तैसेरू आशी शेरें ऐशेरू जेरू थियूं, ते अजगरे तैस हैवाने अपनि शक्ति दित्ती ते राज केरनेरे लेइ तैस अधिकार दित्तो। 3 मीं तैस हैवानेरे करोड़न मरां एक्की पुड़ अक एरो ज़खम लाव, जेन्चरे तै मरने पुड़े; फिरी तैसेरो मारनेबालो ज़खम रोड़ो भोव, ते सारे धेरतलरे लोक हैरान भोए, ते तैस हैवाने पत्ती चलने लगे। 4 ते तैन सेब्भी लोकेई तैस अजगरेरी पूजा की, किजोकि तेने हैवाने अपनो अधिकार दित्तोरो थियो। ते इन जोड़तां कि, “इस हैवानेरो जेरो कौने? हैवाने सेइं कौने लेइ बटते?” 5 परमेशरे तैस हैवाने अज़ाज़त दित्तोरी थी कि अपने अधिकारे पुड़ घमण्ड केरे ते एन्चरे परमेशरेरी तुहीन केरे। परमेशरे तैस 42 महीन तगर ई अधिकार रखनेरे लेइ अज़ाज़त दित्ती। 6 तै हैवान परमेशरेरी तुहीन केरने लगे, कि तैसेरे नंवेरे खलाफ, ते जैडी परमेशर रहते ते स्वर्ग मां रानेबाले सेब्भी लोकां केरे खलाफ तुहीन केरने लगे। 7 परमेशरे तैस हैवाने अज़ाज़त दित्तोरी थी, कि परमेशरेरे लोकन सेइं लड़े, ते तैन करां ज़ीते, ते तैस हर कुले, सारे लोकन, भाषान, त कने कौमन पुड़ अधिकार दित्तो जेव। 8 ते धेरती पुड़ रानेबाले सेब्भी लोकेई तैसेरी पूजा की। सिर्फ तैनेई न की जैन केरां नंवां जिन्दगरे किताबी मां दुनिया बनाने करां पेड़ले लिखोरां थियां। तै किताब गबड़ेरी जिन्दगरी किताबे जैन बलिदानेरे लेइ मारू ज़ोवं। 9 जै समझनू चाते तै ध्याने सेइं शुने। 10 जैना कैद भोनेन, तैना कैद भोले, जैना तलवारी सेइं मरेलो, ज़रूरीए तैना तलवारी सेइं मरेले, परमेशरेरे लोकां केरि सबर ते विश्वास इस्से मांए। 11 फिरी मीं अक होरो हैवान धेरतली पुड़ां निसतो लाव, तैस गबड़े जेरां दूई शिनाँ थियां, पन जैखन तैने ज़ोवं त तैसेरी आवाज़ अजगरेरे जेरी थी। 12 ई दुइयोवं हैवान पेड़ले हैवानेरो सारो अधिकार इस्तेमाल केरते। दुइयोवं हैवाने धेरती ते तैस पुड़ रानेबालन करां पेड़ले हैवानेरी पूजा कराते जेसेरो मारनेबालो ज़खम ठीक भोरो थियो। 13 दुइयोवं हैवान बड़े-बड़े निशान हिरातो थियो, इडी तगर कि मैन्हु केरे सामने अम्बरेरां ज़मीनी पुड़ अग भेजतो थियो। 14 दुइयोवं हैवाने परमेशरे अज़ाज़त दित्ती कि तै पेड़ले हैवानेरे सामने चमत्कार हिराए। एन चमत्कारां केरे ज़िरिये तैनी दुनियारे सारे लोक टपलाए। तैन तैन पेड़ले हैवानेरी मूरती बनानेरो हुक्म दित्तो, जै तलवारी सेइं मारोरो थियो पन फिरी ज़ीतो भोरोए। 15 दुइयोवं हैवाने परमेशरे अज़ाज़त

दित्तोरी थी कि तै पेड़ले हैवानेरी मूरती बनाए ते तै ज़ीतोए, ताके तैस हैवानेरी मूरती गल्लां केरि बटे ते जैना तैस हैवानेरी पूजा न केरने तैना मारे गान। 16 दुइयोवं हैवाने सारे लोकन सेइं ज़बरदस्ती की, जैना खास आन ते जैना खास नई, अमीर, गरीब, आज़ाद, गुलाम आन, कि तैना पेड़ले हैवानेरे नंवेरी मोहर देइने हथ्ये या कुपाए पुड़ लान। 17 जैस पुड़ छाप मतलब तैस हैवानेरू नव या तैसेरो नंवेरो अंक भोए, त तैसेरे अलावा होरो कोई लेन देन न केरि सके। 18 इस समझनेरे लेइ अक्ल ज़रूरीए। जैस अक्ल भोए, तै इस हैवानेरो अंक जमा केरे, किजोकि तै मैनेरो अंके, ते तैसेरो अंक 666 आए।

14 एसेरे बाद, मीं किछ लाऊं, मीं गबडू सिय्योन पहाड़े पुड़ खडू लाऊं। ते तैस सेइं साथी 144000 लोक थिये, जैन केरे कुपाए पुड़ तैसेरू ते कने तैसेरे बाजेरू नव लिखोरू थियूं। 2 ते स्वर्गरां एरी आवाज़ शुनोई, जै बड़े पैनेरी ते बड़े गुडनेरी जेरी आवाज़ थी, ते जै आवाज़ मीं शुनी; तै एरी थी जेन्चरे कोई सारंगी बाज़ाने बालो सारंगी बज़ाने लोरोए। 3 144000 लोक तखतेरे सामने, ते प्राणी ते कने बुजुर्गां केरे सामने खड़े थिये; तैना अक नंवू गीत जोने लोरे थिये, तैन गीत सिर्फ तैन लोकेई शिखोरू थियूं। तैना लोक इना आन जैना सिर्फ इस दुनियाई मां रानेबाले लोकन मरां परमेशरे छुटोरे थिये। 4 इना तैना लोक आन, जैना कुआन्शन सेइं अशुद्ध नई भोरे, पन कुवारेन, इना तैना आन, जेरां भी गबडू गाते तैना भी तैस पत्ती चलतन, इना त परमेशरेरे लेइ पेड़ले फल भोनेरे लेइ मैनन् मरां घिने जोरेन। 5 तैनेई कधी झूठ नई जोरू, ते तैना बेइलजामान। 6 फिरी मीं अक होरो स्वर्गदूत अम्बरे मझामेई उडरतो लाव जैस कां धेरतली पुड़ रानेबालां केरि हर अक कौम, कुल, ते कने भाषारे लोकन शुनानेरे लेइ हमेशारी खुशखबरी थी जै कथे न बेदलोए। (aiōnios g166) 7 तैने बड़े ज़ोरे सेइं ज़ोवं, “परमेशरे करां डरा; ते तैसेरी बड़याई केरा; किजोकि तैसेरो इन्साफ केरनेरो वक्त पुजोरोए, ते तैसेरी आराधना केरा, जैन स्वर्ग, धरती, समुन्द्र, पैनेरे नाग बनोरेन।” 8 फिरी तैसेरां पत्ती अक होरो स्वर्गदूत इन ज़ोतो अव, “कि झूड़ू, तैन बाबेल नगर झूड़ू, तैने सारे कौमन अपनि शराबी पियाई, जेसेरो मतलब ई आए कि तैने सैरी लोकन मूरती केरि पूजा केरनि शिखाली।” 9 फिरी एसेरां पत्ती अक होरो स्वर्गदूत बड़े आवाज़ी सेइं इन ज़ोतो अव, “कि जै कोई इस हैवाने ते तैसेरी मूरती पूजा केरे, ते अपने कुपाए या अपने हथ्ये पुड़ तैसेरी छाप लाए। 10 परमेशर तैन ट्लिठी शराबी पियालो जैस मां पानी न भोए मिलावरू जेसेरो मतलब परमेशरे तैन सेइं बड़ो क्रोधे मां आए ते तैन पुड़ दया न केरेलो, तैना लोक अग ते गन्धकेरे दुखे मां छड़े गाले, जैखन परमेशर तैन सज़ा देतो भोलो त पवित्र स्वर्गदूत गबडू लालू। 11 ते तैन केरे दुखेरो तू सदा उठतो रालो, ते जैना तैस हैवाने ते तैसेरे मूरती पूजा केरेले, ते जैना तैसेरे नंवेरी छाप नेतन, तैन रात दिहाड़ी चैन न मैलेलो।” (aiōn g165) 12 एल्हेरेलेइ परमेशरेरे लोकां केरे लेइ ज़रूरी आए कि जैना भी दुःख तैन पुड़ एज्जन तैन सबरी सेइं झैल्लन, परमेशर जैन केरनेरो हुक्म तैन दे तैनेई तैन कियोरू लोड़े, ते

तैनेई यीशु पुड़ विश्वास केरनो न लोड़े शारोरो। 13 मीं स्वर्गरां ई आवाज़ शुनी, “लिख; ज़ैना मुडदे प्रभु मां मरतन, तैना धन आन।” पवित्र आत्मा पक्कू केरते, “तै ज़ोते, तैन सच्चरे। हाँ किजोकि तैना अपने मेहनती करां आराम हासिल केरेले, ते ज़ैन तैनेई कियूं तैसेरे बदले तैन इनाम मैलेलू।” 14 फिरी मीं अक छिती बिदलार लाई, ते तैस बिदलारी पुड़ मैनेरू ज़ेरो कोई बिशोरो लाव, तैसेरे दोगे पुड़ सोन्नेरू ताज ते हथ्ये मां तिखी इलातीए। 15 फिरी अक होरो स्वर्गदूत मन्दरे मरां निस्तां, तैने ज़ै बिदलारी पुड़ बिशोरो थियो, तैस बड़े ज़ोरे सेइं ज़ोवं, “कि अपनि इलाती चला किजोकि कटनेरो वक्त ओरोए।” 16 ते ज़ै बिदलारी पुड़ बिशोरो थियो, तैने धेरतली पुड़ अपनि इलाती लाई, ते धेरतलरी फसल केटोई। 17 फिरी अक होरो स्वर्गदूत तैस मन्दरे मरां निस्सो, ज़ै स्वर्गं मांए, ते तैस कां भी तिखी इलाती थी। 18 फिरी एक्की होरे स्वर्गदूत ज़ैस अग्गी पुड़ अधिकार थियो, बलिदान केरनेरी ठारी मरां निस्सो, ते ज़ैस कां तिखी इलाती थी, तैस सेइं ज़ोरे सेइं ज़ोवं; “अपने तिखे इलेइती लेइतां धेरतलरी दाछ कटी; किजोकि तैसेरी दाछ पकोरीए।” 19 ते तैने स्वर्गदूत धेरतली पुड़ अपनि इलाती रख्खी, ते धेरतलरे दाछरे फल केटतां, अपने परमेशररे परकोपेरे बड़े रसेरे कुण्ड मां छड़ी। 20 ते नगरेरे बेडर तैस रसेरे कुण्डे मां दाछ इलेन्नी, ते रस कुण्ड मरां एत्रो खून निस्सो कि घोड़ां केरे लगामी तगर पुज़ो, ते 100 कोसे तगर रूड़ो।

15 फिरी मीं स्वर्गं मां अक बड्डो ते आजीब निशान लाव, मतलब सत स्वर्गदूत ज़ैन कां आखरी सत आफतां थी, किजोकि तैन केरे भोने पुड़ परमेशररो क्रोध मुकेलो। 2 तैखन मीं समुन्द्रेरू ज़ेरू किछ लाव ज़ैन शीशेरू ज़ेरू चमकतू थियूं ते अग भी तैस मां मिलोरी थी। मीं तैना लोक भी लाए ज़ैना हैवाने न थिये हैरेई बटोरो, तैन लोकेई हैवान ते तैसेरे मूरतरी पूजा न थी कियारी। ते तैन पुड़ तैस हैवाने नंवेरे अंकेरी महोर न थी लोरोरी। तैना तैस शीशेरे समुन्दरेरे बन्ने पुड़ तै सांरंगी घिन्तां खड़े भोए ज़ै परमेशरे तैन दित्तोरी थी। 3 तैना परमेशररे दास मूसेरू गीत, ते गबड़ेरू गीत ज़ोते थी, “हे सर्वशक्तिमान प्रभु-परमेशर, ज़ैना कम्मां तीं कियां तैना बडा महान ते आजीब आन, तू सेब्भी कौमां केरो राज़ोस, तैन सब ज़ैन तीं कियूं तैन सही ते धर्मी आए।” 4 “हे प्रभु, सेब्भी लोकेई तेरी आदर की, ते तैना सारे तेरे नंवेरी इज़ज़त केरतन, किजोकि तूए सिर्फ पवित्रस। सैरी कौमां केरे लोक हर राज़न मरां तीं कां एज्जले, तैना तेरी आराधना केरेले किजोकि तेरे धर्मी कम्मां बडां मशूर आन।” 5 ज़ैखन तैन लोकेई गीत ज़ोताई खतम कियां, त मीं स्वर्गं मां मन्दर खोलोरू लाव। तैन एरू थियूं ज़ेन्चरे तेम्बु। 6 ते तैना सत स्वर्गदूत ज़ैन कां सत आखरी आफतां थी, तैना तैस मन्दरे मरां निस्से। तैनेई छिन्तां चमकतां लिगड़ां लोरां थियां ते तैनेई अपने छैती पुड़ सोन्नेरी पेटी बेन्धोरी थी। 7 ते तैन च़ेब्रे प्रेणन मरां एक्के सत्ते स्वर्गदूतन हमेशा जीते रानेबाले परमेशररे प्रकोपे सेइं भरोरे सत सोन्नेरे कटोरे दित्ते। (aion g.165) 8 ते परमेशररी महिमा, ते तैसेरे शेक्ते वजाई सेइं मन्दर तूए सेइं

भरोई जेव, ते ज़ां तगर तैन सत्ते स्वर्गदूतेई सते आफतां खतम की, तांतगर कोई मन्दरे मां न गेड़ बटो।

16 तैदां पत्ती मीं मन्दरे मां कोई ज़ोरे सेइं तैन सत स्वर्गदूतन सेइं ज़ोतो शुनो कि, “गाथ, परमेशररे सज़ारे सते कटोरे दुनियारे लोकन पुड़ उलटाथा।” 2 ते पेइले गेइतां अपनो कटोरे धेरतली पुड़ उलटव। ते तैन मैनु केरे ज़ैन पुड़ हैवानेरी छाप थी, ते ज़ैना लोकेई तैसेरी मूरतरी पूजा केरते थी, एक्की किसमरे बुरे ते दुःख देनेबालो फोड़े निस्से। 3 ते दुइयोवं अपनो कटोरो समुन्द्रे पुड़ उलटव, ते तै मुइदां केरे खूनेरो ज़ेरो बनो, ते समुन्दरेरे सारे जानदार मरे। 4 ते ट्लेइयोवं स्वर्गदूते अपनो कटोरो दरियान ते पैनेरे नागन पुड़ उलटव, ते सारू पानी खून बन्नु। 5 ते ज़ैस स्वर्गदूते पैनी पुड़ अधिकारे मीं तै परमेशरे सेइं इन ज़ोते शुनो कि, “हे पवित्र परमेशर, तू ज़ै आस, ते हमेशा करां थियो, तीं कां एन्चरे इन्साफ केरनेरू हक्के। 6 किजोकि तैनेई तेरे लोक ते तेरे नबी मारे ते तैन केरो खून बगोरो थियो, एल्हेरेलेइ तीं हुना तैन खून पीने जो दित्तो। इन इनामेरे रूपे मां तैन केरे लेइ ठीक आए।” 7 फिरी मीं बलिदान केरनेरी ठारी मरां ई आवाज़ शुनी कि, “हाँ सर्वशक्तिमान प्रभु-परमेशर, तेरो इन्साफ सही ते कने सच्चो आए।” 8 ते च़ेवरोवं स्वर्गदूते अपनो कटोरो दिहाड़े पुड़ उलटव, ते दिहाड़े जादे गर्म भोनेरी अज़ाज़त दित्ती कि तैस सेइं लोक फुकोन। 9 ते लोक तैस बड़े सेके सेइं फुकोए, ते तैना लोक परमेशररी तुहीन केरने लाए, किजोकि तैए आए ज़ैस कां सैरी आफतन पुड़ अधिकारे। फिरी भी तैन लोकेई अपने पापन करां मन न फिराव, ते फिरी भी तैनेई परमेशररे महिमारो इकरार न कियो। 10 ते पंचोवं स्वर्गदूते अपनो कटोरो तैस हैवानेरे तखते पुड़ उलटव ते तैसेरे सारे राज़े मां आंधरू भोवं। ते लोक दुखे सेइं मरे ते अपनि-अपनि जिभ चापने लाए। 11 ते अपने दुखे ते फोड़ां केरे वजाई सेइं स्वर्गे परमेशररी तुहीन की; ते अपने-अपने कम्मन करां मन न फिरव। 12 शेइयोवं स्वर्गदूते अपनो कटोरो बडे दरिया फराते पुड़ उलटव ते तैसेरू पानी शुक्की जेव एसेरो नितीजो ई भोव कि पूबेरे राज़े अपनि फौज घिन्तां पार जे। 13 एसेरां पत्ती मीं ट्लाई भूतां मैन्दू केरे रूपे मां लाए। अक अजगररे ऐशी मरां निस्सू, ते अक पेइले हैवानेरे ऐशी मरां निस्सू, ते अक दुइयोवं हैवानेरे ऐशी मरां निस्सू, ज़ै जो झूठो सन्देश ज़ोते। 14 इन भूतन कां चमत्कार केरनेरी काबलीत थी ते तैना दुनियारे सारे मुलखां केरे राज़ केरनेबालन अकोट्टे केरने चले ताके तैना परमेशरे सेइं लड़न, ई ते दिहाड़ी आए ज़ेइस परमेशर भूतन नाश केरेलो ते अपने लोकन मुक्ति देलो। 15 तैन भूतेई हकोमत केरनेबाले ते तैन केरि फौज एक्की ठैरी अकोट्टी की ज़ैस जो इब्रानी भाषाई मां हर-मगिदोन ज़ोतन। एल्हेरेलेइ यीशुए ज़ोरूए, “इस शुना। मेरू एजनू अचानक च़ोरेरू ज़ेरूए। धने तै मैनु ज़ैखन अवं एज्जी त ते बीड़ो रहते, ते अपने लिगड़न तियार रखते। फिरी तै नग्गो न भोलो, ते फिरी तैस लोकन मां गाने सेइं शर्म न भोली।” 17 ते सतोवंए स्वर्गदूते अपनो कटोरो हवाई पुड़ उलटव, ते मीं स्वर्गं मां मन्दरे मरां परमेशरे तखते पुड़ां ई बड़ी आवाज़ शुनी कि कोई ज़ोने लोरोए, “सब किछ पूरू

भोवें।” 18 फिरी बिजली, ते आवाज़, ते गुड़ने लाव, ते अक एत्रो बड्डो भुंजल अव, कि जेइसेरे मैन्हु इस धेरतली पुड़ पैदा भोरोरन, तेइसेरो अज़ तगर एरो भुंजल कधी नई ओरो। 19 ते तैस महान बाबेल नगरेरे ट्लाई टुकड़े भोए, ते दुनियारे कौमां-कौमां केरे सारे नगर बर्बाद भोए। ताके परमेशर ते वादो पूरो केरे ज़े तैने बाबेल नगरेरे लोकन सज़ा देनेरे लेइ कियोरो थियो। ई सज़ा परमेशर पक्की देलो। परमेशर तैन ट्लिठी शराबी पियालो ज़ैस मां पानी न भोए मिलावरू जेसेरो मतलब परमेशरे तैन सेइं बडो क्रोधे मां आए ते तैन पुड़ दया न केरेलो। 20 तैस वक्ते हर अक टैपू समुन्दरे मां डुबो; ते कोई भी पहाड़ न राऊं। 21 ते अम्बरेरां मैन्हु पुड़ मन-मन आण पेई, ते एल्हेरेलेइ कि ई आफत बड़ी भारी थी, लोकेई आनहरी आफतरे वजाई सेइं परमेशरेरी तुहीन की।

17 ज़ैन सत स्वर्गदूतन कां तैना सत कटोरे थिये, तैन मरां एइतां एक्के मां सेइं ज़ोवं, “इरां एई, अवं तीं तैस बड़े वेश्यारी सज़ा हिराताई, ज़े बड़े पैन्नु पुड़ बिशोरीए। 2 ज़ैस सेइं धेरतलरे राजेईं बदमाशी की, ते धेरतली पुड़ रानेबाले तैसेरे बदमैशरे शराबी सेइं मसत भोरे थिये।” 3 तैखन आत्मा अवं अपने कैबू मां कियो ते स्वर्गदूते अवं सुनसान ठैरी मांजो नेव। तैड़ी मां अक कुआन्शा हैवाने पुड़ सुवार लाई, जेसेरी सत क्रोड़ी ते दश शिंगां थियां, तैसेरे जान परमेशरेरी तुहीन केरनेरे नंवन सेइं ढकोरी थी। 4 तैस कुआन्शां बैंगनी ते लाल लिगड़ां लोरो थियां, ते सोन्नेरे ते कीमती मेनी ते मोतन सेइं सजोरी थी, ते तैसेरे हथ्ये मां अक सोन्नेरो कटोरो शराबी सेइं भेरतां थियो, ज़े भिटे कम्मन ते बदमैशरे कम्मन हिराते। 5 ते तैसेरे कुपाए पुड़ इन नवं लिखोरू थियूं, “भेद-बडो बाबेल धेरतलरी वेश्यां ते भिट्टी चीजां केरि अम्मा।” 6 ते मां तै कुआन्शा परमेशरेरे लोकां केरो खून ते यीशुएरे गुवाहां केरो खून पीने सेइं मसत भोती लाई, ते अवं तैन लेइतां हैरान भोव। 7 तैने स्वर्गदूते मां सेइं ज़ोवं; “तू किजो हैरान भोव? अवं तीं सेइं इस कुआन्शरो, ते तैस हैवानेरो भेद ज़ोताई, ज़ैस पुड़ ते सुवार, ते जेसेरी सत क्रोड़ी ते दश शिनगन। 8 ज़े हैवान तीं लाव, ई पेइलो थियो, पन हुनी नई रानो, ते अथाह कुण्डेरां निसेलो ते परमेशर तैस पूरे तरीके सेइं नाश केरेलो, ते ज़ैना लोक इस दुनियाई मां ज़ीने लोरेन ज़ैन केरां नंवां परमेशरे दुनिया बनाने करां पेइले जिन्दगरे किताबी मां नई लिखोरां, तैना इस हैवान हेरतां हैरान भोले, ई हैवान पेइलो ज़ीतो थियो ते हुनी ज़ीतो नई पन फिरी एज्जेलो। (Abyssos g12) 9 इन समझनेरे लेइ ज़ानी मन ज़रूरीए, तैना सत पहाड़न, ज़ैन पुड़ तै कुआन्शा राज़ केरतीए। 10 ते तैना सत राज़े भी आन, पंच त मेरि जोरेन, ते अक हेजू ए; ते अक आखरी हेजू नई ओरो, पन ज़ैखन तै एज्जेलो त थोड़े ङिरेरे लेइ राज़ केरेलो। 11 ते ज़ै हैवान पेइलो थियो, ते हुना नई, तै एपू अठोवं राज़ोए; ते तैन सत्तन मरां पैदा भोव, ते आखरी मां तैस राज़े हमेशारी सज़ा मैलेली। 12 ते ज़ैना दश शिन्गां तीं पेइलां लां, तैना दश राज़ेन, ज़ैनेई हेजू तगर राज़ शुरु नई कियोरू। तैन दश राज़ेन हैवाने सेइं साथी राज़ केरनेरो अधिकार दित्तो जेव, पन तैन राज़ केरनेरे लेइ थोड़ो वक्त दित्तो। 13 इना सब अक मन

भोले, ते तैना अपनि-अपनि शक्ति ते अधिकार तैस हैवान देले। 14 इना गबड़े सेइं लड़ेले, ते गबडू तैन पुड़ ज़ीत हासिल केरेलू; किजोकि ते राज़ां केरो राज़ो ते प्रभुं केरो प्रभु आए। तैस पत्ती चलने बाले तैना आन ज़ैना परमेशरे कुजोरेन ते चुनोरेन, ते ज़ैना तैस सेइं साथी ईमानदार आन।” 15 फिरी तैने स्वर्गदूते मां सेइं ज़ोवं, “कि ज़ैन पानी तीं पेइलू लोरो थियूं, ज़ैस पुड़ तै वेश्या बिशोरी थी, ए दुनियारे सारे कौमन हिराती, ज़ैना बड़े मुलखन मरां ते भाषान मरां आन। 16 तै वक्त एज्जेलो जेइस हैवान दश राज़ेन सेइं ज़ैना तैस सेइं साथी आन, तैस वेश्याई सेइं बैर रखेले, तैना तैस पुड़ हमलो केरेले ते तैस नगगी केरेले तैसेरू किछ मास खाले, ते बाकी फुकेले। 17 किजोकि परमेशर तैन केरे मन्न मां इन छड़ेलो, कि तैना तैसेरी मर्जी पूरी केरेले; ते ज़ांतगर परमेशरेरू वचन पूरू न भोए, तांतगर अक मन भोइतां अपनू राज़ हैवाने देन। 18 ते तै कुआन्शा, ज़ै तीं लोरीए तैन बडू नगरे, ज़ैन धेरतलरे राज़ेन पुड़ राज़ केरते।”

18 इट्टां पत्ती मां अक स्वर्गदूत स्वर्गे मरां एइतो लाव। तैस कां बडो अधिकार थियो, ते एल्हेरेलेइ तैसेरे बड़े चमकने बाले महिमा सेइं सारी धरतली लौ बनी। 2 तैने ज़ोरे सेइं ज़ोवं, “कि डुल्ली बाबेल नगरी डुल्ली, ते भूतां केरे रानेरी ठार, ते हर एक्की भूतेरो अड्डो, ते हर एक्की दुष्ट ते भिटे च़ोडोलेवेरो अड्डो बीती जेव। 3 किजोकि तैसेरे बदमैशरे शराबी सेइं सब कौमां मसत भोइ, ते धेरतलरे राजेईं तैस सेइं बदमाशी की, ते धेरतलरे बुपारी तैसेरे एशेरे वजाई सेइं अमीर भोइ जे।” 4 फिरी मां स्वर्गां अक होरि आवाज़ शुनी, “हे मेरे लोकव तुस तैस मरां निस्सा ताके तुस तैसेरे पापन मां शामिल न भोथ, ते तैसेरी आफतन मरां कोई भी तुसन पुड़ न एज्जे। 5 किजोकि तैसेरे पाप बड़े आन ज़ेन्चरे कि अगर ढेर लाव गाए त अम्बरे तगर पुजोरेन, ते परमेशरे तैसेरी बुराई नई बिसरोरी ज़े तैसां कियोरी आए। 6 ज़ेन्चरे तैसां लोकन सेइं कियूं तेन्चरे तैस सेइं भी केरा। तैना दुःख ज़ैना तैसां लोकन दित्ते तैस दुगने देथ, तैसां लोक अपने बुरां कम्मां केरो स्वाद च़खनेरे लेइ प्रभावित किये, ते परमेशरेरी दुगनी सरक मैसूस केरनेरे लेइ भी बनाई जेई। 7 ज़ेत्री तैसां अपनि बड्याई की, ते एश किये, तेतरी तैस तकलीफ ते दुःख देथ, किजोकि तै अपने मने मां ज़ोतीए, अवं रानई, विधवा नई, अवं विधवारे दुखे मां कधे न गेइली। 8 एल्हेरेलेइ तैसेरे घमण्डेरे वजाई सेइं तैस पुड़ अचानक आफतां एज्जेली। अचानक तैस पुड़ बिमारी, दुःख ते कने काल साथी एज्जेलो। ते तै अग्गी मां भस्म की गाली, किजोकि प्रभु-परमेशर शक्तिमाने ते तै तैस सज़ा देलो।” 9 ते दुनियारे राज़े ज़ैनेई तैस सेइं बदमाशी ते एश कियोरे थिये, ज़ैखन तैना तैसेरे फुकोनेरो तू लाएले त तैसेरेलेइ ढा छड़ेले, ते छाती कुटैले। 10 ते तैना डरेले कि तैना भी तैसेरे सज़ाई मां ट्लेइयोनेन, ते दूर खड़े भोइतां ज़ोले, “हे महान नगरी, बाबेल! हे मज़बूत नगरी, हाय! हाय! एक्की सैइती मां तीं सज़ा मैल्ली।” 11 “ते धेरतलरे बुपारी तैसेरेलेइ लेरां देले ते मिनत केरेले किजोकि हुनी कोई तैन सेइं लेन देन न केरेलो। 12 तैन केरू सामान बड़े किसमां केरू थियूं। सोन्नु चाँदी, जुवाहर, मोती। ते मलमल, बैजनी, देशमी, ते लाल लिगड़ां

थियां, ते कने किसमां-किसमां केरि खुशबूदार लकड़ी, ते हथीदंतरी हर किसमेरी चीजां, ते कीमती लकड़ी, पितल, लूहॉ, संगमरमरेरे किसमां-किसमां केरि चीजां, 13 ते दालचीनी, मसाले, थूप, गन्धरस, लोबान, मदिरा, तेल, मैदो, गेहुं, बेछी-दांत, भैट्टां-छेल्ली, घोडे, रथ, गुलाम, ते कने मैन्हु केरे प्राण। 14 ते बुपारी तैस सेइं ज़ोले, ज़ैना चीजां तीं चैई तैना हुनी न रैली, ज़ैना खुशबूदार चीजां तीं पसंद की, तैना सैरी चीजां ज़ैना तीं अपनो जिसम खूबसूत बनानेरे लेइ इस्तेमाल की, तैना सैरी तीं गवेई ते हुनी तैना न मैल्लन। 15 इन चीजन सेइं बुपारी ज़ैना तैसेरे वजाई सेइं अमीर भोरे थी, तैसेरे दुखेरे डरे सेइं दूर खडे भोले, ते लेरां देइतां ते तड़फते ज़ोले, 16 'अफ्रसोस! अफ्रसोस! ई बड़ी नगरी ज़ै मलमल, बेंगनी, लाल लिगडां लेइतां थी, ते सोन्नु, ते जुवाहर ते मोतन सेइं सज़ोरी थी, 17 एक्की सैइती मां तैसेरू एरू धन बरबाद भोवं, ते सब मांझी, ते मुसाफर, ते मल्लाह, ते ज़ेत्रे समुन्द्रे मरां कमाई कमातन तैना सारे दूर खडे भोए।" 18 ज़ैखन तैना तैस नेगरां फुकोनेरो तू लाएले त ज़ोरे सेइं ज़ोले, इस महान नेगरारी ज़ेरि कोई नगरी नई। 19 ते अपने-अपने दोग्गे पुइ थूइ मलेले, ते लेरां देते ते कर लाते चिन्डां मैरतां ज़ोले, "अफ्रसोस! अफ्रसोस! ई बड़ी नगरी ज़ेसेरी दौलती सेइं समुन्दरेरां सब ज़िहाज़न बाले धनी भोरे थी, एक्की सैइती मां उजड़े। 20 तुस ज़ैना स्वर्गे मां रातथ, ते परमेशरे लोकव, ते प्रेरितव, ते कने नेबव, ज़ैन तैस सेइं भोवं तैसेरे वजाई सेइं खुश भोथ, किजोकि परमेशरे तैस नेगरां इन्साफ कियोरो किजोकि तैसां तुसन सेइं बुरू कियोरू थियू।" 21 फिरी एक्की ताकतबर स्वर्गदूते बडे चेकारे पाठेरो ज़ेरो अक घोइ छूवो, ते इन ज़ोइतां समुन्द्रे मां शारो, कि बड़ी नगरी बाबेल एन्चरे बछोड़ी गाली, ते फिरी कधे तैसेरो पतो न मैलेलो। 22 ते सारंगी बज़ानेबाले, ते गीतां ज़ोनेबाले, ते बेइशोई बज़ानेबाले, ते नइशिनगां बज़ानेबालां केरि आवाज़ फिरी तीं मां कधी न शुनोली, ते फिरी केन्ची पेशेरो करीगिर तीं मां न मैलेलो; ते चक्की च़लनेरी आवाज़ तीं कधे न शुनोली। 23 ते लोक दीयेरी लौ फिरी तीं मां न बालेले, ते लाड़ेरी ते लैडारी आवाज़ कधे तीं मां न शुनोली; किजोकि तेरे बुपारी धेरतली पुइ प्रधान थिये, ते तेरे दूने सेइं सब कौमां टपलोवरी थी। 24 परमेशर बाबेले सज़ा देलो किजोकि सारे नेबी ते परमेशरे लोकां, ते धेरतली पुइ सब मारोरां केरो खून तैस्से मांए।

19 ताकतबर स्वर्गदूतेरे ज़ोइतां झाइनेरां बाद, मीं स्वर्गे मां बडे लोकां केरि भीइ उच्चे आवाज़ी मां इन ज़ोते शुनी, "हल्लिलूय्याह! मुक्ति, महिमा, शक्ति इश्शे परमेशरेरीए। 2 तैसेरी बडयाई भोए किजोकि तैसेरे सारे फैसले सही ते ठीक आन। तैने मशूर वेश्यारो इन्साफ कियो तैसां दुनियारे लोक पाप केरनेरे लेइ प्रभावित किये। परमेशर तैस बदलो देलो किजोकि तैसारे ज़िरिये परमेशरेरे दास मारोरेन।" 3 फिरी दुइयोवं बार तैनेई ज़ोवं, "हल्लिलूय्याह! ते तैसेरे फुकोनेरो तू सदा च़लतो रालो।" (aiōn g165) 4 ते चोब्ही बुजुर्गै ते च़ेरे प्रेणैई परमेशरे कां मथथो टेको; ज़ै तखते पुइ बिशोरो थियो, ते ज़ोवं, "आमीन! हल्लिलूय्याह!" 5 ते तैखन मीं ज़ोते शुनो, ते परमेशरेरे तखते मरां अक आवाज़ आई, तैने ज़ोवं,

"तुस इश्शे परमेशरेरे दास आथ ज़ैना तैसेरी आदर केरतथ, कुन निकडे, कुन बडे, तुस सब तैसेरी तारीफ़ केरा।" 6 फिरी मीं बड़ी भीडारी, ते बडे पेनेरी आवाज़ शुनी, ते गुइनेरी ज़ेरि आवाज़ शुनी, "हल्लिलूय्याह! कि प्रभु इश्शो परमेशर, सर्वशक्तिमान राज़ केरते। 7 एज्जा अस खुश ते मगन भोम, ते तैसेरी बडयाई केरम; किजोकि गबडेरो इला पुजोरोए, ते तैसेरे लेइां अपनो आप तियार केरोए। 8 ते तैस साफ ते चमकदार महीन मतलब मलमल लानेरो अधिकार दितो," किजोकि तैस महीन मलमलेरो मतलब परमेशरेरे लोकां केरां धर्मरां कम्मन। 9 ते स्वर्गदूते मीं सेइं ज़ोवं, "इन लिख, कि धन आन तैना, ज़ैना गबडेरे इलाएरे धामी मां कुजोरेन।" फिरी तैने मीं सेइं ज़ोवं, "इना गल्लां ज़ैना परमेशरे ज़ोई सत्र आन।" 10 ज़ैखन मीं शुनु, अवं ज़ै मीं सेइं गल्लां लोरो थियो केरने तैसेरी आराधना केरनेरे लेइ तैस कां झुको तैने मीं सेइं ज़ोवं, "मेरी आराधना न केर, ते परमेशरे ज़ेसेरी आराधना कियोरी लोडे। अवं भी परमेशरेरो दास आई, ज़ेन्चरे तू त तेरे विश्वासी साथी आन ज़ैना यीशुएरो अपने प्रभुएरे रूपे मां इकरार केरतन।" ई सच्च्वाई यीशुए बांदी कियोरी ज़ै लोकन शक्ति देती कि परमेशरेरे वचनेरू एलान केरन। 11 फिरी मीं स्वर्ग खल्लू लाव; तैड़ी मेरे सामने छितो घोडो थियो; ते तैस पुइ अक सुवार थियो, ज़ै वफादार, ते झूठ न ज़ोए; ते ज़ैन परमेशरेरी नज़री मां सही आए तैसेरे मुताबिक इन्साफ ते परमेशरेरे दुश्मन सेइं लडाई केरते। 12 तैसेरे एछछी अगारे लपारी ज़ेरि थी, ते तैने बडां ताजां लोरो थियां; ते तैसेरू नवं तैस पुइ लिखोरूए, तैसेरो मतलब सिर्फ तैए ज़ानतो थियो। 13 तैनी खूने मां डुबोरू लिगड लोरो थियू, तैसेरू नवं परमेशेरू वचने। 14 ते स्वर्गरी फौज छिते घोइन पुइ सुवार; ते तैना छिते ते साफ मलमल लेइतां तैस पती पत्तीन। 15 ते कौमी-कौमी मारनेरे लेइ तैसेरे ऐशी मरां अक तिखी तलवार निसतीए, ते तै लोहरे सोटे सेइं तैन पुइ राज़ केरेलो, ते तै सर्वशक्तिमान परमेशरेरे बडे प्रकोपेरी खालिस शराबी सेइं दाछ दलेन्चेलो। 16 ते तैसेरां लिगइन ते जंधी पुइ इन नवं लिखोरूए, "राजां केरो राज़ो ते प्रभुं केरो प्रभु।" 17 फिरी मीं अक स्वर्गदूत दिहाडे पुइ खडो लाव, ते तैने बेइ आवाज़ी सेइं अम्बरे मां उडने बाले च़डोलन सेइं ज़ोवं, "एज्जा परमेशरेरे बडे धामी मां शामिल भोनेरे लेइ अकोट्टे भोथ। 18 ज़ैस सेइं तुस राज़ां, प्रधानां, ताकतबर लोकां, घोडां ते कने तैन केरे सवारां, आजादां, गुलामां, निकडे, बडे, सेब्भी लोकां केरू मास खाथा।" 19 फिरी मीं हैवान लाव ज़ै समुन्द्रे मरां ओरो थियो, ते धेरतलरे राज़े ते कने तैन केरि फौज तैस घोडेरे सुवार ते तैसेरी फौजी सेइं लडनेरे लेइ अकोट्टी लाई। 20 ते तै पेडलो हैवान ते तैस सेइं साथी तै झूठो नबी टूलाव, ज़ैने तैसेरे सामने एरे निशान हिरावरो थियो, ज़ेसेरे ज़िरिये तैने तैना सारे लोक टपलाए, ज़ैनेई तैस हैवानेरी छाप नेवरी थी, ते ज़ैना तैसेरी मूतरी पूजा केरते थिये, इन दुइये ज़ींते तैस अगारे झीली मां छडे जे, ज़ै गन्धके सेइं बलतीए। (Limnē Pyr g3041 g4442) 21 ते बाकी लोक तैस घोडेरे सवारेरी तलवारी सेइं ज़ै तैसेरे ऐशी मरां निस्सती थी मारे जे; ते चुडोलू तैसेरे मासे सेइं रेज़्जी जेआं।

20 फिरी मीं अक स्वर्गदूत स्वर्गोरां एइतो लाव; जेसेरे हथ्ये मां अथाह कुण्डेरी चाबी ते कने अक बड्डी शंगल थी। (Abyssos g12) 2 तेने तै अजगर ट्लाव जै बडे पेइले सप्पेरे रूपे मां लेइहोरो थियो जेसेरू नवं शैतान भी आए। तेने तै ट्लेइतां हज़ार सालेरे लेइ बन्थो। 3 ते तै अथाह कुण्डे मां शैरतां बन्द कियो ते तैस पुड़ मोहर लई; कि तै हज़ार साल पूरे भोने तगर कौमां-कौमां केरे लोकन फिरी न भटकाए; इसेरां पत्ती ज़रूरे, कि थोड़े चिरेरे लेइ खोल्लो गाए। (Abyssos g12) 4 फिरी मीं किछ तखत लाए ते जैना लोक तेन पुड़ बिशोरे थिये ते तैन राज़ केरनेरो अधिकार दित्तो; ते तैन केरि आत्मा भी लेई, जैन केरि क्रोडी एल्हेरेलेइ केटोरी थी कि तेना यीशु मसीह अपनो प्रभु मन्तन ते परमेशरेरे वचने पुड़ विश्वास केरतन, ते जैनेई तैस हैवानेरी, ते तैसेरे मूरतरी पूजा न थी कियोरी, ते तैसेरी महोर अपने कुपाए ते हथ्यन पुड़ न थी। तेना ज़ीते भोइतां मसीह सेइं साथी हज़ार सालन तगर राज़ केरेले। 5 इना लोक पेइले आन जैना ज़ीते किये गाले ते तेना धन ते पवित्र आन। दुइयोवं मीतरी तैन पुड़ कोई शक्ति न भोली। तेना परमेशरेरे लेइ याजक भोले ते मसीह तैन सेइं साथी हज़ार साल राज़ केरेलो, जांतगर तेना हज़ार साल पूरे न भोन तांतगर होरे मरं लोक ज़ीते न किये गाले। 7 जैखन हज़ार साल खतम भोनेबाले भोले तै स्वर्गदूत शैताने तैस ठैरारा हथरां छुडेले जैडी ते बन्थोरो थियो। 8 ते तैन कौमन जैना सैरी दुनियाई मां आन धोखो देनेरे लेइ निस्सेलो। तैन कौमन जो गोग ते मागोग ज़ोतन। शैतान तैन तैस ठैरी आनेलो जैडी ते तैन सेइं लड़ेलो। तैन केरि गिनती समुन्दरेरे रेती बराबर भोली। 9 शैतानेरी फौज सारे दुनियाई मां गाली, तेना तैस नगरे घेरेले जैस सेइं परमेशर प्यार केरते ते जैडी तैसेरे लोक रहतन, परमेशरेरे तरफां स्वर्गोरां अग तैन सेइं भयम केरेली। 10 ते तैन केरो गुमरा केरनेबालो शैतान अग ते गन्धकेरे समुन्दरे मां शारो गालो, जैस मां ते हैवान ते कने झूठो नबी भी भोलो, तेना रात दिहाड़ी हमेशा दुखे मां राले। (aiōn g165, Linnē Pyr g3041 g4442) 11 फिरी मीं अक बड्ठो छितो तखत ते जै तैस पुड़ बिशोरो थियो लाव, जेसेरे सामनेरां धरती ते अम्बर नशू, ते तैन केरे लेइ ठार न मैल्ली। 12 फिरी मीं निकड़े बडे जैना मरं थिये तखतेरे सामने खड़े लाए, ते किताबां खोल्ली जेई; ते फिरी अक होरि किताब खोल्ली; मतलब ज़िन्दगरी किताब खोल्ली; ते ज़ेन्चरे तेन किताबन मां लिखोरू थियूं, तैन केरे कम्मां केरे मुताबिक मुड़दां केरो इन्साफ कियो। 13 ते समुन्द्रे तेना मरं मैन्हु दिते जैना तैस मां थी, ते मौतां ते पाताले जैना तैस मां मरं थिये दिते; ते तैन मरां हर एक्केरो तैन केरे कम्मां केरे मुताबिक इन्साफ कियो। (Hadēs g86) 14 ते मौत ते पाताल भी अगारे समुन्दरे मां शारू, ई अगारो समुन्दरे त दुइयोवं मौते। (Hadēs g86, Linnē Pyr g3041 g4442) 15 ते जेसेरू भी नवं ज़िन्दगरे किताबी मां लिखोरू न मैल्लू, तै अगारे समुन्दरे मां शारो जेव। (Linnē Pyr g3041 g4442)


21 फिरी मीं नंवू अम्बर ते नंव्वी धेरतली लाई, किजोकि पेइलू अम्बर, ते पेइली धेरतली न थी रावरी, ते समुन्दर भी न राव। 2 फिरी मीं पवित्र नगर नंवू यरूशलेम स्वर्गोरां परमेशरे करां एंडतू लाव, ते

तैन तैस लैडारू जेरू थियूं, जै अपने लाडेर लेइ तियार भोरी भोए। 3 फिरी मीं परमेशरेरे तखते मरां कोई उच्चवी आवाज़ी सेइं इन ज़ोते शुनो, “अजेरां बाद परमेशर मैनन् सेइं साथी रालो, ते तैसेरू घर तैन लोकन मां भोलू, ते तेना तैसेरे लोक भोले, ते परमेशर एप्पू तैन, अपने लोकां केरे रूपे मां कबूल केरेलो ते तेना लोक तैस अपनो परमेशर कबूल केरेले। 4 ते तै तैन लोकां केरे एछछी केरां सब ऐंखरू पुछेलो; ते तैट्टां पत्ती मौत न राली, ते न दुःख, न मातम, न मुसीबत राली; पेइली गल्लां बीती जेई।” 5 जै तखते पुड़ बिशोरो थियो तेने ज़ोवं, “कि तक, अवं सब किछ नंवू केरताई।” फिरी तेने ज़ोवं, “कि लिख, किजोकि इना वचन विश्वासेरे काबल ते सच्चे आन।” 6 फिरी तेने मीं सेइं ज़ोवं, “सब किछ पूरू भोवं, अवं अलफा ते ओमेगा, पेइलो ते आखरी आई, अवं ट्लिशोरे ज़िन्दगरे पैनेरे नागन मरां मुखत देइलो। 7 जै ज़ीत हासिल केरे, तैए इन चीजां केरो बारस भोलो; ते अवं तैसेरो परमेशर भोलो, ते तैन मेरू मट्टू भोलू। 8 पन डरपोक, विश्वास न केरनेबाले, भिटे, खूनी, बदमाशी केरनेबाले, जैदू केरने बाले, मूरती केरि पूजा केरनेबाले ते सब झूठां केरो हिस्सो तैस समुन्दरे मां मैलेलो जै अगगी ते गन्धकी सेइं बलतो रहते, ई दुइयोवं मौते।” (Linnē Pyr g3041 g4442) 9 फिरी तैन सत स्वर्गदूतेई जैनेई सत आखरी आफतन सेइं भरोरे कटोरे मैनन् पुड़ उलटावरे थिये, तैन मरां एक्के मीं कां एइतां ज़ोवं, “इरां एई, तीं अवं लैडे जै जल्दी गबडे सेइं इला बनाली हिराताई।” 10 परमेशरेरे आत्मा अवं अपने कैबू मां कियो ते स्वर्गदूते अवं एक्की बड्ठे ते उच्चे पहाड़े पुड़ नेव, ते पवित्र नगर यरूशलेम स्वर्गोरां मरां परमेशरे करां एइतो हिरव। 11 परमेशरेरी महिमा तैस मां थी, ते तैसेरी लौ बडे कीमती घोड़ा, मतलब बिल्लोरेरे जेरे यशबे बराबर साफ थी। 12 तैस नगरेरे चेत्रे पासन बडी उच्चवी दिवार थी, ते तैसेरां 12 दारां ते दारन पुड़ 12 स्वर्गदूत थिये; ते तैन पुड़ इसाएली केरे 12 गोत्रां केरां नव्वां लिखोरां थियां। 13 पूवेरे पासे ट्लाई दारां, उत्तरेरे पासे ट्लाई दारां, दखिनेरे पासे ट्लाई दारां, ते पशिचमेरे पासे ट्लाई दारां थियां। 14 ते नगरेरे दिवारारी 12 मुनीयादां थी, ते तैन पुड़ गबडेर 12 प्रेरितां केरां 12 नव्वां लिखोरां थियां। 15 ते जै मीं सेइं गल्लां केरतो थियो, तैस कां नगर, ते तैसेरे दारन ते तैसेरे दिवारन नापनेरे लेइ अक सोन्नेरो गज़ थियो। 16 ते तैस नगरेरे चेत्र पास थिये, ते तैसेरी लमबाई चोड़ाइअरे बराबर थी, ते तेने तैस गजे सेइं नगर नापू, त सडे 750 कोस निस्सी, ते तैसेरी लमबाई, ते चौड़ाई, ते ऊँचाई बराबर थी। 17 तैसेरां बाद स्वर्गदूते दिवारारी ऊँचाई नापी। तेने एन्चरे नापी ज़ेन्चरे मैन्हु चीजां नापतन, तै दिवार 66 मीटर उच्चवी निस्सी। 18 ते तै दिवार कीमती घोड़न सेइं बनोरी थी जैस जो यशब ज़ोतन, नगर खालिस सोन्ने सेइं बनोरू थियूं, जैन साफ चमकते शीशेरू जेरू भोए। 19 ते तैस नगरेरी मुनीयादारे घोड़ हर किसमेरी कीमती घोड़न सेइं सज़ावरी थी, पेइली मुनीयादा यशबेरी दुइयोवं नीलमणेरी ट्लेइयोवं लालड़ी, चेरवरोवं मरकते, 20 पंजोवं गोदेक, शेइयोवं माणिक्ये, सतोवं पीतमणि, अठोवं पेरोजे, नावोवं पुखराजे, दशोवं लहसनिए, यारोवं धूप्रकान्त, बारोवं याकूतेरी थी। 21 ते 12 दारां,

12 मोती केरां थियां, अक-अक दार, एककी-एककी मोती सेइं बनोरू थियूं, ते नगरेरी सडक साफ शीशेरी जेरि खालिस सोन्नेरी थी। 22 मीं कोई मन्दर न लाव, किजोकि सर्वशक्तिमान प्रभु-परमेशर, ते गबडू तैडी नगरे मां आए। एल्हेरेलेइ मन्देरी कोई ज़रूरत नई। 23 ते तैस नगर मां दिहाडो ते चँदनेरे लोअरी ज़रूरत नई, किजोकि परमेशरेरे महिमा सेइं तैस मां लौ भोइ रावरीए, ते कने गबडू तैसेरो दीयोए। 24 ते कौमां-कौमां केरे लोक तैसेरी लोई मां राले, ते धेरतलरे राजे अपनि-अपनि धन दौलत तैस नगरे मां आनेले। 25 तैस नगरेरां दारां सारे दिहेडी खुल्लां भोलो ते कधी बंद न भोलां। किजोकि तैडी कोई रात न भोली। 26 दुनियारे लोक दुनियारे कौमां केरे सैरी खूबसूत चीजां ते धन दौलत तैस नगरे मां आनेले। 27 ते तैस मां कोई भिट्टी चीज या गन्दु कम केरनेबालो या झूठ बनानेबालो, केन्ची भी तरीके सेइं अन्तर न गालो; पन सिर्फ तैना लोक ज़ैन केरां नव्वां गबडूरे ज़िन्दगरे किताबी मां लिखोरां भोलां।

22 फिरी तैने मीं बिल्लौरैरे जेरो अक चमकतो ज़िन्दगरे धेनेरो दरिया हिराव, ज़ै परमेशरेरे ते गबडूरे तखते करां निस्तां तैस नगरेरी सडकी तगर मझामेई निसतो थियो। 2 ते दरियारे इस पासे ते उस पासे, ज़िन्दगरो बुट थियो, तैस मां 12 किसमां केरे फल लगते थिये, ते तै हर महीने फलतो थियो; ते तैस बुटेरे पट्लान सेइं कौमां-कौमां केरे लोक बेज़्जोते थी। 3 फिरी तैडी लानत न भोली ते परमेशर ते गबडूरो तखत तैस नगर मां भोलो, ते तैसेरे दास तैसेरी सेवा केरेले। 4 ते तैना परमेशरेरे आमने सामने लाएले, ते परमेशेरू नवं तैन केरे कुपाए पुड लिखोरू भोलू। 5 ते फिरी रात न भोली, ते तैन दीयो ते दिहाडेरी ज़रूरत न भोली, किजोकि प्रभु-परमेशर तैन लौ देलो, ते तैना हमेशा राज़ केरेले। (aiōn 9:165) 6 फिरी स्वर्गदूते मीं सेइं ज़ोवं, “इना गल्लां विश्वासेरे काबल ते सच्छीन, ते प्रभु ज़ै नेबी केरे आत्मा केरो परमेशरे, तैने अपने स्वर्गदूत एल्हेरेलेइ भेजे, कि अपने दासन तैना गल्लां ज़ैन केरू जल्दी भोनू ज़रूरीए हिराए।” 7 “हेर, अवं जल्दी एजने बालोई, परमेशर तैन सेबभन बरकत देते ज़ैना इस किताबरे सन्देशे पुड ध्यान देतन।” 8 अवं तैए यूहन्ना आई, ज़ै इना गल्लां शुन्तो, ते लहतो थियो, ते ज़ैखन मीं शुनू, ते लाऊं, त ज़ै स्वर्गदूत मीं इना गल्लां हिरातो थियो, अवं तैस कां मथथो टेकने लाव। 9 ते तैने मीं सेइं ज़ोवं, “हेर, एरू न केर; किजोकि अवं तेरो, ते तेरे विश्वासी सैथी नेबी ते इस किताबरी गल्लां केरे मन्ने बालां केरो संगी दासाई; परमेशरे कां मथथो टेक।” 10 फिरी तैने मीं सेइं ज़ोवं, “इस किताबरे भविष्यवैनरे गल्लन केरो भेद छुपेइतां न रख, किजोकि वक्त नेडोए। 11 ज़ै बुरू केरते, तै बुरू केरतो राए; ते ज़ै भिट्टो, तै भिट्टो बनोरो राए; ते ज़ै धर्मी, तै धर्मी बनोरो राए; ते ज़ै पवित्रे तै पवित्र बनोरो राए।” 12 फिरी प्रभु यीशुए ज़ोवं, “अवं जल्दी एज्जेलो। अवं एज्जी रावरोई ज़ैन लोकेई कियूं तैसेरे मुताबिक इनाम देनेरे लेइ या सज़ा देनेरे लेइ। 13 ‘अवं अलफा ते ओमेगाई, पेइलो ते आखरी, शुरूआत ते अन्त आई।’” 14 धने तै, ज़ै अपना लिगड़ा धोते, किजोकि तैस ज़िन्दगरे बुटे कां एजनेरो अधिकार मैलनोए, ते तै दारां केरे बत्तां गेइतां नगर मां दाखल भोलो। 15

पन कुतरां, जैदू केरनेबाले, बदमाशी केरनेबाले, खून केरनेबाले, मूरती केरि पूजा केरनेबाले, हर कोई झूठेरो चाने बालो, ते कने झूठ बनानेबालो बेइर राले। 16 “मीं यीशुए अपने स्वर्गदूत एल्हेरेलेइ भेजो, कि तुसन अगर कलीसिया मां इन गल्लां केरे बारे मां गवाही दे, अवं दाऊदेरू ज़ील, वंश, ते झेइरो चमकतो तारोई।” 17 परमेशरेरी आत्मा ते गबडूरी लाडी यीशु सेइं ज़ोतिन, “तू ज़रूर एई!” ते शुने बाले भी ज़ोन, “एई!” ज़ै ट्लिशोरो भोए, तै एज्जे ते ज़ै कोई चाए पानी ने ज़ैन मुफते मां ज़िन्दगी देते। 18 अवं हेर एककी ज़ै इस किताबरी भविष्यवैनरी गल्लां शुनते गवाही देताई, कि अगर कोई मैन्हु इन गल्लन मरां किछ बधाए, त परमेशर तैना आफतन ज़ैना इस किताबी मां लिखोरिन, तैस देलो। 19 ते अगर कोई इस भविष्यवैनरी किताबरी किछ गल्लां कढे, त परमेशर तैस ज़िन्दगरे बुटे ते पवित्र नगर मरां जेसेरे बारे मां इस किताबी मांए, तैसेरो हिस्सो कढेलो। 20 ज़ै इन गल्लां केरि गवाही देते, तै इन ज़ोते, “हॉ अवं जल्दी एजने बालोई।” आमीन। हे प्रभु यीशु एई! 21 प्रभु यीशुएरो अनुग्रह परमेशरेरे लोकन सेइं साथी राए। आमीन।



फिरी मीं पवित्र नगर नंवू यरूशलेम स्वर्गें परमेशरे करं एंडतू लाव, ते तैन तैस लैडारू जेरू थियूं, जै अपने लाडेंरे लेइ तियार भोरी भोए। फिरी मीं परमेशरेरे तखते मरां कोई उच्ची आवाज़ी सेइं इन ज़ोते शुनो, “अज़ेरं बाद परमेशर मैनन् सेइं साथी रालो, ते तैसेरू घर तैन लोकन मां भोलू, ते तैना तैसेरे लोक भोले, ते परमेशर एप्पू तैन, अपने लोकां केरे रूपे मां कबूल केरेलो ते तैना लोक तैस अपनो परमेशर कबूल केरेलो।”

प्रकाशित वाक्य 21:2-3

Reader's Guide

भद्रवाही at AionianBible.org/Readers-Guide

The Aionian Bible republishes public domain and Creative Common Bible texts that are 100% free to copy and print. The original translation is unaltered and notes are added to help your study. The notes show the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of afterlife destinies.

Who has the authority to interpret the Bible and examine the underlying Hebrew and Greek words? That is a good question! We read in 1 John 2:27, *"As for you, the anointing which you received from him remains in you, and you do not need for anyone to teach you. But as his anointing teaches you concerning all things, and is true, and is no lie, and even as it taught you, you remain in him."* Every Christian is qualified to interpret the Bible! Now that does not mean we will all agree. Each of us is still growing in our understanding of the truth. However, it does mean that there is no infallible human or tradition to answer all our questions. Instead the Holy Spirit helps each of us to know the truth and grow closer to God and each other.

The Bible is a library with 66 books in the Protestant Canon. The best way to learn God's word is to read entire books. Read the book of Genesis. Read the book of John. Read the entire Bible library. Topical studies and cross-referencing can be good. However, the safest way to understand context and meaning is to read whole Bible books. Chapter and verse numbers were added for convenience in the 16th century, but unfortunately they can cause the Bible to seem like an encyclopedia. The Aionian Bible is formatted with simple verse numbering, minimal notes, and no cross-referencing in order to encourage the reading of Bible books.

Bible reading must also begin with prayer. Any Christian is qualified to interpret the Bible with God's help. However, this freedom is also a responsibility because without the Holy Spirit we cannot interpret accurately. We read in 1 Corinthians 2:13-14, *"And we speak of these things, not with words taught by human wisdom, but with those taught by the Spirit, comparing spiritual things with spiritual things. Now the natural person does not receive the things of the Spirit of God, for they are foolishness to him, and he cannot understand them, because they are spiritually discerned."* So we cannot understand in our natural self, but we can with God's help through prayer.

The Holy Spirit is the best writer and he uses literary devices such as introductions, conclusions, paragraphs, and metaphors. He also writes various genres including historical narrative, prose, and poetry. So Bible study must spiritually discern and understand literature. Pray, read, observe, interpret, and apply. Finally, *"Do your best to present yourself approved by God, a worker who does not need to be ashamed, properly handling the word of truth."* 2 Timothy 2:15. *"God has granted to us his precious and exceedingly great promises; that through these you may become partakers of the divine nature, having escaped from the corruption that is in the world by lust. Yes, and for this very cause adding on your part all diligence, in your faith supply moral excellence; and in moral excellence, knowledge; and in knowledge, self-control; and in self-control patience; and in patience godliness; and in godliness brotherly affection; and in brotherly affection, love. For if these things are yours and abound, they make you to be not idle nor unfruitful to the knowledge of our Lord Jesus Christ,"* 2 Peter 1:4-8.

Glossary

भद्रवाही at AionianBible.org/Glossary

The Aionian Bible un-translates and instead transliterates eleven special words to help us better understand the extent of God's love for individuals and all mankind, and the nature of afterlife destinies. The original translation is unaltered and a note is added to 64 Old Testament and 200 New Testament verses. Compare the meanings below to the Strong's Concordance and Glossary definitions.

Abyssos g12

Greek: proper noun, place

Usage: 9 times in 3 books, 6 chapters, and 9 verses

Meaning:

Temporary prison for special fallen angels such as Apollyon, the Beast, and Satan.

aidios g126

Greek: adjective

Usage: 2 times in Romans 1:20 and Jude 6

Meaning:

Lasting, enduring forever, eternal.

aiōn g165

Greek: noun

Usage: 127 times in 22 books, 75 chapters, and 102 verses

Meaning:

A lifetime or time period with a beginning and end, an era, an age, the completion of which is beyond human perception, but known only to God the creator of the aiōns, Hebrews 1:2. Never meaning simple endless or infinite chronological time in Greek usage. Read Dr. Heleen Keizer and Ramelli and Konstan for proofs.

aiōnios g166

Greek: adjective

Usage: 71 times in 19 books, 44 chapters, and 69 verses

Meaning:

From start to finish, pertaining to the age, lifetime, entirety, complete, or even consummate. Never meaning simple endless or infinite chronological time in Koine Greek usage. Read Dr. Heleen Keizer and Ramelli and Konstan for proofs.

eleēsē g1653

Greek: verb, aorist tense, active voice, subjunctive mood, 3rd person singular

Usage: 1 time in this conjugation, Romans 11:32

Meaning:

To have pity on, to show mercy. Typically, the subjunctive mood indicates possibility, not certainty. However, a subjunctive in a purpose clause is a resulting action as certain as the causal action. The subjunctive in a purpose clause functions as an indicative, not an optative. Thus, the grand conclusion of grace theology in Romans 11:32 must be clarified. God's mercy on all is not a possibility, but a certainty. See ntgreek.org.

Geenna g1067

Greek: proper noun, place

Usage: 12 times in 4 books, 7 chapters, and 12 verses

Meaning:

Valley of Hinnom, Jerusalem's trash dump, a place of ruin, destruction, and judgment in this life, or the next, though not eternal to Jesus' audience.

Hadēs g86

Greek: proper noun, place

Usage: 11 times in 5 books, 9 chapters, and 11 verses

Meaning:

Synonymous with Sheol, though in New Testament usage Hades is the temporal place of punishment for deceased unbelieving mankind, distinct from Paradise for deceased believers.

Limnē Pyr g3041 g4442

Greek: proper noun, place

Usage: Phrase 5 times in the New Testament

Meaning:

Lake of Fire, final punishment for those not named in the Book of Life, prepared for the Devil and his angels, Matthew 25:41.

Sheol h7585

Hebrew: proper noun, place

Usage: 66 times in 17 books, 50 chapters, and 64 verses

Meaning:

The grave or temporal afterlife world of both the righteous and unrighteous, believing and unbelieving, until the general resurrection.

Tartaroō g5020

Greek: proper noun, place

Usage: 1 time in 2 Peter 2:4

Meaning:

Temporary prison for particular fallen angels awaiting final judgment.

Glossary +

AionianBible.org/Bibles/Bhadrawahi---Bhadrawahi-Bible/Noted

Glossary references are below. Strong's Hebrew and Greek number notes are added to 64 Old Testament and 200 New Testament verses. Questioned verse translations do not contain Aionian Glossary words and may wrongly imply *eternal* or *Hell*. * The note placement is skipped or adjusted for verses with non-standard numbering.

Abyssos

लूका 8:31
रोमियों 10:7
प्रकाशित वाक्य 9:1
प्रकाशित वाक्य 9:2
प्रकाशित वाक्य 9:11
प्रकाशित वाक्य 11:7
प्रकाशित वाक्य 17:8
प्रकाशित वाक्य 20:1
प्रकाशित वाक्य 20:3

aidios

रोमियों 1:20
यहूदा 1:6

aiōn

मत्ती 12:32
मत्ती 13:22
मत्ती 13:39
मत्ती 13:40
मत्ती 13:49
मत्ती 21:19
मत्ती 24:3
मत्ती 28:20
मरकुस 3:29
मरकुस 4:19
मरकुस 10:30
मरकुस 11:14
लूका 1:33
लूका 1:55
लूका 1:70
लूका 16:8
लूका 18:30
लूका 20:34
लूका 20:35
यूहन्ना 4:14
यूहन्ना 6:51
यूहन्ना 6:58
यूहन्ना 8:35
यूहन्ना 8:51
यूहन्ना 8:52
यूहन्ना 9:32
यूहन्ना 10:28
यूहन्ना 11:26
यूहन्ना 12:34
यूहन्ना 13:8
यूहन्ना 14:16

प्रेरितों के काम 3:21
प्रेरितों के काम 15:18
रोमियों 1:25
रोमियों 9:5
रोमियों 11:36
रोमियों 12:2
रोमियों 16:27
1 कुरिन्थियों 1:20
1 कुरिन्थियों 2:6
1 कुरिन्थियों 2:7
1 कुरिन्थियों 2:8
1 कुरिन्थियों 3:18
1 कुरिन्थियों 8:13
1 कुरिन्थियों 10:11
2 कुरिन्थियों 4:4
2 कुरिन्थियों 9:9
2 कुरिन्थियों 11:31
गलातियों 1:4
गलातियों 1:5
इफिसियों 1:21
इफिसियों 2:2
इफिसियों 2:7
इफिसियों 3:9
इफिसियों 3:11
इफिसियों 3:21
इफिसियों 6:12
फिलिप्पियों 4:20
कुलुस्सियों 1:26
1 तीमुथियुस 1:17
1 तीमुथियुस 6:17
2 तीमुथियुस 4:10
2 तीमुथियुस 4:18
तीतुस 2:12
इब्रानियों 1:2
इब्रानियों 1:8
इब्रानियों 5:6
इब्रानियों 6:5
इब्रानियों 6:20
इब्रानियों 7:17
इब्रानियों 7:21
इब्रानियों 7:24
इब्रानियों 7:28
इब्रानियों 9:26
इब्रानियों 11:3
इब्रानियों 13:8
इब्रानियों 13:21
1 पतरस 1:23

1 पतरस 1:25
1 पतरस 4:11
1 पतरस 5:11
2 पतरस 3:18
1 यूहन्ना 2:17
2 यूहन्ना 1:2
यहूदा 1:13
यहूदा 1:25
प्रकाशित वाक्य 1:6
प्रकाशित वाक्य 1:18
प्रकाशित वाक्य 4:9
प्रकाशित वाक्य 4:10
प्रकाशित वाक्य 5:13
प्रकाशित वाक्य 7:12
प्रकाशित वाक्य 10:6
प्रकाशित वाक्य 11:15
प्रकाशित वाक्य 14:11
प्रकाशित वाक्य 15:7
प्रकाशित वाक्य 19:3
प्रकाशित वाक्य 20:10
प्रकाशित वाक्य 22:5

aiōnios

मत्ती 18:8
मत्ती 19:16
मत्ती 19:29
मत्ती 25:41
मत्ती 25:46
मरकुस 3:29
मरकुस 10:17
मरकुस 10:30
लूका 10:25
लूका 16:9
लूका 18:18
लूका 18:30
यूहन्ना 3:15
यूहन्ना 3:16
यूहन्ना 3:36
यूहन्ना 4:14
यूहन्ना 4:36
यूहन्ना 5:24
यूहन्ना 5:39
यूहन्ना 6:27
यूहन्ना 6:40
यूहन्ना 6:47
यूहन्ना 6:54
यूहन्ना 6:68

यूहन्ना 10:28
यूहन्ना 12:25
यूहन्ना 12:50
यूहन्ना 17:2
यूहन्ना 17:3
प्रेरितों के काम 13:46
प्रेरितों के काम 13:48
रोमियों 2:7
रोमियों 5:21
रोमियों 6:22
रोमियों 6:23
रोमियों 16:25
रोमियों 16:26
2 कुरिन्थियों 4:17
2 कुरिन्थियों 4:18
2 कुरिन्थियों 5:1
गलातियों 6:8
2 थिस्सलुनीकियों 1:9
2 थिस्सलुनीकियों 2:16
1 तीमुथियुस 1:16
1 तीमुथियुस 6:12
1 तीमुथियुस 6:16
2 तीमुथियुस 1:9
2 तीमुथियुस 2:10
तीतुस 1:2
तीतुस 3:7
फिलेमोन 1:15
इब्रानियों 5:9
इब्रानियों 6:2
इब्रानियों 9:12
इब्रानियों 9:14
इब्रानियों 9:15
इब्रानियों 13:20
1 पतरस 5:10
2 पतरस 1:11
1 यूहन्ना 1:2
1 यूहन्ना 2:25
1 यूहन्ना 3:15
1 यूहन्ना 5:11
1 यूहन्ना 5:13
1 यूहन्ना 5:20
यहूदा 1:7
यहूदा 1:21
प्रकाशित वाक्य 14:6

eleēsē

रोमियों 11:32

Geenna

मत्ती 5:22
मत्ती 5:29
मत्ती 5:30
मत्ती 10:28
मत्ती 18:9
मत्ती 23:15
मत्ती 23:33
मरकुस 9:43

मरकुस 9:45
मरकुस 9:47
लूका 12:5
याकूब 3:6

Hadēs

मत्ती 11:23
मत्ती 16:18
लूका 10:15
लूका 16:23
प्रेरितों के काम 2:27
प्रेरितों के काम 2:31
1 कुरिन्थियों 15:55
प्रकाशित वाक्य 1:18
प्रकाशित वाक्य 6:8
प्रकाशित वाक्य 20:13
प्रकाशित वाक्य 20:14

Limnē Pyr

प्रकाशित वाक्य 19:20
प्रकाशित वाक्य 20:10
प्रकाशित वाक्य 20:14
प्रकाशित वाक्य 20:15
प्रकाशित वाक्य 21:8

Sheol

उत्पत्ति 37:35
उत्पत्ति 42:38
उत्पत्ति 44:29
उत्पत्ति 44:31
गिनती 16:30
गिनती 16:33
व्यवस्था विवरण 32:22
1 शमूएल 2:6
2 शमूएल 22:6
1 राजा 2:6
1 राजा 2:9
अय्यूब 7:9
अय्यूब 11:8
अय्यूब 14:13
अय्यूब 17:13
अय्यूब 17:16
अय्यूब 21:13
अय्यूब 24:19
अय्यूब 26:6

भजन संहिता 6:5
भजन संहिता 9:17
भजन संहिता 16:10
भजन संहिता 18:5
भजन संहिता 30:3
भजन संहिता 31:17
भजन संहिता 49:14
भजन संहिता 49:15
भजन संहिता 55:15
भजन संहिता 86:13
भजन संहिता 88:3
भजन संहिता 89:48


भजन संहिता 116:3
भजन संहिता 139:8
भजन संहिता 141:7
नीतिवचन 1:12
नीतिवचन 5:5
नीतिवचन 7:27
नीतिवचन 9:18
नीतिवचन 15:11
नीतिवचन 15:24
नीतिवचन 23:14
नीतिवचन 27:20
नीतिवचन 30:16
सभोपदेशक 9:10
श्रेष्ठगीत 8:6
यशायाह 5:14
यशायाह 7:11
यशायाह 14:9
यशायाह 14:11
यशायाह 14:15
यशायाह 28:15
यशायाह 28:18
यशायाह 38:10
यशायाह 38:18
यशायाह 57:9
यहेजकेल 31:15
यहेजकेल 31:16
यहेजकेल 31:17
यहेजकेल 32:21
यहेजकेल 32:27
होशे 13:14
आमोस 9:2
योना 2:2
हबक्कूक 2:5

Tartaroō

2 पतरस 2:4


Questioned

None yet noted




विश्वासे सेईं जैखन परमेशरे अब्राहम, जैस जगाईं गाने जो परमेशरे तै कुजोरो थियो, त तै हुक्म मेन्तां तैस जगाईं चलो जेव, जै जगाईं बादे मां परमेशर तैस विरासतरो जेरो देनेबालो थियो।
हालांकी तै एन भी न थियो ज्ञानतो कि अवं कोरां चलोरोई, फिरी भी चलो जेव। - इब्रानियों 11:8

Israel's Exodus



"When Pharaoh had let the people go, God didn't lead them by the way of the land of the Philistines, although that was near; for God said, 'Lest perhaps the people change their minds when they see war, and they return to Egypt!'" Exodus 13:17



किज्जोकि मेनेरु मड्डु, यानी अवं एस दुनियाई मां एल्लेलेइ नई ओरो कि कोई मेरी सेवा केरे, पन एल्लेलेइ ओरोई कि अवं हीरि लोकां केरि सेवा केरि त वनो बडे लोकां केरे लेइ अपनि जान बलियान केरि, ताके तैन अपने पापां केरे सजाई केरां छुटकारो मैल्ले। - मरकुस 10:45



अवं पौलुस यीशु मसीहेरो दास आई, ते प्रेरित भोनेरे लेइ परमेशरे चुनोरोई, ते परमेशेरी खुशखबरी प्रचार केरनेरे लेइ ठहरावरो आई। - रोमियों 1:1

Creation 4004 B.C.

Adam and Eve created	4004
Tubal-cain forges metal	3300
Enoch walks with God	3017
Methuselah dies at age 969	2349
God floods the Earth	2349
Tower of Babel thwarted	2247
Abraham sojourns to Canaan	1922
Jacob moves to Egypt	1706
Moses leads Exodus from Egypt	1491
Gideon judges Israel	1245
Ruth embraces the God of Israel	1168
David installed as King	1055
King Solomon builds the Temple	1018
Elijah defeats Baal's prophets	896
Jonah preaches to Nineveh	800
Assyrians conquer Israelites	721
King Josiah reforms Judah	630
Babylonians capture Judah	605
Persians conquer Babylonians	539
Cyrus frees Jews, rebuilds Temple	537
Nehemiah rebuilds the wall	454
Malachi prophecies the Messiah	416
Greeks conquer Persians	331
Seleucids conquer Greeks	312
Hebrew Bible translated to Greek	250
Maccabees defeat Seleucids	165
Romans subject Judea	63
Herod the Great rules Judea	37

(The Annals of the World, James Uusher)

Jesus Christ born 4 B.C.

New Heavens and Earth

1956	Christ returns for his people
1830	Jim Elliot martyrd in Ecuador
1731	John Williams reaches Polynesia
1614	Zinzendorf leads Moravian mission
1572	Japanese kill 40,000 Christians
1517	Jesuits reach Mexico
1455	Martin Luther leads Reformation
1323	Gutenberg prints first Bible
1276	Franciscans reach Sumatra
1100	Ramon Llull trains missionaries
1054	Crusades tarnish the church
997	The Great Schism
864	Adalbert martyrd in Prussia
716	Bulgarian Prince Boris converts
635	Boniface reaches Germany
569	Alopen reaches China
432	Longinus reaches Alodia / Sudan
397	Saint Patrick reaches Ireland
341	Carthage ratifies Bible Canon
325	Ulfilas reaches Goth / Romania
250	Niceae proclaims God is Trinity
197	Denis reaches Paris, France
70	Tertullian writes Christian literature
61	Titus destroys the Jewish Temple
52	Paul imprisoned in Rome, Italy
39	Thomas reaches Malabar, India
33	Peter reaches Gentile Cornelius
	Holy Spirit empowers the Church

(Wikipedia, Timeline of Christian missions)

Resurrected 33 A.D.

What are we? ▶			Genesis 1:26 - 2:3		Mankind is created in God's image, male and female He created us																																																														
How are we sinful? ▶			Romans 5:12-19		Sin entered the world through Adam and then death through sin																																																														
Where are we? ▶			When are we? ▼																																																																
			Innocence		Fallen			Glory																																																											
▶			Eternity Past	Creation 4004 B.C.	Fall to sin No Law	Moses' Law 1500 B.C.	Christ 33 A.D.	Church Age Kingdom Age	New Heavens and Earth																																																										
			<table border="1"> <tr> <td rowspan="2">God</td> <td>Father</td> <td>John 10:30</td> <td rowspan="6"> Genesis 1:31 God's perfect fellowship with Adam in The Garden of Eden </td> <td colspan="3">1 Timothy 6:16 Living in unapproachable light</td> <td rowspan="6"> Acts 3:21 Philippians 2:11 Revelation 20:3 God's perfectly restored fellowship with all Mankind praising Christ as Lord in the Holy City </td> </tr> <tr> <td>Son</td> <td>God's perfect fellowship</td> <td colspan="2">John 8:58 Pre-incarnate</td> <td>John 1:14 Incarnate</td> <td>Luke 23:43 Paradise</td> </tr> <tr> <td>Holy Spirit</td> <td></td> <td></td> <td colspan="2">Psalm 139:7 Everywhere</td> <td colspan="2">John 14:17 Living in believers</td> </tr> <tr> <td rowspan="3">Mankind</td> <td>Living</td> <td rowspan="6"> Genesis 1:1 No Creation No people </td> <td colspan="3">Ephesians 2:1-5 Serving the Savior or Satan on Earth</td> </tr> <tr> <td>Deceased believing</td> <td colspan="3">Luke 16:22 Blessed in Paradise</td> </tr> <tr> <td>Deceased unbelieving</td> <td colspan="3">Luke 16:23, Revelation 20:5,13 Punished in Hades until the final judgment</td> </tr> <tr> <td rowspan="4">Angels</td> <td>Holy</td> <td colspan="3">Hebrews 1:14 Serving mankind at God's command</td> </tr> <tr> <td>Imprisoned</td> <td colspan="3">2 Peter 2:4, Jude 6 Imprisoned in Tartarus</td> </tr> <tr> <td>Fugitive</td> <td colspan="2" rowspan="3"> Genesis 1:31 No Fall No unholy Angels </td> <td>Revelation 20:13 Thalaasa</td> <td rowspan="4"> Matthew 25:41 Revelation 20:10 Lake of Fire prepared for the Devil and his Angels </td> </tr> <tr> <td>First Beast</td> <td colspan="2">1 Peter 5:8, Revelation 12:10</td> </tr> <tr> <td>False Prophet</td> <td colspan="2">Rebelling against Christ Accusing mankind</td> </tr> <tr> <td>Satan</td> <td></td> <td colspan="2">Revelation 19:20 Lake of Fire</td> </tr> <tr> <td colspan="2"></td> <td></td> <td colspan="2">Revelation 20:2 Abbyss</td> <td></td> </tr> </table>		God	Father	John 10:30	Genesis 1:31 God's perfect fellowship with Adam in The Garden of Eden	1 Timothy 6:16 Living in unapproachable light			Acts 3:21 Philippians 2:11 Revelation 20:3 God's perfectly restored fellowship with all Mankind praising Christ as Lord in the Holy City	Son	God's perfect fellowship	John 8:58 Pre-incarnate		John 1:14 Incarnate	Luke 23:43 Paradise	Holy Spirit			Psalm 139:7 Everywhere		John 14:17 Living in believers		Mankind	Living	Genesis 1:1 No Creation No people	Ephesians 2:1-5 Serving the Savior or Satan on Earth			Deceased believing	Luke 16:22 Blessed in Paradise			Deceased unbelieving	Luke 16:23, Revelation 20:5,13 Punished in Hades until the final judgment			Angels	Holy	Hebrews 1:14 Serving mankind at God's command			Imprisoned	2 Peter 2:4, Jude 6 Imprisoned in Tartarus			Fugitive	Genesis 1:31 No Fall No unholy Angels		Revelation 20:13 Thalaasa	Matthew 25:41 Revelation 20:10 Lake of Fire prepared for the Devil and his Angels	First Beast	1 Peter 5:8, Revelation 12:10		False Prophet	Rebelling against Christ Accusing mankind		Satan		Revelation 19:20 Lake of Fire					Revelation 20:2 Abbyss
God	Father	John 10:30	Genesis 1:31 God's perfect fellowship with Adam in The Garden of Eden	1 Timothy 6:16 Living in unapproachable light			Acts 3:21 Philippians 2:11 Revelation 20:3 God's perfectly restored fellowship with all Mankind praising Christ as Lord in the Holy City																																																												
	Son	God's perfect fellowship		John 8:58 Pre-incarnate		John 1:14 Incarnate			Luke 23:43 Paradise																																																										
Holy Spirit				Psalm 139:7 Everywhere		John 14:17 Living in believers																																																													
Mankind	Living	Genesis 1:1 No Creation No people		Ephesians 2:1-5 Serving the Savior or Satan on Earth																																																															
	Deceased believing			Luke 16:22 Blessed in Paradise																																																															
	Deceased unbelieving			Luke 16:23, Revelation 20:5,13 Punished in Hades until the final judgment																																																															
Angels	Holy		Hebrews 1:14 Serving mankind at God's command																																																																
	Imprisoned		2 Peter 2:4, Jude 6 Imprisoned in Tartarus																																																																
	Fugitive		Genesis 1:31 No Fall No unholy Angels		Revelation 20:13 Thalaasa	Matthew 25:41 Revelation 20:10 Lake of Fire prepared for the Devil and his Angels																																																													
	First Beast	1 Peter 5:8, Revelation 12:10																																																																	
False Prophet	Rebelling against Christ Accusing mankind																																																																		
Satan		Revelation 19:20 Lake of Fire																																																																	
			Revelation 20:2 Abbyss																																																																
Why are we? ▶			Romans 11:25-36, Ephesian 2:7		For God has bound all over to disobedience in order to show mercy to all																																																														

Destiny

भद्रवाही at AionianBible.org/Destiny

The Aionian Bible shows the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of after-life destinies. The underlying Hebrew and Greek words typically translated as *Hell* show us that there are not just two after-life destinies, Heaven or Hell. Instead, there are a number of different locations, each with different purposes, different durations, and different inhabitants. Locations include 1) Old Testament *Sheol* and New Testament *Hadēs*, 2) *Geenna*, 3) *Tartaroō*, 4) *Abyssos*, 5) *Limnē Pyr*, 6) *Paradise*, 7) *The New Heaven*, and 8) *The New Earth*. So there is reason to review our conclusions about the destinies of redeemed mankind and fallen angels.

The key observation is that fallen angels will be present at the final judgment, 2 Peter 2:4 and Jude 6. Traditionally, we understand the separation of the Sheep and the Goats at the final judgment to divide believing from unbelieving mankind, Matthew 25:31-46 and Revelation 20:11-15. However, the presence of fallen angels alternatively suggests that Jesus is separating redeemed mankind from the fallen angels. We do know that Jesus is the helper of mankind and not the helper of the Devil, Hebrews 2. We also know that Jesus has atoned for the sins of all mankind, both believer and unbeliever alike, 1 John 2:1-2. Deceased believers are rewarded in Paradise, Luke 23:43, while unbelievers are punished in Hades as the story of Lazarus makes plain, Luke 16:19-31. Yet less commonly known, the punishment of this selfish man and all unbelievers is before the final judgment, is temporal, and is punctuated when Hades is evacuated, Revelation 20:13. So is there hope beyond Hades for unbelieving mankind? Jesus promised, *"the gates of Hades will not prevail,"* Matthew 16:18. Paul asks, *"Hades where is your victory?"* 1 Corinthians 15:55. John wrote, *"Hades gives up,"* Revelation 20:13.

Jesus comforts us saying, *"Do not be afraid,"* because he holds the keys to *unlock* death and Hades, Revelation 1:18. Yet too often our *Good News* sounds like a warning to *"be afraid"* because Jesus holds the keys to *lock* Hades! Wow, we have it backwards! Hades will be evacuated! And to guarantee hope, once emptied, Hades is thrown into the Lake of Fire, never needed again, Revelation 20:14.

Finally, we read that anyone whose name is not written in the Book of Life is thrown into the Lake of Fire, the second death, with no exit ever mentioned or promised, Revelation 21:1-8. So are those evacuated from Hades then, *"out of the frying pan, into the fire?"* Certainly, the Lake of Fire is the destiny of the Goats. But, do not be afraid. Instead, read the Bible's explicit mention of the purpose of the Lake of Fire and the identity of the Goats, *"Then he will say also to those on the left hand, 'Depart from me, you cursed, into the consummate fire which is prepared for... the devil and his angels,'"* Matthew 25:41. Bad news for the Devil. Good news for all mankind!

Faith is not a pen to write your own name in the Book of Life. Instead, faith is the glasses to see that the love of Christ for all mankind has already written our names in Heaven. Jesus said, *"You did not choose me, but I chose you,"* John 15:16. Though unbelievers will suffer regrettable punishment in Hades, redeemed mankind will never enter the Lake of Fire, prepared for the devil and his angels. And as God promised, all mankind will worship Christ together forever, Philipians 2:9-11.



एल्हेरेलेइ तुस गाथ ते सैरी कौमां केरे लोकन चले बनाथ, ते तैन बाजी, ते मट्टेरे, ते पवित्र आत्मारे नंवे सेइं बपतिस्मो देथ। - मत्ती 28:19